


Mbia Cheẽ



New Testament in Sirionó (BL:srq:Sirionó)

Mbia Cheẽ
New Testament in Sirionó (BL:srq:Sirionó)

copyright © 1977 Wycliffe Bible Translators, Inc.

Language: Sirionó

Translation by: Wycliffe Bible Translators, Inc.

Sirionó [srq], Bolivia

Copyright Information

© 1977, Liga Bíblica Mundial del Hogar. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sirionó

© 1977, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

| | |
|----------------------------|-----|
| SAN MATEO | 1 |
| SAN MARCOS | 48 |
| SAN LUCAS | 77 |
| SAN JUAN | 127 |
| HECHOS | 163 |
| ROMANOS | 213 |
| 1 CORINTIOS | 235 |
| 2 CORINTIOS | 256 |
| GÁLATAS | 269 |
| EFESIOS | 277 |
| FILIPENSES | 284 |
| COLOSENSES | 289 |
| 1 TESALONICENSES | 294 |
| 1 TESALONICENSES | 299 |
| 1 TIMOTEO | 302 |
| 2 TIMOTEO | 308 |
| TITO | 312 |
| FILEMÓN | 315 |
| HEBREOS | 317 |
| SANTIAGO | 333 |
| 1 PEDRO | 339 |
| 2 PEDRO | 345 |
| 1 JUAN | 349 |
| 2 JUAN | 354 |
| 3 JUAN | 355 |
| JUDAS | 356 |
| APOCALIPSIS | 358 |

EL SANTO EVANGELIO SEGÚN SAN MATEO

Jesucristo i ñiinda amei

¹ Ñ ndei Jesucristo i ñiinda ã. David rei ei tuchi. Abraham abe no.

² Abraham ndei Isaac ndu. Isaac ndei Jacob ndu no. Jacob ndei Judá ru no. Judá nongue abe ru. ³ Judá rei Fares ndu. Zara ru abe no. (Tamar rei ũquĩsi.) Fares ndei Esrom ndu. Esrom ndei Aram ndu. ⁴ Aram ndei Aminadab ndu. Aminadab ndei Naasón ndu. Naasón ndei Salmón ndu. ⁵ Salmón ndei Booz ndu. (Rahab ndei esi.) Booz ndei Obed ndu. (Rut rei esi.) Obed ndei Isaí ru. ⁶ Isaí rei David ndu. David ndei ererecua. David ndei Salomón ndu. (Urías ninisi rei esi.) ⁷ Salomón ndei Roboam ndu. Roboam ndei Abías ru. Abías rei Asa ru. ⁸ Asa rei Josafat ndu. Josafat ndei Joram ndu. Joram ndei Uzías ru. ⁹ Uzías rei Jotam ndu. Jotam ndei Acáz ru. Acáz rei Ezequías ru. ¹⁰ Ezequías rei Manasés ru. Manasés rei Amón ndu. Amón ndei Josías ru. ¹¹ Josías rei Jeconías ru. Jeconías nongue abe ru. Ũquĩ ngue siqui abae judíos rerao mose Babilóniaa nda.

¹² Jeconías rei Salatiel ndu no. Salatiel ndei Zorobabel ndu. ¹³ Zorobabel ndei Abiud ndu. Abiud ndei Eliaquim ndu. Eliaquim ndei Azor ndu. ¹⁴ Azor ndei Sadoc ndu. Sadoc ndei Aquim ndu. Aquim ndei Eliud ndu. ¹⁵ Eliud ndei Eleazar ndu. Eleazar ndei Matán ndu. Matán ndei Jacob ndu. ¹⁶ Jacob ndei José ru. José quia María quereco nguiã. María rei Jesús si. Cristo, i equia ee.

¹⁷ Nyebe cator ce generaciones jaaja. Sã Abraham nane siqui no. David siqui mose, catorce generaciones cote. Abae judíos rerao mose Babilóniaa, catorce que aque abe mose cote ra. Cristo nyaacuquia mose que catorce aque mose cot e no nda.

Jesucristo nyaacuquia mose

¹⁸ Jesucristo chaacuquia tasenei na jêje. María rei esi. María que siquichõ ndei quia José ninisirã nda. Nyucuaaque ru eã ngue siqui rei ra. Nguirĩ ngue eteachõ nguie ye ra. Siquiã ndaque José rese. Espiritu Turã ae que eririĩ mondo erie ye ra. ¹⁹ José turãte que eriqui rei ra. Eireĩte que eriqui mae María rio rese ra. — Seninisirã eã nda cote reae. Ahui rei ra esi mbia mbiiranua ndeae, i rei que ndua ndua uchi angui re ra. María siqui rei nguia emo ndese ee reaẽ. ²⁰ José que ndua ndua quia erese ra. Ndua ndua mose que ángel mo ndu eque re cuu ra. Angel que ñee ee ra. — David ririĩ ño nde re. María eisi turã ño neninisirã. ¡Ndeireĩ ngũiã ño jê! Emo ngue siqui ate quia erese ra. Espiritu Turã ae que eririĩ mondo erie ye ra. ²¹ Nguiriĩ nda etea. “Jesús” ere chõ eririĩ je. Ae quia ra mbia sirõ tuchi eicuã si, i que ángel ñee José je cuu ra. ²² Eĩ nda Dios cheẽ io cote. Ae Dios cheẽ mbuchecuaşa mbesa cose nae, ũquĩ nda io cote. Ñ ndei embesa ji ã:

²³ ¡Sã jê! Nyucuaaque ruã nda nguiiriĩ tea.

Emanuel, i ra eririĩ je.

Dios riqui nanderese co, i ñi Emanuel nde, i que embesa ji cose ra.

²⁴ José que ñumumba cote ra. Angel cheẽ ndu si que María rerequia turã cote ra. ²⁵ José que siqui eã mbei erese ra. Nguiriĩ ndea chee. Jesús i que José eririĩ je ra.

2

Mbia aquiatu nyoĩ Jesús itãquieĩ ndea

¹ Jesús que nyaacuquia Belén nda. Judea, i que hue ibi je ra. Herodes rei hue jenda mbia rerecua Jesús nyaacuquia mose. Mbia aquiatu mo ngue ngaẽ huee ra. Tenda semba si que ecuaẽ Jerusalén nda. ² Ũquĩ ngue ñee ngaẽ judíos je ra. —¿Mangue judíos rerecua mangue re? Ae nyaacuquia ramo nae ¿mangue mangue re? Ure-mae ngue nyasitata embae rese ra.

Ureico mose ure récuua. Nyebe urechu nguiã erea co. Urecoi rã urenia ndese ñee ee. ¿Ma eriqui ma nde? i que mbia aquiatu ñee judíos je ra. ³ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ⁴ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra nyaacuquia” ¿i embesa ji re? i que Herodes ñee ee ra. ⁵ Ñquĩ ngue ñee Herodes je ra. —Nyaacuquia ra Belén de Judea. I que embesa ji ra:

⁶ Sucha ñetẽ tuchi rei Belén. Belén de Judea.

Mbia chiicua tuchi ra Belén cote. Hue jenda mo nda mbia rerecuarã tuchi cote.

Ae ra serimba Israel jenda teaquiato tuchi quia cote, i que Dios cheẽ embesa ji ra, i que sacerdotes ñee Herodes je ra.

⁷ Nyebe Herodes “jenyu” i nguiã ñquĩ mbia aquiato je. Ñee ngue ñquĩ ísaa ra. —¿Manosete nyasitata embae rese jemaẽ nde? i que ñee ee ra. ⁸ Herodes que ñquĩ mbia aquiato mondochoi Belén cote ra. —Jẽso Belén. Nyaacuquia ramo je rese jẽirandu tuchi. Jẽ erea mose, sembiirandu se. I nda se abe aso mae erese. I nda acoi senia ndese se abe ñee ee, i rei que Herodes ñee ee ra.

⁹ Mbia aquiato que nyoĩ cote ra. Ae nyasitata rese eriqui mae nyii nae, aque nyasitata que oso bei quia mbia rẽta ra. Tiba que ee Belén arõ cote ra.

¹⁰ Nyebe mbia aquiato ia tuchi nguiã mae mose nyasitata tiba rese cote.

¹¹ Mbia aquiato que ique tuchúaa cote ra. Huee que ãquẽ itãquieĩ ndiqui ee cote ra. Usi rese. María, i equia ee. Ngoi que nguiã ndese eitãquieĩ je cote ra. Ñee turã ngue ee ra. Mbae que esirõ mondo Jesús je cote ra. Oro. Mbae mbushimbusa abe no. Mirra abe no. ¹² Dios que ñee mbia aquiato je cote ra. —Jẽsochĩ nda ñee Herodes

mbiirandu jẽ, i que Dios ñee ee cuu ra. Nyebe echoi nguiã Herodes abi nguécuaa.

José nyoĩ uchã Egíptoo

¹³ Aquere que Dio s ángel mo mondo ñee José je ra. Ñee ngue ee cuu ra. —Herodes ra eitãquieĩ sequia sequia. Iquia serite equia co. Jẽso uchã. ãquẽ jendao sunuña Egíptoo. Esi rese. Huee jẽingochõ. Acheẽ jee ra ndeje huee, i que Dios ñee José je ra.

¹⁴ José que ñumumba juã cote ra. ãquẽ ngue ecuruchoi isa usi rese ra. Nyoĩ que Egíptoo quiti ra. ¹⁵ Chi arete que Egíptoo ra. Ererecua Herodes que mano cote ra. Dios cheẽ ngue ique cote ra. Eĩ ngue Dios cheẽ embesa ji ra:

Seriirĩ ngue aru Egíptoo si ra, i que embesa ji ra.

Herodes ãquẽ itãquieĩ iquia ja

¹⁶ Herodes que paama i tuchi cote ra. —Mbia aquiato sembiirĩ irĩ ñochĩ. Nyebiã ñochĩ ecuaẽ ñee seje, i que ra. Nyebe que soldados mondo mbia ririirĩ nacuẽ iquia ja cote ra. ãquẽ itãquieĩ ngu e eiquia iquia ja quia Belén jenda ra. Hue rurubinda ja abe no. Ngata ramo je abe iquia ja. Nyasitata nyecua quia mbia je nae, aque mosenda ãquẽ itãquieĩ iquia ja. ¹⁷ Herodes ñquĩ iquia mose que Dios cheẽ ique cote ra. Ae Jeremías mbesa quia:

¹⁸ Mbia Ramá jenda nyeseo tuchi.

Eya eã tuchi nguiirĩ ndese.

Emo embia aroneãte.

Eriirĩ nguia mano jate nguiã ee, i que embesa ji ra.

¹⁹ José chi mose Egíptoo que Herodes mano nyee ra. Nyebe Dios ángel mo mondo nguiã ñe e José je. ²⁰ —José, echumumba rã. Jẽso Israel cote. ãquẽ abe erao. Esi rese. Ae ãquẽ iquia serite quia nae, ñquĩ ngue mano cote ra, i que ángel ñee José je cuu ra.

²¹ José que ñumumba cote ra. Nyoĩ que nyebi Israel quiti cote ra. ãquẽ ngue equerao esi rese ra. ²² Herodes ririirĩ ngue siqui Judea jenda rerecuarã

cote ra. Arquelaos, i que ee ra. José jirandu mose erese que esiquiche cote ra. Oso sereãte que huee cote ra. Dios que ñee ee cuu ra. Nyebe esi nguiã Galilea cote. ²³Sucha tubiriã mo ngue chi Galiléaa ra. Nazaret, i que hue je ra. José que nyo i bei hue, hue jendarã cote ra. Nyebe Dios cheẽ mbesa ji ique nguiã cote. I ngue Dios cheẽ nda: Nazaret jenda ra Jesús, i que Dios cheẽ nda.

3

Juan el Bautista Dios chẽ senei senei

¹Emo mose que Juan el Bautista Dios cheẽ nenei nenei mbia je cote ra. Dios cheẽ ngue esenei senei nguia mbia je turúquiaa ra. ²—Jendua si jẽicuã ndese. Jendua si Dios rese. Dios ra tu mbia rerecuarã tuchi cote, i beite que Juan nguia ñee nda. ³Sã Isaías embesa nyii no:

Emo ndiqui ñeemombo mombo turúquiaa huee.

“Sã emo ndiqui ñeenda mbuquiche no, eĩ jenyee si chõ nguia jẽ abe icoquiatsu nandererecua je”, i equia turúquiaa hue,

i que Isaías embesa ra. Juan nĩ si que embesa ra. ⁴Quiicuã mbuaera chõ ngue Juan irao ra. Mbae ire chõ ngue enumbicuaa no nda. Tucu mbuae chõ ngue eu quia no nda. Irao quiaa rĩnda abe. ⁵Jerusalén jenda que ngaẽ ngaẽ tuchi quia echeẽ andu ra. Judea jenda abe no. Ama Jordán nimia nduinda abe no. ⁶Mbia huicuã nenei nenei mose Dios je, uqui mose que Juan ndiqui bautizar i ee ra. Ama Jordán ye.

⁷Fariseos tubiriã abe que ngaẽ ngaẽ tuchi quia Juan ndea ra. Sardu ceos tubiriã abe no. Juan ngue ñee asite uqui je ra. —Mbei rã ño jẽingo nguiã ã. Mbae icuã nda tu mbia je nae, ¿uqui nĩ ño jenyu quia uchã serea co re? ⁸Jẽ mbae icuã ndecha mose Dios je, mbae turã jesaã saã mbei quiatu quia ee cote. ⁹“Abraham ndiirĩ nducucha chõ nande re. Nyebe ra Dios nandemingo bei” jjenyechĩ

nda jẽ! Dios Abraham ndiirĩ nducucha chao arõte raque sita je. ¹⁰Ira rã si chõ mbia riqui nguiã ã. Sã ira mo ndiqui ia turã no. Sã emo ndiqui ia eã no. Aque quia ra mbia maña cote. Erei sacua. Eĩ serĩ serĩ ño Dios nguiã mbia je co, mbia mbae turã naa eã mose.

¹¹I je chõ aico nguiã bautizar i mbia je co. Jẽ ndua ndua si mose Dios rese. Co chi emo ndu quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espiritu Turã je. Mbia chiã mbitirõ sacua. Sã tata riqui mbae mbitirõ no. ¹²Ae ra mbia umbae mĩ icúe. Eturã achõ ño embae re. Ae embae eã nae, uqui nda eséi cote. Uqui ndeisa ra ua eã mbei tata. Sã mbia quiata a chiqui chiqui no. Sã ea mĩ icúe no. Sã echuruique mombo tátaa no, i que Juan ñee mbia je ra.

Juan bautizar i Jesús je

¹³Jesús que tu Galilea si cote ra. Tu que Juan ndea Ama Jordán nda. Juan bautizar i sacua ee. ¹⁴Juan ngue teã teã ndei ee ra. —¿Mañi ae ra bautizar i ndeje re? Nde chõ bautizar ere seje ae, i rei que Juan ñee Jesús je ra. ¹⁵Jesús que ñee ee ra. —Bautizar ere rei seje. Dios cheẽ ndui si mbae nandesaã turã ja quia, i que Jesús ee ra. Juan ngue eno i chee ee ra. ¹⁶Juan ngue bautizar i ee ra. Jesús que usẽ oso ama si cote ra. Ibei que nyiequia ee cote ra. Espiritu Turã ngue nguichi nyurushi rã nda. Nguichi que eu Jesús rese ra. ¹⁷Ibei jenda que ñee nda. —Seriirĩ ño co re. Sechesequa chõ co re. Seyate erese, i que Dios ñee Jesús je ra.

4

Jesús tambĩcuã, i raque Satanás

¹Turúquiaa que Espiritu Turã Jesús rerao ra. “Tã tae Jesús je”, i sacua diablo Jesús je. ²Huee que Jesús riqui arete ra. Cuarenta días. Mbae mo ngue eu eã mbei aque mose ra. Eriãcuãte que cote ra. ³Aque mose tuchi que diablo si ee ra. Embĩcuã sacua. —Nde Dios riirĩ

mose, mbichae esaã ã sita je. † nda ereu, i rei que diablo ñee ee ra. ⁴ Jesús que ñee ee ra. —Tei. Sã embesa ji ñee no: “Mbia chiu achõ nda mbia mingo eã. Dios cheẽ nguia ra mbia mingo nguiã”, i que embesa ji ra, i que Jesús ee ra. ⁵ Aquere que diablo ererao Jerusalén nda. Querao que suruchui ibate Dios chuchua arõ nda. ⁶ Ñee ngue Jesús je ibate ereco mose ra. —Nde Dios riirĩ mose, eo oso íbii no. Dios ra ndereaquiату. Sã embesa ji riqui i ñee no:

Dios ra ángeles mondo ndereaquiату sacuã.

Oje ra ndeisi. Nembuquichi mingue rae.

Sita ra cua iã ndei je, i que embesa ji ra, i rei que diablo ñee Jesús je ra. ⁷ Jesús que ñee diablo je ra. —Sã embesa ji ñee no: “Ma Dios sereaquiату. Tã tae ee no’, jenyechĩ nda Dios je”, i ñi Dios cheẽ nde, i que Jesús ñee diablo je ra. ⁸ Aquere que diablo ererao ibi ibate mo nda. Ibate tuchi ererao cote. Diablo que ibi teacuquia ja ee ra. Ishonda abe reacuquia ja ee. ⁹ Diablo que ñee ee ra. —Sembae ja chõ ibi re. Ibi turã ja. Ndeico mose serese, tamondo ja ndeje. Serimbarã mose nde, tamondo ja ndeje, i rei que diablo ñee Jesús je ra. ¹⁰ Jesús que ñee ee ra. —Quiatúae sesi ae, Satanás. ¿Mañi nda se nderimbarã nde? “Dios ae rese chõ jeingo”, i que embesa ji ñee ndesẽ, i que Jesús ee ra. ¹¹ Diablo que oso erecha cote ra. Angeles que ngaẽ Jesús reaquiату cote ra.

Jesús mbia mbaaquiату quiату ramo

¹²⁻¹³ Aquere mose que mbia rerecua Juan tarõ cárcel nda. Jesús jirandu mose etarõ ndese que esi Galilea cote ra. Nazaret, i que sucha tubiriã je ra. Aquere que esi siri Capernaum cote ra. Ama ndisha ji. Zabulón abe ji. Neftalí abe ji. Huee que Jesús si siri ra. ¹⁴ Isaías chimbese Dios cheẽ ngue ique cote ra. Jesús siqui mose huee. Eĩ ngue Isaías embesa cose ra:

¹⁵⁻¹⁶ Mbia hue jenda ja que siqui itondáruu nyii ra.

Zabulón jenda. Neftalí jenda.

Ama ndisha ji jenda.

Ama Jordán ndobeinda.

Ae judíos eã Galilea jenda nae, ùquĩ abe no.

Ùquĩ mbia que siqui ja rei itondáruu nyii ra.

Nyaashĩ ngue tu ee cote ra,

i que Isaías embesa ra. ¹⁷ Aquere mose bei chõ ngue Jesús riqui ñee mbia je cote ra. —Jendua si Dios rese. Mbia rerecuarã tuchi ra Dios namo jiri, i que Jesús quia ñee mbei mbia je cote ra.

Jẽingo serui, i Jesús uchimbaaquiaturũ je

¹⁸ Emo mose que Jesús si quia ama nimia ndui ra. Ama Ndisha Galilea. Huee que mae Simón Pedro rese ra. Enongue rese abe que mae nda. Andrés, i equia ee. I que eu sira mbuasa mondo mondo ii ra. Sira resenda bei rei ùquĩ. ¹⁹ Jesús que ñee ee ra. —Serui bei chõ jẽingo jẽ! Taembaaquiату quiату. Mbia teendu endu bei quia seje cote, i que Jesús ee ra. ²⁰ Nyoĩ ja que erui ra. Sira mbuasa si que echoĩ hui ra. ²¹ Pe jiri que mae Jacobo rese ra. Enongue rese abe. Juan, i equia ee. Eru abe que siqui erese ra. Zebedeo, i equia ee. Huee que echi ja canoa ye sira mbuasa mbitirõ tirõ nda. —Jẽingo serui, i que Jesús Jacobo je ra. Juan je abe. ²² Jesús cheẽ nduibe tuchi que echoĩ erui ra. Canoa ndecha. Ngu abe recha.

Jesús mbia tubiriã mbaaquiату

²³ Jesús que ngata tuchi quia Galilea rĩ nda. Mbia que embaaquiату quiату quia mbia chumunua nuásaa ra. Dios cheẽ turã ngue esenei senei nguia ee ra. Mbia rasi chumumbara que embucherõ cherõ nguia ra. ²⁴ Mbia Siri a jenda que jirandu tuchite chee erese ra. Nyebe eriqui nguiã erasi rurucuaẽ cuaẽ jate ee. Erasi chumumbara. Mbia aba checuayã nyireco abe no. Mbia quiachã quiachã je abe no. Mbia umi

sayã je abe no. Jesús que embucherõ cherõ ja quia ra. ²⁵ Mbia tubiriã tuchi que siqui Jesús rui cote ra. Galilea jenda. Decápolis jenda abe no. Jerusalén jenda abe no. Judea jenda abe no. Ama Jordán ndobeinda abe no. Uquĩ jenda siqui ja Jesús rui.

5

Jesús mbia mbaaquiato quiato ibi ibate

¹ Mbia tubiriã ngu e chi Jesús rese ra. Nyebe Jesús nyui nguiã ibi ibate mo ndese ra. Ngoi que huee ra. Echimbaaquiato que esichã ngaẽ nda. ² Jesús que embaaquiato quiato ra.

Ae eyate riqui

³ Eĩ ngue ñee ee ra:

—Ae siqui mingue quia nae, eya chõ ùquĩ nde. Ùquĩ nda siqui Dios rese.

⁴ Ae nyeseo quia nae, eya chõ ùquĩ nde. Dios ra embia tuchi.

⁵ Ae eseteãte riqui nae, eya chõ ùquĩ nde. Ibi ja ra embae cote.

⁶ Ae siqui turã sete quia nae, eya chõ ùquĩ nde. Dios ra embucuata turã nguia.

⁷ Ae eya eãte riqui mbia rese nae, eya chõ ùquĩ nde. Dios ia eãte ra ùquĩ ndese.

⁸ Ae echiã turãte riqui nae, eya chõ ùquĩ nde. Ùquĩ nda mae Dios rese.

⁹ Ae mbia mingo turã nguia nyiese nae, eya chõ ùquĩ nde. “Seriirĩ” i ra Dios ùquĩ je.

¹⁰ Mbia icuã icuã mose jêturã je, jêya tuchi rae. Jenderecua tuchi chõ Dios riqui nguiã co.

¹¹ Mbia ñee icuã mose jêje serĩ, jêya tuchi rae. Mbia icuã icuã mose jêje serĩ. Mbia ñee ñooño mose jeni, jêya tuchi rae. ¹² Jeñimbia chõ nguia ùquĩ mose. Dios quia ra mbae turã tuchi mondo jêje ibate. Mbia icuã icuande jêje nyii. Eĩ ngue mbia icuã icuã nguia Dios rimba je nyii no nda.

Tata rendi rã ndei Dios quiato

¹³ Embiquesa rã ño jêingo nguiã mbia je ã. Sã embiquesa turãte no.

Eise quiachamba mose, eicuã tuchi ra cote. Mbia ra emombo chõ cote. Mbia ra irõ ño erese. ¹⁴ Tata rã ño jêingo nguiã mbia Dios quiatoã je ã. Mbia sucha cuasu raã mose ibi ibátee, mbia ra mae ja erese. ¹⁵ Sã nandeico lámpara mendi no. Sã nandeico eati eã no. Sã nandeico emi eã mbaequi re no. Erendi checua chõ nda nandemĩ nguiã. Mbia resae ja sacua. ¹⁶ Eĩ jenye si chõ nguia tata turã na. Mbae resae turã mbia je. Eĩ jenye mose ra mbia mae jêturã ndese. Ñee turã nda jendu ibatenda je cote.

Jesús mbia mbaaquiato quiato Moisés chimbese rĩ

¹⁷ Dios cheẽ ique ja sacua ño achu nguiã co. Moisés cheẽ mbutiã sacua eã ño ngue achu nguiã. Dios cheẽ mbuchecuasa cheẽ mbutiã sacua eã ño ngue achu nguiã. ¹⁸ Tacheẽ nyecua jêje. Moisés cheẽ nda ique ja. Ibei ra ua. Ibi abe ra ua no. Moisés cheẽ nguia ra ua eã mbei. Ique ja chee rae. ¹⁹ Dios cheẽ tubiriãte raque mbia je, mbia echeẽ mumbayã sacua. Emo echeẽ mĩ mumba mose, Dios biãte ra ùquĩ, Dios siqui mose ererecuarã tuchi cote. “Dios cheẽ mĩ emumba”, i mose emo, Dios biãte ùquĩ. Ae echeẽ mumbayãte quia nae, Diosbi tuchi chõ ùquĩ nde. Ae ñee nguia mbia je nae, “Dios cheẽ jemumbayã ja” i quia mbia je nae, Diosbi tuchi chõ ùquĩ nde. ²⁰ Tacheẽ nyecua jêje. Fariseos uturã saã saã tuchi raque. Embesasa abe uturã saã saã tuchi raque. jê nguia jêingo turã tuchi ùquĩ si jê! Jê jêingo turã eã mose ùquĩ si, jêingo eã nda Dios rese, Dios siqui mose mbia rerecuarã.

Paama jenyechĩ nda emo je, i Jesús

²¹ Amei ñee ngue jeñandu rei ra. “Mbia mo nda ereiquiachĩ. Nde mbia mo iquia mose, nde abe ra mbia ndeiquia arõte”, i rei que amei nda. ²² Se quia tacheẽ nyecua jêje. Jê paama i chooño mose jenongue je, mbia ra jeiquia arõte. “Ndeaquiatoã nde” jenye mose jenongue je, mbia ra jêiquia arõte. “Ndearacuayã nde”

jenye mose jenongue je, jêso arôte ra tata cuasu. ²³⁻²⁴ Nembae ofrenda rerao mose Dios je, endua rã nyii, emondo nonde ee. Ndenongue mo paama i mose ndeje, ofrenda esecha rã oso ñee ndenongue je. Jeñimbuturã na nguia nyii. Aquere quiatu eso nyebi ofrenda mee Dios je cote. ²⁵ Emo mbia rerecua mbuqueta queta mose nderĩ, ndeturã ño ee. Echeẽ turã ño ee. Jẽ ae chõ jeñimbuturã jenyue. † nda ndererao icuã eã. Ndererao mose ra ndetarõ mbei cárcel. ²⁶ Huee ra ereico bei. Nembae mondo ja tuchi chee ee.

Emo mae mose cuña mo osei osei, adulterio i ùquĩ je

²⁷ Amei ñee ngue jeñandu rei ra. “Emo ninisi rese ra jẽingochĩ”, i rei que ra. ²⁸ Se quia tacheẽ nyecua jêje. Emo mae icuã mose cuña mo ndese, “aque rese nda aico raã ña” i mose, ùquĩ abe eicuãte. Siqui raanguia erese chõ ùquĩ nde. ²⁹ Nderesa mae mose mbae icuã ndese, echoo mombo. Nderesa nemingo serĩ mose mbae icuã nde se, echoo mombo. Coche nderesa mi eremombo nguã. † nda nderete osoã tata cuásuu. ³⁰ Ndeo nemingo mose mbae icuã ndese, echisia mombo. Coche ndeo mombo nguã. Ndequiato cutinda raque. † nda nderete osoã tata cuásuu.

Jeninisi ra jemombochĩ jẽ, i Jesús

³¹ Amei ñee ngue jeñandu rei ra. “Emo ngũinisi mombose mose, sã emombo chõ. Papel mbesa ji emondo ee”, i rei que amei nda. ³² Se quia tacheẽ nyecua jêje. †Jeninisi ra jemombochĩ jẽ! Jeninisi siqui mose emo ndese, ùquĩ mose mi ño jeninisi jemombo arôte raque. Jẽ emombo choño mose, jẽingo jeninisi mingo adulterio rese ùquĩ. Ae emombo ji quereco cote nae, ùquĩ abe eicuãte no. Adulterio, i chõ ùquĩ je re.

Jurar jenye jirichĩ nda jẽ

³³ Amei ñee ngue jeñandu rei ra. “Jurar jenye mose Dios je, jeñee nda jembuchebichĩ ee”, i rei que amei nda. ³⁴ Se quia tacheẽ nyecua jêje. †Jurar

jenye eã mbei tuchi jẽ! Ibei riĩ abe jurar jenye eã jẽ. Dios recua chõ ibei re. ³⁵ Ibi riĩ abe jurar jenye eã jẽ. Dios ironguia chõ ibi re. Jerusalén ni abe jurar jenye eã jẽ. Dios mbae tuchi chõ Jerusalén nde. ³⁶ Jeãquĩ ni abe jurar jenye eã jẽ. Jẽa mi mo jembushĩ aroneate. Co mi jemondei aroneate no. ³⁷ †Jurar jenye eã jẽ! “Ae” jenye chõ. “Tei” jenye chõ. Ùquĩ mi ño jeñee. Jurar jenye mose, eicuãte ùquĩ.

Emo icuã mose jêje, jeturã ño ee

³⁸ Amei ñee ngue jeñandu rei ra. “Emo nderesa mungue mose, nde abe aque resa emungue. Emo nderẽ siquio mose, nde abe ereĩ esiquio”, i rei que amei nda. ³⁹ Se quia tacheẽ nyecua jêje. Mbae icuã nda jẽsaãchĩ mbia icuã je. Emo ucua mose nderitii rese, nderitii ribisho abe eteacuquia ee. ⁴⁰ Emo demandar i mose ndeje, “nembae camisa emondo seje” i mose, emondo chõ ee. Ndeirao nongue abe emondo ee. ⁴¹ “Sembae mbae usi erao jiri seje”, i mose emo ndeje, peebe jiri erao ee. ⁴² Emo ache ache i mose ndeje, emondo ee. “Mbae mo prestar ere seje” i mose emo, emondo ee.

⁴³ Amei ñee ngue jeñandu rei ra. “Ae eturãte riqui ndeje nae, echesecua erese. Ae ndeucuãyã nguia nae, nde abe eucuãyã” i rei que amei nda. ⁴⁴ Se quia tacheẽ nyecua jêje. Echesequa chõ ndeucuãyãsa rese. Mbae turã esaã ño nguia ee. Ae ñee icuã nguia nderĩ nae, echeẽ turã ño nguia nde ee. Ae eicuãte riqui ndeje nae, ùquĩ ni eico ñee turã Dios je. ⁴⁵ Eĩ jenye mose ra Ibatenda riirĩ turã tuchi jẽ. Dios quiarei eturã mbia ja je. Mbia turã je. Mbia icuã je abe no. Dios quiarei tenda mbusẽ turã mbei mbia turã je. Eicuã je abe no. Dios quiarei ama mbuchaaqui turã mbei mbia turã je. Eicuã je abe. ⁴⁶ Ae eturãte riqui mbia jêje nae, ùquĩ achõ je jeturã mose, eicuãte ùquĩ. Mbia icuã abe mbae turã saãte uquiato achõ je. Eĩ jenyechĩ nda jẽ. ⁴⁷ Jẽquiato achõ je jeñee turã mose,

aba biâte ũquĩ. Eĩ ño Dios quiatoã abe nguiã ñee turã uquiato je. ⁴⁸ Jẽ nguia jẽingo turã mbei mbia ja je. Sã jendu Ibatenda turã mbei riqui no.

6

Mbae turã jẽsaã nyecuayã ño nguia

¹ “Sã mbia mae ja sechiao turã ndese”, jenyechĩ nda mbae turã naa mose. Mbia résaa achõ nda mbae turã jẽsaã saachĩ jẽ. Ũquĩ jẽsaã saã mose ra jendu Ibatenda mbae turã mee eã jẽje. ² Jẽingo mose mbae mee mee mbaecha reã je, jemondo checuayã ño nguia ee. Mbia mbiirandu randu eã. Ae uturã saã saã nguia nae, ũquĩ na nda jẽingochĩ. Dios ra mbae turã mee eã ũquĩ je. “Sã mbia mae ja sechiao turã ndese”, jenyechĩ nda jẽ. ³ Mbae turã jẽsaã mose, jẽsaã mingue chõ. ⁴ Mbae turã jẽsaã nyecuayã ño. Jẽingo mose mbae turã naa naa nyecuayã, Dios ae ra mae jẽturã ndese. Ae quia ra mbae turã mee nyecua jẽje cote.

Eĩ jenyechõ ñee Dios je, i Jesús

⁵ Jeñee mose Dios je, jeñee mingue chõ nguia ee. Uturã naa naasa rã nda jẽingochĩ. Ũquĩ ndiqui nyoĩ choĩ mbiásaa ñee sacua Dios je ũquĩ. “Sã mbia mae ja serese secheẽ mose Dios je”, i equia ũquĩ. Mbia riqui mae jate raque erese. Dios quia ra mbae turã mee eã ee. ⁶ Nde ñeese mose Dios je, nde ae chõ echeẽ nguia ee ndechuchúaa. “Sa mbia mae ja serese”, erechĩ nda jẽ. Nde a e chõ echeẽ nguia ee. Dios ae ra siqui nderese. Dios ae mbae icua ja nguia. Ae quia ra mbae turã mee ndeje cote.

⁷ Nde ñee mose Dios je, hue rĩ beite ra ereicochĩ ñee ee. Eĩ ño Dios icuasa reã nguia ñee ndaque Dios je. “Hue rĩ urecheẽ mbei mose ra Dios ureandu”, i rei nguia. ⁸ Ũquĩ na nda jẽingochĩ. Ae mbae ãte riqui jẽje nae, ũquĩ Dios icuate quia co. Jeñee nonde ee. “Mbae embu ure je”, jẽ i nonde ee. ⁹ Eĩ jenyechõ nguia ñee Dios je: Paba Ibatenda, sã mbia ñee turã mbei quia nderĩ.

¹⁰ Mbia rere cuarã ja sacua echu jei íbii.

Sã mbia ibatenda riqui siqui beite ndebi rese no.

Sã mbia ibi jenda abe riqui ndebi rese.

¹¹ Ae ra ureu namo, ũquĩ embu rã urechiurã.

¹² Ae uresaã icua icua ndeje nae, ũquĩ embutiã ná uresi. Sã ureico tesarei mbia icua icua mose ure je no.

¹³ “Mbae icua jẽsaã” iichĩ nda emo ure je jẽ!

Urereaquiatu bei quia mbae icua si.

Nde mii ño mbia rerecuarã nde.

Nde mii ño ndequirãcuã nde.

Nde mii je mbia ñee turã sacua mbei. Amén.

Eĩ jenyechõ ñee Dios je. ¹⁴ Mbia icua icua mose jẽje, jẽtesarei chõ esi. Eĩ jenyechõ mose ra Dios Ibatenda abe jeicua mbutiã jẽsi. ¹⁵ Jẽtesarei eã mose mbia icua si, Dios abe ra jẽicua mbutiã eã jẽsi.

“Sã mbia mae ja serese” jenyechĩ nda hui mose jenyiu si

¹⁶ Jenyiu si jẽhui mose Dios je, “sã mbia mae jate seyayã ndese”, jenyechĩ nda ñee. Jendesa ia eã techĩ nda aque mose jẽ. Eĩ ño uturã naa naasa nguia. Mbia nda mae ja rei nguia erese. Dios quia ra mbae turã mee eã ee. ¹⁷ Ndehui mose ndechiu si Dios je, ndeya chõ eico. ¹⁸ Sã mbia jiranua nderiãcuã ndese. Sã Dios ae jirandu nderiãcuã ndese. Dios quia mbae icua jate nguia. Ae quia ra mbae mee ndeje cote.

Jembaerã ibatenda rese quia jẽingo ndua ndua

¹⁹ “Mbae turã tamunua nu a sembaerã aa íbii”, jenyechĩ nda jẽ. Chicuaquiareĩ nda eu arõte. Emo embuquiachã arõte jẽsi. Eichoi arõ ndete no. ²⁰ Ibate quia mbae jemunua nua jembaerã. Ibate quia ra chicuaquiareĩ eu eã. Ibate quia ra jembaerã ichoi eã mbei. Ibate quia ra emo embuquiachã eã jẽsi. ²¹ Jembaerã chi mose ibate, Dios rese ra jẽingo ndua turã. Jembaerã chi

mose ibii, ibi jenda mii ndese ra jëingo ndua.

Nanderesa mbae resae nanderete je

²² Nanderesa quiarei mbae resae nanderete je. Nanderesa turã mose, nanderete abe ra oso turã. ²³ Nanderesa icuã mose, nanderete abe ra oso icuã icuã no. Tat a rendi rã jëingo bei. Uquĩ mose ra jëingo jiri jiriã itondáruu.

Mbae isiquia Dios quiato eã

²⁴ Erimba mii mo siqui aronea ererecua nyeremo ndese. Ererecua nyeremo mose, huee ra erimba ererecua nongue ucuayã. Ererecua nongue ra ebite. Eĩ si chõ mbia re. Ae ndua beite quia mbae isiquia rese nae, uquĩ siqui aroneate Dios rui. Ae siqui beite quia Dios rese nae, uquĩ nguiarei ndua eã jiri mbae isiquia rese.

Dios uquiato teaquiato bei

²⁵ “¿Mbae ra nandeu re?” jenyechĩ nda quicoi coi jë. “¿Ma tiru ra nandemingue re?” jenyechĩ nda quicoi coi no jë. Mbia chi u ae ra mbia mingo eã. Mbia irao abe ra mbia mingo eã no. ²⁶ Sã nguireĩ no. Mbae tiquiayã ndaque. Mbae ishao eã ndaque no. Mbae ruacuã eãte raque embae no. Dios ae quiarei embuquiaru quiaru bei. Jë nguiarei Dios queteamba tuchi nguireĩ si. Dios ae jembuquiaru nguia jë no. ²⁷ Mbi a ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ nguia. ²⁸ “¿Ma tiru ra nandemingue re?” jenyechĩ nda pare pare i jë. Sã mbae uti no. Sã mbae uti turãte riqui no. Mbae ao ao eã ndaque. Ninyu mburirã ndirã eã ndaque. ²⁹ Dios ae chõ mbae uti mbuturã nguia. Mbae uti quiarei eturã jiri Salomón si. Salomón turãte raque. ³⁰ Sã Dios quiata mbuturã no. Quiata mano jeite raque. ¿Mañi nda Dios jembirao eã jë nde no? ¿Mbaerã jëingo Dios icuayãte re? ³¹ “¿Mbae ra nandeu re?” jenyechĩ nda pare

pare i jë. “¿Mbae ra nandembei re?” jenyechĩ nda pare pare i jë. “¿Ma tiru ra nandemingue re?” jenyechĩ nda eno jë. ³² Eĩ ño Dios quiatoã nguia. Jë nguia jendu Ibatenda tesareia mbeite nguia jësi. ³³ Jë nguia jëingo tuchi Dios rese jenderecuarã. Sã Dios turãte no. Uquĩ na ño jëingo. Uquĩ mose ra Dios mbae mee mee mbei jëje. Jenyurã. Jeñimbeirã abe no. Jëiraorã abe no. ³⁴ “Mbae tiã ñochĩ nda seje isamami nde”, jenyechĩ nda pare pare i jë. Isamaminda rese ra jendua nduachĩ namo jë. Namonda mii ndese jendua namo no. Isamami nguiatu jendua isamaminda rese.

7

“Eicuãte que co ra”, jenyechĩ nda emo nii

¹ “Co que eicuãte ra”, jenyechĩ nda emo nii. “Jëicuãte” iã nda Dios jëje chã. ² Mbia icuã mose, jeñeechĩ nda ee. Jëturã mose ee, Dios abe ra eturã jëje. Mbae jemee mee turã mbia je. Dios abe quia ra mbae mee tuchi jëje cote. Jë embisẽ mee mose emo je, Dios abe ra embisẽ mee jëje no. ³ ¿Mbaerã jëingo “eicuã” i emo je re? Jë jëicuã tuchi mose esi. “Mbae ñetẽ ndiqui nderésaa aque”, jenyechĩ nda emo je, jë mbae cuasu rerequia mose jendésaa jë nguiatu. ⁴⁻⁵ “Mbae turã ndese chõ jëingo”, jenyechĩ nda jë jëicuã mose jë. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jë. Jë nguia jëturã jësãã saã ñote nguia aque. Jë nane nguia jëturã ndiqui. Aquere quia jeñee emo mingo turã cote. ⁶ Sã mbia mo ndiqui perro rã si no. Teasu socoi quia rã abe no. Uquĩ nguiarei mbia icuã mbei Dios cheẽ andure. Dios cheẽ isi teã teã. Dios cheẽ jësenei eã uquĩ je cote. Emo je quia jësenei cote.

Jeñee mose Dios je, mbae ra emondo jëje

⁷ Jeñee mbei mose Dios je, mbae ra emondo jëje. Jë mbae mo ndequia mose, jëtea rae. Jë eiquesa

mbuu mbuu mose, ũquĩ mose ra embuquiata jêje no. ⁸ Ae ñee mbeite quia Dios je nae, mbae ra Dios mondo ee. Ae mbae mo sequia beite quia nae, tea rae. Ae eiquesa mbuu mbuu quia no nae, equia ra ee no. ⁹ Jendiirĩ “mbichae embu seje” i mose, ¿sita ra eru mee ee re? ¹⁰ Jendiirĩ “sira embu seje” i mose, ¿mbei ra eru mondo ee re? ¹¹ Mbia icuã nyee mbae turã mondo mondo quia nguiirĩ je ã. Jendu Ibatenda quia ra mbae turã tuchi mee jêje, jeñee mose ee. ¹² Sã jêyate riqui mbia siqui turã mose jêje no. Eĩ jenyee si chõ nguia siqui turã mbia je no. Moisés chimbesa tuchi chõ ũquĩ nde. Dios quiato cose ndare chimbesa ja chõ ũquĩ nde.

Eiquesa chumumbi

¹³ Eiquesa chumumbi rĩ ño jêso ique jê. Aque ñeenda oso quia tata cuasu nae, eicoi chõ aque re. Ae eiquesa ngasẽ nguia tat a cuasu nae, eicoi chõ aque no nde. Hue rĩ mbia tubiriã ndiqui nguia ũquĩ. ¹⁴ Ñeenda nongue rui quiatu ngasẽ nguia Dios je. Aque ñeenda quiarei echumumbi. Echumumbi chõ aque ñeenda iquesa re. Mbia mĩ mĩ ño siqui nguia aque ñeenda rui. Ũquĩ nguia ra Dios mingo bei.

Sã ira ae ia ae ae no

¹⁵ Ae Dios cheẽ senei ñooño nguia nae, aba mbiirĩ irĩsa chõ ũquĩ nde. Ũquĩ ndei Dios quiato raã ñooño. Mbia mbiirĩ irĩsa Dios rĩ. ¹⁶ Sã ira ae e a ae ae no. Uva a rã eã nda nyu a ia no. Ea ae eno nde. Higo a rã eã nda isio rashĩ a no. Ea ae eno nde. ¹⁷ Eĩ si chõ mbia no nde. Mbia turã nda siqui mbae turã ndese. Mbia icuã nda siqui mbae icuã ndese no. ¹⁸ Ira turã mose, ea abe ra eturã. Nyiabi aronea. Ira icuã mose, ea abe r a eicuã no. Ei rã si ra ea. ¹⁹ Ira mo ia turã eã mose, nyisia rae. Mendi rae. ²⁰ Dios cheẽ nenei neneisa chõ jêicua rã. Dios cheẽ ndui si eriqui turã mose, Dios quiato chõ ũquĩ nde. Dios cheẽ ndui eã mose, Dios quiato eã ño ũquĩ no nde.

Mbia ra ique ja eã

²¹ “Sererecua” i rei mbia tubiriã nguia seje ã. Ũquĩ nguia nda ique ja eã nguia serécuaa. Ae siqui Seru Ibatenda cheẽ ndui nae, ũquĩ mĩ ño nda ique serécuaa. ²² Aque mose ra mbia ñee tuchi seje. “Jesús, ndecheẽ ngue urembuchecua checua tuchi quia mbia je resẽ. Aba checuayã ngue urejea jea tuchi quia mbia si nderĩ ndesẽ. Mbia mae sayã ngue uresaã saã tuchi quia nderĩ ndesẽ”, i tuch i rei ra mbia seje. ²³ Ũquĩ je ra acheẽ. “Co aico jêicuayã mbeite co resẽ. Jêso serecha. Mbae icuã aosa chõ jê nde”, ae ra ee.

Tuchua nyeremo

²⁴ Ae siqui serese, ae secheẽ mumbayã nguia nae, ũquĩ nguiarei eturã tuchi. Tuchua ãtã aosa rã ño ũquĩ nde. Sã eaquiato mo tuchua ao sita turã arõ no. ²⁵ Ama nyaaqui mose, amandi cuasu raque. Quiririã abe ichu ichu raque tuchu a je. Tuchua mbuquiata aroneate. Sita turã arõ nguia ngue uchuchu a ao nguia. Eĩ si chõ secheẽ mumbasa rẽ a nde. Tuchu a ãtã aosa rã si. ²⁶ Ae secheẽ mumba quia eandu mose nae, eaquiatuã na ño ũquĩ nde. Sã eaquiatuã mo uchuchuarã ao no. Aque quiarei ibi ribicoi tuchiã. Sita quiishĩ arõchi chõ uchuchua ao nguia. ²⁷ Ama nyaaqui mose, amandi cuasu ee cote. Quiririã abe ichu ichu tuchua je. Aque quiarei iãcuã mbucoi asi mondo. Eĩ si chõ secheẽ mumbasa re, i que Jesús ra.

²⁸ Jesús que hui ucheẽ si cote ra. Mbia que nyuruira tuchi echeẽ andu ra. ²⁹ Ererecua rã ño ngue eriqui nguia mbia mbaaquiato quiatu.

8

Jesús mbia leproso mbucherõ

¹ Jesús que nguichi ibi ibate si cote ra. Mbia cuabête que siqui erui ra. ² Emo ndasi que tu ee ra. Leproso, i que aque erasi je ra. Tu que ngoi ngũiã ndese ñee Jesús je ra. — Sererecua, nde sembucherõse mose, sembucherõ se, i que ñee Jesús je

ra. ³ Jesús que oco erese cote ra. —Echerō cote, i que ee ra. Echeē mosebe que nyerō nda. ⁴ Jesús que ñee ee ra. —¡Erecheēchĩ nda mbia mo je jē! Eso nderasiã ndeacuquia sacerdote je cote. Moisés cheē ndui si chō mbae mo emondo Dios je. Eĩ nda mbi a jirandu nderasiã ndese cote, i que Jesús ñee ee ra.

Jesús soldado rerecua rimba mbucherō

⁵ Jesús que oso sucha tubiriã Capernaum cote ra. Soldado rerecua a mo ngue tu ñee ee ra. Capitán ngue ae ra. ⁶ —Sererecua, serimba rasite riqui sechuchua huee. Erasi tuchi. Umĩ umĩ sayã tuchi, i que capitán ñee Jesús je ra. ⁷ —Taso embucherō, i que Jesús echeē mose ra. ⁸ Capitán ngue ñee Jesús je ra. —Seicuãte aico co, Jesús. Sechuchua ra ereiquechĩ. Echeeño. Ndecheē achō ño emondo serimba mbucherō sacua. ⁹ Se abe sererecua riqui co. Echeē amumba aroneate quia co. Se abe soldados rerecua aico nguiã co no. Secheē abe emumbayãte quia co no. Eso, i mose, secheē mumbayãte no. Echu, i mose, secheē mumbayãte no. Se neē mose serimba je, secheē mumbayãte no. Ndequirãcuã na eãte raque se, i que capitán ñee Jesús je ra. ¹⁰ Echeē andu mose que Jesús nyuruirate ra. Ñee ngue nguesenda je ra. —Tacheē nyecua jēje. Capitán ndiqui seicua tuchite co. Seicua tuchite equia judíos mo si co. ¹¹ Tacheē nyecua jēje. Ae judíos eã emo jenda ja nae, ũquĩ tubiriã nda siqui Dios rese. Dios siqui mose mbi a rerecuarã. ũquĩ tubiriãte ra quiaru turã Abraham ndese. Isaac rese. Jacob rese no. Judíos eã ndaque ũquĩ. ¹² Dios quia ra judíos mombo itaicuee. Itondáruru. Huee ra nyeseo tuchi cote. Erasite ra huee cote, i que Jesús ñee judíos rĩ nda. ¹³ Jesús que ñee capitán je cote ra. —Eso chō ndechuchúaa cote. Ereico seicuate co. Nyebe ndecheē amumba eã nguiã nderimba mbucherō, i que Jesús ee

ra. Jesús cheē mosebe que erimba nyerō nda.

Jesús Pedro ninisi si mbucherō

¹⁴ Jesús que oso Pedro chuchua cote ra. I que Pedro chari rasi u nyaara ee ra. Eracu tuchi que ra. ¹⁵ Jesús que oco ari o rese ra. Eracu que ti i cote ra. Ari que juã cote ra. Mbae que echao chao quia mbia chiurã cote ra.

Jesús mbia rasi chumumbara mbucherō

¹⁶ Itondaru ramo mose que mbia erasi rurucuaē cuaē tuchi Jesús je ra. Ae aba checuayã quereco qui a nae, ũquĩ ndurucuaē tuchi Jesús je. Aba checuayã ngue usē usē nguia mbia si Jesús cheē mose ra. Erasi chumumbara que embucherō cherō tuchi quia ra. ¹⁷ ũquĩ mose que Isaías cheē io cote ra. Eĩ ño ngue Isaías embesa cose ra: “Dios rucucha que nandeicuã sirō nandesira. Dios rucucha que nanderasi sirō nandesino nda”, i que Isaías embesa ra. ũquĩ ngue io cote ra.

Jesús rui taico, i raque emo

¹⁸ Mbia cuabēte que Jesús mamate ra. Nyebe Jesús ñee nguiã uchimbaaquiatu je. —Nyao rã sobei, i rei que ee ra. ¹⁹ Aque mosete que embesasa mo ñee ee ra. —Taico bei nderese. Ndeso mose manguiti, se abe ra aso bei quia nderese, i rei que ñee Jesús je ra. ²⁰ Jesús que ñee ee ra. —¿Mbae rasi ra eresaã saã serese re? Eoita quia ecua jiri re. Nguireĩ nguia equisa jiri no nde. Se quia sequisayã mbei re, i que Jesús ee ra. ²¹ Echimbaaquiatu mo ngue ñee ee ra. —Sererecua, sã paba mano na. Aquere quia ra aico bei nderui cote, i rei que Jesús je ra. ²² Jesús que ñee ee ra. —Sã mbia ataque chō nderu chati. Eico chō serui nde, i que Jesús ñee ee ra.

Jesús quiririã icuã icuã mbutiba; ama ndebera abe

²³ Jesús que ua canoa ye cote ra. Uchimbaaquiatu rese. ²⁴ Ama ndiit e re mose que quiririã icuã icuã

ndu ee ra. I rebera que ique ique tuchi quia canoa ye ra. Jesús que uque oso quia canoa ye ra. ²⁵ Nyebe echimbaaquiatu Jesús mumba nguiã. —Urembaaquiatu, echumumba. Ureraaro nã. Nandemanochĩ nda re, i que ñee Jesús je ra. ²⁶ Jesús que ñee uchimbaaquiat u je ra. —¿Mbaerã jësiquichete riqui re? ¿Seicuayãte equia ã nde? i que Jesús ñee ee ra. Nyuruã ngue ñee asite quiririã je cote ra. Ama je abe no. Quiririã ngue ti i echeẽ mose cote ra. Ama abe. ²⁷ Echimbaaquiatu que nyuruira tuchi mae Jesús quirãcuã ndese ra. —Quiririã echeẽ mumbayã ñochĩ. Ama abe echeẽ mumbayã ñochĩ, i que ñee ñee nyue cote ra.

Jesús aba checuayã icuã jea

²⁸ Jesús que ngasẽ ama ndobei cote ra. Gadara, i que hue ibi je ra. Amei mo nyeremo ngue ngaẽ ngasẽ Jesús je ra. Mbia raaque tãsa si chõ ngue ecuaẽ ngasẽ Jesús je ra. Aba checuayã icuã ño ngue siqui tuchi nguiã ùquĩ ñiangui re ra. Aba checuayã ño ùquĩ mbiãcuã tuchi nguiã. Nyebe mbia mo hue rurubiã mbei nguiã. ²⁹ Ùquĩ ngue ñee asite cuaẽ Jesús je ra. —¿Mañi ere ra equia ure je re, Jesús? Dios rucucha chõ nde re. ¿Urembasi jei sacua ño erechu aa re? i que ñee tuchi Jesús je ra. ³⁰ Chiasu socoi tubiriã ngue chi quiaru huee rurubi ra. ³¹ Nyebe aba checuayã icuã ñee jate nguiã Jesús je. —Nde urejea mose mbia si, chiasu chiangui re ureso rã, i que aba checuayã ñee Jesús je ra. ³² —Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chiangui re que echoi ja ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda. ³³ Chiasu raarõsa mundite que ra. Mae mose erese. Nyoĩ que mbia mbiirandu jate chiasu rese ra. —Jesús que amei mbucherõ nda. Aba checuayã ngue ejea esi ra, i que maesa erese ñee mbia ataque je ra. ³⁴ Nyebe hue jenda nyoĩ ja nguiã

ñee Jesús je. —Eso rã urerecha urerecua si, i jate que hue such a jenda ñee Jesús je ra.

9

Jesús emi sayã mo mbucherõ

¹ Jesús que ua canoa ye cote ra. Nyoĩ que sobei ra. Ngasẽ ngue uchuchúaa cote ra. ² Mbia que erasi mo curucuaẽ quisa ye ee ra. Emi sayãte que ae ra. —Erurucuaẽsa riqui seicua ùquĩ, i que Jesús ñee uchiangui re ra. Nyebe ñee nguiã emi sayã je. —Echimbã chõ, Echo. Ndechisaã mbae icuã ambutiã nguia ndesi a, i que Jesús ñee umi sayã je ra. ³ Embesasa que ñee nyue ra. —Jesús riqui Dios ibatenda raã naa ñochĩ co, i que ñee nyue ra. ⁴ Jesús que ùquĩ ndua ndua icuate quia ra. Nyebe ñee nguiã ee cote. —¿Mbaerã jëingo ndua ndua icuã nde? ⁵ ¿Ma mbaranguiatuã eã jiri jêje re? ¿Mbia icuã mbutiã esi ere? ¿Mbia rasi mbucherõ ere no? ¿Ma mbaranguiatuã eã jiri jêje re? ⁶ Dios rucucha rei se. Mbia chiao icuã mbutiã aquiatu chõ se re. Sequirãcuã tateacuquia jêje, i que Jesús ñee ee ra. Ñee ngue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra. ⁷ Emi sayã ngue juã asi oso ra. ⁸ Mbia que nyuruira ja u mae emi sayã ngata rese ra. Mbia que ñee turã ja Dios quirãcuã ñi cot e ra.

—Serui bei eico, i Jesús Mateo je

⁹ Mateo, i que emo je ra. Ae que impuestos isi isi bei quia mbia rerecua mbaerã nda. Jesús que ngasẽ ee cote ra. Ngoi que huĩ plata isi isi impuestorã nda. —Serui bei eico, i que Jesús ñee ee ra. Ae Mateo juã oso nguiã erui. ¹⁰ Emo mose que Jesús nyoĩ quiaru erese ra. Impuestos isi isiquia ata que chi quiaru erese huee ra. Echimbaaquiatu abe rese. Mbia icuã mo abe que chi quiaru erese no nda. ¹¹ Fariseos que ñee icuãte Jesús chimbaaquiatu je ra. —¿Mbaerã Jesús riqui quiaru mbia icuãte rese re? i que ñee nda. ¹² Nyebe Jesús ñee

nguiã ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. ¹³ ¿Ã embesa ji jêicuayãte re?

“Mbae mo jemee seje”, ae eã nguiã jêje co.

“Jëya eã ño mbia rese”, ae chõ nguiã jêje co,

í que embesa ji ra. Ñquĩ embesa ji jêicua jiri ae. “Jenyu seje”, aeã ngue u nguiã mbia turã je. Mbia icuã je chõ ngue achu nguiã “jenyu seje” í, í que Jesús ñee ee ra.

Jesús chimbaaquiato hui ãte uchüu si

¹⁴ Juan ñimbaaquiato que ngasẽ ñee Jesús je ra. —Ure quia ureico nguiã hui hui urechüu si ã. Fariseos chimbaaquiato abe hui hui quia uchüu si no. ¿Mbaerã ndechimbaaquiato riqui hui ãte uchüu si ã nde? í que ñee Jesús je ra. ¹⁵ Jesús que ñee ee ra. —Sã emo ndiqui ngüinisirã isi ramo no. Sã eresenda iate riqui quiaru erese no. Sã eriqui hui aroneate uchüu si aque mose no. Sã eru riqui mano emo mose no. Aque mose quiatu ra equiato hui uchüu si cote. ¹⁶ Sã emo ndiqui tiru yasu mñ aroneate tiru ima sorei rese no. Eyasu ra nyaacua quiata eima si. Soro icoi tuchi ra cote. ¹⁷ Sã emo mbaeri rasi ramo nderecoquiato eã eriru ima ye no. Mbae ire ima ye ererecoquiato aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbücuãte ra cote. Mbaeri yasu quia nda equerecoquiato nguiã mbae ire yasu ye. Soroã sacuã, í que Jesús ñee ee ra.

Jesús Jairo riirĩ mbucherõ; ari mo abe mbucherõ

¹⁸ Jesús cheẽ mose que judío rerecua mo ngasẽ ee ra. Jesús jii que ngoi ñee ee ra. —Qui seriirĩ si mano namote qui. Nyao rã erea. Ndeoco mose erese, quera si rae, í que ñee Jesús je ra. ¹⁹ Jesús que juã oso erese ra. Echimbaaquiuiatu abe nyoí erese. ²⁰ Ari rasi mo abe que oso quia mbia

ite rĩ nda. Eruqui nda uchẽ mbei quia ee ra. Doce años nyee. Eruqui nda tibayã mbei ee ra. Ari que tu Jesús quite quitu erüchã nda. Jesús irao ai rese que oco cote ra. ²¹ —Seoco mose Jesús irao rese ra acherõ, í nda ra. ²² Jesús que uba ñee ari je ra. —Coche ñene, Echo. Seicuate que se ra. Nyebe arembucherõ nguiã, í que Jesús ñee ari je ra. Aque mose tuchi que eruqui tiba ee cote ra. ²³ Jesús que ngasẽ nyee judío rerecua chuchua ra. Mbia que nyeseo seo quia ãquẽ ndaaque rese ra. Mbia que irasei rasei eraaque tiquia nonde ra. ²⁴ Jesús que ñee ee ra. —¡Qui jê! Jëso ja itaicuee. Eriirĩ mano eã ño nguiã. Uque chõ ñene, í que ñee mbia je ra. Mbia que icuia icuia echeẽ mose ra. ²⁵ Jesús que mbia mondo ja chee itaicuee ra. Oso que í que eraaque rea cote ra. Eraaque o que eisi ra. Quera si que cote ra. Nyuruã ngue cote ra. ²⁶ Mbia hue jenda que jirandu jate erese ra. Jesús eraaque mbuquera rese.

Jesús eresayã nyeremo mbucherõ

²⁷ Jesús que oso hue si cote ra. Mbia resayã nyeremo ngue nyoí erui ra. Ñee mombo mombo que Jesús je ra. —¡Jesús! ¡David rucucha! ¡Ndeyayã ño urerese jê! í que ñee Jesús je ra. ²⁸ Jesús que oso icue tuchúaa cote ra. Ae eresayã nyoí nguiã erurubi. Jesús que ñee ee ra. —¿Sequirãcuã jembucherõ arõte reí nguiã jêje re? í que Jesús ñee ee ra. —Ae, í que eresayã ñee ja ee ra. ²⁹ Ae Jesús oco nguiã eresa rese cote. —Seicua mose ra jaembucherõ, í que ra. ³⁰ Eresa que nyerõ ja ee cote ra. —Sã mbia jiranua serese, í tuchi rei que Jesús ñee ee ra. ³¹ Eresayã ngue Jesús cheẽ mumba tuchi ra. Nyoí que mbia mbiirandu tuchi Jesús rese hue rĩ ja ra.

Jesús echeẽ nguiã mbucherõ

³² Jesús so mose que mbia echeẽ ngüiã mo curucuaẽ ee ra. Aba checuayã icuã ngue siqui aque chianguí re ra. ³³ Jesús que aba checuayã icuã jea esi ra. Echeẽ ngüiã

ngue ñee turã cote ra. Nyebe mbia tubiriãte chi nguiã nyuruirã mae erese. —Emo ngue ñquĩ saã eã mbeite quia aa Israel ra, i que nyuruirã jate ra. ³⁴ Fariseos quiatu que ñee icuãte Jesús riñ nda. —Satanás quirãcuã je chõ Jesús riqui nguiã aba checuayã jea jea mbia si co, i rei que fariseos ñee nda.

Jesús ia eã tuchi mbia tubiriã ndese

³⁵ Jesús que nyoĩ sucha mbuchesea sea ja ra. Mbia mbaaquiato quiatu ja ra. Mbia chumunua nuásaa jate. Dios cheẽ ngue esenei senei tuchi quia ee ra. Mbia rasi chumumbara que embucherõ cherõ nguia ra. ³⁶ Mbia rasi rasi tuchi que ee ra. Mbia ia eã tuchi que ee ra. Mbia quiachã je rã ngue ee ra. Sã oveja riqui quiachã jate eraarõ iriã no. Eĩ si chõ mbia nguiã Jesús je. Nyebe Jesús ia eã tuchi riqui nguiã erese. ³⁷ Jesús que ñee uchimbaaquiato je ra. —Secheẽ andusa reã ndei etubiriã jiri. Secheẽ nenei neneisa quia rei co miĩ jiri. ³⁸ Jeñee nguia Dios je. “Dios, ndecheẽ nenei neneisa mo emondo tuchi. Mbia mbiirandu randu sacua”, jenyẽ chõ nguia Dios je. Sã mbaecha mbia mo mondo mbae a ireĩ ishao shao equiche mose no, i que Jesús ñee ee ra.

10

Jesús mbia doce irabo uchimbaaquiato

¹ Jesús que “jenyu” i uchimbaaquiato doce je ra. Uquirãcuã ngue emee uchimbaaquiato je cote ra. Aba checuayã icuã jea jea sacua mbia si. Mbia rasi chumumbara mbucherõ cherõ sacua abe no. ² A ño echimbaaquiato ã nde:

Simón (Pedro, i abe que mbia quia ee ra.)

Andrés (Simón nongue rei Andrés.)

Jacobo (Zebedeo riirĩ ndei Jacobo.)

Juan (Jacobo nongue rei Juan.)

³ Felipe

Bartolomé

Tomás

Mateo (Impuestos isi isiquia rei Mateo.)

Jacobo (Alfeo riirĩ ndei Jacobo.)

Lebeo (Tadeo, i abe que ee ra.)

⁴ Simón el Cananista

Judas Iscariote (Aque que Jesús mondo mbia icuã je ra.)

Ñquĩ ja que Jesús irabo ra.

Jesús uchimbaaquiato doce mondo ucheẽ nenei nenei sacua

⁵ Jesús que ñquĩ mondo ja ucheẽ nenei nenei sacua nda. Emondo nonde que ñee ee ra. —Judíos achõ jembaaquiato quiato quia. Jẽsochĩ nda judíos eã je. Samaria jenda chuchua abe ra jẽsochĩ. ⁶ Israel jenda chõ jembuchesea sea oso. Ovejas quiachã je rã ño Israel jenda re. ⁷ Jẽso mose, secheẽ jẽsenei senei mbei quia ee. “Mbia rerecuarã tuchi ra Dios cote”, jenyẽ oso secheẽ nenei nenei judíos je. ⁸ Mbia ire rasi jembucherõ cherõ nguia. Mbia rasi chumumbara jembucherõ cherõ nguia. Mbia raaque abe jembuquera quera quia. Aba checuayã icuã abe jẽjea jea quia mbia si. Sequirãcuã ngue amee ñooño jẽje. “Mbae mo jemee na seje eribishorõ”, ae eã tuchi se quia jẽje co. Nyebe jẽ abe mbae turã jẽsaã ñooño mbia je. “Mbae embu se”, iã mbia je. ⁹ Mbae mo nda jendaochĩ icua jẽso mose. Mbae isiquia mo nda jendaochĩ icua. Mbae isiquia ñete mo nda jendaochĩ icua. ¹⁰ Mbae riru mo abe ra jendaochĩ no.

¹¹ Jẽso nongue abe ra jendaochĩ no.

¹² Jẽyao nongue abe ra jendaochĩ no.

Jenyitochoquia abe ra jendaochĩ. Ae

je ra mbae turã jẽsaã saã nae, sã ñquĩ

ae riqui jembuquiaru quiaru turã

mingo. ¹¹ Jengasẽ mose sucha tubiriã

mo, mbia turã mo jẽtea huee. Aque

chuchua miĩ ño jẽingo uque. Tuchua

ra jembuchesea seate chĩ jẽingo mose

huee. Ae ra jengue nyii nae, hue

tuchua bei chõ jẽingo uque. ¹² Jẽique

mose emo nyuchúaa, hue jenda je

jeñee turã no. Saludar jenyẽ turã ee

no. ¹³ Hue jenda siqui turã mose,

Dios quirãcuã jemee ee. Siqui turã eã

mose, Dios quirãcuã jẽisibe esi. ¹⁴ Hue

jenda jẽisi sereã nea mose, jẽhui chõ

esi. Hue jenda jeñee andu sereã mose, jêso chõ hue si. Jêi tubi jembutomoto mo ee. ¹⁵ Tacheẽ nyecua jêje. Ae ra jeñee isi sereã nae, ùquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ùquĩ nguia ra embasi tuchi Sodoma jenda si. Gomorra jenda abe si.

Mbia icuã icuã tuchi ra jêje, i Jesús

¹⁶ A aico jemondo secheẽ nenei nenei sacua mbia je a. Sã nyacua icuãte riqui oveja je no. Eĩ si ra mbia icuã icuãte jêje. Oveja seteã na ño jêingo. ¡Jêaracua chõ nguia jê! Sã mbei aracuate riqui no. Mbae icuã mo nda jêsaãchĩ jê. Sã nyurushi riqui mbae icuã naa eã mbeite no. ¹⁷ ¡Sã jê! Mbia icuã icuãte ra jêje. Jembirĩ irĩ ndae. Jemee mee icuã nda mbia rerecua je. Jêiruã nua nda mbia chumunuásaa. ¹⁸ Mbia icuã icuãte ra jêje serĩ. Mbia rerecua je ra jenderao icuã. Eĩ jenyembia rerecua mbiirandu randu serĩ. Judíos eã abe mbiirandu randu serĩ. ¹⁹ Jemee mose mbia rerecua je, pare pare jenyechĩ nda jê. “¿Manyae ra ùquĩ ñee ndibishorõ nde?” jenyechĩ nda pare pare i jê. Dios ae chõ nda jembucheẽ turã nuiã nguia mbia je aque mose. ²⁰ Jê ae ra jeñee eã. Espiritu Turã ae nda jembucheẽ nguia mbia je. ²¹ Jenongue ra jemondo chee mbia icuã je. Jêiquia sacua. Jendu abe ra jemondo chee mbia icuã je. Jendiirĩ abe ra jemondo chee mbia icuã je. Mbia icuã nda jemo iquia iquia chee. ²² Mbia ra jêucuyã jate serĩ. Ae ra siqui bei serese, ùquĩ nda Dios mingo bei. ²³ Mbia icuã icuã mose jêje sucha moo, jêso chõ sucha tubiriã nõnguee. Tacheẽ nyecua jêje. Achu jeibe ra se. Sucha Israel jenda jembuchesea sea ja eã mose chõ nda achu jei.

²⁴ Jengasu ra jêsaã saãchĩ sesi jê. Se chõ jembaaquiatusa re. Embaaquiatusa quia ecuasú jiri echimbaaquiatusa si re. Ererecua quia ecuasú jiri erimba si re. ²⁵ Coche jêingo nguia se

rã si. Sã mbia icuã icuãte riqui seje no. Eĩ si ra eicuã icuã jêje no. Sã mbia “Satanás” i ñee icuã seje no. Eĩ si ra ñee icuã icuã jêje no. Serimba je no.

Dios riqui jendeaquiatusa be co

²⁶ Jêsiquiche quichechĩ nda ñee icuã icuã je si jê. Ae mbia saã nyecuyã cuayã nguia nae, ùquĩ nda nyecua ja cote. ùquĩ nda mbia icua ja cote. ²⁷ Ae rĩ aico ñee nyecuyã cuayã jêje nae, ùquĩ jêseni senei turã mbuchecua mbia je cote. Ae asenei senei nguia jêisaa nae, ùquĩ jêseni senei turã mbuchecua mbia je cote. ²⁸ Ae “taiquia” i quia jeni nae, ¡ùquĩ si ra jêsiquichechĩ jê! Ae aba mombo serite quia tata cuasu nae, aque si quiatusa jêsiquiche. Aque si quiatusa jêsiquiche tuchi jê. ²⁹ Aba queteamba eã jiri raque nguireĩ. Mbae isiquia mumba eãte raque nguireĩ. Dios quia ra tesareia nguireĩ mo si. Nguireĩ mo ngoi mose íbii, Dios riqui eicua jate ã. ³⁰ Dios riqui jê mii mii icua jate co. Jêa mii mii abe eicua jate quia co. ³¹ Jêsiquichechĩ nda jê. Dios quiatusa queteã tuchi nguia jendese nguireĩ mo si.

Jesús quiatusa chõ se re, jenyembia checua chõ nguia mbia je

³² “Jesucristo quiatusa chõ se re”, ae i quia mbia je nae, ùquĩ nii nda acheẽ turã se abe. “Sequiatusa chõ ã nde”, ae ra Paba Ibatenda je. ³³ “Jesucristo quiatusa chõ se re”, ae i ãte quia mbia je nae, ùquĩ nii nda acheẽ turã eã se abe. “Sequiatusa eã ño ùquĩ nde”, ae ra Paba Ibatenda je.

Achu chõ ngue mbia mbuchao chao nyesi resẽ, i Jesús

³⁴ ¿Achu reĩ mbia mbuturã turã sacua serimba je jêje re? Tei. Achu chõ ngue mbia mbuchao chao nyesi resẽ. Mbia icuã icuã nda uchue serĩ. Emo emo nda siqui serui. Emo emo nda siqui icuã icuãte ee. ³⁵ Emo nda eicuãte ngu je serĩ. Cuña mo nda eicuãte usi je no. Acuanĩ mo nda eicuãte uchari je serĩ no. ³⁶ Tuchua

jenda ra nyao nyao nyesi. Emo nda siqui serese serimbarã. Eataque ra nyao nyao esi. ³⁷ Ae nyesequa tuchi quia ngu rese sesi nae, ùquĩ nda serimbarã eã. Ae nyesequa tuchi quia usi rese sesi nae, ùquĩ nda serimbarã eã no. Ae nyesequa tuchi quia nguiĩ ndese sesi nae, ùquĩ abe ra serimbarã eã no. ³⁸ Ae ra siquiã serui, ùquĩ nda serimbarã eã. Ñe mano sereãte serĩ, ùquĩ nda serimbarã eã. ³⁹ Sã mbia nduate quia serese. Ae nduate quia nyiese nae, ùquĩ nda nyoĩ eãte ibate. Ae ndua eãte quia nyiese nae, ùquĩ nguia ra nyoĩ ibate.

Dios ra mbae turã mondo mbia turã je

⁴⁰ Ae ra eturã ndiqui jẽje nae, seje abe chõ nda eturã ndiqui. Ae eturã ndiqui seje nae, semondosa je abe chõ eturã ndiqui nguĩã. ⁴¹ Ae eturã ndiqui Dios cheẽ mbuchecuada je nae, Dios ra mbae turã mondo ee. Sã mbae turã mee ucheẽ mbuchecuada je no. Ae eturã ndiqui echĩã mbuquishĩ ji je nae, ùquĩ je abe ra Dios mbae turã mondo no. ⁴² Tacheẽ nyecua jẽje. Emo sechimbaaquiату iseĩ mbiu turã mose serĩ, mbae turã abe ra Dios mondo aque je no, i que Jesús ñee uchimbaaquiату je ra.

11

Juan el Bautista mbia mondo ñee Jesús je

¹ Jesús que hui ñee uchimbaaquiату doce je cote ra. Aquere que esi Dios cheẽ nenei nenei hue rurubinda je cote ra.

² Juan ngue chĩ cárcel nda. Hue eñi mose que jirandu Cristo chisaã ndese ra. Uchimbaaquiату nyeremo ngue emondo Jesús rea ra. Ñee sacuaã ee. ³ —Jẽso ñee Jesús je. “Cristo ra tu’, i beite equia ã nae, ¿ae nde re? ¿Cristo ra uresaarõ arõ mbei quia re?” jenyẽ oso Jesús je, i que Juan uchimbaaquiату mondo erea ra. ⁴ Jesús que ñee Juan nimba je ra. —Ae rese jemae nae, ùquĩ jẽsenei oso Juan je. Ae jeñandu nae, ùquĩ

abe no. ⁵ Eĩ jenyẽ chõ ñee Juan je: “Jesús que eresayã mbucherõ nyerõ nguia ra. Ecuatayã abe mbucuat a cuata. Eire rasi abe mbucherõ nyerõ. Eraaque abe mbuquera quera. Ucheẽ turã ngue esenei senei tuchi quia mbaecha reã je ra”, jenyẽ oso Juan mbiirandu. ⁶ Emo hui eã mbei mose sesi, aque ia tuchi ra siqui cote, i que Jesús ucheẽ mondo Juan je ra.

⁷ Juan ñimondo que nyebi nyoĩ Juan ndea cote ra. Jesús que ñee mbia ja je Juan ñi cote ra. —¿Mbae rese mae jẽso turúquiaa re? ¿Quiririã idioi ichu ichu rese chõ jẽso mae nde? Quiririã ndese mae eã ngue jẽso resẽ. ⁸ ¿Emo irao turã ndese jẽso mae nde? Ùquĩ ndese eã ngue jẽso mae ndesẽ. Eirao turã siquiã nguĩã turuquia ñi. Ae siqui quia mbia rerecua chuchua nae, ùquĩ nguia eirao turã ndiqui nguĩã. ⁹ Juan ndese mae ño ngue jẽso turúquiaa resẽ. Dios cheẽ nenei nenei tuchi chõ ae mbia mo si re. Ae chõ mbia mingoquiату quiату nguĩã se ñee sacuaã mbia je. ¹⁰ Sã embesa ji riqui ñee no:

Secheẽ nderaosa tamondo nde-nonde.

Ae ra mbia mingoquiату ndeje, nde ñee sacuaã ee,

i que embesa ji ñee nda. Juan ñi ño embesa ji riqui nguĩã ñee. Nyebe Juan ndu nguĩã senonde. ¹¹ Tacheẽ nyecua jẽje. Juan el Bautista quiarei i tuchi raque mbia ñiinda ja si. Ae ra siqui tuchi Dios rese erimbarã cote nae, ùquĩ nguia ra i tuchi Juan si cote. ¹² Juan Dios cheẽ nenei nenei namo mosenda bei chõ mbia riqui nguĩã ngaẽ ngaẽ Dios cheẽ andu ã. Mbia bite Dios siqui mose mbia rerecuarã. ¹³ Juan tu nonde chõ embesa ji riqui nguĩã ñee j a serĩ. “Dios rucucha ra tu emo mose”, i serĩ. Sechu eã mose. Juan nane ngue “co eru quia co” i ñee nda. ¹⁴ Sã embesa ji riqui ñee nyii no. “Elías raanguia ra tu mbae mbuquiche ja Cristo tu nonde”, sã i embesa ji no. Juan ñi ño eriqui nguĩã ñee. ¹⁵ Jẽisa mose, ¡secheẽ jeñandu turã na!

16 Mbia namonda siqui turã eãte quia aba cheẽ nduiã. Mbia riirĩ na ño eriqui nguiã ã. Sã mbia riirĩ ndiqui ñumbusarei sarei no. 17 Sã eriqui ñee ñee nyue no. “Flauta que ambucheẽ ñee ndei jêje ra. ¿Mbaerã jenyuruqui sereã nea nde?” sã i chõ nyue no. “Mbae aba mbia eã ngue ambucheẽ ñee ndei jêje resẽ. ¿Mbaerã jêyate erese re?” sã i chõ mbia riirĩ nyue no. Ûquĩ na si chõ mbia riqui nguiã aba cheẽ mumba ã. 18 Juan el Bautista que tu rei mbia je ra. Mbia que eisi turã ã a nda. “Co eriqui quiaru sereãte nanderese co. Co eriqui mbae mbei sereãte nanderese co”, i chõ mbia quia ee ã. “Aba checuayã ndesenda”, i chõchĩ equia ee ã. 19 Aquere que achu se abe ra. Aquiaru rei nguiã jendese co. Mbae abe ambei rei nguiã jendese co. Se abe que seisi turãya nda. “Quiaru tuchi je”, i chõchĩ seje. “Mbae mbeisa”, i abe que seje no nda. “Mbia icuã quiato chõ ñene”, i chõ ngue seje no nda. Ae earacuate nae, Dios aracua abe ra eicua.

Jesús ia eã mbia sucha tubiriã jenda rese

20 Ae mbia je Jesús uquirãcuã ndeacuquia cuquia tuchi nae, ùquĩ ngue Jesús isi eã mbei ra. Nyebe Jesús riqui nguiã ñee asi asi mbia hue jenda je. 21 —Seya eãte jendese, Corazín jenda. Seya eãte jendese, Betsaida jenda. Jendasi tuchi rae. Mbia mae sayã ngue asaã saã jêje nae, ùquĩ naa mose Sidón jenda je, eĩ nda Sidón jenda huicua secha rei. Eĩ nda Tiro jenda abe huicua secha rei. Eĩ nda eya eãte rei huicua ndese. 22 Jê nguia jêicua jêsecha sereãte rei. Nyebe ra Dios jembasi mbasi tuchi ùquĩ si quiatu. Dios mbia icuã mbasi mbasi mose. 23 Jêcuasu jêsaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu. Mbia mae sayã ngue asaã saã jêje nae, ùquĩ naa mose Sodoma jenda je, eĩ nda Sodoma jenda huicua secha rei. Eĩ nda Dios hue sucha cuasu mbutiã eã ndei. 24 Jê nguia jêicua jêsecha

sereãte rei. Nyebe ra Dios jembasi mbasi tuchi Sodoma jenda si. Dios mbia icuã mbasi mbasi mose, i que Jesús ñee nda.

Jesús aba quenea mboseĩ

25 Jesús que ñee Dios je cote ra. — Seyate aico nanderese co, Paba. Ibi jenda rerecua ja chõ nde re. Ibei jenda abe rerecua ja chõ nde no nde. Ndecheẽ ngue erembuchecu a eã mbia aquiatu je ra. Mbia riirĩ naanguia je chõ ngue ndecheẽ erembuchecua nguiã. 26 Ûquĩ ño ngue eturã ndeje ra, Paba, i que Jesús ra. 27 —Seru que mbae mondo ja seje ra. Paba mii ño seicua tuchi nguiã. Paba riirĩ mii tuchi chõ se re. Se mii ño Paba aicua tuchi nguiã no. Ae je ra Paba ateacuquia nae, ùquĩ mii ño nda Paba icua tuchi nguiã serese. 28 Jenguenea mose, jenyu chõ seje. Jenguenea tamboseĩ na jêsi. Taembia mingo. 29 Seseteã ño aico nguiã se. Aico mingue chõ nguiã se co. Jeñimbaaquiato jiri seriĩ. Jeñimbucha chõ serese. Eĩ jenyu mose ra jeñia pare pare i eã cote. Jêya bei ra jêingo cote. 30 Ae siqui serimbarã nae, ùquĩ iate riqui ã. Secheẽ mbaranguiatuã eãte aba je, i que Jesús ñee nda.

12

Jesús chimbbaaquiato mbae a ishao shao sábado mose

1 Sábado mose que Jesús si quia mbiaco ite ite riĩ emo mose ra. Echimbbaaquiato riãcuãte que eriqui ra. Nyebe que quiata a ucua mii mii nyoĩ quia ecuã mose ra. Equiti quitire oo je que echoĩ quia eachãaña cote ra. 2 Fariseos mo ngue ñee ee ra. —¿Mbaerã ndechimbbaaquiato riqui mbae ishao shao sábado mose re? Co mose chõ mbia riqui uquenea ucua resẽ, i que fariseos ñee Jesús je ra. 3 Jesús que ñee ee ra. —¿Embese ji rese jemae eã David riĩ nyii re? David riãcuãte que aque mose ra. Eresenda abe riãcuãte que eriqui aque mose no nda. 4 David que ique Dios chuchúaa aque mose ra. Mbichae Dios chuchua

jenda que eu ra. Mee mee ngue nguesenda abe je ra. Eriãcuãte quiatu ngue re. Sacerdote achõ mbaerã ndaque mbichae. ⁵ ¿Moisés chimbese rese jemaie ãte sacerdote rĩĩ nde? Sábado mose que quieie quieie rei Dios chuchua ra. “Dios cheẽ mumbasa”, i ãte quia mbia nguiã ñee ee. ⁶ Tacheẽ nyecua jẽje. Secheẽ nguia i tuchi jiri nguiã Dios chuchua si co. ⁷ Co embesa ji jẽicuayãte quia ã. “Sebite jẽya eã jẽingo mose mbia rese. Sebiãte ofrenda jemee ñooño mose”, i Dios quia co. Jẽingo ãquĩ icuayãte ã. Eĩ nda jeñee icuã eãte rei mbia turã je. ⁸ Sábado rerecua bei chõ se re, i que Jesús ñee fariseos je ra.

Jesús emo o tomei mbucherõ

⁹ Jesús que oso mbia chumunuásaa cote ra. ¹⁰ Huee que eo tomei mo ndiqui ee ra. Mbua que Jesús mbucheẽ icuã sete ra. Nyebe ñee nguiã ee. —¿Eicuãte erasi mbucherõ sábado mose re? ¿I ere? Echeẽ ure je jẽ, i que mbia ñee Jesús je ra. ¹¹ Jesús que ñee ee ra. —Sã jenimba oveja mo ndiqui jaã no. Ngoi oso ibicua mo ye no. ¿Sábado mose ra jenosẽ ibicua si re? Ae. Jenosẽ jei rae. Sábado mose raque. ¹² Dios queteamba tuchi chõ mbia riqui nguiã oveja si ã. Coche nandeico nguiã mbae turã naa naa sábado mose, i que Jesús ñee mbia je ra. ¹³ Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ¹⁴ Nyebe fariseos paama i nguiã Jesús je. Mbua mbucherõ mose sábado mose. —¿Mañi nande ra Jesús je re? Nandeiquia rei ra reae, i tuchi que eu ñee nyue ra.

Isaías chimbese ique Jesús rĩĩ

¹⁵ Jesús que jirandu ãquĩ ñee ndese ra. Nyebe esi nguiã hue si. Mbua tubiriã ngue nyoie erui ra. Jesús que mbia rasi mbucherõ cherõ ja quia ra. ¹⁶ —¿Mbua ra jembiiranduchi serese jẽ! i que Jesús ñee ee ra. ¹⁷ Aque mose

que Isaías chimbese ique cote ra. Eĩ ngue Isaías embesa mĩ Jesús rĩĩ nda:

¹⁸ Serimba chõ co re. Co que airabo ra.

Sechesequa chõ ae re. Seyate aico erese co.

Espíritu Turã tamondo tuchi ee.

Ae ra secheẽ turã senei senei ja mbia je.

¹⁹ Eicuã icuã eã nda emo je. Ñee icuã eã ndae. Ucuasu ra esaã saã eã mbia je.

²⁰ Siqui turãte ra equia equirãcuã nea je.

Siqui turãte ra equia eaquiataũ je no. Mbua ra siqui turã nyee erui ererecuarã.

²¹ Mbua ja ra ndua turã mbei erese cote, i que Isaías embesa cose ra. ãquĩ ngue ique cote ra.

Aba checuayã quirãcuã Jesús quereco co, i raque mbua

²² Mbua que eresayã mo curucuaẽ Jesús je ra. Echeẽ aquiataũte abe que ra. Aba checuayã icuã nguiatu ngue siqui nguiã echangui re. Jesús que embucherõ nda. Nyebe mae turã nguiã cote. Ñee turã abe cote no.

²³ Mbua que nyuruira ja mae erese ra. —David rucucha chõ Jesús riqui re, i chõ ngue mbua quia ndua ndua ra.

²⁴ Fariseos que echandu ja ra. Nyebe ñee icuã icuã nguiã Jesús je. —Aba checuayã icuã nderecua tuchi chõ

Satanás nde. Satanás quirãcuã je chõ Jesús riqui nguiã aba checuayã icuã jea jea mbua si co, i rei que fariseos ñee icuã Jesús je ra. ²⁵ Jesús que ãquĩ ndua ndua icuate ra. Nyebe ñee nguiã ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno. ²⁶ ¿Mañi nda Satanás aba checuayã jea mbua si re? Erimba chõ nyeresẽ. Satanás icuã icuã mose nyue, equirãcuã nda

ua no. ²⁷ “Satanás quirãcuã je chõ Jesús riqui nguiã aba checuayã jea jea mbua si”, jenyẽ chõchĩ nguia seje ã. ¿Aba uquirãcuã mee jenimba je jẽ nde? Aba checuayã icuã jea nonde re. ¿Satanás uquirãcuã mee jenimba je serese re? ²⁸ Dios quirãcuã je

quiatu aico nguiã aba checuayã jea jea mbia si co. “Dios quirãcuã ndese chõ ureico nguiã mae”, jenyẽ eã ñochĩ equia ã. ²⁹ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ³⁰ Ae siqui ãte quia serese nae, eicuã ño ãquĩndiqui nguiã seje. Ae secheẽ senei senei eãte quia mbia je nae, ãquĩ icuã ño eriqui nguiã seje. ³¹ Tacheẽ nyecua jẽje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. Emo ñee icuã mose Espiritu Turã ñi, ãquĩ icuã nguiatu ra Dios mbutiã eã mbei esi. ³² Emo ñee icuã mose seriĩ, Dios echeẽ icuã mbutiã arõte. Emo ñee icuã mose Espiritu Turã ñi, ãquĩ icuã nguia ra Dios mbutiã eã mbei. Mbae ua ja mose chee ra Dios ãquĩ ñee icuã mbutiã eã mbei.

Sã ira ae ea ae ae no

³³ Ira turã mose, ea abe ra eturã no. Ira icuã mose, ea abe ra eicuã no. Mbia ira icua mose, ea abe ra eicua. Nyiabiã ndae. Sã ira ae ea ae ae no. ³⁴ Mbei rã ño jẽingo nguiã. Jẽicuã ño jẽingo nguiã. Nyebe jeñee turã aquiatu ãte riqui ã. Ae rese mbia riqui ndua ndua uchiangui re nae, ãquĩ ñi sí ra ñee. ³⁵ Mbia turã nda ñee turã. Echiangui renda quia eturãte re. Nyebe eriqui nguiã ñee turã. Mbia icuã nguia ñee icuã nguiã. Echiangui renda quia eicuãte riqui nguiã. Nyebe eriqui nguiã ñee icuã. ³⁶ Tacheẽ nyecua jẽje. Emo ñee ñooño mose, Dios ra ñee asite aque je. Dios mbia icuã ndea rea mose. ³⁷ Emo ñee turã mose, echiangui renda turã ño ñene. Nyebe ra Dios ñee asiã ee. Emo ñee ñooño mose, echiangui renda icuã ño ñene. Nyebe ra Dios ñee asi ãquĩ je, i que Jesús ñee nda.

Mbia mae sayã esaã ure je, i bei mbia Jesús je

³⁸ Fariseos mo ngue ngaẽ Jesús rea ra. Embesasa abe que ngaẽ erea ra. Ñee ngue ee ra. —Mbia mae sayã esaã na ure je, i rei que ñee Jesús je ra. ³⁹ Jesús que ñee ee ra. —Jẽicuãte riqui co mosenda jẽ ja ã. “Mbia mae sayã esaã ure je”, jenyẽ beite equia ã. Mbia mae sayã mii ño nda asaã jẽje. Jonás na si. ⁴⁰ Sã Jonás ndiqui raque tres días sira rie ye no nae. Jonás na sí ra asaã mbia je. Tres días ra aico ibicua rie. ⁴¹ Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huicua ndecha Jonás ñee mose ee no. Aico raque ñee jẽje co mosenda je co. Jẽ secheẽ jemumbate chõ chĩ nguia ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose. ⁴² La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu isho si tuchi Salomón ñee andu no. Se quia acheẽ ndaque quia jẽje. Searacua tuchi raque se quiatu Salomón si. Secheẽ jemumbate chõchĩ nguia ã. Nyebe ra Dios jembasi tuchi mbia icuã ndea rea mose.

Aba checuayã icuã nyebi u mbia chiangui re

⁴³ Aba checuayã icuã usẽ mose emo ñia si, ngata bei chõ nguiã. “¿Mangue ra sequenea aucua que re?” i chõ nguiã. Uquenea ucua sacua mo etea eãte. ⁴⁴ “Tasobe rei nyebi. Ae si achu usẽ, aque chiã ye sí taso”, i que aba checuayã nda. Nyebi si mose u, mbia chiã oreãte que ee ra. Echiã ndecoteã eãte que ee ra. Tuchua tii ji raãte que ee ra. ⁴⁵ Aba checuayã icuã ngue nguesenda siete queru cote ra. Ique ja que echoi aque chiangui re cote ra. Ae chiangui re aba checuayã icuã siete riqui nae, aque icuã i i tuchi que eriqui cote ra. Aba checuayã mii ngue siqui eye nyii ra. Etubiriãte cote. Aque icuã tuchi cote nyii si, i que Jesús mbia je ra.

Jesús nongue ngaẽ erea usi resẽ

⁴⁶ Jesús ñee mbei mose que esi ngaẽ ndei ee huee ra. Jesús nongue ja rese. Chichõ ja chõ ngue taicuee ra. Ñee serete que ee ra. ⁴⁷—Hue ndesi riqui nderequia taicuee huee. Ndenongue rese, i que emo Jesús mbiirandu ra. ⁴⁸ Jesús que ñee umbiirandusa je ra. —¿Aba je chõ aico “taĩ” i chã? ¿Aba je chõ aico “senongue” i no ña? i que Jesús ñee nda. ⁴⁹ Jesús que o mee uchimbaaquiatu cuti ra. —Ã je chõ aico nguiã “taĩ” i. Ã je chõ aico nguiã “senongue” i no. ⁵⁰ Ae Paba Ibatenda cheẽ mumbayã nguia nae, ãquĩ je chõ aico nguiã “senongue” i. Ñquĩ je chõ aico nguiã “taĩ” i no, i que Jesús ñee ee ra.

13

Emo mbae eĩ mombiquia mbiquia

¹ Aque mose sí que Jesús si usẽ tuchia si ra. Tuchia si que esi ngoi ama ndish a nimíaa nda. ² Mbia que ngaẽ ngaẽ ja quia Jesús rea ra. Nyebe Jesús ua oso nguiã ngoi canoa ye. Mbia quiatu que chichõ ama nimíaa ndese ra. ³ Jesús que embaaquiatu quiatu tuchi quia ra. Ejemplos que esaã saã tuchi ee ra. —Sã emo si rei mbae eĩ mombiquia mbiquia no. ⁴ Sã emo ndiqui uqui uqui ñeenda rui no. Sã nguireĩ ndiqui ngaẽ eu no. ⁵ Sã emo emo ndiqui uqui sita arõ no. Sita aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiã. ⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echatí asi u eriquisã nda. ⁸ Sã emo ndiqui uqui uqui ibi túraã no. Ñquĩ nguiatu que ia turã nda. Sã emo ia cien no. Sã emo ia sesenta no. Sã emo ia treinta no. ⁹ Jëisa mose, jsecheẽ jeñandu turã na!

Dios riqui ucheẽ mbiasa jaaja jëje co, i uchimbaaquiatu je

¹⁰ Jesús chimbaaquiatu que ñee nyecuayã Jesús ísaa ra. —¿Mbaerã ejemplos achõ eresenei senei mbia je re? i que echimbaaquiatu ñee ee

ra. ¹¹ Jesús que ñee ee ra. —Mbia rerecua tuchi quiarei Ibatenda. Ae riqui nguiã ucheẽ mbiasa asa ja jëje co. Mbia ataque quia siqui sereã erese co. Mbia ataque je quia eriqui nguiã ucheẽ mbiasa eã jiri. ¹² Emo umbae rerequia mose, Dios ra emo mondobe ee. Emo embae eã mose, Dios ra embae sirõ ja esi. ¹³ Nyebe aico nguiã ejemplos achõ nenei nenei mbia je co. Eanduchõ sacua. Eicua turã ndocoĩ. ¹⁴ Mbia eanduchõ mose que Isaías chimbasa ique cote ra:

Mbia ra secheẽ ñandu raque.

Icuayã nguiatu rae.

¹⁵ Eãquĩ átãte riqui ã.

Secheẽ andu sereãte equia ã.

Mae sereãte equia sechiao rese ã.

Ndua eã mbei equia serese ã.

Nyebe ra ambitirõ eã mbei,

i que Dios cheẽ Isaías chimbasa rese ra. ¹⁶ Jë nguiatu Dios cheẽ jeñandu turãte nguiã ã. Jë nguiatu jemae serete nguiã Dios chiao rese ã. Nyebe jëyate jëingo nguiã ã. ¹⁷ Tacheẽ nyecua jëje. Ae jeñandu quia secheẽ ã nae, Dios cheẽ mbuchecuasa ñiinda ã ñandu serete raque. Mbia turã ñiinda abe ã andu serete raque. Ñandu eã mbeite equia ã. Jë ae chõ jëingo nguiã eandu ã cote. Jë ae je chõ ehecua riqui nguiã.

Jesús ucheẽ mbiasa uchimbaaquiatu je mbae eĩ ñi

¹⁸ Secheẽ tambiasa jëje cote. Mbae eĩ mombiquia mbiquia ji rñi. ¹⁹ Ae uqui uqui ñeenda rui nae, Dios cheẽ andu chooñosa rã ño ñquĩ nde. Icu eãte quia ñene. Nyebe diablo ru nguiã Dios cheẽ ndirõ echiangui si. ²⁰ Ae uqui uqui sita arõ nae, mbia mo na ño ñquĩ no nde. Dios cheẽ andu mose, isi turã ndaque. Eyate raque erese. ²¹ Mbia icua icua mose ee Dios cheẽ ñi, hui jei chõ nguiã esi. Mbae rao eã naanguia chõ ñquĩ nde. ²² Ae uqui uqui nyu réndaa nae, mbia mo na ño ñquĩ no nde. Dios cheẽ andu turã ndaque. Siqui bei eã ño nguiã erui. Umbaerã achõ ndese chõ eriquichĩ nguiã ndua. “Mbaecha tuchite ra se”,

i bei chõ nguiã ndua ndua. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbeite ee. ²³ Ae uqui uqui ibi túraã nae, mbia mo na ño ùquĩ no nde. Ûquĩ nguiatu Dios cheẽ ñandu turã nguiã. Icuã icua turã ño nguiã. Nyebe eriqui bei nguiã erese. Ia ia bei raanguia cote. Emo emo ia cien. Emo ia sesenta no. Emo ia treinta no, i que Jesús ucheẽ mbiasa ñee nda.

Mbae icuã suri trigo turã ndese

²⁴ Jesús que ejemplo nongue senei ee ra. —Sã emo trigo eĩ mombiquia mbiquia úcoo no. Ûquĩ na ño Dios rimba riqui nguiã ã. ²⁵ Sã trigo eĩ mombiquiasa uque cote no. Sã emo tu nyu eĩ mombiquia mbiquia trigo eĩ mumbara mbara no. ²⁶ Trigo eĩ ngue obo cote ra. Nyu abe que suri erese ra. ²⁷ Nyebe erimba ñee nguiã echa je. “Trigo eĩ achõ eremombiquia mbiquia reĩ nguiã seje. ¿Mbaerã nyu abe riqui suri suri erese re?” i que ererecua je ra. ²⁸ Ererecua que ñee ee ra. “Seucuãyãsa chõ ùquĩ nde. Nyu eĩ mombiquia mbiquia chõchĩ trigo eĩ mumbara mbara”, i que ererecua ñee nda. —¿Ureso ra eriqui riqui re? i rei que erimba ñee nguerecua je ra. ²⁹ Ererecua que ñee nda. “Tei. Nyu riqui riqui mose ra trigo abe riqui riquichĩ nde. ³⁰ Sã echichõ ja. Eucua mose ja chee. Ea ireĩ mose quiatu ra acheẽ serimba je cote. Serimba ra nyu rane siqui siqui aque mose cote. Nyu ra eseĩ cote. Aquere quia ra trigo a ishao shao erereco quiatu sacua sechuchua cote”, i que echa ñee nda, i que Jesús ñee nda.

Mbae eĩ na ño Dios rimba re

³¹ Jesús que ejemplo mo senei mbia je ra. —Mbae eĩ na ño Dios rimba re. Sã mbia mostaza eĩ tiquia no. ³² Eñetẽ tuchite raque mbae eĩ mo si. Suri oso quia cote. Ecuasu tuchite chee cote. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ûquĩ miĩ ndaque nyii.

Ñimbeta tuchi cote. Mbae eĩ na, i que Jesús ñee nda.

Levadura rã ño Dios rimba re

³³ Jesús que ejemplo mo senei mbia je ra. —Levadura rã ño Dios rimba re. Sã mbia levadura ñetẽ mondo mbichae ao ramo mose no. Sã levadura riqui oso mbichae mbuchimatã ja no. Eĩ si chõ Dios rimba re, i que Jesús ñee nda.

Jesús ejemplos senei tuchi mbia je

³⁴ Eĩ ño ngue Jesús quia mbia tubiriã mbaaquiato quiato ejemplos je ra. Ejemplos achõ ngue esenei senei mbia mbaaquiato sacua nda. ³⁵ Nyebe Dios cheẽ mbuchecua chimbesa ique cote. Eĩ ño echimbese re: Ejemplos je mbia tambaquiato quiato.

Ae mbia icuayã mbeite quia nae, ùquĩ tambuchecua mbia je, i que embesa ji ra, i que Jesús ñee nda.

Jesús ejemplo mbuchecua nyu eĩ niĩ

³⁶ Jesús que mbia mondo ja cote ra. Aquere que esi ique tuchu a mo nda. Echimbbaquiato que ecurubite ñee ee ra. —Ae ejemplo eresenei mbia je nyu eĩ niĩ nae, ùquĩ embiasa jiri ure je, i que ñee ee ra. ³⁷ Jesús que ñee ee ra. —Ae trigo eĩ mombiquia mbiquia nae, se rã ño ae re. ³⁸ Ae íbii emombiquia mbiquia nae, mbia ja rã ño ùquĩ ibi re. Trigo eĩ turã na ño Dios quiato re. Nyu eĩ icuã na ño diablo quiato no nde. ³⁹ Ae mbae eĩ icuã mombiquia mbiquia nae, aba checuayã nderecua rã ño ùquĩ nde. Mbae a ishao shao raanguia ra ibi ua mose cote. Mbae a ishao shaosa rã ño angeles re. ⁴⁰ Sã mbia riqui nyu mombo mombo tátaa nae, eĩ si ra Dios uquiatoã mombo tátaa ibi ua ja mose no. ⁴¹ Serimba ángeles ra amondo mbi a rea rea ja. Ae mbae icuã saã uquia quia mbia je nae, serimba ra ùquĩ sirõ ja. ⁴² Serimba ra ùquĩ mombo mondo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁴³ Ae Dios mbuturã nae, ùquĩ nininya tuchi

ra tenda rã si cote. Eru ibatenda siqui mose mbia rerecuarã tuchi.

Tesoro rã ndei Dios cheẽ

⁴⁴ Dios cheẽ nguiirĩ nĩ ndei eturã tuchi mbae ja si. Eturã tuchi tesoro si no. Sã amei mo tesoro ati ji rea íbii no. Tesoro turã tuchi que ee ra. Amei ia tuchi que erea mose ra. Sã amei vender i ja umbae je no. Aque ibi isi sacua. Tesoro mĩ ndese ndua.

Dios cheẽ ndei perla turã na

⁴⁵ Dios cheẽ nguiirĩ nĩ ndei eturã tuchi mbae ja si. Sã comerciante mo perlas turã ndequia requia no. ⁴⁶ Perla turã tuchite mo ndea mose, aque mĩ ndese chõ eriqui nguiã ndua ndua cote. Sã vender i ja umbae je aque perla ribishorõ no.

Dios ra mbia icuã quirirõ

⁴⁷ Sira mbua mbua ji rã ño Dios rimba re. Sã emo tarafa mondo ii no. Sira chumumbarate que embua ra. ⁴⁸ Sã sira mbuasa mbisẽ tuchi riqui no. Sã echa econosẽ serao usẽ cote no. Echa que ngoi sira turã irabo rabo cote ra. Sira icuã ndirirõ ndirõ emombo sacua. ⁴⁹ Eĩ si ra Dios mbae ua ja mose. Dios ra ángeles mbu mbia icuã mombo sacua mbia turã si. ⁵⁰ Eicuã nda emombo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁵¹ ¿Secheẽ jẽicuate rei quia ã nde? i que Jesús ñee mbia je ra. —Ae, i que ñee Jesús je ra. ⁵² Jesús que ñee ee ra. —Embesasa mo siqui mose serese, mbaecha rã ño aque re. Sã mbaecha riqui umbae ima ndirõ mbia je emo mose no. Umbae yasu abe rirõ emo mose no, i que Jesús ñee mbia je ra.

Mbia Nazaret jenda Jesús isiteã

⁵³ Jesús que ùquĩ ejemplos senei ja mbia je ra. Hue si que esi cote ra. ⁵⁴ Oso que ngasẽ nguecua Nazaret cote ra. Oso que mbia mbaaquiato judíos chumunuásaa ra. Nyebe mbia nyuruira tuchi nguiã ñee nyue. — ¿Mangue eriqui ñimbaaquiato tuchite re? Nandemae sayã esaã saã tuchichĩ nguia re. ⁵⁵ Ira mbitirõ tirõsa ririĩ ño ndaque. María abe ririĩ ño ndaque

no. Jacobo nongue chõ ndaque. José abe no. Simón abe no. Judas abe no. ⁵⁶ ã echari abe riqui ja raque nanderese ã. ¿Mañi equia mbae i cua ja tuchite re? i que mbia Jesús recu a jenda ñee nyue ra. ⁵⁷ Nyebe mbia hue jenda riqui Jesús isiteã nde. Jesús que ñee ee ra. —Dios cheẽ mbuchecuaa ishonda cheẽ nguia ra mbia isi turã mbei. Nguecua jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee nguecua jenda je ra. ⁵⁸ Hue jenda mbia que Jesús icua eãte ra. Isiteã ño ngue ra. Nyebe Jesús mbia mae sayã naa eã jiri nguiã ee huee.

14

Mbia Juan el Bautista icuia

¹ Mbia que jirandu ja Jesús rese cote ra. Herodes abe que jirandu erese ra. Ererecua que ae ra. ² Juan el Bautista Jesús riqui rei ee reaẽ. Ae que ñee ngũimba je Jesús rĩ nda. —Sechĩquia quera si chõchĩ. Juan el Bautista quera si chõchĩ. Nyebe eriqui nguiã mbia mae sayã naa naa co, i que Herodes ñee Jesús rĩ nda. ³⁻⁴ Herodes que Juan isi icuã nyii ra. Nyucua que mondo tarõ nda. Paama i nda Juan je ra. —iNde ndenongue ninisi erereco aroneate jẽ! i quiatu que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra. ⁵ —Juan taquia, i rei que Herodes ñee nda. Mbia ataque quiarei siqui tuchi Juan ndese. Dios cheẽ mbuchecuaa, i chõ mbia nguiã Juan je. Nyebe Herodes siquiche jiri nguiã Juan icuiayã aque mose. ⁶ Herodes mbae cumpleanos mose, Herodías ririĩ ngue nyuruqui ruqui mbia ja je aque mose ra. Nyucuaaque que ae ra. Herodes ia tuchi que mae nyucuaaque nyuruqui rese ra. ⁷ —¿Mbae ra amee ndeje re? Echeẽ ño seje. “Sebite co” nde i mose, aque tamondo ndeje. Acheẽ ñooño eã ño nguiã ndeje a, i que Herodes ñee nyucuaaque je ra. ⁸ Esi quia

ñee ñee nguia nyucuaaque je nyii reaẽ. Nyebe nyucuaaque ñee nguia Herodes je. —Juan el Bautista ãquĩ emee na seje mbia chiu riru ye, i que nyucuaaque ñee ererecua Herodes je ra. ⁹ Ererecua chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. ã seandu ja chõchĩ. Nyebe ra secheẽ ambuchebi eã ee, i que ererecua uchiangui re ra. —Juan ãquĩ emee ee, i que ngũimb a je cote ra. ¹⁰ —Juan ãquĩ jendoso oso cárcel. Jemondo nyucuaaque je, i que ra. ¹¹ —Juan ãquĩ ngue ecurucuaẽ mbia chiu riru ye cote ra. Mee ngue nyucuaaque je cote ra. Nyucuaaque que emee usi je cote ra. ¹² Juan ñimbaaquiato que ngaẽ Juan ndaaque rea ra. Nyati que suruchoi ra. Nyoĩ que Jesús mbiirandu erese cote ra.

Jesús mbichae tubiriã saã mbichae mĩje

¹³ Jesús jirandu mose Juan ndese que esi turúquiaa ra. Ama ndui que esi canoa ye ra. Mbica que jirandu randu erese ra. Nyebe nyoĩ ja nguia erui ibi rĩ. Sucha ja ja jenda. ¹⁴ Jesús que usẽ canoa si cote ra. Mbica tubiriã ndese que mae nda. Eya eã tuchite que erese ra. Erasi que embucherõ cherõ nda. ¹⁵ Tenda nyesecco mose que echimbaaquiato ñee ndei ee ra. —Mbae ãte a turúquiaa. Tenda abe nyeseccote. Mbica emondo rã sucha tubiriã nia. Sã echoi bei uchiurã isi, i rei que echimbaaquiato ñee Jesús je ra. ¹⁶ —Sã echoi eã. Jeño mbae jemondo ee echiurã, i que Jesús ñee ee ra. ¹⁷ —Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiato ñee Jesús je ra. ¹⁸ —Jembu rã seje, i que Jesús ra. ¹⁹ Ñee ngue mbica tubiriã je cote ra. —Jengoi ja quiata tose, i que ra. Jesús que mbichae cinco sirõ cote ra. Sira nyeremo abe no. Mae ngue ibate ra. Gracias, i que ñee Dios je ra. Mbichae que esiquio quio cote

ra. Mee ngue uchimbaaquiato je ra. Echimbaaquiato que emee mee mbica ja je cote ra. ²⁰ Mbica que embuquiato ja tuchi cote ra. Miãtã tuchi que ra. Mbica huia tubiriã ngue cote ra. Sira rire. Mbichae rire abe no. Doce iru que mbica mombisẽ esique sique je ra. ²¹ Ae mbichae u sira rese nae, etubiriã tuchite que ra. Cinco mil ndobei. Cuña abe etubiriã. Mbica riiri abe etubiriã no.

Jesús ngata i arõ

²² Aquere que Jesús uchimbaaquiato mondo ja canoa ye ra. —Jẽ nane jẽso sobei. Mbica tambui turã na mondo uchuchúaa se nyii, i que ra. ²³ Jesús que mbica tubiriã mbui turã mondo uchuchúaa cote ra. Ae ae que oso sita ibate rĩ cote ra. Ñee sacua Dios je. Huee que ae ae riqui itondaru chee ra. ²⁴ Canoa yenda que chi bei quia ama ite rĩ nda. Quiririã ngue tu icuã icuã ee ra. I rebera que tu asi asi tuchi ee ra. ²⁵ Nguira cheẽ mose que Jesús ngasẽ ee ra. I arõ ngue esi quia ngata ra. ²⁶ Echimbaaquiato que mae erese ra. Echiã ngue cuaãcuã i tuchi ra. Ngata mose i arõ. —Aba checuayã ño tu nguia aque, i rei que tasẽ tasẽ nda. Siquiche tuchi que ra. ²⁷ —Jẽsiquichechĩ nguia. Se chõ nyeresẽ, i jeite que Jesús ñee ee ra.

²⁸ Pedro que ñee ee ra. —Nde mose, echeẽ seje. “Echu ngata i arõ”, ere seje, i que Pedro ñee Jesús je ra. ²⁹ —Quiatuchu, i que Jesús ñee ee ra. Ae Pedro nguichi nguia canoa si i rese irõ. Oso nda ngata i arõ Jesús rea chã nde. ³⁰ Pedro mae mose quiririã icuã ndese que esiquichete ra. I que oso quia ñiimi nda. —¡Sererecua! ¡Senonosẽ na se! i que ñee Jesús je ra. ³¹ Ae Jesús o mondo nguia eo isi. —Seicuayã ñochĩ. ¿Mbaerã ereico seicuayãte re? i que Jesús ñee ee ra. ³² Ua mose canoa ye que quiririã tiba cote ra. ³³ Canoa yenda que ñee turãte Jesús je cote ra. —Dios rucucha tuchi chõ nde riqui re. ¡Ae bei jẽ! i que ee ra.

Jesús mbica Genesaret jenda mbucherõ cherõ

³⁴ Ngasẽ nyee que sobei cote ra. Genesaret, i que hue ibi je ra. ³⁵ Hue jenda que jirandu ja erese ra. Hue rurubinda abe que mbia mbiirandu erese ra. Mbia que er asi curucuaẽ cuaẽ ja Jesús je cote ra. ³⁶ —Sã mbia rasi oco oco rã ndeirão ai rese, i tuchi que mbia Jesús je ra. Ae oco erese nae, ùquĩ ngue nyerõ nyerõ ja ra.

15

Mbia chiangui renda ae chõ embiçuã nguiã

¹ Aquere que fariseos mo ngaẽ ñee Jesús je ra. Embesasa mo abe que ra. Jerusalén jenda chõ ùquĩ ja re. ² Ùquĩ ngue ñee Jesús je ra. —¿Mbaerã ndechimbaaquiato riqui nanderamei ñee mumba mumba beite re? Echoi quiiriã mbei chõ quiaru nguiã, i que ñee asite Jesús je ra. ³ Jesús que ñee ee ra. —¿Mbaerã jẽingo Dios cheẽ mumba mumba jẽ nde? Jenamei ñee ndese chõte jẽingochĩ nguiã ã. Siqui rocoĩ Dios cheẽ ndese. ⁴ Dios que ñee mbia je cose ra. “Jẽturã ño jẽingo jendu je. Jẽsi je abe no. Emo ñee icuã mose ngu rĩ, ùquĩ jẽiquia. Emo ñee icuã mose usi abe rĩ no, ùquĩ abe jẽiquia no”, i quia que Dios ñee mbia mbaaquiato cose ra. ⁵⁻⁶ Dios cheẽ jenyabi tuchi chõchĩ nguia mbia mbaaquiato quiato ã. “Ae nda amee neĩ jẽje, ùquĩ ngue amee ja Dios je ra”, i mose emo ñee ngu je, “coche ñene” jenye chõchĩ nguiã ee. Mbae mee eã mose ngu je. Usi abe je. Nyebe jẽingo nguiã mbia mbaaquiato icuã icuã ùquĩ. Jenamei ñee achõ ño jẽsenei senei nguiã mbia je ùquĩ. Dios cheẽ nenei nenei ndocoĩ ee. ⁷ Jẽturã jẽsaã ñooño ño nguiã ùquĩ. Jeni tuchi chõ ngue Isaías embesa nguiã cose. Eĩ ngue Isaías embesa cose ra:

⁸ A mbia ñee turã ndaque quia seje ã. Uchiangui re quia eriquiãte nguiã serese ã.

⁹ Ñee turãte raque equia seje ã. Amei ñee achõ ño esenei seneichĩ nguiã mbia je.

Dios cheẽ mi nenei nenei ndocoĩ ee, i que Isaías embesa jeni nda, i que Jesús ñee ucuasu raã naasa je ra.

¹⁰ —Jenyu rã secheẽ andu, i que Jesús ñee mbia tubiriã je ra. — Secheẽ jẽicua rã jeñiangui re. ¹¹ Mbia chiu embiçuã eã nguiã. Echiangui renda chõ embiçuã nguiã. Echiangui renda chõ usẽ nguiã echuru rĩ echeẽ mose. Ùquĩ ño embiçuã nguiã, i que Jesús mbia mbaaquiato ra. ¹² Echimbaaquiato que ngaẽ ñee Jesús ísaa cote ra. —¿Ereicuayãte ere? Ndecheẽ ngue fariseos mbupaama ite ra, i que echimbaaquiato ñee nyecuayã ee ra. ¹³ Jesús que ñee ee ra. —Ae ira Paba Ibatenda chutã eã nae, ùquĩ nda esiqui ja erao resebe. Ùquĩ ira rã ño fariseos riqui nguiã ã. ¹⁴ Eresayã na ño fariseos riqui nguiã. Sã eresayã mo “ñeenda tateacuquia jẽje” i raque emo je no. Quiachã ja chõ ndae, i que Jesús ñee ee ra. ¹⁵ Pedro que ñee ee cote ra. — Erecheẽ ngue namo, “ùquĩ nda mbia mbiçuã” ere que, ùquĩ embuchecua rã ndecheẽ ure je, i que Pedro ee ra. ¹⁶ Jesús que ñee ee ra. —¿Jẽ abe jẽicuayãte quia re? ¹⁷ Ae mbia u quia nae, osõ chõ nguiã erie ye. Echique rui chõ eriqui nguiã oso oso. Usẽ nyee. ¹⁸ Mbia chiangui renda chõ embiçuã nguiã usẽ mose echuru rĩ. ¹⁹ Aba chiangui renda quia aba mundua icuã icuãte nguiã. Nyebe mbia riqui nguiã emo iquia. Siqui siqui emo ninisi rese. Emo ndu rese abe no. Siqui siqui eruã ndese no. Mbae mbuquiachã quiachã no. Ñee ñooño abe no. Ñee icuã icuã no. ²⁰ Mbia chiangui renda ja chõ ùquĩ nde. Ùquĩ ño mbia mbiçuã icuã nguiã ùquĩ ao ao mose. Uchoi quiiriã mose quiaru, ùquĩ nguia ra mbia mbiçuã eã, i que Jesús ñee nda.

Ari mo Jesús icua

²¹ Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no. ²² Ari mo Canaán jenda que siqui huee ra. Ae que tu ñee

Jesús je ra. —David nducucha chõ nde re, Jesús. ¡Ndeyayã ño serese jê! Aba checuayã icuã ndiqui seriirĩ mbasi mbasi co, i tuchi que ari ñee Jesús je ra. ²³ Jesús que ñee âte ee ra. Echimbaaquiato que ngaë ñee Jesús je ra. —Ari emondo chõ uchuchúaa. Eñi mbeichĩ ñee nande je a, i que echimbaaquiato ñee Jesús je ra. ²⁴ Jesús que ñee ee ra. —Sã ovejas mo quiachã no. Ñquĩ na ño judíos riqui nguiã ã. Judíos achõ je chõ ngue Dios sembu nguiã, i que Jesús ee ra. ²⁵ Ari que tu ngoi nguiã ndese ñee Jesús je ra. —Sererecua, seriirĩ embucherõ na seje, i que ari ñee Jesús je ra. ²⁶ Jesús que ñee ee ra. —Judíos rese rane taico mbae raã naa. Ahui aronea judíos si, mbae raã naa mbiamo je, i que Jesús ee ra. ²⁷ Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure abe je chõ mbae esaã ae. Seriirĩ embucherõ seje ae, i que ari ñee ee ra. ²⁸ —Seicuate equia co, Ari. Nderiirĩ tambucherõ ndeje, i que Jesús ñee ari je ra. Aque mosechi tuchi que eriirĩ nyerõ nda.

Jesús mbia rasi chumumbara mbucherõ

²⁹ Jesús que oso hue recha cote ra. Oso que equia ama nimia ndui ra. Ama Ndishã Galilea nimia ndui. Hue si que esi sita ibate cote ra. Huee que ngoi huee ra. ³⁰ Mbiam que ngaë ngaë tuchi quia ee huee ra. Erasi chumumbara rurucuaë cuaë tuchi ee. Ecuatayã. Eresayã. Echeë nguiã. Eo icuã. Mbiam que ñquĩ ndasi chono ja Jesús i jii ra. Jesús que ñquĩ mbucherõ ja ra. ³¹ Nyebe mbiam riqui nguiã nyuruira tuchi mae erese. Echeë nguiã ñee turã mose. Eo icuã mbuturã mose. Ecuatayã ngata turã mose. Eresayã mae turã mose. Nyebe mbiam ñee turã ja nguiã Dios rii.

Jesús mbichae tubiriã saã mbichae mii je

³² Jesús que ñee uchimbaaquiato ísaa cote ra. —Seyayãte aico ã mbiam tubiriã ndese co. A echi arete serese

tres días a. Embae mo eãte echiurã aa. Eriãcuã amondo sereãte echuchúaa. Eriãcuã nda eiquia ñeenda cúa, i que Jesús ra. ³³ Echimbaaquiato que ñee ee ra. —Turúquiaa chõ nandeico a resë. ¿Mañi nda aba ã mbuquiaru ja re? Mbae eã tuchite a resë, i que echimbaaquiato ñee Jesús je ra. ³⁴ —¿Manya mbichae jembae re? i que Jesús ee ra. —Siete mbichae. Sira ñetë mo ndese, i que ee ra. ³⁵ Jesús que mbiam mbucoi ja íbii ra. ³⁶ Mbichae que eisi ja o je ra. Sira ñetë abe no. Gracias, i que Dios je ra. Mbichae que esiquio quio mbiam je cote ra. Sir a rese. Mee ja que uchimbaaquiato je cote ra. Ñquĩ ngue emee mee mbiam ja je cote ra. ³⁷ Mbiam que eu ja ñimbio chee ra. Mbichae sique sique que emunua nua ja ra. Sira sique rese. Siete iru que emombisë nyee ra. ³⁸ Mbichaecua rei mbiam cuatro mil. Cuña abe abe. Mbiam riirĩ abe abe no. ³⁹ Jesús que mbiam mondochoi ja cote ra. Jesús que ua canoa ye cote ra. Oso que Magdala quitu cote ra.

16

Mbiam mae sayã eteacuquia ure je, i fariseos

¹ —Tã nande rã Jesús je, i que fariseos ñee nyue ra. Saduceos rese. Nyebe ñquĩ ngaë nguiã ñee Jesús je. —Mbiam mae sayã esaã na ure je. I nda “Dios chimbu” ure tuchi ndeje, i rei que ñee Jesús je ra. ² Jesús que ñee ee ra. —Ibei jëicuate raque ñquĩ. Ibei ireĩ ndese jemae mose eresaitõ, “ama nda nyaaquiã” jenyè chõ nguiã eicua. ³ Ibei ireĩ ndese jemae mose eresaitõ ndabe, “nyaaqui rae”, jenyè chõ nguiã eicua ñquĩ no. Ibei jëicuate raque quia ã. Ae Dios teacuquia jëje nae, ñquĩ jëicuayã mbei chõchĩ nguiã ã. Ae ra tu icuãte mbiam je nae, ¿mberã jëingo ñquĩ nguiatu icuayãte re? ¿Mberã jëingo jëaracua raã naa nde? ⁴ Mbiam icuã ja chõ ã nde. Ae siqui ibi rĩ namo nae. Hui jate equia Dios si ã. “Mbiam mae sayã esaã ure je”, i chõchĩ equia seje ã. Aque mii nda

asaã jêje. Jonás na si ra asaã jêje, i que Jesús ñee nda. Oso que erecha cote ra.

Fariseos mbia mbaaquiato icuã, i Jesús

⁵ Jesús chimbbaaquiato que uchirã curuchoi eã nda. Tesarei que esi nyoï mose sobei ra. ⁶ Jesús que ñee ee ra. —Mbichae mbuchimatãsa rã ndei fariseos cheẽ. Saduceos cheẽ abe no. Uquĩ ñee ndese ra jêingochĩ jê, i que Jesús ee ra. ⁷ —Mbichae quiatu ngue nanderuã nguã. Nyebe eriqui nguã ñee nande je uquĩ, i rei que echimbbaaquiato ñee nyue ra. ⁸ Jesús que echeẽ ñee icuate ra. Nyebe ñee nguã ee. —¿Mbaerã jêingo “mbichae nanderuãchĩ” i re? ¿Mbaerã jêingo seicuayãte re? ⁹ Ae riĩ aico ñee jêje nae, ¿uquĩ jêicuayã mbeite quia re? Se mbichae mbeta mose ¿uquĩ si jêtesarei chõ nde? Cinco mbichae mbeta mose mbia cinco mil je, ¿manya iru jemombisẽ mbichae sique sique je re? ¹⁰ Siete mbichae mbeta mose mbia cuatro mil je ¿manya iru jemombisẽ mbichae sique sique je no? ¹¹ Secheẽ mose jêje nyii, “mbichae mbuchimatãsa rã ndei fariseos cheẽ”, i mose jêje, secheẽ jêicua rã. Mbichae riĩ aico ñee ãte jêje co. Fariseos cheẽ ndese jêingo eã sacua ño aico nguã ñee jêje. Saduceos cheẽ ndese abe jêingo eã sacua, i que Jesús ra. ¹² Echimbbaaquiato que eicua chee ra. —Mbi chae mbuchimatãsa riĩ eã ño eriqui ñee nande je re. Ae fariseos senei senei icuã nguia mbia mbaaquiato nae, uquĩ niĩ ño eriqui ñee nde. Saduceo ñee niĩ abe no, i que echimbbaaquiato eicua ramo cote ra.

Cristo chõ nde resẽ, i Pedro Jesús je

¹³ Jesús que nyoï Cesarea de Filípoo cote ra. Huee que ñee uchimbbaaquiato je cote ra. —Mbiarã ngue achu íbii ra. ¿Aba aico rei se mbia je re? i que Jesús ñee ee ra. ¹⁴ Echimbbaaquiato que ñee ee ra. —Juan el Bautista ereico rei nguã mbia je co. Elías ereico rei nguã emo je no. Jeremías ereico rei nguã

emo je no. Dios cheẽ nenei neneisa mo ereico rei nguã emo je no, i que echimbbaaquiato ñee Jesús je ra. ¹⁵ —¿Aba aico rei jêje co re? i que Jesús ee ra. ¹⁶ —Cristo chõ nde resẽ. Dios riirĩ ño nde resẽ, i que Pedro ee ra. ¹⁷⁻¹⁸ Jesús que ñee Pedro je cote ra. —Ndeyate ereico co, Simón. Mbiamo nembiirandu eãte quia serese co. Paba Ibatenda miĩ ño nembiirandu nguã serese. Jonás ndiirĩ ndei nde. Tacheẽ tuchi ndeje. “Pedro” i chõ equia ndeje co. “Sita” i niĩ Pedro je re. Aque sita arõ ño nda sembae iglesia achao. Satanás nda esiquisã eãte. Satanás quirãcuãte raque. Mbiamiquiasa raque ae no. Ae ra sembae iglesia siquisã eã mbei. ¹⁹ Mbae tamee ndeje. Llave tamee ndeje. Aque je ra Dios recua iquesa erembuquiata quiata mbia je. Mbiamique sacua. Ae je ra erembuquiata, uquĩ nda ique. Ae je ra erembuquiata eã, uquĩ nda ique eã, i que Jesús ra. ²⁰ Jesús que ñee uchimbbaaquiato ja je cote ra. —“Jesús rei Dios chimondo” jenyechĩ nda emo mbiirandu jê, i que ee ra.

Mbia ra seiquia, i Jesús

²¹ Aque mose bei que Jesús umano nonde senei senei uchimbbaaquiato je ra. —Paba ra sererao Jerusalén. Huee ra amei seiruã nu a tuchi. Sacerdotes rerecua abe ra sembasi mbasi tuchi no. Embesasa abe no. Seiquia rae. Tres días mose ra aquera si, i que Jesús ñee ee ra. ²² Pedro que Jesús querao pe jiri ñee sacua ee ra. —Mbiamra jeĩ jeĩchĩ ndeje jê. Mbiamra ndeiquiachĩ jê, i rei que Pedro ñee asi ee ra. ²³ Jesús que uba ñee Pedro je ra. —Ehui chõ sesi, Satanás. ¿Mbaerã ereico seriquisã quisã nde? Mbiamndua rã ño ereico nguã ndua. Dios ndua rã eã, i que ñee Pedro je ra.

²⁴ Jesús que ñee uchimbbaaquiato je cote ra. —Emo siquise mose serui, sã hui ja mbae ubi si. Sã cruz umbaerã ndui se rã si. Sã eriqui serui bei cote. ²⁵ Emo ndua bei mose nguenco rese, ereco ra ua esi. Emo hui mose nguenco

si seje, ũquí nda siqui bei. ²⁶ Emo nguenco mumba chooño mose, eya eã mbei rae. Mbaecha rete raque. Emo nguenco mumba chooño mose, mbae mo eãte ereco ribishorõ sacua. ²⁷ Dios ra sembu si íbii uquirãcuã je. Ibatenda rese ra achu ángeles. Ae mbae turã saã saã nguia nae, ũquí je ra mbae turã amondo se tu mose. Ae mbae icuã saã saã nguia nae, ũquí je ra mbae icuã amondo no. ²⁸ Tacheẽ nyecua jêje. A jengu a nae, jemo nda jemaẽ sechu rese. Achu ra mbia rerecuarã tuchi cote. Jemo jemano eã mose r a achu mbia rerecuarã tuchi cote, i que Jesús ra.

17

Jesús ny#cuabo uchimbaaquiatu résaa

¹ Tenda seis uare que Jesús uchimbaaquiatu mo nderao sita íbate ra. Pedro. Jacobo. Juan abe no. Jacobo nongue rei Juan. Ũquí ngue equerao ja mbia tiãsaã ra. ² Jesús que ny#cuabo erésaa ra. Eruba que ñimbiasu ra. Tenda nininya rã tuchi que eruba ra. Eiraosñi nininya tuchi que ee ra. ³ Mbua nyeremo ngue nyecua u ibate si ra. Jesús nininya mose que echi ñee ñee erese ra. Moisés que enongue ra. Elías que enongue ra. ⁴ Pedro que ñee Jesús je ra. — Sembaaquiatusa, nandecu turãte a. Sucha ñetẽ uresaã saã na, ndebi mose. Enongue nembraerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra. ⁵ Pedro cheẽ mosete que ibeishĩ ndu eite ñi nda. Abamo ñee mo ngue echandu ibeishĩ qui re ra. —Co rei sebi tuchi seriirĩ co. Seya tuchite aico erese co. Echeẽ jeñandu bei quia, i que Dios ñee ee ibeishĩ qui re ra. ⁶ Echimbaaquiatu que siquichete eandu mose ra. Echeẽ mose que echoi nyaara nguie quti ra. ⁷ Jesús que esichã oco oco erese ra. —Jêhuã na. Jêsiquichechĩ nda jê, i que ñee ee ra. ⁸ Echimbaaquiatu soboiba mose que mae Jesús mi ndese cote ra.

⁹ I ecuaẽ nguia nguichi mose sita ibate si que Jesús ñee ee ra. —Ae rese jemaẽ namo nae, ũquí nda jêseni seneichĩ emo je jê. Seraaque quera si mose, aque mose ramo ño jêseni senei mbia je cote, i que Jesús ñee ee ra. ¹⁰ Echimbaaquiatu que ñee ee cote ra. —¿Mbaerã “Elías rane nda tu Cristo si” i embesasa re? i que ñee Jesús je ra. ¹¹ Jesús que ñee ee ra. —Ae bei. Coche Elías rane tu nguia mbae mbitirõ ja. ¹² Elías que tu ra. Mbua que eicuayãte ra. Mbua icuã icuã jate que eriqui ee ra. Eĩ si ra mbua icuã icuã seje no, i que Jesús ee ra. ¹³ Echimbaaquiatu que Jesús cheẽ icua ramo cote ra. —Juan el Bautista rñ ño eriqui ñee nde, i que Jesús cheẽ icua ramo cote ra.

Jesús aba checuayã jea mbua riirĩ mo si

¹⁴ Ngasẽ ngue mbua ja je cote ra. Emo ngue ngoi ngũã ndese ñee Jesús je ra. ¹⁵ —Seriirĩ embucherõ na, Sererecua. Tẽ i beite que equia ra. Titi titi i beite que equia no nda. Erasi tuchite. Ngoi coi beite tátaa. Ama ye abe ngoi coi beite. ¹⁶ “Seriirĩ embucherõ na”, ae rei ngue nguia ndechimbaaquiatu je. Mbua mbucherõ aquiatuã ño eriqui re, i que eru ñee Jesús je ra. ¹⁷ Jesús que ñee cote ra. —¿Mañi jenze quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jêje re? i que Jesús ra. —Eriirĩ jendu rã seje, i que cote ra. ¹⁸ Jesús que ñee asite aba checuayã je cote ra. Aba checuayã ngue usẽ eriirĩ si cote ra. Aque mose tuchi que eriirĩ nyerõ cote ra. ¹⁹ Aquere que echimbaaquiatu ñee Jesús ísaa ra. —¿Mbaerã ureico aba checuayã jea aroneate mbua si re? i que ñee Jesús je ra. ²⁰ Jesús que ñee ee ra. — Seicuayãte jiri quiatu nguia ã. Tacheẽ nyecua jêje. Sã mostaza eĩ ñetẽte riqui raque no. Jê seicua ñetẽ mose, mbae ra asaã ja jêje. “Eso pe jiri”, jenze mose co sita íbate je, siri ra oso pe jiri jeñee nguire. Jê seicua mose, mbae jê saã ja arondete. ²¹ Aba checuayã

ngue ajae namo, ũquĩ nda jêjea eã jeñee eã mose Dios je. Ũquĩ nda jêjea eã, jêhui eã mose jenyiu si, i que Jesús ñee ee ra.

Mbia ra seiquia, i si Jesús

²² Galilea rĩ ngue Jesús riqui ngata uchimbaaquiato rese ra. Jesús que embaaquiato quiato quia ra. — Mbiarã ngue achu ra. Mbia ra semee mbia icuã je. ²³ Mbia icuã nda seiquia. Tres nyaashĩ mose r a aquera si, i que Jesús ra. Echimbaaquiato ia eã tuchi que echeẽ mose ra.

Jesús mbae isiquia mondo impuestos pagar i sacuã

²⁴ Ngasẽ ja que Capernaum cote ra. Ae impuestos isi isi quia Dios chuchua jenda nae, ũquĩ ngue nyoi ñee Pedro je ra. —¿Jenderecua impuestos mee eã nguia Dios chuchua jenda je re? i que ñee Pedro je ra. ²⁵ — Impuestos emee mee mbeite quia co, i que Pedro ee ra. Pedro que oso ique tuchúaa cote ra. Jesús rane ngue ñee ee ra. —I ere, Pedro. ¿Aba je mbia rerecua riqui “impuestos jemee na seje” i re? I eã nda nguiĩ je. Mbiamo je chõ nda ñee nguia, i que Jesús ee ra. ²⁶ —Ae. Mbiamo si ra eisi, i que Pedro ñee ee ra. Jesús que ñee ee cote ra. —Eriirĩ nda impuestos mee eã ee resẽ. ²⁷ Dios riirĩ ndaque se. Impuestos nandemee ndei Dios chuchua jenda je. Sã mbia ndua icuã eã nande rese. Quiato ama ndíshaa. Sira mbabasa emondo ii. Ae rane nda sira erembua nae, aque churu ye ra mbae isiquia mo eretea. Aque emee serao impuestos isi isiquia je. Sembae impuestos sacuã. Nembae sacuã abe no, i que Jesús ñee Pedro je ra.

18

Ererecua tuchi ra se, i jaaja Jesús chimbaaquiato nyue

¹ Aque mose que echimbaaquiato ñee jate Jesús je ra. —¿Aba ra ererecua tuchi ure nderese re? i que ñee Jesús je ra. ² Jesús que ãquẽ mo mbucoi miĩ eite re ra. ³ Ñee ngue mbia je

cote ra. —Tacheẽ nyecua jêje. Dios quiti jemba eã mose ra jenderecua eã mbei Dios. Mbia riirĩ na jêingoã mose ra jenderecua eã mbei Dios no. ⁴ Ae siqui quia cocheete nae, ũquĩ nda mbia rerecuarã nyee Dios rese. Ae siqui quia mbia riirĩ n a nae, ũquĩ nda mbia rerecuarã nyee Dios rese. ⁵ Ae eturã ndiqui mbia riirĩ je seriĩ nae, seje abe chõ eturã ndiqui nguia.

Mbae icuã nda nandesã uquiachĩ emo je

⁶ Ae ra mbae icuã saã uquia seicuaasa mo je nae, ũquĩ nda mbae rasi saã tuchi cote. Ũquĩ nda aba mombo chõ ama ndisha ye nyii re chã. Sita resebe ecua ji mondo. I nda mbae icuã naa uquia eãte rei seicuaasa je. ⁷ Mbae icuã nguiarei siqui bei tuchi mbia mbiicuã nonde. Ae ñee nguia mbia je nae, “mbae icuã esaã” i nae, eicuã tuchi chõ ũquĩ nde. Ae “mbae icuã esaã” i nae, ũquĩ nda mbae rasi saã tuchi cote. ⁸ Ndeo nemingo mose mbae icuã ndese, ndeo echisia mombo. Coche rei ra ereso ibate ndeo miĩ nderequia, siqui bei sacuã huee. Ndei nemingo mose mbae i cuã ndese, ndei echisia mombo no. Coche rei ra ereso ibate ndei miĩ nderequia, siqui bei sacuã huee. Oso rocoĩ tata cuásuu, ndeo nyeremo nderao. Ndei nyeremo nderao. Tata ra uqueã mbei huee no. ⁹ Nderesa nemingo mose mbae icuã ndese, nderesa echoo. Coche rei ra ereso ibate nderesa miĩ nderequia. Nemombo rocoĩ tata cuásuu, nderesa nyeremo nderao.

Oveja quiachã je

¹⁰ Serriirĩ ñetẽ mo nda jêucuãyãchĩ jẽ. Angeles riqui eraarõte ã. Angeles riqui Paba rese ibate pe. ¹¹ Se que achu quiachã je rea ra. ¹² Sã emo nimba quiachã oveja no. Cien ndei ngue erimba re. Co miĩ ngue quiachã ee ra. Aque esi quia quiachã je requia aque. Eataque recha. Noventa y nueve recha. ¹³ Tacheẽ nyecua jêje. Echa quiachã je rea mose, eyate que

erese ra. Eya tuchi que erese ovejas ataque si ra. Quiachã eã je si. ¹⁴ Sã jendu ibatenda abe no. —Sã aque mii quiachã eã seriiri ñetẽ mo, i chõ Dios nguiã co.

Emo mbae icuã naa mbei mose ndeje, etesarei sarei bei chõ

¹⁵ Nderesenda icuã mose ndeje, eso ñee ee. “Ã ngue eresaã mbae icuã nda”, ere chõ ñee eísaa. Ndecheẽ andu turã mose, nderesenda que eremitirõ turã nda. ¹⁶ Ndecheẽ andu sereã mose, emo abe erao ñee sacuaã ee. Aque mii nda reae. Nyeremo nda re no ae. Uquĩ abe ñee sacuaã ee. Jeñee ja mose ee hue rĩ ja, jẽandu turã arõte. ¹⁷ Uquĩ andu sereã mose, jeñee mbia chumunuásaa cote. Sã mbia ñumunua je ñee ja ee. Uquĩ ñee andu sereã mose, jemombo chõ cote. Dios quiatoã naanguia jẽsaã ño ee cote. Mbia icuã naanguia jẽsaã ño nguia ee cote. ¹⁸ Tacheẽ nyecua jẽje. Jẽ mbae mo ndiquisã mose, Dios abe ra esiquisã. Jẽ mbae mo ndiquisã eã mose, Dios abe ra esiquisã eã no. ¹⁹ Tacheẽ nyecua jẽje. Jẽ nyeremo ndua turã mose hue rĩ sí, “co embu ure je” jenyete turã ja mose Dios je, Paba Ibatenda ra emondo jẽje. ²⁰ Jẽ nyeremo ñumunua mose seriĩ, aico chee nguiã jendese jẽite re huee, i que Jesús uchimbaaquiatu je ra.

²¹ Pedro que ñee Jesús je ra. —Seresenda icuã mbei mose seje ¿manya veces ra atesarei eicuã si re? ¿Siete veces ra re? i que Pedro ra. ²² Jesús que ñee ee ra. —Tei. Siete veces eã. Eata tuchi quia ñene. Setenta veces siete quia ñene, i que Jesús ee ra.

Jendesenda icuã si chõ jẽtesarei

²³ Sã ererecua mo ndiqui no. Dios rã si chõ ererecua re. Sã ererecua a cuenta raã naa ja ngũimba je no. ²⁴ Cuenta raã naa mose que erimba mo ndurucuaẽ ee ra. Aque que deber i tuchi quia ee ra. ²⁵ Mbae áte que erimba mbae pagar i sacuaã nda. Nyebe ererecua ñee nguiã. “Embae je vender nande ja rã. Eriiri abe je

vender nande. Eninisi abe no. Ae abe je vender nande. I nda cuenta ua jiri”, i rei que ererecua ñee nda. ²⁶ Erimba ia eã tuchi que echeẽ andu ra. Ngoi que ngũiã ndese ñee nguerecua je ra. “Sererecua, eico tochi chõ seje ae. Mbae tamondo ja chee ndeje”, i que erimba ra. ²⁷ Ererecua ia eã tuchi que erese ra. “Mbae emondo eã ndei seje pagar i sacuaã”, i chõ nyee que ee ra. Hui chõ nyee que esi ra. ²⁸ Erimba que usẽ ndei oso quia ra. Aque mosechi que ngasẽ nguesenda mo je ra. Deber i miite rei ee reaẽ. “Pagar ere rã seje”, i que echosoi isi ra. ²⁹ Eresenda que ngoi ngũiã ndese ñee ee ra. “Eico tochi chõ seje ae. Mbae tamondo ja chee ndeje”, i que eresenda ñee ee ra. ³⁰ “Nya” i chõ ngue enongue echeẽ mose ra. Cárcel chõ ngue ererao chee matã nda. Mbae mondo ja chee sacuaã ee. ³¹ Eresenda ataque ia eã tuchi que mae erese ra. Nyebe echoi nguiã ñee ererecua je. ³² Nyebe ererecua “echu” i nguiã ee. “Serimba icuãte chõ ereicochĩ nde re. Ae deber ere seje, uquĩ nii ngue acheẽ eãte ndeje. Seya eãte que nderese nde ñee mose seje nyii. ³³ ¿Mbaerã ndeya eã eã ño ndenongue rese nde re? Sã ñi seya eãte nderese nyii no”, i que ererecua ñee ee ra. ³⁴ Ererecua que paama i tuchi ee ra. “Jẽiruã nua tuchi, pagar i ja chee”, i que ererecua ñee mbia je ra, i que Jesús mbia mbaaquiatu quiatu ra. ³⁵ —Eĩ sí ra Paba Ibatenda paama i jẽje, jẽtesareiã mose jendesenda icuã si, i que Jesús mbi a je ra.

19

Jesús ñee mbia ngũinisi mombo je ri

¹ Jesús cheẽ uare que esi Galilea si cote ra. Ama Jordán ndobei que esi sobei cote ra. Judea bei chõ hue ja ibi re. ² Mbia que nyoĩ ja tuchi quia erui ra. Huee que mbia rasi mbucherõ cherõ tuchi ra. ³ Fariseos mo ngue nyoĩ Jesús riichã nda. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia

ngūinisi jea ubiã mose re? i que ñee Jesús je cote ra. ⁴ Jesús que ñee ee ra. —¿Embesa ji rese jëingo mae ãte re? “Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda. ⁵ Nyebe ra emo ndiqui ngūinisi rese bei. Ngu si isho. Usi si abe no. Ngūinisi rese siqui bei sacua. Co mii na siqui sacua nyiese”, i ñi embesa ji re. ⁶ Nyeremo siqui rã eã ño cote re. Co mii siqui rã ño ũquĩ cote re. Ae Dios mbucha nyiese nae, sã ũquĩ huĩ eã mbei nyesi, i que Jesús ñee ee ra ⁷ Fariseos que ñee ee cote ra. —¿Mbaerã Moisés ñee ũquĩ nde? “Jeninisi jea nonde, papel mbesa je jemondo ee”, i ee re, i que ra. ⁸ Jesús que ñee ee ra. —Jëaquẽ ãtãte quiatu ngue re. Nyebe Moisés embesa nguiã jëje ũquĩ. ũquĩ i ãte que Dios mbia ao ramo mose nyii ra. ⁹ Ae ngūinisi jea nae, eninisi siquiã ndaque emo ndese, eicua tuchi chõ ũquĩ nde. Ae ngūinisirã mo ndeabe mose, adulterio i que ũquĩ je ra, i que Jesús ñee ee ra.

¹⁰ Echimbaaquiato que ñee ee ra. —Mbaeiaie mose ngūinisi jea mose ¿mbaerã nguiatu ra ngūinisirã ndea re? i rei que echimbaaquiato ñee nda. ¹¹ Jesús que ñee ee ra. —Mbia ja riqui ũquĩ icua eãte ã. Ae Dios mbaaquiato quiatu nae, ũquĩ mii ño siqui nguiã eicua ã. ¹² Ae eninisi sereã mbeite nae, ũquĩ nda siqui turã, eninisiã ndaque rae. Emo nyia o ji mose, ũquĩ abe ra siqui turã, eninisiã ndaque rae. Emo ngūinisirã nderequia eã mose Dios riĩ, ũquĩ abe ra siqui turã, eninisiã ndaque ra eno. Ae ra “coche seninisiã aico nguiã co” i mose, sã eriqui bei eninisiã, i que Jesús ñee ee ra.

Jesús mbia riirĩ isi turã turã

¹³ Mbia que nguiirĩ ngurucuaẽ cuaẽ nguia Jesús je ra. Jesús o noono sacua eãquĩ arõ. Jesús ñee sacua Dios je erĩ. —¿Mbaerã jendiirĩ jendu quia co re? i rei que Jesús chimbaaquiato ñee mbia je ra. ¹⁴ Jesús que ñee nda. —Tei. Jëhuĩ chõ esi. Sã nguiirĩ

ndurucuaẽ cuaẽ seje. Eĩ ño Dios rimba nguiã. Ucuasu raã naa eã. Mbia riirĩ na, i que Jesús ñee ee ra. ¹⁵ Jesús que o chono ñono mbia riirĩ arõ nda. Aquere que esi ngata cote ra.

Acuanindu mbaecha mo ñee Jesús je

¹⁶ Acuanindu mo ngue tu ñee Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacua nde? i que ñee Jesús je ra. ¹⁷ Jesús que ñee ee ra. —¿Mbaerã ereico eturã i seje re? Dios mii ño eturã ndesẽ. Nde ndeico beise mose, Dios cheẽ emumbayã ja, i que Jesús ñee e e ra. ¹⁸ —¿Mbae ra amumbayã Dios cheẽ nde? i que acuanindu ee ra. Jesús que ñee ee ra. —“Mbia mo nda ereiquiachĩ. Emo ninisi rese ra ereicochĩ. Mbae mo nda erembuquiachãchĩ. Erecheẽ ñooñochĩ nda emo nii. ¹⁹ Ndeturã ño nderu je. Ndeturã ño ndesi abe je. Sã erechesequa ndechiese no nae, eĩ ere si chõ nyesequa nde ji jenda rese”. Dios cheẽ ja chõ ũquĩ nde. Mbia echeẽ mumbayã sacua, i que Jesús ñee acuanindu je ra. ²⁰ Acuanindu que ñee ndei ee ra. —ũquĩ ngue amumbayã ja bei quia ra. Señetẽ mosenda bei. ¿Mbae mo abe ra asaã nde? i que acuanindu ñee Jesús je ra. ²¹ Jesús que ñee ee ra. —“Taico turã tuchi”, nde i mose, ã abe esaã. Nembae emondo mondo ja mbia mbaecha reã je. Nde ũquĩ naa mose, mbae tubiriã nda nembae, ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²² Acuanindu Jesús cheẽ andu mose que echosoi oso serite cote ra. Eyayãte que oso ra. Mbaecha tuchite quiatu ngue ae re.

²³ Jesús que ñee uchimbaaquiato je cote ra. —Tacheẽ nyecua jëje. Mbaranguiatu ãte mbaecha je ngasẽ sacua ibate siqui bei sacua huee. ²⁴ Sã ticuasu mo ndiqui oso aroneate ique aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁵ Echimbaaquiato que nyuruira tuchi echeẽ andu ra. —¿Aba quia

ra oso Dios rea ibate re no? i que echimbaaquiatu Jesús je cote ra. ²⁶ Jesús que mae erese ñee ee ra. — Ae mbia saã aroneate quia nae, Dios mii ño nda esaã, i que Jesús ee ra. ²⁷ Pedro que ñee Jesús je ra. —Ure que urembae uresech a ja ra. Siqui sacua nderui. ¿Mbae ra ereme ee ure je re? i que Pedro ñee nda. ²⁸ Jesús que ñee ee ra. —Tacheẽ nyecua jẽje. Dios mbae mbiasu ja mose ra ererecua tuchi rei se cote. Mbia ra mae ja serese aque mose. Aque mose ra jẽ abe ererecua. Jẽ doce. Trono jaaja ra jembraerã cote. Judíos rerecua ja ra jẽ. ²⁹ Emo umbae secha ja mose siqui sacua serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae ngüinisi secha. Ae nguiirĩ secha. Ae umbae ibi secha no. Ûquĩ mbae ja ra asibishorõ tuchi cien veces. Aquere ra siqui bei tuchi Dios rese ibate cote. ³⁰ Ae rane eriqui nyii nae, ùquĩ nda siqui mbia rui tuchi cote. Ae siqui quia mbia rui tuchi nyii nae, ùquĩ nane nda cote, i que Jesús ra.

20

Ae rane eriqui nyii nae, ùquĩ nda siqui mbia rui tuchi cote

¹ Jesús que mbia mbaaquiatu quiatube no nda. —Dios rei mbia rerecua tuchi. Sã mbae cha mo ndiqui no. Sã mbae cha uva tubiriãte riqui embae no. Sã mbae cha mbia mo ndea rea umbae ishao shao sacua no. Nyaashĩ namo mose. ² “Denario mii tamondo mondo ja jẽje. Sembae ishao shao sacua tenda mondo chee”, i que emondochoi úcoo cote ra. ³ Tenda chui mose que mae emo ndecoteã eã ndese ra. ⁴ —Jẽ abe jẽso sembae ishao shao. Mbae mo tamee jẽje, i que ee ra. Nyoĩ que echeẽ mose ra. ⁵ Tenda nandeite re mose que echa emo mondo choi cote ra. Umbae ishao shao sacua. Eĩ si que echa tenda chaara ramo mose no nda. ⁶ Tenda ireĩ mose abe que mae emo ndecoteã eã ndese no nda. “¿Mbaerã jẽingo tenda mondochooño

siqui rocoĩ mbae mo ndese a re?” i que echa ñee ee ra. ⁷ “Emo ngue ‘mbae mo esaã seje’ i ãte ure je ra”, i que ee ra. “Jẽso jẽ abe sembae ishao shao. Mbae mo tamee jẽje”, i que echa ee ra. ⁸ Itondaru ramo mose que echa ñee mbia reaquiatusa je ra. “‘Jenyu’ ere sembae ishao shaosa je. Pagar ere rã ùquĩ ja je. Ae ique ramo eresaitõ nae, ùquĩ nane je pagar ere. Ae rane ique nyii nae, ùquĩ je pagar ere hui bei cote”, i que echa ñee nda. ⁹ Ae ique eresaitõ nae, ùquĩ nane je que denario mii mee mee nda. ¹⁰ Ae rane ique nyii nae, ùquĩ ngue ñee ñee u nyue ra. “Eata jiri ra emee nande je reae. Nande rane ngue uva a nandeishao shao”, i rei que eu ñee ñee nyue ra. Ûquĩ je abe que denario mii mee mee nda. ¹¹ Pagar i mose ee que ñee asi asi echa je ra. ¹² “Ae ique ramo eresaitõ nae, ùquĩ ngue mbae ishao shao eã jiri resẽ. Eresaitõte que ique. Ure quiatu que tenda uremumba rei uva a ishao shao ndeje. ¿Mbaerã mbae isiquia ereme ee ure rã si chõ nde?” i que ñee echa je ra. ¹³ Echa que ñee ùquĩ mo je ra. “Mbae icua mo asaã eãte ndeje resẽ. ‘Denario mii’, nande que ñee nyii resẽ. ¹⁴ Quiatu nembae denario rerao cote. Ae ique ramo nae, ùquĩ je abe denario tamee mee nde rã si. ¹⁵ Sembae ae rese aico nguiã. Sembae amondose mose emo je, ¿amondo aroneate se re? Se sembae mee mose emo je, ¿ndebiãte ùquĩ nde?” i que echa ñee ee ra. ¹⁶ Ae rane eriqui nyii nae, ùquĩ nda siqui mbia rui tuchi cote. Ae siqui quia mbia rui tuchi nyii nae, ùquĩ nane nda cote. “Jenyu serui” i tuchi Dios quia mbia ja je co. Mbia mii mii ño eisirõ sirõ nguiã co, i que Jesús ñee nda.

Mbia ra seiquia, i si Jesús

¹⁷ Jesús que ngata oso quia Jerusalén quiti ra. Uchimbaaquiatu que equerao mbia tiãsa ñee sacua ee ra. ¹⁸ —Co nyao quia Jeursalén co. Huee ra mbia semee sacerdotes rerecua je. Embesasa abe je. “Jesús

jēiquia”, i ra serĩ. ¹⁹ Seme e nda judíos eã je cote. Sei quia sacua. Mbia ra secheẽ saã saã. Seiruã nua abe ra eno. Sembucha chee ra i quia ira rese. Tres nyaashĩ mose ra aquera si, i que Jesús ñee ee ra.

Ererecuarã ure, i raque Jacobo, Juan ndese

²⁰ Ari mo ngue oso Jesús rĩchã nda. Jacobo si. Juan si. Zebedeo riirĩ ngue ũquĩ nda. Ari que oso Jesús rĩchã nguiirĩ ndese ra. Ngoi que ngũĩã ndese ñee Jesús je ra. —Mbae mo esaã na seje, i que ee ra. ²¹ —¿Mbae ra aba saã ndeje re? i que Jesús ñee ari je ra. Ari que ñee ee ra. —Ndeico mose ererecu tuchi, sã seriirĩ abe riqui ererecuarã nderese. Sã seriirĩ ngoi ja u ndejii. Enongue chĩ ngoi ndequito cuti. Enongue ndequiato cutiã no, i rei que ari ñee Jesús je ra. ²² Jesús que ñee ee ra. —Ae rĩ jēingo ñee seje nae, jēirandu turã eãte ũquĩ ndese. Ae rasi ra asaã tuchi nae, ¿ũquĩ ndasi ra jēsaã jē abe re? i que Jesús ee ra. “Ae”, i que ari riirĩ ñee ee ra. ²³ Jesús que ñee ee ra. —Ae bei. Ae rasi ra asaã tuchi nae, ũquĩ ndasi ra jēsaã tuchi raque jē abe. “Ererecuarã ure”, jeny e que seje, ũquĩ asaã aroneate se jēje. Paba ae quiatu ra ũquĩ saã. Ae ebite, ũquĩ nda emĩ ererecuarã, i que Jesús ra. ²⁴ Echĩmbaaqui atu ataque que jirandu erese ra. Echĩmbaaqui atu diez. Paama i que Juan je ra. Jacobo je abe. ²⁵ Jesús que “jenyu” i ñee uchĩmbaaqui atu ja je cote ra. —Mbia ataque rerecu riqui ucuasu raã naa tuchi ngũimba je ũquĩ. ²⁶ Ũquĩ nda jēsaãchĩ jē. “Ererecu ra se”, i mose jemo, sã aque riquichõ uataque rimbarã. ²⁷ Jemo “se rane jē” i mose, sã ũquĩ ndiqui bei mbae turã naa naa uataque je. ²⁸ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã mbia je”, ae u nguiã. Co achu quia mano mbia tubiriã ndiquicharõ sacua co, i que Jesús ñee nda.

Jesús mbia nyeremo ndesayã mbucherõ

²⁹ Jesús que ngata oso quia Jericó si ra. Uchĩmbaaqui atu rese. Mbia tubiriã ngue nyoĩ quia erui ra. ³⁰ Eresayã nyeremo ngue chi ñeenda jie ee ra. Eresayã ngue jirandu Jesús ucua rese ra. Ñeemombo mombo que Jesús je ra. —¡Sererecu! ¡David rucucha! ¡Ndeya eã ño urerese jē! i que eresayã ñee Jesús je ra. ³¹ —¡Jēquiriri chõ jē! i tuchi rei que mbia ñee ee ra. —¡Sererecu! ¡David rucucha! ¡Ndeya eã ño urerese jē! i be que eresayã ñee Jesús je ra. ³² Jesús que tiba ñee ee cote ra. —Jenyu rã. ¿Mañi ae ra jēje re? i que Jesús ñee eresayã je ra. ³³ —Ureresa embuturã na, Urererecu, i que eresayã ñee ee ra. ³⁴ Jesús ia eã tuchi que erese ra. Oco ja que eresa rese ra. Aque mose tuchi que eresayã ndesa turã ja cote ra. Mae turã ngue cote ra. Jesús rui que echoi quia cote ra.

21

Jesús ngasē Jerusalén

¹ Jesús que Jerusalén curubite nyoĩ quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que hue je ra. Hue si que Jesús uchĩmbaaqui atu nyeremo mondo ra. ² Ñee ngue ee ra. —Achi súchaa chõ jēso rã. Burro cuasa ra chĩ nguiirĩ ndese jēje huee. Ũquĩ jenyura seru seje. ³ Emo ñee mose jēje, “¿mbaerã nda jenyura re?” i mose jēje, jeñee ee. “Nandererecu que ‘jendu’ i ra. Mondo jeibe ra jēje”, jenyee ee, i que Jesús ñee ũquĩ nyeremo mondo ra. ⁴ Embesa ji cheẽ io sacua ño ngue ũquĩ nda. I embesa ji huĩ a: ⁵ Jeñee Jerusalén jenda je. “¡sã jē! Jendererecu ru quia jēje burro ato co. Ucuasu esaã saã eãte u quia co. Burro riirĩ átoo eru quia co”, jenyee ee, i que embesa ji huĩ nyii ra. ⁶ Ũquĩ nyeremo ngue Jesús mondo cote ra. Ae rĩ Jesús ñee ee nae, ũquĩ ngue nyecua ja ee cote ra. ⁷ Burro que ecuruchoi

Jesús je ra. Huirao que echono ñono burro quite arõ nda. Burro riirĩ quite arõ abe. Jesús que nyui eato cote ra. ⁸ Jesús que ngata rei oso quia burro átoo ra. Mbia tubiriã ngue huirao mbiitee tee nyoĩ quia ibi rĩ enonde ra. Emo emo ngue sindo mbiitee tee ee no nda. Jesús oso sacua hue rĩ. ⁹ Mbia ia tuchi que tasẽ tasẽ nda. —Co nandererecua ru quia ngasẽte co. Co Dios chimbu ru quia ngasẽte nande je co. David rucucha ru quia co. Dios turã tuchi riqui nande je co, i tuchi que mbia quia ñee nda. Ae nyoĩ quia Jesús nonde nae, ũquĩ. Ae nyoĩ quia eruĩ nae, ũquĩ abe no. ¹⁰ Jesús que ngasẽ Jerusalén cote ra. Mbia hue jenda ia tuchi que o o ja erese ra. —¿Aba co re? i tuchi que equia Jesús rĩ nda. ¹¹ Mbia ataque que echeẽ sibishorõ nda. —Dios chimondo chõ co re. Jesús i equia ee. Nazaret de Galilea jenda chõ ae re, i que ñee nda.

Jesús mbia mbusẽ Dios chuchua si

¹² Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. ũquĩ ja que Jesús mombo hue si ra. Ae mbae isiquia sibishorõ shorõ nguia, ũquĩ mbae abe que embuchiichere chere ja mesa ra. Mesa aronda resebe. Ae nyurushi cuasu mondo mondo mbia je mbae ribishorõ nae, ũquĩ nenda abe que embuchiichere chere ra. ¹³ Jesús que ñee ũquĩ ja je ra. —“‘Mbia cheẽsa Dios je’, i ra mbia Dios chuchua je”, i rei que embesa ji huĩ nda. Jẽ nguia jẽicuã tuchite Dios chuchua je re. Mbae mbuquiachãsa chuchua jẽsaãte chĩ nguia ee, i que Jesús ñee asite ũquĩ je ra.

¹⁴ Jesús siqui mose Dios chuchúaa, mbia resayã ngue nyoĩ nyoĩ erea huee ra. Mbia cuatayã abe no. Jesús que ũquĩ mbucherõ ja ra. ¹⁵ Ererecua cuabẽte que chi mae icuã icuã erese ra. Sacerdote rerecua abe no. Embesasa abe no. Jesús chisaã turã ndese mae mose que paama ite ee no ra. —David rucucha turãte riqui co, i mose

mbia riirĩ Jesús rĩ, ũquĩ mose que ererecua paama i ja Jesús je ra. ¹⁶ —¿Mbia riirĩ ñee erechandu quia re? i que ũquĩ ñee Jesús je ra. Jesús que ñee ee cote ra. —Ae. ¿Embesa ji rese jemae eãte re? “Dios ra mbia riirĩ mbucheẽ turã uturã ñi”, i que embesa ji ra, i que Jesús ñee ererecua je ra. ¹⁷ Jesús que oso mbia rerecua recha ja cote ra. Sucha tubiriã abe recha. Oso que Betániaa nda. Huee que itõ nda.

Jesús ñee icuã higo i je

¹⁸ Isamamimbe que Jesús choi sí quia sucha tubiriã nda. Eriãcuãte abe que nyoĩ quia ra. ¹⁹ Higo i mo ndese que mae ñeenda jie ra. Sũchã ndei que oso ra. Ea eãte que ee ra. Ero achõte chõ ngue ee ra. Nyebe Jesús ñee nguia higo i je. —Ndea eã mbei r a cote, i que Jesús ñee ee ra. Aque mosebe tuchi que esi quia ñimama mano nda. ²⁰ Echimbaaquiato que nyuruirã tuchi mae erese ra. —¿Mañi higo i quia ñimama asite mano nde? i que ñee Jesús je ra. ²¹ Jesús que ñee ee ra. —Tacheẽ nyecua jẽje. Ae asaã higo i je nae, jẽ abe ra ũquĩ jẽsaã serã sí, jẽ Dios jẽicua tuchi mose. Jeñee nyee ra sita ibate mo je. “Esiri rã oso am a ndisha ye”, jenyee chee ra sita ibate mo je. Sita ibate ra jeñee mumbayã jẽ Dios jẽicua tuchi mose. ²² “Ã emondo seje”, jenyee mose Dios je, mondo r a jẽje. “Dios ra emondo seje”, jenyee mose jeñiangui re, Dios ra emondo jẽje, i que Jesús ra.

¿Aba nembu re? i mbia ñee Jesús je

²³ Jesús que oso Dios chuchúaa ra. Huee que eriqui mbia mbaaquiato quiato ra. Sacerdote rerecua que nyoĩ ñee ee amei ndese ra. —¿Mbaerã ereico mbia mbaaquiato quiato Dios chuchúaa re? ¿Aba “ũquĩ esaã saã” i ndeje re? i que ererecua ñee ja Jesús je ra. ²⁴ Jesús que ñee ee ra. —Se rane tacheẽ jẽje. Se rane preguntar tae jẽje. Secheẽ jẽsibishorõ turã mose, ũquĩ mose quiato ra jeñee asibishorõ turã se abe. ²⁵ ¿Aba ñee Juan je re? “Eso bautizar i mbia je”

ĩ ee re. ¿Dios eã ño ere? Jeñee seje, i que Jesús ee ra. Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate ñee ee. Nyebe ra ñee nande je. “¿Mbaerã jẽingo eãte erui re no?” i quiarei ra nande je. ²⁶ “Dios eã ngue embu ra”, nande aroneate ñee ee no. Mbia ataque ra paama i tuchi nande je. Juan quiato tuchi quiarei mbia, i que ererecua u ñee ñee nyue ra. ²⁷ Ererecua que ñee nyee Jesús je cote ra. —Ureicuayãte. Aba chõ Juan mbu bautizar i sacua mbia je, i que ererecua ñee ja Jesús je ra. Jesús abe que ñee ee cote ra. —Se abe tacheẽ eã ndei jẽje no. Ae “ã esaã” i seje nae, aque riĩ nda acheẽ eã jẽje no, i que Jesús ererecua je ra.

Acuanĩndu ndua ndua si

²⁸ Jesús que ñeembe ee ra. —I ra ã jẽje reae. Sã amei mo ndiirĩ nyeremo no. “Quiatu rã uvas ishao shao seje”, i que amei nguiirĩ ndiquii je ra. ²⁹ “Nya” i rei que eriirĩ ndiquii ñee ngu je ra. Aquere que ndua si chõ oso uvas ishao shao ra. ³⁰ “Quiatu rã uvas ishao shao seje”, i rei que amei ñee nguiirĩ nduĩnda je cote ra. “Se quiatu taso, Paba”, i rei que ee ra. Osoã ño ngue ra. ³¹ ¿Ma ngu cheẽ mumbayã ũquĩ mo nde? i que Jesús ñee judíos rerecua je ra. —Eriquii chõ ngue ngu cheẽ mumbayã ndesẽ, i que ñee ee ra. Jesús que ñee ee ra. —Tacheẽ nyecua jẽje. Cuñandu ata ata riqui Dios cheẽ andu turã jẽsi ã. Impuestos isi isiquia abe riqui Dios cheẽ andu turã jẽsi ã. ũquĩ nda siqui tuchi Dios rese jẽsi. ³² “Eĩ jenyẽ chõ siqui turã Dios je”, i rei que Juan el Bautista jembaaquiatu quiatu ra. Jẽ nguiatu que echeẽ jemumbate ra. Cuñandu ata ata quiatu que echeẽ isi turã nda. Impuestos isi isiqui a rese. ũquĩ ndese mae mose abe que jẽya eã eã jẽicuã ndese no nda. Jẽ echeẽ isi turã sacua.

Uva raarõsa icuã icuã nguerecua je

³³ ã abe jeñandu. Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao ra. Uco raarõ turã ja sacua. “Sembae uvas jẽsaarõ”, i que emo je cote ra. Ae que oso ishõ itõte cote ra. ³⁴ Uva quiche mose que ngũimba mo mondo rei umbaerã ndea ra. ³⁵ Uva raarõsa que erimba mbucuasẽ icuã ño nda. Iruã nua ño ngue ra. Echa que ngũimba nongue mo abe mondo rei erea ra. Eraarõsa que aque iquia ra. Enongue que echei chei tuchi mbuqui sita je ra. ³⁶ Eĩ eĩ mbei que eraarõsa quia echa rimba ja je ra. ³⁷ Aquere que echa nguiirĩ mondo erea cote ra. “Ireĩ ireĩ jiri ra seriirĩ si”, i rei que ra. ³⁸ Uva raarõsa mae mose erese que ñee nyue ra. “¡Co eriirĩ ndu quia co cote jẽ! ¡Nandeiquia rei jẽ! I nda uvas nandembaerã ae tuchi cote”, i que ñee nyue ra. ³⁹ Eraarõsa que eriirĩ isi icuã cote ra. Curuchoi que pe jiri iquia ra. Mano ngue cote ra. ⁴⁰ ¿Mañi nda echa quia eraarõsa je cote re? i que Jesús ñee mbia je ra. ⁴¹ Mbia que ñee ee ra. —Echa ra eraarõsa icuã iquia ja cote. Uva i ra emondo emo je eraarõ sacua cote. ũquĩ nguia ra embaerã mee turã turã ee equiche mose, i que mbia ñee Jesús je ra.

⁴² Jesús que ñee mbia je ra. —¿Ã embesa ji rese jemae ãte re?

Sã emo ndiqui tuchua ao sita je no.

Sita mo ngue equirirõ mombo ra.

Eicuãte eriqui reĩ nguiã ee.

Aquere Dios emundua si erese.

“Earonda sacua turambi chõ eriqui re”, i ndua si uchimombo rese.

Uchimombo que esirõ si cote ra.

Dios chiao chõ ũquĩ nde.

Dios chiao turã tuchi riqui nande je ã,

i ñi embesa ji re. ⁴³ Tacheẽ nyecua jẽje. Jenderecua eã nyee ra Dios cote.

Ae mbiamo nda Dios icua nae, ũquĩ

nderecua quia ra Dios cote. ⁴⁴ Ae ra

ngoi aque sita arõ nae, ũquĩ nda huẽ.

Aque sita ngoi mose emo arõ, ũquĩ

nda mano no, i que Jesús ra. —Aque sita rã ndei se, i chõ ngue re.

⁴⁵ Sacerdote rerecua que Jesús cheẽ ñandu ja ejemplos ra. Fariseos abe echandu ja. —Urerĩ ño eriqui nguiã ñee co, i que ndua ndua ra. ⁴⁶ Paama i tuchi que Jesús je ra. Jesús nda eisi icuã nguiã ña. Siquiche quiatu que mbia si ra. —Dios cheẽ na si tuchi chõ Jesús riqui nguiã ñee co, i jate quiatu que mbia ataque quia ra.

22

Jenyu quiaru serese, i raque emo uquiato je

¹ Jesús que ejemplo mo senei mbia je ra. ² —“Jenyu serea”, i raque Dios quia emo emo je co. Sã ererecua mo ndiqui ñee mbia je no. “Jenyu quiaru serese”, i rei que uquiato je ra. Eriirĩ ngüinisi rea ramo mose. ³ Mbae quiche ja mose que ngüimba mo mondo rei mbia mbiirandu ra. Mbua que ngaẽ sereã nea ja chõ erea ra. ⁴ Ngüimba mo ngue emondobe rei erea ra. “Mbae quiche jate que ra. Ticuasú quira tuchi que equishĩ nda. Eriirĩ ngüinisi isĩ ramo ndese jẽso mae. Jẽso quiaru erese”, i rei que erimba mbia je ra. ⁵ Ae je “jenyu” i nae, ùquĩ ngue echeẽ mumba ja chõ nda. “Co aso quia seco co”, i que emo nda. “Co aso quia mbae mo naa naa se co no”, i que emo no nda. ⁶ Mbua que teã teã ja ra. Ererecua rimba iruã nua ño ngue ra. Eiquia chee. ⁷ Ûquĩ mose que ererecua paama i tuchi ra. Soldados que emondo ngüimba iquiasa iquia iquia ra. Echuchua abe rei rei. ⁸ Ererecua que ñee ngüimba je cote ra. “Mbae quiche chi ja raque a. Ae je ‘jenyu’ ae rei nyii nae, sã ùquĩ ngaẽ eã. Eicuãte quia ñene. ⁹ Jẽso ñee mbia ja je. Ishonda ja je. ‘Jenyu ja ererecua riirĩ ngüinisi rerequia ramo ndese mae’, jenyẽ oso quia mbia mbuchesea sea”, i que ererecua ñee nda. ¹⁰ Erimba que nyoĩ mbia mbiirandu randu ja ra. Mbua turã mbiirandu. Mbua icuã abe mbiirandu randu no. Mbua que ngaẽ tuchi cote ra. Tuchua itãyã nyee que ra.

¹¹ Ererecua que ique mbia tubiriã ndese mae cote ra. Emo irao icuãte que chi ee huee ra. Tiru ererecua chimondo emingue eã ñochĩ nguia reaẽ. ¹² Ererecua que ñee ee ra. “Seriirĩ ndiqui ngüinisi isĩ a resẽ. ¿Mbaerã ndeirao turã eremingue eã nde?” i que ererecua ñee ee ra. Ñee eãte que ererecua cheẽ mose ra. ¹³ Ererecua que ñee ngüimba je cote ra. “Co jẽisi jẽ. Eo jenyucua. Ei abe jenyucua. Jenosẽ serao mombo itaicuee itondaruqui re. Huee ra nyeseo tuchi. Huee ra ureĩ quiti quiti tuchi”, i que ererecua ñee nda. ¹⁴ “Jenyu serui” i tuchi Dios quia mbia ja je co. Mbua mĩ mĩ ño eisirõ sirõ nguiã co, i que Jesús ñee nda.

¿Impuestos ra uremee ererecua je re? i mbia ñee Jesús je

¹⁵ —Jesús nandembucheẽ icuã na. I nda mbua paama i ee, i que fariseos ñee ñee nyue ra. ¹⁶ Nyebe fariseos uchimbaaquiatu mo mondochoi nguiã Jesús rea. Herodes chimbaaquiatu rese. Jesús mbucheẽ icuã sacua ño ùquĩ nde. Uturã ngue esaã ñooño Jesús je ra. —Jesús, co ereico mbua mbaaquiatu quiatu turãte co. Ndeturãte ereico mbua ja je co. Co ereico turãt e mbua mbuchiabiã co. Mbua erembaaquiatu quiatu turãte quia Dios icha rĩ co. ¹⁷ Nyebe urechu nguiã ñee ndeje a. ¿Coche mbua mbae isiqui a mee mee Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra. ¹⁸ Jesús que ùquĩ icuã icuate ra. Nyebe ñee nguiã ee. —¿Mbaerã jẽingo “I nda Jesús ucheẽ nyabi”, i serĩ nde? ¹⁹ Mbae isiquia mo jẽteacuquia imbu seje, i que ee ra. Mbua que eteacuquia ee ra. ²⁰ —¿Aba mbae nombre ñi mbae isiqui a rese a re? ¿Aba ãquĩ aingue abe ñi a re? i que Jesús ee ra. ²¹ —Romano nderecua, i que ñee Jesús je ra. Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee no, i que Jesús ee ra. ²² Mbua que

nyuruira jate u Jesús cheẽ andu ra. Nyoĩ ja que erecha cote ra.

Mbia raaque ra quera si, i Jesús

²³—Mbia raaque ra quera eã mbei, i que mbiamo nguia ñee nda. Saduceos i que ñquĩ je ra. Ñquĩ mo ngue nyoĩ ñee Jesús je ra. ²⁴—Sererecua, ã ngue Moisés mbesa nande je ra: “Emo mano mose eriiriã, sã enongue mano je ninisi rerequia erendaque re. Sã tiirĩ ngõngue raaque rĩ”, i que Moisés embesa nande je ra. ²⁵ Eriquii mo ngue siqui urerese ra. Seis que eribi ra. Eriquii que ngũinisiã quereco rei ra. Mano ño ngue tiirĩ ndocoĩ ngũinisi recha ra. Enongue que nguiquii checha quereco rei cote ra. ²⁶ Ae abe que mano ño tiirĩ ndocoĩ no nda. Ñquĩ seis que ngõngue checha quereco ja rei ra. Mano ja chõ ngue tiirĩ ndocoĩ no nda. ²⁷ Eninisi eru checha que mano nyee chõ cote no nda. ²⁸ Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ngue re. ²⁹ Jesús que ñee ee ra. —¿Mbaerã jẽingo Dios cheẽ icua eãte ã nde? Jẽingo Dios cheẽ abi tuchi ã. Jẽingo Dios quirãcuã icua eãte ã. ³⁰ Ae raaque ra Dios mbuquera si nae, ñquĩ nda ngũinisi quereco eã mbei huee cote. Ñquĩ nda ngu quereco eã mbei huee cote no. Angeles rã mbei ra mbia riqui huee ibate cote. ³¹ Mbia raaque quera si rĩ ño ngue Dios jembiirandu rei ra. ¿Embesa ji rese jemaẽ ãte re? ³² ã ño Dios cheẽ embesa ji re: Abraham nderecua chõ aico nguia se co. Isaac nderecua abe. Jacob rerecua abe no, i que embesa ji ra. ã ngue mano ndei nyii ra. Eresco siqui bei chõ nguia namo ã. Mbia raaque rerecua eã ño Dios re. Mbia reco rerecua chõ ae re, i que Jesús ñee mbia je ra. ³³ Mbia tubiriã ngue chi nyuruira tuchi eandu ra. Jesús mbae icua ja mose.

Echesequa tuchi quia Dios rese

³⁴ Jesús cheẽ aquiatu tuchi que ra. Nyebe saduceos cheẽ mbutiba nguia. Fariseos jirandu mose erese que ñmunua ñee nyue ra. ³⁵—Se chõ tacheẽ Jesús je. Ma Jesús ñee icuã, i rei que fariseo mo nda. Embesasa que ae ra. ³⁶—Jesús, Dios cheẽ tubiriãte riqui ã ndesẽ. Mbia echeẽ mumbayã sacua. ¿Ma Dios cheẽ ndiita tuchi ma nde? i que fariseo ñee Jesús je ra. ³⁷ Jesús que ñee ee ra. —ã ño Dios cheẽ ndiita ã nde: “Echesequa tuchi quia Dios rese. Ndechĩã je. Neaĩ je abe. Nendua ndua je abe”. ³⁸ Ñquĩ ño Dios cheẽ ndiita ñquĩ nde. Ñquĩ ño Dios cheẽ ñiinda ñquĩ nde. ³⁹ ã abe rei ñquĩ nduinda ã no: “Sã ereico nyesequa ndechiese no. Eĩ ere si chõ nyesequa mbia rese”. ⁴⁰ Moisés chimbesa tuchi chõ ñquĩ nde. Dios quiato cose ndare chimbesa ja chõ ñquĩ nde, i que Jesús ra.

¿Aba rucucha Cristo re?

⁴¹ Fariseos chichõ mose ñmunua ngue Jesús ñee ee ra. ⁴²—¿Aba rucucha Cristo re? ¿Aba jenye equia ee re? i que Jesús ñee ee ra. —David nducucha chõ ñene, i que fariseos ñee nda. ⁴³ Jesús que ñee ee cote ra. —¿Mbaerã David “sererecua” i ee re no? Espiritu turã embucheẽ mose. ⁴⁴ ã ngue David ñee nda: Dios que ñee Cristo sererecua je ra: “Ecoi sejii. Nde abe ra ererecua serese. Ae ndeucuyãte quia nae, ñquĩ je ra ndequirãcuã ateacuquia tuchi. Ndequirãcuã tuchi chee ra ñquĩ si”, i que Dios ñee sererecua je ra, i que David ra. ⁴⁵ David sí chõ “sererecua” i nguia Cristo je. Cristo David rucucha mose, ¿mbaerã David “sererecua” i ee re? i que Jesús fariseos je ra. ⁴⁶ Ñquĩ ngue ñee aquiatuãte Jesús cheẽ ndibishorõ nda. Aque mose bei que mbia preguntar i eã mbei Jesús je cote ra.

23

Jesús ñee asi fariseos je

1 Jesús que ñee uchimbaaquiatu je ra. Mbia tubiriã je abe no. 2 — Fariseos rã nda jëingochĩ jë. Embesasa rã abe ra jëingochĩ jë. “Ure quia Moisés chimbasa ureicuate nguiã ure ã”, i chõ nguiã. 3 Coche jëingo nguiã echeẽ mumbayã ndaque. Erã sí quia nda jëingoã nguiã. Echeẽ turã turãte raque. Siqui turã eãte quiatu nguiã. 4 Dios cheẽ embeta mbeta tuchichĩ nguia mbia je ã. Mbia echeẽ mumbayã aroneate chee quia ã. Eya eã eãte eriqui mbia rese ã. 5 Mbae turã naa mose, mbia mae sacua erese chõ ùquĩ nde. Tiru hu#rao ibi quitinda ai mb#coi tuchi equia ã. Dios cheẽ mbesa ji echucua bei quia uchiba cúa rese ã. Mbia mae sacua erese chõ eriqui nguiã ùquĩ naa naa ã. 6 Aba mbia eã tuchi fariseos. “Serendarã turã nguiatu se jë”, i tuchi equia mbia chumunua nua mose ã. 7 “Sã mbia ererecua i nande je”, i beite equia ã. Ebi tuchi “mbia mbaaquiatusa” i mose ee. 8 “Mbia mbaaquiatusa rei se”, jenyechĩ nda jë. Se mii ño jembaaquiatusa re. Nyiesenda chõ jë nde. 9 “Paba” jenyechĩ nda mbia mo je jë. Jendu mii ño siqui nguiã ibate pe. 10 “Ererecuarã se”, jenyechĩ nda eno. Se mii ño jenderecua re. 11 Jemo siqui mingue mose, mbae raã naa mose uataque je, aque quia ra ererecuarã. 12 Ae ucuasu raã naa nguia nae, mbia ñetẽ nda Dios saã ño ùquĩ je. Ae siqui mingue quia nae, mbia rerecuarã ño nda Dios saã ùquĩ je.

13 Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Jëingo sereãte quia Dios rese ã. Mbia siquise mose Dios rese, jëingo emingo eãte erese ã no. 14 Aba mbia eã tuchite jë. Eru cheecha mbae jembutiã tiã ñochĩ nguia ã. Ùquinde jëingo chõchĩ ñee oco oco Dios je ã no. “I nda mbia mae nanderese” jenyechõchĩ equia ã. Nyebe ra Dios jembasi tuchi cote. 15 Aba mbia eã tuchite jë, Embesasa. Aba mbia eã tuchite jë abe

no, Fariseos. Jëcuasu jësaã saãte quia ã. “Jëingo ure rui” jenyechõchĩ equia mbia je ã. Ùquĩ mo siqui mose jendui, eicuã tuchi chõ ùquĩ abe cote re.

16 Aba mbia eã tuchite jë. Sã eresayã mo ndiqui emo ndesayã mbuti echiba rese no. Ùquĩ na ño jë nde. Jëaquiatusã ño mbia mbaaquiatusa quiatuchĩ nguiã. “Jurar jenyechõchĩ Dios chuchua rii, coche jeñee jembuchebi nguiã”, jenyechõchĩ nguia mbia je ã. “Jurar jenyechõchĩ Dios chuchua jenda rii, ùquĩ mose quiatu jeñee jembuchebi aroneate nguiã”, jenyechõchĩ nguia mbia je ã. 17 ¿Oro quiatu i tuchi jiri Dios chuchua si re? ¿Mbaerã jëaquiatusãte riqui re? 18 “Jurar jenyechõchĩ Dios chuchua rii, coche jeñee jembuchebi nguiã”, jenyechõchĩ nguia mbia je ã. “Jurar jenyechõchĩ Dios chuchua rii, ùquĩ mose quiatu jeñee jembuchebi aroneate nguiã”, jenyechõchĩ nguia mbia je ã. 19 Eresayã na tuchi chõ jëingochĩ nguiã. ¿Mbaerã jëaquiatusãte riqui re? ¿Ofrenda quiatu i tuchi jiri altar si re? 20 Jurar jenyechõchĩ Dios chuchua rii, earonda abe rii ño jëingo nguiã jurar i ofrenda. 21 Jurar jenyechõchĩ Dios chuchua rii, Dios abe rii ño jëingo nguiã jurar i. Dios abe quia siqui nguiã uchuchua huee. 22 Jurar jenyechõchĩ Dios renda abe rii ño jëingo nguiã jurar i. Dios sí rii abe no.

23 Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Décimo jemee mee ndaque quia Dios je mbae ñetẽ nii. Comino. Menta. Anís. Dios cheẽ ndiita quiatu jemumba mumbate nguiã. Dios jëicua rã nyii. Jëingo turã na nyii. Jëya eã na mbia rese nyii. Aquere quiatu mbae ñetẽ jësaã cote. 24 Sã eresayã mo ndiqui emo ndesayã mbuti echiba rese no. Ùquĩ na ño jë nde. Mbae ñetẽ jësaã turã turãte raque quia ã. Dios cheẽ ndiita quiatu jemumba mumbate nguiã. 25 Aba mbia

eã tuchite jê, Embesasa. Aba mbia eã tuchite jê abe no, Fariseos. Jêcuasu jêsaã saãte quia ã. Sã emo ndiqui i riru irei irei earonda no. Eimi nguiatu eirei quiiriãte re. Eĩ ño jê no nde. Jêturã aba reã ño jêaronda no nde. Jeñiangui renda quiatu eicuã icuãte re. Mbae quia jembuquiachã quiachãte nguiã. Mbae abe quia jenyosei icuã icuãte nguiã. ²⁶ Eresayã na tuchi chõ jêingochĩ jê nde, Fariseos. Jeñiangui renda rane nguiatu jêirei. Jêaronda abe ra equishĩ cote.

²⁷ Aba mbia eã tuchite jê, Embesasa. Aba mbia eã tuchite jê abe no, Fariseos. Jêcuasu jêsaã saãte quia ã. Mbia raaque tãsa rã ño jêingo nguiã. Eati ji turãte raque. Eimi ye quiatu mbia raaque quiangue chi nguiã hue. Eroo cuí abe no. ²⁸ Eĩ si chõ jê nde. Jêaronda turãte aba reã ndiqui raque mbia je. Jeñiangui rend a quiatu eicuãte re.

²⁹ Aba mbia eã tuchite jê, Embesasa. Aba mbia eã tuchite jê abe no, Fariseos. Jêcuasu jêsaã saãte quia ã. Ae mbia turã mano cose nae, ãquĩ tãsa jembiiã turã mbeite raque quia ã. Dios cheẽ mbuchecuasa tãsa abe no. ³⁰ “Cose ureico mose, ã nda ureicuã eãte rei Dios quiato je. Ureramei na eã”, jenye raque equia ã. ³¹ “Mbia iquia iquiasa riirĩ ño ure re”, jenyete equia ãquĩ. Jendu rã si tuchi jê. Mbia i quiasa. ³² Jenamei icuã na si chõ jêingo no. ³³ Mbei tásie rã tuchi chõ jê nde. Eĩ jenye bei oso quia aque ngasẽ nyee tata cuasu. ³⁴ Nyebe ra Dios cheẽ mbuchecuasa amondo mondo quia jêje. Mbia mbaaquiatusa ra amondo jêje. Mbia aracua abe no. Jê nda sechimondo emo emo jêiquia. Emo emo nda jêiruã nua mbia chumunuásaa no. Jêico ico ra equia erese eiquia chee. ³⁵ Ae Dios quiato iquia iquia quia cose nae, ãquĩ ñi nda Dios jembasi cote. Sã mbia Abel iquia cose no. Sã mbia Zacarías abe iquia Dios chuchua jii no. Berequías riirĩ ndei aque. Sã mbia Dios quiato iquia iquia bei cose no. ³⁶ ãquĩ ja rĩ nda Dios

jembasi cote. Acheẽ nyecua quia jêje a.

Jesús ia eã tuchi Jerusalén jenda rese

³⁷ Tacheẽ na jêje, Jerusalén jenda. Seya eãte aicochĩ jendese co. Hue jêingo mbia iquia iquia beite hue. Dios cheẽ mbuchecuasa iquia iquia. Dios chimondo abe iquia iquia no. Sã nguira riqui nguiire reaquiato mondo ujeoqui re no. “Eĩ tae jendeaquiato”, ae beite rei nguiã jêje co. Secheẽ jêisi sereã mbei chõchĩ nguia ã. ³⁸ ¡Aico jendecha a cote jê! ³⁹ Jemae mae eã nda serese cote. Sechube mose ibate si, aque ramo mose ra jemae serese cote. “¡Co chi Dios rucucha ru quia co cote jê!” i ra mbia seisi turã aque mose cote, i que Jesús ñee nda.

24

Mbia ra Dios chuchua mbucoi ja, i Jesús

¹ Jesús que oso usẽ Dios chuchua si cote ra. Ecuata mose que echimbaaquiato ñee ee ra. —Sã Dios chuchua turã tuchite jê, i que ñee ee ra. ² Jesús que ñee ee ra. —Tacheẽ nyecua rã jêje. Ae rese jêingo mae ã nae, ãquĩ nda mbia mbucoi ja cote. Sita mo nda chi eã nyichuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibátee mo nda. Monte de los Olivos i que hue je ra. Echimbaaquiato que ngasẽ ñee eísaa ra. —¿Manosete ra ãquĩ nde? ¿Mbae ra urembiirandu nderese ndechu serĩ mose re? ¿Mbae ra urembiirandu mbae ua ja serĩ mose re no? i que echimbaaquiato ñee Jesús je ra. ⁴ Jesús que ñee ee ra. —Jêtesa jiri quia jê. Mbia mo nda jembirĩ irichĩ ñee jêje jê. ⁵ “Cristo chõ se re”, i ra mbia ñee ata atate jêje. ãquĩ ñee nda jeñanduchĩ jê. ãquĩ nda mbia mbirĩ irĩ jate. Ñee ñooño je chõ ãquĩ nde. ⁶ Mbia ra guerras saã saã tuchi. Mbia

ra ñee ñee tuchi quia nyiquia iquia je rii. Ũquĩ mose ra jësiquichechi jë. Ũquĩ ja rane nda nyecua raque. Aque mose ra mbae ja ua eã ná. ⁷ Mbia ra guerras saã tuchi chee. Nyiquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbae rasi. Mangue chooñoa tuchi ra ibi nyere nyere. ⁸ Jembasi ramo mose chõ nda ũquĩ nde. Aquere ra jembasi tuchi cote.

⁹ Mbia icuã icuã tuchi r a jëje serii. Nguerecua je ra mbae jenderao rao tuchi. Jëiquia chee rae. Mbia mangue chooñoa jenda ra jëucuyã tuchi serii. ¹⁰ Ae siqui quia serui nae, ũquĩ tubiriã nda hui sesi ũquĩ mose cote. Ũquĩ nda nyucuyã. Ũquĩ nda nguerecua mbuqueta queta tuchi ngõngue rii. ¹¹ “Dios cheë mbuchecua chõ se re”, i ra mbae ñee ata atate jëje. Ũquĩ nda mbae mbirĩ irĩ tuchi. ¹² Mbia icuã icuã tuchi ra cote. Aba cheë mumba mumba beite ra cote. Mbia ra nyese-cua eã tuchi nyiese cote. ¹³ Ae ra siqui bei serese, ũquĩ nda Dios mingo bei. ¹⁴ Sequiato r a Dios cheë turã senei senei ná mbae ja je nyii. Mangue chooñoã jenda ja je. Aquere ra mbae ua ja cote.

¹⁵ Dios cheë mbuchecua rei Daniel. Ae que embesa Mbae Mbutiãsa Icuã nã nda. “Dios rendaque re taico se quiatu”, i ra equia huee. (Ae ra mae nguia sechimbesa rese nae, sã ũquĩ eicua.) ¹⁶ Jemae mose Mbae Mbutiãsa Icuã ndese, jeña esi. Ae siqui quia Judéaa, sã ũquĩ uchã jei choi ibi ibátee mo. ¹⁷ Ae ra siqui tuchia quite rese, sã ũquĩ iqueã nyoi uchuchua uquichi mose. Sã echoi chõ uchã hue si bei, umbae rirõ ndocoĩ. ¹⁸ Ae ra siqui úcoo, sã ũquĩ nyebiã ngaë huirao rea. Sã hue si bei chõ echoi uchã. ¹⁹ Aba mbae eã tuchi ra emo áquẽ ndiru rerequia mose aque mose. Nguirĩ mbuquiambu je abe no. ²⁰ “Nyiiisei mose eã urechã” jenyee Dios je. “Sábado mose eã abe urechã”, jenyee abe Dios je no. ²¹ Mbae rasi saã tuchi aque mose. Mbae rasi

que mbae saã eã jiri nyii ra. Aque ramo mose ra mbae rasi raã tuchi cote. Mbae ua bei sacua ño ũquĩ nde. ²² Ae rasi ra mbae saã tuchi nae, ũquĩ nda Dios mbujua jiri uquiato rii. I nda emo ñimbirãcuã eã tuchi rei ũquĩ ndasi je. ²³ “A Cristo riqui a jë” i mose emo jëje, “nyia” jenyechi nda ũquĩ ñee mose jë. “Hue Cristo riqui hue jë” i mose emo jëje, “nyia” jenyechi nda eno jë. ²⁴ “Cristo chõ se re”, ichõiño nda mbae ñee ata atate jëje. “Dios cheë mbuchecua chõ se re”, ichõiño nda mbae ñee ata atate jëje no. Mbae mae sayã nda esaã saã tuchi mbae mbirĩ irĩ sacua. Ũquĩ Dios quiato abe chee mbirĩ irĩ arõte. ²⁵ Ũquĩ nonde chõ aico nguiã jembirandu randu co. ²⁶ “Hue Cristo riqui turuquia hue”, ichõiño nda mbae jëje serii. “A Cristo riqui tuchia a”, ichõiño nda emo jëje serii no. Ũquĩ mose ra “nyia” jenyechi jë. ²⁷ Sã ama ndiqui pirirã i ibei resae ja no, eĩ nda sechu mose. Mbae ra mae ja serese. ²⁸ Sã urubu riqui mae ja mbae raaque rese no. Eĩ si ra seicua mae ja sechu rese no.

Dios rirĩ nda tube ibate sã

²⁹ Mbae ũquĩ ndasi raã ja mose r a tenda checuayã mbei cote. Nyasi abe no. Nyasitata ra ngoi ngoi. Ibei jenda abe ra quiata quiata chee cote no. ³⁰ Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. Mbae ra mae ja tuchi sechu rese mangue chooñoa jenda ja. Mbae ia eã tuchi ra nyeseo mae mose serese. ³¹ Angeles serimba ra amondo corneta mbucheë sacua. Ũquĩ nda mbae sechiisirõ munua nua ja seje cote. Ishonda ja. Mangue chooñoa jenda ja.

³² Sã higuera riqui no. Sã ira mo ndiqui no. Ero quira usẽ j a mose, “iraro itõ ndacu ra cote”, i chõ mbae nguiã aque mose. ³³ Eĩ sí ra mbae ua ja nonde. Ae rii aico ñee jëje nae, ũquĩ ndese jemae mose, “mbae ra ua ja cote” jenyee ra cote. ³⁴ Tacheë nyecua jëje. ã mbae riqui ngata ibi ã nae,

ũquĩ emo emo nda manoã mbae ua ja nonde. ³⁵ Ibei ra ua. Ibi abe ra ua no. Secheẽ nguia ra ua eã mbei.

³⁶ Manosete chõ nda mbae ua ja. Aico eicuayãte co. Mbia mo abe eicuayãte quia ã no. Angeles abe eicuayãte quia ã no. Paba mii ño eicua nguia co. ³⁷ Sã Noé mosenda mbia siqui sereãte Dios rese cose no. Eĩ si ra mbia siqui sereã Dios rese sechu nonde no. ³⁸ Sã Noé mosenda mbia quiaru chooño no. Ndua rocoĩ Dios rese. Ngũinisirã ngue equereco chooño ndua rocoĩ Dios rese no nda. Noé que ique chee arca ye ra. Amandi cuasu nonde. ³⁹ Ama ngue uchi u quia mbia iquia ja nonde cote ra. Mbia mbua tuchi que ra. Eĩ ae ra u mbia mbua tuchi sechu mose. ⁴⁰ Sechu mose ra mbia nyeremo siqui úcoo. Co mii nda arao. Enongue ra siquichõ. ⁴¹ Cuña nyeremo nd a chi raque mbua tocho no. Co mii nda arao. Enongue ra siquichõ. ⁴² Jêtesa bei quiatu quia serese. Ae mose ra achu, aque tenda rese jêiranuate riqui ã. ⁴³ Mbaecha mo jirandu mose mbae mbuquiachãsa rese, “co isa ra eru” i mose, ũquĩ mose nda uqueã nde chaẽ. I nda mbae mbuquiachãsa mbae sirõ eã ndei. ⁴⁴ Jẽingoquiato bei quiatu quia seraarõ arõ. Jendua eã mose serese ra achu jembuate.

Erimba echeẽ mumbayã mose, eya tuchi rae

⁴⁵ Dios rimba aba cheẽ mumbayã je aico ñee a. Dios rimba aquiato je aico ñee a. Sã ererecua mo ñee ngũimba turã je no. “Sembae esaarõ turã ja quia secutiã. Serimba ataque embuquiaru quiaru turã secutiã”, i que ererecua ee ra. ⁴⁶ Erimba echeẽ mumbayã mose, ererecua ia tuchi ra eru mose. Erimba abe ra eya tuchi no. ⁴⁷ Ererecua ra ngũimba mii umbae raarõ mbei sacua cote. ⁴⁸ Sã erimba ndua ndua uchiangui re no. “Sererecua ra tu jei ãte” i ndua ndua. ⁴⁹ Hue ñee icuã icuã uataque je hue cote. Iruã nua cote. Quiaru chooño cote. Mbae mbei chooño abe cote. Quiacua quiacua mbia icuã ndese cote. ⁵⁰ Sã

ererecua ruchi nguia ngũimba mbuate aque mose cote jẽ. ⁵¹ Ererecua ra eiruã nua tuchi. Mombo rae. Mbae rasi ra esaã tuchi. Ae ucuasu saã saã nguia nae, ũquĩ ndese ra mbae rasi raã tuchi cote. Nyeseo seo tuchi ra equia. Ureĩ nda equiti quiti tuchi.

25

Nyucuaaque icoquiato je

¹ Nyucuaaque icoquiato je rã si rei Dios rimba. Sã nyucuaaque diez nyoĩ quia emo ngũinisi nderequia ramo ndese maenno. Lamparina nendi que ecuruchoi ja quia ra. ² Cinco que icoquiato je ra. Cinco que icoquiatoã je no nda. ³ Ae icoquiatoã nae, ũquĩ ngue mbae quira curuchoi eã umbae lamparina mombisẽ sacua nda. ⁴ Ae icoquiato nae, ũquĩ ngue mbae quira curuchoi botella ye ra. Lamparina ye abe. ⁵ Ae ra ngũinisi isi rei nguia ee, aque que itõte ee ra. Nyucuaaque reesi esi chee que ra. Uque uque ja chee que ra. ⁶ Itondiite mose que to i andu cote ra. “Co erurã ndu quia co cote jẽ. Jẽso mae erese cote”, i que mbia tasẽ tasẽ ee ra. ⁷ Nyucuaaque que nyuruã ja cote ra. “Nandembae lamparina nandemombisẽ mbisẽ ja”, i rei que ra. ⁸ Ae icoquiatoã nae, ũquĩ ngue ñee ndei icoquiato je ra. “Urembae uque uquete. Mbae quira ñetẽ jeme mee na ure je”, i rei que uataque je ra. ⁹ “Ateẽ. Nande ja chayãte ra resẽ. Emo jẽisi chõ oso icua”, i que icoquiato je ñee ee ra. ¹⁰ Nyoĩ rei que equia eisi cote ra. Ecutiã ngue erurã ndu cote ra. Nyucuaaque icoquiato je que nyoĩ ique erese ra. Ngũinisirã isi ramo ndese mae. Quiaru abe que echoi erese ra. Eiquesa que ematã cote ra. ¹¹ Icoquiatoã je abe que ngaẽ nyee ra. I que eiquesa matã ji mi ee ra. “Embuquiata rã ure je”, i rei que ñee eru je ra. ¹² Eru que ñee ee ra. “Tei. Jaẽicuayã tuchite se”, i que eru ñee ee ra, i que Jesús ñee mbia je ra. ¹³ — Jẽingoquiato bei quia jẽ. Ae mose ra achu, ũquĩ jẽicuayãte quia ã.

*Ererecu a mbae isiquia mbuchao
chao ngũimba je*

14 Sã ererecu mo mbae isiquia mee mee ngũimba je no. Eĩ si chõ Dios nguiã mbae mee mee ngũimba je. Ererecu oso serĩ mose que umbae mbae isiquia mee mee ngũimba je ra. Embaata ata sacua ño ngue emee nguiã ee. 15 Cinco mil que emee emo je ra. Dos mil enongue je no. Un mil que enongue je no nda. “Jenya chõ tamee mee jêje jê”, i que ñee ee ra. Secha que oso isho cote ra. 16 Ae je ererecu cinco mil mondo nae, aque que negocio saã saã mbae isiquia je ra. Mbae isiquia que embaata tuchi ra. 17 Ae je ererecu dos mil mondo nae, aque abe que negocio saã saã mbae isiquia je ra. Mbae isiquia que embaata tuchi no nda. 18 Ae je ererecu un mil mondo nae, aque que ibi sibicoi mbae isiquia rerecoquiato sacua nda. 19 Emo mose tuchi que ererecu ru cote ra. Ñee ngue ngũimba je cote ra. “Jenyu sembiirandu sembae mbae isiquia rese cote”, i que ñee ee ra. 20 Ae je cinco mil mondo nae, aque rane ngue tu ñee nguerecu je ra. “Cinco mil que ereme ndei seje nae, ũquĩ ngue ambaata ra. Cinco mil que aisibe ra”, i que emee ja nguerecu je ra. 21 Ererecu que ñee ee ra. “Coche ñene. Nde quiarei serimba turã tuchi. Mbae ñetê ngue eresaã turãte nde ra. Nyebe ra mbae tubiriã ereteaquiato seje cote. Ndeya bei tuchi ra ereico serese cote”, i que ererecu ñee ee ra. 22 Ae je ererecu dos mil mondo nae, aque que tu ñee nguerecu je cote ra. “Dos mil que ereme ndei seje nae, ũquĩ ngue ambaata ra. Dos mil que aisibe ra”, i que emee ja nguerecu je ra. 23 Ererecu que ñee ee ra. “Coche ñene. Nde quiarei serimba turã tuchi. Mbae ñetê ngue eresaã turãte nde ra. Nyebe ra mbae tubiriã ereteaquiato seje cote. Ndeya bei tuchi ra ereico serese cote”, i que ererecu ñee ee ra. 24 Ae je ererecu un mil mondo nae, aque que tu rei ñee nguerecu

je cote ra. “Nde que ere queteãte quiatu nguiã mbae rese. Ndechitiquia eã abe ereishao shaote quia co. 25 Nyebe asiquiche tuchi nguiã mbae isiquia mee mose seje. Nyebe achati nguiã ibi je. Co é co resê”, i que ñee nguerecu je ra. 26 Ererecu que ñee ee ra. “Aba rimba biã tuchi quiarei nde. Ndetomei tuchi chõ eriqui re. Sequeteã mose mbae rese ndeje, ¿mbaerã secheẽ eremumba re? 27 Sembae mbae isiquia eremonaõ ñochĩ banco. I nda eata jiri sechu mose cote re chã”, i que ererecu ñee asite ee ra. 28 Ererecu que ñee mbi a hue jenda je cote ra. “Mbae isiquia jêsirõ na esi un mil. Ae diez mil quereco nae, aque je jemondo. 29 Ae embae tubiriãte nae, aque je mbae tamondobe. Ae embae ãte nae, embae ñetê tasirõ ja esi. 30 Co que serimba icuã tuchi ra. Jemombo itondaruqui re. Mbae rasi ra esaã tuchi huee. Huee ra nyeseo tuchi. Ureĩ nda equiti quiti tuchi”, i que ererecu ñee nda.

*Jesús ra mbia emo emo mingo icúe
umbaerã*

31 Sechu mose íbii mbia rerecuarã, ángeles sembae ra semama tuchi aque mose. Serenda nininya tuchi ra aque mose. 32 Mbia mangue chooñoa jenda ja ra chi ñumunua huee aque mose. Mbia emo emo nda achono icúe sembaerã aque mose. Sã oveja raarõsa riqui ovejas no icúe chivos si no. 33 Uquiato cuti ra ovejas no. Uquiato cutiã nda chivos no no. 34 Eĩ ae ra se mbia rerecu tuchi mose. Acheẽ nda mbia sequiato cutinda je. “Jenyu serese. Jenderecu turã tuchi ra aico jêje. Paba turãte riqui jêje co. Paba que jêirabo nyii mbae ao nonde ra. Jêingo sacua serese. 35 Seriãcuã mose que mbae jemee seje ra. Seisei mose que sembiu ra. Sechuchua eã mose que seisi turã no nda. 36 Seirao eã mose que tiru jemee seje ra. Serasi mose que jêso mae serese ra. Seico mose cárcel que jêso mae serese no nda”, ae ra ñee sequiato cutinda je. 37 Sequiato

cutinda ra ñee seje cote. “¿Manose mbae uremee ndeje nderiãcuã mose re? ¿Manose ureso nembiu ndeisei mose re? ³⁸ ¿Manose ure ndeisi turã ndechuchua eã mose re? ¿Manose tiru uremee ndeje ndeirao eã mose re? ³⁹ ¿Manose ureso mae nderese nderasi mose re? ¿Manose ureso mae nderese ndeico mose cárcel re?” i tuchi ra ñee seje. ⁴⁰ Aque mose ra acheẽ ee. “Tacheẽ nyecua jêje. Senongue mo mbaech a reã ndaque. Ae turã jêsaã senongue mo je nae, seje eraã naanguia chõ ùquĩ nde”, ae ra ñee ee. ⁴¹ Acheẽ nda sequiatio cutiã quitinda je cote. “Jêso sesi. Mbae turã nda jêisiã seo jenda. Jêso tata cuásuu. Ae Dios chiao tata, diablo mbasi sacuaã. Diablo rimb a abe mbasi sacuaã. Ùquĩ tata ra uqueã mbei. ⁴² Seriãcuã mose que mbae mo jemee eãte seje ra. Seisei mose que sembiu eãte no nda. ⁴³ Sechuchua eã mose que seisi turã eã nda. Seirao eã mose que tiru jemee eãte seje ra. Serasi mose que jêso eãte mae serese ra. Seico mose cárcel que jêso eãte mae serese no nda”, ae ra sequiatio cutiã quitinda je. ⁴⁴ Sequiatio cutiã quitinda ra ñee seje cote. “¿Manose mbae mo uremee eã ndeje nderiãcuã mose re? Ndeisei mose abe no. Ndechuchua eã mose abe no. Ndeirao eã mose abe no. ¿Manose uresoã nderea nderasi mose re? ¿Manose uresoã nderea ndereco mose cárcel nde no?” i ra sequiatio cutiã quitinda ñee seje. ⁴⁵ Acheẽ nda ee. “Mbae turã jêsaã eã mose emo je, seje eraã eã naanguia chõ ùquĩ nde”, ae ra sequiatio cutiã quitinda je. ⁴⁶ Ùquĩ nda nyoĩ ja tata cuasu cote. Huee ra mbae rasi raã mbei tuchi cote. Sequiatio cutinda quia ra siqui turã mbei ibate cote, i que Jesús ñee nda.

26

Jesú nandeisi tarõ, i ja ererecua nyue

¹ Aquere que Jesús ñee uchimbaaquiatu je cote ra. ² —Dos días mose ra fiesta de la pascua cote. Aque mose ra mbia icuã semee ererecua je seiquia

sacuã, i que Jesús ñee nda. ³ Sacerdote rerecua que ñumunua ja cote ra. Amei ja rese. Embesasa rese abe no. Ùquĩ ngue ñumunua ja u Caifás itaicuee ra. Caifás rei sacerdote rerecua tuchi. ⁴ Caifás itaicuee que ùquĩ nyi ñee ñee Jesús rĩ nda. —Jesús nandembĩrĩ irĩ jê. Eisi sacuaã. Etarõ sacuaã. Eiquia sacuaã cote, i que u ñee ñee nyue ra. ⁵ —Fiesta mose eã ño nandeisi jê. Mbia ra paama i tuchi nande je, i que u ñee ñee nyue ra.

Cuña mo aba mbusimbusa turã ichusẽ Jesús ãquĩ ndese

⁶ Jesús que siqui Simón Leproso chuchúaa ra. Betania, i que hue je ra. ⁷ Cuña mo ngue tu erea hue ra. Aba mbusimbusa mo ngue equeru Jesús je ra. Embisẽ tuchi que equeru ra. Mbae isiquia mumbasa tuchi que ùquĩ nda. Ichusẽ ja que Jesús ãquĩ ndese equiaru mose ra. ⁸ Echimbaaquiatu que chi ja mae erese ra. Paama i que cuña je ra. ⁹ —¿Mbaerã eichusẽ ñooño nde? Mbae isiquia ribishorõ ño nda aba emondo re. Mbaecha reã je emee mee sacuaã, i que echimbaaquiatu ñee nyue ra. ¹⁰ Jesús que echeẽ ñandu ra. Ñee ngue ee ra. —¿Mbaerã jêingo ñee ùquĩ nde? Sã cuña ae riqui ae. Ae esaã seje nae, eturãte seje ùquĩ. ¹¹ Mbaecha reã nguia ra chi arete íbii a. Se quia nda aico bei eã nguiã jendese aa. ¹² Seati nonde chõ ngue cuña aba mbusimbusa ichusẽ nguiã serese. ¹³ Tacheẽ nyecua jêje. Mbia Dios cheẽ turã nenei nenei mose mangu chooñoa jenda ja je, cuña nyisaã abe ra esenei senei. Mbia ndua turã ja sacuaã echisaã abe rese, i que Jesús ñee uchimbaaquiatu je ra.

Jesús tamee jêje, i Judas mbia icuã je

¹⁴ Judas Iscariote, i rei que Jesús chimbaaquiatu mo je ra. Aque que oso ñee sacerdote rerecua je ra. ¹⁵ —Jesús tamee jêje. ¿Mbae ra jemee seje eribishorõ nde? i que Judas ñee sacerdote rerecua je ra. Sacerdote rerecua que mbae isiquia ata mee ee ra.

Treinta que ra. ¹⁶—Mbia eãsa quiatu Jesús tamee jêje, i que Judas ñee ee ra.

Jesús quiaru uchimbaaquiatu rese

¹⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. Fiesta nonde que echimbaaquiatu ñee Jesús je ra. —¿Mangue ra oveja urembuchi mangue ndechiurã nde? i que ñee Jesús je ra. ¹⁸ Jesús que ñee ee ra. —Jêso sucha cuasu. Jeñee aque je. “Jesús que urembu ñee nde je ra. ‘Ndechuchua oveja tau sequiato rese semana nonde’, i que Jesús ucheẽ mbu nde je ra”, jenye aque je, i que Jesús ñee nda. ¹⁹ Echimbaaquiatu que nyoï erea Jesús cheẽ nguire ra. Oveja que embuchi huee cote ra.

²⁰ Itondaru ramo mose que Jesús chi quiaru uchimbaaquiatu rese huee cote ra. ²¹ Quiaru mose que Jesús ñee ee cote ra. —Tacheẽ nyecua jêje. Jemo nda semondo mbia icuã je, i que ñee uchimbaaquiatu je ra. ²² Echimbaaquiatu ia eã tuchi que echeẽ mose ra. —¿Se ra aremondo ee re? i ja jate que ñee Jesús je ra. ²³ Jesús que ñee ee ra. —Ae chí quiaru serese aque plato ye sí a nae, aque tuchi ra semondo mbia icuã je. ²⁴ Dios cheẽ ndui sí tuchi ra amano ndaque. Ae ra semee mbia icuã je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curi”, i chee ra aque, i que Jesús ra. ²⁵ —¿Se ra aremondo mbia icuã je re? i que Judas ñee Jesús je ra. Jesús rĩ ñeende mbia icuã je nyii. “Ae” i que Jesús echeẽ mose ra.

²⁶ Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Ã mbichae jêu. Serete chõ ã nde, i que Jesús ñee ee ra. ²⁷ Vino mbeisa que esirõ cote no nda. Gracias i que Dios je ra. Mondo que uchimbaaquiatu oo cote ra. —Jembei mbei ja. ²⁸ Seruqui chõ ã

nde. Mbia icuã mbutiã sacuã ño seruqui re. Dios cheẽ yasu rui si chõ seruqui riqui nguiã mbia icuã mbutiã co. ²⁹ Tacheẽ nyecua tuchi jêje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguiã jendese cote, i que Jesús ñee nda.

Jesús aicuayãte resẽ, ichõñõ nda Pedro serĩ, i Jesús

³⁰ Frasei rasei que cote ra. Nyoï que Monte de los Olivos ra. ³¹ Jesús que ñee uchimbaaquiatu je ra. —Jêreĩ ireĩte ra serĩ co isa. Jeñimboseĩ mboseĩ nda ošo serecha co isa. Sã embesa ji riqui ñee no: “Dios ra oveja raarõsa iquia. Oveja ra ñimboseĩ nyoï cote”, sã embesa ji riqui i no. ³² Seraaque quera sire ra aso se rane jendaarõ Galilea, i que Jesús ra. ³³ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra. ³⁴ Jesús que ñee ee ra. —Tacheẽ nyecua nde je, Pedro. Ngaira cheẽ nonde ra erecheẽ ñooño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús ñee ee ra. ³⁵ Pedro que ñee ee ra. —Mbia sei quia arõte raque nderĩ, acheẽ ñooño eã nda nderĩ, i rei que Pedro ra. Eĩ ja que ñee nda.

Jesús ñee ngu je

³⁶ Jesús que oso Getsemaní cote ra. Uchimbaaquiatu rese. —Jengoi rã u aa. Taso rã ñee Paba je pe jiri se, i que Jesús ee ra. ³⁷ Pe quiti jiri que Pedro rerao ra. Zebedeo riirĩ nyeremo ndese. Eya eã ndasi tuchi que tu ee aque mose ra. ³⁸ Ñee ngue ũquĩ je ra. —Seya eã ndasi tuchi aico co. Seya eã ndasi ra sei quia chee. Jenguchõ na jê aa. Jêtesa tesa bei u aa, i que Jesús ñee ee ra. ³⁹ Jesús que oso pe quiti jiri cot e ra. Nyibi que u ngũĩ ndese ñee Dios je ra. —Paba, ũquĩ ndasi asaã sereãte raque quia co. Ae sebite riqui nae, ũquĩ ndese semingo eã. Ae ndebite riqui nae, ũquĩ ndese quiatu semingo, i que Jesús ñee Dios

je ra. ⁴⁰ Nyebi que u uchimbaaquiatu je cote ra. I que eu uque ja ee cote ra. Ñee ngue Pedro je ra. —Jëingo areã ñochi tesa serese se ñee mose Dios je. ⁴¹ Jëtesa tesa u. Jengue eã u ñee Dios je. Mbae icuã tã i eã sacuã jëje. Jëingo serete raque serese. Mbae icuã nguiatu jembuti mbutite nguiã, i que Jesús ee ra. ⁴² Osobe que ñee Dios je pe jiri cote ra. —Paba, nde ñee mose seje, “mbae rasi ra eresaã” nde i mose seje, asaã nda se, i que ñee Dios je ra. ⁴³ Nyebi que u uchimbaaquiatu je cote ra. I sí que u uque ee no nda. Eresa quiatu ngue eshiu shiute nguiã. ⁴⁴ Jesús que osobe erecha ñee Dios je ra. Tres veces que aque cote ra. Hue rí si que ñee Dios je ra. ⁴⁵ Uchimbaaquiatu jii que esi ñee ee cote ra. —Jengue cote. Jenguenea jëucua cote. Semondo ra mbia icuã je cote. Sei quia sacuã. ⁴⁶ Jëhuã cote. Nyao cote. Ae ra semee mbia icuã je, co eru quia semee sacuã co cote, i que Jesús uchimbaaquiatu je ra.

Mbia icuã Jesús isi suruchoi

⁴⁷ Jesús cheë mosebe tuchi que Judas ru erea ra. Jesús chimbaaquiatu rei que ae ra. Aque rese que mbia cuaë tuchi quia ra. Tiquise abe que ecurucuaë nguia ra. Ira jua abe no. Sacerdote rerecua chõ ñquí mbucuaë nguia reaë. Amei abe. ⁴⁸ Judas ñee nyecuayã nguiatu quia ñquí je nyii reaë. —Ae ritii ra asiite, aque chõ ñene. Aque jëisi serao, i quia equia ee nyii reaë. ⁴⁹ Jesús ríichã ngue esi saluda i ee cote ra. Jesús ritii que esiite ee cote ra. ⁵⁰ —¿Mbaerã erechu serea re? i que Jesús ee ra. Mbia que ngaë Jesús isi ecua cote ra. ⁵¹ Ñquí mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁵² Jesús que ñee ee ra. —Ndechuuru emingue chõ eriru ye. Nde emo nyisha mose tiquise je, nde abe ra emo ndeisha. ⁵³ ¿Ndeiranuate ángeles rese re? Se ñee mose Paba je, ángeles tubiriã tuchi nda embu seje re chaë. Sereaquiatu sacuã. ⁵⁴ “Ángeles embu

ra sereaquiatu”, ae eã nda Paba je. Ñquí mose ra embesa ji ique eã cote. Sã embesa ji riqui ñee no: “Mbae rasi ra esaã tuchi” i no, i que Jesús ñee Pedro je ra. ⁵⁵ Jesús que ñee mbia ja je cote ra. —¿Mbaerã jenyu quia tiquise rurucuaë serea co re? Ira jua abe no. Mbae mbuquiachãsa rea rocoi jenyuchi nguia serea co. Tenda que amumba mumba beite rei quia jendese Dios chuchua resë. Mbia que ambaaquiatu quiatu bei rei quia huee resë. ¿Mbaerã seisiã nyucua aque mose re? ⁵⁶ Embesa ji ique sacuã ño jëicuã icuã ndiqui nguiã seje ã, i que Jesús ra. Echimbaaquiatu que nyoi ja chee uchã Jesús recha ra.

Jesús mbia curuchoi mbia rerecua je

⁵⁷ Ae Jesús isi nae, ñquí ngue ecuruchoi sacerdote rerecua je ra. Huee que embesasa chi ja ñmunua nda. Amei ererecua ja abe. ⁵⁸ Pedro que embuchurucha rucha oso quia erui ra. Ngasë nyee que sacerdote rerecua itaicuee ra. Huee que ngoi sacerdote rimba mo ndese ra. —Mañi nda mbia Jesús je reae, i que huí ngoi eraarõ arõ nda. ⁵⁹ Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandei quia, i rei que ñee ñee nyue ra. —¿Mbae i ra aba mbia je Jesús ríicharã nde? i rei que u ñee ñee nyue ra. ⁶⁰ Emo emo ngue ngaë ndei ñee icuã icuã Jesús ríi nda. Ñquinde que mbia nyeremo ngaë ñee ñooño Jesús ríi nda. ⁶¹ —Jesús que ñee ñooño Dios chuchua ríi nda. “Dios chuchua ra ambucoi. Tres días mose ra achaobe”, i que urechandu Jesús cheë nda, i que ñquí ñee ñooño Jesús ríi nda. ⁶² Sacerdote rerecua que juã ñee Jesús je ra. —¿Echeë nda eresibishorõ eã mbei re? ¿Mbae i equia nderíi nde? i que Jesús je ra. ⁶³ Jesús que ñee eã mbei echeë mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? Díosaa echeë ure je, i que sacerdote rerecua ñee ee ra. ⁶⁴ Jesús que ñee

ee ra. —Ae. Dios rucucha chõ se re. Tacheẽ nyecua jêje. Jemae nda serese se coi mose Dios quirãcuã jii. Sechu mose abe ibeishĩ ndese, i que Jesús ee ra. ⁶⁵ Sacerdote rerecua que paama i tuchi Jesús cheẽ mose ra. Huiirao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiiran-dube eã cote. Nandemae ndei ngue erese re. ⁶⁶ ¿I jêje re? ¿Mañi nande ra equia re? i que sacerdote rerecua ñee ererecua ataque je ra. —Eicua tuchi que ra jẽ. Sã mbia eiquia, i jate que ererecua ñee Jesús rii nda. ⁶⁷ Mbia que ñinimbu nimbu Jesús ruba rese cote ra. Ucuu ucuu abe que erese ra. Emo emo ngue eritii mbeete ete o je ra. ⁶⁸ Ñee ngue ee ra. —“Cristo chõ se re”, ere ñi equia. Aba chõ ucuu nderese chã. Ma eicua no, i que mbia ñee icuã icuã ee ra.

Jesús aicuayãte reseẽ, ichõiño Pedro

⁶⁹ Pedro que chí mbeite ngoi itaicuee ra. Nyucuaaque mo ngue tu ñee ee mbia rimba mo nda. —Jesús resenda que nde abe ra. Galilea jenda, i que nyucuaaque ñee ee ra. ⁷⁰ Pedro que ñee ee ra. —Tei. Ndecheẽ aicuayãte, ichõiño ngue Pedro mbia résaa ñee ee ra. ⁷¹ Pedro que oso quia eiquesa cuti cote ra. Nyucuaaque nongue que ñee mbia je erii nda. —Co abe que Jesús resenda ra. Nazaret jenda, i que ñee mbia je ra. ⁷² —Tei. Jesús aicuayãte, ibe que Pedro ñee icuã ee ra. ⁷³ Ae chi huee nae, ñquĩ mo ngue ñee Pedro je cote ra. —Jesús resenda chõ nde abe resẽ. Ndecheẽ aba chũcuate resẽ, i que ñee ee ra. ⁷⁴ Pedro que jurar i tuchi ñee ee ra. —Aicuayã tuchite se resẽ, i que ñee ñooño nda. Aque mose tuchi que nguira ñee cote ra. ⁷⁵ Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nonde ra erecheẽ ñooño tres veces serii, sã Jesús i ee nyii no. Ñquĩ ndese que Pedro ndua cote ra. Nyebe esi nguiã usẽ nyeseo tuchi.

27

Mbia Jesús curuchoi Pilato je

¹ Nyaashĩ namo mose que sacerdote rerecua ndua hue rĩ ja ra. Amei mbia rerecua ja abe no. Hue rĩ ja ndua Jesús iquia sacua. ² Jesús que echucua suruchoi Pilato je ra. Pilato rei mbia rerecua, hue jenda ja rerecua.

Judas uchoso mumbi nyiquia

³ Mbia ra Jesús iquia, i mose Judas je, eya eã tuchi que ñquĩ mose ra. —Jesús amee jirichĩ nguiã mbia je, i que ra. Nyebe mbae isiquia mondobe nguiã sacerdote rerecua je. Amei ererecua je abe no. ⁴ —Mbae icuã tuchi asaachĩ. Jesús seteã tuchi ameechĩ jêje. Eiquia sacua, i que Judas ñee nda. —Nde quia rei. Ure eã ñene, i ja que ererecua ñee ee ra. ⁵ Judas que mbae isiquia mbaba asi mombo mondo íbii ra. Dios chuchúaa. Oso que uchoso mumbi nyiquia cote ra. ⁶ Sacerdote rerecua que mbae isiquia sirõ ibi si cote ra. —Mbia ribishoronda chõ ã mbae isiquia re. Nyebe nandemondo eã ofrendarã, i que ñee ñee nyue ra. ⁷ Aquere que sacerdotes ibi mo isi aque mbae isiquia je ra. Ibi mo ngue eisi mbiamo tiquia tiquia sacua nda. Ñionga, i que hue ibi je ra. ⁸ Nyebe eriqui nguiã “mbia ruqui rua” i bei hue je. Namonyee. ⁹ Aque mose que Jeremías ñimbese ique cote ra. Ñ ndei Jeremías ñimbese ã:

Ñquĩ mbae isiquia treinta que eisi cote ra.

Ñquĩ ndei mbia ribishoronda ñquĩ.

¹⁰ Ñquĩ mbae isiquia que emondo hue ñionga ribishorõ cote ra.

Dios ñee nguia erii seje nyii nae, ñquĩ ndu si,

i que Jeremías embesa cose ra.

Pilato ñee Jesús je

¹¹ Mbia que Jesús curuchoi Pilato je cote ra. Pilato que ñee ee ra. —¿Judíos rerecua chõ nde re? i que ee ra. —Ae. Judíos rerecua chõ se re, i que Jesús ee ra. ¹² Sacerdote rerecua que ñee icuã ja Jesús je ra. Amei ererecua

abe no. Jesús que ñee ãte echeẽ mose ra. ¹³ —¿Erechanuãte equia ñee mose nderiĩ nde? i que Pilato ñee Jesús je ra. ¹⁴ Jesús que ñee ãte echeẽ mose ra. Nyebe Pilato nyuruira tuchi nguiã echeẽ eã mose.

Jesús jẽiquia mbucha ira rese, i ererecua

¹⁵ Pilato que mbia tarõ ji mo mbusẽ mbei quia pascua mose ra. Co mii ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra. ¹⁶ Barrabás, i que etarõ ji mo je ra. Mbia chiicua tuchi que ae ra. ¹⁷ Mbia ñumunua ja mose que Pilato ñee ee ra. —¿Aba ra ambusẽ mondo jẽje re? ¿Barrabás ra re? ¿Jesús ra re? i que Pilato ñee ee ra. ¹⁸ —Sacerdote rerecua riqui paama i chooñote Jesús je ã, i quiatu que Pilato ndua ndua uchiangui re ra. ¹⁹ Pilato que chĩ ngoi ndua ndua ngũenda tose ra. Eninisi que ucheẽ mondo ñee ee ra. —Ehũ chõ Jesús si jẽ. Mbae icuã ngue esaã eãte resẽ. Atea que seque re isa ra jẽ. Seque re icuã tuchi que aa ra jẽ, i que Pilato ninisi ñee ngu je ra. ²⁰ Sacerdote rerecua que ñee mbia ja je ra. Amei ndese. —Sã Pilato Barrabás mbusẽ mondo. Sã Jesús quiatu iquia, i que ererecua ñee ja mbia je ra. Nyebe mbia “eno” i chee ee. ²¹ Pilato que ñee si mbia je ra. —¿Aba ra ambusẽ mondo jẽje re? ¿Jesús ra re? ¿Barrabás ra re? i que Pilato ra. —Barrabás embusẽ mondo i que mbia ee ra. ²² —¿Mañi ae quia ra Jesucristo je re no? i que Pilato ra. —Embucha ira rese, i ja que mbia ñee ee ra. ²³ —¿Mbae icuã esaã nde? i que Pilato ee ra. —Embucha ira rese jẽ, i be que mbia tasẽ tasẽ ee ra.

²⁴ —Mbia riqui “Jesús eiquia” i i tuchi chĩ, i que Pilato ndua ndua ra. —I mo embu seje, i que mbia je cote ra. Nyoĩ que mbia résaa cote ra. —A aico nyoĩ a. Se ra Jesús aiquiayã. Eseteãte quiatu ngue re. Jẽ nguiatu jẽingo erese, i rei que Pilato ñee mbia je ra. ²⁵ Mbia que ñee ja Pilato je ra.

—¿Eiquia jẽ! Eicuãte que eriqui ra jẽ. Dios ra paama i eã eiquia mose. Dios paama i mose, sã ure je quiatu paama i. Ureiriĩ je abe no, i jate que mbia Pilato je ra. ²⁶ Pilato que Barrabás mbusẽ mondo cote ra. Jesús cuasa quiatu que chiño nda. Pilato que Jesús iruã nua cote ra. —Jembucha iquia ira rese, i que ñee soldados je cote ra.

²⁷ Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama nda. ²⁸ Jesús irao que embui esi ra. Tiru ireĩ nguiatu ngue emingue nguiã ee cote. ²⁹ Nyu ritiméi uma ji que emii eãquĩ ndese corona nda. Ira ñetẽ mo abe que emondo éoo ra. Ngoi ja que u ngũã ndese Jesús nonde ra. Ñee icuã icuã ngue u eriĩ nda. —Judíos rerecua tuchi chõ nde re, ichõiño ngue soldados Jesús je ra. ³⁰ Ñinimbu nimbu abe que erese ra. Ira abe que euru uru eãquĩ ndese no nda. ³¹ Jesús rimba que esaã saã ee no nda. Iquia iquia que ee no nda. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

³² I rei que echoi quia ra. Mbia mo ngue esobeishĩ nda. Simón, i equia ee. Cirene jenda que ae ra. —Cruz echa rã Jesús mbucha sacuã pe, i que soldados ee ra. Nguerao que ee cote ra. ³³ Ngasẽ ngue pee cote ra. Gólgota, i que hue je ra. Eresa cuare, i chõ nguiã hue je. ³⁴ Huee que vino ñimocondo tuchi mo mondo Jesús je ra. Ubi rei que erese ra. Aquere que embei eã cote ra. ³⁵ Soldados que Jesús mbucha ira rese ra. Aquere que sita ñetẽ mbaba mbaba o je cote ra. —Aba ra Jesús irao querao ñi ja, i que nyue ra. Aque mose que embesa ji cheẽ ique cote ra. Seirao que embuchao chao nyue ra. Sita ñetẽ mbaba mbabare o je, i que embesa ji ra. ³⁶ Aquere que soldados chi ngoi Jesús raarõ cote

ra. ³⁷ Mbia que letrero mii Jesús ãquĩ nguiti ibate ra. JESUS REI JUDIOS RERECUA, i que embesa mii nda. Ûquĩ nii ño eriqui nguiã eiquia hue. ³⁸ Mbia nyeremo abe que embucha ira rese Jesús chabe ra. Jesús rereco chobei que emii ira rese ra. Mbae mbuquiachãsa tuchi que ùquĩ nda. ³⁹ Mbia que iquia iquia chõ nguia echeẽ naa naa ecuã nda. Ñee icuã icuã ee. ⁴⁰ —“Dios chuchua ra ambucoi. Tres días mose ra ambuchurumbe” ere que equia. Ndequirãcuã tuchi mose, equichi u hue si. Nde Dios rucucha mose, equichi u cruz si, i tuchi que mbia quia iquia iquia ee ecuã mose ra. ⁴¹ Sacerdote rerecua abe que iquia iquia chõ nguia ee ra. Embesasa abe no. Amei ererecua abe no. Ûquĩ ngue ñee icuã icuã ja quia erii nda. ⁴² —Mbia que embuquera quera rei nyii ra. Ae si quia quera aroneate nguia aque. Judío rerecua mose ae, sã ae ae nguichi ira si. I nda ureicu a cote, i ja que ererecua ñee icuã icuã e erii nda. ⁴³ —“Dios aicuate”, i que equia, sã Dios ae embuquichi eya mose erese. “Dios rucucha rei se” i que equia, i ja que ererecua ñee icuã icuã erii nda. ⁴⁴ Ae mbuchai chi ira rese mbae mbuquiachãsa nae, ùquĩ abe que ñee icuã icuã nyee ee ra.

Jesús mano cote

⁴⁵ Tenda nandeite re mose que itondaru ru ra. Itondaru bei que mbia ja je tres horas ra. ⁴⁶ Tenda chesece mose que Jesús ñeemombo cote ra. —Elí, Elí, ¿lam a sabactani? i que ñeemombo ra. —Dios sererecua, ¿mbaerã ereico hui sesi re? i chõ ngue ñee nguia. ⁴⁷ —Elías je eriqui “quiatuchu” i reae, i rei que echeẽ andusa mo nda. ⁴⁸ Aque mose tuchi que emo esponja monde vinagre ye ra. Ira ai rese que embia ji mondo rei Jesús chúruu cote ra. ⁴⁹ —Esecha rei. ¡Sã Elías ruãte quia erea! i que eataque ñee ee ra. ⁵⁰ Jesús que tasẽ mano mbei cote ra.

⁵¹ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. Ibi que nyere

nyere cote ra. Sita abe que nyisia sia nyibite bite rĩ nda. ⁵² Mbia tãsa mo abe que nyeequia equia ra. Dios quiato raaque mo ngue quera quera ra. ⁵³ Jesús quera si mose que ùquĩ ndaaque usẽ nyoĩ cote ra. Nyoĩ que Jerusalén cote ra. Mbia tubiriã ngue mae u erese ra. ⁵⁴ Soldados rerecua que chí mae Jesús rese ra. Soldados abe no. Ûquĩ ngue siquichete Jesús mano mose ra. Ibi chere mose. Mae mose mbae ja rese. —Dios ririĩ ño eriqui re, i jate que soldados ñee erii cote ra.

⁵⁵⁻⁵⁶ Cuña ngue chi jate mae Jesús rese isho ra. María Magdalena abe que chí huee ra. María abe no. María rei Jacobo si. José abe si. Zebedeo ririĩ si abe que chí erese huee ra. Ûquĩ ngue siqui bei quia Jesús rui ra. Echiurã ngue emii mii mbei quia ee ra. Galiléaa eico mose bei.

Mbia Jesús raaque chati cote

⁵⁷ José, i que mbaecha mo je ra. Arimatea jenda rei ae. Jesús quiato que ae ra. Tenda ireĩ mose que esi ñee Pilato je ra. ⁵⁸ —Jesús raaque emee na seje, i que oso ñee Pilato je ra. Pilato que “eno” i ee ra. ⁵⁹ José que eraaque curuchoi cote ra. Ñuma ngue tirushĩ mo je ra. ⁶⁰ Jesús raaque que eiti suruchoi sita ribicoi ji imi ye ra. José chisaã ye. Nyati rei que sita cuasu mo je cote ra. Nyoĩ que erecha cote ra. ⁶¹ María Magdalena ngue chi ngoi mae Jesús atisa rese ra. María rese.

Soldados Jesús raaque atiquia saarõ u

⁶² Isamami ngue sacerdote rerecua choi ñee Pilato je ra. Fariseos abe no. Sábado isamami ngue ra. ⁶³ Ûquĩ ngue nyoĩ ñee Pilato je Jesús rii nda. —Urendua nduachĩ nguia ñeeñoño je rese. “Tres días mose ra aquera si”, i que equia mano nonde ra. ⁶⁴ Soldados emondo rã eatiquia raarõ. Sã echi bei tres días eraarõ huee. I nda echimbaaquiatu eraaque siroã suruchoi. “Quera si que ra” ¡ichĩ nda ñee ñooño mbia je jẽ! Ûquĩ mose ra mbia mbiirĩ irĩ tuchi cote, i que ñee

Pilato je ra. ⁶⁵ Pilato que ñee ee ra. —Soldados jendao rã. Eraaque raarõ tuchi sacua, i que ee ra. ⁶⁶ Soldados que ecuruchoi Jesús atiquiaa cote ra. Eiquesa aronda que ematã tuchi cote ra. —Jësaarõ tuchi jë, i rei que soldados je cote ra.

28

Jesús raaque quera si

¹ Jesús raaque ati ji que chibe sábado mose ra. I nyaashĩ oso quia domingo mose, aque mose que cuña mo nyoĩ mae eatisa rese ra. María Magdaalena, i que emo je ra. María, i que enongue je ra. ² Aque mose tuchi que ibi nyere nyere ee ra. Angel ibatenda mo nguia tu quia eatisa mbuquiata reaẽ. Sita eatiquia que ecuruba ra. Ngoi que etose ra. ³ Enininya tuchi que chĩ ngoi ra. Ama pirirã pirirã i rã tuchi que ra. Eiraoshĩ tuchi que chĩ nda. ⁴ Soldados que titi titi i tuchi chõ mae ùquĩ ndese ra. Emundi tuchi que ra. ⁵ Angel que ñee cuña je ra. —Jësiquiche quichechĩ nguiã. Jëingo raque Jesús raaque re- quia ã. ⁶ Emoate aa resẽ. Eraaque que quera si no. Ucheẽ ndui si que quera resẽ. Jenyu rei mae eatisa rese ae. ⁷ Jëso asi rã echimbaaquiato mbi- irandu equera si rese. “Jenonde ra esi Galilea. Jemaẽ nda erese huee”, jenyẽ embiirandu. Ùquĩ ae chõ ngue u nguiã jëje, i que ángel cuña je ra. ⁸ Cuña ngue siquichete echeẽ andu ra. Eyate abe que ra. Uchã ndei que echoi quia Jesús chimbaaquiato mbiirandu ra. ⁹ Ñeenda cúa chõ ngue Jesús nyecua saluda i ee ra. Cuña ngue nyoĩ oo erese ra. Jesús i que equiaama ama nda. ¹⁰ Jesús que ñee ee ra. —Jësiquichechĩ nguiã sesi. Jëso ñee seresenda je. “Jëso rã Galilea. Hue ra jemaẽ Jesús rese”, jenyẽ oso ee, i que Jesús ñee ee cuña je ra.

Soldados ñee ñooño Jesús raaque rã

¹¹ Soldados eraaque raarõsa que nyoĩ sacerdotes rerecua mbiirandu Jesús quera rese ra. Ae rese mae

nae, ùquĩ ngue esenei ja ee ra. ¹² Sacerdotes rerecua que nyoĩ ja ñee amei ererecua je cote ra. —¿Mañi nande ra equia mbia jiranuã sacua Jesús quera rese re? i que ererecua ndua ndua hue rĩ ja ra. Nyebe mbae isiquia mee nguiã soldados je, ñee ñooño sacua mbia je. ¹³ —Jeñee ñooño mbia je jë. “Ureque mose Jesús resenda eraaque suruchoi rei sirõ”, jenyẽ chooño mbia je jë. ¹⁴ Pilato jirandu mose jendese, urecheẽ nda ee. Paama iã nda jëje chã, i que ererecua ñee ja soldados je ra. ¹⁵ Soldados que mbae isiquia isi cote ra. Ñee ñooño tuchi que mbia je cote ra. Nyebe judíos riqui nguiã ñee mbei ã cote. —Jesús chimbaaquiato que eraaque sirõ cose ra, nyebe eriqui nguiã i bei ã cote.

Jesús uchimbaaquiato mondo mbia mbiirandu

¹⁶ Jesús chimbaaquiato once que nyoĩ ja Galilea ra. Ibi ibate mo ngue echoi Jesús cheẽ nguire ra. ¹⁷ Jesús que nyecu a ee huee ra. Jesús rese mae mose que ngoi ngũã ndese ñee ee ra. —Jesús eã ño co reae, i rei que emo emo ñee uchiangui re ra. ¹⁸ Aquere que Jesús si erichã ñee ee cote ra. —Sequirãcuã tuchi chõ se re. Se rei ibi jenda rerecua ja. Ibatenda abe rerecua ja. ¹⁹ Jëso mbia mbaaquiato quiato ja seriĩ. Mbia mangue chooñoa jenda ja. Bautizar jenyẽ ee Paba rĩ. Serĩ abe. Espíritu Turã ni abe no. ²⁰ Jembaaquiato quiato tuchi secheẽ ni. Ae asenei senei nguia jëje nae, ùquĩ jëseni senei ja ee. Secheẽ mumbayã sacua. Aico bei ra se quia jendese. Mbae ua j a chee, i que Jesús ñee ee ra. Amén.

EL SANTO EVANGELIO SEGÚN SAN MARCOS

Juan el Bautista Dios cheë senei senei

¹ Á tasenei na jêje. Dios cheë turã Jesucristo riñ. Jesucristo rei Dios ririñ.

² Sã Isaiás Dios cheë mbesa cose no: Secheë nderaosa amondo quia nderëta aque.

Ae ra ñeenda mbuquiche nembraerã, i que Dios ra.

³ Emo ndiqui ñeemombo mombo turúquiaa hue.

“Sã emo ndiqui ñeenda mbuquiche no, eñ jenye si chõ nguia jẽ abe ico quiatu nandererecua raarõ arõ”, i equia turúquiaa hue,

i que Isaiás embesa ra. ⁴ Juan el Bautista que tu ñquĩ ñee nguire cote ra. Dios cheë ngue esenei senei nguia turúquiaa cote ra. —Jendua si Dios rese. Jẽhui chõ jẽicua si. Dios jẽicua mbutiã sacua. Ñquĩ mose nda bautizar ae jêje chã, i beite que Juan nguia ñee nda. ⁵ Jerusalén jenda que ngaë ngaë tuchi quia echeë andu ra. Judea jenda abe no. Mbia huicua nenei nenei mose Dios je, ñquĩ mose que Juan ndiqui bautizar i ee ra. Ama Jordán ye. ⁶ Quiicua mbuaera chõ ngue Juan irao ra. Camello. Mbae ire chõ ngue enumbicua no nda. Tucu mbuae chõ ngue eu eu quia ra. Irao quiaa rinda abe. ⁷⁻⁸ Dios cheë ngue esenei senei nguia ra: —I achõ je chõ aico nguiã bautizar i mbia je co. Co chi emo ndu quia serui co. Dios ririñ tuchi chõ ae re. Ae quia equirãcuã tuchi sesi re. Ae quia eturã tuchi sesi no nde. Ae quia tura bautizar i mbia je Espíritu Turã je. Mbia chiã mbitirõ sacua, i beite que Juan nguia ra.

Juan bautizar i Jesús je

⁹ Aque mose que Jesús ru sucha tubiriã Nazaret si ra. Galilea jenda rei Nazaret. Juan ngue bautizar i Jesús je ra. Ama Jordán ye. ¹⁰ Jesús que usë

oso ama si cote ra. Ibei que nyeequia ee cote ra. Espíritu Turã ngue nguichi u erese cote ra. Nyurushi rã ngue eru nguichi erese ra. ¹¹ Ibei jenda que ñee ee ra. —Seriirĩ ño nde re. Sechesequa chõ nde re. Seyate nderese, i que Dios ñee ee ra.

Jesús tambñi cuã, i raque Satanás

¹² Espíritu Turã ngue Jesús querao turúquiaa cote ra. ¹³ Huee que Jesús riqui arete ra. Cuarenta días. Nyacua risha ite re. Mbia rñchare ja ite re. Satanás que tu rei tã i ee cote ra. Angeles que ngaë ngaë nguia ereaquiatu ra.

Jesús mbia mbaaquiatu quiatu ramo

¹⁴ Mbia rerecua que Juan tarõ cárcel cote ra. Aquere que Jesús si Galiléaa ra. Dios cheë turã ngue esenei senei nguia huee ra. ¹⁵ — Achite Dios ñi tu mbia rerecuarã a. Jendua si Dios rese. Jẽhui chõ jẽicua si. Dios cheë turã jẽicua. I nda Dios jemingo bei, i que Jesús quia ñee mbia je ra.

Jẽingo serui, i Jesús uchimbaaquiatu ra je

¹⁶ Jesús que ngata oso quia ama nimia ndui ra. Galilea, i que aque ama ndisha je ra. Huee que mae Simón ndese ra. Enongue abe rese mae. Andrés, i equia ee. I que u sira mbua mbuasa mondo mondo ii ra. Sira resenda bei rei ñquĩ. ¹⁷ Jesús que ñee ee ra. —Serui bei chõ jẽingo jẽ. Taembaaquiatu quiatu. Mbia teendu endu bei quia seje cote, i que ee ra. ¹⁸ Nyoï ja que erui ra. Sira mbuasa si que echoï huï ra. ¹⁹ Pe jiri que mae Jacobo rese ra. Enongue rese abe. Juan, i equia ee. Zebedeo ririñ ja rei ñquĩ. Huee que echï ja canoa ye sira mbuasa mbitirõ tirõ nda. ²⁰ —Jẽingo serui, i que Jesús ñee ee ra. Echeë nduibe tuchi que echoï erui ra. Ngu que esecha choï ra. Eru que siquichõ canoa ye ngũimba rese ra.

Jesús aba checuayã icuã jea mbia mo si

²¹ Nyoï que sucha tubiriã Capernaum nda. Sábado mose que Jesús

si judíos chumunua nuásaa ra. Mbia mbaaquiatsu quiatu sacuã. ²² Mbia rerecua rã ño ngue eriqui mbia mbaaquiatsu quiatu ra. Embesasa rã eã. Nyebe mbia riqui nguiã nyuruira tuchi echeẽ andu. ²³ Huee que amei mo ndiqui mbia chumunuásaa ra. Aba checuayã icuã nyireco rei ae. Ñee asite que Jesús je ra. ²⁴ —¿Mbaerã erechu urerea co re, Jesús? Quiatúae urerecha ae. ¿Urericharã ño erechu quia co re? Dios rucucha chõ nde re. Areicuate se, i rei que aba checuayã ñee asite ee ra. ²⁵ Jesús que ñee asi ee cote ra. —¡Equiriri chõ jẽ! Esẽ oso amei ñiangui si, i que ee ra. ²⁶ Jesús cheẽ mose que aba checuayã amei mburirite cote ra. Tasẽ ngue oso usẽ amei si cote ra. ²⁷ Mbia que nyuruira tuchi mae Jesús rese ra. Ñee ñee ja que nyue cote ra. —Jesús riquichĩ mbia mbaaquiatsu quiatu ucheẽ namonda je co. Equiracuã ae ñee nguiã. Mbia rerecua rã ño eriqui nguiã ñee aba checuayã icuã je co. Sã aba checuayã echeẽ mumbayãte jẽ, i que mbia ra. ²⁸ Mbia que jirandu jei Jesús rese Galilea jenda ja cote ra.

Jesús Simón ninisi si mbucherõ

²⁹ Jesús que usẽ nyoĩ mbia chumunuasa si cote ra. Nyoĩ que Simón nyuchua ra. Andrés abe que siqui rei huee tuchia ra. Jesús que ique nyoĩ huee ra. Jacobo rese. Juan ndese abe no. ³⁰ I que Pedro chari rasi u nyaara ee ra. Eracu tuchi que ra. ³¹ Jesús que eo isi embuchuruã nda. Aque mosebe que eracu ti i esi cote ra. Mbae que echao chao quia mbia chiurã cote ra.

Jesús mbia rasi chumumbara mbucherõ

³² Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco quia nae, ñquĩ abe que ecurucuaẽ cuaẽ tuchi quia ee ra. ³³ Sucha tubiriã jenda ja que chi ñmunua eiquésaa ra. ³⁴ Mbia rasi chumumbara que embucherõ cherõ ja ra. Aba checuayã icuã tubiriã ngue ejea jea quia mbia

si ra. Aba checuayã ngue Jesús icuate rei ra. Nyebe Jesús riqui nguiã echeẽ ndiquisã quisãte.

Jesús mbia Galilea jenda mbuchesea sea

³⁵ I nyaashĩ oso quia, aque mose que Jesús juã oso mbia tiásaa ra. Ñee sacuã Dios je itondaru bei mose. ³⁶ Simón ngue oso erui emuña nda. Nguesenda rese. ³⁷ Ngasẽ ngue ee ra. —Pe mbia chi nderequia jate pe, i que ee ra. ³⁸ Jesús que ñee ee ra. —Nyao sucha tubiriã mbuchesea sea achi jenda. Dios cheẽ nda asenei senei ee chã. Nyebe achu nguiã, i que ee ra. ³⁹ Galilea jenda que embuchesea sea ja cote ra. Dios cheẽ nenei nenei judíos chumunua nuásaa. Aba checuayã abe jea jea mbia si.

Jesús mbia leproso mbucherõ

⁴⁰ Emo ndasi que ngasẽ Jesús je ra. Leproso, i que ñquĩ erasi je ra. Tu que ngoi nguiã ndese ñee Jesús je ra. —Nde sembucherõse mose, sembucherõ se, i tuchi que ñee ee ra. ⁴¹ Jesús ia eã tuchi que erese ra. Ñomee ngue oco erese cote ra. —Eno. Tarembucherõ, i que ee ra. ⁴² Echeẽ nduibe tuchi que nyerõ cote ra. ⁴³⁻⁴⁴ Jesús que ñee ee ra. —Sã jẽ. Erecheẽchĩ nda emo je jẽ. Eso nderasiã ndeacuquia sacerdote je cote. Moisés cheẽ ndui si chõ mbae mo emondo Dios je. Eĩ nda mbia jirandu nderasiã ndese cote, i rei que Jesús ñee emondo ra. ⁴⁵ Mbia que embiirandu ja tuchi chõ oso ra. Nyebe Jesús nyecua aroneate nguiã sucha tubiriã mo. Siquiibi ibi chõ ngue eriqui cote ra. Icuenda ja que ngaẽ ngaẽ nguia erea ra.

2

Jesús emi sayã mo mbucherõ

¹ Emo mose jiri que Jesús nyebi Capernaum nda. Echuchua ereco mose que mbia jirandu erese ra. ² Mbia tubiriã ngue ñmunua ee ra. Mbia chayã tuchi que ra. Eĩ quesa abe itãyã tuchi que ra. Dios cheẽ ngue

esenei senei tuchi quia ee ra. ³ Mbia cuatro que erasi mo curucuaẽ ee ra. Emi sayã. ⁴ Mbia tubiriã ngue tuchia mbiitãyãte eriquisã nda. Nyebe erasi ruruchoi nguiã sui tei quite arõ. Tei que endoro cote ra. Erasi que embuquichi imbu quisa ye Jesús je cote ra. ⁵ —Erurucuaẽsa riqui seicuate ùquĩ, i que Jesús ñee uchiangui re ra. Nyebe ñee nguiã emi sayã je. —Echo, ndechisaã mbae icuã ambutiã nguia ndesi a, i que ee ra. ⁶ Embesasa mo abe que chi echeẽ andu ra. Mae icuã icuãte que equia Jesús res e ra. ⁷ —¿Mbaerã Jesús riqui ñee ùquĩ nde? Ñee icuã icuã ñochĩ equia Dios rĩ co. Dios ibatenda ae mbi a chiao icuã mbutiã tiã nguia esi resẽ, i rei que ñee icuã icuã Jesús rĩ nda. ⁸ Jesús que ùquĩ ndua ndua icuate quia ra. Nyebe ñee nguiã ee cote. —¿Mbaerã jẽingo ndua ndua icuã nde? ⁹ ¿Ma mbaranguiatuã eã jiri jẽje re? ¿Mbia icuã mbutiã esi ere? Mbia rasi mbucherõ ere no ae. ¿Ma mbaranquiãtuã eã jiri jẽje re? ¹⁰ Dios rucucha rei se. Mbia chiao icuã mbutiã aquiãtu chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. ¹¹ —Ehuã na. Ndechuchua eso cote. Ndequisa abe erao, i que Jesús emi sayã je ra. ¹² Emi sayã ngue juã asi Jesús cheẽ nduibe cote ra. Ngua que esirõ asite serao cote ra. Mbia resa rae ja. —Ã ndese que ureico mae eã tuchi emo mose ra, i tuchi que mbia u mae nyuruira erese ra. Mbia que ñee turã jate Dios quirãcuã nã cote ra.

Serui bei eico, i Jesús Leví je

¹³ Jesús que oso si ama ndisha rimíaa nda. Mbia que ngaẽ ngaẽ jate erea ra. Jesús que embaaquiãtu quiãtu ra. ¹⁴ I que Jesús oso quia ra. Mae ngue Leví rese ra. Alfeo riirĩ ngue Leví ra. Ngoi que huĩ plata isi isi impuestorã nda. —Serui bei eico, i que Jesús ñee ee ra. Ae Leví juã oso nguiã eruĩ.

¹⁵ Jesús que nyoĩ quiãtu erese ra. Impuestos isi isiquia ata que chi quiãtu erese huee ra.

Echimbãaquiãtu abe rese. Mbia icuã mo abe que chi quiãtu erese no nda. Ùquĩ tubiriãte que siqui eruĩ ra. ¹⁶ Fariseos que ñee icuãte Jesús chimbãaquiãtu je ra. Embesasa abe que ñee icuãte ee ra. —¿Mbaerã Jesús riqui quiãtu mbia icuãte rese re? i que ñee nda. ¹⁷ Nyebe Jesús ñee nguiã ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. “Jenyu seje” ae eã ngue u nguiã mbia turã je. Mbia icuã je chõ ngue achu nguiã “jenyu seje” i, i que Jesús ra.

Jesús chimbãaquiãtu hui ãte uchũu si

¹⁸ Juan ñimbãaquiãtu que hui uchũu si aque mose ra. Fariseos chimbãaquiãtu abe no. Nyebe mbia ngaẽ nguiã ñee Jesús je. —¿Mbaerã ndechimbãaquiãtu abe riqui hui ãte uchũu si re? i que ñee Jesús je ra. ¹⁹ Jesús que ñee ee ra. —Sã emo ndiqui ngũinisirã isi ramo no. Sã eresenda iate riqui quiãtu erese no. Sã eriqui hui aroneate uchũu si aque mose no. ²⁰ Sã eru riqui mano emo mose no. Aque mose ramo nguãtu ra equiato hui uchũu si cote. ²¹ Sã emo ndiqui tiru yasu mĩ aroneate tiru ima sorei rese no. Eyasu ra nyaacua quiãtu eima si. Soro icoi tuchi chõ nda cote. ²² Sã emo mbaeri rasi ramo nderecoquiãtu eã eriru ima ye no. Mbae ire ima ye ererecoquiãtu aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiãcuãte ra cote. Mbaeri yasu quia nda equerecoquiãtu nguiã mbae ire yasu ye. Soroã sacua, i que Jesús ñee ee ra.

Jesús chimbãaquiãtu mbae a ishão shão sãbado mose

²³ Sãbado mose que Jesús si quia mbiãco ite ite rĩ emo mose ra. Echimbãaquiãtu que quiãtu a nyiqui nyiqui choi quia eruĩ ra. ²⁴ Fariseos mo ngue ñee ee ra. —¿Mbaerã ndechimbãaquiãtu riqui mbae ishão shão sãbado mose re? Co mose chõ mbia riqui uquenea ucua resẽ, i que fariseos ñee Jesús je ra. ²⁵ Jesús que

ñee ee ra. —¿Embesa ji rese jemae eã David rĩ nyii re? David riãcuãte que aque mose ra. Eresenda abe riãcuãte que eriqui aque mose no nda. ²⁶ David que ique Dios chuchua aque mose ra. Abiatar que sacerdote rere cua aque mose ra. Mbichae Dios chuchua jenda que David u ra. Mee mee ngue nguesenda abe je ra. Eriãcuãte quiatu ngue re. Sacerdote mbaerã ja chõ ndaque mbichae, i que Jesús fariseos je ra. ²⁷ —Sábado que Dios chao mbia mbaerã nda. Sábado mbaerã eã ño Dios mbia ao nguiã. ²⁸ Sábado rerecua bei chõ se re, i que Jesús ñee fariseos je ra.

3

Jesús emo o tomei mo mbucherõ

¹ Jesús que oso mbia chumunuásaa cote ra. Huee que eo tomei mo ndiqui ee ra. ² Mbia que mae nguiatute quia Jesús rese ra. —Ma Jesús eo tomei mbucherõ. Sábado mose raque co. Sã embucherõ. Nandecheẽ icuã icuã nda ee chã, i que eu mae nguiatute Jesús rese ra. ³ Jesús que ñee eo tomei je cote ra. —Ehuã na u aa mbia ite re, i que ee ra. ⁴ Jesús que ñee mbia je ra. —¿Mbae eturãte jẽje co tenda sábado mose re? ¿Coche nandeico mbae turã naa naa sábado mose re? ¿Coche nandeico mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. Mbia que ñee ãte echeẽ mose ra. ⁵ Jesús que paama i mae mbia rese ra. Eya eãte que eriqui mbia chiã ãtã ndese ra. Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ⁶ Nyebe fariseos paama i nguiã Jesús je. Mbia mbucherõ mose sábado mose. Ndua ndua ja que Jesús i quia nonde ra. —Jesús nandeiquia rei, i tuchi que equia Herodes resenda ja je ra.

Mbia tubiriã nyoĩ Jesús rui

⁷ Jesús que oso ama ndisha quiti ra. Uchimbaaquiatu rese. Mbia

tubiriã Galilea jenda que nyoĩ quia eruĩ ra. ⁸ Mbia que jirandu ja tuchi Jesús chisaã turã ndese ra. Nyebe eriqui nguiã ngaẽ ngaẽ erea. Judea jenda. Jerusalén jenda. Idumea jenda. Ama Jordán ndobeinda abe. Tiro rurubinda abe no. Sidón ndurubinda abe no. Ûquiã ja que ngaẽ ngaẽ nguia erea ra. ⁹ Nyebe Jesús ñee nguiã uchimbaaquiatu je. —Canoa mo jendu rã ñno mbuquiche co rĩ, i que ee ra. Mbia quiatu ngue emumbite nguiã. ¹⁰ Mbia que embucherõ cherõ tuchi quia nyii ra. Nyebe erasi ataque riqui nguiã “taoco erese” i raque. Nyebe eriqui nguiã ñimaña maña tuchi. “Nandeoco Jesús rese” i. ¹¹ Aba checuayã icuã mae mose Jesús rese que ngoĩ ngoĩ quia ngũã ndese ñee ee ra. —Dios riirĩ ndei nde, i que equia ñeemombo mombo ee ra. ¹² Jesús que ñee asite ee ra. —“Co rei Dios riirĩ co” jenyechĩ nda jẽ, i que ee ra.

Jesús mbia doce irabo uchimbaaquiaturã

¹³ Jesús que nyui oso sita ibate mo ndese ra. “Jenyu” i que uchiirabobi je ra. Nyoĩ que erea ra. ¹⁴ Ûquiã doce que eirabo nguesendacuã nda. Embuchao chao sacuã mondo Dios cheẽ nenei nenei. ¹⁵ Uquirãcuã ngue emondo ee ra. Aba checuayã jea jea sacuã mbia si. Mbia rasi chumumbara mbucherõ cherõ sacuã. ¹⁶ Ña ndei mbia echiirabo ã:

Simón (Pedro, i abe que ee ra.)

¹⁷ Jacobo (Zebedeo riirĩ ndei Jacobo.)

Juan (Jacobó nongue rei Juan Boanerges, i que ùquiã ja je ra. “Ama sieu je riirĩ” i chõ nguiã ee.)

¹⁸ Andrés

Felipe

Bartolomé

Mateo

Tomás

Jacobo (Jacobó rei Alfeo riirĩ.)

Tadeo

Simón el Cananista

¹⁹ Judas Iscariote (Aque que Jesús mondo mbia icuã je ra.)

Ûquiã ja que Jesús irabo ra.

Aba checuayã quirãcuã Jesús quereco co, i raque mbia

Nyoi que ique tuchúaa cote ra. Uchimbaaquiату rese. ²⁰ Mbia que ngaë ngaë tuchi quia erea no nda. Equiaru mose rocoï. Echimbaaquiату abe quiaru mose rocoï. ²¹ Jesús nongue jirandu mose que echoi erea ra. Equiachã eriqui reï nguiã ee. Nyebe eriqui rei nguiã “nanderao” i raque. ²² Embesasa ngaë nguia Jerusalén si nae, ùquĩ ngue ñee ñee mbia je ra. Mbia mbuqueta queta Jesús rñ. —Satanás quirãcuã je chõ Jesús riqui nguiã aba checuayã icuã jea jea mbia si co, i rei que ñee icuã Jesús je ra. ²³ —Jenyu rã tacheë jêje, i que Jesús ee ra. —¿Mañi nda Satanás aba checuayã icuã jea mbia si re? Erimba chõ nyeresë. ²⁴ Gobierno icuã icuã mose nyue, ua rae. ²⁵ Tuchuamo jenda icuã icuã mose nyue, ua ra eno. ²⁶ Satanás icuã icuã mose nyue, equirãcuã nda ua no. ²⁷ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõt e quia esi co. Dios Satanás quirãcuã mbutiã ja arõte quia co.

²⁸ Tacheë nyecua jêje. Emo siqui icuã mose, Dios eicuã mbutiã arõte esi. Emo ñee icuã mose, Dios echeë icuã mbutiã arõte no. ²⁹ Emo ñee icuã mose Espíritu Turã nñ, ùquĩ icuã nguiatu ra Dios mbutiã eã mbei esi, i que Jesús ee ra. ³⁰ —Jesús chiangui re aba checuayã icuã ndiqui co, i quiatu ngue mbia nguiã. Nyebe Jesús ñee nguiã ùquĩ.

Jesús nongue ngaë erea usi rese

³¹ Jesús nongue que ngaë ndei erea ra. Usi rese. Chichõ ja chõ ngue itaicuee ra. —“Quiatuchu” ere Jesús je, i que emo mondo ra. ³² Mbia que chi jate ngoi Jesús jii ra. ùquĩ ngue ñee ee ra. —Hue ndesi riqui nderequia itaicuee hue. Ndenongue rese, i que ee ra. ³³ —¿Aba je chõ aico “taï” i chã? ¿Aba je chõ aico “senongue” i no

ña? i que Jesús mbia je ra. ³⁴ Jesús que mae ucheë andusa rese ra. — ã je chõ aico nguiã “taï” i. ã je chõ aico nguiã “senongue” i no. ³⁵ Ae Dios cheë mumbayã nguia nae, ùquĩ je chõ aico nguiã “senongue” i. ùquĩ je chõ aico nguiã “taï” i no, i que Jesús ñee ee ra.

4

Emo mbae eï mombiquia mbiquia

¹ Jesús que mbia mbaaquiату quiatu si ama nimia ndese ra. Mbia que ñumunua tuchi u erese huee ra. Nyebe Jesús si nguiã ua canoa mo ye. Ngoi que huĩ huee mbia mbaaquiату quiatu ra. Mbia que chi jate ama nimia ndese ra. ² Jesús que mbia mbaaquiату quiatu tuchi quia ra. Ejemplos que esaã saã tuchi ee ra. ³ —Jenyisaquia rã serese. Sã emo si rei mbae eï mombiquia mbiquia no. ⁴ Sã emo ndiqui uqui uqui ñeenda rui no. Sã nguireï ndiqui ngaë eu no. ⁵ Sã emo emo ndiqui uqui sita arõ no. Sita aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiã. ⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi cuaë eriquisã nda. Nyebe ia eã ño nguiã. ⁸ Sã emo ndiqui uqui uqui ibi turã no. ùquĩ nguiatu que suri turã nda. I a turã ngue ra. Sã emo ia treinta no. Sã emo ia sesenta no. Sã emo ia cien no. ⁹ Jëisa mose, secheë jeñandu turã na, i que Jesús ra.

Jesús ucheë mbiasa uchimbaaquiату je mbae eï nñ

¹⁰ Mbia ataque nyoi mose que Jesús ji jenda ñee ee ra. Echimbaaquiату doce rese. —Ndecheë embiasa tuchi rã ure je mbae eï nñ, i que ñee Jesús je ra. ¹¹ Jesús que ñee ee ra. —Mbia rerecua tuchi quiarei Ibatenda. Ae chõ asenei senei nguiã jêje ã. Secheë ambiasa asa bei tuchi quia jêje co. Mbia ataque quia siqui sereã erese co. Mbia ataque je aico ejemplos achõ naa naa mbei co. ¹² Eanduchõ sacuã

eicua turã nonde rocoĩ. Sã eriqui uba eãte Dios icha rui no. Dios eicua mbutiã eã sacua esi, i que Jesús ñee nda. ¹³ Jesús que ñee ee ra. —¿Secheẽ jẽicuayãte mbae eĩ ñi ñee mose jẽje re? ¿Mañi jenyẽ quiatu ra ejemplos ataque icua re no? ¹⁴ Ae mbae eĩ mombiquia mbiquia nae, Dios cheẽ nenei neneisa rã ño aque re. ¹⁵ Ae uqui uqui ñeenda rui nae, mbia Dios cheẽ andu chooñosa rã ño ũqui nde. Ae Dios cheẽ andu chooñote quia nae, ũqui ñiangui si chõ Satanás ndiqui nguiã Dios cheẽ ndirõ. ¹⁶ Ae uqui uqui sita arõ nae, mbia mo na ño ũqui no nde. Dios cheẽ andu mose, isi turã ndaque. Eyate raque erese nyii. ¹⁷ Mbia icua icua mose ee Dios cheẽ ñi, hui jei chõ nguiã esi. Mbae rao eã naanguia chõ ũqui nde. ¹⁸ Ae uqui uqui nyu réndaa nae, mbia mo na ño ũqui no nde. Dios cheẽ andu turã ndaque. Siqui bei eã ño nguiã erui. ¹⁹ Umbaerã achõ ndese chõ eriquichĩ nguiã ndua. “Mbaecha tuchite ra se”, i bei chõ nguiã ndua ndua. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbeite ee. ²⁰ Ae uqui uqui ibi túraã nae, mbia mo na ño ũqui no nde. ũqui nguiatu Dios cheẽ ñandu turã nguiã. Nyebe eriqui nguiã siqui beite erese. I a ia bei raanguia cote. Emo emo ia treinta. Emo emo ia sesenta no. Emo emo ia cien no, i que Jesús ra.

Tata rendi mbia resae ja

²¹ Jesús que ñeembe ee ra. —Sã nandeico lamparina ati eã no. Sã nandeico emi eã mbaequi re no. Erendi checua chõ nda nandemi. Mbia resae ja sacua. ²² Mbae checuayã nda nyecua ja emo mose. Mbia chiangui renda checuayã nda nyecua emo mose no. ²³ Jẽisa mose secheẽ jeñandu turã na. ²⁴ Secheẽ nda jeñandu chooñocheẽ jẽ. Jẽ secheẽ mumbayã mose, taembaaquiatu i i tuchi. ²⁵ Emo umbae rerequia mose, Dios ra embaerã mo mondobe ee. Emo embae eã mose, Dios ra embae sirõ ja esi.

Dios rimba ñimbeta chõ nguiã mbae eĩ na

²⁶ Dios rimba ñimbeta chõ nguiã mbae eĩ na. Sã emo mbae eĩ tiquia tiquia no. ²⁷ Suri ra itõ mocoinde cote. Eruri cuasu tuchi ra cote. Echa embusuriã ndaque. ²⁸ Dios ae chõ embusuri nguiã. Eracói rane. Ia chee. Ea ñetẽ nane. Ea cuasute cote. Ea ireĩ cote. ²⁹ Ea ireĩ tuchi mose ra eishao shao cote.

Mbae eĩ na ño Dios rimba re

³⁰ Mbae rã ño Dios rimba chã. Ejemplo mo tasenei jẽje. ³¹ Mbae eĩ na ño Dios rimba re. Sã mbia mo mostaza eĩ tiquia no. Eñetẽ tuchi raque mbae eĩ mo si. ³² Suri oso quia cote. Ecuasu tuchi chee. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. ũqui mi ndaque nyii. Ñimbeta tuchi cote. Mbae eĩ na, i que Jesús ñee mbia mbaaquiatu ra.

Jesús ejemplos senei senei tuchi mbia je

³³ Eĩ ño ngue Jesús quia mbia tubiriã mbaaquiatu quiatu ejemplos je ra. Mbia quenea tuchi chee que ra. ³⁴ Ejemplos achõ ngue esenei senei mbia mbaaquiatu sacua nda. Uchimbaaquiatu je quiatu que embiasa turã turã nda.

Jesús quiririã icua icua mbutiba; ama ndebera abe

³⁵ Itondaru ramo mose que ñee uchimbaaquiatu je ra. —Nyao ama ndisha robei, i que ee ra. ³⁶ Ae canoa ye Jesús ñi mbia mbaaquiatu quiatu nae, aque ye sí que echimbaaquiatu Jesús rerao ra. Mbia tubiriã ndecha. Canoa mo abe que nyoĩ quia erese ra. ³⁷ Ama ndiite re mose que quiririã icua icua ndu ee ra. I rebera que ique ique tuchi quia canoa ye ra. Nyebe canoa ndiqui nguiã ñimi serĩ tuchi ee. ³⁸ Jesús que uque rei oso quia canoa ndiita qiti ra. Uãqui ndua arõ ngue esi rei quia ra. Echimbaaquiatu que emumba ra. —Urembaaquiatusa, echumumba. Nandemanocheẽ nda re, i que Jesús

je ra. ³⁹ Jesús que nyuruã ñee asite quiririã je ra. —Ti ere cote, ama, i que ama ndebera je no nda. Quiririã ngue tiba echeẽ mose cote ra. Ama ndebera abe que tiba ra. ⁴⁰ Ñee ngue uchimbaaquiatu je cote ra. —¿Mbaerã jësiquichete riqui re? ¿Seicuayãte equia ã nde? i que Jesús ñee ee ra. ⁴¹ Siquiche bei que equia ra. Nyuruira tuchi que mae Jesús quiracuã ndese ra. —Quiririã Jesús cheẽ mumbayã ñochĩ. Ama abe echeẽ mumbayã ñochĩ no, i que ñee nyue ra.

5

Jesús aba checuayã icuã jea

¹ Ngasẽ ngue ama ndobei cote ra. Gadara, i que hue ib je ra. ² Canoa si Jesús nguichi mose que hue jenda mo tu erea ra. Aba checuayã icuã ngue siqui echiangui re ra. Mbia raaque tãsa si chõ ngue eru ngasẽ Jesús je ra. ³ Mbia raaque tãsa bei que eriqui ra. Emo ngue echucua aroneate quia ra. Cadenas je abe que emo ndiqui ecua aroneate ra. ⁴ Nyucua mocoite rei nda cadenas je raẽ. Ei nda echucua rei raẽ. Eo abe. Ucuasa nda endoso ndoso bei quia ra. Emo nda embutiba aronea tuchi quia ra. ⁵ Ngata bei nda equia itondaru ra. Nyaashĩ mose abe. Tasẽ tasẽ mbei nda equia mbia raaque tãsa ra. Sita ibátee abe no. Sita je nda eriqui ñimbasi mbasite ra. ⁶ Isho que mae Jesús rese ra. Uchã asi que eu ngoi ngũĩã ndese enonde ra. ⁷⁻⁸ Jesús que ñee ee ra. —Esẽ u aque chiã si, aba checuayã, i que Jesús ñee ee ra. Aba checuayã ngue tasẽ tuchi ñee Jesús je ra. —¿Mañi ere ra equia seje re, Jesús? Dios riirĩ ño nde re. ¡Sembasichĩ nda se jẽ! i tuchi que ee ra. ⁹ —¿Mañi ndeje re? i que Jesús ee ra. —Etubiriã, i chõ nguiã seje. Ure cuabẽte quia ñene, i que ñee Jesús je ra. ¹⁰ —Isho ra uremondochĩ, i tuchi que aba checuayã ñee Jesús je ra. ¹¹ Chiasu socoi tubiriã ngue chi quiaru huee ibi ibátee ra. ¹² Nyebe aba checuayã icuã ñee ja nguiã Jesús je. —Uremondo ja rã chiasu socoi

chiangui re, i tuchi que equia Jesús je ra. ¹³ Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chiangui re que echoi ja cote ra. Dos mil rei chiasu. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

¹⁴ Chiasu raarõsa mundite que ra. Uchã ngue echoi mbia mbiirandu randu ja ra. Sucha tubiriã jenda mbiirandu. Ishonda abe mbiirandu no. Mbia que ngaẽ ngaẽ nguia jirandu turã cote ra. ¹⁵ Ngasẽ ngue ecuaẽ Jesús je ra. Ae aba checuayã icuã nguereco uchiangui re nyii nae, aque abe que siqui huee ee ra. Huiirao resebe que eñi ngoi ra. Earacuate que ee cote ra. Nyebe mbia riqui nguiã siquichete. ¹⁶ Ae mae erese nae, ñqui ngue ñee ñee mbia je ra. Mbia mbiirandu chiasu socoi rese. Ae aba checuayã quereco quia nyii nae, aque rese abe no. ¹⁷ —Eso rã urecha urerecua si, i jate que hue jenda ñee Jesús je ra. ¹⁸ Ae aba checuayã quereco quia nyii nae, aque que ñee Jesús je ra. Jesús ua mose canoa ye. —Nderese bei chõ taso se jẽ, i rei que ñee Jesús je ra. ¹⁹ Jesús que ñee ee ra. —Tei. Quiatu rei ndechuchúaa. Quiatu ñee nderesenda je. “Dios chõ sembucherõ nguiã. Eya eã tuchite que eriqui serese ra”, ere oso nderesenda mbiirandu, i que Jesús ee ra. ²⁰ Amei ngue oso sucha mbuchesea sea cote ra. Mbia Decápolis jenda mbiirandu randu ja. —Jesús chõ sembucherõ nguiã, i ja jate que equia mbia je ra. Mbia que nyuruirate quia mae erese ra.

Jesús Jairo riirĩ mbucherõ; ari mo abe mbucherõ

²¹ Jesús que tu si iasa sobei si canoa ye ra. Mbia tubiriã ngue ngaẽ ngaẽ nguia erea ra. Ama nimíaa eriquibe mose. ²² Judíos rerecua mo ngue tu erea ra. Jairo, i que ee ra. Judíos munua nuasa que ae ra. Jesús nonde que eru ngoi ngũĩã ndese ñee ee ra. ²³ —Qui seriiirĩ si quia mano qui. Nyao rã ndeo terechono earõ. Embucherõ

sacuã, i tuchi que equia Jesús je ra. ²⁴ Jesús que oso erese cote ra. Mbia tubiriã abe que nyoï quia ñimajaã tuchi erui ra. ²⁵ Ari rasi mo abe que oso quia erui ra. Eruqui nda uchẽ mbei quia ee ra. Doce años nyee. ²⁶ Ngasi nda esaã tuchi quia ra. Erasi rea reasa nda etea tea jate rei quia raẽ. Umbae nda emondo mondo ja chee ngasi rea reasa je ra. Nyerõ jiri jiriã tuchi que ra. Erasi i i tuchi chõ ngue ra. ²⁷ Jirandu chee que Jesús rese ra. Equite quti que esi mbia joõ nda. Oco que oso eirao rese ra. ²⁸ — Eirao achõ ndese se oco mose, acherõ nda se, i nda ra. ²⁹ Aque mose tuchi que eruqui ti i ee cote ra. Ngasiã ngue eicua uchiangui re cote ra. ³⁰ — Sequirãcuã ngue mbia mo mbucherõ nda, i que Jesús uchiangui re ra. — ¿Aba oco seirao rese re? i que mae uquite quti ra. ³¹ Echimbaaquiatu que ñee ee ra. — Mbia tubiriãte nyeresẽ. Ñimajaãte nyeresẽ. ¿Mbaerã ereico “¿aba oco serese re?” i re? i que ee ra. ³² Jesús que nyuruba ruba mae nda. — ¿Aba oco serese re? i. ³³ Ari que jirandu tuchi ucherõ ndese ra. Eireite que titi titi i huï ee ra. Ngoi que ngüiã ndese Jesús resa quti ra. Mbae que esenei ja ee cote ra. ³⁴ Jesús que ñee ee ra. — Seicuate que se ra. Nyebe arembucherõ nguiã. Ndeya chõ eso cote. Nderasi ra tu si eã ndeje, i que Jesús ñee ee ra.

³⁵ Echeẽ mose chite que emo ngaẽ Jairo chuchua si ra. — Nderiirĩ ngue mano cote ra. ¿Mbaerã nda Jesús ererao ndechuchua cote re? i que ñee ee ra. ³⁶ Jesús que echeẽ ñandu ra. Ñee ngue Jairo je cote ra. — Ndeya eã techĩ nda jẽ. Seicua chõ se jẽ, i que Jesús ee ra. ³⁷ Jesús que oso eraaque rea cot e ra. Uchimbaaquiatu tres que equerao ra. Pedro. Jacobo abe. Juan abe no. Jacobo nongue que Juan nda. Ũquí mii ño ngue equerao erea ra. ³⁸ Ngasẽ ngue Jairo chuchua cote ra. Mbia que chi ja nyeseo ãquẽ ndaaque rese ee ra. Nyiibu tuchi que eu ra. ³⁹ Ique que oso ñee mbia je ra. —

¿Mbaerã jẽingo nyiibute re? ¿Mbaerã jẽingo nyeseo re? ãquẽ manoãte resẽ. Uque chõ u co resẽ, i que Jesús ñee mbia je ra. ⁴⁰ Mbia que iquia iquia chõ ee ra. Jesús que mbia mondo ja chee itaicuee ra. Eru rese que esi ique eriirĩ ndaaque rea ra. Esi abe rese. Nguesenda abe rese. ⁴¹ Eraaque o que eisi ñee ee ra. — Echuruã, ãquẽ, i que ee ra. ⁴² Echeẽ mose tuchi que ãquẽ juã ngata cote ra. Etiarõte que ra. Doce años que ra. Mbia que nyuruira tuchi mae erese ra. ⁴³ — “Jesús que co raaque mbuquera ra”, jenyechĩ nda emo je jẽ, i que Jesús mbia je ra. — Nderiirĩ embuquiaru cote, i que ee cote ra.

6

Mbia Nazaret jenda Jesús isiteã

¹ Hue si que esi nguécuaa ra. Echimbaaquiatu abe que nyoï erese ra. ² Sábado mose que mbia mbaaquiatu quiatu judíos chumunuásaa ra. Mbia que nyuruira ja tuchi u echeẽ andu ra. Ñee ñee ngue u nyue ra. — ¿Mangue eriqui ñimbaaquiatu tuchite re? ¿Mañi equia mbae icua ja tuchite re? Nandemae sayã naa naa tuchichĩ. ³ Ira mbitirõ tirõsa chõ ndaque. María riirĩ ño ndaque. Jacobo nongue chõ ndaque. José abe no. Judas abe no. Simón abe no. ã echari enongue riqui ja raque nanderese ã, i que mbia ra. Nyebe mbia Jesús cheẽ andu sereã nea nguiã. ⁴ Jesús que ñee ee ra. — Dios cheẽ mbuchecuasa ishonda cheẽ nguia ra mbia isi turã mbei. Nguécua jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee nguécua jenda je ra. ⁵ Jesús que mbia mae sayã saã saã aroneate quia huee ra. O que echono mbia rasi mii mii arõ embucherõ nda. ⁶ Hue jenda mbia que chi Jesús icua eãte ra. Nyebe Jesús nyuruira tuchi nguiã mae erese. Sucha tubiriã mbuchesea sea que equia mbia mbaaquiatu quiatu ra.

Jesús uchimbaaquiatu doce mondo ucheẽ nenei nenei sacua

⁷ “Jenyu” i que uchimbaaquiatu doce je ra. Nyeremo nemo ngue embuchao chao mondo ra. Uquirãcuã ngue emee mee ee ra. Aba checuayã icuã jea jea sacua mbia chiangui si. ⁸⁻⁹ —Mbae mo nda jendaochĩ icua. Mbae riru mo abe ra jendaochĩ. Jenyurã mo abe ra jendaochĩ no. Mbae isiquia abe ra jendaochĩ. Jẽiyao nongue mo nda jendaochĩ. Jẽirao nongue mo abe ra jendaochĩ no. Jenyitochoquia mii ño jenda. ¹⁰ Jengasẽ mose sucha tubiriã mo, aque tuchia mii ño jẽingo uque. Tuchua ra jembuchesea seate chĩ jẽingo mose huee. Ae ra jengue nyii nae, hue tuchia bei chõ jẽingo uque. ¹¹ Sucha tubiriã jenda mo jẽisi sereã nea mose, jẽhui chõ esi. Hue jenda jeñee andu sereã mose, jẽso chõ hue si. Jẽi tubi jembutomo tomo ee. Hue jenda huicuã icua sacua. Tacheẽ nyecua jẽje. Ae ra jeñee isi sereã nae, uquiã nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, uquiã nguia ra embasi tuchi Sodoma jenda si. Gomorra jenda abe si, i que Jesús ñee uchimondobi je ra. ¹² Nyoĩ nyoĩ ja que equia Dios cheẽ nenei nenei mbia je ra. —Jendua si Dios rese, i ite que equia mbia ja je ra. ¹³ Aba checuayã icuã ngue ejae jea tuchi quia mbia chiangui si ra. Mbae eĩ quira que equiti quiti quia mbia rasi rese ra. Mbucherõ ja que ra.

Mbia Juan el Bautista iquia

¹⁴ Mbia que jirandu ja Jesús rese cote ra. Herodes abe que jirandu erese ra. Ererecua que ae ra. Juan el Bautista Jesús riqui reĩ Herodes je reaẽ. —Juan ndaaque que quera si ra. Nyebe eriqui nguia mbae raã jate, i rei que Herodes ra. ¹⁵ Elías Jesús riqui reĩ emo je reaẽ. Dios cheẽ mbuchecuaa ñiinda Jesús riqui reĩ emo je re no aẽ. ¹⁶ Herodes

que jirandu Jesús rese ra. Juan el Bautista eriqui reĩ nguia ee. — Juan ño eriqui re. Ae aquĩ achisia. Quera si chõchĩ ere, i rei que Herodes ra. ¹⁷⁻¹⁸ Herodes Juan mondo quiatu quia carcel nyii reaẽ. Nyucua nda cadena je ra. Paama i nda Juan je ra. —Nde ndenongue ninisi erereco aroneate jẽ! i quiatu que Juan ñee ee nyii ra. Herodes sigui mose nõngue ninisi rese. Herodías, i que enongue ninisi je ra. Felipe, i que enongue je ra. ¹⁹ Herodías que Juan ucuayãte quia ra. —Taiquia, i rei que equia ra. ²⁰ Herodes bite rei que Juan ñee andu ra. Icuayã jiri rei que ra. —Juan turãte que ra jẽ, i que equia Juan nii nda. Nyebe eriqui nguia ireĩ ireĩte esi. Nyebe Herodías Juan iquia aroneate nguia. ²¹ —Co mose chõ jẽ, i que Herodías Herodes mbae cumpleaños mose cote ra. —Jenyu quiaru serese, i que Herodes mbia rerecua ja je ra. Ererecua Galilea jenda ja je. ²² Aque mose que Herodías riirĩ nyuruqui ruqui mbia je ra. Nyucuaaque que ae ra. Herodes ia tuchi que mae nyucuaaque nyuruqui rese ra. Ñee ngue nyucuaaque je ra. —¿Mbae ra amee ndeje re? Echeẽ ño seje. ²³ “Sebite co” nde i mose, aque tamondo ndeje. Sembae ataque tamondo ja ndeje ndebi mose. Acheẽ ñooñoa ño nguia ndeje a, i que Herodes ñee nyucuaaque je ra. ²⁴ Nyucuaaque que oso ñee usi je ra. —¿Mbae “embu seje” ae ra ee re? i que ñee usi je ra. —“Juan el Bautista aquĩ ño embu seje”, ere chõ ee, i que esi ra. ²⁵ Nyebe que esi ñee Herodes je cote ra. —Juan el Bautista aquĩ emee na seje plato ye, i que ñee ee ra. ²⁶ Herodes chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. Ñ seandu ja chõchĩ. Nyebe ra secheẽ ambuchebi eã ee, i que Herodes uchiangui re ra. ²⁷ Soldado mo ngue emondo cote ra. —Quiatu Juan iquia. Eãquĩ eru seje, i que ñee soldado je ra. ²⁸ Cárcel que

esi Juan ãquĩ sia cote ra. Eãquĩ ngue equeru plato ye nyucuaaque je cote ra. Nyucuaaque que emee usi je cote ra. ²⁹ Juan ñĩmbaaquiatsu jirandu mose que echoi eraaque rea cote ra. Ñono ngue sita ndoro ji ye ra.

Jesús mbichae tubiriã saã mbichae mii je

³⁰ Ae Jesús mondo quia uchĩmbaaquiatsu ãquĩ ngue ngaẽ si ee cote ra. Uchĩsaã ngue esenei senei cuaẽ ee ra. —Eĩ ure que mbia mbaaquiatsu quiatsu ra, i que ecuaẽ Jesús mbiirandu ra. ³¹ Mbĩa tubiriãte que ngaẽ ngaẽ nguia ñĩndecua ndecua erea ra. Equiaru mose rocoĩ abe. Nyebe ñee nguia uchĩmbaaquiatsu je. —Nyao rã mbĩa eãsaã, jenguenea ucua mbirĩ, i que ra. ³² Ae ae que nyoĩ canoa ye mbĩa eãsaã ra. ³³ Mbĩa tubiriã tuchi ngue mae ñochĩ nguia echoi rese. Jesús icua chõ ngue ra. Mbĩa que nyoĩ uchã ibi rĩ nda. Sucha jenda ja. Ñquĩ nane ngue nyoĩ ngasẽ Jesús raarõ ama nimia nda. ³⁴ Jesús que usẽ canoa si cote ra. Mbĩa tubiriã ndese que mae nda. Eya eã tuchite que erese ra. Oveja raarõ iriã na nguia tuchi que mbĩa chi ee ra. Mbĩa que embaaquiatsu quiatsu tuchi cote ra. ³⁵ Tenda oso mose que echĩmbaaquiatsu ñee ndei ee ra. —Tenda osote resẽ. Mbĩa chuchua mo ãte a resẽ. ³⁶ Mbĩa chiurã eã abete a resẽ. Mbĩa embui mondo uchĩurã ndequia requia sacuaã sucha achi jenda rea rea, i que ñee Jesús je ra. ³⁷ —Jeño mbae jemondo ee echĩurã, i chõ ngue Jesús ñee ee ra. —Tei. Mbae quia ra aba mondo ee. Mbĩa tubiriã tuchite quia ñene. Mbae isiquia tubiriã tuchi je quia nda aba mbae isi rei nguia ña. Mbĩa chayãte chõ eno nde, i que ñee Jesús je ra. ³⁸ —¿Manya mbichae jendeco ãquĩ nde? Jẽso mae erese no, i que Jesús ee ra. Emo ngue oso mae erese eicua ra. —Cinco mbichae riqu i co. Sira nyeremo abe, i que echĩmbaaquiatsu mo ñee ee ra. ³⁹ —Sã mbĩa ngoi ngoi ja quiata tose. Echesea sea, i que Jesús ra. ⁴⁰ Mbĩa que ngoi ngoi ja nyesea

sea cote ra. Cincuenta jaaja. Cien abe no. ⁴¹ Jesús que mbichae cinco sirõ cote ra. Sira nyeremo abe no. Ibei rese que mae gracias i Dios je ra. Mbichae que esiquio quio cote ra. Mee mee ngue uchĩmbaaquiatsu je ra. —Jemee mee mbĩa je, i que uchĩmbaaquiatsu je ra. Sira nyeremo abe que esiquio quio mbĩa ja je ra. Mbĩa ja que eu tuchi ra. Ñimbio chee que ra. ⁴³ Mbĩa chiu sique tubiriã tuchi que ra. Mbichae rire. Sira rire abe no. Doce iru que mbĩa mombisẽ esique sique je ra. ⁴⁴ Cinco mil hombres que mbĩa mbichaecua ra.

Jesús ngata i arõ

⁴⁵ Aquere que Jesús uchĩmbaaquiatsu mondo ja canoa ye ra. —Jẽ nane jẽso Betsaida sobei. Mbĩa tambui turã na mondo uchuchuaã se nyii, i que ra. ⁴⁶ Jesús que mbĩa mbui turã mondo cote ra. Ae ae que oso sita ibátee cote ra. Ñee sacuaã Dios je. ⁴⁷ Huee que ae ae riqui itondaru chee ra. Canoa yenda que chi bei ama ndiite rĩ nda. ⁴⁸ Echĩmbaaquiatsu que pare pare i canoa ibu ra. Quiririã ngue eichu ichute eruba quiti ra. Jesús que mae erese ishote ra. Nguira ñee mose que esi erichã nda. I arõ ngue esi quia ngata ra. Nyucuaño nda eña nde. ⁴⁹ Mbĩa aingue eriqui rei nguia echĩmbaaquiatsu je. Ngata mose i arõ. Nyebe tasẽ tasẽ nguia. ⁵⁰ Echĩmbaaquiatsu chiã ngue cuãacuã i tuchi mae erese ra. —Jẽsiquichechĩ nguia. Jẽya chõ ae. Se chõ nyeresẽ, i que Jesús ñee ee ra. ⁵¹ Ua que canoa ye embirõ cote ra. Quiririã ngue tiba cote ra. Echĩmbaaquiatsu que nyuruira tuchi u mae erese ra. ⁵² Jesús mbichae mbeta quia nae, ãquĩ ngue echĩmbaaquiatsu icuayãte uchĩangui re ra. —Dios riirĩ ño eriqui reaẽ, i ãte que eicuayã nda. Eãquĩ ãtãte chõ ngue ra.

Jesús mbĩa Genesaret jenda mbucherõ cherõ

⁵³ Ngasẽ nyee que sobei cote ra. Genesaret, i que hue ibi je ra. ⁵⁴ Jesús

usẽ mose canoa si que mbia eicua jei ra. ⁵⁵ Mbia que nyoĩ ja uchã tuchia mbuchesea sea ra. Erasi rurucuaẽ cuaẽ sacuaã Jesús je, erua resebe. ⁵⁶ Jesús cuatásaa que mbia riqui erasi rurucuaẽ cuaẽ ee ra. Sucha tubiriã jenda jaaja. Sucha miĩ miĩ jenda jaaja abe no. Turuquia jenda abe no. Uquĩ ja que erasi curucuaẽ cuaẽ nguia ñono Jesús jii ra. —Sã erasi oco oco ja rã ndeĩrao ai rese, i jaaja que ñee Jesús je ra. Ae oco erese nae, uquĩ ngue nyerõ ja ra.

7

Mbia chiangui renda ae chõ embicuaã nguia

¹ Aquere que fariseos mo ngaẽ ñee Jesús je ra. Embesasa mo abe, ae ngaẽ Jerusalén si. ² Jesús chimbbaaquiato mo ngue quiaru quiaru echoi quiiriã ee ra. —¿Mbaerã jẽingo quiaru jenyoi quiiriã nde? Nanderamei ñee ndui si eã ño jẽingochĩ nde, i que ñee asite ee ra. ³ Fariseos quiarei nyoĩ bei quiaru nonde. Judíos ja abe no. —Nandechoi eã mose ra nandechiã mondeite, i rei equia ã. Ngãmei ñee nguire eriqui uquĩ naa naa mbei ã. ⁴ Echoi quiiriã mose eriqui quiaruã ã. Ngaẽ mose plaza si eriqui nyoĩ nyoĩ tuchi quiaru nonde ã. Ngãmei ñee nguire chõ eriqui nguia mbae raã ja ã. Sã eriqui uyuquia irei irei no. Nio abe no. Irachaẽ abe no. Uquisa abe no. ⁵ Nyebe fariseos ñee nguia Jesús je. —¿Mbaerã ndechimbbaaquiato riqui eĩ eã nanderamei ñee nguire re? ¿Mbaerã eriqui quiaru uchoi quiiriã nde? i que fariseos ñee Jesús je ra. Embesasa abe no. ⁶ Jesús que ñee ee ra. —Isaías que embesa jeniĩ cose ra. Eĩ ngue embesa ra:

Ã mbia riqui ñee turãte raque seje ã. Uchiangui re quia eriquiãte nguia serese ã.

⁷ Ñee turãte raque equia seje ã. Amei ñee achõ ño esenei seneichĩ nguia mbia je.

Dios cheẽ miĩ nenei nenei ndocoĩ ee,

i que Isaías embesa jeniĩ nda. ⁸ Jenamei ñee achõ ño jesenei seneichĩ nguia mbia je uquĩ. Dios cheẽ nenei nenei ndocoĩ ee.

⁹ Dios cheẽ jemumba mumba chõ chĩ nguia ã. Nanderamei ñee ndese chõ jẽingochĩ oote ã. ¹⁰ Moisés cheẽ ndui turã eã ño jẽingochĩ ã. Sã Moisés ñee mbia je no: “Jeturã ño nguia jendu je jẽ. Jësi je abe no. Emo ñee icua mose ngu je, uquĩ jẽiquia chõ. Emo ñee icua mose usi abe je, uquĩ abe jẽiquia no”, sã i Moisés no. ¹¹ Jẽ nguia jẽingo nguia Moisés cheẽ abi abite ã. Sã jẽingo ñee no. “Ae nda amee nei jẽje, uquĩ ngue amondo ja Dios je ra”, i mose emo ñee ngu je, “coche ñene” jenyẽ chõchĩ nguia ee. Mbae mee eã mose ngu je. Usi abe je. Nyebe jẽingo nguia mbia mbaaquiato icua icua uquĩ. ¹² ¿Mbaerã jẽingo mbia riquisã quisãte mbae meese mose usi je re? Ngu je abe no. ¹³ Nanderamei ñee achõte jësenei seneichĩ nguia jendiirĩ je ã. Nyebe jẽingo nguia Dios cheẽ mbuquiachãte jendiirĩ si ã. Mbae icua atate jësaã saã nguia ã, i que Jesús fariseos je ra. Embesasa abe je. ¹⁴ —Jenyu secheẽ andu, i que Jesús mbia ja je ra. —Secheẽ jẽicua rã. ¹⁵ Mbia chiũ embicuaã eã nguia. Echiangui renda chõ embicuaã nguia. Echiangui renda chõ usẽ nguia echuru ri echeẽ mose. Uquĩ ño embicuaã nguia. ¹⁶ Jëisa mose, secheẽ jeñandu turã na, i que Jesús ra. ¹⁷ Jesús que mbia secha oso ique tuchúaa ra. Echimbbaaquiato que ñee ee cote ra. —Erecheẽ ngue namo, “uquĩ nda mbia mbicuaã” ere que, uquĩ embuchecua rã ndecheẽ ure je, i que ñee Jesús je ra. ¹⁸ Jesús que ñee ee ra. —¿Jẽ abe jẽicuayãte quia re? Ae mbia u quia nae, uquĩ mbia mbicuaã eã nguia. ¹⁹ Iqueã nda oso echiangui re. Erie ye chõ eriqui nguia oso. Echiique rui chõ eriqui nguia oso. Usẽ nyee, i que Jesús ñee uchimbbaaquiato je ra. —Mbia chiũ turã ja, i chõ nguia. ²⁰ —Mbia chiangui renda chõ embicuaã nguia

usẽ mose echuru rĩ. ²¹ Aba chiangui renda quia aba mundua icuã icuãte nguiã. Nyebe eriqui nguiã siqui emo ninisi rese. Emo ndu rese abe no. Siqui siqui eruã ndese abe no. Mbia abe iquia iquia. ²² Mbae abe mbuquiachã quiachã no. “Aque raã nda sembaerã ña”, i emo mbae je no. Mbae icuã ñumumbara raã naa ja. Mbia abe mbĩĩĩ rĩĩ no. Mbae icuã oseĩ oseĩ bei. “Se quiatu ae”, i mbae je. Ñee icuã icuã no. Ucuasu abe raã naa no. Mbae icuã naa ja chooño. ²³ Mbia chiangui renda icuã ja chõ ũquĩ nde. Ũquĩ ño mbia mbĩĩcuã icuã nguiã ũquĩ ao ao mose, i que Jesús ra.

Ari mo Jesús icua

²⁴ Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no. Ique que oso tuchia mo nda. —Sã mbia jiranua serese, i rei que ra. Mbia qu e jirandu chõ erese ra. ²⁵ Ari mo abe que jirandu erese ra. Eriĩĩ ngue aba checuayã nguereco uchiangui re ra. Ari que tu Jesús rea ra. Ngũĩã ndese que ngoi ejii ra. ²⁶ Sirofenisia jenda que ae ra. Judío eã tuchi que ae ra. Griego cheẽ ño ngue echeẽ nde. —Aba checuayã icuã ejea rã seriĩĩ si, i tuchi que Jesús je ra. ²⁷ Jesús que ñee ee ra. —Judíos rese rane taico mbae raã naa. Ahui aronea judíos si, mbae raã naa mbiamo je, i que Jesús ee ra. ²⁸ Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure je abe chõ mbae esaã ae. Seriĩĩ embucherõ seje ae, i que ari ñee ee ra. ²⁹ Jesús que ñee ee ra. —Erecheẽ turãte. Quiatu rei. Nderiĩĩ ngue nyerõ no, i que ee ra. ³⁰ Ari que oso uchuchúaa cote ra. I que eriĩĩ u ngua ye ee cote ra. Aba checuayã icuã usẽ ño ngui a esi reaẽ.

Jesús eisayã mbucherõ

³¹ Jesús que nyebi Tiro rurubi si ra. Sidón ngue etasamo nda. Ama ndisha Galiléaa que esi ra. Decápolis rĩ ngue esi ra. ³² Eisayã mo ngue mbia curucuaẽ ee ra. Echeẽ aquiatuãte

abe que ra. —Ndeo echono earõ embucherõ, i tuchi que mbia Jesús je ra. ³³ Jesús que eisayã nguerao pe jiri mbia recha ra. O que emingue mondo eisacua rereco chobei ra. O que embia ngüendi je ra. Mondo que echuru rĩ cote ra. ³⁴ Soboiba que ibate cote ra. Jiabute que ñee ee ra. —Esoro, eisacua, i que ee ra. ³⁵ Eisacua que soro cote ra. Echuru abe que nyerõ cote ra. Ñee ngue cote ra. ³⁶ —Emo nda jembiiranduchĩ jẽ, i rei que Jesús ñee mbia je ra. Mbia que ñimbiirandu i i tuchi ra. ³⁷ Mbia que ñee ñee nyue Jesús rĩĩ nda. —Mbae raã turã turã ja tuchichĩ equi a co. Eisayã abe isa ndoro chee no. Echeẽ ngũĩã abe mbucheẽ nyee no, i ja tuchi que mbia quia nyuruira mae erese ra.

8

Jesús mbichae tubĩĩã saã mbichae mĩĩ je

¹ Mbia que ñumunua tuchi Jesús je aque mose ra. Ñee ngue uchimbacuaquiato je ra. ² —Seya eãte aico ã mbia tubĩĩã ndese co. A echĩ arete serese tres días a. Echĩurã mo eãte mbae mo aa. ³ Eriãcuã amondo sereãte echuchúaa. Ngasẽ ãte chõ ndae. Ishote si ecuaẽ aa resẽ. Nandembuquiari chõ aa, i que Jesús ra. ⁴ Echimbacuaquiato que ñee ee ra. —Turuquia re chõ nandeco a resẽ. ¿Mañi nda aba ã mbuquiari ja re? i que ñee Jesús je ra. ⁵ —¿Manya mbichae jendeco re? i que Jesús ee ra. —Siete, i que ee ra. ⁶ Jesús que mbia mbucui ja íbii ra. Mbichae siete que eisi ja o je cote ra. Gracias i que Dios je cote ra. Mbichae qu e esiquio quio mee uchimbacuaquiato je cote ra. Ũquĩ ngue embuchao chao mbia tubĩĩã je cote ra. ⁷ Sira ñetẽ mĩĩ abe que equereco ra. Gracias i que Jesús Dios je cote ra. —Sira abe jembuchao chao mbia je, i abe que ee ra. ⁸ Mbia que eu ja ñimbio chee ra. Echĩu sique que emunua nua ja ra. Siete iru que emombisẽ nyee ra. ⁹ Mbichaecua rei mbia cuatro mil. Jesús que embui

turã mondo cote ra. ¹⁰ Canoa ye que Jesús ua uchimbaaquiatu rese cote ra. Nyoï que Dalmanútaa ra.

Mbia mae sayã eteacuquia ure je, i fariseos

¹¹ —Tã nande rã Jesús je, i que fariseos cuaẽ ñee ñee ee ra. —Mbia mae sayã esaã na ure je. † nda “Dios chimbu” ure tuchi ndeje, i rei que ñee Jesús je ra. ¹² Jesús que iabu tuchi ñee nda. —¿Mbaerã mbia riqui “mbia mae sayã esaã ure je” i tuchi re? Tacheẽ nyecua jêje. Mbia mae sayã mo nda ateacuquia eã tuchi jêje, i que Jesús ñee ee ra. ¹³ Oso que mbia recha cote ra. Iasa que echoï sobei cote ra.

Fariseos mbia mbaaquiatu icuã, i Jesús

¹⁴ Jesús chimbaaquiatu que uchiurã curuchoï eã nda. Tesarei que esi ra. Mbichae mi tuchi que equeru huee ra. ¹⁵ Jesús que ñee ee ra. —Mbichae mbuchimatãsa rã ndei fariseos cheẽ. Herodes chimbaaquiatu cheẽ abe no. Ûquï ñee ndese ra jêingochĩ jê, i que Jesús ee ra. ¹⁶ —Mbichae quiatu ngue nanderuã nguiã. Nyebe eriqui nguiã ñee nande je ùquï, i rei que echimbaaquiatu ñee nyue ra. ¹⁷ Jesús que echeẽ ñee icuate ra. Nyebe ñee nguiã ee. —¿Mbaerã jêingo “mbichae nanderuãchĩ” i re? ¿Ae rĩ aico ñee jêje nae, ùquï jêicuayã mbeite quia re? ¿Jeñia ãtã mbeite eriqui re? ¹⁸ Jêisate raque. ¿Secheẽ jeñanua mbeite quia re? Jendesate raque. ¿Sechisaã jêicuayã mbeite quia re? ¹⁹ Se mbichae cinco mbeta mose mbia cinco mil je, ¿manya iru jemombisẽ mbichae sique sique je re? i que Jesús ee ra. Doce, i que ee ra. ²⁰ —Mbichae siete mbeta mose mbia cuatro mil je, ¿manya iru jemombisẽ esique sique je re no? i que Jesús ee ra. Siete, i que ee ra. ²¹ —¿Jêingo secheẽ icuayã i ite ã nde? i que Jesús ee ra.

Jesús eresayã mo mbucherõ

²² Nyoï que Betsaida cote ra. Mbia que amei ndesayã mo ngurucuaẽ

Jesús je ra. Oco sacuaẽ erese embucherõ. ²³ Jesús que eo isi serao pe jiri sucha si cote ra. Ngüendi que equiti eresa rese ra. O que echono earõ nda. —¿Eremaete mbae rese cote re? i que ee ra. ²⁴ Eresayã ngue mae cote ra. —Mbia rese amaete cote. Ecuata rese amaete. Ira raãte mbia seje, i que eresayã nda. ²⁵ Jesús que o chonombe eresa rese ra. Mae turã ngue cote ra. Nyerõ tuchi que cote ra. ²⁶ Jesús que embui mondo uchuchúaa ra. —Eresochĩ nda sucha ite rĩ jê, i que ee ra.

Cristo chõ nde resẽ, i Pedro Jesús je

²⁷ Jesús que nyoï Cesarea de Filípoo cote ra. Huee que ñee uchimbaaquiatu je cote ra. —¿Aba aico reĩ mbia je re? i que ee ra. ²⁸ Echimbaaquiatu que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Dios cheẽ nenei neneisa mo ereico reĩ nguiã emo je no, i que echimbaaquiatu ñee Jesús je ra. ²⁹ —¿Aba aico reĩ jêje co re? i que Jesús ee ra. —Cristo chõ nde resẽ, i que Pedro ñee ee ra. ³⁰ —Jeñeechĩ nda mbia mo je ùquï jê, i que Jesús ee ra.

Mbia ra seiquia, i Jesús

³¹ Jesús que umano nonde senei senei uchimbaaquiatu je ra. —Mbae rasi ra asaã tuchi. Judíos ramei icuã icuã tuchi ra seje. Sacerdotes rerecua abe no. Embesasa abe no. Seiquia rae. Tres días mose ra aquera si, i que ñee uchimbaaquiatu je ra. ³² Jesús que ñee nyecua tuchi ee ra. Nyebe Pedro Jesús rerao nguiã suruicha. —¿Mbaerã erecheẽ ùquï nde? Mbia ra ndeiquiyã, i rei que Pedro ñee asite Jesús je ra. ³³ Jesús que uba mae uchimbaaquiatu rese ra. Ñee ngue Pedro je ra. —Ehui chõ sesi, Satanás. Mbia ndua ndua rã ño ereico nguiã ndua. Dios ndua ndua rã eã, i que ñee Pedro je ra.

³⁴ Jesús que ñee uchimbaaquiatu ja je cote ra. Mbia abe je. —Emo siquise mose serui, sã hui ja mbae ubi si. Sã cruz rui umbaerã se rã si. Sã eriqui

serui bei cote. ³⁵ Emo ndua bei mose ngueco rese, ereco ra ua esi. Emo hui mose ngueco si seje, ũqui nda siqui bei. ³⁶ Emo ngueco mumba chooño mose, eya eã mbei rae. Mbaecha rete raque. ³⁷ Emo ngueco mumba chooño mose, mbae mo eãte ereco ribishorõ sacua. ³⁸ Emo ireĩ ireĩ mose sesi mbia icua ndésaa, se abe ra aireĩ ireĩ esi. Emo ireĩ ireĩ mose secheẽ si, se abe ra aireĩ ireĩ esi, sechu mose mbia rerecuarã. Dios ra sembu si íbii uquirãcuã je aqae mose. Ibatenda rese ra achu ángeles, i que Jesús ee ra.

9

1 —Tacheẽ nyecua jêje. A jengu a nae, jemo nda jemae sechu rese. Achu ra mbia rerecuarã tuchi cote. Jemo jemano eã mose ra achu mbia rerecuarã tuchi cote, i que Jesús ee ra.

Jesús ny#cuabo uchimbaaquiatu résaa

2 Tenda seis uare que Jesús uchimbaaquiatu mo nderao sita ibátee ra. Pedro. Jacobo. Juan abe no. Ũqui ngue equerao ja mbia tiásaa ra. Jesús que ny#cuabo erésaa huee ra. Enininya tuchi que ee ra. ³ Eirao abe nininya tuchi que ra. Eiraoshĩ nininya tuchi que ee ra. ⁴ Mbua nyeremo ngue ngaẽ ibate si ra. Ñee ñee ngue ecuaẽ Jesús nininya rese ra. Moisés que ũqui nda. Elías rese. ⁵ Pedro que ñee Jesús je ra. —Sererecua, nandecurâte a. Sucha ñetẽ uresaã saã na. Enongue nembraerã. Enongue Moisés mbaerã. Enongue Elías mbaerã no, i rei que Pedro ñee Jesús je ra. ⁶ Echimbaaquiatu siquichete quiatu ngue re. Nyebe Pedro riqui nguiã “mañi nda aba re” ite. ⁷ Ibeishĩ ngue tu nguichi eite re cote ra. Moisés mbuchecuaỹã ee. Elías abe no. Echeẽ mo ngue ehandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ñee ee ibeishĩ qui re ra. ⁸ Echimbaaquiatu mae mose que Jesús mĩ ndiqui ee cote ra. Moisés que nyecuaỹã asi ee ra. Elías abe.

⁹ Ecuaẽ mose nguichi sita ibate si que Jesús ñee ee ra. —Ae rese jemae namo nae, ũqui je jenyecuachõ jẽ. Sequera si mose quiatu teñee ñee mbia je cote. Semano nonde eã, i que Jesús ñee uchimbaaquiatu je ra. ¹⁰ Nyebe ñee eã nguiã emo je. —¿Mbaerã eriqui “se quera si mose” i re? i que ndua ndua ñee nyue ra. ¹¹ Ñee ngue Jesús je cote ra. —¿Mbaerã embesasa ñee nde? “Elías rane nda tu Cristo si” i re, i que ñee Jesús je ra. ¹² Jesús que ñee ee ra. —Ae bei. Coche Elías rane tu nguiã mbae mbitirõ ja. ¿Mbae i chõ embesaja ji quia Cristo rĩ ña? “Mbae rasi ra esaã tuchi”, i chõ nguiã. “Mbua ra eucuaỹã tuchi”, i chõ nguiã no. ¹³ Elías que tu no. Mbua icua icua tuchi que ee ra. Sã embesaja ji ñee nyii no. Eĩ si tuchi que ra, i que Jesús ñee ee ra.

Jesús aba checuayã jea mbia ririĩ mo si

¹⁴ Ngasẽ ngue echoi echimbaaquiatu ataque je cote ra. Mbua tubiriã tuchi que chi echimbaaquiatu mama huee ra. I que embesasa u ñee icua icua echimbaaquiatu je huee ra. ¹⁵ Jesús ngasẽ mose que mbua nyuruira tuchi mae erese ra. Oo tuchi que erese ra. ¹⁶ —¿Mbae rĩ jẽingo ñee icua icuaẽte jenyue re? i que Jesús ñee mbua je ra. ¹⁷ Emo ngue ñee Jesús je ra. —Sererecua, seriirĩ aru quia ndeje co. Nde embucherõ sacua. Aba checuayã icua equereco uchiangui re co. Nyebe eriqui nguiã ñee eãte co. ¹⁸ Aba checuayã icua ndiqui seriirĩ isi isi beite co. Mbucõ co beite equia íbii co. Echuru abe mbichoite. Ureĩ abe qiti quitite. Nyebe equirãcuã neate riqui nguiã co. “Aba checuayã jêjea seriirĩ si”, ae rei que ndechimbaaquiatu je ra. Eaquiataẽ chõ ngue ra, i que eru ñee Jesús je ra. ¹⁹ Jesús que ñee cote ra. —¿Mañi jenyee quia seicuaỹãte re? ¿Ñimbirãcuã mbeite ra aba quia jêje re? i que Jesús ra. —Eriirĩ jendu rã seje, i que cote ra. ²⁰ Eriirĩ ngue ecurucuaẽ ee cote ra. Aba checuayã ngue eriirĩ mburirite Jesús

rese mae mose ra. Mbucoi que íbii ra. Mbuchishao shao tuchi que ra. Echuru mbichoi tuchi que ra. ²¹ —¿Manosete aba checuayã ndiqui ererequia re? i que Jesús eru je ra. —Eñetẽ mosebe bei, i que eru ra. ²² —Tátaa eriqui emondo mondo beite co. Ama ye abe. Ericharã. Nde ejea aquiatu mose, ejea rã esi ure je, i que eru ñee Jesús je ra. ²³ Jesús que ñee ee ra. —¿Mbaerã ereico “nde aquiatu mose” i seje re? Ae seicua quia nae, ùquĩ je aico mbae raã aquiatu jate co resẽ, i que Jesús ee ra. ²⁴ Eru que ñee ee ra. —Areicuate se resẽ. Semingo uquiabe jiri nderese ae, i que eru ucheẽ mumbebote ñee Jesús je ra. ²⁵ I que mbia cuaẽ nguia ñumunua nua tuchi huee ra. Nyebe Jesús ñee asi nguia aba checuayã icuã je. —Aba cheuayã, mbia isa erembũtaote quia hue. Erebuheẽ ngũiate abe equia hue. Esẽ oso esi. Erique sichĩ nda oso echiangui re jẽ, i que Jesús ee ra. ²⁶ Aba checuayã ngue tasẽte eriirĩ mburiri cote ra. Usẽ oso cote. Eraaque rã ngue eriirĩ nyi cote ra. Mano nei nguia mbia je. ²⁷ Jesús que emua eo rese ra. Juã turã ngue cote ra. ²⁸ Jesús que oso ique tuchúaa cote ra. Echimbaaquiatu que ñee ee mbia tiãmbaa cote ra. —¿Mbaerã aba checuayã useã oso urecheẽ mose ure re? i que ñee ee ra. ²⁹ Jesús que ñee ee ra. —Jeñee eã mose Dios je, ã jẽjea aroneate. Jẽhui eã mose jenyiu si, ã jẽjea aroneate no, i que Jesús ee ra.

Mbia ra seiquia, i si Jesús

³⁰ Galilea rĩ ngue echoi hue si ra. —Sã mbia jiranua nanderese, nandeso mose hue rĩ, i que Jesús ñee uchimbaaquiatu je ra. ³¹ Uchimbaaquiatu ae que embaaquiatu quiatu oso quia ñeenda rui ra. —Emo nda semee mbia icuã je seiquia sacua. Seiquia ji ra aquera si tres días mose, i que equia embaaquiatu quiatu ñeenda rui ra. ³² Echimbaaquiatu que echeẽ icuayãte quia ra. —Ndecheẽ embiasa

asa tuchi rã ure je, i ãte que equia ee ra. Ireĩ ireĩte quiatu que equia esi ra.

Ererecua tuchi ra se, i jaaja Jesús chimbaaquiatu nyue

³³ Ngasẽ ngue Capernaum nda. Tuchúaa ique mose que ñee uchimbaaquiatu je ra. —¿Mbae rĩ jenyu quia ñee icuã icuãte jenyue ñeenda rui re? i que ee ra. ³⁴ Quiriri ja chõ ngue u ñee ndocoi ee ra. —Ererecuarã nda se cote, i jaaja chõ equia nyue ñeenda rui reaẽ. Nyebe eriqui ireĩ ireĩte Jesús si re. ³⁵ Jesús que ngoi cote ra. —Jenyu ja rã. Tacheẽ jẽ ja je, i que uchimbaaquiatu doce je ra. —“Ererecuarã se” i mose emo, sã uataque rimbarã ño eriqui, i que Jesús ee ra. ³⁶ Aquẽ mo ngue emi eite re cote ra. Sui que ñee uchimbaaquiatu je ra. ³⁷ —Ae siqui turã nguia mbi a riirĩ je serĩ nae, seje abe chõ eriqui nguia siqui turã. Ae eturã ndiqui seje nae, semondosa abe je chõ eturã ndiqui nguia, i que Jesús ee ra.

Emo icuã eã mose nande je, nanderesenda chõ ùquĩ nde

³⁸ Juan ngue ñee Jesús je ra. —Pe emo nyi aba checuayã ndirõ ndirõ mbia si nderĩ pe. Uremae ngue erese ra. Aque eriqui ãte nanderese aque. Nyebe uresiquisã nguia, i que Juan Jesús je ra. ³⁹ Jesús que ñee ee ra. —Tei. ¡Jẽsiquisã quisachĩ nda jẽ! Emo mbia mae sayã naa mose serĩ, ñee icuã eã nda seje aquere. ⁴⁰ Emo icuã eã mose nande je, nanderesenda chõ ùquĩ nde. ⁴¹ Emo sechimbaaquiatu isei mbiu turã mose serĩ, Dios abe ra mbae turã mondo aque je.

Mbae icuã nda nandesã uquiachĩ emo je

⁴² Ae ra mbae icuã saã uquia seicuaa mo je nae, ùquĩ nda mbae rasi saã tuchi cote. Uquĩ nda aba mombo chõ ama ndisha ye nyii re chã. Sita resebe ecua ji mondo. I nda mbae icuã naa uquia eãte rei seicuaa je. ⁴³ Ndeo nemingo mose mbae

icua ndese, ndeo echisia mombo. Coche rei ra ereso ibate ndeo mii Nderequia, siqui bei sacua huee. Oso rocoi tata cuasuu, ndeo nyeremo nderao. Tata mungue aronea tuchi cho hue jenda re. ⁴⁴ Mbae rosei ra manoa mbei huee. Tata ra uquea mbei huee no. ⁴⁵ Ndei nemingo mose mbae icua ndese, ndei echisia mombo. Coche rei ra ereso ibate ndei mii nderequia, siqui bei sacua huee. Nemombo rocoi tata cuasuu, ndei nyeremo nderao. Tata mungue aronea tuchi cho hue jenda re. ⁴⁶ Mbae rosei ra manoa mbei huee. Tata ra uquea mbei huee no. ⁴⁷ Nderesa nemingo mose mbae icua ndese, nderesa echoo. Coche rei ra ereso Dios recua nderesa mii nderequia. Nemombo rocoi tata cuasuu, nderesa nyeremo nderao. ⁴⁸ Mbae rosei ra manoa mbei huee. Tata ra uquea mbei huee no. ⁴⁹ Tata ra mbia sei bei huee. ⁵⁰ Embiquesa ra no jingo nguia mbia je a. Sa embiquesa turate no. Eise quiachamba mose, eicua tuchi ra cote. Embiquesa ra tuchi cho jingo mbia je. Jingo turã no nguia jenyese, i que Jesús ee ra.

10

Jesús ñee mbia ngüinisi mombo je rii

¹ Jesús que ngata si oso cote ra. Judéaa que esi ra. Ama Jordán ndobei que esi sobei cote ra. Mbiam que ñumunua nua tuchi quia ee ra. Mbaaquiato quiato que equia ra. Sa eriqui mbiam mbaaquiato quiato beite no. ² Fariseos mo abe que ngaã erea ra. —Tã nande Jesús je no. Ma ñee Dios cheã abi, i que ñee nyue ra. —¿Coche mbiam ngüinisi jea ubiã mose re? i que ñee Jesús je cote ra. ³ —¿Mbae i Moisés embesa re? i que Jesús ee ra. ⁴ Fariseos que ñee ee ra. —“Jeninisi jea nonde, papel mbesa ji jemondo ee”, i que Moisés ra, i que ra. ⁵ Jesús que ñee ee ra. —Jeãquã atãte quiato ngue re. Nyebe Moisés uquiã mbesa nguiã jêje. ⁶ Uquiã i atãte que Dios quia mbiam ao ramo mose nyii ra. Dios mbiam ao mose, nyeremo ngue echao

ra. Erãcuẽ ngue echao ra. Eninisirã abe que echao no nda. ⁷ Nyebe ra emo ndiqui ngüinisi rese bei. Ngu si isho. Usi si abe no. Ngüinisi mii ndese siqui bei sacua. ⁸ Co mii na siqui sacua nyiese cote. Nyeremo siqui ra eã ño cote re. Co mii siqui ra ño uquiã cote re. ⁹ Ae Dios mbucha nyiese nae, sa uquiã hui eã mbei nyesi, i que Jesús ñee fariseos je ra.

¹⁰ Ngasẽ mose tuchuaa que echimbaaquiato ñeembe ee ra. —Ndecheẽ embiasa turã na ure je, i que ee ra. ¹¹ Jesús que ñee ee ra. —Ae ngüinisi jea nae, emo ndese siqui sacua nae, eicua tuchi cho uquiã nde. Adulterio i que uquiã je ra. ¹² Cuña mo ngu jea mose siqui sacua emo ndese, eicua tuchi cho uquiã no nde, i que Jesús ee ra.

Jesús mbiam rii isi turã turã

¹³ Mbiam que ngüiri ngurucuaã cuaã nguia Jesús je ra. Jesús oco oco sacua erese. —¿Mbaerã jendiiri jendu quia co re? i rei que echimbaaquiato ñee mbiam je ra. ¹⁴ Jesús que paama i ñee uchimbaaquiato je ra. —Jeñeechi nguiã ee. Sa ae ae riqui ngüiri ndurucuaã cuaã seje. Eã ño Dios rimba nguiã. Ucuasu raã naa eã. Mbiam rii na. ¹⁵ Mbiam rii na ño jingo Dios isi turã. I mose ra Dios rimba tuchi jê cote, i que Jesús ra. ¹⁶ Mbiam rii ngue esui sui ra. O que echono ñono earõ nda. Ñee turã ngue Dios je erii nda.

Acuanindu mbaecha mo ñee Jesús je

¹⁷ Acuanindu mo ngue tu Jesús je ra. —Mbiam mbaaquiatusa turate nde. ¿Mbae turã mo nda asaã Dios je semingo bei sacua nde? i que ñee Jesús je ra. ¹⁸ Jesús que ñee ee ra. —¿Mbaerã ereico “eturã” i seje re? Dios mii ño eturã ndesẽ. ¹⁹ Dios cheã emumbayã. Echeẽ ereicuate quia co resẽ: “Emo ninisi rese ra ereicochi. Mbiam ra ereiquiachã. Mbae ra erembuquiachãchi. Echeẽ ñoñochochi nda emo nii. Emo nda eremburi irichi. Ndeturã ño nderu je. Ndesi abe je”,

i que Dios cheẽ nda, i que Jesús ñee ee ra. ²⁰ Acuanĩndu que ñee ndei ee ra. —Ūquĩ ngue amumbayã ja bei quia ra. Señetẽ mosenda bei, i rei que ñee Jesús je ra. ²¹ Jesús que nyesecua tuchi mae mose erese ra. —Ã mii mo abe eresaã eãte. Nembae emondo mondo ja mbia mbaecha reã je. Nde ũquĩ naa mose, mbae tubiriã nda nembae ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²² Acuanĩndu Jesús cheẽ andu mose que echiã ndoso tuchi cote ra. Eya eã tuchi que oso Jesús recha ra. Mbaecha tuchite quiatu ngue ae re.

²³ Jesús que mae mbia rese ra. —Mbaranguiatu ãte mbaecha je ngasẽ sacuaã ibate, siqui bei sacuaã huee, i que ñee uchimbaaquiato je ra. ²⁴ Echimbaaquiato que nyuruira tuchi eandu ra. Jesús que ñeembe ee ra. —Ae ndua ndua beite quia umbae tubiriã ndese, mbaranguiatu ãte ũquĩ je oso sacuaã ibate Dios rese. ²⁵ Sã ticuasú mo ndiqui oso aroneate ique aguja sorei rĩ no. Eĩ si chõ mbaecha no nde. Oso aronea ibate Dios rese, i que Jesús ee ra. ²⁶ Echimbaaquiato que nyuruira tuchibe u eandu no nda. —¿Aba quiatu ra oso Dios rea ibate re no? i que ñee nyue ra. ²⁷ Jesús que mae erese ñee ee ra. —Ae mbia saã aroneate quia nae, Dios mii ño nda esaã, i que Jesús ee ra. ²⁸ Pedro que ñee Jesús je ra. —Ure que urembae uresecha ja ra. Siqui sacuaã nderui, i que Pedro ñee nda. ²⁹ Jesús que ñee ee ra. —Tacheẽ nyecua jẽje. Emo umbae secha ja mose siqui sacuaã serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae nguiirĩ secha. Ae umbae ibi secha no. ³⁰ Ūquĩ mbae ja ra asibishorõ tuchi cien veces ereco mose íbii. Echuchua ata. Enongue ata. Esi ata. Eriirĩ ata. Ibi ata abe no. Ūquĩ ja ra asibishorõ tuchi ee. Mbica iquã icuã tuchi ra ee serĩ. Aquere ra siqui bei tuchi Dios rese ibate cote. ³¹ Ae ererecua saã saã nguia namo

nae, ererecua eã tuchi ra ũquĩ m o cote. Ae ererecua eã namo nae, ũquĩ mo nda ererecua cote, i que Jesús ra.

Mbia ra seiquia, i si Jesús

³² Jerusalén ngue echoi quia ra. Jesús que oso quia enonde ra. Echimbaaquiato que siquichete nyoĩ quia ra. Nyebe Jesús ererao nguiã mbia tiãsaã ñee sacuaã ee. ³³ —Co nyao quia Jerusalén co. Huee ra mbia semee sacerdotes rerecua je. Embesasa abe je. “Jesús jẽiquia”, i ra serĩ. Semee nda judíos eã je cote. Seiquia sacuaã. ³⁴ Mbica ra secheẽ saã saã. Seiruã nua abe ra eno. Sembucha chee ra iquia ira rese. Tres nyaashĩ mose ra aquera si, i que Jesús ñee ee ra.

Ererecuarã se, i raque Jacobo, Juan ndese

³⁵ Jacobo que oso Jesús riichã ngõngue rese ra. Juan, i equia ee. Zebedeo riirĩ ndei ũquĩ. —Urechu ñee ndeje aa, Urembaaquiatusa. Ae rĩ nda urecheẽ ndeje nae, ũquĩ je “eno” ere rã ure je, i rei que ee ra. ³⁶ —¿Mbae ra aba saã jẽje re? i que Jesús ee ra. ³⁷ —Ndeico mose ererecua tuchi, sã ure abe ureico ererecuarã nderese. Sã urecoi ja u ndejii. Co mii chĩ ndequiato cuti. Enonge chĩ ndequiato cutiã no, i rei que ñee Jesús je ra. ³⁸ Jesús que ñee ee ra. —Ae rĩ jẽingo ñee seje nae, jẽirandu turã eãte ũquĩ ndese. Ae rasi ra asaã tuchi nae, ¿ũquĩ ndasi ra jẽsaã jẽ abe re? Bautizar i ra seje, ¿eĩ nda bautizar i jẽ abe je re? i que Jesús ee ra. ³⁹ “Ae” i que ñee ee ra. Jesús que ñee ee cote ra. —Ae bei. Ae rasi ra asaã tuchi nae, ũquĩ ndasi ra jẽsaã tuchi rei jẽ abe. Bautizar i ra seje, eĩ si rei ra bautizar i jẽje no. ⁴⁰ “Ererecuarã ure”, jenyere rei que seje, ũquĩ asaã aroneate se jẽje. Paba ae quiatu ra ũquĩ saã. A e ebite, ũquĩ nda emii ererecuarã, i que Jesús ra. ⁴¹ Echimbaaquiato ataque que jirandu erese ra. Echimbaaquiato diez. Paama i que Jacobo je ra. Juan je abe. ⁴² Jesús que “jenyu” i ñee

uchimbaaquiatu ja je cote ra. — Mbia ataque rerecua riqui ucuasu raã naa tuchi ngũimba je ũquĩ. ⁴³ Ũquĩ nda jêsaã eã jê. “Ererecua ra se”, i mose jemo, sã ũquĩ siquichõ uataque rimbarã. ⁴⁴ Jemo “se rane jê” i mose, sã ũquĩ ndiqui bei mbae turã naa naa uataque je no. ⁴⁵ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã oso mbia je”, ae u nguiã. Co achu quia mano mbia tubiriã ndiquicharõ sacua co, i que Jesús ñee nda.

Jesús Bartimeo ndesayã mbucherõ

⁴⁶ Jesús que ngasẽ Jericoo ra. Uchimbaaquiatu rese. Jesús ngata mose hue si, mbia tubiriãte que nyoĩ quia erui ra. Eresayã mo ngue chĩ ñeenda jie huee ra. Ache ache i que huĩ nda. Bartimeo, i equia ee. Timeo ndiirĩ ngue ae ra. ⁴⁷ Jirandu mose Jesús rese que ñeemombo mombo ee ra. —¡Jesús! ¡David nducucha! ¡Ndeya eã ño serese jê! i que ee ra. ⁴⁸ —¡Equiriri chõ jê! i tuchi rei que mbia ñee ee ra. —¡Sererecua! ¡David nducucha! ¡Ndeya eã ño serese jê! ibe que eresayã ñee Jesús je ra. ⁴⁹ Jesús que tiba ra. —Eresayã jendu rã, i que ra. Mbia que ñee eresayã je ra. —Ndeya chõ jê. Ehuã. Jesús riqui ñee ndeje a, i que ee ra. ⁵⁰ Juã asi que oso oo Jesús rese ra. Uchiatiquia recha. ⁵¹ —¿Mañi ae ra ndeje re? i que Jesús ñee ee ra. —Seresa embuturã na, Sererecua, i que ra. ⁵² Jesús que ñee ee ra. —Eso cote. Seicuate que se ra. Nyebe nderesa nyerõ nguiã cote, i que ee ra. Aque mose tuchi que eresayã ndesa turã ja cote ra. Jesús rui que esi quia cote ra.

11

Jesús ngasẽ Jerusalén

¹ Jesús que Jerusalén curubite nyoĩ quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que ee ra. Hue si que Jesús uchimbaaquiatu nyeremo mo mondo ra. ² Ñee ngue ee

ra. —Achi sucha chõ jêso rã. Jengasẽ namo mose ra burro riirĩ cuasa mo ñi jêje huee. Emo ngue nyui eãte eátoo ra. Jenyura seru seje. ³ Emo ñee mose jêje, “¿mbaerã nda jenyura re?” i mose jêje, jeñee ee. “Nandererecua que ‘jendu’ i ra. Mondo jeibe ra jêje”, jenyee ee, i que Jesús ñee ũquĩ nyeremo mondo ra. ⁴ Nyoĩ que erea cote ra. Burro riirĩ ngue etea Jesús cheẽ nguire cote ra. Ecuasa que chĩ taicuee eiquesa jii ra. Nyura que cote ra. ⁵ Ae mbia chi huee nae, ũquĩ mo ngue ñee ee ra. —¿Mbae rese jêingo hue re? ¿Mbaerã jêingo era era re? i que ee ra. ⁶ Jesús cheẽ ndui si que ũquĩ ñee ee ra. “Eno” i que mbia ee cote ra. ⁷ Burro riirĩ ngue ecuruchoi Jesús je cote ra. Huĩrao que echono ñono earõ nda. Jesús que nyui eátoo cote ra. ⁸ Jesús que ngata oso quia burro átoo cote ra. Mbia tubiriã ngue huĩrao mbiitee tee nyoĩ quia ibi rĩ enonde ra. Emo ngue sindo mbiitee tee choi quia enonde no nda. Jesús oso sacua hue rĩ. ⁹ Mbia ia tuchi que tasẽ tasẽ nyoĩ quia enonde ra. Erui abe no. —Co nandererecua ru quia ngasẽte co. Co Dios chimbu ru quia ngasẽte nande je co. ¹⁰ David nducucha ru quia co. Nandererecua turã sacua. Dios turã tuchi riqui nande je co, i tuchi que mbia quia ñee nda. ¹¹ Jesús que ngasẽ Jerusalén cote ra. I que que oso Dios chuchua cote ra. Mae ja mose mbae rese que esi Betania uchimbaaquiatu rese cote ra. Tenda quiatu ngue osote nguiã ee.

Jesús ñee icuã higo i je

¹² I que Jesús choi quia Betania si isamami nda. Eriãcuãte que oso quia ra. ¹³ Isho que mae higo i mo ndese ra. Ero rerecua que ra. —Ea mo tau, i rei que oso erea ra. Ero achõte chõ ngue ee ra. Aque mose que eriqui ia eã nda. ¹⁴ Jesús que ñee higo i je cote ra. —Mbia ra ndea u eã mbei cote, i que ee ra. Echimbaaquiatu abe que echeẽ ñandu ra.

Jesús mbia mbusẽ Dios chuchua si

15 Ngasẽ ngue Jerusalén cote ra. Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. Ûquĩ ja que Jesús mbusẽ mondo ra. Ae mbae isiquia sibishorõ shorõ nguia, ùquĩ mbae abe que embuchiichere chere ja mesa ra. Mbae ja resebe. Ae nyurushi cuasu mondo mondo mbia je mbae ribishorõ nae, ùquĩ nenda abe que embuchiichere chere ja ra. 16 Jesús que ñee ùquĩ je ra. —Dios chuchua ite rĩ jẽingochĩ nguia mbae rerao rao. 17 “‘Mbia cheẽsa Dios je’, i ra mbia Dios chuchua je”, i rei que embesa ji huĩ nda. Jẽ nguia jẽicuã tuchite Dios chuchua je re. Mbae mbuquiachãsa chuchua jẽsaãte chĩ nguia ee, i que Jesús ñee asite ùquĩ je ra. 18 Sacerdote rerecua que chi Jesús cheẽ andu ra. Embesasa abe no. —¿Mañi nda aba Jesús iquia re? i que eu ndua ndua ra. Mbia quiatu que oote Jesús cheẽ ndese ee ra. Nyebe eriqui nguia Jesús ucuayãte. 19 Hue sucha qu e Jesús secha oso eresaitõ cote ra.

Higo i mano cote

20 I que Jesús nyoĩ quia isamami nda. Higo i cutite que echoĩ quia ra. Higo i ñimama ño nguia reaẽ. Erao abe mano ño nguia re no aẽ. 21 Pedro que ndua ñee Jesús je ra. ¡—Sã Sererecua! Higo i je que erecheẽ asi nae, mano ño equia cote reaẽ, i que ñee Jesús je ra. 22 Jesús que ñee ee ra. —Dios jẽicua tuchi. 23 Tacheẽ nyecua jẽje. Jemo ñee mose sita ibate mo je, “esiri rã oso ama ndisha ye” i mose sita ibate mo je, sã Dios icua tuchi rã nyii. “Dios ra secheẽ mumbayã” i tuchi mose uchiangui re, Dios ra echeẽ mumbayã. Sita ra siri ee. 24 “A emondo seje”, jenyẽ mose Dios je, mondo ra jẽje. “Dios ra emondo seje”, jenyẽ mose jeñiangui re, mondo ra jẽje. 25 Emo mbae icuã naa mose jẽje, ùquĩ ñee chĩ mose jendese, jẽtesarei chõ ùquĩ si. Jẽtesarei chõ esi ñee nonde Dios je. Ûquĩ mose ra jendu ibatenda

abe jẽicuã mbutiã no. 26 Jẽtesareiã mose emo icuã si, Dios abe ra jẽicuã mbutiã eã mbei jẽsi, i que Jesús ee ra.

¿Aba nembu re? i mbia ñee Jesús je

27 Nyebibe que echoĩ Jerusalén nda. Dios chuchuaqui rĩ ngue Jesús riqui ngata ra. Sacerdote rerecua que nyoĩ ñee ee ra. Embesasa rese. Amei ndese. 28 —¿Mbaerã ereico mbia mbaaquiatsu quiatu Dios chuchúaa re? ¿Aba “ùquĩ esaã saã” i quia ndeje re? i que ùquĩ ererecua ñee ja Jesús je ra. 29 Jesús que ñee ee ra. —Se rane tacheẽ jẽje. Se rane preguntar tae jẽje. Secheẽ jẽsibishorõ na nyii. Aquere quiatu ra jeñee asibishorõ cote. 30 ¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra. 31 Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndibishorõ nde? “Dios que Juan mbu ra”, nande aroneate ee. Nyebe ra ñee nande je. “¿Mbaerã jẽingo eãte erui re no?” i quiarei ra nande je. 32 “Dios que embu eã nda”, nande aroneate ee no. Mbia ataque ra paama i tuchi nande je. Juan quiatote quia mbia re, i que ererecua ñee ñee nyue ra. 33 Ñee nyee que Jesús je cote ra. —Ureicuayãte. Aba chõ Juan mbu bautizar i sacua mbia je, i que ee ra. Nyebe Jesús ñee nguia ee. —Se abe quiatu tacheẽ eã jẽje no. Ae “ã esaã” i seje nae, erĩ nda acheẽ eã jẽje no, i que Jesús ùquĩ ererecua je ra.

12

Uva raarõsa icuã icuã nguerecua je

1 Jesús que ejemplos saã saã mbia je ra. —Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao no nda. Uco raarõ turã ja sacua. Ibicha que “sembae uvas jẽsaarõ” i emo je cote ra. Al partido. Ae que oso isho itõte cote ra. 2 Uva quiche mose que ngũimba mo mondo rei umbaerã ndea ra. 3 Uva raarõsa

que erimba mbucuasẽ icuã ño nda. Iruã nua ño ngue ra. Eochi chõ ngue emondo mbuchebi ra. ⁴ Echa que ngũimba mo mondobe rei ereabe no nda. Aque abe que embucuasẽ icuã no nda. Sita que emombo mombo erese no nda. Eãquĩ nduqui tuchi que ra. ⁵ Ngũimba mo ngue emondobe aquere no nda. Aque quiatu que eiquia tuchi cot e ra. Eĩ eĩ mbei que eraarõsa quia echa rimba je ra. Emo emo ngue eiruã nua nda. Emo emo ngue eiquia no nda. ⁶ Aque mi tuchi que siquichõ echa rese cote ra. Eriirĩ tuchi chõ ngue aque re. Nyesequa tuchi que equia aque rese ra. Aque que emondo chee uva rea cote ra. “Ireĩ ireĩ jiri ra seriirĩ si”, i rei que ra. ⁷ Eriirĩ ngasẽ mose que uva raarõsa ñee nyue ra. —iCo eriirĩ ndu quia co cote jẽ! iNandeiquia rei jẽ! i nda uvas nandembaerã ae tuchi cote, i que ñee nyue ra. ⁸ Eraarõsa que eriirĩ isi icuã cote ra. Curuchoi que iquia pe jiri ra. Mano ngue cote ra. ⁹ ¿Mañi nda echa quia eraarõsa je cote re? Echa ra eraarõsa icuã iquia ja cote. Uva i ra emondo ja emo je eraarõ sacua cote. ¹⁰ ¿Ã mbesa ji rese jemaẽ ãte re? Sã emo ndiqui tuchia ao sita je no. Sita mo ngue equirirõ mombo ra. Eicuãte eriqui reĩ nguiã ee. Aquere ndua si erese.

“Earonda sacua turambi chõ eriqui re”, i ndua si uchimombo rese. Uchimombo que esirõ si cote ra.

¹¹ Dios chiaõ chõ ãquĩ nde. Dios chiaõ turã tuchi riqui nande je ã, i ñi embesa ji re, i que Jesús ee ra.

¹² —Nanderĩ ño eriqui nguiã ñee, i que ãquĩ ererecua ra. —Nandeisi rei serao jẽ, i rei que nyue ra. Jesús isi aronea tuchi que mbia résaa ra. Eireĩte quiatu ngue mbia tubiriã si re.

¿Impuestos ra uremee ererecua je re? i mbia ñee Jesús je

¹³ ãquĩ ererecua que fariseos mo mondochoi ñee Jesús je ra. Herodes chimbaaquiatu abe mondochoi erea. —Jesús nandembucheẽ icuã na. i nda

mbia paama i ee, i rei que ra. ¹⁴ Uturã ngue esaã ñooño Jesús je ra. —Jesús, co ereico mbia mbaaquiatu turãte co. Mbia jaje ndeturãte riqui co. Co ereico turãte mbia mbuchiabiã co. Mbia erembaaquiatu quiatu turãte quia Dios icha rĩ co. Nyebe urechu nguiã ñee nde je a. ¿Coche mbia mbae isiquia mee mee Romanos nderecua je re? Impuestos. ¹⁵ ¿Uremee mee nda ee re? ¿Uremee eã nda ee re no? i que ñee Jesús je ra. Jesús que ãquĩ icuã icuate ra. Nyebe ñee nguiã ee. —¿Mbaerã jẽingo “i nda Jesús ucheẽ nyabi”, i serĩ nde? Mbae isiquia jẽteacuquia imbu seje. Tamae erese, i que ee ra. ¹⁶ Mbia que eteacuquia ee ra. —¿Aba mbae nombre ñi mbae isiquia rese a re? ¿Aba ãquĩ aingue abe ñi a re? i que Jesús ee ra. Romanos nderecua, i que mbia ee ra. ¹⁷ Jesús que ñee ee cote ra. —Romanos nderecua mbaerã jemondo chõ ee. Dios mbaerã jemondo chõ ee no, i que Jesús ee ra. Mbia que nyuruira jate u Jesús cheẽ andu ra.

Mbia raaque ra quera si, i Jesús

¹⁸ —Mbia raaque ra quera eã mbei, i que mbiamo nguia ñee nda. Saduceos i que ãquĩ mbia je ra. ãquĩ mo ngue nyoĩ ñee Jesús je ra. Tã i sacua ee. ¹⁹ —Sererecua, ã ngue Moisés mbesa nande je ra: “Emo ndiiriã mano mose, sã enongue mano je ninisi rerequia erendaque re. Sã tiirĩ ngõngue raaque rĩ”, i que Moisés embesa nande je ra. ²⁰ Eriqui mo ngue siqui urerese ra. Seis que eribi ra. Eriqui que ngũinisirã quereco rei ra. Mano ño ngue tiirĩ ndocoĩ ngũinisi recha ra. ²¹ Enongue que nguiqui checha quereco rei cote ra. Ae abe que mano ño tiirĩ ndocoĩ no nda. Enongue que equereco no nda. ²² ãquĩ seis que ngõngue checha quereco ja rei ra. Mano ja chõ ngue erecha tiirĩ ndocoĩ no nda. Eninisi eru checha que mano nyee chõ cote no nda. ²³ Siete rei que eru nyii ra. Mbia raaque quera si ja mose, ¿abate ra equereco cote re? i que saduceos

ñee Jesús je ra. —Ma Jesús ñee icuã, i chõ ngue re.

²⁴ Jesús que ñee ee ra. —Jëingo Dios cheë icuayãte ã. Jëingo Dios cheë abi tuchi ã. Jëingo Dios quirãcuã icuayãte ã. ²⁵ Ae raaque ra Dios mbuquera si nae, ùquĩ nda ngüinisi quereco eã mbei huee cote. Ûquĩ nda ngu quereco eã mbei huee cote no. Angeles rã mbei ra mbia riqui huee ibate cote. ²⁶ ¿Moisés chimbese rese jemaë ãte re? Mbia raaque quera si rĩ ño ngue embesa nguiã. Ira ruri sendi quia, aque mose que Dios Moisés mbiirandu ùquĩ ndese ra. “Abraham nderecua chõ aico nguiã se co. Isaac nderecua abe. Jacob nderecua abe no”, i que Dios Moisés je aque mose ra. ²⁷ Ñngue mano ndei nyii ra. Eresco siqui bei chõ nguiã namo ã. Mbia raaque rerecua eã ño Dios re. Mbia reco rerecua chõ ae re. ¿Ûquĩ jëicua eãte quia ã nde? i que Jesús ñee mbia je ra.

Echesequa tuchi quia Dios rese

²⁸ Embesasa mo ngue chĩ echeë andu ra. —Jesús ñee turã tuchichĩ saduceos je, i que uchiangui re ra. Nyebe esi nguiã ñee ee. —Jesús, Dios cheë tubiriãte riqui ã ndesë. Mbia echeë mumbayã sacua. ¿Ma Dios cheë ndiita tuchi ma nde? i que embesasa ñee Jesús je ra. ²⁹ Jesús que ñee ee ra. —Ñ ño Dios cheë ndiita ã nde: “Secheë jeñandu rã, Israelitas. Dios mii tuchi chõ nandererecua re. ³⁰ Echesequa tuchi quia Dios rese. Ndechiã je. Neaĩ je. Nendua ndua abe je. Ndequirãcuã abe je”, i chõ Dios cheë ndiita nguiã. ³¹ Ñ abe rei ùquĩ nduinda ã no: “Sã ereico nyesequa ndechiese no. Eĩ ere si chõ nyesequa mbia rese”, i. Ûquĩ nyeremo ndei Dios cheë i tuchi ùquĩ, i que Jesús ee ra. ³² Embesasa que ñee Jesús je cote ra. —Ae bei, Sererecua. Dios mii tuchi chõ nandererecua re. Emo abe mo eãte. ³³ Nandechesequa tuchi mose Dios rese, ùquĩ eturãte ee. Nandechesequa tuchi mose nandechiã je. Nandendua ndua je. Nandeaĩ je. Nand-

equirãcuã je abe no. Nandechesequa tuchi mose mbia rese, ùquĩ eturãte Dios je mbae mo si. Sacrificio mo si. Ofrenda mo si, i que embesasa ñee Jesús je ra. ³⁴ —Ñee aquiature equia seje co, i que Jesús uchiangui re ra. —Dio s rimbarã tuchi chee ra nde, i que ee cote ra.

¿Aba rucucha Cristo re?

³⁵ Jesús que mbia mbaaquiatur quiatu quia Dios chuchúaa ra. —¿Mbaerã embesasa riqui ñee nde? “David rucucha chõ Cristo re” i re. ³⁶ David abe que “sererecua” i Jesús je ra. Sã embesa ji ñee no: Dios que ñee Cristo sererecua je ra: “Ecoi seji. Nde abe ra ererecua serese. Ae ndeucuayãte quia nae, ùquĩ je ra ndequirãcuã ateacuquia tuchi. Ndequirãcuã tuchi chee ra ùquĩ si”, i que Dios ñee sererecua je ra, i que Espíritu Turã David mbucheë nda. ³⁷ David sí chõ “sererecua” i nguiã Cristo je. Cristo David rucucha mose, ¿mbaerã David “sererecua” i ee re? i que Jesús embesasa je ra. Mbia tubiriã ngue Jesús cheë chandu turã jate ra.

Jesús ñee asi embesasa je

³⁸ Jesús que uchimbaaquiatur mbaaquiatur quiatur ra. —Embesasa rã nda jëingochĩ jë. Ûquĩ ucuasu saã saã mbeite quia ã. Huirao turã equereco beite quia ã. “Sã mbia ererecua i nande je”, i beite equia ã. ³⁹ Mbia renda turã abe eirabo rabo beite quia mbia si ã. “Fiestacha jii quia taĩ jë”, i abe beite equia ã no. ⁴⁰ Ari eru cheecha mbae abe embutiã tiãte quia ã no. Ucheë oco abe esaã saã mbeite quia Dios je ã no. “ƒ nda mbia mae nanderese”, i chõ nguiã. Ûquĩ nda Dios mbasi tuchi cote, i que Jesús mbia je ra.

Eru cheechambaechareã mo mbae mee Dios je

⁴¹ Emo mose que Jesús ñi Dios chuchúaa ra. Ofrenda riru nonde que eñi ngoi ra. Mae ngue mii mbia mbae isiquia mondo mondo mose

eriru ye rese ra. Mbaecha atate que mbae isiquia tubiriã mondo mundo quia eriru ye ra. ⁴² Eru cheecha mo ngue ngasẽ u cote ra. Nyeremoño tuchi que ae mbae isiquia mondo ra. Centavo mii mbuchecha tuchi que ra. ⁴³ Jesús que ñee uchimbaaquiatu je ra. —Jenyu. Tacheẽ nyecua jẽje. Eru cheecha mbaecha reã ngue mbae isiquia mondo tuchi mbia ataque si ra. ⁴⁴ Mbaecha quiatu que umbae rire ñetẽ mondo mundo ra. Eru cheecha quiatu que umbae mii mondo ja ra, i que Jesús ra.

13

Mbia ra Dios chuchua mbucoi ja, i Jesús

¹ Jesús que oso usẽ Dios chuchua si cote ra. Echimbaaquiatu mo ngue ñee ee ra. —Sã Dios chuchua turã tuchite jẽ. Eao ji turã tuchi sita je, i que echimbaaquiatu mo ñee ee ra. ² Jesús que ñee ee ra. —Ã ndese jẽingo mae ã nae, ùquĩ nda mbia mbucoi ja cote. Sita mo nda chi eã nyuchuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibate mo nda. Monte de los Olivos, i que hue je ra. Dios chuchua checuate que ee hue si ra. Echimbaaquiatu que ngasẽ ñee ee ra. Pedro. Jacobo. Juan. Andrés. Ûquĩ ja que ñee eĩsaa ra. ⁴ —¿Manosete ra ùquĩ nde? ¿Mañi ure ra equia jirandu mbae ua nonde re? i que ñee Jesús je ra. ⁵ Jesús que ñee ee ra. —Jẽtesa jiri quia jẽ. Mbia mo nda jembĩrĩ irĩchĩ ñee jẽje jẽ. ⁶ “Cristo chõ se re” i ra mbia ñee ata atate jẽje. Ûquĩ nda jeñanduchĩ jẽ. Ûquĩ nda mbia mbĩrĩ irĩ jate. Ñee ñooño je chõ ùquĩ nde. ⁷ Mbia ra guerras saã saã tuchi. Mbia ra ñee ñee tuchi quia nyiiquia iquia je rĩ. Ûquĩ mose ra jẽsiquichechĩ jẽ. Ûquĩ ja rane nda nyecua raque. Aque mose r a mbae ja ua eã ná. ⁸ Mbia ra guerras

saã tuchi chee. Nyiiquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbia rasi. Mangue chooñoa tuchi ra ibi nyere nyere. Jembasi ramo mose chõ nda ùquĩ nde. Aquere ra jembasi tuchi cote.

⁹ ¡Sã jẽ! Mbia icuã icuãte ra jẽje. Jembĩrĩ irĩ ndae. Jemee mee icuã nda mbia rerecua je. Jẽiruã nua nda mbia chumunuásaa. Nguerecua je ra mbia jenderao rao tuchi. Ererecua abe je chee ra secheẽ jẽsenei senei. ¹⁰ Sequiato ra Dios cheẽ turã senei senei ná mbia ja je nyii. Mangue chooñoa jenda ja je. Aquere ra mbae ua ja cote. ¹¹ Jemee mose mbia rerecua je, pare pare jenyechĩ nda jẽ. “¿Manyae ra ùquĩ ñee ndibishorõ nde?” jenyechĩ nda pare pare i jẽ. Espiritu Turã ae chõ nda jembucheẽ turã nguiã mbia je aque mose. Jẽ ae ra jeñee eã. Espiritu Turã ae chõ nda jembucheẽ nguiã. ¹² Jenongue ra jemondo chee mbia icuã je. Jẽiquia sacuã. Jendu abe ra jemondo chee mbia icuã je. Jendiĩrĩ abe ra jemondo chee mbia icuã je. Mbia icuã nda jemo iquia iquia chee. ¹³ Mbia mangue chooñoa jenda ra jẽucuayã tuchi serĩ. Ae ra siqui bei serese, ùquĩ nda Dios mingo bei.

¹⁴ Daniel que embesa Mbae Mbutiãsa Icuã nii nda. Mbae Mbutiãsa Icuã nda siqui nguecuáyaã. “Dios rendaque re taico se quiatu”, i ra equia huee. (Ae ra mae nguia sechimbesa rese nae, sã ùquĩ eicua.) Jemae mose Mbae Mbutiãsa Icuã ndese, jeña esi. Ae siqui quia Judéaa, sã ùquĩ uchã jei choi ibi ibátee mo. ¹⁵ Ae ra siqui tuchia quite rese, sã ùquĩ iqueã nyoi uchuchua uquichi mose. Sã echoi chõ uchã hue si bei, umbae rirõ ndocoĩ. ¹⁶ Ae ra siqui úcoo, sã ùquĩ nyebiã ngaẽ huĩrao rea. Sã hue si bei chõ echoi uchã. ¹⁷ Aba mbia eã tuchi ra emo áquẽ ndiru rerequia mose aque mose. Nguĩrĩ mbuquiambu je abe no. ¹⁸ “Nyiseĩ mose eã urechã” jenyẽ Dios je. ¹⁹ Mbia ra mbae rasi saã tuchi aque mose. Mbae rasi que mbia saã

eã jiri nyii ra. Aque ramo mose ra mbae rasi raã tuchi cote. Mbae ua bei sacua ño ùquĩ nde. ²⁰ Ae rasi ra mbia saã tuchi nae, ùquĩ nda Dios mbujua jiri uquiato riĩ. I nda emo ñimbirãcuã eã tuchi rei ùquĩ ndasi je. ²¹ “A Cristo riqui a jẽ” i mose emo jẽje, “nyia” jenyechĩ nda ùquĩ ñee mose jẽ. “Hue Cristo riqui hue jẽ” i mose emo jẽje, “nyia” jenyechĩ nda eno jẽ. ²² “Cristo chõ se re” ichõiño nda mbia ñee ata atate jẽje. “Dios cheẽ mbuchecua chõ se re” ichõiño nda mbia ñee ata atate jẽje no. Mbia mae sayã nda esaã saã tuchi mbia mbiĩrĩ irĩ sacua. Ùquĩ Dios quiato abe chee mbiĩrĩ irĩ arõte. ²³ Ùquĩ nonde chõ aico nguiã jemiirandu randu co.

Dios riirĩ nda tube ibate si

²⁴ Mbia ùquĩ ndasi raã ja mose ra tenda checuayã mbei cote. Nyasi abe no. ²⁵ Nyasitata ra ngoi ngoi. Ibei jenda abe ra quiata quiata chee cote no. ²⁶ Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. ²⁷ Angeles serimba ra amondo mbia sechisirõ munua nua sacua. Ishonda ja. Manguie chooñoa jenda ja. Mbia sechisirõ nda emunua nua ja seje cote.

²⁸ Sã higuera riqui no. Sã ira mo ndiqui no. Ero quira usẽ ja mose, “iraro itõ ndacu ra cote”, i chõ mbia nguiã aque mose. ²⁹ Eĩ sí ra mbae ua ja nonde. Ae riĩ aico ñee jẽje nae, ùquĩ ndese jemaie mose, “mbae ra ua ja cote” jenyera cote. ³⁰ Tacheẽ nyecua jẽje. A mbia riqui ngata ibi ã nae, ùquĩ emo emo nda manoa mbae ua ja nonde. ³¹ Ibei ra ua. Ibi abe ra ua no. Secheẽ nguiã ra ua eã mbei.

³² Manosete chõ nda mbae ua ja. Aico eicuayãte co. Mbia mo abe eicuayãte quia ã no. Angeles abe eicuayãte quia ã no. Paba mii ño eicua nguiã co. ³³ Nyebe jẽingo quiatu quia eraarõ arõ mbei. Jẽtesa tesa bei quia. Ma nyaashĩ ño nda equeru. Jẽicuayãte equia ã. ³⁴ Sã ererecua mo oso isho itõte no. Sã ñee ngũimba je

oso nonde no. —Sembae jẽsaarõ ja. A ndese jẽingo. Co rese eico nde. Qui rese eico nde no, i que ñee ngũimba mii mii je ra. —Etesa tesa bei quia, i que eiquesa raarõsa je ra. ³⁵ Manosete chõ nda tuchuacha ru. Jẽicuayãte equia ã. Itondaru ramo mose eru arondete. Itondii mose eru arondete. Nguira cheẽ mose eru arondete no. Eresaitõ ndabe mose eru arondete no. Nyebe jẽtesa tesa bei quiatu quia. ³⁶ Jengue mose ra eruchĩ jembuate jẽ. ³⁷ “Jẽtesa tesa bei quia” ae chõ nguiã mbia ja je co. Jẽ mii je eã, i que Jesús ra.

14

Jesús nandeisi tarõ, i ja ererecua nyue

¹ Sacerdote rerecua que ñee ja nyue ra. Embesasa abe no. —¿Mañi nande ra equia Jesús isi nonde re? Eiquia sacua. ¿Mañi nande ra embiĩrĩ irĩ nde? i que equia ñee ñee nyue ra. Achite que fiesta de la pascua ñi tu ee cote ra. Dos días. ² —Fiesta mose eã nandeisi jẽ. Mbia ra paama ichĩ nande je jẽ, i que u ñee ñee nyue ra.

Cuña mo aba mbusimbusa turã ichusẽ Jesús ãquĩ ndese

³ Jesús que siqui Simón Leproso chuchúaa ra. Betania, i que hue je ra. Cuña mo ngue tu erea huee ra. Aba mbusimbusa mo ngue equeru ee ra. Sita ao ji ye que ereru ra. Embisẽ tuchi que equeru ra. Mbae isiquia mumbasa tuchi que ùquĩ nda. Eriru churui que esiquio eichusẽ nonde Jesús ãquĩ ndese equiaru mose ra. ⁴ Mbia que chi ja mae erese ra. Paama i que cuña je ra. —¿Mbaerã eichusẽ ñooño nde? ⁵ Mbae isiquia ribishorõ ño nda aba emondo re. Mbaecha reã je emee mee sacua, i que ñee icuã icuã cuña je ra. ⁶ Jesús que ñee cote ra. —¿Mbaerã jẽingo ñee ùquĩ nde? Sã cuña ae riqui ae. Ae esaã seje nae, eturãte seje ùquĩ. ⁷ Mbaecha reã nguiã ra chi arete íbii a. Jẽ mbae raãse mose ee, mbae jẽsaã turã mbei ee ae. Se quia nda aico bei eã nguiã jendese aa. ⁸ Seati nonde chõ ngue cuña aba mbusimbusa ichusẽ ja nguiã serese.

⁹ Tacheẽ nyecua jẽje. Mbia Dios cheẽ turã nenei nenei mose mbia ja je, cuña nyisaã abe ra esenei senei mangue chooñoa jenda ja je. Mbia ndua turã ja sacua echisaã abe rese, i que Jesús ñee mbia je ra.

Jesús tamee jẽje, i Judas mbia icuã je

¹⁰ Judas Iscariote, i rei que Jesús chimbbaaquiato mo je ra. Aque que oso ñee sacerdote rerecua je ra. Jesús mee nonde ee. ¹¹ Sacerdote rerecua ia ja que ũqui andu ra. —Mbae isiquia uremee tuchi ndeje jẽ, i que ee ra. Nyebe Judas riqui nguiã ndua ndua. —Mbia eãsa quiatu Jesús tamee ee, i.

Jesús quiaru uchimbbaaquiato rese

¹² Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. —¿Mangue ra oveja urembuchi mangue ndechiurã nde? i que echimbbaaquiato ñee Jesús je ra. ¹³ Ñee ngue uchimbbaaquiato nyeremo je ra. —Jẽso sucha cuasu. Huee ra jemae emo i rerao rese. I ra equerao quia irasa mo ye. Aque rui jẽso. ¹⁴ Eique mose, aque tuchuacha je je ñee. “Jesús que urembu ñee sacua ndeje ra. ‘¿Ma cuarto ra urecu quiaru oveja u que re? Sechimbbaaquiato rese’, i que Jesús ñee ndeje ra”, jentye tuchuacha je. ¹⁵ Tuchuacha ra cuarto cuasu mee jẽje. Mbia quesã ibatenda ra emee jẽje. Embuquiche ji. Huee chõ oveja jembuchi nandequiaru sacua, i que Jesús ñee ee ra. ¹⁶ Nyebe echimbbaaquiato nyoĩ nguiã sucha cuasu. Jesús cheẽ ndui si tuchi que mbae chi ja ee huee ra. Huee que oveja mbuchi huee cote ra.

¹⁷ Itondaru ramo mose que Jesús ru uchimbbaa quiato ataque rese ra. ¹⁸ Quiaru mose que Jesús ñee ee cote ra. —Tacheẽ nyecua jẽje. A jẽingo quiaru serese a nae, jemo nda semondo mbia icuã je, i que ñee uchimbbaaquiato je ra. ¹⁹ Echimbbaaquiato ia eã tuchi que echeẽ mose ra. —¿Se ra aremondo

ee re? i ja jate que ñee Jesús je ra. ²⁰ Jesús que ñee ee ra. —Doce jẽingo quiaru serese a nae, jemo ño ñene. Ae chi quiaru serese aque plato ye si a nae, aque chõ ñene. ²¹ Dios cheẽ ndui si tuchi ra amano ndaque. Ae ra semee mbia icuã je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curi”, i chee ra aque, i que Jesús ra.

²² Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —¿Mbachae jẽu. Serete chõ ã nde, i que Jesús ñee ee ra. ²³ Vino mbeisa que esirõ cote no nda. Gracias i que Dios je ra. Mondo que uchimbbaaquiato oo cote ra. Mbei mbei ja que cote ra. ²⁴ Jesús que ñee ee ra. —Seruqui chõ ã nde. Mbia icuã mbutiã sacua ño seruqui re. Dios cheẽ yasu rui si chõ seruqui riqui nguiã mbia icuã mbutiã ã. ²⁵ Tacheẽ nyecua jẽje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguiã cote, i que Jesús ñee nda.

Jesús aicuayãte resẽ, ichõño nda Pedro serĩ, i Jesús

²⁶ Frasei rasei que cote ra. Nyoĩ que ibi ibate mo cote ra. Monte de los Olivos, i que huee ibi je ra. ²⁷ Jesús que ñee uchimbbaaquiato je huee ra. —Jẽireĩte ra eriqui serĩ. Jeñimboseĩ mboseĩ nda oso serecha. Sã embesa ji riqui ñee no: “Mbia ra oveja raarõsa iquia. Ovejas ra ñimboseĩ nyoĩ cote”, sã embesa ji riqui i no. ²⁸ Seraaque quera sire ra aso se rane jendaarõ Galilea, i que Jesús ee ra. ²⁹ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra. ³⁰ Jesús que ñee ee ra. —Tacheẽ nyecua ndeje. Ngaira cheẽ nyeremo nonde ra erecheẽ ñooño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús ñee ee ra. ³¹ Pedro que ñee ee ra. —Mbia ra seiquia arõte raque nderĩ,

acheẽ ñooño eã nda se nderĩĩ, i rei que Pedro ra. Eĩ ja que ñee nda.

Jesús ñee ngu je

³² Jesús que oso Getsemaní cote ra. Uchi mbaaquiato rese. —Jengoi rã u aa. Tacheẽ na oso Paba je pe jiri se, i que Jesús ee ra. ³³ Pe quiti jiri que Pedro rerao ra. Jacobo rese. Juan abe no. Eya eã ndasi tuchi que tu ee aque mose ra. ³⁴ Ñee ngue ãquĩ je ra. —Seya eã ndasi tuchi aico co. Seya eã ndasi ra sei quia chee. Jenguchõ na jẽ aa. Jẽtesa tesa bei u aa, i que Jesús ñee ee ra. ³⁵ Jesús que oso pe quiti jiri cote ra. Nyibi que u ngoi ngũĩã ndese ñee Dios je ra. —Mbae rasi asaã sereãte, i rei que ñee Dios je ra. ³⁶ —Paba, mbae eresaã ja arõte nde. ãquĩ ndasi asaã sereãte raque quia co. Ae sebi riqui nae, ãquĩ ndese semingo eã. Ae ndebite riqui nae, ãquĩ ndese quiatu semingo, i que Jesús ñee Dios je ra. ³⁷ Nyebi que u uchimbaaquiato je cote ra. I que eu uque ja ee cote ra. Ñee ngue Pedro je ra. —Simón, ¿ereque huĩ a re? Ereico areã ñochĩ tesa tesa s e ñee mose Dios je. ³⁸ Jẽtesa tesa u. Jengue eã u ñee Dios je. Mbae icuã tã i eã sacuaã jẽje. Jẽingo serete raque serese. Mbae icuã nguiatu jembuti mbutite nguiã, i que Jesús ee ra. ³⁹ Nyebi si que oso ñee Dios je ra. Hue rĩ si que ñee ee ra. ⁴⁰ Nyebi que u uchimbaaquiato je cote ra. I sí que u uque ee no nda. Eresa quiatu ngue eshiu shiute nguiã. —¿Mañi nda aba ñee nde? i ja tuchi que echimbaaquiato ra. ⁴¹ Osobe que ñee Dios je pe jiri cote ra. Tres veces que aque cote ra. Uba rei que u ñee uchimbaaquiato je ra. —Jengue tuchi cote. Jenguenea jẽucua cote. Semondo ra mbia icuã je cote. Sei quia sacuaã. ⁴² Jẽhuã cote. Nyao cote. Ae ra semee mbia icuã je, co eru quia semee sacuaã co cote, i que Jesús uchimbaaquiato je ra.

Mbia icuã Jesús isi suruchoi

⁴³ Jesús cheẽ mosebe tuchi que Judas ru erea ra. Jesús chimbaaquiato

rei que ae ra. Aque rese que mbia cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chõ ãquĩ mbucuaẽ nguia reaẽ. Embesasa abe. Amei abe. ⁴⁴ Judas ñee nyecuayã nguiatu quia ãquĩ je nyii reaẽ. —Ae ritii ra asiite nae, aque chõ ñene. Aque jẽisi quiatu tuchi serao, i quia equia ee nyii reaẽ. ⁴⁵ Jesús riichã ngue esi saludar i ee cote ra. Jesús ritii que esiite ee cote ra. ⁴⁶ Mbia que Jesús isi cuaẽ ecua cote ra. ⁴⁷ ãquĩ mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁴⁸ Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoĩ jenyuchi nguia serea co. ⁴⁹ Tenda que amumba mumba beite rei quia jendese Dios chuchua resẽ. Mbia que ambaaquiato quiato bei rei quia huee resẽ. ¿Mbaerã seisiã nyucua aque mose re? Embesa ji ique sacuaã ño jẽicuã icuã ndiqui nguiã seje ã, i que Jesús ñee ee ra. ⁵⁰ Echimbaaquiato que nyoĩ ja chee uchã Jesús recha ra. ⁵¹ Acuanĩndu mi mo ngue oso erui ra. Tiru mi ngue equereco nyiati ra. Mbia que acuanĩndu abe isi rei ra. ⁵² Huĩrao que esecha oso uchã nda. Eirao eã tuchi que oso uchã nda.

Jesús mbia curuchoi mbia rerecua je

⁵³ Mbia que Jesús curuchoi sacerdote rerecua je cote ra. Huee que sacerdote rerecua ja chi ñumunua nda. Embesasa abe. Amei ererecua ja abe no. ⁵⁴ Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Hue que ngoi sacerdote rimba mo ndese ra. Nyee que huĩ huee ra. ⁵⁵ Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandei quia, i rei que ñee ñee nyue ra. —¿Mbae i ra aba mbia je Jesús riicharã

nde? i rei que u ñee ñee nyue ra. ⁵⁶ Emo emo ngue ñee icuã icuã ndei Jesús ríi nda. Ucheẽ ngue etasa tasa tuchi chõ nda. ⁵⁷ Mbia mo abe que juã ñee ñooño eríi nda. ⁵⁸ —Jesús cheẽ ngue urechandu ra. Ñee icuãte que Dios chuchua ríi nda. “Dios chuchua tambocoi mbia chiaio. Tres días mose ra Dios chucharã asaã no. Mbia chiaio eã nda ñquĩ cote”, i que urechandu Jesús cheẽ nda, i que ñquĩ ñee ñooño Jesús ríi nda. ⁵⁹ Ucheẽ ngue etasa tasa bei chõ nda. ⁶⁰ Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderíi nde? i que ñee Jesús je ra. ⁶¹ Jesús que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? i que ñee Jesús je ra. ⁶² Jesús que ñee ee ra. —Ae. Dios rucucha chõ se re. Jemae nda serese s e coi mose Dios quirãcuã jii. Sechu mose abe ibeishí ndese, i que Jesús ee ra. ⁶³⁻⁶⁴ Sacerdote rerecua que paama i tuchi Jesús cheẽ mose ra. Huírao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndei ngue erese re. ¿I jẽje re? ¿Mañi nande ra equia re? i que sacerdote rerecua ñee mbia rerecua ataque je ra. —Eicuã tuchi que ra jẽ. Sã mbia eiquia, i jate que ererecua ñee Jesús ríi nda. ⁶⁵ Mbia que ñinimbu nimbu Jesús ruba rese cote ra. Eresa que echati mbae mo je ra. Ucu ucua tuchi que erese cote ra. —¿Aba ucua ucua u nderese a re? Eicua no, i que equia eresa ati ji je ra. Soldados abe que ucua ucua tuchi eresa rese ra.

Jesús aicuayãte resẽ, ichõiño Pedro

⁶⁶ Pedro que chĩmbeite ngoi itaicuee ra. Nyucuaaque mo ngue tu huee sacerdote rerecua rimba ra. ⁶⁷ Pedro que chĩ nyee tata jii ee huee ra. —Jesús resenda que nde abe ra, i que nyucuaaque ñee mae mose Pedro rese ra. ⁶⁸ —Tei. Ndecheẽ aicuayãte, ichõiño ngue Pedro ñee ee

ra. Hue si que esi eiquesa quitu cote ra. Usẽ mose que nguira ñee cote ra. ⁶⁹ Nyucuaaque que maembe erese ra. —Co abe que Jesús resenda ra, i que mbia ataque je ra. ⁷⁰ —Tei. Aicuayãte se, ichõiño ngue Pedro ee no nda. Ae chi huee nae, ñquĩ mo ngue ñee ee cote ra. —Jesús resenda chõ nde abe resẽ. Galilea jenda chõ nde resẽ, i que ñee Pedro je ra. ⁷¹ Pedro que jurar i tuchi ñee ee ra. —Aicuayã tuchite se resẽ, i que ñee ñooño si no nda. ⁷² Aque mose tuchi que nguira ñee sí cote ra. Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nyeremo nonde ra erecheẽ ñooño tres veces seríi, sã Jesús i ee nyii no. Ñquĩ ndese que Pedro ndua cote ra. Nyebe nyeseo tuchi nguiã cote.

15

Mbia Jesús curuchoi Pilato je

¹ Nyaashí namo mose que sacerdote rerecua ñumunua ja ra. Amei ererecua abe no. Embesasa abe no. Mbia rerecua jate que ñumunua nda. Jesús que echucua suruchoi Pilato je ra. Pilato rei mbia rerecua hue jenda ja. ² —¿Judíos rerecua chõ nde re? i que Pilato ñee ee ra. —Ae. Judios rerecua chõ se re, i que Jesús ee ra. ³ Sacerdote rerecua que ñee ñooño tuchi Jesús ríi nda. Ñee icuã tuchi que eríi nda. ⁴ —Sã ñee icuã icuãte nderíi jẽ. ¿Echeẽ nda eresibishorõ eã nde? i que Pilato ñee Jesús je ra. ⁵ Jesús que ñee ãte echeẽ mose ra. Nyebe Pilato nyuruirã tuchi nguiã echeẽ eã mose.

Jesús jẽiquia mbucha ira rese, i ererecua

⁶ Pilato que mbia tarõ ji mo mbusẽ mbei quia pascua mose ra. Co mĩ ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra. ⁷ Barrabás, i que etarõ ji mo je ra. Emo abe que chi huee erese ra. Mbia iquiasa que ñquĩ nda. ⁸ Mbia que ñee ngaẽ Pilato je ra. —Mbia mĩ tarõ ji

que erembusẽ mbeite quia, einyere si emo mbusẽ namo, i ja que mbia ñee Pilato je ra. ⁹—¿Judío rerecua ra ambusẽ mondo jẽje Jesús re? i rei que Pilato ra. ¹⁰—Sacerdote rerecua riqui paama i chooñote Jesús je ã, i quiatu que Pilato ndua ndua uchiangui re ra. ¹¹—Sã Pilato Barrabás mbusẽ mondo Jesús rendaque re, i tuchi que sacerdotes ñee ja mbia je ra. Nyebe que mbia “Barrabás embusẽ mondo” i chee Pilato je ra. ¹²—¿Mañi ae quia ra Jesucristo je re no? i que Pilato ñee ee ra. ¹³—Embucha ira rese, i ja que mbia ñee ee ra. ¹⁴—¿Mbae icuã esaã nde? i que Pilato ñee ee ra. — ¡Embucha ira rese jẽ! i bei bei que mbia ra. ¹⁵—Mbia turã jiri nda seje chã, i chee que Pilato ra. Nyebe Barrabás mbusẽ mondo nguiã. Jesús quiatu que eiruã nua cote ra. —Jembucha iquia ira rese, i que mbia je cote ra.

¹⁶ Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama no nda. ¹⁷ Tiru ireĩ ngue emingue ee cote ra. —Ererecua chõ nde re, ichõiño iquia iquia ee. Nyu ritimeĩ uma ji que emiã eãquĩ ndese corona nda. ¹⁸—Judío rerecua tuchi chõ nde re, ichõiño ngue iquia iquia ee ra. ¹⁹ Ira que euru uru eãquĩ ndese ra. Ñinimbu nimbu abe que erese no nda. Ngoi ngoi que ngũĩã ndese erimba raã naa ee ra. ²⁰ I quia iquia tuchi que eu ee ra. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

²¹ I rei que emo u quia uco si ra. Simón, i que ee ra. Cirene jenda mo ngue ae ra. Alejandro ru que ra. Rufo ru abe no. Aque que soldados isi ira mbuchicuandasa ji rerao sacua ee ra. Cruz, i equia ee. Nguerao que cote ra. ²² Ngasẽ ngue pee cote ra. Gólgota, i que hue je ra. Eresa cuare, i chõ nguiã hue je. ²³ Huee que vino mondo rei Jesús je ra. Mirra je emubarai. Mbei eã ngue ra. ²⁴ Soldados que

Jesús mbucha ira rese ra. Aquere que sita ñetẽ mbaba mbaba o je cote ra. — Aba ra Jesús irao querao ñi ja, i que nyue ra. ²⁵ Tenda chui ite ramo mose que embucha ira rese ra. ²⁶ Mbia que letrero mii Jesús ãquĩ nguiti ibate ra. JESUS REI JUDIO RERECUA i que embesa mii nda. Ñquĩ nii ño eriqui nguiã eiquia hue. ²⁷ Mbia nyeremo abe que embucha ira rese Jesús chabe ra. Jesús rereco chobei que emiã ira rese ra. Mbae mbuquiachãsa tuchi que ñquĩ nda. ²⁸ Embesa ji cheẽ nguire que Jesús iquia mbia icuã ndese cote ra. Sã embesa ji riqui ñee no: “Mbia icuã ndese ra eiquia, sã embesa ji i ñee nyii no. ²⁹ Mbia que iquia iquia quia Jesús cheẽ naa naa ecuã mose ra. Ñee icuã icuã ee. —“Dios chuchua ra ambucoi. Tres días mose ra ambuchuruambe” ere que equia. ³⁰ Equiche u nde ae hue si no, i tuchi que mbia quia iquia iquia ee ecuã mose ra. ³¹ Sacerdote rerecua abe que iquia iquia chõ nguia ee ra. Embesasa abe no. Ñquĩ ngue ñee icuã icuã ja quia erĩ nda. —Mbia que embuquera quera rei nyii ra. Ae si quera aroneate nguiã aque. ³² Judío rerecua mose ae, sã ae ae nguichi ira si. Cristo mose ae, sã ae ae nguichi no. I nda uremae erese. I nda ureicua cote, i ja que ererecua ñee icuã icuã erĩ nda.

Jesús mano mose cote

³³ Tenda nandeite re mose que itondaru tu ra. Itondaru bei que mbia ja je tres horas ra. ³⁴ Tenda cheseco mose que Jesús ñeemombo cote ra. — Eloi, Eloi, ¿lama sabactani? i que ñee mombo ra. —Dios sererecua, ¿mbaerã ereico hui sesi re? i chõ ngue ñee nguiã. ³⁵—Elías je eriqui “quiatuchu” i reae, i rei que echeẽ andusa monda. ³⁶ Emo ngue esponja monde vinagre ye ra. Ira ai rese que embia ji mondo rei Jesús chúruu cote ra. —Esecha rei. Sã Elías ruãt e quia erea, i que emo ñee ee ra. ³⁷ Jesús que tasẽ mano mbei cote ra. ³⁸ Aque mosechi tuchi que cortina nyisia Dios chuchua jenda ra. Ibate si que eru

nyisia íbii ra. ³⁹ Soldado rerecua que chí Jesús nonde mae erese ra. Emano ndese que eñi mae nda. —Dios riirí ño eriqui re, i que cote ra.

⁴⁰ Cuña ngue chí jate ma e Jesús rese ishó ra. María Magdalena abe que chí huee ra. Salomé abe no. María abe no. María rei José si. Jacobo Ñetē si abe no. ⁴¹ Ũquí ngu e siqui bei quia Jesús rui ra. Echíurã ngue emii mii mbei quia ee ra. Galiléaa eico mose bei. Cuña tubiriãte abe que chí mae Jesús mbuchai rese huee ra. Ae nyoí Jesús rese Jerusalén, ũquí.

Mbia Jesús raaque chati cote

⁴² Tenda que oso cote ra. Sábado nonde. Aque mose bei que mbia riqui mbae mbuquiche ja sábado sacua nda. ⁴³ Aque eresaitō mose que José si ñee Pilato je ra. Judío turã ngue ae ra. Arimatea jenda que ae ra. Judío rerecua que ae no nda. —Dios ra ererecua, i beite que equia eraarō arō nda. Aque que ireí ireí ãte oso ñee Pilato je ra. —Jesús raaque emee na seje, i que oso ñee ee ra. ⁴⁴ —¿Mano jei tuchi ere? i tuchi que Pilato uchiangui re ra. —Quiatuchu rã sembiirandu. ¿Jesús mano cote re? i que Pilato ñee soldado rerecua je ra. ⁴⁵ —Mano ngue cote ra, i que soldado rerecua ñee ee ra. Nyebe Pilato eraaque mondonguiã José je cote. ⁴⁶ José que Jesús raaque mbuquichi cote ra. Tirushí turã mo ngue eisi ra. Eraaque que echuma aque je cote ra. Iti que echoi sita ribicoi ji imi ye ra. Nyati que sita cuasu mo je cote ra. ⁴⁷ María Magdalena ngu e mae mi eati rese ra. María rese. José si que ae ra.

16

Jesús raaque quera si

¹ Jesús raaque ati ji que chibe sábado mose ra. I nyaashí oso quia domingo mose, aque mose que cuña mo nyoí mae eatisa rese ra. María Magdalena. Salomé abe no. María abe no. Jacobo si rei ae. Ũquí ja que aba mbushimbusa isi rei eichusē

chusē sacua Jesús raaque rese ra. ² Tenda nyui ramo mose que echoi eatísaa ra. ³ —¿Aba ra sita curubanande je eatiquia re? i rei que echoi quia ñee ñee nyue ra. ⁴ I que sita rurubai u ee cote ra. Sita cuasute quiatu ngue re. ⁵ Ique rei que echoi sita imi ye ra. Acuanindu mo ngue chí ngoi huee equiatocuti quiti ra. Huñraoshí oco tuchi que ecunui huee ra. Cuña ngue siquiche tuchi ra. ⁶ Acuanindu que ñee ee ra. —¿Mbaerã jëingo siquiche re? Jesús raaque jësequia raque quia ã. Emoate a resē. Eraaque que quera si no. Jemae eatisa rese ae. ⁷ Jëso asi rã echimbaaquiatu mbiirandu erese. Pedro abe jembiiirandu. “Jenonde ra esi Galilea. Jemae nda erese huee. Sã ñee jëje nyii no”, jenyē embiiirandu, i que acuanindu ee ra. ⁸ Cuña ngue siquichete echeē andu ra. Uchã ngue echoi eatisa si ra. Ñee eã tuchi que mbia mo je ra. Esiquichete quiatu ngue re.

Jesús nyecua María Magdalena je

⁹ Jesús que quera si nyaashí namo mose domingo mose ra. María Magdalena nane je que nyecua ra. Aque si chō eriqui siete aba checuayã icuã jea nyii reaē. ¹⁰ Ae que oso Jesús quiato mbiirandu ja cote ra. Ngasē mose ee que echí nyeseo jate eya eã ee ra. ¹¹ —Jesús que quera si ra. Amae ngue erese ra, i rei que embiiirandu ra. Quera aroneate que ũquí je ra.

Jesús nyecua uquiato nyeremo je

¹² Aquere que nyecua uquiato nyeremo je ra. Ishote que sucha tubiriã si ra. Emo na tuchi que ee ra. ¹³ —Jesús que quera si nyecua ure je ra, i rei que echoi uataque mbiirandu ra. Quera aroneate que ee no nda.

Jesús uchimbaaquiatu mondo mbia mbiirandu

¹⁴ Aquere que Jesús nyecua uchimbaaquiatu ja je no nda. Once je. Ũquí quiaru mose que nyecua ee ra. Ñee asi asi que ee ra. —¿Mbaerã jeñia ãtãte riqui re? ¿Mbaerã “nyia” jenyē eã jembiiirandu mose sequera

rese re? i que ñee ee ra. ¹⁵ —Jēso secheē nenei nenei mbia ja je. Mbia mangue chooñoa jenda ja je. ¹⁶ Mbia mo nda seicua icua. Ũquĩ je bautizar jenyē. Ũquĩ nda siqui bei cote. Ae ra seicuayã, ũquĩ nda mbae rasi saã mbei. ¹⁷ Seicuasa ra mbia mae sayã saã saã tuchi. Aba checuayã icuã nda ejea jea mbia si serĩ. Mbia cheemo nda esaã. ¹⁸ Mbei ra eisi isi o je. Aba iquiāsa mbei mose ra erasiã. O ra echono ñono erasi arõ embucherõ sacuã, i que Jesús uchimbaaquiatu mondo ra.

Jesús nyui oso ibate

¹⁹ Jesús ñee ja mose que Dios equerao ibate cote ra. Siqui bei sacuã Dios jii cote. ²⁰ Echimbaaquiatu que nyoĩ Dios cheē nenei nenei mbia ja je ra. Mangue chooñoa jenda ja je. Dios que siqui tuchi quia erese ra. Mbia mae sayã tuchi que esaã saã nguia ra. Mbia Dios cheē icua sacuã. Amén.

EL SANTO EVANGELIO SEGÚN SAN LUCAS

Lucas ucheẽ mbesa Teófilo je

¹ Jesucristo que mbae saã saã tuchi quia huico mose íbii ra. Mbia atate que echisaã mbesa mbesa rei ra. ² Mae ndei equia erese nyii. Dios cheẽ esenei senei mbei rei quia nyii. Jesucristo chisaã ndese que urembi-irandu cote ra. ³ Se abe que airandu tuchi cote ra. Ae esaã saã nguia nyii nae, aque mosenda bei rese que airandu cote ra. Se abe ùquĩ tambesa ja ndeje, Teófilo. Tasenei turã ja embuchiabiã ndeje. ⁴ Ae rese ereirandu randu nae, ùquĩ ereicua tuchi sacua ño aico nguiã embesa mbesa ndeje. Eĩ nda “ae bei” ere chõ nguia Jesucristo chisaã saã je.

“Juan el Bautista ra nyecua u mbia je”, i que ángel mo nda

⁵ Zacarías, i que emo je ra. Sacerdote que ae ra. Herodes que siqui Judea mbia rerecuarã aque mose ra. Abías resenda rei Zacarías. Aarón ndiirĩ nducucha rei Zacarías. Eninisi abe rei Aarón ndiirĩ nducucha no. Elisabet, i que eninisi je ra. ⁶ Zacarías turãte que eriqui Dios je ra. Ngūinisi rese. Ùquĩ ngue Dios cheẽ mumbayã mbei quia ra. Eicuãte, i aroneãte que mbia mo nguia erĩnda. ⁷ Eriiriã mbei que eriqui ra. Tiiriã je rei Elisabet. Ari chee. Zacarías abe que ameite chee ra.

⁸⁻⁹ Sacerdotes que nyuuru uru beite quia querabe mbae raã naa Dios chuchúaa ra. Nyebe que Zacarías abe riqui mbae raã naa Dios chuchúaa emo mose ra. Zacarías que oso ique tuchi Dios chuchua ra. Mbae mo ndei sacua embushimbu. ¹⁰ Zacarías que mbae shimbu sei cote ra. Mbia cuabẽ ngue chi ja taicuee ñee ñee Dios je ra. ¹¹ Angel ibatenda mo ngue tu nyecua Zacarías je cote ra. Chĩ ngue juã mbae shimbu reisa ji ee

ra. ¹² Zacarías mae mose ángel rese, siquiche tuchi que ra. ¹³ Angel que ñee Zacarías je cote ra. —¿Mbaerã ereico siquiche re? Dios que ndecheẽ ñandu ra. Elisabet nda tiirĩ ndeje cote. Juan, ere nderiirĩ je nyaacuquia mose. ¹⁴ Ndeyate ra cote. Nderiirĩ nyaacuquia mose ra mbia ia tuchi cote. ¹⁵ Nderiirĩ nda mbae turã saã saã tuchi quia Dios je. Mbaeri rasi mo nda embei eã tuchi. Espiritu Turã nda siqui tuchi erese. Esi rie ye ereco mose bei. ¹⁶ Nderiirĩ nda mbia Israel jenda mbuchebi ja Dios je. Dios ra ùquĩ nderecuarã. ¹⁷ Nderiirĩ nda mbae mbuquiche ja Cristo tu nonde. Sã Dios Elías mbuquirãcuã no, eĩ si ra Dios uquirãcuã mee nderiirĩ je. Nderiirĩ nda mbia mbuturã turã nyiese. Eru mbuturã turã nguiirĩ ndese. Eriirĩ mbuturã turã ngu rese no. Nderiirĩ nda aba cheẽ mumbasa mbaaquiato quiatu. Aba cheẽ mumbayã sacua cote. Nderiirĩ nda mbia mbuquiche ja Cristo tu nonde, i que ibatenda ñee Zacarías je ra. ¹⁸ Zacarías que ñee ángel je ra. —¿Mañi nda ùqui nde? ¿Ndecheẽ nda ique seje re? ¿Manyae ra eicua re? Ameite se. Seninisi abe arite, i que Zacarías ee ra. ¹⁹ Angel que ñee Zacarías je ra. —Se rei Gabriel. Dios rimba chõ aico co. Dios quia semondo rei nguiã ñee turã sacua ndeje. ²⁰ “Nyia” ere eã ñochĩ secheẽ je. Nyebe ra ndeisyã. Ndecheẽ nguiã nda eno. Nderiirĩ nda nyaacuquia chee. Nderiirĩ nyaacuquia mose ra erecheẽ nyecua cote. Secheẽ nda io ja ndeje cote, i que ángel Zacarías je ra. ²¹ Mbia que chi bei taicuee huee ra. Zacarías raarõ arõ. —¿Mbaerã Zacarías riqui itõ tuchite Dios chuchúaa re? i que mbia ñee jate ra. ²² Zacarías que usẽ nyee ra. Echeẽ nguiã. O que emumbate mbate chõ nguia mbia je ra. —Zacarías mbae mo tea cuu Dios chuchua reae, i que mbia ñee ñee nyue ra. ²³ Zacarías que umbae tarea saã ja Dios chuchúaa ra. Tenda nongue mose. Emo ngue tu euru cote ra. Zacarías que oso

uchuchua cote ra.

²⁴ Aquere qu Eya uchi que cote ra. Eninisi que useã mbei tuchua si cinco meses ra. ²⁵ —Dios seriirina meeñi seje cote. Mbia ra iquia iquia eã seje cote, i que Elisabet ra.

“Dios riirĩ nda nyecua u mbia je”, i que ángel mo nda

²⁶ Nyasi nongue mose que Dios iba-tenda mondo mbia mo je ra. Gabriel, i que aque ángel je ra. Aque que emondo sucha Nazaret ra. Galilea, i que aque ibi je ra. ²⁷ —Eso rã ñee nyucuaaque María je, i que Dios ángel mondo ra. Emo ngue siquiã tuchi María rese ra. Eruã mbei. José ninisibi rei María. José siquiã ndaque erese. David riirĩ nducucha rei José. ²⁸ Angel que ique María ch María chuchua cote ra. —Acheẽ ngue u ndeje ra. Dios turã tuchi riqui ndeje co. Ndua bei nderese. Dios ia tuchite nderese acuanĩ mo si, i que ángel María je ra. ²⁹ María mae mose iba-tenda rese que ñee uchiangui re ra. —¿Mbaerã eru quia serea co re? ¿Mbaerã eru quia ñee seje co re? i que María uchiangui re ra. ³⁰ Angel que ñeembe ee ra. —María, siquichechĩ nda sesi re. Dios turã tuchi riqui ndeje co. ³¹ Dios cheẽ turã ngue asenei u ndeje ra. Nanĩmbae ra nde cote. Nderiirina nda eretea cote. Jesús, ere nderiirĩ je. ³² Nderiirĩ quirãcuã tuchi rae. Dios quirãcuã ndiirĩ nda erereco. Mbia rerecua tuchi ra ae. Sã David riqui mbia rerecua nyii no, eĩ nda nderiirĩ mbia rerecua tuchi cote. ³³ Nderiirĩ nda judíos rerecua bei cote. Ua eã mbei rae, i que ángel ñee María je ra.

³⁴ María que ñee ángel je ra. —¿Mañi nda serío re? Seru eãte nyeresẽ, i que María ee ra. ³⁵ Angel que ñee María je ra. —Espíritu Turã ae ra Dios riirĩ mondo nderie ye. Espíritu Turã nda ndereaquiata bei quia. Dios quirãcuã nda siqui bei nderese. Nyebe ra Dios mbaerã tuchi nderiirĩ. Dios rucucha, i ra nderiirĩ je. ³⁶ Ndesi nongue ndiirĩ abe ra tiirĩ cote. Elisabet, i equia ee nae, aque abe ra tiirĩ. Arite raque. Erie cuasu cote. Tiirĩ mbae, i mbia

quia ee nyii nae, aque ra tiirĩ cote. ³⁷ Dios quiarei mbae ao ja, i que ángel ñee María je ra. ³⁸ María que ñee ee ra. —Dios rimba chõ aico nguiã co. Sã ndecheẽ ique quia seje, i que María ra. Angel que oso erecha cote ra.

María oso Elisabet ndea

³⁹ María que oso Elisabet ndea cote ra. Ñeenda ishote que ee ra. Sita ibate bate rĩ ngue esi quia ra. Judea, i hue ibi je. ⁴⁰ María que ngasẽ Elisabet ndu chuchúaa ra. Zacarías, i equia eru je. Ique que ñee Elisabet je ra. ⁴¹ Elisabet María cheẽ andu mose, erie yenda que umi nda. Espíritu Turã ngue ique tuchi Elisabet chiangui re cote ra. ⁴² Elisabet que ñee nyecua tuchi María je ra. —Nde rese chõ Dios ia tuchi acuanĩ mo si re. Dios ia tuchi nderie yenda rese abe no. ⁴³ ¿Mbaerã Cristo si ru serea se re? Mbia rerecua eã ño se resẽ. ⁴⁴ Se ndecheẽ andu mose que serie yenda ia tuchi umi nda. ⁴⁵ Dios cheẽ ngue ereisi turã nda. Nyebe Dios iate riqui nderese co. Nyebe ra Dios cheẽ ique tuchi ndeje cote, i que Elisabet ñee María je ra. ⁴⁶ María que ñee cote ra.

Acheẽ turã mbei quia Dios rĩ co.

⁴⁷ Seya bei riqui Dios rese co.

Ae que serirõ mbae icuã si ra.

⁴⁸ Dios que nduate quia serese ra.

Seaquiata ndaque.

Nyebe ra mbia ia jate serese cote.

⁴⁹ Dios quirãcuã ngue mbae turã saã tuchi seje ra.

Ae mñi ño eturã tuchi emo si re.

⁵⁰ Ae ndua turã nguia Dios rese nae, ñquĩ ndese chõ Dios ia eã tuchi riqui nguiã.

Eĩ mbei chõ Dios nguiã mbia je co.

⁵¹ Dios quirãcuã ngue mbae saã ja ra.

Ucuasu raã naasa chõ Dios mboseĩ nguiã.

⁵² Siqui mingue je chõ Dios mñi mñi nguiã mbia rerecuarã.

Ae ererecua uaqiata saã saã nguia nae, ñquĩ ño Dios sirõ nguiã.

Ererecua eã ño ñquĩ cote re.

⁵³ Dios que mbae mee mee nguia mbaecha reã je ra.

Mbaecha quia emboochi nguiã.
⁵⁴ Dios que siqui tuchi judíos rese ra.
 Tesareiã mbei esi.
 Eyayã mbei erese no. ⁵⁵ Sã Dios ñee
 Abraham je no, ãquĩ ngue em-
 buchebiã mbei ra.
 Ae ucheẽ mondo judíos jaje nae,
 ãquĩ ngue embuchebiã mbei
 no nda,
 i que María ñee turã Dios riĩ nda.
⁵⁶ María que siqui arete Elisabet rese
 ra. Tres meses. Aquere que eru nyebi
 uchuchúaa cote ra.

Juan el Bautista nyaacuquia

⁵⁷ Elisabet rasi rasite que cote ra.
 Nyaa cuquia que cote ra. ⁵⁸ Mbia
 que nyoi ja Elisabet ndea cote ra. Ejii
 jenda. Eresenda ja. —Dios turã tuchi
 riqui ndeje co. ãquẽ mondo ndeje, i ja
 que ee ra. Eya ja tuchi que erese ra.
⁵⁹ Ocho días mose que circuncisión
 naa eriirĩ je ra. Zacarías, i nda mbia
 eriirĩ je chã nde. Eru rã si. ⁶⁰ Esi quia
 que ñee nda. —Tei. Juan nande chõ
 ee, i que esi ra. ⁶¹ Mbia que ñee esi je
 ra. —¿Mbaerã nda “Juan” ere nderi-
 irĩ je re? Juan mo eã nderesenda
 mo aa resẽ, i rei que mbia esi je ra.
⁶² Mbia que o mbaaba aba Zacarías
 je ra. —¿Mañi nda nderiirĩ je re? i
 ee. ⁶³ Zacarías que ñomee mbia je
 ra. Nyebe mbia embesa sacua mee
 nguiã ee. —Juan, i chõ seriirĩ je, i
 que Zacarías embesa ra. Mbia que
 nyuruira ja u mae erese ra. ⁶⁴ Aque
 ruibe que Zacarías ñee aquiatu cote
 ra. Ñee turã tuchi que equia Dios riĩ
 cote ra. ⁶⁵ Zacarías cheẽ andure que
 mbia nyuruira jate ndua ndua hue
 jenda ra. Nyebe mbia ñimbiirandu
 ja nguiã sita ibate bate jenda. Judea,
 i que hue ibi je ra. ⁶⁶ Ae jirandu
 quia erese, ãquĩ ngue ndua tuchi quia
 erese ra. —Mañi nda Zacarías riirĩ
 nguia reae. Nandemae nguia erese
 no, i que mbia quia ndua ndua ra.
 Dios que siqui tuchi Zacarías ndiirĩ
 ndese ra.

Zacarías ia tuchi ñee Dios je

⁶⁷ Espíritu Turã ngue siqui tuchi
 Zacarías rese ra. Nyebe Zacarías Dios
 cheẽ nenei nguiã.
⁶⁸ Sã mbia ñee turã Dios riĩ judíos rere-
 cua riĩ.
 Uturã ngue eteacuquia nande je ra.
 Nanderirõ ngue mbae icua si ra.
⁶⁹ Nanderirõ sacua nande icua si que
 Dios mondo nande je ra.
 David riirĩ nducucha que nanderirõ
 sacua nda.
⁷⁰ Sã Dios ñee cose no.
 “Mbia rirõ sacua nda ambu íbi”, i
 cose no.
 Ucheẽ nenei neneisa que em-
 buchecua mbia je cote ra.
⁷¹ “Jẽucuãyãsa si ra jendirõsa jen-
 deaquiatu bei”, i que Dios
 nande je ra.
⁷²⁻⁷³ Dios turãte que eriqui nandei
 ñiinda je ra.
 Abraham je abe que eturãte riqui ra.
 Ae Dios ñee Abraham je nyii nae,
 echeẽ ngue io cote ra.
⁷⁴ Dios que ñee Abraham je nanderiĩ
 nyii ra.
 “Taendeaquiatu jẽucuãyãsa si,
 jẽsiquicheã sacua ico mose
 serese”, i que Dios nanderiĩ
 cose ra.
⁷⁵ Nyebe ra nande ico turã mbei Dios
 je.
 Ae ra nandemingo bei icue umbaerã.
⁷⁶ Nde ra Ibatenda cheẽ esenei senei
 nguia mbia je, ãquẽ.
 Dios riirĩ ndetã nda Dios cheẽ ere-
 senei senei nguia mbia je,
 ãquẽ.
 Mbia icoquiatu sacua Dios riirĩ je.
⁷⁷ Eĩ mose ra Dios mbia rirõ
 eicua si.
 Eĩ mose ra Dios mbia icua mbutiã esi.
⁷⁸ Dios turãte quia eriqui nguiã nande
 je.
 Eriirĩ nda tu ibate si mbae
 mbuchecua nande je.
⁷⁹ Nandeaquiatuã mbaaquiatu sacua
 ño eru nguiã aque.
 Nandemingo sacua nyaashĩ naan-
 guia chõ eru nguiã aque,
 i que Zacarías ñee ãquẽ je ra. ⁸⁰ ãquẽ
 ngue tiarõ i i oso quia cote ra. Dios
 rese que eriqui i i cote ra. Siqui bei

que equia turúquiaa ra. Dios cheẽ ngue esenei senei nyee mbia je cote ra.

2

Jesús nyaacuquia

¹ Aque mose que ererecua ñee nda. Augusto, i que ee ra. —Censo nandesaã na mbia ja je, i que ra. Mbia mbae nombre mbesa mbesa ja mose, “censo” i que ùquĩ je ra. ² Censo raã namo mose rei ùquĩ. Cirenio ngue Siria jenda rerecua aque mose ra. ³ —Jenyusua sua jẽso ja pueblo. Nombre mbesa mbesa ja sacua jembae, i que ererecua mbia ja je ra. ⁴ Nyebe José choi nguiã Judea. Belén, i que sucha je ra. Belén ño David chusua re. José i chõ David re. Nyebe José choi nguiã Belén. Umbae ibi recha. Nazaret recha. Galilea abe recha no. ⁵ José que nyoĩ Belén umbae nombre mii sacua nda. María rese. María que eninisibi ra. María riote que ra. ⁶ Siqui mose Belén ngue ãquẽ ndasi rasite María je ra. ⁷ Aque ramo ngue María nguiĩ mbua ra. Ñuma ngue tiru je ra. Ticuasú quiarusa ye que eno nda. Mbia chuchua quiatu que eitãyãte ee ra.

Oveja raarõsa ngaẽ mae Jesús itãquẽ ndese

⁸ Hue jii que oveja raarõsa mo nyi isa ra. Ovejas que esarõ arõ nguiã turuquia rĩ nda. ⁹ Angel ibatenda mo ngue tu embua tuchi ra. Dios nininya tuchi que tu overja raarõsa resae ra. Nyebe siquiche tuchi nguiã esi. ¹⁰ Angel que ñee ee ra. —¿Mbaerã jẽsiquichete riqui re? Mbae turã ñi ño achu nguiã ñee jẽje co. Ae ra asenei jẽje, mbia mbia sacua tuchi chõ ùquĩ nde. ¹¹ Dios riĩĩ ngue nyaacuquia namo Belén nda. Cristo, i equia ee. Mbia rirõsa mbae icua si chõ ae re. ¹² Aque echĩ ticuasú quiarusa ye aque. Ema ji tiru je. Jemae nda erese huee. Jemae mose sechienei ndese, “Cristo chõ eriqui re”, jenyẽ ra cote, i que ángel ñee oveja raarõsa je ra. ¹³ Angeles tubiriãte que nyecua

oveja raarõsa je cote ra. Angel ñiinda ndese. Ñee turã ja que Dios rĩĩ nda. ¹⁴ Sã mbia ñee turã ja Dios ibatenda rĩĩ.

Sã Dios uquiato mbia ja ibi jenda, i que ángeles ñee nyecha ee ra. ¹⁵ Angeles que nyoĩbe ibate cote ra. Oveja raarõsa que ñee ñee nyue cote ra. —Nyaso rã Belén. Ae Dios senei senei nguiã nande je nae, nyaso rã mae erese. Ae nyaacuquia namo nae, nyaso rã mae erese, i que oveja raarõsa ñee nyue ra. ¹⁶ Nyoĩ asi tuchi que mae erese ra. Ngasẽ ngue María je ra. José abe je. Áquẽ abe je. I que ãquẽ u ticuasú quiarusa ye ee ra. ¹⁷ Oveja raarõsa que mbia mbiirandu ja erese ra. Ae ángel senei senei nguiã ee María riĩĩ ñi, ùquĩ ngue oveja raarõsa senei senei tuchi mbia je cote ra. ¹⁸ Eandusa que nyuruira ja tuchi eandu ra. ¹⁹ María que ndua ndua tuchi quia ùquĩ ja rese uchiangui re ra. ²⁰ Oveja raarõsa ia tuchi que nyoĩ nyebi ovejas je ra. Ñee turã turã tuchi que echoĩ quia Dios rĩĩ nda. —Angel que ñee nande je, echeẽ ndui si tuchi chõchĩ mbae eĩ ja, i que ñee ñee nyue ra.

Jesús ruruchoi Dios chuchúaa

²¹ Ocho días mose que circuncisión naa ãquẽ je cote ra. Jesús, i que ãquẽ je cote ra. Angel cheẽ ndui si tuchi chõ “Jesús” ichĩ ãquẽ je. Ae ángel ñee María je erio nonde nae, echeẽ ndui si tuchi chõ “Jesús” ichĩ María riĩĩ je. ²² Aquere que María ñimbitirõ Moisés cheẽ ndui si cote ra. Aquere que ãquẽ nduruchoĩ Jerusalén cote ra. Áquẽ mee sacua Dios je. ²³ Embesa ji cheẽ ndui si que ãquẽ mee Dios je ra. —Ae eriĩĩ i erãcuẽ nae, ùquĩ jemondo tuchi Dios je, i quiatu ngue embesa ji rese re. ²⁴ Jerusalén José riqui mose que sacrificio mee Dios je ra. Embesa ji cheẽ ndui si. Sã embesa ji riqui ñee

no: —Nyurusi nyeremo jemee Dios je. Ũquĩ eã mose, nyurusi ñetẽ jemee ee no ae, i que embesa ji cheẽ nda. ²⁵ Amei mo ngue siqui hue Jerusalén nda. Simeón, i que ee ra. Ae que eturã tuchi ra. Ñee mbei que equia Dios je ra. Ae que Dios riirĩ saarõ arõ tuchi quia ra. Judíos mbui sacua mbae icua si. Espiritu Turã abe que siqui Simeón ndese ra. ²⁶ Espiritu Turã nguia ñee ndei Simeón je nyii. —Eremae nda Dios riirĩ ndese. Nde-manononde ra eretea. Dios ra embu íbii, i que Espiritu Turã ñee Simeón je nyii ra. ²⁷ Espiritu Turã ngue Simeón querao Dios chuchúaa ra. Embesa ji cheẽ ndui si que José ãquẽ nduruchoi Dios chuchúaa aque mose si ra. María reses. ²⁸ Simeón ngue ãquẽ sui ra. Eya tuchi que erese ra. —¡Co chõ jẽ! i que Simeón ñee turã Dios je ra. ²⁹ Dios, ndecheẽ ngue io seje cote ra. Seyate aico co cote Sererao se cote. ³⁰ Nderiirĩ ndese que amae cote ra. ³¹ Ae erembu mbia rirõ sacua mbae icua si nae, aque rese aico mae co cote. ³² Mbia resae sacua tuchi chõ nderiirĩ ndiqui re. Judíos eã abe ra etesae tuchi. Judíos abe je ra eturã tuchi no, i que Simeón ñee Dios je ra. ³³ Simeón ñee mose María riirĩ ñii, José que nyuruira tuchi echeẽ andu ra. María rese. ³⁴ Simeón ngue ñee turã María je ra. —Nderiirĩ nda judíos tubirã mingo turã. Ae siqui sereãte quia erese, ùquĩ nguia ra emingo icua. Mbia ra ñee icua icua nguia nderiirĩ turã je. Eicua je rocoĩ. ³⁵ Ae ndua turãte quia nderiirĩ ñii nae, ùquĩ ndua ndua turã nda nyecua mbia je cote. Ae ndua ndua icua nguia, ùquĩ ndua ndua abe ra nyecua mbia je cote no. Mbia icua nda nemundite nderiirĩ ndese, i que Simeón María je ra. ³⁶ Huee que arite mo ndiqui ra. Dios cheẽ nenei neneisa que ae ra. Ana, i equia ee. Fanuel, i que eru eiruã siasa je ra. Aser, i que ei ñiinda je ra. Ana yasu mose que ngurã ndea nyii ra. Siete años que eriqui ngu rese nyii ra.

³⁷ Eru eã ngue cote ra. Eru cheecha que siqui beite ra. Ochenta y cuatro años. Dios chuchúaa que eriqui beite ra. Ñee ñee mbei Dios je. Quiaru rocoi. Isa abe. ³⁸ Ana ngue mae ãquẽ Jesús rese Dios chuchua cote ra. —¡Co chõ jẽ! i tuchi que Dios je ra. Ñee turã tuchi que ãquẽ ñii mbia jaje cote ra. Ae Dios riirĩ saarõ arõ nguia nae, ùquĩ jaje que Ana ñee turã turã ãquẽ ñii nda.

José nyebi Jesús rerao Nazaret

³⁹ José que mbae saã ja embesa ji cheẽ nguire ra. Aquere que echoi nyebi Galiléaa ra. Nazaret, i equia echuchua je. ⁴⁰ María riirĩ ngue tiarõ cote ra. Ñimbaaquiato quiato que equia coterã. Ñimbirãcuã nacuate que equia cote ra. Dios turã ngue siqui tuchi quia erese ra.

Jesús ñimbaaquiato quiato Dios chuchúaa

⁴¹ Aque tenda bei que José riqui nyoĩ choi Jerusalén nda. Fiesta de la pascua mose bei. María rese. ⁴² Jesús tiarõ namo mose, doce años mose que echoi si fiesta de la pascua mose no nda. Jerusalén. ⁴³ Fiesta ua mose que ecuaẽ ndei quia nyebi ra. Jesús que siquichõ Jerusalén nda. Jesús abe oso reĩ nguiã usi je. Ngu abe je. ⁴⁴ Jerusalén ño eriquichõ neaẽ. Mbia ataque rese eru reĩ nguiã esi je. Mbia que ngaẽ ngaẽ bei quia tenda mumba chee ra. —Ma Jesús ñii, i rei que nguesenda je ra. ⁴⁵ Tea eã mbei que ra. Erea eã mose que eru si chee nyebi Jerusalén nda. María rese. Erequia sacua huee cote. ⁴⁶ Tres días mose que erea huee cote ra. Dios chuchúaa que eriqui ee ra. Ñimbaaquiato quiato. Mbia mbaaquiatusa cheẽ andu andu que Jesús riqui ngoi huee ra. —¿Mañi equia re? Tachandu tuchi rã, i i que equia ee ra. ⁴⁷ Jesús cheẽ aracua tuchi que eriqui mbia je ra. Nyebe mbia nyuruira nguiã echeẽ aracua andu. ⁴⁸ Eru erea mose huee, ae abe que nyuruira ra. Esi abe nyuruira no. Esi que ñee ee ra. —¿Mbaerã

eresoã urerese re, Echo? Ureya eã tuchi que eriqui nderequia asi asi ra, i que María nguiirĩ je ra. ⁴⁹ Jesús que ñee ee ra. —¿Mbaerã serequia mámbii re? Paba chuchua chõ ngue aico resẽ, i que Jesús usi je ra. ⁵⁰ María que Jesús cheẽ icuayãte ra. José abe echeẽ icuayã no. ⁵¹ Jesús que oso uchuchua erese cote ra. Nazaret, i equia sucha je. Usi cheẽ ngue emumbayã mbei quia ra. Ngu cheẽ ngue emumbayã mbei quia no nda. Esi que ndua ndua bei quia ãquĩ Jesús chisaã ndese ra. ⁵² Jesús rete que siri siri oso quia cote ra. Ñimbaaracua racua que equia no nda. Dios iate que eriqui erese ra. Mbia abe iate que eriqui erese no nda.

3

Juan Dios cheẽ senei senei mbia je

¹⁻² Aquere que Dios ñee Juan je ra. Zacarías riirĩ je. Tiberio siqui bei mose mbia ja rerecuarã. Quince años ereco mose mbia rerecuarã. Poncio Pilato que Judea jenda rerecu aque mose ra. Herodes que Galilea jenda rerecu ra. Felipe que Herodes nongue ra. Felipe que Iturea jenda rerecu ra. Traconite jenda rerecu abe que Felipe no nda. Lisania que Abilinia jenda rerecu ra. Anás que sacerdote rerecu ra. Caifás abe que sacerdote rerecu ra. Ñquĩ ererecu sique mose que Dios ñee Juan je turuquia re ra. ³ Nyebe que Juan Dios cheẽ senei senei nguia mbia je ra. Ama Jordán ndurubinda jaje. Eĩ ño ngue Juan nguia ñee mbia je ra. —Jẽhui chõ jẽicuã si. Dios jẽicuã mbutiã sacua. Ñquĩ mose nda bautizar ae jẽje chã, i que Juan nguia ñee mbia ja je ra. ⁴ Isaías chimbesa io sacua ño ngue Juan Dios cheẽ nenei nenei nguia. Isaías chimbesa chõ ã nde:

Emo nda ñeemombo mombo quia mbia je turúquiaa.

“Ñeenda nandererrecua mbaerã jembuquiche.

Jẽingo quiatu nandererrecua tu nonde.

⁵ Ñeenda jembuturã turã nandererrecua mbaerã.

Ibi cuaacua jembato mbato.

Ibi ati ati jẽsimiambo ambo.

Ñeenda chaa chaa jeñeengo.

Ibi rashĩ ndashĩ jẽiti iti.

⁶ ‘Mbia mingo beisa’, i ja ra mbia ñee Dios je cote”, i ra emo nguia turúquiaa,

i que Isaías embesa cose ra. ⁷ Mbia que nyoĩ nyoĩ ja quia Juan ndea ra. Juan bautizar i sacua ee. Juan ngue ñee ee ra. —Mbei rã ño jẽingo nguia.

Mbae icua nda jeĩ jeĩ mbia je, ¿ñquĩ si jenyu quia seje co re? ⁸ Jẽ mbae icua ndecha mose Dios je, mbae turã jẽsaã saã mbei quia ee cote. “Abraham ndiirĩ nducucha chõ nande re. Nyebe ra Dios nandemingo bei” jjenyechĩ nda jẽ! Dios Abraham ndiirĩ nducucha chao arondete raque sita je. ⁹ Ira rã si chõ mbia re. Sã ira mo ia eã no. Sã ea eã maña ño no. Sã eréi chõ no. Eĩ serĩ serĩ ño Dios mbia je, mbia mbae turã naa eã mose, i que Juan ñee mbia je ra. ¹⁰ —¿Mbae rese ra ureico Dios je re? i que mbia Juan je ra.

¹¹ Juan ngue ñee ee ra. —Ndeirao nyeremo mose, enongue emondo eirao eã je. Ndechĩurã mose, emo emondo mbaecha reã je, i que Juan mbia mbaaquiato quiato ra. ¹² Impuestos isi isiquia mo abe que nyoĩ Juan je ra. Juan bautizar i sacua ee. —¿Mbae rese ra ureico ure re? i que ñee Juan je ra. ¹³ —¿Mbae ra jembatachĩ jẽ! ¡Cobrar jenye turã ño jẽ! Jẽicua quiato chõ, i que Juan ee ra.

¹⁴ Soldados mo abe que ñee Juan je ra. —¿Mbae rese ra ureico ure re no? i que soldados ñee Juan je ra. Juan ngue ñee ee ra. —¿Mbia mbae ra jẽisi chooñochoĩ jẽ! “Co que mbae icua saã nda” jjenye chooñochoĩ nda emo je jẽ! Jembae ae chõ jendeco, i que Juan ñee soldados je ra. ¹⁵ Mbia que mae quiato quiato quia Juan ndese ra. —Cristo chõ co reae, i raque mae quiato quiato erese. ¹⁶ Juan ngue ñee mbia jaje ra. —I achõ je chõ aico nguia bautizar i mbia je co. Co chi emo ndu

quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espiritu Turã je. Mbia chiã mbitirõ sacua. Sã tata riqui mbae mbitirõ no. ¹⁷ Ae ra mbia umbae miã icúe. Eturã achõ ño embae re. Ae embae eã nae, ũqui nda esei cote. Ũqui ndeisa ra ua eã mbei tata. Sã mbia quiata a chiqui chiqui no. Sã ea miã icúe no. Sã echurique mombo tátaa no, i que Juan ñee mbia je ra. ¹⁸ Eĩ ngue Juan nguia Dios cheẽ turã nenei nenei mbia je ra. Mbia mbaaquiato tuchi. ¹⁹ Ererecua Herodes je que Juan ñee nyee ra. Felipe ninisi rese siqui mose. —¿Mbaerã ereico ndenongue ninisi rese re? i que Juan ererecua je ra. —Mbae icuã eresaã saã ja techĩ nguia re, i tuchi que Juan ee ra. ²⁰ Ererecua que Juan ñee mumba bei chõ nda. Ererecua que Juan tarõ nyee cárcel nda.

Juan bautizar i Jesús je

²¹ Juan bautizar i mose mbia jaje, Jesús je abe que bautizar i ra. Jesús que ñee ñee nguia ngu je ra. Ibei que obo ee ra. ²² Espiritu Turã ngue nguichi Jesús rese ra. Nyurusĩ rã ño nguichi checua erese. Ibatenda que ñee ee ra. —Seriĩ ño nde re. Sechesequa chõ nde re. Seyate nderese, i que Ibatenda Jesús je ra.

Mbia ñiinda Jesús i

²³ Jesús treinta años mose que mbia mbaaquiato quiato ramo nda. —José riĩ, i ja que mbia Jesús je ra. Elĩ riĩ nguia José re. ²⁴ Elĩ rei Matat ndiĩ. Matat ndei Levĩ riĩ. Levĩ rei Melqui riĩ. Melqui rei Jana ndiĩ. Jana ndei José riĩ. ²⁵ José rei Matatías riĩ. Matatías rei Amós ndiĩ. Amós ndei Nahum ndiĩ. Nahum ndei Esli riĩ. Esli rei Nagai riĩ. ²⁶ Nagai rei Maat ndiĩ. Maat ndei Matatías riĩ. Matatías rei Semei ndiĩ. Semei ndei José riĩ. José rei Judá riĩ. ²⁷ Judá rei Joana ndiĩ. Joana ndei Resa riĩ. Resa rei Zorobabel riĩ. Zorobabel rei Salatiel riĩ. Salatiel rei Neri riĩ. ²⁸ Neri rei Melqui riĩ. Melqui rei Adi riĩ. Adi rei Cosam ndiĩ. Cosam ndei Elmodam ndiĩ.

Elmodam ndei Er riĩ. ²⁹ Er rei Josué riĩ. Josué rei Eliezer riĩ. Eliezer rei Jorim ndiĩ. Jorim ndei Matat riĩ. ³⁰ Matat rei Levĩ riĩ. Levĩ rei Simeón ndiĩ. Simeón ndei Judá riĩ. Judá rei José riĩ. José rei Jonán ndiĩ. Jonán ndei Eliaquim ndiĩ. ³¹ Eliaquim ndei Melea riĩ. Melea rei Mainán ndiĩ. Mainán ndei Matata riĩ. Matata rei Natán ndiĩ. ³² Natán ndei David riĩ. David rei Isai riĩ. Isai rei Obed riĩ. Obed rei Booz riĩ. Booz rei Salmón ndiĩ. Salmón ndei Naasón ndiĩ. ³³ Naasón ndei Aminadab riĩ. Aminadab rei Aram ndiĩ. Aram ndei Esrom ndiĩ. Esrom ndei Fares riĩ. Fares rei Judá riĩ. ³⁴ Judá rei Jacob riĩ. Jacob rei Isaac riĩ. Isaac rei Abraham ndiĩ. Abraham ndei Taré riĩ. Taré rei Nacor riĩ. ³⁵ Nacor rei Serug riĩ. Serug rei Ragau riĩ. Ragau rei Peleg riĩ. Peleg rei Heber riĩ. Heber rei Sala riĩ. ³⁶ Sala rei Cainán ndiĩ. Cainán ndei Arfaxad riĩ. Arfaxad rei Sem ndiĩ. Sem ndei Noé riĩ. Noé rei Lamec ndiĩ. ³⁷ Lamec ndei Matusalén ndiĩ. Matusalén ndei Enoc ndiĩ. Enoc ndei Jared riĩ. Jared rei Mahalaleel riĩ. Mahalaleel rei Cainán ndiĩ. ³⁸ Cainán ndei Enós ndiĩ. Enós ndei Set riĩ. Set rei Adán ndiĩ. Adán ndei Dios riĩ.

4

Satanás tã i Jesús je

¹ Jesús que nyebi Ama Jordán si ra. Espiritu Turã ngue siqui tuchi quia erese ra. Turúquiaa que Espiritu Turã Jesús rerao ra. ² Huee que eriqui arete ra. Cuarenta días. Mbae mo ngue eu eã mbei aque mose ra. Eriãcuãte que cote ra. —Tã tae rã Jesús je. Ma Jesús mbae icuã naa, i rei que diablo Jesús rĩ nda. ³ —Nde Dios riĩ mose, mbichae esaã co sita je no, i rei que diablo Jesús je ra. ⁴ Jesús que ñee ee ra. —Tei. Eĩ ngue embesa ji ñee nda: “Mbia chiũ achõ nda mbia mingo eã. Dios cheẽ nguia ra mbia mingo nguã”, i que embesa ji ra, i que Jesús diablo je ra. ⁵ Aquere que diablo Jesús rerao ibi ibate mo nda. Ibate tuchi. Diablo que ibi teacuquia

ja Jesús je ra. Ishonda abe reacuquia ja ee. Aque mose bei que ereacuquia ja ee ra. ⁶⁻⁷ Diablo que ñee Jesús je ra. —Sembae ja chõ ibi re. Se emondose mose emo je, amondo ra ee. Tamondo tuchi ndeje. Mbia ja rerecuarã nda aremii. Ndeico mose serese, tamondo ja ndeje. Serimbarã mose nde, tamondo ja ndeje no, i rei que diablo ñee Jesús je ra. ⁸ Jesús que ñee diablo je ra. —Quiatúae sesi ae, Satanás. ¿Mañi nda nderimba se re? “Dios ae rese chõ jëingo”, i que embesa ji ñee ndesê, i que Jesús diablo je ra. ⁹ Aquere que diablo Jesús rerao Jerusalén nda. Querao que suruchui ibate Dios chuchua arõ nda. Ibate tuchi echuchua. —Nde Dios riirĩ mose, eo oso íbii. Dios ra ndereaquiato. Eremanoã nda oso ngoi. ¹⁰ Sã embesa ji riqui ñee no: Dios ra ángeles mondo ndereaquiato sacua.

¹¹ Oje ra ndeisi.

Nembuquichi mingue rae.

Sita ra cua iã ndei je,

i que embesa ji ra, i rei que diablo Jesús je ra. ¹² Jesús que ñee diablo je ra. —Sã embesa ji ñee no: “Ma Dios sereaquiato. Tã tae ee no’, jenyechĩ nda Dios je”, i ñi Dios cheẽ nde, i que Jesús ñee diablo je ra. ¹³ Diablo Jesús mbiãcuã aronea mose, secha chee que oso ra. —Emo mose jiri ra tã aebe ndeje jẽ, i rei que uchiangui re ra.

Jesús mbia mbaaquiato quiato ramo

¹⁴ Jesús que oso nyebi Galiléaa cote ra. Espiritu Turã quirãcuã ngue siqui tuchi quia erese ra. Mbia hue jenda ja que jirandu ja tuchi quia erese ra. ¹⁵ Judíos chumunuásaa que Jesús riqui mbia mbaaquiato quiato ra. Mbia que ñee turã ja quia erĩ nda.

Nazaret jenda Jesús isiteã

¹⁶ Jesús que ngasẽ Nazaret cote ra. Hue rei etiarõsa hue. Sábado mose que esi judíos chumunuásaa ra. Sábado mose bei que eriqui oso oso huee ra. Juã ngue embesa ji renei nonde mbia je ra. ¹⁷ Mbia que Isaías chimbesa mondo Jesús oo ra. Isaías

chimbesa que eequia cote ra. ã embesa ji que esaã saã mbia je ra:

¹⁸ Espiritu Turã ndiqui tuchi serese co. Dios que sererecúe ra.

Echeẽ turã nenei nenei sacua mbaecha reã je.

Etarõi mbusẽ sacua ño ngue Dios sererecúe ra.

Eresayã ndesa ira sacua ño ngue sererecúe no nda.

Ae je ererecua icuãte riqui nae, ùquĩ mbusẽ sacua ño ngue Dios sererecúe nguiã no.

¹⁹ Mbia je ñee ñee sacua ngue Dios sererecúe no nda.

“Namo ño Dios turã ndiqui nguiã”, i sacua mbia je,

i que Jesús embesa ji mbuchecua mbia je ra. ²⁰ Jesús que embesa ji mumbi cote ra. Mondo que emo oo cote ra. Ngoi que cote ra. Mbia que mae mbei quia erese ra. ²¹ Jesús que ñee mbia je ra. —Embesa ji que ambuchecua jẽje namo, aque io quia jẽje a cote, i que Jesús mbia je ra.

²² Mbia que ñee turã ja quia Jesús rĩ nda. —Jesús cheẽ turã tuchi quia eriqui re, i ja tuchi que mbia nyuruira ra. —¿José riirĩ ño co re? i que mbia quia ee ra. ²³ Jesús que ñee mbia je ra. —“Mbia mae sayã ngue eresaã saã Capernaum nae, ùquĩ mo esaã aa ndechuchúaa no”, jenyẽ arõte seje sechuchúaa. ²⁴ Tacheẽ nyecua rã jẽje. Dios cheẽ mbuchecuasa ishonda cheẽ nguia ra mbia isi turã mbei quia. Nguécua jenda cheẽ nguia ra eisi turã eã. ²⁵ Tacheẽ nyecua rã jẽje. Elías reco mose íbii, ama ngue nyaaquã mbei ra. Tres años ndobei. Mbia riãcuã ja que aque mose ra. Eru cheecha tubiriãte que chi rei hue Israel jenda ra. ²⁶ “Ùquĩ eru cheecha mo je mbae echao turã”, i ãte que Dios quia Elías je ra. “Sarepta jenda je quia mbae echao eru cheecha je”, i quiato que Dios ee ra. Judío eã je quiato que Dios Elías mondo ra. ²⁷ Eliseo reco mose íbii, leprosos tubiriãte que chi rei hue Israel jenda ra. Eliseo que hue jenda mo mbucheroã no nda. Ishonda mo nguia tu que embucherõ Siria jenda

ra. Naamán, i que ee ra, i que Jesús ñee mbia je ra. ²⁸ Judíos chumunuasa que Jesús riqui ñee mbia je ra. Mbia Jesús cheẽ andu mose que paama i ee ra. ²⁹ Mbia paama i je que Jesús mombo sucha tubiriã si ra. Sita ibate que sucha tubiriãte ra. Sita rimia mbucu que mbia Jesús rerao rei ra. Hue si nda emombo nguiã ña. ³⁰ Jesús que oso chee mbia tubiriã ite re si ra.

Jesús aba checuayã icuã jea amei mo si

³¹ Jesús que oso Capernaum cote ra. Sucha tubiriã mo. Galilea jenda. Sábado mose que mbia mbaaquiato quiatu ra. ³² Ererecua rã ño ngue Jesús riqui mbia mbaaquiato quiatu ra. Nyebe mbia riqui nguiã nyuruira tuchi echeẽ andu. ³³ Huee que amei mo ndiqui mbia chumunuásaa ra. Aba checuayã icuã nyireco rei ae. Aque que ñee asite Jesús je ra. ³⁴ —¿Mbaerã erechu quia urerea co re, Jesús? Quiatúae urerecha ae. ¿Ure-riicharã ño erechu quia co re? Dios rucucha chõ nde re. Areicuate se, i rei que aba checuayã icuã Jesús je ra. ³⁵ Jesús que ñee ee ra. —Equiriri chõ jẽ. Esẽ oso amei ñiangui si, i que Jesús ee ra. Jesús cheẽ mose que aba checuayã amei mombo íbii ra. Mbia tubiriãsaa. Usẽ ngue u amei mbasiã cote ra. ³⁶ Mbia tuririã ngue nyuruira ja u erea ra. —Jesús quirãcuã ae ñee nguiã. Mbia rerecua rã ño eriqui nguiã ñee aba checuayã icuã je. ¡Sã aba checuayã echeẽ mumbayã jẽ! i tuchi que mbia nyuruira erea ra. ³⁷ Mbia que ñimbiirandu randu ja Jesús rese ra. Erurubinda jenda abe jirandu ja erese.

Jesús Simón ninisi si mbucherõ

³⁸ Jesús que usẽ mbia chumunuasa si cote ra. Oso que ique Simón nyuchua cote ra. I que Simón nyari rasi u ee ra. Eracu tuchi que ee ra. —Embucherõ na, i tuchi que mbia Jesús je ra. ³⁹ Jesús que oso nyibi earõ nda. Ñee ngue eracu je ra. —Etiba, i que ee ra. Eracu que hui esi Jesús cheẽ

nguire ra. Ari que juã cote ra. Mbae que echao chao mbia chiurã cote ra.

Jesús mbia rasi chumumbara mbucherõ

⁴⁰ Tenda ireĩ mose que mbia nguesenda rasi rurucuaẽ cuaẽ ja Jesús je ra. Erasi chumumbara tuchi que ra. Jesús que o chono ñono ja erasi arõ embucherõ cherõ ja ra. ⁴¹ Aba checuayã icuã ngue usẽ usẽ nguia mbia si Jesús cheẽ mose cote ra. —Nde rei Cristo Dios riirĩ, i que usẽ usẽ mbia si ra. —¡Jẽñee eã ño jẽ! i tuchi que Jesús quia aba checuayã icuã je ra. Ũquĩ ngue Cristo icua chõ nda.

Jesús mbia Galilea jenda mbuchesea sea

⁴² Nyaashĩ namo mose que Jesús si turuquia a. ra. —Se ae taico mbirĩ na, i rei que ra. Mbia que nyoĩ erui erea chee ra. —¡Eresochĩ nda ure-rea jẽ! Ure rese bei chõ eico, i rei que mbia ñee Jesús je ra. ⁴³ Jesús que ñee ee ra. —Dios cheẽ tasenei senei pe quitinda je abe. Nyebe sembu nguiã, i que Jesús ra. ⁴⁴ Jesús que mbia mbuchesea sea quia Galilea jenda ra. Dios cheẽ nenei nenei judíos chumunuásaa.

5

Jesús sira tubiriã mbua uquia mbia je

¹ Emo mose que Jesús riqui ama ndisha rimia ndese ra. Genesaret, i que ama ndisha aque je ra. Mbia cuabẽ ngue ngaẽ ee huee ra. Dios cheẽ anduse rete que ra. Nyebe mbia tubiriã Jesús mumbi i i tuchi nguiã. ² Canoa nyeremo abe que chi hue erimia ndese ra. Eoreã ja que ra. Echa que chi sira mbuasa irei irei ra. ³ Jesús que ua canoa nongue ye ra. Simón mbae que aque canoa nda. —Ama nimia ndecha jiri sererao mingo, i que Jesús Simón je ra. Canoa ye que Jesús ñi erimia ndesenda mbaaquiato quiatu ra. ⁴ Mbia mbaaquiato jare que ñee Simón je ra. —Eriquiraasa rĩ canoa jendao. Huee tarafa jemondo ii. Sira mbuasa

jemondo ii, i que Jesús ee ra. ⁵ Simón ngue ñee ee ra. —Nyaashĩ nyee que ureico rei embuasa rerequia isa ra. Emo ngue uresiroã mbei ra, Sererecua. Ma ndecheende tasaambe no, i que Simón Jesús je ra. ⁶ Mbia que tarafa mondo ii cote ra. Sira tubiriã mbua nonde. Tarafa soro serĩ sira usi je. ⁷ Nyueru eru que canoa nongue yenda je ra. —Sira usite ure je. Jenyu rã. Nandembua ja rã canoa ye, i que canoa nongue yenda je ñee nda. Canoa nyeremo puk i ja sira je. Aete ñĩmi sira usi je. ⁸ Sira tubiriãchĩ sira eande nyii. Nyebe Simón Pedro nyuruira tuchi nguiã mae Jesús chimondo rese. Ngoi que ngũĩã ndese ñee ee ra. —Seicuãte aico co, Sererecua. Serecha rei se ae, i rei que Simón Pedro ñee Jesús je ra. ⁹ Echiã nguia cuaãcuã i tare nguiã. Eresenda abe chiã cuaãcuã i ja. Sira tubiriã ndea. Sira mbua eande nyii. ¹⁰ Zebedeo riirĩ abe que chi ja Simón ndese huee ra. Jacobo, i que enongue je ra. Juan, i que enongue je no nda. Ũquĩ chiã abe que cuaãcuã i ra. Jesús que ñee Simón je ra. —¡Eresiquichechĩ nda jẽ! Sira rese ra ereicoã cote. Mbia ra ereru reru bei quia seje cote, i que Jesús ee ra. ¹¹ Canoa yenda ngasẽ mose ama nimíaa, umbae que esecha ja nyoi bei nonde Jesús rese cote ra.

Jesús mbia leproso mbucherõ

¹² Jesús que siqui tuchia mo nda. Hee que emo ndasi riqui ee ra. Leproso. Jesús rese mae mose que ngoi ngũĩã ndese ee ra. Nyibi que ñee Jesús je ra. —Sererecua, nde sembucherõse mose, sembucherõ se, i que leproso ñee Jesús je ra. ¹³ Jesús que oco erese ra. —Echerõ cote, i que ee ra. Echeẽ mosebe que nyerõ nda. ¹⁴ Jesús que ñee ee ra. —¡Erecheẽchĩ nda mbia mo je jẽ! Eso nderasiã ndeacuquia sacerdote je cote. Moisés cheẽ ndui si mbae mo emondo Dios je. Eĩ nda mbia jirandu nderasiã ndese cote, i que Jesús ñee ee ra. ¹⁵ Mbia que ñimbiirandu i i tuchi quia Jesús rese ra. Ngaẽ ngaẽ ja que equia echeẽ andu ra. Umbucherõ cherõ

sacuã abe que eriqui ngaẽ ngaẽ erea ra. ¹⁶ Jesús que oso oso quia mbia tiãmbaa ra. Ñee ñee Dios je.

Jesús emi sayã mo mbucherõ

¹⁷ Emo mose que Jesús riqui mbia mbaaquiato quiato ra. Huee que fariseos mo nyi echeẽ andu andu ra. Embesasa abe que chi ra. Galilea jenda chõ ũquĩ nde. Judea jenda abe no. Jerusalén jenda abe no. Huee que echi ja Jesús cheẽ andu ra. Dios quirãcuã ngue siqui tuchi Jesús rese ra. Erasi mbucherõ cherõ sacuã. ¹⁸ Mbia que erasi mo curucuaẽ quisa ye ra. Emi sayã ngue ae ra. —Nandemingue serao Jesús je, i rei que ra. ¹⁹ Tuchua mbaranguiatuãte que ee ra. Mbia tubiriã ngue tuchia mbitãyã ee ra. Nyebe erasi ruruchoi nguiã sui tuchia arõ. Tei que endoro ra. Erasi que embuquichi imbu quisa ye Jesús rimbe ra. Mbia ite rĩ. ²⁰ —Ererucuaẽsa riqui seicua ũquĩ, i que Jesús ñee uchiangui re ra. Nyebe ñee nguiã emi sayã je. —Ndechisaã mbae icuã ambutiã nguiã ndesi co, i que Jesús ee ra. ²¹ Fariseos que ñee ñee nyue ra. Embesasa rese. —Jesús ñee icuã ñochĩ nguiã Dios rĩ co. Dios ibatenda ae mbia chiao icuã mbutiã nguiã esi. Jesús aquiatuã ño ñene, i rei que eu ñee ñee nda. ²² Jesús que ũquĩ ndua icuã icuate ra. Nyebe ñee nguiã ee cote. —¿Mbaerã jẽingo ndua icuã nde? ²³ ¿Ma mbaranguiatuã eã jiri jẽje re? ¿Mbia icuã mbutiã ere? ¿Mbia rasi mbucherõ ere no? ¿Ma mbaranguiatuã eã jiri ũquĩ jẽje re? ²⁴ Dios riirĩ ndei se. Mbia chiao icuã mbutiã aquiato chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra. ²⁵ Jesús cheẽ ndurucha reã ngue emi sayã juã nda. Mbia que mae ja tuchi u erese ra. Uquisa abe que equerao ra. Eya tuchi que oso uchuchúaa ra. Ñee ñee turã ngue equia Dios rĩ nda. ²⁶ Mbia que nyuruira ja u mae emi sayã ngata rese ra. —Emi sayãte rei

nyii. Ngata chõchĩ cote, i ja que mbia u mae nguiatu erese ra. Mbia ñee turã ja Dios rĩĩ cote.

Serui bei eico, i Jesús Leví je

²⁷ Leví, i que emo je ra. Ae que impuestos isi isi bei quia ererecua mbaerã nda. Jesús que ngasẽ ee emo mose ra. Huee que eñi ngoi plata isi isi ra. —Serui bei eico, i que Jesús ñee ee ra. ²⁸ Ae Leví juã oso nguiã Jesús rui. Mbae recha ja umbae. ²⁹ Leví que fiesta saã tuchi Jesús je ra. Embuquiaru turã sacua uchuchua. Impuestos isi isiquia ata que chi quiaru erese huee ra. Mbiamo abe que chi no nda. ³⁰ Fariseos que ñee icuãte Jesús chimbbaaquiato je ra. Embesasa rese ñee icuã ee. —¿Mbaerã jẽingo quiaru impuestos isi isiquia rese re? Mbia icuã ndese abe jẽingochĩ nguiã quiaru, i que ñee nda. ³¹ Jesús que ñee ee ra. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. ³² “Jenyu seje”, aeã ngue u nguiã mbia turã je. Mbia icuã je chõ ngue achu nguiã “jenyu seje” i. “Jẽicuã si jẽhuĩ”, ae chõ ngue u nguiã eicuã je, i que Jesús ee ra.

Jesús chimbbaaquiato hui ãte uchũu si

³³ Mbia que ñee Jesús je ra. —Juanñimbbaaquiato hui hui uchũu si. Ñee nonde Dios je. Fariseos chimbbaaquiato abe hui hui uchũu si no. ¿Mbaerã ndechimbbaaquiato riqui hui ãte uchũu si re? i que mbia Jesús je ra. ³⁴ Jesús que ñee ee ra. —Sã emo ngũinisirã isi ramo mose no. Sã eresenda iate riqui quiaru erese no. Sã hui aroneate uchũu si aque mose no. ³⁵ Sã eru riqui mano emo mose no. Aque mose quia ra equiatio hui uchũu si cote, i que Jesús ñee ee ra. ³⁶ Jesús que ejemplo saã mbia je ra. —Sã emo ndiqui tiru yasu mii aroneate tiru ima sorei rese no. Ñquĩ mose eicuãte cote. Eyasu ra quiata chõ esi. ³⁷ Sã emo eri rasi ramo nderecoquiato eã eriru ima ye no. Mbae ire ima ye erecoquiato

aronea. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiicuãte ra cote. ³⁸ Eri yasu quia nda equerecoquiato nguiã mbae ire yasu ye. Soroã sacua. ³⁹ Emo eri ima mbei mose, eyasu ra embei sereã cote. “Eima ño eturã nde”, i chõ nguiã cote. Nyebe mbia riqui nguiã secheẽ yasu isi sereãte, i que Jesús ñee mbia je ra.

6

Jesús chimbbaaquiato mbae a ishao shao sábado mose

¹ Sábado mo mose que Jesús si quia mbiaco ite rĩ nda. Uchimbbaaquiato rese. Echimbbaaquiato que quiata a ucua mii mii nyoĩ quia ecuã mose ra. Equiti quitire oo je que echoi quia eachãaña cote ra. ² Fariseos mo ngue ñee ee ra. —¿Mbaerã jẽingo mbae ishao shao sábado mose re? Co mose chõ mbia uquenea ucua resẽ, i que fariseos ee ra. ³ Jesús que ñee ee ra. —¿Embesa ji rese jemaẽ eã David rĩĩ nde? David riãcuãe que aque mose ra. Eresenda abe riãcuã ngue aque mose ra. ⁴ David que ique Dios chuchúaa ra. Mbichae Dios chuchua jenda que eu ra. Mee mee ngue nguesenda je ra. Eriãcuãte quia ñene. Sacerdote achõ mbaerã ndaque mbichae. ⁵ Sábado rerecua bei chõ se re, i que Jesús ñee fariseos je ra.

Jesús eo tomei mo mbucherõ

⁶ Sábado nongue mose que Jesús si judíos chumunuasa ra. Mbia que embbaaquiato quiato huee ra. Huee que eo tomei mo ndiqui ee ra. Equiatio cutinda tomei ngue ra. ⁷ Fariseos que mae nguiato quia Jesús rese ra. Embesasa abe que mae nguiato quia erese ra. —Mañi nda Jesús quia eo tomei je reae. Co sábado mose reae. Sã embucherõ jẽ. Nandechẽ icuã nda ee chã jẽ, i que eu mae nguiato Jesús rese ra. ⁸ Ñquĩ ndua icuã ngue Jesús icua ra. Ñee ngue eo tomei je cote ra. —Ehuã na u mbia ite rĩ, i que Jesús ee ra. Eo tomei ngue juã uã cote ra. ⁹ Jesús que ñee mbia je ra. —¿Mbae

eturâte jêje co tenda mose re? Sábado mose bei. ¿Coche mbae turã naa naa sábado mose re? ¿Coche mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. ¹⁰ Jesús que mae mbia ja rese cote ra. —Echomee secuti, i que eo tomei je cote ra. Eo tomei ngue ñomee Jesús cheẽ mose ra. Aque mosechi que eo nyerõ cote ra. ¹¹ Nyebe fariseos paama i tuchi nguã Jesús je. Sábado mose mbia mbucherõ mose. —¿Mañi nande ra Jesús je re? Nandeiquia chõ nda reae, i tuchi que eu ñee nyue ra.

Jesús mbia doce irabo uchimbaaquiatu chõ

¹² Jesús que oso mbia tiámbaa ra. Sita ibátee. Huee que eñi ñee mbei Dios je nyaashĩ nyee ra. ¹³ Nyaashĩ mose que uchimbaaquiatu munua ja cote ra. Ñquĩ doce mo ngue eirabo ra. —Sechimondo sacuã jẽ. Jaemondo ra secheẽ nenei nenei sacuã mbia je, i que ñquĩ doce je ra. ¹⁴ ã mbia que eirabo ra:

Simón (Pedro, i abe que ee ra.)

Andrés (Simón nongue rei ae.)

Jacobo

Juan

Felipe

Bartolomé

¹⁵ Mateo

Tomás

Jacobo (Alfeo riirĩ ndei ae.)

Simón el Cananista

¹⁶ Judas (Jacobo nongue rei ae.)

Judas Iscariote (Aque que Jesús mondo mbia icuã je ra.)

Ñquĩ ja que Jesús irabo ra.

Jesús mbia tubiriã mbaaquiatu

¹⁷ Jesús que nguichi u sita si cote ra. Uchimbaaquiatu rese. Ibi túraã ngue ecuaẽ ngasẽ cote ra. Mbia tubiriãte abe que chi huee ra. Judea jenda. Jerusalén jenda abe no. Tiro jenda abe no. Sidón jenda abe no. Ama nimia jenda rei ñquĩ. Ñquĩ ngue ngaẽ nyiisaquia Jesús cheẽ ndese ra. Jesús embucherõ abe sacuã ngue ecuaẽ nda. ¹⁸ Ae rese aba checuayã

icuã ndiqui nae, ñquĩ abe que Jesús mbucherõ nda. ¹⁹ Jesús quirãcuã ngue mbia mbucherõ ja quia ra. Nyebe mbia riqui nguã ocose ja Jesús rese.

Ae eyate riqui

²⁰ Jesús que mae uchimbaaquiatu rese ñee nonde ee ra. —Jeyate riqui ã. Jẽ mbaecha reã ndaque. Dios quiatu ra jendrecuarã tuchi cote. ²¹ Jẽyate riqui ã. Jeniãcuã ndaque. Jendio rete ra cote. Jẽyate riqui ã. Jenyeseo seo raque. Jẽiquia iquia ra emo mose cote. ²² Mbiam jemo ucuãyã mose, jemo mombo mose, ñee icuã mose jêje serĩ, jẽyate jẽingo ñquĩ. ²³ Jenĩmbia tuchi chõ aque mose. Mbiam icuã mose jêje. Dios quia ra mbae turã mondo jêje ibate. Mbiam icuãde jêje nyii. Eĩ si que mbiam icuã nguia Dios rimba ñiinda je no nda.

Ae aba mbia eãte quia

²⁴ Aba mbia eã tuchi chĩ jẽ, Mbaecha. Mbae icuã nda tu jêje. Jẽyare nyii. ²⁵ Aba mbia eã tuchi chĩ jẽ, quiaru tuchi je. Jeniãcuã tuchi ra cote. Aba mbia eã tuchi chĩ jẽ, iquia iquia je. Jenyeseo ra cote. ²⁶ Aba mbia eã tuchi chĩ jẽ mbia ñee turã mbei mose jeni. Eĩ si rei que equia ñee turã turã dios abareã nimba je cose ra.

Jẽingo turã ño nguia jẽucuãyãsa je

²⁷ Aico ñee jêje a. Ae eicuãte riqui jêje, ñquĩ ndese jenyesequa chõ. Jẽingo turã ño nguia jẽucuãyãsa je. ²⁸ Emo ñee icuã mose jeje, jeñee turã ño ee. Jeñee turã ño Dios je erĩ. ²⁹ Emo ucuã mose jenditii rese, “tasaã se abe”, jenyechĩ ndae. Jenditii ribisho abe jẽteacuquia ee. Emo jẽirao rirõ mose jẽsi, jẽirao nongue abe rese jengueteã eã ño ee. ³⁰ Emo ache ache i mose jêje, jemondo chõ ee. Emo jembae reraochõ mose, “emondobe seje”, jenyechĩ nda ee. ³¹ Sã jẽyate riqui mbiam siqui turã mose jêje no. Eĩ jenyese si chõ nguia siqui turã mbiam je no.

³² Ae eicuãte riqui jêje nae, ñquĩ ndese jenyesequa chõ. Ae nyesequa

quia jendese nae, ũquĩ mii ndese jenyesequa mose, eicuãte ũquĩ. Mbia ja rese quiatu jenyesequa. ³³ Jẽingo turã nguiatu quia mbia ja rese. Ae eturã ndiqui jẽje, ũquĩ mii ndese jẽingo turã mose, eicuãte ũquĩ. Jesús quiatoã abe chee siqui turã uquiato je. ³⁴ Emo prestar i mose jembae je, jemondo chõ ee. Ae mbae mondo aroneate eribishorõ nae, jemondo bei chõ ee. “Cobrar tae ee”, jenyechĩ ndae. Jesús quiatoã abe chee mbae mondo eribishorõsa je. “Mbae mo nda emondobe seje”, i. ³⁵ Eĩ jenyechĩ nda jẽ abe. “Mbae mo nda emondobe seje chã” jenyechĩ nda jẽ abe jẽ! Jemondochõ ño ee. Ae eicuãte riqui jẽje, ũquĩ ndese jenyesequa chõ. Ũquĩ mose ra Dios mbae mee tuchi jẽje. Dios rã tuchi ra jẽ cote. Dios ia eãte quia eriqui nguiã eicuã ndese. Dios turãte quia eicuã je re. Eicuã ñee turã eã ndaque ee. ³⁶ Jẽyayã ño mbia rese. Sã Dios abe eya eãte nanderese no.

“Eicuãte que co ra”, jenyechĩ nda emo nii

³⁷ “Co que eicuãte ra”, jenyechĩ nda emo nii. “Jẽicuãte”, iã nda Dios jẽje chã. ¡Condenar jenyechĩ nda emo je jẽ! Dios nda condenar iã jẽje chã. Emo icuã mose jẽje, jẽtesarei chõ eicuã si. Dios nda tesarei jẽicuã si no ña. ³⁸ Mbae jemee mee ño mbia je. Dios quia ra mbae mee tuchi jẽje cote. Mee turã nda jẽje. Eñetẽ nda emee eã jẽje. Embisẽ ño nda emee jẽje. Jẽ embisẽ mee mose emo je, Dios ra embisẽ mee jẽje no, i que Jesús mbia mbaaquiato quiatu ra. ³⁹ Jesús que ejemplo saã mbia je ra. —Sã eresayã ja nyiruchoi aronea no. Ngoi ja chõ nda echoi ibicua rie. ⁴⁰ Embaaquiatusa quiarei earacua tuchi uchimbaaquiato si. Embaaquiato ja ji mose, earacua tuchi cote. Umbaaquiatusa rã si cote. ⁴¹ ¿Mbaerã nda “eicuã” jenyemo je re? Jẽ jẽicuã tuchi mose esi. “Mbae ñetẽ ndiqui nderesaa aque”, jenyechĩ nda emo je. Mbae cuasu siqui mose jendésaa jẽ quiatu. ⁴² “Mbae turã ndese chõ jẽingo”,

jenyechĩ nda jẽingo icuã mose jẽ. Jẽturã nda jẽsaã ñooñochoĩ jẽ. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jẽ. Jẽ nane nguia jẽturã ndiqui. Aquere quiatu jeñee emo mingo turã cote.

Sã ira ae ia ae ae no

⁴³ Ira turã mose, ea abe turã ndae. Ira icuã mose, ea abe icuã ño nda eno. ⁴⁴ Sã ira ae ea ae ae no. Higo a rã eã nda nyu a no. Ea ae eno nde. Uva a rã eã nda isio rashĩ a no. Ea ae eno nde. ⁴⁵ Eĩ si chõ mbia no nde. Mbia turã nda ñee turã. Echiangui renda quia eturãte re. Nyebe eriqui nguiã ñee turã. Mbia icuã nda ñee icuã no. Echiangui renda quia eicuãte riqui nguiã. Nyebe eriqui nguiã ñee icuã. Nandechuru achõ ñee eã nguiã. Nandechiangui renda quia ñee nguiã.

Tuchua nyeremo

⁴⁶ “Sererequa” jenyemo chõchĩ seje secheẽ mumba mumbare. ⁴⁷ Ae siqui serese secheẽ mumbayã nae, eturã tuchi chõ ũquĩ nde. ⁴⁸ Sã emo uchuchuarã ao no. Sã ibi ribicoi tuchi no. Sita je ngasẽ nyee. Sita arõ tuchua ao cote. Nyebe echuchua atãte riqui nguiã. Ama ndicuasuu mose, iãcuã irãtã ndaque echuchua ite rĩ. Tuchua mbuquiata aroneate iãcuã irãtãte raque. Sita arõ nguia ngue uchuchua ao nguiã. Eĩ si chõ secheẽ mumbasa reã nde. Tuchua atã aosa rã si. ⁴⁹ Sã emo uchuchuarã ao no. Aque quiarei ibi ribicoi tuchiaã. Ibi arõchi chõ uchuchua ao nguiã. Iãcuã ngasẽ mose aque chuchua, mbucoi asi que mondo ra. Eĩ si chõ secheẽ mumbasa re. Ae uchuchua saã ibi arõchi nae, aque rã si chõ ñene, i que Jesús ra.

7

Jesús soldados rerequa rimba mbucherõ

¹ Jesús cheẽ ngue tiba mbia je cote ra. Oso que Capernaum cote ra. ² Soldados rerequa mo ngue siqui hue ra. Capitán ngue ae ra. Roma jenda que ae ra. Aque rimba rasi que chi hue erese ra. Ebite que erimba ra. Erimba rasi tuchi. Mano serĩte

que equia ee ra. ³ Capitán ngue jirandu Jesús rese cote ra. Ñee ngue judíos ramei je ra. —“Echu serimba mbucherō’, i que capitán ñee ndeje ra”, jenyee oso Jesús je, i que capitán nda. ⁴ Judíos ramei ngue ngasē Jesús je ra. —Capitán nimba embucherō na oso ee. Capitán turâte quiatu ngue eriqui nguiã ure je. ⁵ Nandequiato turã tuchi que aque ra. Judíos quiato ja. Urechumunua nua sacua ngue ae chao tuchia ra, i que amei ñee Jesús je ra. ⁶ Jesús que oso amei ndese ra. Capitán nyuchua rurubi mose que capitán uquiato mo mondo Jesús robeishĩ nda. —Seicuãte se, Jesús. Sechuchua ra ereiquechĩ. ⁷ Nyebe se asoã nguiã nderea. Ndecheẽ achõ je chõ nda serimba erembucherō. ⁸ Se abe sererecua no nde. Se echeẽ amumba aroneate. Soldados rerecua se no nde. Secheẽ abe emumbayã nguiã no. Eso, i mose, secheẽ mumbayã no. Echu, i mose, secheẽ mumbayã no. Se ñee mose serimba je, secheẽ mumbayãte no. Ndequirãcuã na eãte raque se, i que capitán ucheẽ mondo Jesús je ra. ⁹ Echeẽ andu mose que Jesús nyuruirate ra. Uba que ñee nguesenda je ra. —Tacheẽ nyecua jėje. Capitán seicua tuchite quia co. Israel jenda mo embuchechea aroneate quia co, i que Jesús ra. ¹⁰ Capitán nyimondo que nyebi nyoĩ uchuchúaa cote ra. Erimba mbucherō ji que ee cote ra.

Jesús eru cheecha riirĩ ndaaque mbuquera

¹¹ Isamami ngue Jesús choi quia Naín cote ra. Echimbaaquiato abe que nyoĩ quia erese ra. Mbia tubiriãte que nyoĩ quia erese ra. ¹² Sucha ata rurubi mose que ngasē mbia tubiriã je ra. I que eraaque ruruchoi quia etã sacua nda. Aque mi tuchi rei ngue cuña ndiirĩ mo nde. Eru cheecha riirĩ. Aque que mano ño ee ra. Hue jenda mbia que nyoĩ jate quia esi rese ra. Eraaque rui. ¹³ Jesús que mae esi nyeseo rese ra. Jesús ia eãte que erese ra. —¡Echeseo eã ño jē! i que ee ra. ¹⁴ Jesús que oco eraaque rese

ra. Eruruchoisa que tiba ee cote ra. —Echuruã, Acuanĩdu, i que ñee eraaque je ra. ¹⁵ Eraaque que nyuruã ñee cote ra. Jesús que embuquera ji mondo esi je cote ra. ¹⁶ Mbia que nyuruirã ja erea ra. Ñee turã ja Dios riĩ. —Dios chimondo chõ co re, i que mbia quia ñee Jesús riĩ nda. —Dios riqui tesareiã nande si co, i que mbia quia nyue ra. ¹⁷ Jesús chumbucherō ndese que mbia riqui ñimbiirandu jate ra. Judea jenda jirandu ja erese. Erubeinda ja abe que jirandu erese ra.

Juan el Bautista mbia mondo ñee Jesús je

¹⁸ Juan abe que jirandu Jesús chiaose rese ra. Erimba quiatu ngue embiirandu nguiã erese. ¹⁹ Nyebe Juan ñee nguiã ngũimba nyeremo je. —Nyeremo jeso ñee Jesús je. “Cristo ra tu’, i bei equia nae, ¿ae chõ nde re?” jenyee oso ee. “¿Cristo ra uresaarõ arõ si quia re?” jenyee oso Jesús je, i que Juan ngũimba mondochoi ra. ²⁰ Juan ñimondo que nyoĩ ngasē Jesús je ra. —Juan el Bautista que urembu ñee ndeje ra. ¿Cristo chõ nde re? ¿Cristo ra uresaarõ arõ si quia re no? ¿Ae chõ nde re? i que Juan nimba ñee Jesús je ra. ²¹ Juan nimba ngasēte mose que Jesús riqui mbia rasi mbucherō cherō nda. Erasi chumumbara. Erasi cuabẽ. Aba checuayã icuã abe que embusẽ mbusẽ nguia mbia si ra. Eresayã abe que embu cherō nyerõ nguia ra. Juan nimba que mae ja quia ũquĩ mbucherō ndese ra. ²² Jesús que ñee Juan nimba je ra. —Ae rese jemaee nae, ũquĩ jēsenei oso Juan je. Ae jeñandu nae, ũquĩ abe no. “Jesús que eresayã mbucherō nyerõ nguia ra. Ecuatayã abe mbucuata cuata. Eire ndasi abe mbucherō nyerõ. Eisayã abe mbucherō nyerõ. Eraaque abe mbuquera. Ucheẽ turã esenei senei tuchi mbaecha reã je”, jenyee oso Juan mbiirandu. ²³ Emo hui jei eã mose sesi, aque iate ra siqui cote, i que Jesús ucheẽ mondo Juan je ra.

²⁴ Juan ñimondo que nyoĩ nyebi ee cote ra. Jesús que ñee mbia ja je

Juan nii cote ra. —¿Mbae rese mae jêso turúquiaa re? ¿Quiririã idioi ichu ichu rese jêso mae nde? ²⁵ ¿Mbae rese mae jêso re? ¿Emo irao turã ndese jêso mae nde? Tei. Eirao turã siquiã nguiã turuquia ñi. Ae siqui quia mbia rerecua chuchua nae, ũquĩ ño eirao turã ndiqui nguiã. ²⁶ Juan ndese mae ño ngue jêso turúquiaa resê. Dios cheê nenei neneisa tuchi chõ ae emo si re. Ae chõ mbia mingoquiato quiatu nguiã se ñee sacua ee aque. ²⁷ Sã embesa ji riqui ñee no:

Secheê nderaosa tamondo nderêta. Ae ra mbia mingoquiato ndeje, i que embesa ji ñee nda. Juan nii ño embesa ji ñee nguiã. ²⁸ Juan el Bautista quiarei i tuchi raque mbia ñiinda ja si. Dios cheê nenei neneisa ataque si. Ae ra siqui tuchi Dios rese erimbarã cote nae, ũquĩ nguia ra i tuchi Juan si cote, i que Jesús ñee nda. ²⁹ Mbía que Jesús cheê ñandu turã ja ra. Impuestos isi isiquia abe chee que echeê ñandu turã nda. —Dios turã tuchi, i ja que mbia ra. Juan ngue bautizar i ja ee nyii ra. ³⁰ Fariseos achõ ño ngue Jesús cheê isi sereã nda. Embesasa rese. ũquĩ ngue siqui sereãte Dios cheê ndese ra. Nyebe Juan bautizar i eã nguiã ee.

³¹ Jesús que ñeembe ee ra. —Mbía namonda siqui turã eãte quia aba cheê nduiã. Mbía ririã na ño eriqui nguiã. ³² Sã mbía ririã ndiqui ñumbusarei sarei no. Sã eriqui ñee ñee nyue no. “Flauta que asaã saã ndei jêje ra. ¿Mbaerã jenyuruqui sereã nea nde?” sã i chõ nyue no. “Mbae aba mbía eã ngue asaã ndei jêje resê. ¿Mbaerã jêyate erese re?” sã i chõ mbía ririã nyue no. ũquĩ na si chõ jêingo nguiã aba cheê mumbaã. ³³ Juan el Bautista que tu rei jêje ra. Jêisi turã eã ngue ra. “Co eriqui quiaru sereãte nanderese co. Co eriqui mbae mbei sereãte nanderese co”, jenyê chõchĩ ee. “Aba checuayã ndesenda”, jenyê chõ ngue ee ra. ³⁴ Se abe que achu rei jêje ra. Aquiaru rei quia jendese co. Mbae abe ambei rei quia jendese co. Se abe que jê seisi

turãyã nda. “Quiaru tuchi je”, jenyê chõchĩ seje. “Mbae mbeisa”, jenyê chõ ngue seje no nda. “Mbía icuã quiato chõ ñene”, jenyê que seje resê. ³⁵ Ae earacuate nae, Dios aracua abe ra eicua, i que Jesús mbía je ra.

Jesús quiaru fariseo chuchua

³⁶ —Nandequiaru sechuchua, i que fariseo mo ñee Jesús je ra. Jesús que oso erese ra. Ngoi que quiaru nonde ra. ³⁷ Cuña icuã mo ngue siqui hue jenda huee ra. Jirandu que Jesús rese ra. Oso que erea cote ra. Aba mbushimbusa que equerao erea ra. (Sita ao ji rei aba mbushimbusa riru.) ³⁸ Jesús quite quiti que eñi nyeseo ra. Nguesari je que Jesús i irei irei ra. Ua je que embiru iru cote ra. Uchuru que embucha Jesús i rese erite ra. Aba mbushimbusa que eicherê ei rese cote ra. ³⁹ Jesús mbuquiarusa que ñee nguia uchiangui re ra. —¿Mbaerã Jesús ñee asiã cuña icuã je re? Jesús Dios ririã mose, ñ nda ñee asi rei ee, i que fariseo uchiangui re ra. ⁴⁰ Jesús que ñee fariseo je ra. —Tacheê ndeje, Simón, i que ee ra. —Eno. Echeê seje no, Sererecua, i que fariseo ee ra. ⁴¹ Jesús que ñee ee ra. —Sã mbía nyeremo deber i ererecua mo je no. Sã enongue deber i ee quinientos no. Sã enongue deber i ee cincuenta no. ⁴² ũquĩ ja que pagar i aronea ja. Nyebe ererecua ñee nguiã ee. “Mbae jemondo eã ño seje”, sã i chõ ererecua ee no. ¿Aba eya tuchi nguerecua rese re? i que Jesús ñee Simón je ra. ⁴³ Simón ngue ñee ee ra. —Ae deber i tuchi ee nae, aque eya tuchi erese cote reae, i que Simón ee ra. —Ae bei, i que Jesús ñee ee ra. ⁴⁴ Jesús que mae cuña ndese ñee Simón je ra. —Ndechuchúaa seique mose que sei ereirei eã nda. Co cuña nguiatu que sei irei nguesari je ra. Ua je que sei mbiru ra. ⁴⁵ Nde quiatu que seritii eresiite eã ndesê. Cuña nguiatu que sei siite nguiã. ⁴⁶ Nde que aba mbushimbusa ereichereã sea rese resê. Cuña nguiatu ngue aba mbushimbusa icherê nguiã sei rese.

47 Tacheẽ nyecua ndeje, Simón. Cuña icuã tuchi raque. Eicuã ngue ambutiã ee namo nda. Nyebe eriqui nguiã nyesequa tuchi serese a. Ae “seicuã eã jiri se”, i quia nae, ùquĩ nguia ra nyesequa eã jiri serese. Se eicuã ambutiã ndaque, i que Jesús Simón je ra. 48 —Ndeicuã ngue ambutiã ndesi ra, i que Jesús ñee cuña je cote ra. 49 Ae que chi quiaru erese nae, ùquĩ ngue ñee nyecuayã cuayã u nyue ra. —¿Mañi nda Jesús mbia icuã mbutiã esi re? i que eu ñee ñee nyue ra. 50 Jesús que ñee cuña je ra. —Seicuasa chõ nde re. Nyebe arerirõ nguiã ndeicuã si. Ereico bei ra cote. Ndeya eso cote, i que Jesús cuña je ra.

8

Cuña mo nyoĩ ngata Jesús rui mbae raã naa ee

1 Jesús que sucha tubiriã mbuchesea sea quia ra. Dios cheẽ turã ngue esenei senei nguia mbia je ra. Echimbaaquiatu doce abe que ngata quia erese ra. 2 Cuña echimbucherõ mo abe que ngata quia erese ra. Ae si aba checuayã icuã ndirõ nyii, ùquĩ mo abe que ngata quia erese ra. María Magdalena que ngata quia erese ra. Ae si aba checuayã siete rirõ nyii nae. 3 Juana abe que ngata quia erese ra. Chuza ninisi que aque ra. Herodes resenda rei Chuza. Susana abe que ngata quia erese ra. Cuña ata que ngata quia erese ra. Ùquĩ ngue umbae mee mee mbei quia Jesús je ra.

Emo mbae eĩ mombiquia mbiqui

4 Mbia que ngaẽ ngaẽ ja quia Jesús rea ra. Suchamo jenda abe. Mbia ñumunua ja mose que Jesús ejemplo raã ee ra. 5 —Sã emo si mbae eĩ mombiquia mbiquia no. Emombiquia mbiquia mose sã emo uqui uqui ñeenda rui no. Sã mbia riqui irõ irõ erese no. Sã nguireĩ abe eu chee no. 6 Sã emo uqui uqui sita arõ no. Sita aronda suri raque. Ibi irute quia ee re. Nyebe ñimama nguiã mano. 7 Sã emo ndiqui uqui uqui nyu réndaa no. Sã nyu abe suri erese no. Nyu

ruri que echatu asi u eriquisã nda. 8 Sã emo uqui uqui ibi túraã no. Ùquĩ nguiatu que ia turã nda, i que Jesús mbia je ra. Aquere que ñee asite mbia je ra. —Jëisa mose jsecheẽ jeñandu turã na! i que Jesús mbia je ra.

9 —Eresenei ngue mbae eĩ ñii, ùquĩ embiasa turã na ure je, i que echimbaaquiatu ñee ee ra. 10 Jesús que ñee ee ra. —Mbia rerequa tuchi quiarei Dios. Ae riqui nguiã ucheẽ mbiasa asa ja jëje co. Mbia ataque quia siqui sereã erese co. Mbia ataque je quia eriqui nguiã ucheẽ mbiasa eã jiri. Ejemplos achõ esenei senei nguiã ee co. Eanduchõ sacua. Eicua turã ndocoĩ.

Jesús ucheẽ mbiasa uchimbaaquiatu je mbae eĩ ñii

11 Secheẽ tambiasa jëje cote. Dios cheẽ na si chõ mbae eĩ nde. 12 Ae uqui uqui ñeenda rui nae, ùquĩ ndei mbia Dios cheẽ andu chooñosa rã ùquĩ. Ae Dios cheẽ andu chooño nae, ùquĩ ñiangui si chõ diablo riqui nguiã Dios cheẽ ndirõ. Nyebe eriqui nguiã Dios icuayã mbei. Nyebe Dios riqui nguiã emingo bei eã. 13 Ae uqui uqui sita arõ nae, mbia mo na ño ùquĩ no nde. Dios cheẽ andu mose, isi turã ndaque. Eyate raque erese. Mbae mo embiayã mose, hui jei chõ esi cote. Mbae rao eã naanguia chõ ùquĩ nde. 14 Ae uqui uqui nyu réndaa nae, mbia mo na ño ùquĩ no nde. Dios cheẽ andu turã ndaque. Siqui bei eã ño nguiã erese. Umbaerã achõ ndese chõ eriquichĩ nguiã ndua. Ñimbusarei sarei bei chõchĩ nguiã. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbei ee. 15 Ae uqui uqui ibi túraã nae, mbia mo na ño ùquĩ no nde. Echiã quishĩ ño ùquĩ nde. Dios cheẽ andu mose, siqui bei erese. Ia ia bei raanguia cote.

Tata rendi mbia resae ja

16 Sã nandeico lamparina mendi no. Sã nandeico eati eã no. Sã nandeico emii eã mbaequi re no. Erendi checua chõ nda nandemii

nguiã. Mbia resae ja sacua. ¹⁷ Mbae checuayã nda nyecua ja emo mose. Ñeminde ra nyecua ja. ¹⁸ Secheẽ jeñandu tuchi. Aba mo umbae rerequia mose, Dios ra emo mondobe ee. Emo embae eã mose, Dios ra embae sirõ ja esi.

Jesús nongue ngaẽ erea usi rese

¹⁹ Jesusi que ngaẽ ndei ee ra. Jesús nongue ja rese. Mbia tubiriãte que esiquisãte esi ra. ²⁰ —Hue ndesi riqui nderequia taicuee hue. Ndenongue rese, i que mbia Jesús mbiirandu ra. ²¹ Jesús que ñee mbia je ra. —Ae Dios cheẽ andu turã nae, ae Dios cheẽ mumbayã nguia nae, ñquĩ je chõ aico nguiã “senongue” i. Ñquĩ je chõ aico nguiã “taĩ” i no, i que Jesús ñee nda.

Jesús quiririã icuã icuã mbutiba; ama ndebera abe

²² Emo mose que Jesús ua canoa ye ra. Uchimbaaquiatu ja rese. —Nyao ama ndisha robei, i que Jesús ee ra. Nyoĩ que cote ra. ²³ Ama ndisha rasa mose que Jesús si quia uque ra. Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ñiimi serĩ tuchi nguiã ee. ²⁴ Nyebe mbia Jesús mumba nguiã. —Urembaaquiatusa, echumumba. Nandemanochĩ nda re, i que ñee Jesús je ra. Jesús que nyuruã cote ra. Ñee quiririã je. Ama mbutiba. Quiririã ngue ti i ee cote ra. Ama abe que ti i no nda. ²⁵ —¿Mbaerã jẽingo siquichete re? ¿Seicuayãte equia re? i que Jesús uchimbaaquiatu je ra. Siquiche bei que equia ra. Nyuruira tuchi Jesús quirãcuã ndese mae. —Quiririã Jesús cheẽ mumbayã ñochĩ. Ama abe echeẽ mumbayã ñochĩ, i que ñee ñee nyue cote ra.

Jesús aba checuayã icuã jea Gadara jenda mo si

²⁶ Ngasẽ nyee que sobei ra. Gadara, i que hue ibi je ra. Galilea mbuchechea tuchi que huee ra. Ama ndisha rasa. ²⁷ Canoa si Jesús nguichi mose, hue jenda amei mo ngue tu ee ra.

Aba checuayã icuã ngue siqui quia echiangui re ra. Cosete ngue eriqui rei nguiã echiangui re. Eirao eã mbei que eriqui ra. Tuchuaqui re que eriqui uqueã nda. Mbia raaque tãsa bei chõ eriqui nguiã. ²⁸ Tu que ngoi ngũĩã ndese Jesús resa quiti ra. Ñee asite que eu ee ra. —¿Mañi ere ra seje re, Jesús? Dios ibatenda riirĩ ño nde re. ¡Sembasichĩ nda se jẽ! i que ñee tuchi Jesús je ra. ²⁹ —Esẽ esi, i chõ Jesús aba checuayã icuã je reaẽ. Aba checuayã ño aque amei isi isi bei quia embiicuã icuã neaẽ. Mbia eo cuaacua raque quia cadenas je. Ei abe cuaacua raque no. Ucuasa ndoso ndosochõ mbei que equia ra. Aba checuayã ño equerao rao quia turuquia ñi neaẽ. ³⁰ —¿Mañi ndeje re? i que Jesús ñee ee ra. —Etubiriã, i que seje ra. Ure cuabẽte quia ure re, i que aba checuayã ñee Jesús je ra. ³¹ —Uremondochĩ nda tata cuasu, i que aba checuayã ñee tuchi Jesús je ra. ³² Chiasu socioi tubiriã ngue chi quiaru huee ra. Sita ibate rese. Nyebe aba checuayã ñee Jesús je. —Chiasu chiangui re ureso rã, i tuchi que equia ñee Jesús je ra. —Eno, i que Jesús ee ra. ³³ Aba checuayã icuã ngue usẽ ja amei ñia si cote ra. Chiasu chiangui re que echoi ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

³⁴ Chiasu raarõsa que chi mae erese ra. Emundite que ra. Nyoĩ que uchã mbia mbiirandu ja chiasu rese ra. Sucha tubiriã jenda mbiirandu. Mbia ataque abe mbiirandu no. ³⁵ Mbia que ngaẽ ja mae erese ra. Huee que Jesús riqui beite ra. Ae rese aba checuayã ndiqui nyii amei nae, aque abe que chĩ ngoi Jesús i jii ra. Huirao resebe cote. Earacuate que mbia je cote ra. Nyebe mbia nyuruira tuchi nguiã erea. ³⁶ —Jesús que amei mbucherõ aba checuayã ndirõ esi ra, i que maesa erese ñee mbia ataque je ra. Maesa erese que esenei ja mbia je ra. ³⁷ Mbia hue jenda que

siquiche ja Jesús si cote ra. —Eso rã urerecha urerecua si, i ja que hue jenda ñee Jesús je ra. Nyebe Jesús ua nguiã canoa ye. Oso que nyebi sobei cote ra. Gadara recha. ³⁸ Ae rese aba checuayã ndiqui nyii nae, aque que ñee Jesús je ra. —Nderese taso bei, Jesús, i rei que ee ra. Jesús que ñee ee ra. ³⁹ —Eso chõ ndechuchúaa. Mbae esenei ja nderesenda je. “Dios que sembucherõ nda”, ere oso mbae renei nenei ja nderesenda je, i que Jesús ee ra. Umbucherõsa renei nenei ngue oso mbia ja je cote ra. Jesús renei nenei ja sucha jenda ja je.

Jesús Jairo riiri mbucherõ; ari mo abe mbucherõ

⁴⁰ Jesús chebi si mose sobei si, mbia que chi eraarõ arõ nda. Ûquĩ nguiatu que eisi turãte ra. ⁴¹ Emo ngue tu ñee Jesús je ra. Jairo, i que ee ra. Judio munua nuasa que ae ra. Jesús i jii que ngoi ñee ee ra. —Nyao rã sechuchúaa. ⁴² Seririĩ nguasu jiri si quia mano serĩte seje qui. Seririĩ miĩ tuchi se, i tuchi que Jesús je ra. Jesús que oso erese ra. Mbua cuabẽ ngue nyoĩ ja erui ra. Jesús mbiitãyãte que echoĩ quia ra. ⁴³ Ari mo abe que oso quia mbia ite rĩ nda. Eruqui nda uchẽ uñe mbei quia ee ra. Doce años nyee nda eruqui tibayã mbei ee ra. Aba mbucherõsa abe nda embucherõ aroneate quia ee ra. Ari umbae mondo mondo ja raque quia ee. ⁴⁴ Ari que tu Jesús quite quiti eriichã nda. Eirao ai rese que oco ra. Aque mose tuchi que eruqui tiba ee cote ra. ⁴⁵ —¿Aba oco serese re? i que Jesús mbi je cote ra. —Tei. Aba ãte, i ja rei que mbia ee ra. Pedro que ñee ee ra. —Mbia tubiriãte nyeresẽ. Mbua cuaẽ nguia ñimaña maña jate co resẽ. ¿Mbaerã ereico “¿aba oco serese re?” i re? i que echimbaaquiatu ñee ja ee ra. ⁴⁶ Jesús que ñee ee ra. —Tei. Emo ngue oco serese ra. Sequirãcuã ngue emo mbucherõ nda i que Jesús ra. ⁴⁷ —Jesús jiranduchĩ serese, i que ari uchiangui re cote ra. Nyebe ngoi nguiã ngũã ndese Jesús resa quiti.

Titi titi i ete que ra. Ñee nyecua que ee ra. —Sembucherõ sacua ño aoco nguiã nderese. Aque mose tuchi chõ acherõchĩ, i que ari erenei ja Jesús je ra. Mbua que ehandu ja u ra. ⁴⁸ Jesús que ñee ee cote ra. —Seicuasa chõ nde re. Nyebe arembucherõ nguiã. Ndeya tuchi eso cote, i que Jesús ee ra.

⁴⁹ Jesús cheẽ mosete que emo ndu Jairo chuchua si ra. —Ndeririĩ ngue mano cote ra. ¿Mbaerã nda Jesús erao ndechuchua cote re? i que ñee Jairo je ra. ⁵⁰ Jesús que ehandu ra. Ñee ngue Jairo je ra. —iNdeya eã techĩ nda jẽ! Seicua chõ se. Ndeririĩ nda quera si, i que eru je ra. ⁵¹ Ngasẽ ngue echuchúaa cote ra. Jesús que ique eraaque rea cote ra. Pedro rese. Jacobo abe rese. Juan abe rese. Eraaque ru abe rese no. Esi abe rese. Ûquĩ achõ ngue emingue ra. ⁵² Mbua que chi ja nyeseo ãquẽ ndese ra. —Jenyeseochĩ nguiã. Mano eã ño ñene. Uque chõ ñene, i que Jesús ñee mbia je ra. ⁵³ Mbua que iquia Jesús cheẽ mose ra. —Eraaquete nyeresẽ. ¿Mañi nda nyuruã nde? i que mbia ra. ⁵⁴ Jesús que eraaque o isi ra. —Echuruã na, Echo, i que ñee asite ee ra. ⁵⁵ Quera si que nyuruã cote ra. —Ndeririĩ embuquiari cote, i que Jesús ee ra. ⁵⁶ Eru que nyuruira tuchi mae erese ra. Esi abe nyuruira tuchi. —iEmo nda jembiiiranduchĩ jẽ! i que Jesús ee ra.

9

Jesús uchimbaaquiatu doce mondo ucheẽ nenei nenei sacua

¹ —Jenyu, i que Jesús uchimbaaquiatu doce je ra. Uquirãcuã ngue emee mee ee ra. Aba checuayã icuã jea jea sacua mbia si. Mbua rasi mbucherõ cherõ sacua. ² —Jẽso Dios cheẽ nenei nenei mbia je. Jẽso mbua rasi abe mbucherõ cherõ. “Mbua rerecuarã tuchi ra Dios cote”, jenyẽ oso secheẽ nenei nenei mbia je. ³ Mbae mo nda jendaochĩ icua. Jenyitochiquia ra jendaochĩ. Mbae riru mo abe ra jendaochĩ no. Jenyirã mo nda jendaochĩ no. Mbae isiquia mo abe ra jendaochĩ

no. Jẽirao nongue abe ra jendaochĩ no. ⁴ Emo nyuchúaa jengue mose, hueechõ ño jẽingo uque. Jemba jembatechĩnda uque tuchia raamba amba. Hue si chõ jẽso sucha tubiriã mo secheẽ nenei nenei cote. ⁵ Sucha tubiriã mo jenda jẽisi sereã mose, jẽsecha chõ. Jẽi tubi jembutomo tomo ee. Hue jenda huicua icua sacua, i que Jesús uchimbaaquiatu je ra. ⁶ Echimbaaquiatu que nyoĩ choĩ bei quia sucha tubiriã mbuchesea sea ra. Dios cheẽ turã nenei nenei mbia ja je. Mbia rasi mbucherõ cherõ no.

Mbia Juan el Bautista iquia

⁷ Herodes abe que jirandu Jesús chiaõ rese ra. Embusiquichete que ra. Emo ngue ñee ndei ee ra. —Ae ereiquia nae, Juan i equia ee nae, aque que quera si ra, i rei que emo ñee Herodes je ra. Juan Jesús riqui reĩ nguiã mbia je. ⁸ Elías Jesús riqui reĩ nguiã emo je no. —Dios cheẽ nenei neneisa ima quera si je chõ ñene, i rei que emo emo Jesús rĩ no nda. ⁹ Herodes que ñee nda. —Juan aiquĩ ngue achisiamo tuchi. ¿Mañi nda quera si re? ¿Aba Jesús re? Ae rese aico jirandu tuchite. Tamae erese no, i que ndua ndua uchiangui re ra.

Jesús mbichae mbeta tuchi mbia je

¹⁰ Jesús chimondo ucheẽ nenei neneisa que nyebi ngaẽ ee ra. —Ã ngue uresaã saã nda, i que mbae renei ja Jesús je ra. Mbia tiãmbaa que Jesús ũquĩ nderao ja rei ra. Betsaida rurubi jiri. ¹¹ Mbia ataque jirandu mose que nyoĩ erui ra. Jesús que eisi turã Dios cheẽ nenei nenei ee ra. Erasi abe mbucherõ cherõ ee. ¹² Tenda oso mose que echimbaaquiatu ñee ndei ee ra. —Mbia emondo rã sucha tubiriã nia. Sã echoĩ bei quiaru huee. Uque bei abe huee no. Mbae aite nandecu a, i rei que echimbaaquiatu Jesús je ra. ¹³ —Jeño mbae jemondo ee echĩurã, i que Jesús ee ra. —Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiatu Jesús

je ra. ¹⁴ Mbia tubiriã tuchi que chi ra. Cinco mil ndobei. —Mbia jembucoi ja ño íbii. Eata jaaja jeñoño mbucoi. Sã echĩ ngoi icúe cúe cincuenta jaaja, i que Jesús uchimbaaquiatu je ra. ¹⁵ Jesús cheẽ nguire que ngoi ja cote ra. ¹⁶ Jesús que mbichae sirõ cote ra. Sira abe rirõ. Mae ngue ibate ra. —Gracias, i que ñee Dios je ra. Mbichae que esiquio quio ra. Sira abe no. Mondo mondo ja que uchimbaaquiatu je cote ra. —Jembuchao chao mbia tubiriã je cote, i que Jesús ra. ¹⁷ Mbia que embuquiaru ja tuchi ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisẽ esique sique je ra.

Cristo chõ nde resẽ, i Pedro Jesús je

¹⁸ Emo mose que Jesús ae riqui ñee ñee Dios je ra. Echimbaaquiatu abe que chi huee ra. —¿Aba aico reĩ mbia je re? i que Jesús ee ra. ¹⁹ Echimbaaquiatu que ñee ee ra. —Juan el Bautista ereico reĩ nguiã emo je co. Elías ereico reĩ nguiã emo je no. Dios cheẽ nenei neneisa quera si je ereico reĩ nguiã emo je no, i que echimbaaquiatu ee ra. ²⁰ —¿Aba aico reĩ jẽje co re? i que Jesús ee ra. —Cristo chõ nde resẽ. Dios ririĩ ño nde resẽ, i que Pedro Jesús je ra.

Mbia ra sei quia, i Jesús uchimbaaquiatu je

²¹ —Ũquĩ nda jeñeechĩ emo je jẽ, i tuchi que Jesús ee ra. ²² Jesús que uchimbaaquiatu mbaaquiatu quiatu ra. —Mbiarã ngue Dios sembu ra. Mbia ra sembasi mbasi tuchi. Amei nda hui ja sesi. Sacerdotes rerecua abe ra hui ja sesi. Embesasa abe ra hui ja sesi. Mbia ra sei quia chee. Tres tenda mose ra aquera si, i que Jesús mbia eiquia nonde ra.

²³ —Emo siquise mose serui, sã hui ja mbae ubi si. Sã cruz umbaerã ndui bei se rã si. Sã eriqui serui cote. ²⁴ Emo ndua bei mose nguico rese, ereco ra ua esi. Emo hui mose nguico si seje, ũquĩ nda siqui bei.

25 Emo ngueco mumba chooño mose, eya eã mbei rae. Mbaecha rete raque.

26 Emo ireĩ ireĩ mose sesi, se abe chõ nda aireĩ ireĩ esi. Emo ireĩ ireĩ mose secheẽ si, se abe chõ nda aireĩ ireĩ esi, sechu mose mbia rerecuarã. Dios quirãcuã nda sembu. Angeles rese ra achu aque mose. 27 Tacheẽ nyecua jêje. ã jêingo serese ã nae, jemo nda jemae Dios quirãcuã ndese jemanononde. Mbiam rerecuatuchi ra Dios, jemo manononde, i que Jesús ee ra.

Jesús ny#cabo uchimbaaquiatu je

28 Ocho tendare que Jesús choi sita ibátee ra. Ñee sacua Dios je huee. Pedro que oso erese ra. Jacobo abe. Juan abe. 29 Jesús ñee mose Dios je que eruba ñimbiasu ra. Eirao abe que enininya ra. Eiraoshĩ nininya tuchi que ra. 30 Mbiam nyeremo ngue nyecua u ibate si ra. Jesús nininya mose que eriqui ñee ñee nyue erese ra. Moisés que enongue ra. Elías que enongue no nda. 31 Ûquĩ ja que enininya Jesús rese ra. —Mbiam ra Jesús iquia mbucha ira rese Jerusalén, i que equia ñee nyue ra. 32 Pedro reesite raque. Eresenda abe reesi esite raque. Uqueã mbei quera. Jesús nininyate quiatu ngue ee re. Moisés abe nininyate quiatu ngue ee re. Elías abe nininya no. 33 Ibatenda que nyo i quia Jesús recha cote ra. —¿Manyae ra ñee Jesús je re? i que Pedro ra. Nyebe ñee iru chõ nguiã ee. —Nandecurâte aa, Sembaaquiatusa. Sucha ñetê uresaã saã na. Enongue nembraerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra. 34 Pedro cheẽ mosete que ibeishĩ ndu eite ñi nda. Ibeishĩ ngue Moisés mbuchecuayã ee ra. Elías abe mbuchecuayã ee. Nyebe esiquiche nguiã. 35 Echeẽ mo ngue echandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ee ibeishĩ qui re ra. 36 Aquere que Jesús mĩ ndiqui uchimbaaquiatu rese ra. Umaesa que esenei eã ja emo je ra. Ñee ãte que emo je ra.

Jesús aba checuayã jea mbia riiri mo si

37 Isamamimbe que ecuaẽ nguichi sita ibate si ra. Mbiam tubiriã ngue ngaẽ Jesús rea ra. 38 Ûquĩ mo ngue ñee Jesús je ra. —Seriirĩ ndese emae, Urembaaquiatusa. Seriirĩ mĩte que se co ra. 39 Aba checuayã icua ndiqui eisi isi co. Embaasẽ asẽ mbei. Emburiri riri. Echuru mbicho i. Erete munumbi numbi. Aba checuayã hui sereã mbei seriirĩ si. 40 “Aba checuayã embusẽ seriirĩ si”, ae rei ngue ndechimbaaquiatu je re. Embusẽ aroneate esi, i que eru ñee Jesús je ra. 41 —¿Mañi jenye quia seicuayãte re? ¿Secheẽ jemumba tuchi chõ nguiare? ¿Ñimbirãcuã mbeite ra aba quia jêje re? i que Jesús ñee ee ra. —Nderiirĩ eru rã seje, i que eru je cote ra. 42 Jesús rurubite mose que aba checuayã eriirĩ mbucoi mondo ra. Mburiri tuchi que ra. Jesús que ñee asite aba checuayã icua je ra. Eriirĩ ngue embucherõ nda. Embucherõ ji que emondo eru je cote ra. 43 Dios quirãcuã ndese mae ngue mbiam nyuruira tuchi ra.

Mbiam ra seiquia, i si Jesús

Jesús chiaose mae ngue mbiam nyuruira tuchi ra. Mbiam nyuruira mose que Jesús ñee uchimbaaquiatu je cote ra. 44 —Mbiarã ngue achu ra. Mbiam ra semee mbiam icua je. Sericharã. Ûquĩ si ra jêtesareichĩ, i rei que Jesús uchimbaaquiatu je ra. 45 Echimbaaquiatu que Jesús cheẽ icuayãte ra. Echecuayãte que ee ra. —Ndecheẽ embiasa ure je, iã ngue ñee ee ra. Ireĩ ireĩ ño ngue ñee ee ra.

Ererecuatuchi ra se, i jaaja Jesús chimbaaquiatu nyue

46 —Se quia ra ererecuarã tuchi jêsi, i jaaja que echimbaaquiatu ñee nyue ra. Ñee icua icua nyee nyue. 47 Jesús que Ûquĩ ndua ndua icuate ra. Nyebe ãquẽ mo mbucoi mĩ nguiã ujii. 48 Jesús que ñee ee ra. —Sã ãquẽ mo ndiqui siqui mingue no jê. Ae eturã ndiqui mbiam riirĩ je serĩ nae, seje abe chõ eturã ndiqui nguiã. Ae

eturã ndiqui seje nae, semondosa je abe chõ eturã ndiqui nguiã. Ae ererecua sereãte riqui jemo nae, ùquĩ nguia sebi re. ¿Mbaerã jëingo “ererecuarã se” i nyue re? i que Jesús ee ra.

Emo icuã eã mose nande je, nanderesenda chõ ùquĩ nde

⁴⁹ Juan ngue ñee Jesús je ra. —Pe emo nyi aba checuayã ndirõ ndirõ mbia si nderĩ pe. Uremae ngue erese ra. Aque eriqui ãte nanderese aque. Nyebe uresiquisã nguiã, i que Juan Jesús je ra. ⁵⁰ Jesús que ñee ee ra. —Tei. ¡Jësiquisã quisãchĩ nda jë! Emo icuã eã mose nande je, nanderesenda chõ ùquĩ nde, i que Jesús ñee ee ra.

Jesús ñee asi Jacobo je; Juan abe je

⁵¹ —Namo jiri ra aso ibate cote, i que Jesús ndua ndua cote ra. —Taso Jerusalén, i tuchi que equia ra. ⁵² Jesús que mbia mo mondo unonde ra. Ùquĩ ngue ngasë sucha tubiriã mo nda. Samaria jenda rei sucha. —Jesús ra uque aa jendese, i rei que hue jenda je ra. ⁵³ Hue jenda que Jesús isi turã sereãte ra. —Jerusalén Jesús si quia qui reae. Nyebe ureico nguiã eisi sereã aa, i que hue jenda ñee icuã Jesús chimondo je ra. ⁵⁴ Jacobo jirandu mose que paama i hue jenda je ra. Juan abe que paama i hue jenda je ra. Ùquĩ ngue ñee Jesús je ra. —Sã Elías tata mbu ibate si mbia icuã je cose no. ¿Eĩ ure si ra tata mbu ã iquia sacua nde? i que echimbaaquiatu ñee Jesús je ra. ⁵⁵ Jesús que uba ñee asite ee ra. —Jësecha chõ. Aba mingosa ririĩ ño jëingo ã ndesë. ¿Jëtesarei chõ nguia ùquĩ si re? ⁵⁶ Mbia iquia sacua ngue achua ndesë. Mbia mingo bei sacua ño ngue achu nguiã, i que Jesús ra. Sucha tubiriã mo ngue echoi cote ra.

Jesús rui taico, i raque emo

⁵⁷ Jesús ngata mose que mbia mo ñee ee ra. —Taico bei nderese. Ndeso mose manguiti, se abe ra aso bei quia nderese, i que ñee Jesús je ra. ⁵⁸ Jesús que ñee ee ra. —¿Mbae rasi ra eresaã saã serese re? Eoita quia ecua jiri re.

Nguireĩ nguia equisa jiri no nde. Se quia sequisayã mbei re, i que Jesús ee ra. ⁵⁹ —Serui eico bei, i que Jesús emo je ra. —Sã seru mano na. Aquere quia ra aico bei nderui, i rei que aque ñee Jesús je ra. ⁶⁰ Jesús que ñee ee ra. —Sã mbia ataque chõ nderu chati. Nde quia eso Dios cheë nenei nenei mbia je, i que Jesús ee ra. ⁶¹ Emo ngue ñee Jesús je ra. —Aico jee ra nderui. “Co acua quia co”, tae rã oso sechuchua jenda je, i que ñee Jesús je ra. ⁶² Jesús que ñee ee ra. —“Achu jirichĩ nguia Jesús rui”, i mose sequiato mo, aque ra ngaseã Dios je, i que ra.

10

Jesús mbia setenta mondo ucheë nenei nenei sacua

¹ Aquere que Jesús mbia setenta irabo no nda. —Serëta chõ jëso jëso quia sucha mbuchesea sea, i que ee ra. Nyeremo nemo ngue embuchao chao quia mondo ra. ² —Secheë andusa reã ndei etubiriã. Secheë nenei neneisa rei co mui jiri. “Dios, ndecheë nenei neneisa mo emondo tuchi. Mbia mbiirandu randu sacua”, jenyé chõ nguia Dios je. Sã echa mbae a ishao shaosa mondo ea ireĩ mose no. ³ Jëso cote. Sã nyacua icuã ndiqui oveja je no. Eĩ si ra mbia icuã icuã jëje. Nyacua rã si. ⁴ Jëochi chõ jëso. Mbae riru ra jendaochi. Mbae isiquia abe ra jendaochi no. Jëiyao abe ra jendaochi. Jëitõ itõchĩ nda ñeenda cúa ñee sacua mbia je. ⁵ Jëique mose emo nyuchúaa, jeñee turã huee tuchua jenda je. “Dios nda jembia bei quia chã”, jenyé hue jenda je. ⁶ Hue jenda ia mose Dios rese, Dios ra siqui tuchi erese. Eya eã mose Dios rese, emo je quia jeñee. ⁷ Jemba jembatechĩ nda uque tuchua raamba amba. Jengue mocoĩ jiri quia huee. Ae hue jenda u u quia nae, jë abe jëu quia erese. Jëingo mose secheë nenei nenei mbia je, sã mbia mbae mondo mondo jëje. ⁸ Sucha tubiriã jenda jëisi turã mose, jëquiaru quiaru erese. ⁹ Hue jenda ndasi jembucherõ nyerõ ee. Hue

jenda je secheẽ jēsenei senei. “Namo jiri ra jenderecuarã Dios cote”, jenyẽ chõ hue jenda je. ¹⁰ Sucha tubiriã jenda mo jëisi sereã nea mose, jeñee asi ee etaicúee. ¹¹ “Urei tubi urembu-tomo nguia jendique jie a. Jêtesareia sacua urecheẽ si. Jenderecuase rete raque Dios. Jëisiã ñochi”, jenyẽ chõ hue jenda mbiirandu. ¹² Se mbia icua mbasi mbasi mose, hue jenda ra ambasi mbasi tuchi Sodoma jenda si.

Jesús ia eã mbia sucha tubiriã jenda rese

¹³ Seya eãte jendese, Corazín jenda. Seya eãte jendese, Betsaida jenda. Jendasi tuchi chõ ndae. Mbia mae sayã ngue asaã saã jêje nae, uqui naa mose Sidón jenda je, eĩ nda hue jenda huicua ndecha rei. Eĩ nda Tiro jenda abe huicua ndecha rei. Eĩ nda eya eãte rei huicua ndese. ¹⁴ Jê nguia jëicua jësecha sereãte rei. Nyebe ra Dios jembasi mbasi tuchi uqui si quiatu. Dios mbia icua mbasi mbasi mose. ¹⁵ Jêcuasu jësaã saã tuchi techi nguia re, Capernaum jenda. Nyebe ra Dios jemondo tuchi tata cuasu. ¹⁶ Secheẽ nenei neneisa chõ jê nde. Ae ra jeñee ñandu quia nae, secheẽ abe ra echandu. Ae ra jêucuâyãte quia nae, se abe ucuâyã ndae. Ae ra seucuâyãte quia nae, sembusa abe ucuâyã nda eno, i que Jesús ñee uchimondo setenta je ra.

Jesús chimondo mbia setenta nyebi ngaã ee

¹⁷ Uqui setenta nyebi si mose que eyate ra. —Aba checuayã icua urecheẽ mumbayã ñochi nderi, Urerere-cua, i que ñee Jesús je ra. ¹⁸ Jesús que ñee ee ra. —Satanás que ngoi tuchi u ibei si ra. Sã ama piriã i asi no, eĩ si que eu ngoi ra. Amae tuchi que ecoi rese ra. ¹⁹ Sequirãcuã ngue amee tuchi jêje ra. Jendeaquiato sacua. Jëirõ sacua mbei tásie rese. Quiraẽ ndese. Seucuâyãsa riquisã sacua. Sequirãcuã nda jendea quiatu mingo. ²⁰ Uqui ndesechi nda jëya. Serese

quia jëya. Aba checuayã jeñee mumbayã mose uqui ndesechi nda jëya no jê! Paba que nombre jembae mbesa mbesa mi ibate ra. Uqui ndese quia jëya, i que Jesús ee ra.

Jesús ia tuchi

²¹ Aque mosete que Espiritu Turã Jesús mbia tuchi ra. Ñee ngue ngu je ra. —Seyate aico nderese co, Paba. Ibi jenda rerecuja ja chõ nde re. Ibei jenda abe rerecuja ja chõ nde no nde. Ndecheẽ ngue erembuchecuayã mbia aquiato tuchi je ra. Mbia riiri naanguia je chõ ngue erembuchecua nguia. Uqui ño ngue eturã ndeje ra, Paba, i que Jesús ra. ²² —Seru que mbae mondo ja seje ra. Paba mi ño seicua tuchi nguia. Paba riiri mi ño se re. Se mi ño Paba aicua tuchi nguia no. Ae je ra Paba ateacuquia nae, uqui mi ño nda Paba icua tuchi nguia serese, i que Jesús ñee nda. ²³ Jesús que uba mae uchimbaaquiato rese ra. Eísaa que ñee nda. —Coche jemaie nguia ã sechio rese. ²⁴ Mbia rerecuja ñiinda mae ja bite raque ã sechio rese. Dios cheẽ nenei neneisa abe mae ja bite raque ã ndese. Mae eã mbei que equia sechio rese ra. Secheẽ andu bite raque. Secheẽ ngue echanuate ra, i que Jesús ra.

Samaria jenda mo turã erasi je

²⁵ —Ma Jesús ucheẽ nyabi, i que embesasa mo ñee oso Jesús rea ra. —¿Mbae rese ra aico siqui bei nonde re? i que ñee Jesús je ra. ²⁶ —¿Mañi ño Voisés chimbesa re? i que Jesús ee ra. ²⁷ Embesasa que ñee ee ra. —Eĩ ño ngue Moisés embesa ra: “Echesequa tuchi quia Dios rese. Ndechiã ja je chõ eico nyesequa erese. Neaĩ abe je. Ndequirãcuã abe je. Nendua ndua abe je. Sã erchesequa ndechiese no, eĩ ere si chõ nyesequa nde ji jenda rese”, i que embesa ji ñee ndesẽ, i que embesasa ñee Jesús je ra. ²⁸ Jesús que ñee ke ra. —Erecheẽ turãte. Ndkico mose uqui ndese, Paba ra nemingo bei, i que Jesús ee ra.

29 Embesasa que uturã saã saã Jesús je ra. —¿Aba se ji jenda re? ¿Aba rese ra achesequa re? i que ñee Jesús je ra. 30 Jesús que ñee ee ra. —Sã emo oso quia Jericó quiti no. Jerusaén si. Sã mbia icuã nyarõ erese ñeenda cúa no. Ucuu ucuu tuchi que erese ra. Embae que embuquiachã ja ra. Eirao abe rirõ ja esi no. Ecura curái que esecha ino ñeenda cúa rĩ nda. 31 Aque ñeenca aui que sacerdote mo si ra. Maeño ngue ecura curái rese ra. Nyucuaño ngue oso ra. 32 Levita mo abe que oso rei hue rĩ no nda. Aque abe que maeño si erese no nda. Ñeenda ibi chõ esi nguiia kcuano no. 33 Aquere que Samaria jenda mo oso hue rĩ nda. Aque mae mose ecura curái rese, eya eã tuchi que aque quiatu ra. Aque quia echucuaño eã nguiã cote. 34 Aque que tiba erese ra. Mbae quira que equiti quiti eiruã nua ji rese ra. Vino abe quiti erese. Esia ji que echucua chucua ee ra. Caballo umbae rese que erasi mbuchui cote ra. Tuchua mo ngue ererao ra. Huee que eriqui eraarõ isa ra. 35 Isamami ngue ñee tuchuacha je ra. —Taso cote. Ecura curái embucherõ nguia aa. Co mbae isiquia nyeremo tamondo ndeje. Embucherõ sacua eisi co je. Co nyeremo chayã mose, mbae isiquia mo nda amondobe ndeje sechube mose, i que Samaria jenda ñee tuchuacha je ra. 36 ¿Aba nyesequa ecura curái rese re? ¿Sacerdote ere? ¿Levita ere? ¿Samaria jenda ere? i que Jesús embesasa je ra. 37 Embesasa que ñee ee ra. —Samaria jenda chõ ngue nyesequa erese resẽ, i que embesasa ñee Jesús je ra. Jesús que ñee ee ra. —Ae rã si chõ eico nyesequa, i que ee ra.

Jesús oso Marta rea; María abe rea

38 Jesús que ngasẽ sucha tubiriã mo nda. Cuña mo ngue eisi turã uchuchúaa ra. Marta, i equia ee. 39 María, i que Marta nongue je ra. Jesús i ji bei que María riqui ngoi ra. Jesús cheẽ ndese nyiisaquia bei. 40 Marta que mbae chao chao ja tuchi quia ra. Erecoteã tuchi que eriqui

ra. Oso que ñee Jesús je ra. —Mbae mo ndese senongue riquiã ño co resẽ. Echeẽ na ee. Siqui sacua mbae mo ndese seje, i rei que Marta Jesús je ra. 41 Jesús que ñee Marta je ra. —¿Mbaerã ereico siqui jate mbae rese re, Marta? 42 Aque mi ndese chõ eico ndenongue rã si ae, Marta. María riqui secheẽ andu andu a resẽ. Emo nda embui eã secheẽ si, i que Jesús Marta je ra.

11

Jesús mbia mbaaquiato quiatu ñee tura sacua Dios je

1 Emo mose que Jesús chi ñee ngu je ra. Hui mose que echimbaaquiato ñee ee cote ra. —Urererequa, urembaaquiato rã ñee Dios je. Sã Juan uchimbaaquiato mbaaquiato no, i que Jesús chimbaaquiato ñee ee ra. 2 Jesús que ñee ee ra. —Eĩ jenyẽ chõ nguia Dios je ñee mose:

Paba ibatenda, sã mbia ñee turã ja bei quia nderĩ.

Mbia rerecuarã ja sacua echu jei íbii. Sã mbia ibatenda siqui beite ndebi rese no.

Sã mbia ibi jenda abe riqui ndebi rese.

3 Ae ra ureu namo, ñquĩ embu rã urechiurã.

4 Ae uresaã icuã icuã ndeje nae, ñquĩ embutiã ná uresi.

Sã ureico tesareĩ mbia icuã icuã mose ure je no.

“Mbae icuã jẽsaã” ¡ichĩ nda emo ure je jẽ!

Urerequiato mbae icuã si.

Eĩ jenyẽ chõ ñee mose Dios je, i que Jesús embaaquiato ra. 5 Jesús que ñeembe ee ra. —“Mbae embu seje”, jẽ i mose jẽquiato je, ¿mee nda jẽje re? Sã jẽingo oso jẽquiato rea itondiite rete mose no. “Mbichae prestar ere rã seje. 6 Sequiato mo ngue tu serea ra. ¿Mbae ra amee ee re?” jenyẽ chõ ee. 7 Ae je jẽingo ñee nae, ¿mee eã nda jẽje re? Sã ñee jẽje no. “Jẽso rei. Seiquesa átãte. Co achu seriirĩ ndese quisa ye co. Sehuã sereãte. Mbae mo amondo aronea tuchite ndeje”, ¿i ra

jêje re? ⁸ Mondo eã aroneate jêje jeñee mbei bei mose ee. Nyuruã sereãte raque uquiato je. Ñee mbei mose ee, nyuruã nda mbae mondo turã ee. ⁹ Eĩ si chõ Dios no nde. Jeñee i i mose Dios je, mbae ra emondo jêje no. Jê mbae mo ndequia i i mose, jêtea rae. Jê eiquesa mbu i i mose, mbuquiata ra jêje cote. ¹⁰ Ae ñee i ite quia Dios je nae, mbae ra Dios mondo ee. Ae mbae mo sequia i ite quia nae, tea rae. Ae eiquesa mbu i ite quia nae, equia ra ee. ¹¹ Jendiirĩ “mbichae embu seje” i mose, ¿sita ra eru mee ee re? Jendiirĩ “sira embu seje” i mose ¿mbei ra eru mondo ee re? ¹² Jendiirĩ “nguira chia embu seje” i mose, ¿quiraẽ nda eru mondo ee re? ¹³ Mbia icuã nyee mbae turã mondo mondo quia nguiirĩ je ã. Jendu Ibatenda quia ra mbae turã tuchi mee jêje. Jendu ra Espíritu Turã mee jêje, jeñee mose ee, i que Jesús ee ra.

Aba checuayã quirãcuã Jesús quereco co, i raque mbia

¹⁴ Emo mose que Jesús aba checuayã icuã mbusẽ emo ñia si ra. Aque aba checuayã nguia echeẽ mbaaquiataũte nguia. Jesús embusẽ mose que ñee cote ra. Ñee mose que mbia nyuruira tuchi mae erese ra. ¹⁵ Emo emo ngue ñee nda. —Aba checuayã icuã nderecuu tuchi chõ Satanás nde. Satanás quirãcuã je chõ Jesús riqui nguia aba checuayã icuã mbusẽ mbusẽ mbia si co, i rei que emo emo nda. ¹⁶ —Ma Jesús aquiature, i que mbia ñee nyue ra. —Jesús, mbia mae sayã mo esaã na ure je, i que mbia ñee Jesús je ra. ¹⁷ Jesús que ũquĩ ndua ndua icuate ra. Nyebe ñee nguia ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno. ¹⁸ Satanás icuã icuã mose nyue, Satanás quirãcuã nda ua no. Jeñee ñooño ño nguia seje ã. “Satanás quirãcuã je chõ Jesús riqui nguia aba checuayã mbusẽ mbusẽ mbia si”, jenyee chõchĩ nguia seje ã. ¹⁹ ¿Aba jeñimbaaquiatu mbirãcuã jê nde?

Aba checuayã icuã mbusẽ nonde re. ¿Satanás jeñimbaaquiatu mbirãcuã serese re? ²⁰ Dios quirãcuã je quiatu aico aba checuayã mbusẽ mbusẽ mbia si ã. “Dios quirãcuã ndese chõ ureico nguia mae”, jenyee eã ñochĩ nguia ã. ²¹ Satanás quirãcuã tuchite raque. Umbae raarõ tuchite raque. “Sembae chi turãte a”, i raque. ²² Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ²³ Ae siqui ãte quia serese nae, ũquĩ icuã ño eriqui nguia seje. Ae mbae a ishao shao raanguia eãte quia seje nae, ũquĩ icuã ño eriqui nguia seje.

Aba checuayã icuã nyebi u mbia chiangui re

²⁴ Aba checuayã icuã usẽ mose emo ñia si, ngata bei chõ nguia. “¿Mangue ra sequenea aucua que re?” i chõ nguia. Uquenea ucua sacua ngue eate eãte ra. “Tasobe rei nyebi. Ae si achu usẽ, aque chiã ye si taso”, i que aba checuayã nda. ²⁵ Aba checuayã nyebi si mose u, mbia chiã ndecoteã eãte que ee ra. Tuchua tii ji raãte que ee ra. ²⁶ Aba checuayã icuã ngue nguesenda siete queru cote ra. Ique ja que echoi aque chiangui re cote ra. Ae chiangui re aba checuayã icuã siete riqui nae, aque icuã i i tuchi que cote ra. Ñiinda si. Aba checuayã mii ngue siqui eye nyii ra. Etubiriãte cote, i que Jesús ee ra.

Dios cheẽ andusa je quiatu mbae roonde

²⁷ Jesús cheẽ mose que cuña mo tasẽ tuchi ñee mombo ra. —Mbae roonde tuchiñi ndesi je nye. Ae nembuquiambu quia, i que cuña mo ñee mombo Jesús je ra. ²⁸ Jesús que ñee ee ra. —Dios cheẽ andusa je quiatu mbae roonde riqui nguia. Dios cheẽ mumbasa reã je quiatu mbae roonde riqui nguia, i que Jesús ra.

Mbia mae sayã esaã ure je, i bei mbia Jesús je

²⁹ Mbia que ngaẽ tuchi Jesús rĩchĩ nda. Jesús que ñee mbia je ra. —Co mosenda mbia icuãte riqui ã. “Mbia mae sayã esaã ure je”, i beite equia seje ã. Mbia mae sayã mũ ño nda asaã ee. Jonás na si. ³⁰ Sã Jonás ndiqui raque sira rie ye tres días nae, sã mbia Nínive jenda echeẽ andu cote nae. Jonás na si ra asaã mbia je. Mbia co mosenda je mae sayã tasaã. ³¹ La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu isho tuchi si Salomón ñee andu no. Se quia acheẽ ndaque quia jẽje. Searacua tuchi raque se quiatu Salomón si. Secheẽ jemumbate chõchĩ NGUIA Ñ: Nyebe ra Dios jembasi tuchi mbia icuã ndea rea mose. ³² Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huĩcuã ndecha Jonás ñee mose ee no. Aico raque ñee jẽje, co mosenda je. Jẽ secheẽ jemumbate chõchĩ nguia ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose.

Nanderesa quiarei mbae resae nanderete je

³³ Nande lámpara mendi mose, nandemũ aroneate mbaequi re. Nandemũ aroneate mbae mo ye. Nandemingo quia ibate erenda rese. Mbia resae ja sacuã. ³⁴ Nanderesa quiarei mbae resae nanderete je. Nanderesa turã mose, nanderete abe ra oso turã. Naneeresa icuã mose, nanderete abe ra oso icuã icuã no. ³⁵ Tata rendi rã jẽingo bei. ³⁶ Tata rendi rã jẽingo bei mose, jemaie turã nda mbae ja rese cote. Sã tata rendi riqui nanderesae no, i que Jesús mbia mbaaquiatu ra.

Jesús ñee asi fariseos je

³⁷ Jesús ñee jare que fariseo mo ñee ee cote ra. —Nyao rã sechuchúaa. Terequiaru serese, i que ñee Jesús je ra. Jesús que oso erese ra. Ngoi que quiaru cote ra. ³⁸ Fariseo que ñee uchiangui re ra. —Jesús choi quiiriã ño quiaruchĩ, i que uchiangui re ra.

³⁹ Jesús que ñee asi ee cote ra. —Jẽo achõ ño jẽirei ireichĩ nguia. Jeñiangui renda quia eicuãte re. Jeñiangui renda quia jẽirei ãte nguia. Abei chiãte chõ jẽingochĩ jeñiangui re. ⁴⁰ Nandeo achõ eã ño ngue Dios saã nguia. Nandechiangui renda abe chõ ngue Dios saã ndesẽ. ⁴¹ Abei chiãte chõ jẽingochĩ jeñiangui re ã. Jeñiangui renda turã mose, eĩ nda jeturã ja rei. ⁴² Aba mbia eã tuchichĩ jẽ, Fariseos. Mbae a jemondo mondo tuchi raque Dios je. Jenyesequa eãte quia erese jeñiangui re re. Jẽingo turã eãte quia mbia rese no nde. Uũquĩ jẽsaã jiri ae. Mbae a abe jemondo Dios je. ⁴³ Aba mbia eã tuchichĩ jẽ, Fariseos. “iSerendarã turã nguiatu se jẽ!” jenyete chĩ nguia mbia ñumunua mose. “Sã mbia sererecua i nande je”, jenyete chĩ nguia no. ⁴⁴ Aba mbia eã tuchichĩ jẽ, Fariseos. Embesasa abe no. Jenguasu jẽsaã saã techĩ nguia mbia je. Mbia raaque tãsa rã ño jeñiangui renda re. Jeñiangui renda soõ ño nguia. Erondeite. Sã eraaque tãsa yenda soõ no. Mbia jirandu eã ndaque jeñiangui renda soõ ndese, i que Jesús ñee fariseos je ra. Embesasa je abe no. ⁴⁵ Embesasa mo ngue ñee Jesús je cote ra. —¿Mbaerã ereico ñee ure abe je re? i que ra. ⁴⁶ Jesús que ñee uũquĩ abe je ra. —Aba mbia eã tuchichĩ jẽ abe. Jeñee tuchite quia mbia je ã. Dios cheẽ jembeta mbeta tuchichĩ nguia mbia je ã. Mbia echeẽ mumbayã aroneate chee quia ã. Jẽ si chõ jeñee jemumba mumba nguia ã. ⁴⁷⁻⁴⁸ Cose ndare rã si jẽingo nguia ã. Jenamei na si. Sã ñi jenamei icuã icuã ndiqui Dios cheẽ mbuchecuaa je cose no. Eĩ jenye si chõ nguia ã no. ⁴⁹ Dios quiarei earacua tuchi. Ae que ñee jẽje ra. “Secheẽ mbuchecuaa emo emo nda amondo mbia je. Mbia icuã icuãte ra secheẽ mbuchecuaa je. Secheẽ mbuchecuaa mo iquia chee, i que Dios ñee nda. ⁵⁰⁻⁵¹ Ae Dios quiato iquia iquia quia cose nae, uũquĩ ñi nda Dios jembasi cote. Sã mbia

Abel iquia cose no. Sã mbia Zacarías abe iquia altar jii no. Sã mbia Dios quiato iquia iquia bei cose no. Ũquĩ ja rĩĩ nda Dios jembasi cote. ⁵² Aba mbia eã tuchichĩ jẽ. “Ure mĩĩ ño Dios cheẽ ureicua nguiã ã”, jenyẽ chooño ño nguiã ã. Dios cheẽ jẽisi turã eãte quia ã. Mbia siquise mose Dios rese, jẽingo emingo eãte erese ã no. Jẽ abe chee jẽingo eãte erese ã no, i que Jesús ñee embesasa je ra.

⁵³⁻⁵⁴ Jesús ñee jare que fariseos paama i tuchi ee ra. Embesasa abe paama i nguiã ee no. Ũquĩ ngue ñee ñee tuchi Jesús je ra. —Sã Jesús ucheẽ tasa tasa nande je no. Ũquĩ mose nandeisi serao policíaa, i tuchi que ra. Nyebe eriqui nguiã Jesús rea chemi ñemi.

12

Jẽturã nda jẽsaã ñooñochoĩ jẽ

¹ Mbia tubiriã ngue ngaẽ ngaẽ nguia Jesús rea cote ra. Cuaacua i tuchi que equia nyuera. Mbia tubiriã tuchi. Jesús que ñee uchimbaaquiatu je cote ra. —iFariseos rã nda jẽingochĩ jẽ! Uturã naa ñooño mbei. ² Ae mbia saã nyecuayã cuayã nguia nae, ũquĩ nda nyecua ja cote. Ũquĩ nda mbia icua ja cote. ³ Ae jeñee nguia itondaru jẽingo mose, ũquĩ nda nyecua ja mbia je cote. Jeñee equia nyiisa isa nae, ũquĩ abe ra nyecua ja mbia je no.

Dios riqui jendeaquiatu bei co

⁴ Tacheẽ nyecua jẽje, Sequiato. Ae “taiquia” i quia jeni nae, iũquĩ si ra jẽsiquichechĩ jẽ! ⁵ Ae aba mombo serĩte quia tata cuasu nae, aque si quiatu jẽsiquiche. iAque si quiatu jẽsiquiche tuchi jẽ! ⁶ Nguireĩ ndei aba queteamba eã jiri. Mbae isiquia mumba eã jiri raque. Dios quia nguireĩ icua jate nguiã. Dios ra tesareĩã nguireĩ mo si. ⁷ Dios riqui jẽ mĩĩ mĩĩ icua ja co. Dios riqui ngueteã jiri jendese nguireĩ si co. Nyebe jẽsiquicheã mbae mo si.

Jesús quiato chõ se re, jenyẽ checua chõ nguia mbia je

⁸ “Jesucristo quiato chõ se re”, ae i quia mbia je nae, ũquĩ nĩĩ nda acheẽ turã se abe. “Sequiato chõ ã nde”, ae ra se. Angeles ra ambiirandu ja ũquĩ ndese. ⁹ “Jesucristo quiato chõ se re”, ae iã nguia mbia je nae, ũquĩ nĩĩ nda acheẽ turã eã. “Sequiato eã ño ũquĩ nde”, ae ra se. Angeles nda ambiirandu ja sequiato eã ndese. ¹⁰ Emo ñee icuã mose serĩĩ, Dios ra echeẽ icuã mbutiã arõte. Emo ñee icuã mose Espiritu Turã nĩĩ, ũquĩ icuã nguia ra Dios mbutiã eã mbei. ¹¹ Mbia icuã icuã nda jẽje serĩĩ. Jenderao mose mbia rerecua je, jẽiquicoi coichĩ nda jẽ! “¿Mañi nande ra ñee ee re?” jjenyechĩ nda jẽ! ¹² Huee quia ra Espiritu Turã ñee nguiã jẽje jembucheẽ sacua, i que Jesús ñee uchimbaaquiatu je ra.

Mbaecha aracuayã

¹³ Emo ngue ñee Jesús je ra. — Sererecua, senongue icuã icuãte seje. Echeẽ na senongueje. Ae ureru secha ure je nae, senongue embuchecha turã eãte seje, i que mbia mo ñee Jesús je ra. ¹⁴ Jesús que ñee ee ra. —¿Mbaerã nda re? “Mbia mbae embuchecha turã turã ee”, iã ngue Dios seje ra, i que Jesús ee ra. ¹⁵ —iEmo mbae rese ra jemaie maechĩ eosei sacua jẽ! “Sembae tubiriã mose ra seyate cote”, jjenyechĩ nda jẽ! i que Jesús ee ra. ¹⁶ Jesús que ñee ee ra. —Sã mbaecha mo ndiqui no. Ibicha. Sã embae ia tuchite no. ¹⁷ “¿Mañi ae ra se re? ¿Mangue ra aba ererecoquiatu re?” i tuchi que mbaecha uchiangui re ra. ¹⁸ “Sembae ruacuã tambucuasutuchi. Quiata a ruacuã. fnda sembae ique ja tuchi huee. Ae arecoquiatu quia ã nae, ũquĩ nda tenda ata jiri tea seje chã. ¹⁹ Aquieĩ quieĩ eã mbei ra se quia cote. Aquiaru quiaru chõ nda se quia cote. Mbae ra ambei mbei chõ nguia cote. Achimbia mbia chõ nda se quia cote”, i raque mbaecha ñee uchiangui re. ²⁰ Dios que ñee ee ra. “Ndearacuayãte ereico co. Co

isa chõ nda eremano. Ae ererecoquiature quia nae, aba je chio nda ùquĩ cote”, i que Dios ñee mbaecha je ra. ²¹ Ae mbae munua nua mbei quia nae, ererecoquiature sacua nae, earacuayã tuchi chõ ùquĩ nde. Dios quiato eã ño ùquĩ nde, i que Jesús mbia mbaaquiature quiature ra.

Dios uquiato reaquiature bei

²² Jesús que ñee uchimbaaquiature je ra. —“¿Mbae ra nandeu re?” jjenyechĩ nda quicoi coi jẽ! “¿Ma tiru ra nandemingue re?” jjenyechĩ nda quicoi coi jẽ! ²³ Mbia chiue ae ra mbia mingo eã. Mbia irao abe ra mbia mingo eã no. ²⁴ Sã nguireĩ no. Mbae tiquiayã ndaque. Mbae ishao eã ndaque no. Mbae ruacuã eãte raque embae. Dios quiareĩ embuquiature quiature. Jẽ nguireĩ Dios queteamba tuchi nguireĩ si. Nguireĩ ja si. Jẽ abe Dios ae jembuquiature nguia jẽ no. ²⁵ Mbia ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbu-tiarõ arõ nguia. ²⁶ Jẽ mbae ñetẽ naa aquiature mose, ¿mbaerã jẽingo “mbae cuasu tasaã” i re? Dios quia ra mbae saã ja jẽje. ²⁷ Sã mbae uti turãte riqui no. Mbae ao ao eã ndaque. Ninyu mburirã eã ndaque. Mbae uti quiareĩ eturã jiri Salomón si. Salomón turãte raque. ²⁸ Sã Dios quiata mbaturã no. Quiata mano jeite raque. ¿Mañi nda Dios jemburaõ eã jẽ nde no? ¿Mbaerã jẽingo Dios icuayãte re? ²⁹ “¿Mbae ra nandeu re?” jjenyechĩ nda pare pare i jẽ! “¿Mbae ra nandembei re?” jjenyechĩ nda quicoi coi no jẽ. ³⁰ Eĩ ño Dios quiatoã nguia. Jẽ nguia jendu tesareĩa mbeite nguia jẽsi. ³¹ Jẽ nguia jẽingo tuchi Dios rese jenderecuarã. Ùquĩ mose ra Dios mbae mee mee mbei jẽje. Jenyurã. Jeñimbeirã abe no.

Jembae jemondo ja Dios je

³² Jësiquichechĩ nda mbae mo si, Seriirĩ. Jendu ra umbae mondo ja jẽje. Dios iate ra umbae mondo mose jẽje. ³³ Jembae jemondochõ ño mbaecha

reã je. † nda jembae tubiriã jẽingo mose ibate cote. Mbae riru ra soro soroã mbei jembae ibate cote. Mbae ra ua eã mbei huee. Mbia ra mbae mbuquiachãya huee. Chicuaquiareĩ eãte ra huee no. ³⁴ Jẽ jembae mondo mondo mose ibate, jendua ra ibatenda rese cote. Jẽ jembae monoã mose emo je, ibatenda rese ra jendua eãte.

Jẽingoquiature bei chõ nguia

³⁵ Jẽingoquiature bei quia jẽ! Iton-daru abe jẽingoquiature quia. ³⁶ Sã ererecua mo no. Oso ngũinisirã nderequia no. Huee erimba mo ndiqui echuchua raarõ huee. Aque ererecua ru quia eiquesa mbuu mbuu aque cote. Erimba eequia asi ee cote. ³⁷ Erimba uqueã mose nguerecua tu mose, ererecua ia tuchi ra erese. Ererecua ra embuquiature turã. Ae sí chõ echara chara nguia ngũimba je hue no. ³⁸ Ererecua ra tu arõte itondáruu. Itondiite mose abe no. Erimba uqueã mose nguerecua tu mose, ererecua ia tuchi ra erese. ³⁹ Sã emo ñee ndeje no. “Co mose ra mbae mbuquiachãsa ru nembae rirõ”, i ndeje no. Ùquĩ mose ra erequeã. Nembae ra eresaarõ mbei esi. ⁴⁰ Eĩ jenje jẽ abe icoquiature. Eĩ ae ra u ibate si. “Tu eãte rei rae”, i mose quia ra achu, i que Jesús ra.

Erimba echeẽ mumbayã mose, eya tuchi rae

⁴¹ Pedro que ñee Jesús je ra. —¿Aba je ereico ñee ùquĩ nde? ¿Ure mii je ere? ¿Mbia ja je ere? i que Pedro ee ra. ⁴² Jesús que ñee ee ra. — Dios rimba aba cheẽ mumbayã ñi aico ñee co. Dios rimba aracua riãico ñee co. Sã ererecua ñee ngũimba turã je no. “iSembae esaarõ ja jẽ!” i ee. “Serimba ataque embuquiature quiature ja quia no”, i ee. ⁴³ Erimba echeẽ mumbayã mose, ererecua ia tuchi ra tu mose. Erimba abe ra eya no. ⁴⁴ Ererecua ra ngũimba mii mbei cote, umbae raarõ sacua. ⁴⁵ Sã erimba ndua ndua uchiangui re no. “Sererecua ra tu jei ãte”, i ndua ndua. Hue ñee icuã icuã uataque je huee

cote. Iruã nua cote. Quiaru chooño cote. Mbae mbei chooño abe cote. Quiacua quiacua cote. ⁴⁶ Sã ererecua ru quia ngũimba mbuate aque cote no. Ñee ee. “Mbae ra eresaarõã mbei seje cote”, i ngũimba je cote. Ngũimba iruã nua tuchi cote. Ae aba cheẽ mumbate quia, ùquĩ ndese ra mbae rasi raã naa cote. ⁴⁷ Ae nguerecua cheẽ icuate quia nae, ùquĩ nda ererecua mbasi mbasi bei ucheẽ mumba mose. ⁴⁸ Ae nguerecua cheẽ icua eãte quia nae, ùquĩ nguia ra ererecua mbasi mbasiã jiri ucheẽ mumba mose. Ae Dios cheẽ icua tuchi quia nae, ùquĩ je ra Dios “mbae esaã tuchi seje”, i. Ae je Dios mbae mondo tuchi nae, ùquĩ je ra Dios “mbae esaã tuchi seje”, i.

Achu chõ ngue mbia mbuchao chao nyesi resẽ, i Jesús

⁴⁹ Ibate si que achu íbii ra. Mbua mae sacua sequirãcuã ndese. Mbua sequirãcuã icua eã ñochĩ namo nyee. ⁵⁰ Mbua ra sembasi tuchi cote. Pare pare aete se quia ndua erese co. ⁵¹ ¿Achu reĩ mbia mbuturã turã sacua serimba je jẽje re? Tei. Achu chõ ngue mbia mbuchao chao nyesi resẽ. ⁵² Mbua chuchua jenda ra ñimbuchao chao nyesi. Nyeremo nda siqui serese serimbarã. Eataque ra ñimbuchao esi. ⁵³ Emo nda eicuãte ngu je serĩ. Emo nda eicuãte nguiĩri je serĩ no. Emo nda eicuãte usi je serĩ no. Acuanĩ abe ra eicuãte uchari je no. Ari mo abe ra eicuãte nguiĩri ninisi je no. Eĩ si ra mbia icua icua uchue serĩ no, i que Jesús ra.

Ae ibatenda ra tu icuãte mbia je nae, aque jẽicua eãte chõchi

⁵⁴ Jesús que ñeembe mbia je ra. — “Ama nda nyaaqui”, jenyee bei quia pã i mose ã. Ibei jẽicuate raque quia ã. ⁵⁵ “Tenda rasite ra cote”, jenyee bei quia quiririã ichu ichu mose ã no. ⁵⁶ Ibei jẽicuate raque quia ã. Tenda abe jẽicuate raque quia ã no. Ama abe no. Dios rucucha ra tu mbia je, ¿mbaerã jẽingo ùquĩ icuayãte quiatu

re? ¿Mbaerã jẽingo jëaracua raã naa nde?

Ae eicuãte riqui jẽje nae, “nandeico turã ño nguia”, jenyee chõ nguia ee

⁵⁷ ¿Mbaerã jẽingo mae sereãte mbae turã ndese re? ⁵⁸ Emo ñee icuã mose jeni mbia rerecua je, jëturã ño ee. Jeñee turã ño ee. Jë ae chõ jeñimbuturã nguia erese. I nda jenderao icuã eã. Jenderao mose ra jëtarõ mbei cárcel. ⁵⁹ Huee ra jẽingo bei. Jembae mondo ja tuchi chee ee, i que Jesús ra.

13

Jëhui chõ jẽicua si

¹ Aque mose que mbia Jesús mbiirandu Pilato riã nda. Pilato nda mbia Galilea jenda mo icua icua ra. Mbua ticuasu icua icua mose Dios mbaerã. ² Jesús que ñee mbia je ra. —Ae Pilato icua icua quia nae, ¿ùquĩ eicuãte riqui reĩ mbia ataque si re? Tei. Jẽicua ja chõ jẽingo nguiã ã no. ³ Jëhui eã mose jẽicua si, jemano ja chõ nda jë abe. Ùquĩ na si. ⁴ Sã torre de Siloé ngoi mbia ati no. Dieciocho icua. ¿Ùquĩ eicuãte riqui reĩ mbia ataque si re? Tei. ⁵ Eĩ ja chõ ñene. Jëhui eã mose jẽicua si, jemano ja chõ nda jë abe. Ùquĩ na si, i que Jesús ra.

Ira ia ea mbei

⁶ Jesús que ñee mbia je ra. —Sã amei mo ira tiquia rei no. Ia eã mbei chõ ee no. “Ma taso erea no. Ia cote reae”, i rei que amei nda. Ei oreãte que ee ra. ⁷ Nyebe amei ñee nguiã ngũimba je cote. “Ira a rea ngue aso rei nguiã. Ia eã mbei chõchĩ seje tres años. ¡Echisia chõ oso jë! Ibi riquisã ñooño uã aque”, i que amei ngũimba je ra. ⁸ Sã erimba ñee amei je no. “Co tenda mose nandechisia eã na. Equi tambuturã. Mbae ruusi tachono ñono erao rese. ⁹ Ma ia eãte co tenda. Ia eã mose, nandechisia chõ cote”, i que erimba amei je ra, i que Jesús mbia mbaaquiату ra.

Jesús ari rasi mbucherõ

¹⁰ Sábado mose que Jesús chi mbia mbaaquiato quiato ra. Judíos chumunuásaa. ¹¹ Cuña ndasi mo ngue siqui hue ra. Nyiituquia bei dieciocho años nyee. Aba checuayã icuã nguia embasi nguã. Ari que nguete isoã mbei quia ra. ¹² Jesús que mae ari rasi rese ra. —Echu rã aa, i que ee ra. —Cuña, nderasi ãte cote, i que Jesús ee ra. ¹³ Jesús que o chono erese ra. Aque mose tuchi que ari nguete iso turã cote ra. Ari que ñee turã turã Dios je cote ra. ¹⁴ Ererecua judíos munuasa que paama i tuchi Jesús je ra. Ari mbucherõ mose sábado. —Sábado eã mose chõ nandeico mbae rese ae. Sábado eã mose chõ nandeico erasi mbucherõ ae. Sábado mose chõ Dios mbae resẽ. Erasi mbucherõ aroneate co mose resẽ, i rei que ererecua mbia je ra. ¹⁵ Jesús que ñee ee ra. —¿Mbaerã ereico ndeturã naa ñooño nde? ¿Sábado mose jẽingo ticuasú mbui eã mbei embiu sacuã nde? ¹⁶ ¿Mañi nande ra cuña ndasi mbucheroã co sábado mose re? Judía sí chõ nyeresẽ. Jẽ na si. Satanás que embasi cosete ra. Dieciocho años chee. ¿Mañi ae ra erasi mbui eã esi sábado mose re? i que Jesús ñee nda. ¹⁷ Mbia ataque iate que Jesús cheẽ mose ra. Jesús chiao rese abe eyate no. Ae Jesús ucuãyãte quia, ùquĩ ngue eireĩ tuchi Jesús cheẽ mose ra.

Mbae eĩ na ño Dios rimba re

¹⁸⁻¹⁹ Jesús que ñeembe mbia je cote ra. —¿Mbae rã ño Dios rimba chã? Mbae eĩ na ño Dios rimba re. Sã mbia mostaza eĩ tiquia no. Ieĩ ñetẽte raque etiquia ramo mose. Suri oso quia cote. Ecuasu tuchi chee cote. Nguireĩ uquisa saã nyee erãquiã ndese. Eĩ si chõ Dios rimba re. Ùquĩ mii ndaque nyii. Ñimbeta tuchi cote. Mbae eĩ na.

Levadura rã ño Dios rimba re

²⁰⁻²¹ ¿Mbae rã ño Dios rimba chã? Levadura rã ño Dios rimba re. Sã mbia levadura ñetẽ mondo mbichae ao ramo mose no. Levadura oso quia mbichae mbuchimatã ja no. Eĩ si chõ Dios rimba re, i que Jesús ra.

Eiquesa chumumbi

²² Jesús que oso quia Jerusalén nda. Tiba tiba que oso quia mbia chuchua mbuchesea sea ra. Mbia mbaaquiato quiato. ²³ Emo ngue ñee Jesús je ra. —Sererecua, ¿mbia mii mii ño nda siqui ibate nderese re? i que emo ñee Jesús je ra. ²⁴ Jesús que ñee ee ra. —¿Eiquesa chumumbi rĩ ño jẽso ique jẽ! “Hue rĩ nda aso se abe ique”, i ja jate raque rae. Tei. Ique ja eã nguia nda re. ²⁵ Emo mose ra eiquesa amatã mbei cote. Emo nda iqueã mbei cote. Eiquesa ra jembuu mbuu raque cote. “Sererecua, eiquesa embuquiata rã ure je”, jenyeraque ra seje cote. Acheẽ nda jẽje. “¿Mangue jenda jẽ nde? Jaẽicuayãte se”, ae ra jẽje cote. Eiquesa ra ambuquiatayã mbei jẽje cote. ²⁶ Jeñee tuchi raque ra seje cote. “Urequiaru que equia nderese. Nde que urembaquiato quia. ¿Mañi ere ra urerecha re?” jenyeraque ra seje cote. ²⁷ Acheẽ nda jẽje cote. “Jaẽicuayãte se. Jẽso serecha. Mbae icuã ngue jẽsaã saãte quia resẽ”, ae ra se hue cote. ²⁸ Hue ra jenyeseo seo seje huee cote. Jeñee nda seje. “Abraham ño siquichĩ nderese hue. Isaac abe no. Jacob abe no. Dios cheẽ mbuchecuasa ja abe no. Ure chõ urecuchĩ taicuee a”, jenyera nyeseo seo seje huee. ²⁹ Mangue jenda chooñoa nda ngaẽ ngaẽ Dios riichã aque mose. Quiaru quiaru ra equia Dios rese. ³⁰ Ae eaquiature riqui raque namo nae, ùquĩ mo nda eñetẽ na pee cote. Ae eaquiature riqui raque namo nae, ùquĩ mo nguia ra siqui ecuasurã tuchi pee cote, i que Jesús ñee nda.

Jesús ia eã tuchi Jerusalén jenda rese

³¹ Aque nyaashĩ mose que fariseos ngaẽ ñee Jesús je ra. —¿Eso a si jẽ! Herodes ndeiquia serĩte quia co, i que Jesús mbiirandu ra. ³² Jesús que ñee ee ra. —Eoita rã ño Herodes re. Jẽso ñee ee. “Jesús que ñee ndeje ra. “Taico mbirimbe rã aba checuayã icuã jea jea mbia si. Taico

mbirĩmbe rã mbia rasi mbucherõ cherõ. Namõ. Isamami abe. Isamami nongue ra ahui erecha cote', i que Jesús ndeje ra", jenyẽ oso Herodes je. ³³ Taicobe jiri namõ. Isamami. Isamami nongue abe no. Jerusalén nguia nda sei quia nguia. Sã Dios cheẽ mbuchecuaa mano ja Jerusalén no. ³⁴ Tacheẽ na jẽje, Jerusalén jenda. Seya eãte aicochĩ jendese co. Hue jẽingo mbia iquia iquia beite hue. Dios cheẽ mbuchecuaa iquia iquia. Dios chĩmondo abe iquia iquia no. Sã nguira riqui nguĩre reaquiato mundo ujeoqui re no. "Eĩ tae jendeaquiato", ae beite rei nguia jẽje co. Secheẽ jẽisi sereã mbei chõchĩ nguia ã. ³⁵ ¡Aico jendecha a cote jẽ! Jemaẽ mae eã nda serese cote. "¡Co chi Dios rucucha ru quia co cote jẽ!" jenyẽ mose, hue ramo nguia ra jemaẽ serese cote.

14

Jesús mbia rete ruru mbucherõ

¹ Jesús que oso rei quiaru fariseo rerecua mo nyuchúaa ra. Sábado mose. Fariseos mo ngue chi erea chemi ñemi nda. ² Huee que emõ ndasi riqui Jesús je ra. Erete ruru ja que ra. ³ Jesús que ñee fariseos je ra. Embesasa je abe. —¿Eicuãte se erasi mbucherõ mose sábado mose re? I ere. Jeñee seje, i rei que Jesús ee ra. ⁴ Jesús cheẽ mose que mbia mo ñee eãte ee ra. Jesús que erasi mbucherõ mundo cote ra. ⁵ Jesús que ñee fariseos je ra. —Sã jenimba ticuasú riqui jaã no, ngoi oso ibicuarie. ¿Sábado mose ra jẽsiquiã nde? i que Jesús ee ra. ⁶ Fariseos que ñee sereãte echeẽ mose ra.

Jẽcuasu ra jẽsaã saãchĩ, i Jesús mbia je

⁷ Mbia que erenda turã isirõ sirõ nguia ra. Ngoi sacua ererecua ji. Ucuasu raã naa sacua. Nyebe Jesús ñee nguia ee. ⁸ —Jẽingo mose fiesta, jerenda turã mo nda jẽisirõchĩ jẽ! Mbia chĩcuate mo nda tu arõ ndeje cote. ⁹ Fiestacha ra ñee arõte ndeje. "Ehuã

na nde. Erenda turã tamondo sequiato je", i arõte ra ndeje. Ndeireite ra huee cote. Pe quiti jiri ra nembucoi cote. ¹⁰ Jẽingo mose fiesta, pe quiti jiri chõ jengoi. Erenda turã isirõ nocoĩ. I nda fiestacha ñee ndeje. "Quiatuchu a jiri, Sequiato. Erenda turã tose", i sacua ndeje. I nda mbia mae ja nderese. ¹¹ Ae ererecua saã saã nguia nae, ñquĩ nda siqui eñetẽ na cote. Ae siqui minguete quia nae, ñquĩ nda siqui ererecuarã cote, i que Jesús mbia je ra.

¹² Fiestacha abe je que ñee cote ra. —Nde fiesta raã mose, "jenyu quiaru serese", jerechĩ nda mbaecha jiri je jẽ! Erechĩ nda ndenongue je. Erechĩ nda ndequiato tuchi je. Ñquĩ mose ra embuchebi ndeje. Dios quia ra embuchebiã ndeje cote. ¹³ Nde fiesta raã mose, "jenyu quiaru serese", ere chõ mbaecha reã je. Ere chõ mbia rasi rasi je. Mbia cuatayã je. Mbia resayã je. ¹⁴ Nde fiesta raã naa mose ñquĩ je, ñquĩ nda embuchebiã ndeje. Dios quia ra embuchebi ndeje, Dios quiato quera si mose. Ñquĩ mose ra ndeya tuchi, i que Jesús fiestacha je ra.

Ererecua quiaru mbaecha reã ndese

¹⁵ Ñquĩ andu mose que emo ñee Jesús je ra. —Ababi tuchi siqui Dios rese ae ererecua tuchi mose, i que emo ñee Jesús je ra. ¹⁶ Jesús que ñee ee ra. —Sã emo fiesta raã no. "Jenyu quiaru serese", i sacua mbia tubiriã je. Mbia chiurã ngue esaã tuchi ra. ¹⁷ Echiurã quiche ja mose que ngũimba mo mundo cote ra. "Ae je acheẽ, sã ecuaẽ quiaru cote", i que ngũimba je ra. ¹⁸ "Ateẽ. Aso eã nda se. Serecoteãte chõchĩ", i ja ja que ra. "Ibi mo ngue aisi ramote ra. Taso rã erea", i que emo ucheẽ mundo fiestacha je ra. ¹⁹ "Ticuasú mo ngue aisi ramote ra. Cinco yuntas. Taso rã erea", i que emo ucheẽ mundo no nda. ²⁰ "Seninisirã mo areco ramote co. Nyebe ra asoã quiaru nderese huee", i que emo ee no nda. ²¹ Erimba

que tu nyebi ñee nguerecua je ra. “Erecoteã ja jate que ra. Quiaru eã nda nderese”, i que erimba embi-irandu ja ra. Ererecua que paama i ra. Ngaẽ eã mose erea. Ae ñeembe nguiã ngũimba je. “Eso ñee ũquĩ je quiatu no. Mbaecha reã je. Mbia rasi rasi je. Mbia cuatayã je. Mbia resayã je. ũquĩ ja je echeẽ. Sã ecuaẽ quiaru serese”, i que ererecua ra. ²² Emo mose jiri que erimba ru ñee nyebi ee ra. “Acheẽ ñee ja que ee ra. Co ecuaẽ ndaque nguiã co. Mbia miite que ra”, i que erimba ñee fiestacha je ra. ²³ Ererecua que ñeembe ee ra. “Esobe ñee ñee emo je no. Eru ja sechuchua. Quiaru sacua serese. I nda sechuchua mbiitãyã jiri. ²⁴ Ae je acheẽ nyii, ũquĩ nda quiaruã tuchi serese cote”, i que ererecua ñee asi ra, i que Jesús ñee nda.

Jesús rui aba siqui jei aronea

²⁵ Mbia tubiriã ngue siqui quia Jesús rui ra. Jesús que uba ñee ee ra. ²⁶ —Ae nyesequa tuchi quia ngurese sesi, ũquĩ nda serimba eã. Ae nyesequa tuchi quia usi rese sesi, ũquĩ nda serimba eã no. Ak nyesequa tuchi quia ngũinisi rese sesi, ũquĩ nda serimba eã no. Ae nyesequa tuchi quia nguiirĩ ndese sesi, ũquĩ nda serimba eã no. Ae nyesequa tuchi quia ngõngue ndese sesi, ũquĩ nda serimba eã no. Ae nyesequa tuchi quia nguere rese sesi, ũquĩ nda serimba eã no. ũquĩ ja ra serimba eã. ²⁷ Ae mano sereãte serĩ, ũquĩ nda serimba eã no. Ae siqui sereãte quia serui, ũquĩ nda serimba eã no. ²⁸ Sã emo ñee no. “Sechuchua tasaã na”, i. “¿Manya mbae isiquia ra amumba sechuchua raã sacuaã nde?” i nyii eao nonde. ²⁹ Sã uchuchua raã naa ndaque no. Hũaẽ tiquia tiquia raque. Hui bei chõ esi cote. Hue mbia iquia iquia ee cote. ³⁰ “Co uchuchua saã saã ndei cose. Saã ja eã mbei chõchi nae”, i ra mbia iquia iquia ee. ³¹ Sã soldados rerecua icuaã icuaã emo je no. Guerra raã serĩ ee. Guerra raã nonde ra

ndua ndua. “Ae quiatu que soldados tubiriãte embae sesi ra”, i uchianguire cote. ³² Nyebe guerra raã eã nguiã ee. Nyebe ucheẽ turã mondo nguiã ee. Isho mose. “¡Nandeico turã ño nyiese jẽ!” i ee. ³³ ¡Eĩ jenye si chõ nguia jẽ! Jendua rã nguia nyii. Jẽ jembae recha ja eã mose, serimbarã eã nda jẽ.

Embiquesa ise quiachamba mose

³⁴ Embiquesa turãte raque. Embiquesa ise quiachamba mose, eicuã tuchi cote. ³⁵ Ñio ye echã aronea cote. Eicuãte cote. Emombo bei chõ cote. Ae eisate riqui, secheẽ jeñandu, i que Jesús ra.

15

Oveja quiachã je

¹ Mbia icuaã ngue Jesús siichã nguia ra. Ae impuestos isi isi quia, ũquĩ abe que Jesús siichã nguia ra. Echeẽ andu sacuaã. ² Nyebe fariseos ñee icuaã icuaã nguiã Jesús rĩ. Embesasa abe ñee icuaã icuaã nguiã erĩ no. —¿Mbaerã Jesús riqui mbia icuaã isi turã turã nde? ¿Mbaerã eriqui quiaru erese re? i que equia ñee Jesús mbutereã tuchi ra. ³ Nyebe Jesús ñee nguiã ee. Embaaquiato sacuaã.

⁴ —Sã emo nimba quiachã oveja no. Cien ndei erimba. Co mi ngue quiachã ee ra. Aque esi quia quiachã je requia aque. Eataque recha. Noventa y nueve recha. ⁵ Quiachã je rea mose, sui cote. Equiaama cote. Eya tuchi erese cote. ⁶ Tu uchuchua cote. “Quiatuchu rã”, i uquiato je cote. Nguesenda je abe no. “Quiachã je que atea cote ra. ¡Sã jẽ! Jeya tuchi serese cote”, i que uquiato je ra. ⁷ Tacheẽ nyecua jẽje. Quiachã je mo nyebi mose, Dios iate riqui co. Mbia icuaã tu mose ee, Dios iate riqui erese co. Ae uturã saã saã nguia nae, ae huĩcuã secha sereãte quia nae, ũquĩ ndese quia Dios ia eãte re.

Mbae isiquia quiachã je

⁸ Sã cuña mo mbae isiquia diez quereco no. Sã aque mi quiachã

ndaque ee no. Lamparina ngue emendi eresae sacua nda. Sa uchuchua tii no. Mbae isiquia rea chee. ⁹ Ereare que ñee uquiato ja je ra. “Quiachã je que atea cote ra. ¡Sã jê! Jêya tuchi serese cote, i que uquiato je ra. ¹⁰ Aico ñee nyecua jêje a. Mbia mo hui mose huicua si, ángeles ibatenda ia tuchi erese, i que Jesús ra.

Ae ngu secha

¹¹ Jesús que ñeembe ee ra. —Sã amei mo eriirĩ nyeremo no. ¹² Eriirĩ ndiquii que ñee ngu je ra. “Paba, mbae isiquia ataque embu rã se sembaerã. Ndemano nonde”, i que ñee ngu je ra. Ae eru mbae isiquia mbuchecha nguiã ee. Mondo eo cote. ¹³ Isamami nongue que eriirĩ nduinda umbae rerecoquiato ra. Ae oso nguiã isho cote. Ngu recha. Huee que mbae isiquia umbae mumba choño ja ra. Mbae icua ndibishorõ. ¹⁴ Hue jenda mbia chi u que uate cote ra. Amei ndiirĩ abe riãcuã nyee que ra. Umbae mumba choño jare. ¹⁵ “Taquiei quiei rã oso ererecua mo je”, i chee. “Teasu socoi esaarõ na serimba”, i chee ererecua mo ee. ¹⁶ “Teasu chi u au chõ mbichĩ ira a. Seriãcuã tuchichĩ”, i chee amei ndiirĩ. Emo ngue embuquiaruã mbei ra. ¹⁷ “Paba rimba chichĩ quiaru turãte sechuchua huee, seriãcuã mose aa. ¹⁸ Tasobe rei Paba rea. Tacheẽ ndei oso ee. ‘Seicua tuchite que ndeje curi ra, Paba. Paba ibatenda je abe no. ¹⁹ Seriirĩ ere eã seje cote. Nderimbarã taico cote’, tae rã oso Paba je”, i que ndua ndua uchiangui re cote ra. ²⁰ Ngu rea que esi cote ra. Isho ereco mose que eru mae erese ra. Amei ia eã tuchi que eriqui erese ra. Amei ngue oso uchã nguiirĩ ndese oo ra. Equiaama. Eritii riite no. ²¹ Ngu je que eriirĩ ñee ndei cote ra. “Seicua tuchite que ndeje curi ra, Paba. Paba ibatenda je abe no. Seriirĩ ere eã seje cote”, i rei que ngu je ra. ²² Eru que ñee ngũimba je cote ra. “Eirao turã mo emondo seriirĩ je. Eiyaorã abe mo emingue ee. Anillo mo abe emingue eo rese. ²³ Ticuasú quira mo

jêquishĩ echo je. Nandequiaru tuchi erese. Fiesta nandesaã ee. ²⁴ Seriirĩ ngue mano naanguia oso curi resẽ. A eru quera si raanguia seje a. Quiachã tuchi que oso serecha ra. A erube seje a cote”, i que amei ngũimba je ñee nda. Eya tuchi cote. Nyebe fiesta raã nguiã nguiirĩ je.

²⁵ Amei ndiirĩ nongue que siqui úcoo ra. Ngasẽ ndaque u quia uchuchúaa cote. Tõotõ i que echandu ra. Mbia cheĩ cururi abe andu. ²⁶ Ñee ngue erimba mo je ra. “¿Mbaerã eriqui toõtõ i re? ¿Mbaerã mbia riqui nyuruqui re?” i que amei ndiirĩ ndiquii ra. ²⁷ Erimba que ñee ee ra. “Ndenongue que tu ngasẽ nderu je ra. Nyebe ticuasú iquia nguiã ee”, i que erimba ñee ee ra. ²⁸ Ae enongue paama i nguiã ngu je. Ique sereã nea ngu chuchúaa. Ae eru tu nguiã usẽ ñee ee taicuee. “Eique rã mae ndenongue rese”, i rei que eru ee ra. ²⁹ Eriirĩ ngue ñee ngu je ra. “Cosete que aico rei quiei quiei ndeje. Ndecheẽ ngue amumba mumba eãte quia emo mose. Mbae mo ngue ereiquia eã mbeite seje. Sembae fiesta raã sacua sequiato rese. ³⁰ Ae tu ramo nderiirĩ, ¿mbaerã ticuasú mo ereiquia ee re? Umbae que emumba choño oso curi resẽ. Siqui siqui cuña icua ndese. ¿Mbaerã ereico fiesta raã ee re?” i que eriirĩ ngu je ra. ³¹ Eru que ñee echeẽ mose ra. “A ereico beite serese a resẽ, Echo. Sembae ja chõ nembraerã ndesẽ. ³² Ndenongue quiato que quiachã nandesĩ resẽ. Mano naanguia oso nandesĩ. A eru si quera raanguia nande je a. Nyebe fiesta nandesaã ee. Nandeya tuchi rã erese”, i que eru nguiirĩ nongue je ra, i que Jesús mbia je ra.

16

Ererecua rimba mo icuquiato

¹ Jesús que ñee uchimbaaquiato je ra. —Sã ererecua mo mbaechate riqui no. Erimba mo ngue embae saarõ ja quia ra. “Nderimba que nembrae mbuquiachã quiachã nguia

ra”, i que mbia mo ererecua mbi-irandu cote ra. ² Ererecua que ñee ee ra. “¿Mbaerã mbia riqui ñee nderiĩ seje re? ¡Cuentas esaã saã mbia mbae ja jẽ! Sembae raarõsa eã nda nde cote”, i que ererecua ngũimba je ra. ³ Erimba que ndua ndua uchiangui re cote ra. “¿Mañi ae ra sequia sererecua se mombo mose re? Sequirãcuã neate quieĩ quieĩ sacua ndesẽ. Seireĩte ache ache i mbia je. ⁴ Ũquĩ ño nda asaã ee nda. ¶ nda mbia seisi turã uchuchúaa sembae eã mose”, i que erimba uchiangui re ra. ⁵ Ae deber i quia ererecua je, ũquĩ je que erimba ñee nda. Co mĩ mĩ je. “¿Manya deber ere sererecua je re?” i que erimba emo je ra. ⁶ “Cien latas de aceite que deber ae ee ra”, i que erimba je ra. Erimba que ñee ee ra. “Nembae cuenta nandemombo chõ. Emo nandesaã asi. Cien eã nda cote. Cincuenta achõ ño nda cote”, i que erimba ee ra. ⁷ Ae deber i quia ererecua je, ũquĩ mo je que erimba ñee no nda. “¿Manya deber ere sererecua je re?” i ee. “Cien bolsas de trigo que deber ae ee ra”, i que erimba je ra. Erimba que ñee ee ra. “Nembae cuenta nandemombo chõ. Emo nandesaã asi. Cien eã nda cote. Ochenta achõ ño nda cote”, i que erimba ñee ee ra. ⁸ Ererecua que jirandu erese cote ra. “Serimba aracua chõ eriquichi nde no”, i que ererecua ra. Mbia ibi jenda aracua tuchi chõchĩ Dios quiato si. ⁹ Acheẽ tuchi quia jẽje co. ¡Mbae isiquia jemondo mondo quia ibatenda je jẽ! Eĩ nda jẽquiato jiri. Eĩ nda Dios jẽisi quiatu turã ibate jembae ua mose. Huee ra jẽingo bei cote.

¹⁰ Ae mbae ñetẽ saarõ turãte quia, mbae tubiriã abe ra esaarõ turã nguia. Ae mbae ñetẽ saarõ turã eãte quia, mbae tubiriã abe ra esaarõ turãya nguia no. ¹¹ Jẽ jembae mondo turã eã mose Dios je, Dios ra mbae turã mondo eã jẽje ibate. ¹² Jẽ Dios mbae raarõ turã eã mose, ¿aba quia ra mbae mondo jẽje jembaerã tuchi cote re? ¹³ Co mĩ erimba siqui aronea ererecua nyeremo ndese.

Ererecua nyeremo mose, huee ra erimba nguerecua nongue ucuãya. Ererecua nongue ra ebite. Ae ndua beite quia mbae isiquia rese nae, ũquĩ siqui aroneate Dios rese. Ae siqui beite quia Dios rese nae, ũquĩ ndei ndua eã jiri mbae isiquia rese, i que Jesús ra.

¹⁴ Fariseos que chi Jesús cheẽ andu ja ra. Mbae isiquia quiato tuchi que ũquĩ nda. Nyebe ñee icua nguia Jesús cheẽ mose. ¹⁵ Nyebe Jesús ñee asite nguia ũquĩ je. —Jẽ nguiarei jẽturã jembuchecua tuchi mbia résaa. Dios quiarei jeñiangui renda icua tuchi quia co. Ae eturã abareãte riqui mbia je nae, ũquĩ Dios ucuãyaate quia co.

Dios cheẽ nda io ja

¹⁶ Moisés chimbesa que mbia mbaaquiato quiato nyii ra. Dios cheẽ mbuchecuasa chimbesa abe que mbia mbaaquiato quiato nyii ra. Juan tu nonde. Juan ngue Dios cheẽ turã senei senei cote ra. “Mbia rerecuarã tuchi ra Dios cote”, i bei que Juan nguia ee cote ra. Nyebe mbia riqui nguia ñee. “Dios rimba ra se”, i tuchi mbia quia ã cote. ¹⁷ Ibei ua arõte quia co. Ibi abe ua arõte quia co no. Embesa ji Dios cheẽ nguia ra uayã mbei. Io ja rae.

Eicuãte ngũinisi mombo mose

¹⁸ Mbia ngũinisi mombo mose, ngũinisirã mo nderequia mose, eicuã tuchi ũquĩ. Adulterio, i que ũquĩ je ra. Ae eru mombo, emo aque rerequia mose, eicuãte ũquĩ abe no.

Mbaecha mo oso tata cuasu

¹⁹ Sã mbaecha tuchi mo ndiqui no. Huirao turã mingue mingue bei. Huirao nininya mingue mingue bei. Fiesta que esaã saã mbei quia ra. Umbae mbae isiquia mumba chooño mbae rese. ²⁰ Sã mbaecha reã mo abe riqui no. Lázaro, i que ee ra. Erete reechu echu que ra. Huee que Lázaro riqui chĩ mbei ngoi ra. Mbaecha chuchua taronda jii. ²¹ Lázaro riãcuã ngue ñee mbei quia ra. “Mbaecha chiu rire nda au rã ña”, i tuchi que equia uchiangui re

ra. Ñooñoõo ñgue ñgaẽ ñgaẽ ñguia erete reechu rere rere ra. ²² Lázaro mbaecha reã ñgue mano cote ra. Angeles que equerao mbae turãsa Abraham ndea ra. Mbaecha abe que mano nda. Mbia que echati ra. ²³ Mbaecha que oso tata cuasu cote ra. Isho que mae Abraham ndese ra. Lázaro abe. ²⁴ Sã ñeemombo mombo Abraham je no. “Paba Abraham, ndeya eã jiri serese ae. Serasite aico tata réndii a. Lázaro embu rã. Sã o mbia rã i je sechuru mbia sacuã”, i rei que mbaecha ñeemombo Abraham je ra. ²⁵ Abraham ñgue ñee ee cote ra. “Mbae tubiriãte que nembae nyii resẽ. Lázaro quiatu que mbae rasi saã tuchi quia nyii ra. A eriqui turãte a cote, nde nderasi rasi mose cote. ²⁶ A jenda mo oso aroneate erasa ndeje hue. Hue jenda abe tu aroneate erasa ure je aa no”, i que Abraham mbaecha je ra. ²⁷ Mbaecha que ñeemombove Abraham je ra. “Lázaro chõ emondo Paba chuchúaa no, Abraham. ²⁸ Hue senongue cinco chi hue. Sã Lázaro si ñee ee. Embiirandu. ¶ nda ecuaẽ eã mbae rasi raã a”, i rei que mbaecha ñee Abraham je ra. ²⁹ Abraham ñgue ñee ee ra. “Ndenongue Moisés chimbasa rerequia hue. Dios cheẽ mbuchecuasa cheẽ abe rerequia hue no. Sã ñquĩ mumbayã”, i que Abraham ee ra. ³⁰ Mbaecha que ñeembe Abraham je ra. “Embesa ji rerequia raque. Mano je oso mose ñee ee, aque cheẽ ñguia ra emumbayã cote. Huĩcuã nda esecha cote”, i rei que mbaecha ñee Abraham je ra. ³¹ Abraham ñgue ñee ee ra. “Ndenongue Moisés chimbasa mumba mumba mose, mano je cheẽ abe ra emumba no. Eraaque mo quera si je ñee mose ee, aque cheẽ abe ra emumba no”, i que Abraham ñee mbaecha je ra, i que Jesús ra.

17

Mbae icuã nda nandesaã uquiachĩ emo je

¹ Jesús que ñee uchimbaaquiato je ra. —Mbae icuã ñguiarei siqui bei tuchi mbia mbĩcuã nonde. Ae ñee ñguia mbia je nae, “mbae icuã esaã” i nae, eicuã tuchi chõ ñquĩ nde. Ae “mbae icuã esaã” i nae, ñquĩ nda mbae rasi saã tuchi cote. ² Ae ra mbae icuã saã uquia seicuasa mo je nae, ñquĩ nda mbae rasi saã tuchi cote. Ñquĩ nda aba mombo chõ ama ndisa ye nyii re chã. Sita resebe ecua ji mondo. ¶ nda mbae icuã naa uquia eãte rei seicuasa je. ³ Jẽingo chooñoa ño ñguia jẽ! Nderesenda icuã mose ndeje, echeẽ ño ee. “Nandeico turã ño”, ere ee. Hui mose huĩcuã si, eicuã si etesarei chõ nde. ⁴ Sã nderesenda mbae icuã naa naa siete veces ndeje no. Sã ñee ndaque siete veces ndeje no. “Mbae icuã nda asaã eã ndeje cote”, sã i raque ndeje no. Eicuã si etesarei chõ, eicuã mbei bei raque, i que Jesús ñee ee ra.

Jẽ Dios icua jiri mose, eĩ nda mbae mo jeñee mumba eãte rei

⁵ Jesús chimbbaaquiato que ñee ee ra. —Dios eicua tuchi rã ure je, i que ñee Jesús je ra. ⁶ Jesús que ñee ee ra. —Jẽ Dios icua jiri mose, i nda mbae mo jeñee mumbayãte rei. ¶ nda jeñee ndei ira je. “Nde ae echisiqui. Nde ae si echitiquia ama ndisha ite re”, i ira je. ¶ nda ira jeñee mumbayãte rei, jẽ Dios icua jiri mose.

Dios rimbachõ ño nande re, jenye chõ ñguia

⁷ Sã emo nimba mo ndiqui bei turuquia rĩ ticuasú raarõ arõ no. Ecuasẽ mose tuchúaa, ¿mañi nda ererecua ñee jei ee re? “Equiaru rã”, i jei ee re. ⁸ Tei. I jei eã nda ee. “Sechiurã esaã naa seje. Sequiaru eteaquiato rã nyii. Aquere quia terequiaru nde”, i chõ nda ererecua ee. ⁹ Ererecua ra gracias i eã ngũimba je. Erimbachõ ño ñene. ¹⁰ Eĩ si chõ jẽ no nde. Dios rimbachõ ño jẽ no nde. Ae rĩ Dios riqui ñee jẽje, ñquĩ naa ja mose, jẽingo mingue chõ ñguia ee jẽ! “Ae rĩ Dios ñee nande je nae, ñquĩ mii ño ñgue nandesaã nda. Erimbachõ ño nande

re”, jenyé chõ nguia ico mingue, i que Jesús ra.

Jesús mbia leproso ata mbucherõ

¹¹ Jesús que ngata si Jerusalén icha rui ra. Galilea rĩ ngue écoi quia ra. Samaria rĩ abe que écoi quia ra. ¹² Jesús que ngasẽ sucha tubiriã moo nda. Hue que mbia rasi mo chi ee ra. Diez que ra. Eire rasi ja que ra. Lepra, i que ùquĩ mbia rasi je ra. Erasi que chi icúe isho jiri Jesús si ra. ¹³ Ùquĩ mbia rasi que ñeemombo mombo Jesús je ra. —¡Jesús! ¡Mbia mbaaquiatusa! Urembucherõ na ae, i que ñeemombo mombo ee ra. ¹⁴ Jesús que mae erese cote ra. Ñee ngue ee ra. —Eno. Jẽso jendete reacuquia sacerdotes je, i que Jesús ee ra. Ecuata mose chõ ngue nyerõ ja ra. ¹⁵ Ucherõ ndese mae mose que co mii ndu nyebi ñee Jesús je ra. Eya tuchi que ñeemombo mombo Dios rĩ nda. ¹⁶ Ngoi que ngũĩã ndese Jesús resa quiti ra. Nyibi que u ñee ee ra. Gracias i tuchi que Jesús je cote ra. Samaria jenda que ae ra. Judío eã ngue ra. ¹⁷ Jesús que ñee nda. —Eatate que ambucherõ. ¿Ma eataque ma nde? ¿Ma nueve ma nde? Nyebiã ñochĩ ecuaẽ gracias i seje. ¹⁸ Co mii tuchi chõ tuchi nyebi gracias i Dios je co. Judío eã ndaque, i que Jesús ra. ¹⁹ Jesús que ñee erasi je cote ra. —Ehuã. Eso cote. Nde que seicua ra. Nyebe arembucherõ nguia, i que Jesús ee ra.

Mbia chiangui re quiatu Dios riqui nguia mbia rerecuarã

²⁰ —¿Manosete ra Dios ru íbii mbia rerecuarã tuchi re? i que fariseos ñee Jesús je ra. Jesús que ñee ee ra. —Mbia ra mae eã erese. ²¹ “¡Aa chõ Dios riqui mbia rerecuarã jê!” iã ndae. “¡Pee chõ Dios riqui mbia rerecuarã jê!” iã nda eno. Mbia chiangui re quiatu Dios riqui nguia mbia rerecuarã, i que Jesús ra.

²² Jesús que ñee uchimbaaquiatusu je cote ra. —Namo jiri ra jẽ seosei osei setiã mose cote. “Jesús nda siqui

mbiri na nanderese chã”, jenyé rei nda re. ²³ “Hue Cristo riqui hue”, ichõiño nda mbia jẽje seriĩ. “Pe eriqui pe”, ichõiño nda jẽje no. “Nyia” jenyechĩ nda ee jẽ. Ñeeñoño ndae. ²⁴ Sechecuayã nguia ra achuã. Mbia ra mae ja quiatu senininya rese seru mose. Sã mbia riqui mae jate ama pirirã i rese no. Eĩ ae quia ra u mbia mumae ja. ²⁵ Sechube nonde ra mbia icuã tuchi seje. Mbae rasi ra asaã tuchi rã. Ae siqui namo ã mbia, ùquĩ nda seririrõ tuchi rã. ²⁶ Sã Noé mosenda mbia siqui sereã tuchi Dios rese no. Eĩ si ra mbia siqui sereã Dios rese sechu nonde no. ²⁷ Sã Noé mosenda mbia quiaru chooño no. Ndua rocoĩ Dios rese. Sã ngũinisirã nderequia chooño no. Sã mbae raã ñooño ndua rocoĩ Dios rese no. Sã Noé ique chee arca ye no. Sã ama ndicuasú tu cote no. Sã mbia mano ja no. ²⁸ Sã Lot mosenda abe mbia no. Sã quiaru chooño no. Sã mbae isi isi chooño no. Sã mbae eĩ tiquia chooño no, Sã uchuchuarã naa ñooño no. Sã mbae raã ñooño no. Ndua rocoĩ Dios rese no. ²⁹ Sã Lot usẽ nyee hue si cote no. Sã Dios tata mbu ibate si cote no. Sã Sodoma jenda oquei ja aque mose no. ³⁰ Eĩ si ra mbia mbae raã ñooño. Seru mose chee. Ndua rocoĩ serese. ³¹ Emo siqui mose taicuee se tu mose, ique eã nda uchuchua umbae rerecoquiatusu. Ae siqui úcoo, nyebiã nda u uchuchua no. ³² ¡Lot ninisi rã nda jẽingochĩ jê! ³³ Ae ngueteãte quia ngueco rese nae, ereco ra quiachã esi. Ae ngueteã eãte quia ngueco rese nae, aque reco quia ra quiachãya esi. ³⁴ Sechu mose, aque isa ra nyeremo chi uque quisa ye. Co mii nda arao. Enongue ra siquichõ. ³⁵ Cuña nyeremo nda chi mbua tocho no. Co mii nda arao. Enongue ra siquichõ no. ³⁶ Mbia nyeremo nda chi úcoo no. Co mii nda arao. Enongue ra siquichõ no, i que Jesús ra. ³⁷ —¿Mangue ra ùquĩ mangue re, Jesús? i que echimbaaquiatusu ra. Jesús que ñeembe ee ra. —Ae rĩ mbae raaque riqui chi nae, huee ra urubu choi ja

tuchi, i que Jesús ra.

18

Eru cheecha ñee chíbe íbe ererecua mo je

¹ Jesús que ñee uchimbaaquiatu je ra. —Sã mbia riqui ñee mbei Dios je. Sã tesareia mbei ñee Dios je. ²⁻³ Sã eru cheecha mo ndiqui no. Oso chíbe íbe ñee ererecua je no. “Ae sembae quereco nae, sã aque sembae meembe seje”, i chíbe íbe ererecua je. Dios quiatoã ndaque ererecua. Mbia quiato biãte raque aque ererecua. ⁴⁻⁵ Ererecua que eru cheecha cheẽ ñanduchõ nyii ra. Eru cheecha que ñee i i tuchi ee ra. Ererecua que ndua chee uchiangui re ra. “Ari riqui ñee chíbe íbe tuchi chĩ seje co. Echeẽ tamumbayã na”, i chee que ererecua ra, i que Jesús ñee uchimbaaquiatu je ra. ⁶ Ñeembe que ee ra. —Sã ererecua ari cheẽ mumbayã nyee no. Ererecua icuãte raque. ⁷ Eĩ nda Dios uquiato cheẽ mumbayã no. Dios quiato riqui ñee ñee mbei Dios je co. Arõ mose. Isa abe. Dios riqui uquiato ucuãyãsa riisu isu raque co. ⁸ Dios ra uquiato cheẽ mumbayã nyee cote. Se tube mose íbii manya sequiatio ra chí be ñee Dios je reae, i que Jesús ra.

Mbia nyeremo ñee Dios je

⁹ Ucuasu raã naasa mo ngue chí Jesús je ra. Mbia ataque ririrõte que equia ra. Mbia ataque isi teã teã mbei. Nyebe Jesús ñee nguiã ùquí je. ¹⁰ —Sã mbia nyeremo nyo i que Dios chuchua no. Ñee Dios je no. Co mii ngue fariseo ra. Enongue que impuestos isi isi quia ererecua mbaerã nda. Mbia mbĩrĩ irĩsa que ae ra. ¹¹ Fariseo que ñee ndei Dios je ra. “Dios, seturãte se. Mbia icuã na eã ño se re. Co mbia mbĩrĩ irĩsa rã eã ño se re. Mbae mbuquiachãsa eã ño se no nde. Acheẽ ñooño eã ño se re. Emo ninisi rese aicoãte se. Mbia ambĩrĩ irĩ ãte quia co. ¹² Aquiaruã mocoite quia ndua bei nderese co. Diezmos amee mee mbeite quia ndeje co”, i rei que fariseo ñee Dios je ra. ¹³ Aba

mbĩrĩ irĩsa que chí isho ra. Uãquí ngue embucheseco ibi quiti ra. Uchiã ngue eisi ñee Dios je ra. “Ndeyayã ño serese, Dios. Mbae icuã asaã saã mbei chõchĩ nguia co. Seyayã tuchi chĩ seicuã ndese”, i que ñee Dios je ra. ¹⁴ Tacheẽ nyecua rã jẽje. Dios que aba mbĩrĩ irĩsa cheẽ isi turã nda. Ico minguete quiatu nguiã ñee ñee Dios je. Fariseo quiatu ngue uturã saã saã mbeite nguiã ñee Dios je. Nyebe Dios echeẽ ñanuate nguiã. Ae ucuasu saã saã nguia nae, ùquí nda Dios isiãte. Ae ico tochei quia Dios je, ùquí nguiatu ra Dios isi, i que Jesús ra.

Jesús mbia riirĩ isi turã turã

¹⁵ Mbia que nguiirĩ ngurucuaẽ cuaẽ nguia Jesús je ra. Jesús oco oco sacua erese. —¿Mbaerã jendiirĩ jendu quia co re? i rei que Jesús chimbaaquiatu ñee mbia je ra. ¹⁶ Jesús quiatu que ñee nda. —Tei. Jẽsecha. Sã nguiirĩ ndurucuaẽ seje. Eĩ ño Dios rimba re. Mbia riirĩ na. Ucuasu raã naa eã. ¹⁷ Mbia riirĩ na ño jẽingo Dios isi turã. Eĩ jenyẽ mose, Dios rimba tuchi ra jẽ cote, i que Jesús ra.

Acuanindu mbaecha mo ñee Jesús je

¹⁸ Ererecua mo ngue ñee Jesús je ra. —Mbia mbaaquiatusa turãte nde. ¿Mañi ae ra se siqui bei nonde ibate re? i que ererecua ñee Jesús je ra. ¹⁹ Jesús que ñee ee ra. —¿Mbaerã ereico eturã i seje re? Dios mii ño eturã ndesẽ. ²⁰ Dios cheẽ ereicuate resẽ: “Emo ninisi rese ra ereicochĩ. Mbia mo nda ereiquiachĩ no. Mbae ra erembuquiachãchĩ. Ereceẽ ñooño chĩ nda emo nii. Ndeturã ño nderu je. Ndeturã ño ndesi abe je”, i que Dios cheẽ nda, i que Jesús ñee ererecua je ra. ²¹ Ererecua que ñee ndei Jesús je ra. —Ùquí ngue amumbayã ja bei quia ra. Señetẽ mosenda bei, i rei que ererecua ra. ²² Jesús eandu mose que ñee ee ra. —Mbae mii mo abe eresaã eãte. ã abe esaã. Nembae emondo mondo ja mbia mbaecha reã je. Nde ùquí naa mose, mbae tubiriã nda nde, ndeico mose ibate. Nembae mondo

ja mose mbaecha reã je, serui eico cote, i que Jesús ee ra. ²³ Ererecua Jesús cheẽ andu mose que echosoi oso serite cote ra. Mbaecha tuchite quiatu ngue ae re. ²⁴ Jesús que mae mbaecha ia eã ndese ra. Ñee ngue mbia je cote ra. —Mbaranguiatu ãte mbaecha je ngasẽ sacua ibate Dios rese. ²⁵ Sã ticuasú mo ndiqui oso aroneate aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁶ —¿Aba quia ra oso Dios rea re no? i que mbia Jesús je cote ra. ²⁷ Jesús que ñee ee ra. —Ae mbia saã aroneãte quia nae, Dios mi ño nda esaã, i que Jesús ee ra. ²⁸ Pedro que ñee Jesús je ra. —Ure que urembae uresecha ja ra. Siqui sacua nderui, i que Pedro ee ra. ²⁹ Jesús que ñee ee ra. —Emo umbae recha ja mose Dios rĩ, Dios ra esibishorõ tuchi ee. Ae uchuchua secha. Ae ngu secha. Ae usi secha. Ae ngõngue secha. Ae ngũinisi secha. Ae nguiĩ secha. ³⁰ Ñquĩ mbae ja ra Dios sibishorõ tuchi. Ibii mbia reco bei mose. Aquere ra Dios emingo bei ibate cote, i que Jesús ra.

Mbia ra seiquia, i si Jesús

³¹ Jesús que ñee icúee uchimbaaquiatu doce je ra. —Co nandesó quia Jerusalén co. Ae Dios cheẽ mbuchecuasa mbesa mbesa quia serĩ nyii nae, ñquĩ nda io ja cote. ³² Mbia ra semee judíos eã je cote. Mbia ra secheẽ naa naa. Ñee icua tuchi ra seje. Ñinimbu nimbu ra serese. ³³ Seiruã nua ndae. Seiquia ra cote. Tres nyaashĩ mose ra aquera si, i que ñee ee ra. ³⁴ Echimbaaquiatu que echeẽ icuayãte ra. —¿Mbae rĩ eriqui ñee nande je re? i que nyue ra.

Jesús eresayã mo mbucherõ Jericoo

³⁵ Jesús Jericó rurubi mose que eresayã mo ndiqui ee ra. Ñeenda jie que eñi ache ache i mbia je ra. ³⁶ Eresayã ngue mbia tubiriã quicoi chandu ra. —¿Mbae ere? i que eresayã emo je ra. ³⁷ —Co Jesús coi quia co. Nazaret jenda coi quia co, i que emo eresayã

je ra. ³⁸ Eresayã ngue ñee mombo ra. —¡Jesús! ¡David rucucha! ¡Ndeya eã ño serese jẽ! i que eresayã ñee Jesús je ra. ³⁹ Ae rane nyoĩ quia, ñquĩ ngue ñee ndei eresayã je ra. —¡Equiriri chõ jẽ! i rei que ee ra. —Jesús, indeya eã ño serese jẽ! i bei bei que Jesús je ra. ⁴⁰ Jesús que tiba cote ra. —Eresayã jendu rã, i que mbia je ra. Eresayã ngue oso Jesús rĩchã cote ra. ⁴¹ —¿Mañi ae ra ndeje re? i que Jesús ñee ee ra. —Seresa embuturã na, Sererecua, i que eresayã nda. ⁴² Jesús que ñee ee ra. —Nderesa que cote ra. Seicuate quiatu ngue se re. Nyebe arembucherõ nguiã, i que Jesús ee ra. ⁴³ Aque mose tuchi que eresayã ndesa turã cote ra. Mae turã ngue cote ra. Jesús rui que esi quia cote ra. Ñee turã turã tuchi que equia Dios rĩ cote ra. Ae mae erese nae, ñquĩ abe que ñee turã ja quia Dios je cote ra.

19

Taico nderese, i Zaqueo Jesús je

¹ Jesús que ngasẽ Jericoo cote ra. Sucha tubiriã ite rĩ ngue esi quia ra. ² Mbia mbaecha mo ngue siqui ee huee ra. Zaqueo, i que ee ra. Aba mbiriã irisa que ae ra. Impuestos isi isiquia rerecua que ae ra. ³ —Jesús rese tamae. Jesús taicua rã, i rei que Zaqueo ra. Mbia tubiriã ngue Jesús chatite esi ra. Zaqueo jua tuchi que ra. Nyebe mae aroneate nguiã Jesús rese. ⁴ Zaqueo que oso uchã Jesús nonde ra. Nyui que oso ira mo ñi nda. Jesús ucuá rese mae sacua. ⁵ Jesús que ngasẽ Zaqueo qui re cote ra. Soboiba que mae erese ra. —Equichi, Zaqueo. Taso ndechuchua nderese, i que Jesús ee ra. ⁶ Zaqueo que nguichi asi u cote ra. Eyate que Jesús rerao uchuchúaa ra. ⁷ Mbia que ñee ñee tuchi Jesús rĩ cote ra. —¿Mbaerã Jesús si quia mbia icua nyuchúaa aque re? i tuchi que mbia ñee nda. ⁸ Zaqueo que juã ñee Jesús je ra. —Sererecua, tacheẽ ndeje. Sembae tachisia nyibite rĩ mondo sacua mbia mbaecha reã je. Ae asirõ ñooño

mbia si nae, ũquĩ tambuchebibe ee. Eata tambuchebibe ee, cuatro veces, i que Zaqueo Jesús je ra. ⁹ Jesús que ñee ee cote ra. —Arerirõ ngue mbae icuã si namo nda. Judiate quiatu nde re. ¹⁰ Quiachã je requia chõ achu nguiã ibate si co. Quiachã je mingo bei sacuã abe chõ achu nguiã ibate si co no, i que Jesús ra.

Mbae isiquia jembaata, i ererecua ngũimba je

¹¹ Mbia que Jesús cheẽ ñandu turã nguia ra. Jerusalén ndurubite que echoi quia ra. —Mbia rerecuarã ja ra Jesús cote reae, i rei que mbia quia ndua ndua ra. Nyebe Jesús ñee nguiã ee. ¹² —Sã mbia mo ndiqui oso ibimo isho tuchi no. “Mbia rerecuarã eico nde cote”, i nonde mbia pe jenda ee. Aquere ra eru mbia rerecuarã cote. ¹³ Sã ñee ja ngũimba je oso nonde no. Diez rei erimba. Mbae isiquia atate que embuchao chao ngũimba je ra. “Å mbae isiquia jembaata ata oso quia. Sechu mose chee”, i que ngũimba je ra. ¹⁴ Sã hue jenda mbia aque ucuãyãte no. Comisión ngue emondo ra. “Aque urebiãte urererecuarã”, i rei que comisión mondo ra. ¹⁵ Gobierno ngue emi mbei chõ ererecuarã nda. Nyebe uba bei u nguiã uchuchua cote. Ngũimba je que ñee cote ra. ũquĩ diez. Ae je eriqui mbae isiquia mondo nae, ũquĩ. “¿Sechimee mbae isiquia jembaata ata rei re?” i jaaja que ngũimba je ra. ¹⁶ Erimba mo ngue ñee ee ra. “Ae. Aque mi ngue ereme ndei seje nyii, ambaatate que se cote ra. Diez que cote ra”, i que nguerecua je ra. ¹⁷ Ererecua que ñee ee ra. “Coche ñene. Serimba turãte nde. Mbae ñetẽ ngue eresaã turãte quia secheẽ nguire ra. Nyebe mbae cuasu tamondo ndeje cote. Diez pueblos rerecuarã nda nde cote”, i que ererecua ngũimba ñiinda je ra. ¹⁸ Erimba nongue que tu ñee ee cote ra. “Aque mi ngue ereme ndei seje nyii, ambaatate que se cote ra. Cinco que cote ra”, i que nguerecua je cote ra. ¹⁹ Ererecua que ñee ae

abe je no nda. “Eno. Cinco pueblos rerecuarã nda nde cote”, i que aque ngũimba je ra. ²⁰ Erimba nongue que tu ñee ee cote ra. “Co nembae mbae isiquia co. Tiru ye que areco bei ra. ²¹ Sesiquichete quiatu ngue ndesi re. Erequeteãte quiatu nguiã mbae rese. Ndechitiquia eã abe ereishao shaote quia co. Nyebe nembae mbae isiquia areco quiatuchõ ño nguiã ndeje”, i que aque nguerecua je ra. ²² Ererecua que paama i tuchi ñee ee ra. “Serimba icuã tuchi chĩ nde re. Nde sí chõ erecheẽ nguiã sembiirandu. ‘Nembae que ambaata eãte ra’, ere chõchĩ. ‘Arecu quiatuchõ ño nguiã’, ere chõchĩ. Se ngueteã mose mbae rese ndeje ¿mbaerã secheẽ eremumba re? ²³ ¿Mbaerã sembae mbae isiquia eremondo eã banco re? † nda ñimbaata jiri rei seje”, i que ererecua ñee asi aque ngũimba je ra. ²⁴ Ae chi huee, ũquĩ je que ererecua ñee nda. “Ae sembae quereco chooño nguia nae, jẽsirõ na esi. Ae diez quereco quia nae, aque je jemondo”, i que ererecua ra. ²⁵ Mbia que ñee ererecua je ra. “¿Mbaerã nda re? Eatate ae resẽ. Diez que ae resẽ. ¿Mbaerã nda emo abe eremondo ee re?” i que mbia ñee ererecua je ra. ²⁶ Ererecua que ñee ee ra. “Ae embaete nae, mbae tamondobe ee. Ae mbae quereco ãte quia nae, embae tasirõ ja esi. ²⁷ Seucuãyãsa jendu ja rã. Ae ñee nguia serĩ. ‘Aque urebiãte urererecuarã’, ae i quia serĩ. ũquĩ jendu ja. ũquĩ jẽiquia ja sésaa”, i que ererecua ra, i que Jesús ñee mbia mbaaquiaturã.

Jesús ngasẽ Jerusalén

²⁸ Jesús cheẽ jare que ngata si Jerusalén icha rui ra. ²⁹ Jerusalén ndurubite que echoi ngasẽ nda. Betfagé, i que hue sucha je ra. Betania, i que hue sucha erurubinda je no nda. Ibi ibate abe que chĩ huee ra. Monte de los Olivos, i que ee ra. Hue si que uchimbaaquiaturã nyeremo mondo cote ra. ³⁰ —Aichi súchaa chõ jẽso rã. Burro riirĩ cuasa

ra chĩ jēje hue. Ae ato emo nyui āte. Jenyura seru seje. ³¹ “¿Mbaerã nda jenyura re?” i mose emo jēje, jeñee ee. “Nandererecua que jendu i ra”, jenyee ee, i que Jesús ũquĩ nyeremo mondo ra. ³² Nyoĩ que súchaa ra. Ae riĩ Jesús ñee ee nae, ũquĩ ngue nyecua ja ee cote ra. ³³ Burro riirĩ ngue etea ra. Era mose que echa ñee ee ra. —¿Mbaerã jēingo era era re? i que ee ra. ³⁴ Jesús chĩmbaaquiato que ñee ee ra. —Nandererecua que jendu i ra, i que echa je ra. ³⁵ Burro riirĩ ngue ecuruchoĩ Jesús je cote ra. Echĩmbaaquiato que huĩrao chono ñono burro arõ nda. Mbia que Jesús mbuchui burro ato cote ra. ³⁶ Jesús ngata mose burro ato, mbia que huĩrao mbiitee ee ibi riĩ nda. Jesús nonde. Jesús oso sacuã hue riĩ. ³⁷ Jesús quiato tubiriã tuchi que nyoĩ quia erese ra. Monte de los Olivos icha re ngasẽ mose, Jesús quiato que tasẽ tasẽ tuchi ra. Eya tuchi que ra. Ñee mombo mombo turã ngue Dios je cote ra. —Jesús riqui mbia mae sayã naa naa tuchi mbia je co, i que ñee mombo mombo turã Dios je ra. ³⁸ Mbia ia tuchi que tasẽ tasẽ nda. —Co nandererecua ru quia ngasẽte co. Co Dios chĩmbu ru quia ngasẽte nande je co. Dios turã tuchite nande je, i que mbia ia tuchi ra. ³⁹ Fariseos mo abe que chi huee ra. Ũquĩ ngue ñee ndei Jesús je ra. —Ndechĩmbaaquiato embaasẽ asẽ eã jiri ae, i rei que Jesús je ra. ⁴⁰ Jesús que ñee ee ra. —Sequiato ñeemombo mombo eã mose serĩĩ, eĩ ndei ra sita ñeemombo mombo serĩĩ cote, i que ñee nda.

⁴¹ Jesús que ngasẽ serĩte oso quia Jerusalén cote ra. Sucha checuate que esi quia ee cote ra. Jesús ia eã tuchi que Jerusalén ndese ra. Nyeseo que erese cote ra. ⁴² Jesús que ñee sucha tubiriã je cote ra. Jerusalén je. —Seyayã tuchi aico nderese co, Jerusalén. Mbia mbiassa ereicuayã mbei chõchĩ nguia co. Echecuayã mbei chõ eriquichĩ ndeje co. ⁴³ Mbae

rasi ra eresaã tuchi cote. Ndeucuayãsa ra nderiquisã tuchi cote. Nemama nda ecuaẽ. ⁴⁴ Sucha ra embucoĩ ja ndeyenda. Sita ra embucoĩ ja tuchi mbia chuchua si. Mbia ra mano ja ndeyenda cote. Dios quiato ngue ereisiã mbeite nguiã. Dios sembu mose nderea, aque mose abe que seisiãte no nda, i que Jesús ñee Jerusalén je ra.

Jesús mbia mbusẽ Dios chuchua si

⁴⁵ Jesús que oso Dios chuchúaa ra. Huee que mbia riqui mbae isi isi querabe ra. Mbae mondo mondo abe mbae isiquia ribishorõ. Jesús que ũquĩ mombo ja Dios chuchua si ra. ⁴⁶ Jesús que ñee mbia je ra. —“ ‘Mbia cheẽsa Dios je’, i ra mbia Dios chuchua je”, i que embesa ji ra. Jē nguia jēicuã tuchite Dios chuchua je re. Mbae mbuquiachãsa chuchuarã ño jēsaãte chĩ nguia Dios chuchua je, i que Jesús ũquĩ je ra. ⁴⁷ Jesús que mbia mbaaquiato quiato bei quia Dios chuchúaa ra. Ererecua cuabẽte que mae icuã icuã nguia erese ra. Sacerdote rerecua. Embesasa abe no. Mbia rerecua ja. Ũquĩ ererecua ja que ñee ñee nguia nyue ra. —¿Mañi nande ra equia Jesús iquia sacuã nde? i que ererecua quia ñee ñee nyue ra. ⁴⁸ Ererecua que Jesús iquia aroneate ra. Mbia tubiriãte quiato que Jesús chandu quia ra.

20

¿Aba nembu re? i mbia ñee Jesús je

¹ Emo mose que Jesús riqui mbia mbaaquiato quiato Dios chuchúaa ra. Ererecua que ngaẽ ja ñee ee ra. Sacerdote rerecua. Embesasa abe no. Amei abe no. ² Ũquĩ ngue ñee ja Jesús je ra. —¿Mbaerã ereico mbia mbaaquiato quiato re? ¿Aba “mbia embaaquiato quiato” i ndeje re? i que ererecua ja Jesús je ra. ³ Jesús que ñee ee ra. —Se rane tacheẽ jēje. Se rane preguntar tae jēje. ⁴ ¿Aba ñee Juan je re? “Eso bautizar i mbia je” i ee re. ¿Dios eã ño ere no? Jeñee seje, i que Jesús ee ra. ⁵ Ererecua

que ndua ndua ja u ra. Ñee ñee ñgue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate. Eĩ nda ñee nande je. “¿Mbaerã jẽingoãte erui re no?” i quiarei ra nande je. ⁶ “Dios eã ñgue embu ra”, nande aroneate no. Mbia ataque ra paama i tuchi nande je. Nandeĩ eĩ ra sita je. Juan quiato tuchi que mbia, i que ererecua ñee ñee nyue ra. ⁷ Ererecua que ñee nyee Jesús je ra. —Ureicuayãte. Aba chõ Juan mbu. Bautizar i sacua, i que ererecua ñee ja ee ra. ⁸ Jesús abe que ñee ee cote ra. —Se abe ra acheẽ eã jẽje no. Aba chõ “ã esaã” i seje. Acheẽ eã nda jẽje no, i que ererecua je ra.

Uva raarõsa icua icua nguerecua je

⁹ Jesús que mbia mbaaquiato quiato cote ra. —Sã mbia mo ndiqui no. Sã ibicha mo ndiqui no. Sã ibicha riqui uva i tiquia tiquia no. Sã ibicha riqui “sembae uvas jẽsaarõ”, i emo je no. Sã eriqui oso itõte no. ¹⁰ Uva quiche mose que echa ngũimba mo mondo rei umbaerã ndea ra. Ae uva saarõ nguia nae, ãquĩ ñgue eisi icua tuchi ra. Ucuu ucuu que erese ra. Eochi que emondo mbuchebi ra. ¹¹ Echa que ngũimba mo mondo rei ereabe no nda. Aque abe que eraarõsa isi icua no nda. Ucuu ucuu que aque abe rese no nda. Eochi que emondo mbuchebi ra. ¹² Echa que emo abe mondo rei ra. Aque abe que eiruã nua mondo mbuchebi no nda. ¹³ Echa ia eãte que ra. “¿Mañi ae ra se re? Seriiĩ quiato tamondo erea cote. ãquĩ nda ireĩ ireĩ jiri esi cote reae”, i rei que echa ra. ¹⁴ Uva raarõsa mae mose erese que ñee nyue ra. “iCo eriiĩ ndu quia co cote jẽ! iNandeiquia rei jẽ! i nda uvas nandembaerã ae cote”, i que ñee nyue ra. ¹⁵ Eraarõsa que eriiĩ querao pe jiri eiquia ra. Eriiĩ ñgue mano cote ra. ¿Mañi nda echa quia eraarõsa je cote re? ¹⁶ Echa ra oso eraarõsa iquia ja cote. Ibi ra emondo emo je cote. Eraarõ sacua, i que Jesús mbia je ra. —iãquĩ nda iquechĩ jẽ! i que mbia ra. ¹⁷ Jesús que mae erese

ñee ee cote ra. —¿ã embesa ji rese jemaẽ ãte re?

Sã emo ndiqui tuchia ao sita je no.

Sã sita mo ndirirõ mombo no.

Eicuãte eriqui reĩ nguia ee.

Aquere Dios emundua si erese.

“Earonda sacua turambi chõ eriqui re”, i ndua si uchimombo rese.

Sã uchimombo rirõ si cote no,

i que embesa ji ra. ¹⁸ Ae ra nyoi ngoi aque sita arõ nae, ãquĩ nda huẽ.

Aque sita ngoi mose emo arõ, ãquĩ

nda mano, i que Jesús ra. —Aque sita rã ndei se, i chõ ñgue re.

¿Impuestos ra uremee ererecua je re? i mbia ñee Jesús je

¹⁹ —Nanderĩ ño Jesús riqui nguia ñee a. Nandeisi rei serao jẽ, i rei que sacerdotes rerecua ñee nyue ra.

Embesasa abe no. ãquĩ ñgue paama i ja Jesús je ra. Jesús isi aronea tuchite que mbia résaa ra. Eireĩte quiato ñgue mbia tubiriã si re. ²⁰ Ererecua que mbia icua mondo mondo quia Jesús cheẽ andu andu ra. —iJẽtura jẽsaã saã oso Jesús je jẽ! iEcheẽ ndese jenyiisaquia quiato ure je jẽ! Mbae mo nii ñee icua mose, i nandeisi rei jẽ!

Ererecua tuchi je nandemondo cote, i ja que ererecua ñee nda. ²¹ Ae chi uturã naa naate Jesús je nae, ãquĩ ñgue ñee ee ra. —Jesús, co ereico mbia mbaaquiato quiato turãte co. Mbia jaje ndeturãte riqui co. Mbia erembaaquiato quiato turãte quia Dios icha rĩ co. ²² Nyebe ureico nguia ñee ndeje a. ¿Coche mbia mbae isiquia mee mee mose Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra.

²³ Jesús que ãquĩ icua icuate ra. Nyebe ñee nguia ee. —¿Mbaerã jẽingo “ĩ nda Jesús ucheẽ nyabi”, i seje re? ²⁴ Mbae isiquia mo jẽteacuquia imbu seje. ¿Aba mbae nombre ñi mbae isiquia rese a re? ¿Aba ãquĩ aingue abe ñi a re? i que Jesús ee ra. —Romano nderecua,

i que ñee Jesús je ra. ²⁵ Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee, i que Jesús ee ra. ²⁶ Jesús

que ucheẽ nyabi aroneate ee ra. Ûquĩ ngue nyuruirã jate u Jesús cheẽ andu ra. Nyebe eriqui ñee eã ee cote.

Mbia raaque ra quera si, i Jesús

²⁷—Mbia raaque ra quera eã mbei, i que mbiamo nguia ñee nda. Saduceos i que ùquĩ je ra. Ûquĩ mo ngue nyoĩ ñee Jesús je ra. ²⁸—À ngue Moisés mbesa nande je ra: “Emo eririã mano mose, ngũinisi recha mose, sã enongue mano je ninisi rerequia. Sã tiirĩ ngõngue raaque rĩ”, i que Moisés embesa nande je ra. ²⁹ Sã eriqui mo ndiqui no. Eribi que seis ra. Eriqui que ngũinisirã quereco rei ra. Mano ño ngue tiirĩ ndocoĩ ngũinisi recha ra. ³⁰ Enongue que nguiqui cheecha quereco rei cote ra. Ae abe que mano ño tiirĩ ndocoĩ no nda. ³¹ Enongue abe que equereco rei cote no nda. Ae abe que mano ño tiirĩ ndocoĩ no nda. Ûquĩ seis ja que ngõngue cheecha quereco ja rei ra. Mano ja tuchi chõ ngue tiirĩ ndocoĩ no nda. ³² Eninisi eru cheecha abe que mano ño nyee cote ra. ³³ Siete que eru nyii resẽ. Mbia raaque quera si mose, ¿abate ra equereco cote re? i que saduceos ñee Jesús je ra. —Ma Jesús ñee icuã no, i chõ ngue re.

³⁴ Jesús que ñee ee ra. —Aa chõ mbia riqui nguia ngũinisi rerequia querabe. Siqui mose íbii. ³⁵ Ae raaque ra Dios mbuquera si nae, ae ra Dios mingo bei nyiese nae, ùquĩ nda ngũinisi quereco eã mbei huee cote. Ûquĩ nda ngu quereco eã mbei huee cote no. ³⁶ Huee quiatu ra mbia manoã mbei. Angeles rã mbei ra mbia riqui huee cote. Dios riirĩ tuchi ra eriqui huee mose cote. Embuquerái quiatu ra cote. ³⁷ Moisés abe que mbia mbiirandu ra. “Mbia raaque quera quera bei quia co”, i que Moisés ra. “Se rei Dios. Abraham nderecua chõ aico nguia co. Isaac nderecua abe. Jacob nderecua abe no’, i que Dios ra”, i que Moisés embesa ra. Ira ruri rendi mose que Dios Moisés mbiirandu ùquĩ ndese ra.

³⁸ Ûquĩ mano ndaque nyii. Ûquĩ ndeco siqui bei chõ nguia ùquĩ. Mbia raaque rerecua eã ño Dios re. Mbia reco rerecua chõ ñene. Mbia reco ja chõ siqui nguia Dios je ã, i que Jesús ee ra. ³⁹—Ndecheẽ turãte, i que embesasa mo ñee Jesús je ra. ⁴⁰ Ae “Jesús nandembicuã” i rei quia, ùquĩ ngue ñee eã Jesús je cote ra.

¿Aba rucucha Cristo re?

⁴¹ Jesús que ñee mbia je ra. —Se abe tacheẽ jẽje cote. ¿Mbaerã mbia riqui ñee nde? “David rucucha chõ Cristo re” i re. ⁴² David si que “sererecua” i Cristo je ra. Sã David chimbasa Salmos no: Dios que ñee Cristo sererecua je ra. “Ecoi seji.

Nde abe ra ererecua serese.

⁴³ Ae ndeucuãyãte quia nae, ùquĩ je ra ndequirãcuã ateacuquia tuchi. Ndequirãcuã tuchi chee ra ùquĩ si”, i que Dios sererecua je ra, i que David embesa ra. ⁴⁴ David si chõ “sererecua” i nguia Cristo je. ¿Mañi nda David rucucha Cristo re? Jeñee ño seje, i que Jesús ùquĩ je ra.

Jesús ñee asi embesasa je

⁴⁵ Mbia ja résa que Jesús ñee uchimbabaquiato je cote ra. ⁴⁶ — ¡Embesasa rã ño nda jẽingochĩ je! Ûquĩ ucuasu saã saã mbeite quia ã. Huirao turã equereco beite quia ã. “Sã mbia ererecua i nande je”, i beite equia ã. Mbia renda turã abe eirabo raõ beite quia mbia si ã. “Fiestacha jii quia taĩ jẽ”, i abe bei equia ã no. ⁴⁷ Ari eru cheecha mbae abe embutiã tiã nguia ã no. Ucheẽ oco abe esaã saã mbeite quia Dios je ã no. “I nda mbia mae nanderese”, i chõ nguia. Ûquĩ nda Dios mbasi tuchi cote, i que Jesús uchimbabaquiato je ra.

21

Eru cheecha mbaecha reã mo mbae mo mee Dios je

¹ Jesús que nyoĩ nyoĩ quia Dios chuchúaa ra. Hue que mbia mbaecha riqui ofrenda mondo mondo ofrenda riru ye ra. ² Eru cheecha abe que

siqui ra. Ae que centavos nyeremoño mondo ofrendarã nda. Mbaecha reãte quiatu ngue ae re. ³ Jesús que ñee nda. —Tacheẽ tuchi jêje. Eru cheecha mbaecha reã ngue mbae mondo tuchi mbia ataque si ra. ⁴ Mbaecha quiatu que umbae rire ñetê mondo mondo ra. Eru cheecha quiatu nbbbbknnnknnnnnnn gue umbae mi mondo ja nguiã, i que Jesús ra.

Mbia ra Dios chuchua mbucoi ja, i Jesús

⁵ Mbia que ñee ñee Dios chuchua turã nii nda. Tuchua mbarõ ji sita turã nii. Mbae aba queteamba riã abe no, Dios chuchua jenda. Jesús que ñee mbia je cote ra. ⁶—Ae rese jêingo mae nae, ãquĩ nda mbiamo mbutiã ja cote. Sita mo nda chi eã nyuchuarõ cote. Mbia ra tuchia mbucoi ja tuchi. Dios chuchua ra chi eã juã cote, i que Jesús ra.

Mbae ua ja nonde

⁷ —¿Manose ra ãquĩ nde? ¿Mañi ure ra equia irandu mbae ua nonde re? i que Jesús chimbaaquiato ee ra. ⁸ Jesús que ñee ee ra. —Jêtesa jiri quia jê. Mbia ra jembiriã irichĩ jê. “Cristo chõ se re”, i ra mbia ñee ata atate jêje. “Co rei é co cote”, i ra mbia ñee ata atate jêje no. ãquĩ nda jeñanduchi. Ñeeñoño je chõ ãquĩ nde. ⁹ Mbia ra ñee ñee tuchi nyiquia iquia je riã. Guerra riã abe no. ãquĩ mose ra jêsiquichechĩ jê. ãquĩ ja rane nda nyecua raque. Aque mose ra mbae ja ua eã ná, i que Jesús mbia mbaaquiato ra.

¹⁰—Mbia ra guerra saã tuchi chee. Nyiquia iquia tuchi rae. ¹¹ Ibi ra nyere nyere tuchi. Mbia mo abe riãcuã tuchi ra aque mose. Emo ñooñoa tuchi ra mbia rasi. Mbia mae sayã nda nyecua tuchi ibei riã cote. ¹² ãquĩ nonde ra mbia icuã icuã tuchi jê je serĩ. Nguerecua je ra mbia jenderao rao tuchi. Ererecua abe icuã icuã tuchi ra jêje. Jêtarõ tarõ tuchi ra serĩ. ¹³ ãquĩ mose nda secheẽ jêsenei

senei tuchi mbia je chã. ¹⁴ ¿Manyae ra ãquĩ ñee ndibishorõ nde? jenyechĩ nda ñee ãquĩ nonde jê. ¹⁵ Se chõ nda jaembucheẽ turã nguiã aque mose. Nyebe ra jêucuayãsa jeñee ndibishorõ aroneate aque mose. ¹⁶ Jendu ra jemondo chee mbia icuã je. Jenongue abe ra jemondo chee mbia icuã je no. Jendesenda abe ra jemondo chee mbia icuã je no. Jêquiato abe no. ãquĩ nda jemo iquia chee no. ¹⁷ Mbia ra jêucuayã tuchi serĩ. ¹⁸ Jêsiquichechĩ nda esi. Jaendeaquiato tuchi ra aque mose. ¹⁹ Jeñimbiãcuã mose ra Dios jemingo turã mbei.

Jerusalén tiã tuchi rae, i Jesús

²⁰ Soldados Jerusalén mama mose, aque mose ra Jerusalén mbutiã cote. ²¹ Sã Judea jenda choi uchã ibi ibate riãchã aque mose. Sã Jerusalén jenda abe choi uchã hue si. Ae chi isho isho Jerusalén si nae, sã ãquĩ nyebibe eã Jerusalén ndichã aque mose. ²² Aque mose ra mbia mbae icuã ja irara tuchi huãcuã nii. Embesa ji cheẽ nda ique ja aque mose. ²³ Aba mbia eã tuchi ra emo ãquẽ ndiru rerequia mose aque mose. Nguiriã mbuquiambu je abe no. Mbia ra mbae rasi saã tuchi aque mose. Mbae icuã nda irara tuchi huãcuã nii. ²⁴ Aque mose ra mbia guerra raã tuchi. Mbia ra nyiquia iquia aque mose. Jerusalén jenda ra sasẽ tuchi aque mose. Mbia ra ecuruchoi choi tuchi tarõ isho. Judíos eã nda chi tuchi Jerusalén aque mose. Dios ra emondochoi chee hue si cote.

Dios riãnda tube ibate si

²⁵ Mbia mae sayã ndese ra mbia mae tuchi ibei riã cote. Tenda rese. Nyasi rese abe no. Nyasi tata rese abe no. Ama ndisha ra sieu tuchi quia aque mose cote. Mbia ra titi titi i tuchi aque mose. Quiachã tuchi rae. ²⁶ Mbia chiã nda cuaãcuã i tuchi aque mose. “Mbae rasi ra nandesã tuchichĩ nde”, i tuchi ra titi titi i. Ibei jenda abe chee ra quiata quiata cote. ²⁷ Aque mose tuchi ra achube íbii cote. Ibeishĩ ndese ra achu. Senininya tuchi ra achu. Sequirãcuã tuchi ra

achu. ²⁸ Ũquĩ ndese jemaē mose, jẽo jẽo tuchi aque mose jẽ. Dios ra jendirõ jei mbae icuã si aque mose cote, i que Jesús ra. ²⁹ Jesús que ñeembe ee ra. —Sã higuera riqui no. Sã ira mo ndiqui no. ³⁰ Ero quira usẽ ja mose, “iraro itõ ndacu ra cote”, i chõ mbia nguiã aque mose cote. ³¹ Eĩ si chõ nda mbia mae mbae ja rese cote. Ũquĩ ndese mae mose, “achite Jesús ñi tu a cote”, jenyē rae. “Mbia rerecua tuchi ra Dios cote”, jenyē ra aque mose. ³² Ae siqui quia mbia aque mose nae, ũquĩ nda manoã mbae ua ja mose chee. ³³ Ibei ra ua. Ibi abe ra ua. Secheẽ nguia ra uayã mbei.

³⁴⁻³⁵ Mbia ndua eã mose serese ra achu cote. Ibi jenda ja ra ambua tuchi u. Jẽ nguia seraarõ arõ mbei quia. Mbae icuã ndese siqui rocoĩ. Quiacua siqui rocoĩ. Mbae rese ndua ata ata rocoĩ. Ũquĩ icuã ndese jẽingo mose, jaembuate ra u. ³⁶ Jẽtesa bei quiatu quia serese. Jeñee mbei quiatu quia Dios je. ã mbae icuã jeĩ eã sacuã jẽje. Jẽingo turã sacuã serese sechu mose, i que Jesús ra.

³⁷ Nyaashĩ mose que Jesús riqui mbia mbaaquiātu quiātu Dios chuchua ra. Isa que eriqui oso oso bei Monte de los Olivos ra. ³⁸ Isamamimbe que mbia riqui ngaẽ ngaẽ ja bei echeẽ andu ra. Dios chuchúaa.

22

Jesús nandeisi tarõ, i ja mbia rerecua ñee nyue

¹ Achite que fiesta de la pascua cote ra. Mbichae mbuchimatã iriã ngue mbia u u quia aque fiesta mose querabe ra. ² Sacerdotes rerecua que ñee ja nyue ra. Embesasa abe no. —Jesús nandeiquia. ¿Mañi nande ra equia eiquia nonde re? i que equia ñee ñee nyue ra. Eireite que eriqui mbia tubiriã si ra. ³ Judas Iscariote, i que Jesús chimbaaquiātu mo je ra. Satanás que ique aque chiangui re cote ra. ⁴ Nyebe aque si nguiã ñee

sacerdotes rerecua je. Dios chuchua raarõsa je abe no. —Jesús tamondo jẽje. ¿Mañi nande ra equia ee re? i que Judas ñee ee ra. ⁵ Ũquĩ iate que Judas ñee mose ee ra. —Mbae isiquia ra uremee ndeje, i que Judas je cote ra. ⁶ Judas que eno i mbia ñee mose ee ra. —Jesús tamondo rã jẽje mbia tiãsa, i que ñee nda.

Jesús quiaru uchimbaaquiātu rese

⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia no nda. ⁸ Jesús que ñee Pedro je ra. Juan abe je. —Jẽso oveja mbuchi nande je, i que Jesús ee ra. ⁹ Ũquĩ ngue ñee echeẽ mose ra. —¿Mangue ra aba embuchi mangue re? i que Jesús cheẽ mose ra. ¹⁰ Jesús que ñee ee ra. —Jengasẽ mose sucha cuasu, emo i rerao rese ra jemaē. I ra equerao quia irasa mo ye. Aque rui jẽso bei quia ique chee echuchua. ¹¹ Tuchuacha je jeñee. “Jesús que urembu ñee ndeje ra. ‘¿Ma cuarto ra urecu quiaru oveja u que re? Sechimbaaquiātu rese’, i que Jesús ñee ndeje ra”, jenyē tuchuacha je. ¹² Tuchuacha ra cuarto cuasu mee jẽje. Mbia quesa ibatenda ra emee jẽje. Embuquiche ji. Huee chõ oveja jembuchi nandequiaru sacuã, i que Jesús ñee ee ra. ¹³ Pedro que nyoĩ cote ra. Juan abe. Jesús cheẽ ndui si tuchi que mbae eĩ ja cote ra. Huee que oveja mbuchi cote ra.

¹⁴ Mbae quiche ja mose que Jesús ngoi uchimbaaquiātu rese quiaru sacuã cote ra. ¹⁵ Jesús que ñee ee ra. —Co oveja que ause tuchi quia jendese semano nonde ra. Co mose pascua mose. ¹⁶ Pascua mo nda au eã mbei jendese cote. Dios mbia rerecua tuchi mose chee, i que Jesús ee ra. ¹⁷ Jesús que vino mbeisa isi cote ra. Gracias i que Dios je ra. Ñee ngue uchimbaaquiātu je cote ra. —Co jẽisi. Jembei jaaja jẽ. ¹⁸ Vino mo nda ambei eã mbei cote. Dios mbia rerecua tuchi mose chee, i que Jesús ra. ¹⁹ Jesús que mbichae isi cote ra. Gracias i que

Dios je ra. Siquio que mbuchao chao ee cote ra. Ñee ngue ee cote ra. —Ñ ndei serete rã ã. Serete ra mano jêje cote. Jendua serete riquio ji rese ã mbichae u mose, i que Jesús ñee ee ra. ²⁰ Eĩ si que Jesús vino mbeisa isi no nda. Quiaru jare. —Ñ ndei seruqui rã ã. Mbia icuã mbutiã sacuã tuchi chõ seruqui re. Dios cheẽ yasu rui si chõ seruqui riqui nguiã mbia icuã mbutiã co. ²¹ Ae ra semee mbia icuã je nae, aque abe riqui quiaru serese a. ²² Co acua raque quia mano nonde co. Dios cheẽ ndui si co. Ae semee nguia mbia icuã je a nae, aque ra mbae rasi saã tuchi. Aba mbia eã tuchi rae, i que Jesús ee ra. ²³ Echimbaaquiato que mae jaaja nyiese ra. —Aba tuchi ra emee mbia icuã je reae, i ja jate que nyue ra.

Jesús chimbaaquiato mbia rerecua saã saã tuchi nyue

²⁴ Aquere que Jesús chimbaaquiato ñee icuã icuã tuchi nyue ra. —Se quia ererecua tuchi ndesi re, i jaaja que nyue ra. ²⁵ Jesús que ñee ee ra. —Mbia ataque rerecua riqui ucuasu raã naa tuchi ngũimba je ũquĩ. ²⁶ Eĩ jenyechĩ nda jẽ jẽ. “Ererecuarã se”, jenyechĩ nda jẽ. Ae eaquiato jiri jemo nae, sã ũquĩ ndiqui uñetẽ naa naa ño. Sã ũquĩ ndiqui tochei chõ nguia. Ae ererecua jemo nae, sã ũquĩ ndiqui ererecua rimba rã tuchi chõ. ²⁷ Ererecua ngoi chõ nguiã. Erimba mbae mee mee ño nguiã ee. Eĩ eã ño se re. Se quia mbae amee mee nguiã jêje co.

²⁸ Jẽ nguiatu ngue jẽingo beite nguiã serese. Se mbae icuã irara tuchi mose. ²⁹ Nyebe ra jaemi tuchi mbia rerecuarã. Sã seru semi tuchi mbia rerecuarã no. ³⁰ Jẽingo tuchi ra serese, se ererecua tuchi mose. Jẽquiaru ra serese. Mbae mo abe ra jembei serese no. Israel ndiirĩ nderecua ja ra jẽ. Judíos rerecua ja ra jẽ, i que Jesús ee ra.

Jesús aicuayãte resẽ, i ra Pedro serĩ, i Jesús

³¹ Jesús que ñee Pedro je cote ra. —Simón, Satanás que ñee jeni nda. “Ndechimbaaquiato emee na seje. Tã tae rã ee. Ma siqui beite Dios rese”, i rei ngue Satanás jeni nde.

³² Acheẽ tuchite que Dios je nderĩ nda. Nde Dios icua tuchi sacuã. Nde ubabe mose serese, nderesenda abe je echeẽ emingo sacuã serese, i que Jesús Pedro je ra. ³³ Pedro que ñee ee ra. —Sererecua chõ nde re. Aico bei ra se quia nderese. Mbia nda sematã ndei nguiã. Mbia nda sei quia rei nguiã nderese, i que Pedro ra.

³⁴ Jesús que ñee ee ra. —Tacheẽ nyecua ndeje, Pedro. Nguira cheẽ nonde ra erecheẽ ñooño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús Pedro je ra.

Embasa ji chee nda ique ja serĩ cote, i Jesús

³⁵ Jesús que ñee uchimbaaquiato je ra. —Jaemondo que mbia mbaaquiato quiato sacuã nyii, jẽochi que jaemondo. Mbae isiquia mo ngue jendao eã tuchi icua. Mbae rirurã mo abe que jendao eãte. Jẽiyao eã abe no. ¿Aque mose mbae eãte jêje re? i que Jesús ee ra. —Tei. Urembae tubiriãte que ra, i que echimbaaquiato ñee Jesús je ra.

³⁶ Jesús que ñee ee ra. —Ae jemo embae rirurã mo nae, jendao cote ae. Ae mbae isiquia mo nae, jendao cote ae. Ae echuuru eãte tiquise mo nae, sã emo isi huĩrao ribishorõ ae. ³⁷ Sã embasa ji riqui ñee serĩ no. “Mbia icuã ndese ra Dios riirĩ mingo chee”, i. ũquĩ nda ique cote. Embasa ji chee nda ique ja tuchi serĩ cote, i que Jesús ñee nda. ³⁸ —Co tiquise nyeremo ñi co resẽ, i que echimbaaquiato echeẽ mose ra. —Coche ñene, i que Jesús ee ra.

Jesús ñee ngu je

³⁹ Jesús que oso usẽ taicuee cote ra. Oso que Monte de los Olivos cote ra. Eĩ mbei que ae quia oso oso huee ra. Echimbaaquiato que nyoĩ erese ra. ⁴⁰ Ngasẽ mose que ñee

uchimbaaquiatu je ra. —Jeñee tuchi Dios je. Satanás tã i eã sacuaã jêje, i que Jesús ñee ee ra. ⁴¹ Jesús que oso pe quti jiri esi ra. Ngoi que ngúia ndese ñee Dios je ra. ⁴² —Paba, ndebi mose sereaquiatu se, mbae rasi raã eã sacuaã. Ae sebite nae, ñquĩ esaã eã seje. Ae ndebite nae, ñquĩ nguiatu esaã, i que Jesús Dios je ra. ⁴³ Aque mose que ángel mo tu ibate si ee ra. Embirãcuã sacuaã. ⁴⁴ Jesús ia eã tuchite que ra. —Mbae rasi ra asaã tuchichĩ nde, i tuchi que ndua ndua ra. Ñee tuchi que Dios je ra. Eiriei ruqui que tiqui tiqui tuchi quia íbii ra. ⁴⁵ Jesús ñee jare Dios je que juã cote ra. Uchimbaaquiatu rea que esi ra. I que u uque ee ra. Eya eãte quiatu ngue re. ⁴⁶ Ñee ngue ee ra. —¿Mbaerã jẽingo uque a re? Jenyuruã eae. Jeñee na Dios je. Satanás tã i eã sacuaã jêje, i que Jesús ee ra.

Mbia Jesús nyucua serao

⁴⁷ Jesús cheẽ ua eã mose que mbia ngaẽ jate ee ra. Judas que tu quia mbia nonde ra. Jesús chimbaaquiatu raque que ae ra. Ae que Jesús siichã u eritii riite sacuaã nda. ⁴⁸ Jesús que ñee Judas je ra. —¿Ereico seritii riite mbia icuaã je sereacuquia sacuaã a re? i que Jesús ee ra. ⁴⁹ Jesús resenda que mae u erese ra. Ñee ngue Jesús je ra. —Urererecua, ¿tiquise ra ureuru uru mbia rese re? i que ñee Jesús je ra. ⁵⁰ Jesús resenda mo ngue tiquise uru sacerdote rerecua rimba rese ra. Eisa sia. Eisa equiatocuti quitinda. ⁵¹ —Jẽhui esi ae. Coche ñene, i que Jesús ee ra. Oco que eisa rese embucherõ nda. ⁵² Jesús rerao sacuaã ño mbia ngaẽ nguia reaẽ. Sacerdotes rerecua. Policía abe no. Judíos rerecua abe no. Nyebe Jesús ñee nguia ee. —¿Mbaerã jenyu quia tiquise reru serea co re? Ira jua abe no. Mbae mbuquiachãsa isi rã ño jenyuchĩ nguia serea co. ⁵³ Tenda que amumba mumba beite rei quia jendese resẽ. Mbia mbaaquiatu quiatu Dios chuchúaa resẽ. ¿Mbaerã jẽingo

seisiã secua aque mose re? Isa chõ jenyuchĩ serea co, mbia mae eã sacuaã jendese. Itondaru rãnda chõ jẽ nde, i que Jesús ee ra.

Jesús aicuayãte resẽ, ichõiño Pedro

⁵⁴ Mbia que Jesús isi nyucua cote ra. Sacerdotes rerecua chuchua que eruruchoi cote ra. Pedro que oso quia ishote erui ra. ⁵⁵ Itaicuee que mbia tata mbucha ra. Huee que echĩ ngoi tata jii ra. Pedro abe que ngoi embirõ nda. ⁵⁶ Nyucuaaque mo ngue chĩ mae nguiatu tuchi Pedro rese ra. Tata rendi que etesaete ee ra. —Aque abe que Jesús resenda, i que mae Pedro rese ra. ⁵⁷ Pedro que ñee ee ra. —Tei. Jesús aicuayãte resẽ, ichõiño ngue Pedro nyucuaaque je ra. ⁵⁸ Emo jiri mose que mbia mo mae Pedro rese ra. —Nde abe que Jesús resenda ra, i que Pedro je ra. —Tei. Eresenda eã ño se resẽ, ichõiño ngue Pedro ee ra. ⁵⁹ Emo mose jiri que emo ñee ee no nda. —Jesús resenda chõ nde resẽ. Galilea jenda chõ nde abe resẽ, i tuchi que Pedro je ra. ⁶⁰ Pedro que ñee ee ra. —Tei. Ndecheẽ aicuayãte resẽ, ichõiño ngue Pedro ee ra. Pedro cheẽ mose tuchi que nguira ñee cote ra. ⁶¹ Jesús que uba mae Pedro rese nguira cheẽ mose cote ra. Pedro que ndua Jesús cheẽ ndese cote ra. —Nguira cheẽ nonde ra echeẽ ñooño tres veces serĩ, sã Jesús i Pedro je nyii no. ⁶² Pedro ndua mose ñquĩ ndese que esi nyeseo pe jiri ra.

Mbia iquia chooño Jesús je

⁶³ Ae Jesús isi miĩ nae, ñquĩ ngue iquia iquia tuchi u Jesús je ra. Ucuu ucua tuchi que u erese ra. ⁶⁴ Jesús resa abe que echati ra. Eruba rese que ucua ucua tuchi ra. —¿Aba ucua ucua quia nderuba rese a re? i abe que equia Jesús resa ati ji je ra. ⁶⁵ Ñquĩ miĩ eã ngue eriqui ñee ee ra. Mbae ja rĩ ngue embuqueta ra.

Mbia Jesús ruruchoi ererecua chumunua mose

⁶⁶ I que nyaashĩ u quia ra. Aque mose que ererecua ñmunua ja ra.

Judíos rerecua. Sacerdotes rerecua abe no. Embesasa abe no. Ũquĩ ñumunua mose que Jesús ruruchoi ee cote ra. Ererecua que ñee ja Jesús je cote ra. ⁶⁷ —¿Cristo nde re? Echeẽ tuchi ure je no, i que ererecua ñee Jesús je ra. —“Cristo chõ se re”, ae raque ra jẽje, “nyia”, jenyẽ ãte ra secheẽ mose. ⁶⁸ Se abe preguntar i mose jẽje mbae mo ñii, jeñee ãte chõ nda secheẽ ndibishorõ. Jẽhui eã abe ra sesi no. ⁶⁹ Namo jiri ra acoi Dios quiatocuti cote. Hue bei ra aĩ cote. Dios quirãcuã na si ra aico mbia rerecua cote, i que Jesús ñee ererecua chumunua mose ra. ⁷⁰ Ñee ja que Jesús je cote ra. —¿Dios rucucha chõ nde re? i ja que ñee Jesús je ra. —Ae. Dios rucucha rei se, i que Jesús ee ra. ⁷¹ Ererecua que ñee ja nyue ra. —¿Mbaerã nda mbia Jesús icuã nenei i ite nande je re? Jesús cheẽ icuã ngue nandechandu rei nande abe resẽ. Sã mbia eiquia, i que ererecua ñee ja nyue ra.

23

Mbia Jesús ruruchoi Pilato je

¹ Judíos rerecua que juã ja cote ra. Jesús que ecuruchoi Pilato je cote ra. ² Ũquĩ ngue ñee icuãte Pilato je Jesús rĩi nda. —Jesús que mbia mbaaquiato icuã icuãte quia ra jẽ. “Impuestos ra jemee meechi mbia rerecua je”, i chõ ngue equia mbia je ra jẽ. “Se chõ Cristo re. Mbia rerecuarã nda se”, i que equia ra, i que judíos rerecua ñee icuã Jesús rĩi nda. ³ —¿Judíos rerecua nde re? i que Pilato ñee Jesús je ra. —Ae. Judíos rerecua chõ se re, i que Jesús ee ra. ⁴ Pilato que ñee mbia je cote ra. Sacerdotes rerecua je abe no. —“Mbae icuã mo ngue Jesús saã nda”, ae aroneate eriĩ, i que Pilato ra. ⁵ Judíos que ñee asite ee ra. —Jesús riqui mbia mbaaquiato icuã icuã tuchi co. Mbia mbesa choño. Judíos mbaaquiato icuã icuã ja. Galilea jenda rane. A jenda abe chee cote, i que ñee asite Pilato je ra.

Mbia Jesús ruruchoi Herodes je

⁶ Galilea jenda, i mose que Pilato ñee ee ra. —¿Galilea jenda chõ Jesús re? i que mbia je ra. ⁷ —Ae. Galilea jenda chõ Jesús re, i que mbia Pilato je ra. Nyebe Pilato Jesús mondo nguiã Herodes je. Galilea jenda rerecua quiatu ngue Herodes re. Herodes que siqui Jerusalén aque mose ra. ⁸ Herodes que maese beite quia Jesús rese ra. Jesús rese que eriqui jirandu beite ra. —Jesús nda mbia mae sayã mo saã na serésaa chã, i beite que equia ra. Nyebe eya tuchi nguiã mae mose Jesús rese cote. ⁹ Herodes que ñee atate rei Jesús je ra. Jesús que ñeeã mbeite echeẽ ndibishorõ nda. ¹⁰ Sacerdotes rerecua abe que chi ra. Embesasa abe no. Ũquĩ ngue ñee icuã icuãte quia Jesús rĩi nda. ¹¹ Herodes que iquia iquia chõ nguia Jesús rĩi nda. Erimba soldados abe no. Jesús ririrõ tuchi que equia ra. Tiru nininya tuchi que emingue Jesús je ra. Ererecua raã naa tuchi Jesús je. Aquere que Herodes embuchebi mondo Pilato je cote ra. ¹² Aque mose ramo ngue Herodes quiato Pilato cote ra. Eicuã icuã mbeite que eriqui nyue nyii ra.

Jesús jẽiquia mbucha ira rese, i ererecua

¹³ Pilato que mbia rerecua munua ja ra. Sacerdote rerecua. Judíos rerecua abe no. Mbia ja abe no. ¹⁴ Ñee ngue mbia je cote ra. —Jẽ ngue Jesús jendu rei seje ra. “Mbia mbiĩri irĩa chõ Jesús re”, jenyẽ rei que seje ra. Acheẽ ocote rei que ee jẽsaa ra. Ae jeñee ndei seje nae, ũquĩ icuã mo eãte seje Jesús rĩi. ¹⁵ Herodes je abe mbae icuã mo eãte Jesús rĩi. Herodes que Jesús mbube chõ nande je ra. ¿Mbaerã nda nandeiquia re? Mbae icuã mo ngue esaã eãte resẽ. ¹⁶ Tairuã nua ño. Aquere tambui mondo, i rei que Pilato ñee mbia je ra. ¹⁷ Pascua mose bei que Pilato riqui mbia matã ji mii mbui bei ra.

¹⁸ Mbia que tasẽ tasẽte ñeemombo mombo Pilato je ra. —Jesús eiquia.

Barrabás quia embui ure je, i tuchi que mbia quia Pilato je ra. ¹⁹ Barrabás tarō ji que chí nda. Mbia iquiasa tuchi que ae ra. Romanos nderecua je abe que eicuã icuã tuchi riqui ra. ²⁰ —Jesús quia tambui, i rei que Pilato ñeembe mbia je ra. ²¹ — Jesús embucha ira rese, i tuchi que mbia quia tasē i i ra. ²² Pilato que ñee si ee ra. Tres veces cote. —¿Mbaerã nda Jesús aiquia re? ¿Mbae icuã esaã nde? Mbae icuã esaã eãte umano sacuã. Tairuã nua ño. Aquere tambui mondo, i rei que Pilato ra. ²³ Mbia que ñee mombo mombo tuchite ee ra. —¡Eiquia jê! ¡Ira rese embucha jê! i tuchi que mbia quia tasē tasē ee ra. Sacerdotes rerecua abe que tasē i ite ra. Eno i chee que Pilato cote ra. ²⁴ Pilato que mbia cheẽ mumbayã nyee ra. ²⁵ Pilato que Barrabás mbui mondo cote ra. Mbia iquiasate raque ae. Ñee icuã icuãsatete raque ererecua je. Pilato que Jesús mee mbia je cote ra. Eiquia sacuã.

Mbia Jesús mbucheseco ira rese

²⁶ Soldados que Jesús curuchoi eiquia sacuã cote ra. I rei que emo u quia uco si ra. Simón, i que ee ra. Cirene jenda mo ngue ae ra. Aque que soldados isi ra. Ira mbuchicuandasa ji rerao sacuã Jesús rui. Cruz, i equia ee. ²⁷ Mbia tubiriã ngue nyoï quia eruï ra. Cuña abe tubiriã. Ñquï ngue nyoï quia tasē tasē tuchi nyeseo erese ra. ²⁸ Jesús que uba mae ñee ee ra. —Cuña, jenyeseochï nguiã serese. Jenyiese quia jenyeseo. Jendiirï abe rese quia jenyeseo, Jerusalén jenda. ²⁹ Mbae icuã nda tuutu tuchi jêje cote. Ae eriirï nderecua nae, ñquï nda mbae rasi saã tuchi aque mose cote. Aque mose quiatu bichï mbia riirï eã ja mbite re. Mbae icuã tuchite quia nda aque mose cote re. ³⁰ “Amano ño mbichï se”, i tuchi ra mbia aque mose cote. “Sita ibate tu chõ mbichï seati”, i tuchi ra mbia aque mose cote. ³¹ Se chee mbia riquichï sembasi mbasi a.

Seicuã eã ndaque se. Mbia quiatu ra mbae rasi saã tuchi huïcuã ñi cote, i que Jesús ñee nda.

³² Soldados que mbia icuã nyeremo curuchoi Jesús rese eiquia sacuã nda. ³³ Ngasē ngue ibi ibate mo cote ra. Eresa cuare, i que hue je ra. Huee que Jesús mbucha ira rese cote ra. Ñquï mbia icuã abe que embucha ira rese ra. Enongue que emï Jesús quiatocuti ra. Equiatocutiã ngue enongue mï no nda. ³⁴ Mbia Jesús mbucha mose ira rese que Jesús ñee Dios je ra. —Paba, ñ icuã embutiã esi. Ñimbaaquiatuãte equia seiquia ñ, i que Jesús Dios je ra. Soldados que sita ñetē mbaaba aba o je ra. —Aba ra ja. Aba mbaerã nda Jesús irao reae, i que nyue ra. ³⁵ Mbia que chí ja tuchi mae erese ra. Ererecua abe chee que chí iquiasate ra. —Ma ndequirãcuãte. Mbia que erembucherõ cherõ tuchi quia. ¿Mbaerã ereico eï ãte ndechue nde abe re? Dios riirï nde reaẽ, i que ererecua u iquiasate ra. ³⁶ Soldados abe que iquiasate ra chõ nguia ee ra. Vinagre chiquino ngue emee ndei ee echimbei sacuã nda. ³⁷ —¿Mbaerã ereico nguichi ãte ira si nde ae re? Judïos rerecua rei nde reaẽ, i que soldados iquiasate ra Jesús je ra. ³⁸ Mbia que embesa ji mï Jesús ñquï quiati ibate ra. JUDIOS RERECUA CHÕ CORE, i que embesa ji huï nda. Griego cheẽ. Latín ñee abe no. Hebreo cheẽ abe no.

³⁹ Ae mbia icuã mbucheseco ji chí Jesús rese nae, ñquï mo ngue ñee icuã Jesús je ra. —¿Mbaerã ereico nguichiã nde ae re? ¿Mbaerã ereico urembuquichiãte ure abe re? Dios riirï nde reaẽ, i que ñquï mo ñeemombo Jesús je ra. ⁴⁰ Enongue que ñee ee ra. —¿Mbaerã ereico ñee ñquï Jesús je re? ¿Ndesiquiche ãte eriqui Dios si re? Ereico mano Jesús rã si a resẽ. ⁴¹ Nandeico mano nandeicuã ñi a resẽ. Jesús quiatu que mbae icuã saã eãte rei resẽ, i que enongue ñee ee ra. ⁴² Aque sí que ñee Jesús je cote ra. —

Jesús, endua serese nde ererecuarã mose, i que ñee Jesús je ra. ⁴³ Jesús que ñee ee ra. —Tacheẽ nyecua ndeje. Ereico ra serese namo Dios rese seico mose, i que Jesús ee ra.

Jesús mano cote

⁴⁴ Tenda chí mose nandeite re que itondaru ru cote ra. Ibi ja que itondaru ra. Itondaru beite que ra. Tenda nyesechoe chee. Tres horas que ra. ⁴⁵ Tenda cuute que aque mose ra. Tiru mbucheseco ji Dios chuchua jenda que nyisia turã nda. ⁴⁶ Jesús que ñee mombo ngu je ra. —Paba, aso quia nderea aque, i que ra. Mano ngue cote ra. ⁴⁷ Soldado rerecuca que mae tuchi huĩ erese ra. Ae que ñee turã Dios riĩ cote ra. —Mbae icuã naasa eã tuchi chõ Jesús riqui re, i que maende erese ra. ⁴⁸ Mbia tubiriã chí quia mae ja erese nae, ùquĩ ia eã tuchi que nyoĩ quia uchiã isi cote ra. ⁴⁹ Mbia Jesús chíicua ja que chí isho mae erese ra. Ae cuña nyoĩ beite quia erese Galilea si nae, ùquĩ abe que chí isho mae erese ra.

Mbia Jesús raaque chati cote

⁵⁰ I que mbia turã mo nguia huee ra. José, i que ee ra. Judío mo ngue ae ra. Arimatea jenda que ae ra. Judíos rerecuca mo ngue ae ra. ⁵¹ José ia eãte que ererecuca ataque rese Jesús iquia mose ra. Ae que Dios quiatote ra. — Dios ra ererecuca, i beite que equia eraarõ arõ nda. ⁵² —Jesús raaque emee na seje, i que José oso ñee Pilato je ra. ⁵³ José que Jesús raaque mbuquichi cote ra. Tiru je que emanda. Sita ribicoĩ ji imi ye que emondo ra. Mbia raaque mo ngue emondo eãte huee nyii ra. ⁵⁴ Viernes que aque mose ra. Mbia que icoquiatu ja quia sábado nonde ra. ⁵⁵ Ae cuña nyoĩ beite quia Jesús rese Galilea si nae, ùquĩ ngue nyoĩ sita imi ndese mae nda. Jesús raaque iti ji rese que mae tuchi ra. ⁵⁶ Nyebi que echoĩ uchuchua ra. Aba mbushimbusa que esaã nyoĩ ra. Sábado mose que ùquĩ uquenea ucua cote ra. Dios cheẽ si.

24

Jesús raaque quera si

¹ Isamamimbe tuchi que cuña nyoĩ domingo mose sita imi ndese mae nda. Aba mbushimbusa que ecuruchoĩ rei eichusẽ chusẽ sacua Jesús raaque rese ra. Cuña mo abe que nyoĩ quia erese ra. ² I que sita eraaque atiquia ruruba ji u ee ra. ³ Cuña ngue ique rei nyoĩ sita imi ye ra. Jesús raaque oreãte que ee ra. ⁴ Tiri i tuchi que ra. —¿Mañi nda abare? i tuchi que ra. Aque mose que mbia nyeremo chí juã ee ra. Eirao nininya tuchi que chí ee ra. ⁵ Cuña ngue titi titi i tuchi u ra. Nyebe echi nguiã nyibi beite. Angeles que ñee ee ra. —¿Mbaerã jẽingo Jesús raaque requia requia a re? Quera si que resẽ. ⁶ Emoate a resẽ. Quera si que resẽ. Sã ñee jẽje siqui mose Galilea no. ⁷ “Mbia icuã nda seisi iquia. Sembucha ra ira rese. Tres días mose ra aquera si”, i que jẽje nyii resẽ, i que ángeles ñee cuña je ra. ⁸ Ùquĩ ndese que cuña ndua cote ra. ⁹ Cuña ngue nyebi cuaẽ mbia mbiirandu ja cote ra. Jesús chimbaaquiatu once abe mbiirandu. ¹⁰ María Magdalena i que mbia mbiirandusa je ra. Juana i que emo je ra. María i que enongue je ra. Jacobo si que María ra. Cuña mo abe abe que ra. ¹¹ Nyia iã ñochĩ Jesús chimbaaquiatu cuña ñee mose ee. Cuña ñee ñooño nei nguiã ee. ¹² Pedro que oso uchã sita imi ndese mae nda. Nyurucua que mae erese ra. Jesús umanda achõ ngue chí ee ra. Pedro que nyebi oso quia ndua ndua Jesús oreã ndese ra.

Jesús ngata querare uquiato rese

¹³ I que Jesús quiatu nyeremo nyoĩ quia aque mose ra. Emaús quiti que echoĩ quia ra. Dos leguas que Jerusalén si ra. ¹⁴ Ùquĩ ngue nyoĩ quia ñee ñee nyue ra. Jesús mano niĩ. Jesús raaque oreã niĩ abe no. ¹⁵ Ùquĩ ñee ñee ndiichã ngue Jesús si ra. Erese que Jesús si quia ngata cote ra. ¹⁶ Ùquĩ ngue mae ndei Jesús rese ra. Icu

eãte chõ ngue ra. Mbiamo nda eriqui reĩ ee raẽ. ¹⁷ Jesús que ñee nyee ee ra. —¿Mbaerã jẽingo ñee nyue ã nde? ¿Mbaerã jẽya eãte riqui re? i que Jesús ñee ee ra. ¹⁸ Ũquĩ mo ngue ñee Jesús je cote ra. Cleofas, i equia ee. —¿Ereiranuate erese re? ¿Nde miĩ ño ereiranua erese ndeico mose Jerusalén nde? i que Cleofas ñee ee ra. ¹⁹ —¿Mbae rese? i que Jesús ee ra. Ũquĩ ngue ñeembe ee ra. —Jesús rese. Nazaret jenda rese. Dios cheẽ nenei neneisa tuchi rei que ae ra. Equirãcuã tuchi rei que ae ra. Mbia que mae ja tuchi rei equirãcuã ndese ra. ²⁰ Mbia rerecua que Jesús icuia cote ra. Sacerdotes rerecua abe chõ ngue Jesús icuia nguiã. Nyebe soldados eicua nguiã mbucha ira rese cote. ²¹ Israel jenda rerecua reĩ nda ure je. Tres días chee namo cote emano mosenda bei. ²² Ureresenda cuña mo ngue ñee uremundi tuchi ra. Ũquĩ ngue nyoĩ rei eatísaa nyaashĩ namo mose ra. ²³ Jesús raaque oreãte nda ee ra. Nyebe euaẽ nguiã urembiirandu cote. Angeles mo nda chi ee eatísaa ra. “Jesús que quera si ra”, i nda ángeles ñee ee ra. ²⁴ Aquere que ureresenda mo abe nyoĩ eatísaa ra. Cuña ñee ndui si que Jesús raaque oreãte ee ra. Jesús rese quiatu que mae eã nda, i que Cleofas ñee Jesús sí je ra. Jesús eã nda eriqui reĩ ee raẽ. ²⁵ Jesús que ñee ee cote ra. —¿Mbaerã jẽaquiatuãte riqui re? ¿Mbaerã jẽingo Dios cheẽ icuayãte re? ¿Mbaerã jẽingo Dios cheẽ nenei neneisa chimbesa icuayãte re? ²⁶ Sã embesa ji ñee no. “Cristo ra mbae rasi saã ja oso nonde ibate”, i que embesa ji no, i que Jesús ee ra. ²⁷ Jesús que Dios cheẽ mbuchecua ja ee cote ra. Ngasi riĩ. Umano niĩ abe no. Uquera riĩ abe no. Moisés chimbesa que embuchecua ee ra. Aquere que Dios cheẽ nenei neneisa chimbesa abe mbuchecua ja ee ra.

²⁸ Ngasẽ ngue ũquĩ nyuchúaa cote ra. Jesús que ngata i abareã oso ra. ²⁹ Jesús ngata i abareã mose que ũquĩ eriquisã nda. —Eitõ ureresẽ aa ae.

Tenda osote resẽ. Itondarute ra ndeje resẽ, i que ñee ee ra. Nyebe Jesús icue nguiã echuchúaa erese. ³⁰ Ngoi ja que quiaru nonde cote ra. Jesús abe que ngoi erese ra. Mbichae que esirõ o je cote ra. Gracias i que Dios ibatenda je mbichae riĩ nda. Mbichae que esiquio mondo ee cote ra. ³¹ Ũquĩ mose tuchi que Dios mbia mumae turã tuchi Jesús icua sacua cote ra. Jesús icua ramo sacua cote. Jesús que quiachã asi esi cote ra. ³² Ũquĩ ngue ñee ñee nyue cote ra. —Jesús chõ eriqui reaẽ. Nyebe nandeya tuchite riqui nguiã Dios cheẽ mbuchecua checua mose nande je ñeenda cúa, i que equia ñee ñee nyue ra. ³³ Nyebe echoi jei nguiã nyebi si Jerusalén. Huee que Jesús chimbaaquiatu chi ñumunua ee ra. Eresenda mo abe rese. ³⁴ Ũquĩ ñumunua je que ñee ee ra. — Jesús que quera si ra. Ae bei. Simón ngue mae erese ra, i que ñumunua je ee ra. ³⁵ Aquere que ũquĩ nyeremo ñee mbia chumunua je cote ra. — Jesús rese que uremae ñeenda cúa ra. Urembaaquiatu quiatu que umano niĩ nda. Uquera riĩ abe no. Mbichae riquio mose ure je, aque mose ramo ngue Jesús ureicua ra, i que mbia mbiirandu ja ra.

Jesús nyecua uchimbaaquiatu je

³⁶ Ũquĩ ñee ua eã mose que Jesús nyecua ee ra. Mbia ite re. —Jẽya chõ serese, i que ñee ee ra. ³⁷ Mbia que titi titi i tuchi u mae erese ra. Aba checuayã nda Jesús riqui reĩ ee raẽ. ³⁸ Jesús que ñee ee ra. —¿Mbaerã jẽsiquichete riqui re? ¿Mbaerã “Jesús chõ eriqui re” jenyẽ eã seje re? ³⁹ ¡Sã jẽ! Jemae seo rese. Jemae sei abe rese ae. Jẽoco serese ae. ¡Sã se si chõ jẽ! Aba checuayã nguia eroo eã nde. Equiangue eã abe no. Se rã eã, i que Jesús ee ra. ⁴⁰ O que eteacuquia ee cote ra. Hui abe que eteacuquia ee ra. ⁴¹ —Jesús chõ eriqui re, i eã ngue ra. Ndua ndua chõ erese. Eyate raque erese. Jesús que ñeembe ee ra. — ¿Mbae mo ndei eu sacua aa re? i que

ee ra. ⁴² Sira resi ji que emee ee ra. Irao abe que emee ee eretã ndesebe ra. ⁴³ Jesús que eisi eu bei ũquĩ ndésaa cote ra.

⁴⁴ Jesús que ñee ee cote ra. —Sã acheẽ jêje seico mose jendese nyii no. “Ae Moisés mbesa seriĩ nae, ũquĩ nda ique ja seriĩ cote. Dios cheẽ nenei neneisa chimbesa abe ra ique ja cote. Salmos ndesenda cheẽ abe ra ique ja seriĩ cote”, ae que se quia jêje nyii. ũquĩ ngue ique ja semana mose cote ra. Sequera mose abe no, i que Jesús ñee ee ra. ⁴⁵ Dios cheẽ ngue embuchecua checua ee cote ra. ⁴⁶ Jesús que ñeembe ee ra. —Sã embesa ji riqui ñee no: “Cristo ra mbae rasi saã tuchi mano nonde. Tres días mose ra quera si. ⁴⁷ Mbia ra echeẽ senei senei tuchi cote. Jerusalén jenda je rane nda erenei nenei. Mbia ja je ra erenei nenei cote. ‘Jêicuã si jêhuĩ rã. Cristo jêicuã mbutiã sacuã’, i tuchi ra mbia ja je Cristo riĩ cote”, i que embesa ji quia nae. ⁴⁸ ũquĩ ique quia ã cote. Jemaee nguia erese ã cote. ⁴⁹ Ae je Paba ñee jêje nae, “Espíritu Turã tamondo jêje”, i equia jêje nae, aque tamee jêje cote. A jenguchõ na Jerusalén. Paba ibatenda uquirãcuã mee nyee jêje, i que Jesús ñee uchimbaaquiato je ra.

Jesús nyui oso ibate

⁵⁰ Jesús que equerao ja pe jiri Jerusalén si cote ra. Betania i que hue sucha je ra. Jesús que o mumbate ñee uchimbaaquiato je cote ra. —Sã Dios jendeaquiato turã, i ee. ⁵¹ Aque mose tuchi que Jesús si nyui ibate erecha cote ra. ⁵² ũquĩ ngue ñee turãte Jesús riĩ nda. Eya tuchi que nyebi nyoi Jerusalén nda. ⁵³ Dios chuchua que eriqui bei nyoi ñee turã Dios riĩ nda. Amén.

EL SANTO EVANGELIO SEGÚN SAN JUAN

Jesucristo rane ngue siqui nyii ra

¹ Dios cheẽ nane tuchi que nyii ra. Mbae ja si. Dios cheẽ ndei Jesús. Ae que siqui bei Dios rese ra. Dios si rei Jesús. ² Ae chõ ngue siqui bei Dios rese nyii ra. ³ Dios que mbae chao eã ae ae ra. Jesús rese ae mbae ao ja nguiã. ⁴ Jesús chõ mbia mingo nguiã ã. Nandemíngosa chõ nanderesae nguiã ã. ⁵ Nandemíngosa chõ mbae tesae tuchi nguiã itondaru. Itondaru quia ra emungue aroneãte. ⁶ Dios que emo mbu cote ra. Juan, i que ee ra. ⁷ Juan ngue tu aba resaesa renei nenei mbia je ra. Mbia mbiirandu randu ja. ¶ nda mbia aba resaesa icua ja, Juan ñee nguire. ⁸ Aba resaesa eã ño Juan nde. Emo nii ño Juan ndiqui nguiã ñee. —Ae chõ nanderesae nguiã co, i que Juan nda. ⁹ Aba resaesa que tu ibi cote ra. Aba resaesa choñoã tuchi que ra. Ae chõ aba resae ja nguiã ã. ¹⁰ Aba resaesa que siqui íbii cote ra. Mbia que eicua eãte chõ nda. Mbae aosa ja raque ae. ¹¹ Aba resaesa que tu rei nguesenda mbirõ nda. Eresenda que eisiteã ñochĩ nguiã. ¹² Mbia mii mii ño ngue eisi turã turã nguiã. Mbia mii mii ño ngue eicua icua nguiã. Uquĩ je quia Dios riqui nguiã “seriirĩ” i. ¹³ Mbia riirĩ na eã ño Dios riirĩ ndiqui nguiã nyaacuquia cuquia ã. Ñquẽ nyaacuquia rã eã ño Dios riirĩ ndiqui nguiã nyaacuquia cuquia ã cote. Sã emo ndiqui ngũinisi rese embiirĩ nae, uquĩ na eã ño Dios riirĩ ndiqui nguiã nyaacuquia cuquia ã. Dios ae chõ “seriirĩ” i nguiã ee Dios icua mose. ¹⁴ Jesús rei Dios cheẽ. Jesús que tu mbiarã cote ra. Mbia tuchi que ae cote ra. Siqui que equia urerese cote ra. Echisaã turã ndese que ureico mae cote ra. Eturã tuchi chõ ae re. Ngu rã si chõ ae re. Ichõñosa reã tuchi

chõ ae re. ¹⁵ Juan ngue Jesús senei senei nguia mbia je ra. —Co rĩ ngue acheẽ jêje resẽ. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae rei que jêje resẽ. Ae siqui co cote, i que Juan mbia je ra. ¹⁶ Jesús turã tuchi que ra. Nyebe eriqui nguiã mbae turã mee mee mbei nande je. ¹⁷ Dios cheẽ mumbayã sacua ngue Moisés ñee ndei nguiã nande je. Jesús quiatu ngue tu nguiã cote. Dios turã nenei nenei nande je. Jesús quiatu ngue Dios cheẽ ñooñoa senei senei nguiã nande je no. ¹⁸ Emo maeãte Dios rese. Eriirĩ ae que nandembiirandu randu quia Dios rese ra. Eriirĩ nguiarei ngu rã si.

Juan el Bautista ñee turã Jesús rĩ

¹⁹ Judíos Jerusalén jenda que mbia mondochoi ñee Juan je ra. Sacerdotes mondo erea. Levitas mo ndese. —¿Aba nde re? i sacua Juan je. ²⁰ Juan ngue ñee nyecua tuchi ee ra. —Christo eã ño se re, i que ee ra. ²¹ —¿Abate nde re? ¿Elías chõ nde re? i que judíos chimondo ñeembe Juan je ra. —Tei. Elías eã ño se re, i que Juan ee ra. —Dios cheẽ mbuchecua ra tu, i equia nae, ¿ae chõ nde re? i que mbia ñee Juan je ra. —Tei, i que Juan ee ra. ²² Judíos chimondo que ñeembe Juan je ra. —Ndecheẽ embuchecua ure je. ¿Abate nde re? ¶ nda ndecheẽ uresenei uquĩ je, ae urembu. ¿Mañi ure ra nderĩ nde? i que Juan je ra. ²³ Juan ngue ñee ee ra. —Tacheẽ jêje cote. Aba chõ se chã. Mbia amingo quiatu quiatu quia co. Ae ñee mombo mombote quia mbia je turuquia ite re nae, ae chõ se re. —“Ñeenda jembuquiche nandererecua mbaerã”, ae i quia, aque chõ se re, i que Juan nda. (Isaías chimbesa rui si chõ Juan ñee nguiã.) ²⁴ Ae ñee ñee nguia Juan je nae, uquĩ ndei fariseos chimondo uquĩ. ²⁵ Fariseos chimondo que ñee ee ra. —¿Mbaerã ereico bautizar i re? Cristo eã ño nde resẽ. Elías eã ño nde resẽ. Dios cheẽ mbuchecua eã ño nde resẽ, i que Juan je ra. ²⁶ Juan

ngue ñee ee ra. —I je chõ aico nguiã bautizar i. Emo nguia siqui raque quia jẽite re. Aque quia jẽicuayãte nguiã co. ²⁷ Enonde aico co. Aque ra tu serui. Ae quia ererecua tuchi sesi re. Erã si eã ño se re, i que Juan fariseos chimondo je ra.

Jesús rei oveja rã

²⁸ Betábara, i que hue sucha je ra. Huee quia fariseos chimondo ñee nguiã Juan je. Ama Jordán ndobei. Ae Juan ndiqui bautizar i, huee. ²⁹ Isamami nongue que Juan mae Jesús rese ra. Jesús que tu quia Juan ndichã nda. —Co mbia icuã ndiquicharõ sacuã ndu quia co. Oveja riirĩ na eriqui Dios je. Ae ra nandeicuã mbutiã nandesi. ³⁰ Erĩ ngue aico ñee jẽje. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae que se quia jẽje. Co chi eru quia co cote. ³¹ Se sí que aicuayãte nyii ra. I je que bautizar ae quia mbia je cote ra. I nda Israel jenda Cristo icua, i que Juan nda. ³² Juan ngue ñee mbei quia ra. —Espíritu Turã ndese que amae nda. Nguichi que u Jesús arõ nda. Nyurusĩ rã ngue eru nguichi earõ nda. I bate si. ³³ “¿Aba ra Cristo re?” ae beite que se quia ra. Dios que ñee seje ra. “I je eico bautizar i mbia je jẽ! Ae arõ nda Espíritu Turã ndu nguichi bei nae, ae quiatu bautizar i sacuã mbia je Espíritu Turã je”, i que Dios seje ra. ³⁴ Atea que se cote ra. Ae rei Dios riirĩ. Aicuate se cote, i que Juan nda.

Jesús mbia irabo uchimbaaquiaturã

³⁵ Isamami nongue que Juan ndiqui hue sí no nda. Nguesenda nyeremo ndese que eriqui ra. ³⁶ I que Jesús ucuã quia ra. —Qui mbia icuã ndiquicharõ sacuã coi quia qui. Oveja riirĩ na eriqui Dios je, i que Juan Jesús riĩ nda. ³⁷ Juan ndesenda nyeremo ngue Juan ñee ñandu ra. Nyoĩ que Jesús rui cote ra. ³⁸ Jesús que mae nguique quitira. —¿Mbae jẽsequia quia re? i que

mae erese ra. Uquĩ ngue ñee Jesús je ra. —Mbia mbaaquiatusa, ¿ma ndechuchua ma nde? i que ee ra. ³⁹ —Jenyu mae erese, i que Jesús ee ra. Nyoĩ que mae echuchua rese ra. Tenda nyecote mose que echoi erese ra. Tenda oso cheete que echi erese cote ra. ⁴⁰ Uquĩ nyeremo ngue Juan ñee ñandu ra. Siqui que Jesús rui cote ra. Andrés, i que uquĩ mo je ra. Simón Pedro nongue que ae ra. ⁴¹ Andrés que oso asite ngõngue requia ra. Simón ndequia. —Dios chimondo que uretea ra. Cristo que uretea ra, i que Andrés ngõngue je ra. ⁴² Andrés que ngõngue querao Jesús rea cote ra. Jesús que mae erese ra. Ñee ngue ee ra. —Simón ño nde re. Jonás ndiirĩ ño nde re. Cefas, i ra ndeje cote. Cefas, i chõ Pedro re, i que Jesús ee ra.

Jesús Felipe irabo; Natanael abe

⁴³ Isamami nongue que Jesús ñee nda. —Taso Galilea, i que ra. Ngasẽ ngue Felipe je ra. —Serui eico, i que ee ra. ⁴⁴ Betsaida jenda que Felipe ra. Hue jenda si chõ Andrés re. Pedro rese. ⁴⁵ Felipe que oso Natanael ndequia cote ra. —Ae riĩ Moisés riqui embesa mbesa cose, aque que uretea ra. Ae riĩ Dios cheẽ mbuchecuada riqui embesa mbesa cose, aque que uretea cote ra. Jesús chõ eriqui re. Nazaret jenda chõ eriqui re. José riirĩ ño eriqui re, i que Felipe Natanael je ra. ⁴⁶ Natanael que ñee Felipe je ra. —¿Mbae turã mo nda tu Nazaret jenda re? i que ra. —Echu erea ae, i que Felipe ee ra. ⁴⁷ Natanael que tu Jesús riichã nda. Jesús que mae erese ra. —Co israelita turã tuchi mo ndu quia co. Aba mbiirĩ irisa reã tuchi mo ndu quia co, i que Jesús Natanael niĩ nda. ⁴⁸ —¿Mañi ere quia seicuate re? i que Natanael Jesús je ra. —Amae ngue nderese ra. Felipe ‘quiatuchu’ i nonde ndeje. Iraqui re que amae nderese ra. Higo iqui re, i que Jesús ee ra. ⁴⁹ Natanael que ñeembe ee ra. —Mbia mbaaquiatusa, Dios ndiirĩ ño nde riqui re. Israel jenda rerecua

tuchi chõ nde riqui re, i que Natanael Jesús je ra. ⁵⁰ Jesús que ñee ee ra. —¿Seicuate se re? “Iraqui re que amae nderese ra”, ae que ndeje, ¿aque bei bei seicua quia co re? Mbae turã tuchi rese ra erëmae cote, aque si, i que Jesús Natanael je ra. ⁵¹ Jesús que ñee si ee ra. —Tacheẽ nyecua jêje. Ibei ra obo jêje. Angeles nda nguichi quichi quia seje. Nyoï nyoï si ra equia ibate. Angeles ibatenda. Dios rimba. Jemae nda erese, i que Jesús ee ra.

2

Emo ngũinisirã nguereco

¹ Tres días mose que emo ngũinisirã isi ra. Galilea. Caná, i que hue sucha tubiriã je ra. Mbia que ñumunua nua fiesta raã ngũinisirã isi mose ra. Jesús si abe que siqui huee ra. ² Jesús abe que siqui huee no nda. Uchimbaaquiату rese. ³ Mbia que uva rique mbei u huee ra. Ua jei que mbia je ra. Jesús si que ñee nda. —Uva rique que ua jeite ra, i que ñee Jesús je ra. ⁴ Jesús que ñee ee ra. —¿Mbaerã ereico ñee seje ùquĩ nde, Taĩ? Achecua jei eã nda mbia je, i que Jesús usi je ra. ⁵ Esi que ñee mbia rimba je ra. —¡Jesús cheẽ ndui si chõ jẽingo jẽ! i que ee ra. ⁶ Cántaro atate que chi ra. Seis que cántaro ra. Sita ao ji. Ûquĩ jie que judíos riqui nyoï nyoï querabe ra. Ûquĩ cántaro jie que cien litros jaaja ra. ⁷ Jesús que ñee mbia rimba je ra. —Cántaro jemombisẽ mbisẽ ja i je, i que Jesús ee ra. Nyebe emombisẽ ja nguiã. ⁸ Jesús que ñeembe ee ra. —Embisengue jenyarabe jiri mondo fiesta raã naasa je, i que ee ra. Erimba que echara serao ee cote ra. ⁹ Uva rique rã si chõ ngue i fiesta raã naasa je cote ra. Fiesta raã naasa que ubi erese ra. Eiranuã ngue ubi erese ra. Erimba achõ ño ngue jirandu ja nguiã. Ae ngũinisirã isi quia nae, aque je que fiesta raã naasa ñee nda. ¹⁰ —Mbia ja quiarei uva rique turã nane mee mee nguia mbia je querabe. Eturã mbei ja mose, ereã jiri mbei ruquia ruquia mbia je cote.

Nde quia eturã tuchi ererecoquiату nguiã. Hui bei sacua cote, i que ra. Jesús chisaã ñi ño eriqui nguiã ñee. ¹¹ Ûquĩ nane ngue Jesús saã mbia mae sayã nyii ra. Uva rique rã si tuchi que i raã nda. Ûquĩ ngue esaã Galiléaa eriqui mose ra. Caná, i que hue sucha tubiriã je ra. Hue rane ngue Jesús uquirãcuã ndeacuquia mbia je ra. Echimbaaquiату que Jesús icua tuchi cote ra. ¹² Huesi que Jesús choi Capernaum nda. Usi rese. Ngõngue rese. Uchimbaaquiату abe rese. Hue que ech i itõ mocoite ra.

Jesús oso Dios chuchúaa

¹³ Fiesta rurubite mose que Jesús si Jerusalén nda. Pascua, i que judíos aque fiesta je ra. ¹⁴ Jesús que oso Dios chuchúaa ra. Huee que mbia chi ticuasú mee mee nyue mbae isiquia ribishorõ nda. Ovejas abe no. Nyurusí cuasu abe no. Emo ngue chi ngoi ra. Mbae isiquia que esibishorõ shorõ u ra. ¹⁵ Mbia iruã nuãsa que Jesús saã nda. Esã nderecua. Aque je que Jesús mbia mbusẽ ja mondochoi Dios chuchua si ra. Ticuasú abe. Ovejas abe. Ae mbae isiquia sibishorõ shorõ nguia, ùquĩ mbae abe que embuchiichere chere ja mesa ra. Mbae isiquia mombo mombo íbii. ¹⁶ Ae nyurusí cuasu mee mee nguia mbia je nae, ùquĩ je que Jesús ñee asite ra. —Ã nyurusí cuasu jendao Dios chuchua si. Mbae isi isisa jësaã saã ñochĩ u Paba chuchúaa a, i que Jesús ñee ee ra. ¹⁷ Jesús chimbaaquiату que ndua ndua quia embesa ji rese ra. —Sebi tuchi ndechuchua, i que embesa ji huĩ nda. Ûquĩ ndese que echimbaaquiату ndua ndua ra. Jesús mbia icuã mbusẽ mondochoi mose Dios chuchua si. ¹⁸ Judíos que ñee Jesús je ra. —¿Ma mbia mae sayã nda eresaã ure je re? Ure ndeicua sacua. “Ererecua chõ eriqui re”, ure nda ndeje chã, i que judíos ñee Jesús je ra. ¹⁹ Jesús que ñee ee ra. —Jẽ Dios chuchua mbutiã mose, asiquicharõ nda se. Tres días mose ra asiquicharõ, i que Jesús ra. ²⁰ Judíos que ñeembe

Jesús je ra. —Tenda atate que nanderu riqui itōte Dios chuchua ao ao resē. Cuarenta y seis años. ¿Mañi ere ra tres días eao ja nde re? i que judíos Jesús je ra. ²¹ Nguete riñi ngue Jesús riqui ñee nda. Mbia chumunuasa riñi eã ño ngue ñee nguiã. ²² Jesús quera si mose ramo ngue echimbaaquiatu ndua aque echeē ndese cote ra. Embesa ji rese ndua. —ƒ nguia equia re, i que echimbaaquiatu ndua ndua cote ra. Jesús quera si mose.

Jesús mbia chiã icuate

²³ Mbia tubiriã ngue Jesús icuate aque mose ra. Fiesta de la pascua mose. Siqui mose Jerusalén. Mbia mae sayã naa naa mose que mbia eicuate cote ra. ²⁴ Jesús que mbia ndua ndua icuate quia ra. Nyebe ñee tuchi eã nguiã mbia je. ²⁵ —Ei ño mbia nguiã ã, i aronea mbia mo Jesús mbiirandu. Jesús quiatu que mbia chiã icuate quia ra.

3

Nicodemo oso ñee Jesús je

¹ Mbia mo ngue siqui ra. Nicodemo, i que ee ra. Fariseo que ae ra. Judíos rerecua que ae ra. ² Itondaru mo ngue esi Jesús rea ra. —Mbia mbaaquiatusa chō nde re. Dios chimbu chō nde re. Ureicuate que ra. Mbia mae sayã nda mbia mo saã eã, Dios siquiã mose erese, i que Nicodemo Jesús je ra. ³ Jesús que ñee ee ra. —Tacheē nyecua ndeje. Ae nyaacuquia si eã, ũquĩ nda siquiã Dios rese, i que Jesús ee ra. ⁴ Nicodemo que ñee Jesús je ra. —¿Mañi nda mbia cuasu nyaacuquia si re? ¿Usi riequi rĩ nda esi si re? ¿Nyaacuquia si nonde re? i que Nicodemo Jesús je ra. ⁵ Jesús que ñee ee ra. —Tacheē nyecua ndeje. Ae nyaacuquia i achō je nae, ũquĩ nda siquiã Dios rese. Ae nyaacuquia Espíritu Turã abe je nae, ũquĩ nguia ra siqui Dios rese cote. ⁶ Mbia nyaacuquia mose, mbia sí chō eririĩ nde. Emo nyaacuquia mose Dios riirina, Dios rã si chō eno

nde. ⁷ “Nducuã”, erechĩ nda secheē mose jē. “¡Jenyaacuquia si ja chō jē!” se i mose. ⁸ ¿Mbaranguiti si quiririã ndiqui ichu re? ¿Mbaranguiti ra esi re? Ereicuayãte. Quiririã erechandu raque. Eremae ãte erese. Eĩ si chō Dios riirĩ nde. Ae nyaacuquia Dios je nae, i que Jesús ee ra. ⁹ —¿Mañi ũquĩ nde? i que Nicodemo Jesús je ra. ¹⁰ Jesús que ñee ee ra. —¿Secheē ereicuayãte quia re? Mbia mbaaquiatusa raque nde. Judíos mbaaquiatusa raque nde. ¹¹ Tacheē nyecua ndeje. Ae ureicua, ũquĩ ño uresenei senei ndei nguiã jēje. Ae rese uremae, ũquĩ ño uresenei senei ndei nguiã jēje. “ƒchōiño nguiã”, jenye chōchĩ nguiã urecheē mose. ¹² “ƒchōiño nguiã”, jenye chōchĩ nguiã secheē mose. Ibi jenda renei nenei mose jēje. Secheē nda jemumba tuchi cote, ibatenda nenei nenei mose jēje. ¹³ Emo nguichiãte ibei si. Se mĩ ño ngue achu nguiã nguichi ibei si. Mbiarã ño ngue achu nguiã. Asobe ra ibei. Ibei jenda chō se re. ¹⁴ Sã Moisés mbei raanguia mbuchecua mbia je turuquia re cose no. Eĩ si ra mbia sembucha ira rese. ¹⁵ ƒ nda seicuaa quiachã eã mbei sesi. ƒ nda seicuaa siqui bei ibate serese.

Dios nyesecua ja mbia rese

¹⁶ Dios que nyesecua tuchite mbia ja rese ra. Nyebe nguiirĩ mĩ mbu nguiã mbia je. Eriirĩ icua sa ra manoa. Siqui bei rae. ¹⁷ Mbia mbasi sacua eã ngue Dios nguiirĩ mbu íbii ra. Mbia rirō sacua mbae icua si quia ñi ngue Dios nguiirĩ mbu nguiã. ¹⁸ “Eso tata cuasu”, i eã nda Dios nguiirĩ icuaa je. “Eso tata cuasu”, i Dios quia nguiirĩ icuaa reã je ã. Jesús icua eãte quia ñene. ¹⁹ “Eso tata cuasu”, i Dios quia nguiirĩ icuaa reã je. Ebite quia ñi itondaru nyaashĩ si re. Nyaashĩ tu mose íbii, isiteã ngue ra. Mbae icua ndese quia eriqui beite nguiã. ²⁰ Ae siqui beite quia mbae icua ndese, ũquĩ nguia siquichete nguiã nyaashĩ si. Nyaashĩ ndiichã sereãte quia ñene. “ƒ

nda mbia mae eã nandechisaã ndese mbae icuã ndese”, i ñene. ²¹ Ae mbae turã saã mbeite quia nae, ùquĩ nguiatu nyaashĩ siichã sete nguiã. † nda echisaã saã nyecua mbia je. † nda mbia ñee, “Dios quirãcuã nguia siquite nguiã erese”, i ra mbia ñee, i que Jesús ra.

Juan el Bautista ñee turã Jesús rñ

²² Jesús que nyoĩ Judéaa cote ra. Uchimbaaquiato rese. Huee que eriqui mocoĩte ùquĩ ndese ra. Huee que eriqui bautizar i mbia je ra. ²³ Juan abe que bautiza r i quia mbia je ra. Enón, i que sucha tubiriã je ra. Salim ndurubi que ra. Hue quiato ngue i tubiriãte re. Mbia que ngaẽ ngaẽ nguia erea ra. Juan ngue bautizar i quia ee ra. ²⁴ Mbia Juan tarõ nonde mñi ngue eriqui bautizar i huee nyii ra.

²⁵ Judío mo ngue ñee icuã icuã Juan ñimbaaquiato je ra. Bautizar i rñ. —¿Aba quia ra bautizar i mbia mbitirõ sacuã nde? i que ñee icuã icuã nyue ra. ²⁶ Nyebe Juan ñimbaaquiato nyoĩ nguiã ñee Juan je. —Ae rese ereico Ama Jordán ndobei, ae abe riqui bautizar i mbia je huee. Ae eresei senei turã nguia ure je, aque. Mbia riqui tuchite erui ã, i que Juan ñimbaaquiato ñee ee ra. ²⁷ Juan ngue ñee ee ra. —Coche ñene. Dios ibatenda quiarei. Emo siqui aroneate mbia rerecuarã, Dios emingo sereã mose. ²⁸ Cristo tu nonde que Dios sembu resẽ. Mbae mbuquiche ja sacuã Cristo tu nonde. “Cristo eã ño se resẽ”, ae checua rei que jẽje resẽ. ²⁹ Jesús rui ra mbia siqui ja. Sã emo ngũinisirã nguereco no nae. Sã eninisi riqui ngu rese no. Sã eru quiato abe eya erese no. Eru quiato rã ño seya riqui Jesús rese co, mbia siqui mose erui. ³⁰ Jesús quia ererecua tuchi riqui nguiã sesi co. Ererecua eã ño aico nguiã se co, i que Juan nda.

Jesús rei ibatenda

³¹ Jesús rei ibatenda. Nyebe eaquiato riqui nguiã mbia si co. Ibi jenda chõ nande re. Ibi jenda rese

achõ ño nandeaquiato nande re. Ae quiarei ibatenda. ³² Ibatenda umaesa senei senei nguia mbia je co. Ae echandu ibate nae, ùquĩ abe esenei senei nguia mbia je co. Mbia mñi jiri riqui echeẽ andu andu ã. ³³ Ùquĩ mñi mñi ño Jesús cheẽ isi turã nguiã ã. Ùquĩ mñi “Dios ichõiñosa reã”, i tuchi nguiã ã. ³⁴ Dios quiato que Jesús mbu ra. Nyebe Jesús riqui Dios cheẽ nenei nenei co. Dios que Espiritu Turã mondo tuchite Jesús je ra. ³⁵ Jesús rese Paba riqui nyesequa tuchite co. Erucucha quia ae re. Nyebe Paba uquirãcuã mee tuchi nguiã ee. † nda Jesús riqui mbae rerecuarã ja. ³⁶ Ae Dios rucucha icua nae, ùquĩ nda siqui bei Dios rese. Ae Dios rucucha icuayã nae, ùquĩ nda siquiã tuchi erese. Nyoĩ eã mbei ra ibate. Dios ra ùquĩ mondo tata cuásuu.

4

Jesús ñee acuanĩ mo je

¹⁻² Mbia que siqui tuchite Jesús rui cote ra. Bautizar i sacuã mbia je. Jesús sí que bautizar i eã nda. Echimbaaquiato quia ngue bautizar i nguiã ee. —Fariseos riqui ndecuayãte ã. Mbia siqui tuchi mose nderui, i que mbia mo Jesús mbiirandu ra. ³ Jesús jirandu mose que esi Judea recha cote ra. —Tasobe Galilea, i que ra. ⁴ Samaria ni ngue esi ra. ⁵ Ngasẽ ngue Samaria ra. Sucha tubiriã mo ngue ngasẽ nda. Sicar, i que hue je ra. Jacob chimee ibi ndurubite que huee ra. Ae emee nguiirĩ José je. ⁶ Jacob chibicoi ibi que chĩ huee ra. Noria. Jesús que ngoi huĩ uquenea ucuã huee ra. Noria ji. Tenda nandete re mose. Ñeenda ishote que ee ra.

⁷⁻⁸ Jesús ae que tiba huee ra. Echimbaaquiato que nyoĩ sucha tubiriã nda. Mbae mo isi uchirã. Acuanĩ mo ngue tu ngasẽ i rea huee ra. Samaria jenda que ae ra. —I embu rã. Tayu, i que Jesús ñee ee ra. ⁹ Judíos que ñee eã mbei quia mbia Samaria jenda je querabe ra. Isho bei

que eriqui nyesi ra. Nyebe acuaní ñee nguiã Jesús je. —Judiate nde resê. ¿Mbaerã ereico ñee seje re? ¿Mbaerã ereico “i embu” i seje re? Samaria jenda chõ se resê, i que acuaní Jesús cheẽ ndibishorõ nda. ¹⁰ Jesús que ñee ee cote ra. —Dios chimee ereicuayãte quia co. Co ereico seicuayãte co. Eĩ nda “i raanguia embu seje” ere rei seje. Seicua mose. Eĩ nda i mbia mingo beisa amee ndeje, i que Jesús acuaní je ra. ¹¹ Acuaní ngue ñee si Jesús je ra. —Noria cuate nyeresê. I arasa ereru eãte quia a resê. Ma je quia ra i raanguia erechara seje. ¹² Nanderu ñiinda abe nda íu íu quia a yenda ye resê. Jacob. Nguiri ndese. Erimba abe nda íu íu quia a yenda ye resê. ¿Ndeaquiatute ae si nde re? i que acuaní Jesús je ra. ¹³ Jesús que ñee acuaní je ra. —Mbia íu mose a yenda jie, eisei jei chõ nda eno. ¹⁴ Ae i raanguia mbei quia nae, ùquĩ nda eisei chiã mbei cote. I raanguia sechimee nguia ra siqui bei echiangui re. Uchi uchi bei ra equia echiangui re. Emingo bei sacua, i que Jesús acuaní je ra. ¹⁵ Acuaní ngue ñeembe Jesús je ra. —I raanguia embu nembae seje no. Eĩ nda seisei chiã mbei. Eĩ nda achu achu eã a jenda ara, i que acuaní ee ra.

¹⁶—Eso nderu rea. Eru seje a, i que Jesús ee ra. ¹⁷—Seru eãte nyeresê, i que acuaní nda. Jesús que ñee ee ra. —Ae beite. Nderu eãte que ereico namo co ra. ¹⁸ Nderurã ngue eretea mocoĩte rei resê. Cinco. Ae erereco co nae, nderu tuchi eã ño aque re. Erecheẽ ñooño ãte rei nguiã seje a, i que Jesús acuaní je ra. ¹⁹ Jesús cheẽ mose que acuaní ñeembe ee no nda. —Mbae mbuchecuaa nde reae. Dios resenda nde reae. ²⁰ Ureramei nda ngaẽ ngaẽ nguia a ibi ato ra. Ñee ñee sacua Dios je. “Jerusalén quiatu mbia cheẽsa Dios je re” jenyẽ chõchĩ nguiã judíos, i que acuaní Jesús je ra. ²¹ Jesús que ñee acuaní je ra. —Tacheẽ nyecua ndeje. Mangue chooño ãte ra mbia ñee Dios je cote. Namu jiri. Jerusalén mi eã. A ibi ato mi eã

no. ²² Jeñee mbeite raque equia Dios je ã. Dios icuare rocoĩ. Ure quia ureico nguiã Dios icuate ã. Judíos chõ ure re. Judío rei mbia rirõsa mbae icua si. ²³ Namu jiri ra Dios quiatote ñee turã turã Dios riĩ uchiangui re. Mangue chooñoa cote. Dios quiatote ra ñee turã bei quia Dios riĩ cote. Echeẽ nguire. ²⁴ Dios rei espíritu. Mae aronea erese. Nandechiangui re chõ nandeico Dios andu ã. Nandechiangui re nandechẽ turã turã Dios riĩ. Dios cheẽ nguire, i que Jesús ra. ²⁵ Acuaní ngue ñee Jesús je ra. —Mesías ra tu ibate si. “Cristo”, i equia ee nae, aque ra tu ibi cote. Tu mose ra mbae mbuchecua ja mbia je. Ûquĩ aicuate quia co, i que acuaní nda. ²⁶—Cristo chõ se re. Ae je ereico ñee, i que Jesús acuaní je ra.

²⁷ Aque mose que Jesús chimbaaquiato ngaẽ ngasẽ cote ra. —Jesús riquichĩ ñee acuaní je a re, i que eu nyururate mae erese ra. —¿Mbae jenyẽ quia ñee nde? i eã ngue emo nda. Ireĩ ireĩte quiatu ngue ñee Jesús je re. ²⁸—Se rei Cristo, i mose que acuaní ía tuchi ra. Ñio ngue esecha oso ra. Mbia mbiirandu randu sucha tubiriã jenda. ²⁹—A emo ndiqui a. Semumbusẽ ja que ra. Cristo chõ ae reae. Nyao rã mae erese, i que acuaní mbia je ra. ³⁰ Nyebe mbia nyoĩ ja nguiã ícuua. Jirandu mae Jesús rese. Acuaní ñee nguire.

³¹—Mbae mo eu, i chiibe ibe que echimbaaquiato Jesús je ra. Acuaní oso mose sucha tubiriã. ³²—Tei. Sechiu jëicuayãte jẽ, i que Jesús ee ra. ³³—Emo mbae mo queru echiurã ndeae, i que echimbaaquiato ñee ñee nyue ra. ³⁴ Jesús que ñee ee ra. —Ae riĩ Paba ñee seje nae, ùquĩ tasaã mbei quia ee. Paba cheẽ mumbayã mose, ùquĩ ño sechiu riqui nguiã. ³⁵ “Pete mbae ishao shao ñi pe”, jenyẽ chõchĩ nguiã ã. Mbiaco yenda ea ireĩ ishao iriã na ño mbia riqui nguiã ã. Sã mbia riqui nyoĩ mbae a ishao shao no. Eĩ jenyẽ si chõ nguia nyoĩ mbia reru reru seje. Serese siqui

sacuã. ³⁶⁻³⁸ Sã emo ndiqui mbae a ishao shao no. Sã mbae acha riqui mbae mondo mondo ee eishao shao ribishorõ no. Sã emo ndiqui mbae eĩ tiquia tiquia no. Sã emo ndiqui eishao shao equiche mose no. Eĩ si chõ secheẽ no nde. Sã emo ndiqui secheẽ nenei nenei nyii no. Aquere emo mbia reru reru seje no. Ae secheẽ nenei nenei quia nyii nae, ae mbia queru queru quia seje cote nae, ùquĩ ia jate nyiese cote. Ae emo ndiqui secheẽ nenei nenei nyii, huee jaemondo quia aque. Mbiam reru reru sacuã seje. Se mbiam mingo bei sacuã. Emo nane serenei nenei nguiã ee nyii. Jẽ jẽingo ereru reru seje ã cote. Jẽya jate riqui jenyiese ã cote. Ae secheẽ nenei nenei quia nyii, ùquĩ ndese jẽya jate, i que Jesús ra.

³⁹ —Jesús que semumbusẽ ja ra, i que acuanĩ ñee sucha tubiriã jenda je ra. Nyebe mbiam tubiriã siqui nguiã Jesús rui hue jenda cote. ⁴⁰ Samaria jenda que nyoĩ Jesús rea cote ra. —Eico are jiri ure rese, i que mbiam Jesús je ra. Nyebe Jesús itõ nguiã nyeremo huee. ⁴¹ Jesús sí que mbiam mbaaquiату quiату cote ra. Nyebe mbiam tubiriã siqui tuchi nguiã eruĩ cote. ⁴² Mbiam que ñee acuanĩ je cote ra. —Nde chõ ngue urembiirandu rei nyii ra. Uremae ngue erese cote ra. Echeẽ ngue urechandu cote ra. Nyebe ureico nguiã eicua tuchi ã cote. Erecheẽ ñooñoa ngue ra. Cristo tuchi chõ ae re. Mbiam rirõsa mbae icuã si chõ ae re, i que mbiam ñee acuanĩ je ra.

Jesús ererecua mo ndiirĩ mbucherõ

⁴³ Huee que Jesús itõ nyeremo nda. Samáriaa. Hue si que esi si nyuruã Galilea quti ra. ⁴⁴ —Mbiam ra Dios cheẽ nenei neneisa quereco turã eã hue jenda sí mose, i que Jesús nyii ra. Nyebe esi nguiã Galiléaa. ⁴⁵ Jesús que ngasẽ Galiléaa cote ra. Mbiam hue jenda que embucuasẽ turã nda. Mae nguiatu equia erese Jerusalén neaẽ. Pascua mose. Mbiam mae sayã nguiatu ngue Jesús saã saã nguiã ee

nyii. Nyebe eyate nguiã Jesús cuasẽ mose cote.

⁴⁶ Jesús que oso si Caná de Galilea no nda. Ae eriqui i mbuchiicabo uva rique rã mbiam je nyii nae, huee que esi si ra. Hue rurubi que ererecua mo ndiirĩ ndasi riqui ra. Capernaum, i que hue je ra. ⁴⁷ —Jesús ru Judea si a cote, i que mbiam ererecua mbiirandu ra. Nyebe ererecua si nguiã Jesús rea cote. —Seriirĩ chĩ mano serĩte qui. Nyao terembucherõ seje, i que ererecua ñee ee ra. ⁴⁸ —Mbiam mae sayã naa eã mose ra jẽ seicuayã ñochĩ nde, i que Jesús ee ra. ⁴⁹ —Nyao jei rã. Seriirĩ nda mano nyee re, i que ererecua Jesús je ra. ⁵⁰ —Esobe nyebi ndechuchúaa. Nderiirĩ ngue nyerõ nda, i que Jesús ee ra. —Jesús ñee ñooño aroneate, i que ererecua oso nyebi ra. ⁵¹ Echuchua rurubi que erimba ngaẽ erobeishĩ ñee nda. —Nderiirĩ ngue nyerõte ra, i que ñee embiirandu ra. ⁵² —¿Ma tenda seriirĩ ngasi ucua re? i que ererecua ra. —Tenda nyiichere ramo mose que nderiirĩ ngacu ucua curi ra, i que mbiam ñee ee ra. ⁵³ —Hue tenda tuchi que Jesús ñee seje curi ra. “Nderiirĩ ngue nyerõ nda”, i seje curi, i que ererecua ra. Nyebe eriqui nguiã Jesús icua tuchi cote. Echuchua jenda abe que Jesús icua ja cote ra. ⁵⁴ Judea si que Jesús ru Galiléaa ra. Mbiam mae sayã nyeremo ngue Jesús saã Galilea jenda je ra. I que esaã uva riquerã nyii ra. Ererecua riirĩ ngue embucherõ namo no nda.

5

Jesús Amei mbucherõ

¹ Aquere que judíos mbae fiesta ra. Jesús que oso Jerusalén fiesta mose ra. ² Oveja iquesa que chĩ huee ra. Mbiam icua abe que chĩ huee ra. Cinco tei que chĩ hue eicua mama nda. Betesda, i que judíos hue mbiam icua je ra. ³ Mbiam rasi que chi jate nyaara huee ra. Taiqui re. Eresayã. Ecuatayã. Echaacua. Mbiam rasi chumumbara que chi huee ra. I rebera

raarõ arõ. ⁴ Angel mo nda nguichi quichi quia ra. I mumbera sacua mbia rasi je. —Ae rane nda ua amandebera mose nae, aque rane nda nyerõ, i que mbia ra. ⁵ Amei ndasi ima mo ngue chi bei aque ri nda. Treinta y ocho años que amei ndasi ra. ⁶ Aque que chi nyaara Jesús je ra. —Aa chõ erasi riqui bei a cose re, i que Jesús uchiangui re ra. —¿Erecherõ sete ere? i que ee ra. ⁷ Amei ndasi que ñee ee ra. —Aba quia ra sembua i ye, i rebera mose. Mbiana rane ngue secuã secuã nguia ra. I rebera mose, i que erasi Jesús je ra. ⁸ Jesús que ñee ee ra. —Ëhuã. Ndequisa erao. Eso, i que Jesús ee ra. ⁹ Echeẽ mose que nyerõ nda. Uquisa que esirõ serao ra. Erasiã ngue oso cote ra. Sábado mose que Jesús embucherõ nda. ¹⁰ Nyebe judíos paama i nguia embucherõ mose sábado mose. —Co mose que mbia uquenea ucua ra. ¿Mbaerã nda ndequisa ererao re? i que judíos Jesús chimbucherõ je ra. ¹¹ —Ae sembucherõ, aque que ñee seje ra: “Ndequisa erao. Eso”, i que sembucherõsa seje ra, i que judíos cheẽ mose ra. ¹² Judíos que ñee ee ra. —¿Aba aque re? ¿Aba “ndequisa erao”, i ndeje re? i que ra. ¹³ —Aicua eãte se. Aba chõ sembucherõ. Mbiam tubiriãte quiatu ngue re, i que erasi judíos je ra. Jesús oso rei. ¹⁴ Emo mose que Jesús ngasembe uchimbucherõ je ra. Dios chuchúaa. Ñee ngue ee ra. —¡Sã jê! Arembucherõ ngue se resê. ¡Mbae icua nda eresaã sichi jê! Mbae mo nda jeĩ tuchi ndeje cote, i que Jesús ee ra. ¹⁵ Amei ngue oso judíos mbiirandu cote ra. —Jesús chõ sembucherõ nguia reaẽ, i que judíos je ra. ¹⁶ Nyebe judíos paama i nguia Jesús je. Nandeiquia, i. Sábado mose quia Jesús riqui nguia mbiam bucherõ cherõ judíos je. Judíos uquenea ucua mose. Nyebe judíos paama i nguia ee. ¹⁷ Jesús que ñee judíos je cote ra. —Paba recoteã mbeite riqui co. Namobe. Se abe Paba rã si serecoteã teã mbeite riqui

co, i que Jesús ee ra. ¹⁸ Nyebe judíos riqui nguia paama i tuchi Jesús je. Iquia serĩ serĩte que cote ra. Jesús que judíos cheẽ mumba mumba ra. Mbiam rasi mbucherõ cherõ sábado mose. —Dios rã si aico co. Paba rei Dios, i que Jesús ra. Nyebe judíos paama i tuchi nguia ee.

Jesús rei Dios rucucha

¹⁹ Jesús que ñeembe judíos je ra. —Dios rucucha rei se. Dios rucucha ae ra mbae saã eã. Se ae ra mbae asaã eã. Paba chisaã ndese maende ae aico nguia mbae raã naa se abeco. Ae Paba saã saã nguia, ñquĩ asaã saã ja quia se abeco. ²⁰ Dios rucucha rei se. Paba riqui nyecua tuchi serese co. Paba riqui uchiao reacua quia tuchi seje co. Uchiao ra eteacua quia tuchi seje cote. Mbiam mae sayã tuchi. Jenyuruirã tuchi ra mae erese cote. ²¹ Paba mbiam raaque mbuquera quera. Se abe ra mbiam raaque ambuquera quera. Ae amingo bei sete, ñquĩ abe ra amingo bei. ²² Paba ra mbiam mo mondo eã tata cuásuu. “Nde chõ mbiam equirirõ ndirõ mondo tata cuásuu”, i que Paba seje ra. ²³ I nda mbiam ñee turã serĩ. Sã mbiam riqui ñee turã Paba riĩ no. Ae ñee turã eã nguia serĩ, ñquĩ ñee turã eãte Paba abe riĩ no. Dios rucucha rei se. Dios chimee ndei se. ²⁴ Tacheẽ nyecua jêje. Secheẽ andusa ra siqui bei. Paba icuasa ra siqui bei. Nyoĩ eã mbei ra tata cuásuu. Paba ra emingo bei cote.

²⁵ Tacheẽ nyecua jêje. Namojiri ra mbiam raaque secheẽ andu. Secheẽ mumbasa reã nda siqui bei. ²⁶ Paba quiarei mbiam mingo beisa. Se abe rei mbiam mingo beisa Paba rui si. ²⁷ Se abe ra mbiam amondo tata cuásuu. “Nde chõ mbiam equirirõ ndirõ mondo tata cuásuu”, i que Paba seje ra. Se chĩ erucucha. ²⁸ ¡Jenyuruirã techĩ nda secheẽ mose jê! Mbiam raaque ra secheẽ ñandu ja chee. ²⁹ Júã ja ra ngua si. Ae siqui turã, ñquĩ nda Dios mingo bei cote. Ae siqui icua icua nguia, ñquĩ nda nyoĩ tata cuásuu.

Serĩ ño embesa ji ñee, i Jesús

³⁰ Se ae ra mbae asaã eã. Paba cheẽ ndui si chõ aico nguiã mbia mondo tata cuásuu. Paba cheẽ ndui si chõ aico nguiã mbia mingo bei no. Paba cheẽ nda achabiã. Paba cheẽ nguire chõ aico nguiã mbae raã naa co. Se ae eã ño ñene. ³¹ Se ae eã ño acheenei enei nguiã mbia je co. ñnda “ichõñño” jenyere rei seje. ³² Aque emo ndiqui serenei nenei mbia je aque. Aque eriqui ñee ñooño eã serĩ aque. ³³ Jemo ngue jemondo Juan je. Jẽirandu sacua serese. Juan ngue ñee ñooño eãte jẽje ra. ³⁴ Ae mbia ñee ñee serĩ, ùquĩ ñee ndeseã aico nguiã se. “Dios riri eã ño co re”, i mose mbia serĩ, Dios riri mbei chõ se re. Jẽicua mbutiã sacua ño aico rei nguiã ñee jẽje. ³⁵ Tata rendi rã ndei Juan. Mbae resae ja raque. Huee que jengu mbiri ndei erese ra. Jẽhui jei chõchĩ esi. ³⁶ Juan ñee ngue mbia mbiirandu rei serese ra. Sechisaã nguia mbia mbiirandu tuchi serese Juan ñee si. Dios cheẽ nguire ae aico nguiã mbae ao ao co. Sechisaã ndese mae jee mbia jirandu nguiã serese cote. “Dios chimondo quiarei Jesús”, i mbia cote. ³⁷ Paba abe riqui serenei nenei mbia je co. Paba cheẽ jeñauate raque. Jemae sayãte raque Paba no. ³⁸ Jẽ nguia seicuayãte nguiã co. Paba chimondo chõ se re. Nyebe Paba cheẽ chĩ eãte jendese. ³⁹ Embesa ji rese jẽingo mae tuchite raque. “Embesa ji ra nandemingo beite”, jenyechĩ nguiã. Serese jembirandu sacua ño embesa ji re. Se quiatu mbia mingosa tuchi re. ⁴⁰ Jẽ nguia jẽingo sereãte nguiã serese. ñnda se jaemingo beite rei. ⁴¹ Jẽingo eã mose Dios rese, sebiãte jeñee turã turã mose serĩ. ⁴² Co aico jẽicuate co resẽ. Jenyesequa eãte quia Dios rese co resẽ. ⁴³ Paba que sembu resẽ. Jẽo eã ñochĩ serese. Paba chimondo eã tu mose, aque rese quia ra jẽo tuchite cote. ⁴⁴ Mbia resa rae jẽingochĩ nguiã jeturã naa naa. Dios je quiarei jeturã eãte. ¿Mañi jenyere quiatu ra equia seicua re? ⁴⁵ Se quia ra jẽicua ambuchecua

eã Paba je. Moisés chimbesa quia jẽicua mbuchecua nguiã. “Moisés chimbesa rei mbia mingo beisa”, jenyechĩ nguiã. ⁴⁶ Moisés chimbesa jẽicua eãte quia ã. Nyebe jẽingo nguiã seicua eãte ã. Serĩ ngue Moisés embesa ra. ⁴⁷ “Nya” jenyere eã mose Moisés chimbesa je, “nya” jenyere eã nda secheẽ mose abe no, i que Jesús judíos je ra.

6

Jesús mbichae mbeta tuchi

¹ Aquere que Jesús choi ama ndisa rasa ra. Galilea, i que ama ndisa je ra. Tiberias, i abe que ee ra. Hue robei que echoi ra. ² Mbia que nyoi tuchite Jesús rui ra. Mbia mae sayã ngue Jesús saã saã nguia ra. Echisaã ndese que mbia mae mae nda. Mbia rasi mbucherõ cherõ mose. ³ Sita ibate rĩ ngue Jesús choi ra. Huee que echi ngoi uchimbaaquiatu rese ra. ⁴ Fiesta de pascua rurubi que ra. ⁵ Mbia tubiriã ngue ngaẽ nguia Jesús rui ra. Jesús que mae erese ra. Ñee ngue Felipe je ra. —Mbia tubiriã tuchi. ¿Mangue ra echirã nandei mangue re? i que Jesús ee ra. ⁶ Jesús eicuate raque. —Mañi nda Felipe quia secheẽ mose reae, i que Jesús ra. ⁷ Felipe que ñee ee ra. — Doscientos plata mbia chayãte mbia chirã isi sacua. Echayã tuchite, i que Felipe ra. ⁸ Andrés abe que chi ra. Jesús chimbaaquiatu. Simón Pedro nongue. Ae que ñee nda. ⁹ —A ãquẽ mo ndiqui a. Cinco mbichae rerequia a. Sira nyeremo abe rerequia a. Echayãte quiatu nda re. Mbia tubiriãte quia ñene, i que Andrés Jesús je ra. ¹⁰ —“Jengoi ja”, jenyere mbia je, i que Jesús ra. Quiata turã ngue huee ra. Quiata tose que mbia ngoi ja ra. Mbia cuabẽ. Cinco mil que mbia ra. ¹¹ Jesús que mbichae isi cote ra. Ianye, i que ngu je cote ra. Mbichae rĩ. Mbichae que embuchao chao cote ra. Uchimbaaquiatu je que emondo mondo ra. Echimbaaquiatu que emondo mondo mbia je cote ra.

Ae chi ngoi. Sira abe que embuchao chao mbia je ra. Mbia que eu ja ra. Mbia que echosei chiã chiã nyee ra. ¹² Mbia rio ja mose que Jesús ñee uchimbaaquiatu je cote ra. —¡Mbia chi u sique jemunua nua jê! ¡Jendecoquiato ja jê! i que ra. ¹³ Ech i u sique que emunua ja ra. Doce irairu que puk i ja ra. Mbichae sique sique. Cinco chõ ndei que mbichae nyii aẽ. ¹⁴ Mbia que mae tuchi Jesús rese ra. Mbichae mbeta rese ra. Ũquĩ ndese que mbia riqui mae eã tuchi nyii ra. —Dios cheẽ nenei neneisa chõ co riqui re. Ae uresaarõ arõ nguia, ae chõ eriqui re, i que mbia Jesús rĩ nda.

¹⁵ Jesús que mbia icua ra. —Mbia ra seisichĩ suruchoi ererecuarã nde, i que ra. Nyebe esi si nguia mbia recha. Sita ibate rĩ ngue esi erecha ra.

Jesús ngata i arõ

¹⁶ Itondaru ndaru que Jesús chimbaaquiatu choi ama ndísaa ra. ¹⁷ Nyui nyui que canoa ye cote ra. Aque echoichĩ nguia iasa Capernaum aque. Jesús que nyebi eã mbeite u ee ra. Itondaru chee. Nyoĩ chee que erecha ra. ¹⁸ Quiririã ngue tu icuã icuã ee ra. Ama ndiite re mbia reco mose. I rebera que tu asi asi tuchi ra. ¹⁹ Mbia que nyoĩ choi bei canoa ye ra. Una legua. Jesús que canoa curubite cote ra. I arõ ngue esi quia ngata ra. Canoa yenda que mae erese ra. Echĩã ngue cuaãcuã i tuchi ra. ²⁰ —Se chõ nyeresẽ. ¿Mbaerã jẽingo siquiche sesi re? i que Jesús ee ra. ²¹ Canoa yenda que oote erese cote ra. Mbua que canoa ye ra. Ngasẽ asi que ecuaẽ íbii cote ra.

Mbia cuabẽ Jesús requia

²² Mbia cuabẽ ngue chi sobei ra. Isamami ngue Jesús tiãte ee ra. Nyebe ñee nguia nyue. —Canoa mĩ ño ngue chi resẽ. Canoa ye eã ño Jesús si iasa resẽ. Echimbaaquiatu achõ ño ngue nyoĩ iasa canoa ye resẽ. ¿Mangue Jesús riqui mangue re? i que mbia cuabẽ u ñee Jesús requia ra. ²³ Aque mose que canoa mo ngaẽ ngasẽ ee ra. Tiberias si que canoa cuaẽ nda. Mbia

mbichae usa rurubi que ecuaẽ tiba ra. ²⁴ Jesús tiã mbei que mbia je huee ra. Mbichae úsaa ra. Echimbaaquiatu abe tiã ngue mbia je ra. Nyebe mbia choi nguia erequia canoa ye. Ngasẽ ngue coquimo cote ra. Capernaum, i que hue sucha je ra.

Mbichae rã ndei Jesús

²⁵ Mbia cuabẽ ngue ngaẽ ama ndasa coquimo ngote ra. Ngasẽ ngue Jesús je cote ra. —Mbia mbaaquiatusa, ¿manose erechu ngasẽ aa re? i que mbia cuabẽ Jesús je ra. ²⁶ Jesús que ñee ee ra. —Tacheẽ nyecua jêje. Se jembuquiarure chõ jẽingo nguia serese. Se jembiore chõ jẽingo nguia serese. Sechisaã icuare rocoĩ. Jemae sayã ngue asaã saã ndei quia resẽ. ²⁷ Jenyurã ndese jẽingochĩ nguia ndua tuchite. Ũquĩ nda ua jeite. Ae ua eã mbeite quia, ũquĩ ndese quiatu jendua. Mbia mingo beisa rese quiatu jendua. Se rei mbia mingo beisa. Se rei Dios rucucha. Paba que uquirãcuã mondo seje ra, i que Jesús ee ra. ²⁸ Mbia que ñeembe Jesús je ra. —¿Mañi ure ra equia re? ¿Mbae rese ra aba riqui Dios mbia re? i que mbia Jesús je ra. ²⁹ Jesús que ñeembe ee ra. —Dios que sembu ra. Seicua quia se. Seicua mose ra Dios ia tuchi jendese cote, i que Jesús mbia je ra. ³⁰ —¿Mbae mo nda eresaã na ure je re, uremae sayã nde? † nda uremae nderese. Eĩ ure ra ndeicua cote. ³¹ Cose nda nanderamei ndiqui maná u u turuquia rĩ nda. Sã embesa ji no: “Dios que mbichae mbu ibei si mbia je ra”, sã embesa ji riqui i no, i que mbia Jesús je ra. ³² Jesús que ñee ee ra. —Tacheẽ nyecua jêje. Moisés eã ño ngue mbichae mondo nguia mbia je ibei si. Paba chõ ngue emondo nguia ibei si mbia je. Aque mbichae ra mbia mingo bei eã. Paba ra mbia mingo beisa mondo mbia je cote. ³³ Dios riqui mbichae mbuae mondo mondo mbia je co. Ae Dios mondo mondo nguia mbia je co nae, aque que tu ibei si ra. Aque rei mbia mingo beisa, i que Jesús ra. ³⁴ Mbia

que ñee Jesús je ra. —Aquembichae mbichae emondo mondo bei quia ure je, Urererecua, i que mbia Jesús je ra.

³⁵ Jesús que ñee ee cote ra. —Mbichae rã ño se re. Mbia mingo beisa chõ se re. Serese siqui mose ra jeniãcuã eã mbei. Serese siqui mose ra jẽisei eã mbei. Jẽya bei rae. ³⁶ Jemae ndei que equia serese resẽ. Seicuyã mbei chõchĩ nguiã ã. Acheẽ ndei que jẽje nyii resẽ. ³⁷ Ae Paba mee seje mbia nae, ùquĩ nda siqui bei serese. Ûquĩ nda aisi teã eã mbei. ³⁸ Paba que sembu ibei si resẽ. Secheẽ nguire eã ño aico nguiã mbae raã naa. Paba cheẽ nguire ae chõ aico nguiã mbae raã naa co. ³⁹ “Ae amondo ndeje nae, ùquĩ mo nda quiachãchĩ”, i que Paba seje ra. Ambuquera ja ra se, se tube mose íbii. ⁴⁰ Se rei Dios rucucha. Paba que sembu ra. Ae seicuate nae, ùquĩ nda siqui bei. “Ûquĩ nda amingo bei”, i que Paba ra. Ûquĩ ndaambuquera ja, se tube mose íbii, i que Jesús ra.

⁴¹ Judíos que paama i Jesús je ra. —Se rei mbichae rã. Ibei si que achu ra, i mose que judíos ñee icuã icuã Jesús je ra. ⁴² —Jesús chõ co re. José ririĩ ño co re. Eru rese que nandemae ndesẽ. Esi abe rese que nandemae ndesẽ. ¿Mbaerã eriquiñee nande je re? “Ibei si que achu ra”, i nande je re, i que mbia ñee ñee nyue ra. ⁴³ Jesús que ñee ee cote ra. —¿Mbaerã jẽingo ñee icuã icuã seriĩ nde? ⁴⁴ Mbia ae ra siqui eã serese. Paba emingo mose serese, aque mose ra eriqui tuchi serese cote. Ûquĩ ndaambuquera si mingo sechube mose íbii. ⁴⁵ “Dios ra mbia mbaaquiata ja”, sã embesa ji riqui i no. Nyebe ra Paba cheẽ andusa siqui bei serese. Nyebe ra Paba cheẽ mumbasa reã siqui bei serese. ⁴⁶ Emo ngue mae eãte Paba rese ra. Se miĩ ño ngue amae erese ra. Esi chõ ngue achu resẽ. ⁴⁷ Tacheẽ nyecua jẽje. Ae seicuate quia nae, ùquĩ nda siqui bei. ⁴⁸ Se rei mbichae rã. Mbia mingo beisa rei se. ⁴⁹ Nanderamei ngue maná u u turã ndei quia turuquia re ra. Emo mose que mano mano ja ra.

⁵⁰ Mbichae mbuae chõ asenei senei nguiã jẽje co. Mbia mingo beisa rei mbichae mbuae. Aque que tu ibei si ra. Ae mbichae mbuae u nae, ùquĩ nda siqui bei. Ûquĩ nda ua eã mbei. ⁵¹ Se rei mbichae. Ibei si que achu ra. Mbia mingo beisa rei se. Ae seu nae, ùquĩ nda siqui bei. Mbichae ra amee mbia mingo bei sacua. Aque mbichae rei serete sí. Seroo sí, i que Jesús judíos je ra.

⁵² Judíos que ñee icuã icuã nyue cote ra. —¿Mañi nda nguete mee nandechiurã nde? i que nyue ra. ⁵³ Jesús que ñee ee cote ra. —Tacheẽ nyecua jẽje. Mbiarã ngue achu ra. Serete jẽu eã mose, jẽingo bei eã ndae. Seruqui jembei eã mose, jẽingo bei eã ndae. ⁵⁴ Ae serete u quia nae, ùquĩ nda siqui bei. Ae seruqui mbei quia nae, ùquĩ nda siqui bei. Ûquĩ ndaambuquera si mingo, sechube mose íbii. ⁵⁵ Serete rei mbia chiurã. Seruqui rei mbia chimbei rã. ⁵⁶ Ae serete u quia nae, ae seruqui mbei quia nae, ùquĩ nda siqui bei sechiangui re. Se abe ra aico bei echiangui re. ⁵⁷ Paba riqui bei co. Paba riqui semingo se abe co. Eĩ nda serete usa abe siqui bei. Amingo bei ra se. ⁵⁸ Mbichae mbuae chõ asenei senei nguiã jẽje co. Ae tu ibei si. Maná na eã ño aque mbichae re. Maná ngue nanderamei u u rei ra. Maná ngue mbia mingo bei eã nda. Emo mose que mano ja chõ nda. Ae sechimee u quia nae, ùquĩ nguia ra siqui bei, i que Jesús judíos je ra. ⁵⁹ Eĩ ngue Jesús quia judíos mbaaquiata quiata ra. Capernaum. Judíos chumunuásaa.

Mbia tubiriã hui Jesús si

⁶⁰ Jesús cheẽ andusa que ñee tuchi nyue ra. —Mbaranguiatuã tuchi chõ Jesús cheẽ ndiqui re. Echeẽ nandemumba eã aroneate quiata quia re, i que nyue ra. ⁶¹ —Mbia riqui ñee icuã icuã tuchi chõ secheẽ niĩ, i que Jesús uchiangui re ra. Nyebe ucheẽ mbuchecua ee cote. —¿Mbaranguiatuãte secheẽ jẽje re?

62 ¿Mañi jenye ra mae mose serese re? Seso si mose ibate re. 63 Nande rete nandemingo eã nguiã. Nande aĩ ño nandemingo nguiã. Secheẽ nguia ra mbia mingo bei ibátee. 64 Seicua ja eãte quiatu nguiã ã. Jemo seicua eãte quia ã, i que Jesús ee ra. Mbae ao ramo mosenda bei que Jesús mbia icua uchiangui re ra. —Ã nda seicua. ã nda seicua eã. Co ra semondo mbia icua je, i que Jesús mbia icua uchiangui re nyii ra. 65 —Acheẽ ngue jêje nyii, ùquĩ sí aico ñee jêje a. Mbua ae ra siqui eã serese. Paba emingo mose serese, aque mose ra eriqui tuchi serese cote, i que Jesús ra.

66 Aque mosebe bei que mbia tubiriã hui Jesús si cote ra. Ae siqui erese nyii nae, ùquĩ mo ngue hui ja esi cote ra. Ngatayã ngue equia erui cote ra. 67 Jesús que ñee uchimbaaquiato je cote ra. Doce je. —¿Jê abe ra jêhui sesi re? i que uchimbaaquiato je ra. 68 Simón Pedro que ñee ee ra. —Tei, Urererecua. Aba rui quia ra ureico cote. Ndecheẽ ño mbia mingo beisa resẽ. 69 Ureico ndeicua ã cote. Cristo rei nde. Dios rucucha rei nde, i que Pedro ra. 70 Jesús que ñee ee cote ra. —Jê doce que jaẽirabo rei ra. Sechimbaaquiato sacua. Jemo ngue diablo rã nda, i que ra. 71 Judas Iscariote riĩ ngue eriqui ñee nda. Diablo, i. Simón ndiirĩ ndei Judas. Ae quia Jesús mee nguiã mbia icua je. Jesús chimbaaquiato mo ndaque.

7

Jesús nongue siquiã Jesús rese

1 —Jesús nandeiquia, i rei que judíos quia ñee ñee nyue ra. Nyebe Jesús si eã nguiã Judea cote. Galilea bei que eriqui ngata ra. 2 Fiesta rurubi mose que cote ra. Tuchua ñetẽ ngue judíos saã saã mbei quia aque fiesta mose ra. Curubite que cote ra. 3 Jesús nongue que ñee ja ee ra. —Eso rã Judea. † nda ndechimbaaquiato mae ja ndechisaã ndese Judea jenda. 4 ¡Mbae esaã nyecua chõ mbia resa rae jê! † nda mbia ndeicua ja. Co

ereico mbia mae sayã naa naa co. Mbua resa rae quiatu esaã saã, i que enongue ee ra. 5 Jesús nongue abe que Jesús icuayãte ra. Nyia, i eã Jesús cheẽ je. 6 Jesús que ñee ee cote ra. —Emo mose quia ra aso nyecua mbia je cote. Jê jêso jê ae ae, jêsose mose. 7 Dios cheẽ mumbasa riqui jêucuyã eãte raque jê. Se quia eriqui nguiã seucuyãte ã. “Jenyisaã saã nguia eicuãte riqui nguiã”, ae quiatu nguiã ee co. Nyebe eriqui nguiã seucuyãte ã. 8 Jê ño jêso fiesta rea. Se ra asoã. Emo mose quia nda achecua nguiã mbia je cote, i que Jesús ngõngue je ra. 9 Jesús que siqui are jiri Galilea cote ra.

Jesús mbia mbaaquiato quiato fiesta mose

10 Jesús nongue que nyoĩ fiesta rea cote ra. Aquere que Jesús abe si mingue cote ra. Ngasẽ nyecuyã ño ngue oso ra. —Mbua ra jiranduchi serese re, i que uchiangui re ra. 11 Judíos rerecua que Jesús sequia sequia ja u ra. —¿Ma Jesús riqui mande? i ja que fiesta mose ra. 12 Mbua que ñee ata atate Jesús riĩ nda. —Jesús turãte que, i que emo emo nda. —Jesús turã eã ngue ra. Mbua mburiĩ irĩte que equia no nda, i que emo emo no nda. 13 Mbua que siquichete judíos rerecua si ra. Nyebe mbua ucheẽ mbuchecua eã nguiã Jesús riĩ.

14 Fiesta ite mose que Jesús si Dios chuchua mbua mbaaquiato quiato cote ra. 15 Judíos que nyuruira tuchi Jesús cheẽ andu ra. —Eaquiato quia eriqui re. ¿Mangue eriqui ñimbaaquiato mangue nyii re? i que mbua ra. 16 Jesús que ñee ee ra. —Secheẽ ae eã asenei senei nguiã jêje co. Paba cheẽ ño asenei senei nguiã jêje. Ae sembu. 17 Emo siquise mose Dios cheẽ ndui, aque ra Dios cheẽ icua tuchi. Aque ra ñee. “Ucheẽ ño eã Jesús senei senei nguiã mbua je co. Dios cheẽ ño esenei senei nguiã mbua je co”, i ra aque ñee seriĩ. 18 “¡Sã mbua ñee turã mbe i seriĩ jê!” i ra emo ucheẽ achõ nenei nenei. “¡Sã mbua

ñee turã mbei Dios rĩ nguiatu jẽ!” ae chõ nguiã Dios cheẽ nenei nenei se co. Acheẽ ñooño eã ño nguiã co. Mbia ambĩrĩ irĩ eã ño nguiã co. ¹⁹ Moisés que Dios cheẽ mbesa rei nande je ra. Nande emumbayã sacua. Jẽ nguia rei Dios cheẽ mumba. ¿Mbaerã jẽingo seiquia serĩte re? i que Jesús ee ra. ²⁰ Mbia que ñee ee cote ra. —Emo ndiqui ndeiquia serĩ eãte co. Aba checuayã icuã ae nembĩcuã ndeae, i que mbia Jesús je ra. ²¹ Jesús que ñee ee cote ra. —Mbia rasi mo ngue ambucherõ sábadó mose. Aque mii ño ngue asaã ndei nguiã. Aque mii je chõ jẽingochĩ nguiã nyuruirate mae serese. ²² Moisés que circuncisión teacuquia jẽje ra. Nanderamei nane ngue circuncisión saã nguiirĩ je ra. Nyebe jẽingo nguiã sábadó mose abe circuncisión naa naa jendiirĩ je. ²³ Moisés cheẽ nguire chõ jẽingo nguiã circuncisión naa naa jendiirĩ je. Sábado mose abe. ¿Mbaerã jẽingo paama i seje mbia mbucherõ mose sábadó mose re? ²⁴ “Aque eicuãte”, jenyje jei chõchĩ nguiã. Jẽirandu turã na erese nyii, i que Jesús ee ra.

Ibatenda chõ se re, i Jesús

²⁵ Jerusalén jenda que ñee ñee Jesús rĩ cote ra. —A Jesús riqui ñee mbia je a. ¿Nandererecua ra Jesús iquia eã si chõ nde? ²⁶ A eñi nyecua ñee mbia ite re a. Nandererecua ñee eã tuchi chõchĩ ee. Teachõ tuchi chõchĩ. ¿Cristo eriqui rei nandererecua je re? ²⁷ Cristo eã ño Jesús re. Galilea jenda chõ ae re. Cristo tu mose quiatu ra nandeiranuate. Ma si chõ nda eru, i que Jerusalén jenda ñee nda. ²⁸ Jesús que echeẽ ñandu ja ra. Dios chuchúaa eriqui mose mbia mbaaquiātu quiatu. Nyebe Jesús echeẽ ndibishorõ nguiã cote. —¿Ma si achu co re? ¿Jẽ seicuate re? Se ae achu eã nguiã co. Sembu ji ae aico nguiã co. Ichõñosa reã ae ngue sembu nguiã. Ae rese jemae ãte nae, ae chõ sembu nguiã. ²⁹ Se ae que amae erese ra. Esi que achu ra. Ae chõ sembu nguiã co, i que Jesús ee ra.

³⁰ Mbia que paama i Jesús cheẽ mose ra. —Jesús nandehi etarõ sacua, i rei que mbia ñee nyue ra. Ae mbia eisiã ño nguiã. —Aque mose ra eremano, i ãte quiarei Dios ee. ³¹ Mbia tubirĩa ngue Jesús icua icua ramo nguia cote ra. Nguerecuarã. —Cristo tuchi rei co. Co eriqui mbia mae sayã naa naa tuchi co. Emo aquiātu mo nda tuãte rei. Co mii tuchi chõ ndei Dios chĩmbu co, i que mbia tubirĩa nguia ñee ñee Jesús rĩ nda.

Fariseos paama i Jesús je

³² Fariseos que nyiisaquia mbia cheẽ ndese ra. Mbia ñee turã turã mose Jesús rĩ. Nyebe fariseos paama i nguiã Jesús je. Policía jenda mo ngue emondo rei Jesús isi sacua nda. Sacerdote rerecua abe que policía jenda mondo rei Jesús isi sacua nda. ³³ Jesús que ñee nda. —Aico mbirĩ ño nguiã jendese a cote. Aquere ra aso si Paba rea. Ae sembu. ³⁴ Jẽ nda serequia cote. Serea eãte ra se cote. Ae ra aso nae, huee jengasẽ aroneate, i que Jesús ee ra. ³⁵ Judíos que ñee nyue ra. —Manguiti ra esi reae. Manguiti ra nandecuasẽ aroneate ee reae. Judíos siqui quia griegos rese nae, ũquĩ ndea ra esi reae. Griegos mbaaquiātu sacua ndeae. ³⁶ “Serequia ra se cote. Serea eãte ra se. Ae ra aso nae, huee jengasẽ aroneate”, i chõchĩ nguiã nande je. ¿Mbaerã eriqui ñee nande je ũquĩ nde? i que judíos u ñee nyue ra.

Jesús icuasa rei i riõ na

³⁷ Fiesta ua nonde que mbia ñumunua tuchi cote ra. Fiesta mumba bei. Aque mose que Jesús ñi juã ñee mbia ite re ra. —“Emo isei mose, sã eru serea. Ambiu ra se. ³⁸ Ae ra seicua nae, i riõ na nda ũquĩ. Iãcuã turã na nda ũquĩ”, sã embesa ji riqui i no, i que Jesús ucheẽ mbirãtãte mbia je ra. ³⁹ —Ae ra seicua nae, ũquĩ je ra Espiritu Turã amondo, i ñene. Espiritu Turã mbu nonde chõ eriqui nguiã ñee. Jesús oso eã mose ibate chõ eriqui nguiã ñee.

Mbia ñee atate Jesús rĩ

⁴⁰ Mbia tubiriã ngue chi Jesús cheẽ andu ra. Ñquĩ mo ngue ñee nyue ra. —Co rei Dios cheẽ nenei neneisa co. Ae uresaarõ arõ nguia co, i que u ñee Jesús rĩ nda. ⁴¹ Emo emo ngue ñee nda. —Co rei Cristo tuchi co, i que ra. Emo emo ngue echeẽ sibi shorõ no nda. —Tei. ¿Mañi nda Galilea jenda Cristo re? Hue jenda eã ño nda Cristo ndesẽ. ⁴² “David riirĩ nda Cristo. Belén jenda ra Cristo, David rã si”, sã embesa ji riqui i no, i que mbia ñee ñee nyue ra. ⁴³ Hue rĩ ja mbia ñee eãchĩ Jesús rĩ. Mbia que ñee ata ata Jesús rĩ nda. ⁴⁴—Jesús nandehi serao tarõ, i rei que emo ñee nda. Isiã si que ra.

Fariseos Jesús icuayã

⁴⁵ Policía jenda ochi que nyoĩ nyebi fariseos je cote ra. Sacerdotes rerecua je abe nyebi. —¿Mbaerã Jesús jendu eã ure je re? i que ererecua policía jenda je ra. ⁴⁶ Policía jenda que ñee ee ra. —Aque Jesús riqui mbia mbaaquiату turã tuchi aque. Ae rã si emo mbia mbaaquiату turã aronea, i que policía jenda ñee mbia rerecua je ra. ⁴⁷ Fariseos que ñee policía jenda je cote ra. —¿Jẽ abe chee chõ Jesús jembĩrĩ irĩ nguia re? ⁴⁸ Nandererecua mo ngue “coche rei” iã tuchi Jesús je resẽ. Fariseos mo abe que “coche rei” iã tuchi Jesús je resẽ. ⁴⁹ ã mbia ataque riqui Dios cheẽ icua eãte ã. Quiachã ja ra Dios si, siqui mose Jesús rese, i rei que fariseos ra. ⁵⁰ Nicodemo abe rei fariseo. Ae tu Jesús je isa nae, aque que ñee fariseos je ra. Uataque je ra. ⁵¹—Emo nandembasi mbasi choõ aroneate. Echeẽ nandechandu rane nguiatu. Nandeirandu ja rã nguiatu erese. Embasi nonde. Eĩ ngue Moisés embesa mĩ nande je ra, i que Nicodemo uataque je ra. ⁵² Fariseos que ñee ee cote ra. —¿Nde abe chõ Galilea jenda Jesús rese re? Embesa ji rese emae mae. Dios cheẽ nenei neneisa mo eãte que Galilea jenda resẽ, i rei que fariseos ñee asi Nicodemo je ra. ⁵³ Mbia que nyoĩ ja uchuchua cote ra.

8

Cuña mo siqui emo ndu rese

¹ Jesús que oso Monte de los Olivos ra. ² Isamami ngue Jesús si nyebi si Dios chuchúaa ra. Eresaitõ ndabe. Mbia que esichã tuchi ra. Jesús que ngoi ra. Mbia mbaaquiату quiatu. ³ Fariseos que cuña mo curucuaẽ Jesús je ra. Embesasa rese que cuña ndurucuaẽ ee ra. Cuña nda siqui emo ndu rese mbia je ra. Mbia ite re que fariseos cuña mĩ nda. ⁴ Ae cuña curucuaẽ nae, ñquĩ ngue ñee Jesús je ra. —Urembaaquiatusa, mbia que mae cuña ndese ra. Emo ndu rese siqui mose. ⁵ Moisés que ñee nande je ra. “ã jẽiquia sita je”, i que Moisés quia ã mbia rĩ nda. ¿Mañi ere ra ã ñi ñee nde re? i que cuña ndurucuaẽsa ñee Jesús je ra. ⁶—Jesús nandembĩrĩ. ĩ nda ñee icuã. ĩ nda mbia nandembĩcuã Jesús je cote, ichõ equia nyii reaẽ. Nyebe cuña ndurucuaẽchĩ ee reaẽ. Jesús que nyatiquio chõ nda. Ibi que embesa mbesa o je ra. ⁷—¿Mañi ere ra nde cuña je re? i bei que mbia quia Jesús je ra. Jesús que juã ñee mbia je cote ra. —Jemo turã mbeite mose, sã aque rane cuña chei sita je, i que Jesús ee ra. ⁸ Nyatiquio si que ibi mbesa ra. ⁹ Jesús cheẽ andu mose que mbia rerecua ireĩ ireĩ ja chõ nda. —Nandehi jate que, i ja chõ ngue ñee uchiangui re ra. Nyebe echoi nguia usẽ ja. Amei nane ja que ra. Eataque quia usẽ nguia erui cote. Ererecua que usẽ ja ra. Jesús ae que siquichõ nda. Cuña ndesechõ. ¹⁰ Jesús que juã mbia rerecua ruibe cote ra. Cuña je que ñee cote ra. —¿Manderurucuaẽsa ma nde? “Nandehi rã sita je”, ¿iãte emo nguia nderĩ co re? i que Jesús ñee cuña je ra. ¹¹—Tei. Emo ñeeãte, Sererecua, i que cuña Jesús je ra. Jesús que ñee ee cote ra. —Se abe ra acheẽ eã ndeje. Eso rei. ¡Mbae icuã nda eresaã sichĩ jẽ! i que Jesús cuña je ra.

Tata rendi rã ndei Jesús

¹² Jesús que ñee si mbia je ra. —Mbia ja mbaaquiatusa chõ se re. Tata rendi rã ño aico nguia mbia je co.

Ae siqui serui nae, ũquĩ nda siquĩã itondáruu. Ũquĩ amingo bei quia querabe co, i que Jesús mbia mbaaquiaturá. ¹³ Fariseos que ñee Jesús je cote ra. —Ndechue chõ ereico nguiã ñee mbia je. Nyebe mbia “coche rei” i aronea ndecheẽ je, i que fariseos ñee Jesús je ra. ¹⁴ Jesús que ñee echeẽ ndibishorõ nda. —Sechue acheẽ ndaque mbia je. “¡Ae bei jẽ!” i chõ mbite raque aba secheẽ mose. Ae si achu nae, huee jẽicuayãte. Ae ra aso nae, huee abe ra jẽicuayãte no. Se ae aicua nguiã co. ¹⁵ Jeñee icuã jei chõchĩ nguiã aba rĩ. Mbae mumbusẽ ja mose rocoĩ. Eĩ ae eã ño nguiã se. ¹⁶ “Co eicuãte”, ae eã nguiã se ae co. Paba rese chõ aico nguiã mbia mumbusẽ ja co. Nyebe aico nguiã ñee Paba cheẽ ndui si co. ¹⁷ “Mbia nyeremo ñee mose huee rĩ si, ‘ae beite’ jenyẽ chõ”, i que Moisés jẽje ra. ¹⁸ Sã ure nyeremo ure no. Paba rese. Ae sembu. Sã ureico ñee serĩ Paba rese no. Ure nyeremo, i que Jesús fariseos je ra. ¹⁹ —¿Ma nderu riqui ma nde? i que fariseos Jesús je ra. Jesús que ñee ee ra. —Paba jẽicuayãte quia ã. Se abe seicuayãte quia ã. Jẽ seicua mose, Paba abe ra jẽicua, i que Jesús ra. ²⁰ Eĩ ngue Jesús quia mbia mbaaquiaturá quiaturá Dios chuchúaa ra. Ofrenda no nosa jii que eriqui mbia mbaaquiaturá quiaturá ra. Emo ngue Jesús isĩ ãte etarõ sacuã nda. —Aque mose ra eremano, i ãte quiarei Dios ee.

Aso si ra ibate Paba rea, i Jesús

²¹ Jesús que ñee si fariseos je ra. —Aso si ra Paba rea cote. Serequia requia rei nda se re. Jẽicuã mbei ra jemano nyee. Ae ra aso nae, huee jengasẽ aroneate, i que Jesús ee ra. ²² Judíos que ñee ñee nyue ra. —¿Mbaerã nda nandecuasẽ aroneate ee re? Nyiquia ra reae, i rei que ñee nyue ra. ²³ Jesús que ñee ee ra. —Ibi jenda chõ jẽ nde. Ibatenda chõ se re. Ibi jenda eã ño se re. ²⁴ Nyebe aico nguiã ñee jẽje nyii. “Jẽicuã mbei ra jemano nyee”, ae que jẽje nyii. Seicuayã mbei mose ra jemano nyee

jẽicuã mosebe, i que Jesús ee ra. ²⁵ —¿Aba tuchi nde re? i que mbia Jesús je ra. Jesús que ñee ee ra. —Cose ndare bei chõ aico nguiã serenei nenei jẽje co. ²⁶ Mbae ra asenei tuchi jẽje reae. Secheẽ nda jẽicuã mbuchecua tuchi jẽje. Ae sembu nae, aque quiarei ñee ñooño aronea. Echeẽ ngue achandu ra. Ae cheẽ ño asenei senei mbei nguiã mbia je co, i que Jesús mbia je ra. ²⁷ Mbia rerecua que Jesús cheẽ icuayã mbei ra. —Dios rĩ ño eriqui nguiã ñee, iã mbei que mbia ra. ²⁸ Jesús que ñeembe ee ra. —Mbiarã ngue achu ra. Jẽ nda sembucha ira rese cote. Aque mose ra mbae jẽicua jiri serĩ cote. “Dios cheẽ nguire chõ eriqui mbia mbaaquiaturá quiaturá re”, jenyẽ ra serĩ cote. “Dios rucucha chõ eriqui re”, jenyẽ ra serĩ cote. ²⁹ Ae sembu nae, aque riqui bei serese co. Echeẽ nguire aico bei embia co. Nyebe eriqui nguiã serechayã mbei co, i que Jesús ra. ³⁰ Jesús cheẽ mose que mbia Jesús icua icua cote ra.

Jẽingo bei mose serui, sechimbaaquiaturá tuchi chõ jẽ nde

³¹ Ae Jesús icua quia judíos nae, ũquĩ je que Jesús ñee nda. —Secheẽ si jẽhui eã mose, sechimbaaquiaturá tuchi ra jẽ. ³² Jẽ nda ichõĩñosa reã jẽicua tuchi cote. Mbia icuã nderecua rimba eã nda jẽ cote, i que Jesús ee ra. ³³ Mbia que ñee Jesús je ra. —Abraham nducucha rei ure. Mbia mo nimba eã mbei que ureico resẽ. ¿Mbaerã ereico ñee ure je re? “Mbia si taembui mingo cote”, i ure je re, i que mbia Jesús je ra.

³⁴ Jesús que ñee ee cote ra. —Ae mbae icuã saã saã nguia nae, ũquĩ ndiqui bei eicuã nimbarã ã. ³⁵ Erimba ra siqui bei eã nguerecua rese. Nguirĩ tuchi quiaturá equereco bei nyiese. ³⁶ Se jembui mose mbae icuã si, eicuã nimbarã eã nda jẽingo cote. ³⁷ Abraham nducucha raque jẽ. Ũquĩ aicuate raque. ã jẽingo secheẽ isĩ turã eãte ã. Secheẽ jẽicuayã nguia ã. Nyebe jẽingo nguiã seiquia serĩte ã. ³⁸ Ae Paba teacuquia seje nae, ũqui ño asenei senei nguiã

jêje co. Ae jendu teacuquia jêje nae, ũquĩ ndese chõ jêingo nguiã jê ã no, i que Jesús ee ra.

³⁹—Abraham ño ureru resê. Urei resê, i que mbia Jesús je ra. Jesús que ñee ee cote ra. —Abraham nducucha turã mose jê, eĩ nguia nda jêingo turã nguiã ña. Abraham ndui si. ⁴⁰ Dios que sembaaquiato ra. Dios quiarei ñee ñooño eã. Echeẽ ño asenei senei nguiã jêje co. Ũquĩ je chõ jêingo nguiã seiquia serĩte ã. I ãte que Abraham quia seje ra. ⁴¹ Jendu rã si chõ jêingo nguiã ã, i que Jesús ee ra. Mbia que ñee Jesús je cote ra. —Ureru ata ata eãte nyeresê. Dios miĩ ño ureru re, i que ñee Jesús je ra. ⁴² Jesús que ñeembe ee ra. —Dios jendu tuchi mose, eĩ nguia nda jêingo nguiã nyecua serese chã. Ae quiarei sembu. Se ae eã achu nguiã. ⁴³ ã jêingo secheẽ andu sereãte ã. Nyebe jêingo nguiã secheẽ icua aroneate ã. ⁴⁴ Aba checuayã nderecua rei jendu. Erese bei chõ jêingo nguiã ã. Echeẽ jemumbayã mbei chõ nguiã ã. Mbia iquia iquiasa bei que ae ra. Cose ndare mosenda bei. Ñee ñooñosa reã quiato aronea tuchi quiarei ae. Ñee ñooño mbeite equia co. Ucheẽ achõ ño esenei senei nguiã mbia mbiĩrĩ irĩ querabe co. Ñee ñooñosa rerecua chõ aque re. ⁴⁵ Se quia acheẽ ñooño ãte rei nguiã jêje. Secheẽ jêucuyãte chõchĩ nguiã. ⁴⁶ Mbae icuã ngue asaã eãte ra. Ũquĩ jêicuate raque. Acheẽ ñooño ãte sequia co resê. ¿Mbaerã jêingo secheẽ andu sereã neate ã nde? ⁴⁷ Dios quiato quia Dios cheẽ ñandu turã nguiã. Dios quiato eã ño jê nde. Nyebe jêingo nguiã Dios cheẽ andu sereãte ã, i que Jesús mbia je ra.

Jesús rane siqui Abraham si nyii

⁴⁸ Judíos que ñee si Jesús je ra. “Samaria jenda chõ nde reae. Aba checuayã nyireco chõ nde reae”, ure que nderĩ nda. ¿Ae tuchi nde re? i que judíos ñee Jesús je ra. ⁴⁹ Jesús que ñee ee ra. —Aba checuayã nyireco eã ño se resê. Co aico ñee turã tuchi Paba rii co resê. Jê nguia jeñee icuã

mbeite nguiã serĩ. ⁵⁰ “iSã mbia ñee turã serĩ jê!” ae eã ño nguiã se co. Paba quia siqui nguiã ñee turã turãte serĩ co. Ae quia ra mbia icuã mbasi. ⁵¹ Tacheẽ nyecua jêje. Ae secheẽ mumbayã nguia nae, ũquĩ nda amingo bei. Ũquĩ nda manoã mbei, i que Jesús ra. ⁵² Judíos que ñee Jesús je ra. —Aba checuayã nyireco tuchi chõ ereico nguiã co. ¿Mbaerã ereico ñee nde? “Mbia ra manoã, secheẽ mumbayã mose”, i re. Abraham ngue mano. Nandei. Dios cheẽ nenei neneisa que mano ja resê. ⁵³ ¿Nde ndeaquiato tuchi Abraham si re? Ae chee que mano. Dios cheẽ nenei neneisa chee que mano. ¿Abate nde re? “Mbia ra manoã”, ere chõte equia co, i que judíos Jesús je ra. ⁵⁴ Jesús que ñee ee cote ra. Se ae secheẽ turã mose serĩ, mbia ra seanduchõ. Paba quia ñee turã mbei nguiã serĩ co. Ae je jêingo ñee. “Dios urererecua” i raque erĩ. ⁵⁵ ã jêingo Dios icuayãte ã. Se quia aicuate nguiã co. “Dios aicuyã”, se i mose, eĩ nda acheẽ ñooñote rei jê na si. Dios aicua tuchite. Echeẽ ndui chõ aico bei nguiã co. ⁵⁶ Abraham ngue seraarõ arõ mbei quia ra. “Turã”, i bei que equia ñimbia serĩ nda. Secuasê mose que eyate mae serese cote ra, i que Jesús mbia je ra. ⁵⁷ Mbia que ñee Jesús je ra. —Cosete que Abraham mano ndesê. ¿Mañi ere mae erese re? Cincuenta años eãte nde resê, i que ra. ⁵⁸ Jesús que ñee ee ra. —Tacheẽ nyecua jêje. Cose ndare bei chõ aico nguiã co. Abraham tiã mosenda bei, i que Jesús ra. ⁵⁹ —iSita je Jesús nandechei jê! i rei que mbia sita isi isi ra. Jesús que ñimi ñimi oso ra. Usê Dios chuchua si.

9

Jesús emo ndesayã mbucherõ

¹ Ñeenda rui que Jesús mae emo ndesayã ndese ra. Echaacuquia mosenda bei que eresayã nyobei ra. ² Jesús chimbaaquiato que ñee ee ra. —Urembaaquiatusa, ¿abate mbae icuã saã nyii re? Co resayã nonde re. Eru ereae. Esi ere no ae. Ae si

ere no ae. ¿Abate ere? i que Jesús je ra. ³ Jesús que ñee ee ra. —Tei. Emo ngue mbae icuã saã eãte rei ra. Mbia ra mae ja Dios quirãcuã ndese chã. Embucherõ mose. Nyebe eresayã nyaacuquia nguiã. ⁴ Arõ ño nandeico nguiã mbae raã naa. Itondaru mose, mbae rese nandeico aroneãte cote. Nyebe aico bei nguiã mbae rese Paba je co. Semano mose quia aico aroneãte nguiã mbae rese íbii cote. ⁵ Seico mose íbii, aico mbia resaete co, i que Jesús ra. ⁶ Jesús que ñinimbu íbii cote ra. Tuchu que esaã ngũendi je ra. Nguiti que eresayã ndesa rese cote ra. ⁷ —Eso nderuba irei cote. Ama Siloé eso eirei, i que Jesús eresayã je ra. (“Echimondo”, i chõ nguiã Siloé je.) Eresayã ngue oso nguesa irei huee ra. Obei que eru quia mae turã cote ra. ⁸ Hue jenda que nyuruira jate mae erese ra. Ae mae nguia erese nyii nae, ùquĩ ngue nyuruira tuchi mae erese cote ra. Eresa cherõ mose. —¿Co resayã ño ache ache i quia nyii re? ¿Ae chõ ere? i que mbia ñee ñee nyue ra. ⁹ —Ae eã ño ñene, i que emo nda. —Ae chõ ñene, i que emo emo no nda. Eresayã ngue ñee cote ra. —Se chõ nyeresẽ, i que ñee mbia je ra. ¹⁰ —¿Mañi nderesayã mae nde? i que mbia ee ra. ¹¹ Eresayã ngue ñee nda. —Ae eriqui “Jesús” i nae, aque que tuchu saã nda. Nguiti que seresa rese ra. “Eso nderuba irei Ama Siloé”, i que seje cote ra. Aso que se ra. Seruba irei ji que amae cote ra, i que eresayã mbia je ra. ¹² —¿Ma nderesa mbucherõsa riqui ma nde? i que mbia eresayã je ra. —Qui chõ esi, i que ee ra.

Fariseos ñee eresayã je

¹³ Mbia que eresayã curuchoi fariseos je cote ra. ¹⁴ Ae mose Jesús eresayã mbucherõ nae, sábadu mose que ra. Tuchu que esaã, aque mose que ra. ¹⁵ —¿Mañi ere nderesa ira re? i que fariseos ee ra. —Tuchu que equiti seresa rese ra. Ae seresa airei nguiã. Co aico mae co cote, i que eresayã nda. ¹⁶ Fariseos mo ngue ñee

nyue ra. —Ae eresa mbucherõ sábadu mose nae, Dios cheẽ nenei neneisa eã ño aque re, i rei que nyue ra. Emo emo ngue ñee no nda. —Eĩ nguia nda eicuã mose mbia mae sayã naa naa eã nguiã nande je chã, i que fariseos mo ñee nyue ra. Hue rĩ ja eã ngue fariseos ñee Jesús rĩ nda. ¹⁷ Fariseos que ñee si eresayã je ra. —Ae nembucherõ nae, ¿mañi ee re? ¿Mañi ere quia nde erĩ co re? i que ra. Eresayã ngue ñee nda. —Dios chimondo que ae ra, i que eresayã nda.

¹⁸ Judíos que echeẽ ñandu sereã nda. Eresa turã mbei mo eriqui reĩ nguiã ee. Nyebe “jenyu” i nguiã eresayã ndu je. Esi je abe no. —Nandeirandu rã erese, i que ra. ¹⁹ —¿Co nderiirĩ co re? ¿Eresayã nyobei nyii re? ¿Eresayã nyaacuquia nyii re? ¿Mbae emumae nguia co cote re? i que ñee eru je ra. Esi je abe. ²⁰ Eru que ñee ee ra. —Co rei seriirĩ co. Eresayã ngue nyaacuquia rei ra. ²¹ Mañi ño equia mae co cote. Aba chõ embucherõ. Ureicuayãte. Jeñee nguia ee. Etiarõte nyeresẽ. Ae ra ñee jẽje, i que eru ñee judio rerecua je ra. Esi abe. ²² Judíos rerecua quia ñee nguia nyue nyii reaẽ. —Emo ñee turã mose Jesús rĩ, ùquĩ nandemombo bei mbia chumunuasa si. “Dios chimbu rei Jesús”, i mose, nandemombo bei mbia chumunuasa si, i quia ererecua quia ñee nyue nyii reaẽ. Nyebe eresayandu siquichete nguiã ñee turã Jesús rĩ. Esi abe no. ²³ Nyebe eru riqui nguiã ñee ererecua je. —Jeñee nguia seriirĩ je. Etiarõte nyeresẽ, i ee. Esiquichete quia ñene.

²⁴ —Quiatuchu, i si que judíos rerecua eresayã je no nda. —Echeẽ turã Dios mĩ je. ¡Jesús abe je ra erecheẽ turãchĩ jẽ! Eicuãte ae resẽ, i rei que judíos rerecua eresayã je ra. ²⁵ Eresayã ngue ñee ee ra. —Aicuayãte se. Eicuãte ereae. Eaturãte ere no ae. Aicuayãte se. Seresayã ngue nyii ra. Co aico mae co cote. Ûquĩ mĩ ño aicua nguiã co, i que eresayã judíos rerecua je ra. ²⁶ —

¿Mañi equia ndeje re? ¿Mañi nderesayã ira re? i si que eresayã je no nda. ²⁷ Eresayã ngue ñeembe ererecua je ra. —Acheẽ ndei que jêje resẽ. Secheẽ ngue jemumb resẽ. ¿Mbaerã jêingo “echeembe” i seje ã nde? ¿Jê abe jêingose rete sembucherõsa rui re? i que eresayã judíos rerecua je ra. ²⁸ Ererecua que ñee icuãte ee cote ra. —Ae rui chõ ereicochĩ nguiã nde co. Moisés rui chõ ureico nguiã ure ã. ²⁹ Moisés je quiatu que Dios ñee nyii resẽ. Ñquĩ ño ureicua nguiã ã. Ae nembucherõ nae, ma si quiatu ñi ae ru. Ae quia ureicuayãte nguiã, i que judíos rerecua ra. ³⁰ Eresayã ngue ñee ee ra. —Seresa que embucherõ ndesẽ. “Dios chimbu”, jenyẽ eã ñochĩ equia ã. Seresa mbucherõsa raque ae. ³¹ Dios ra mbia icuã ñee ñanuã. Ae Dios cheẽ mumbayã nguia nae, ñquĩ ñee nguia ra Dios ñandu. ³² Seresayã ngue achaacuquia rei nyii ra. Ae que sembucherõ nda. Emo abe ra ñquĩ saã eã. ³³ Dios chimbu eã mose, eĩ nguia nda mbae raã eãte nguiã ña, i que eresayã judíos rerecua je ra. ³⁴ Judíos rerecua que ñee eresayã je ra. —Ndechaacuquia mosenda bei chõ ndeicuã ndiqui nguiã co. ¿Mbaerã ereico urembaaquiato sete re? i que judíos rerecua eresayã je ra. Nyebe que judíos rerecua eresayã mombo bei judíos chumunuasa si cote ra.

Ureaquiatute ure, i chõchĩ fariseos

³⁵ Jesús que jirandu erese ra. Emombo mose. Nyebe esi nguiã ñee eresayã je. —¿Dios rucucha ereicuate quia co re? i que ee ra. ³⁶ —¿Aba chõ Dios rucucha re? Aicua sete quia co, i que eresayã nda. ³⁷ —Ae chõ se resẽ. Ae je chõ ereã ñee a resẽ. Eremae ndei serese resẽ, i que Jesús ee ra. ³⁸ Eresayã ngue ngoi nguiã ndese Jesús ji cote ra. —Areicua tuchi se cote, i que Jesús je ra. ³⁹ Jesús que ñee ee ra. —Achu que íbii ra. Mbia icuã mbuchecua mbia je ra. Achu que eresayã ndesa mumae mae nda. Ae eresa nae, ñquĩ mumae eã sacuã abe que achu ra, i que ra. ⁴⁰ Fariseos

mo abe que chi hue ra. Jesús cheẽ andu que ñee Jesús je ra. —¿Uresesayã ureico ure abe ã nde? i que fariseos ee ra. ⁴¹ Jesús que ñee ee ra. —Jendesayã mose, eĩ nda jêicuã ambuchecua yã ndei. “Seaquiatute”, jenyechĩ equia ã. Nyebe aico nguiã jêicuã mbuchecua jêje co, i que Jesús judíos rerecua je ra.

10

Ovejas ucha cheẽ icuate

¹ Jesús que ñee nda. —Tacheẽ nyecua jêje. Ae iqueã nguia oveja chiquesa rĩ nae, mbae mbuquiachãsa chõ ñquĩ nde. Echiquesa eã ñi ique ique mose. ² Ae ique ique quia oveja chiquesa rĩ nae, aque quia oveja raarõsa aque re. ³ Ae echiquesa saarõ nguia nae, aque ra echiquesa equia oveja raarõsa je cote. Eique sacuã. Oveja raarõsa cheẽ nda oveja icua ja. Ñee mii mii nda umbae oveja je. Oveja icua ja. Ae ra oveja nyoĩ usẽ erui. ⁴ Eraarõsa embusẽ ja mose etaronda si, ae rane nda ngata oso quia erẽta. Oveja ra nyoĩ ja quia erui. Echeẽ nguia eicuate nguiã. ⁵ Emo ndui ra echoĩ eã. Uchã ño nda emo si. Echeẽ nguia eicuayãte nguiã, i que Jesús ñee nda. ⁶ Jesús que eĩ ndei ñee fariseos je ra. Ejemplo je. Oveja renei nenei ee. Jesús cheẽ andusa que echeẽ icuayãte ra.

Jesús rei oveja raarõsa

⁷ Jesús que ñee si ee ra. —Tacheẽ nyecua jêje. Oveja chiquesa rã ño se re. ⁸ Ae ngaẽ senonde nyii nae, mbae mbuquiachãsa ja chõ ñquĩ nde. Nyebe ovejas eche siichã eã nguiã. ⁹ Oveja chiquesa chõ se re. Ae seicua quia nae, ñquĩ nda ateaquiato bei mingo. Sã oveja mo ndiqui oso quiaru quiaru no. Sã eriqui cuã nyebi chebi bei utaronda no. Eĩ si ra seicuasa quia siqui bei serese. ¹⁰ Mbae mbuquiachãsa quia ra tu mbae rirõ sacuã. Mbae mbutiã sacuã. Mbae iquia sacuã. Se quia ni achu nguiã mbia mingo bei sacuã. Mbia mbia tuchi nonde que achu ra. ¹¹ Oveja raarõsa rei se. Ovejas

ateaquiato bei quia co. Amano nda emingo bei sacuã. ¹² Ae ovejacha eã nae, aque ra ovejas saarõ ndaque, saarõ turã eã ndae. Uchã ño nda nyacua tu mose ovejas je. Nyacua ra ovejas isi embuquiachamba u quia. ¹³ “Echa eã ndei se re”, i ra eraarõsa uchã erecha. Esiquiche mose. Oveja raarõ turã eã. ¹⁴⁻¹⁵ Se quiarei oveja raarõsa turã. Sã Paba riqui seicuate co no. Sã aico Paba icuate se abe co no. Eĩ ae chõ nguiã oveja icua sembae co no. Sembae abe seicua quia ã. Sembae ovejas mingo bei sacuã nda amano. ¹⁶ Ovejas mo abe que sembae no nda. A jenda eã ño ùquĩ nde. Ùquĩ abe ra aru a. Ùquĩ nda secheẽ mumbayã no. Sembae oveja ra chi ja serese cote. Se mii ño nda asaarõ ja cote. ¹⁷ Sesiquire eã semana ndese. Sembae ovejas mingo sacuã. Nyebe Paba iate riqui nguiã serese co. Semanonde ra aquera si. ¹⁸ Semano sereã mose, eĩ nda mbia seiquia aroneate rei. Se ae chõ amanosete nguiã mbia je. Se ae chõ nda aquera si no. Paba quia uquirãcuã meete nguiã seje, i que Jesús mbia je ra.

¹⁹ Judíos que ñee ata atate nyue ra. Jesús cheẽ mose. Hue rĩ si ñee ja eã. ²⁰ —Aba checuayã siquite Jesús rese co resẽ. ¿Mbaerã jẽingo echeẽ andu re? i que emo emo uataque je ra. ²¹ Emo emo ngue ñee no nda. —Ae rese aba checuayã ndiqui nae, ùquĩ nda ñee turã eã ndesẽ. Aba checuayã nda mbia resayã mbucherõ eã ndesẽ, i que emo emo no nda.

Judíos Jesús oseĩ chiã

²² Mbã que ñumunua nua nguiã Jerusalén cote ra. Dios chuchua ao mosenda ndese ndua ndua. Nyiiseite que aque mose ra. ²³ Jesús que oso Dios chuchúaa ra. Portal de Salomón ngue eriqui ngata ra. ²⁴ Judíos que ngaẽ Jesús mama nda. Ñee ngue ee ra. —Ureico ndeicuayãte ã. ¿Manosete ra erecheẽ tuchi ure je re? Nde rĩ. Echĩmbu checua jiri ure je. Nde Cristo mose, ndecheẽ embuchecua

ure je, i que judíos ñee Jesús je ra. ²⁵ Jesús que ñee ee ra. —Acheẽ ndei que jẽje resẽ. Secheẽ jẽñanuã ño nguiã ã. Paba quirãcuã je chõ aico nguiã mbia mae sayã naa naa co. Æ ndese mae nda seicua nguiã ña. ²⁶ Acheẽ ndei que jẽje nyii resẽ. Serimba eã ño jẽ nde. Nyebe jẽingo nguiã secheẽ anuã. ²⁷ Serimba secheẽ icua ja quia ã. Serimba aicua ja quia ã. Serui ja serimba riqui ã. ²⁸ Serimba amingo bei quia co. Serimba ra quiachã eã mbei. Emo eisi aronea tuchi sesi. ²⁹ Paba que emee serimbarã nda. Emo eisi aroneate Paba o si. Ae quiarei equirãcuã tuchi. ³⁰ Aque mii ño ureico nguiã ã. Paba rese. Eĩ si tuchi ureico nguiã ã, i que Jesús ee ra.

³¹ Nyebe judíos paama i nguiã ee. Sita que esirõ sirõ nda. —Jesús nandechẽ, i rei que ra. ³² Jesús que ñee ee ra. —Paba que sembuquirãcuã tuchi ra. Nyebe jemaẽ sayã asaã saã tuchi nguiã jẽje. ¿Ùquĩ mo nii jẽingo “nandechẽ” i seje re? i que Jesús judíos je ra. ³³ Judíos que ñee Jesús je ra. —Ndechiao turã mo je eã ño ureico nguiã “nandechẽ” i ndeje. Erecheẽ icuãte que Dios rĩ ndesẽ. Dios eresaã saãte quia ure je co resẽ. Mbã si chõ ndaque nde, i que judíos Jesús je ra. ³⁴ Jesús que ñee ee ra. —Sã embesa ji riqui i no: “Jẽ ndei dioses, i que Dios ra”, sã embesa ji riqui i no. ³⁵ Embesa ji ñeeñoño aronea. “Dioses rei jẽ”, i que Dios ucheẽ nenei neneisa je ra. ³⁶ Dios que seirabo ra. Sembu que íbii cote ra. ¿Mbaerã jẽingo paama i secheẽ mose re? “Dios riirĩ ño se re”, i mose re. “Ndeicuãte chõchĩ Dios je”, jenyẽ chõchĩ nguiã seje. ³⁷ Se mbae raã naa eã mose Paba rã si, ùquĩ mose quia secheẽ jeñanuã. ³⁸ Paba rã si mose, “coche ñene” jenyẽ chõ sechisaã je. Secheẽ jeñandu sereã ndaque. Paba riqui serese co. Se abe aico Paba rese co. Ùquĩ nda jẽicua cote, “coche ñene” i mose sechisaã je, i que Jesús ee ra. ³⁹ —Jesús nanderao etarõ sacuã, i rei que mbia ra. Jesús que oso chee hue si ra.

⁴⁰ Jesús que oso Ama Jordán ndobei ra. Ae Juan ndiqui bautizar i nyii nae, huee que esi ra. Huee que Jesús riqui arete cote ra. ⁴¹ Mbia que nyoï nyoï tuchite erea huee ra. Ñee ñee ngue nyue ra. —Juan ngue nandemae sayã mo saã eãte rei nande je. Nandembi-irandu turã tuchichĩ Jesús riĩ. Ichõĩño eã ño equia ñee nande je reaẽ, i que mbia ñee nyue ra. ⁴² Mbia tubiriã ngue Jesús icuua huee ra.

11

Lázaro mano

¹ Emo ndasi que chi ra. Lázaro, i que ee ra. María, i que enongue je ra. Marta, i que enongue je no nda. Echari ja que ũquĩ nda. Betania jenda ja que ũquĩ nda. ² María rei aba mbushimbusa ichusẽsa Jesús i rese. Ua je que esi esi ra. Enongue quia erasi re. Lázaro, i que ee ra. ³ Nyebe echari mbia mo mondo nguiã Jesús mbiirandu sacua. —Ndequiato rasi que chi aque rĩ nda, i que echoi Jesús mbiirandu ra. ⁴ Jirandu mose que Jesús ñee cote ra. —Mano sacua eã ño erasi chi nguiã aque. Dios quirãcuã ndese mbia mae sacua ño erasi chi nguiã aque. Se abe sequirãcuã ndese mae sacua ño erasi chi nguiã aque, i que Jesús ra. ⁵ Jesús que nyese-cua tuchi Marta rese ra. María rese, Lázaro rese abe no. ⁶ Lázaro rasi rese jirandu mose que esi jei eã erea ra. Siquichõ ngue ra. Itõ nyeremo ngue huee ra. ⁷ —Nyaobe Judea cote, i que uchimbaaquiatu je cote ra. ⁸ Echimbaaquiatu que ñee ee ra. —Namote que judíos ndeigua serite sita je. ¿Mbaerã nda ereso si huee re? i que Jesús je ra. ⁹⁻¹⁰ Jesús que ñee ee ra. —Dios quiatu que sembu ra. Mbae raã naa sacua ee. Echeẽ ngue asaã ja eãte ra. Nyebe emo seiquia aroneate namo. Se echeẽ naa ja mose quia ra mbia seiquia arõte cote, i que ñee uchimbaaquiatu je ra. ¹¹ Aquere que ñee si uchimbaaquiatu je ra. —Nandequiato que uque cote ra. Lázaro. Taso emumba cote, i que ra. ¹² —Uque mose u, ae ae ra

ñumumba rei, i que echimbaaquiatu ee ra. ¹³ —Lázaro que mano nda, i eã ngue Jesús ucheẽ mbuchecua tuchi ee ra. Lázaro mano tuchi raque. Lázaro uquechõ nei nguiã echimbaaquiatu je. ¹⁴ Jesús que ucheẽ mbuchecua ramo ee cote ra. —Lázaro que mano nda. ¹⁵ Coche aico eã nguiã huee. Jẽ nda seicua tuchi cote. Nyao erea cote, i que Jesús uchimbaaquiatu je ra. ¹⁶ Tomás que ñee echimbaaquiatu ataque je ra. —Nyao erese nande abe no. Sã mbia nandeiquia nande abe rõ, i que Tomás ra. “Eata”, i que mbia quia Tomás je ra. Eata rei ae.

Jesús mbia raaque mbuquerasa

¹⁷ Ngasẽ ngue Betania cote ra. Mbia hue jenda que ñee Jesús je cote ra. —Co Lázaro ati ji chi itõ mocoite co resẽ. Cuatro días tuchite nyeresẽ, i que mbia ñee Jesús je ra. ¹⁸ Aichite que Betania Jerusalén si ra. Tres kilómetros que ra. ¹⁹ Nyebe judíos rane ngaẽ jate nguiã ngasẽ Jerusalén si. María mbia jiri sacua. Marta abe no. Enongue raaque ati ji mose. ²⁰ Marta jirandu mose Jesús rese que esi erobeishĩ nda. Oo que erese ra. María quiatu que siquichõ tuchúaa ra. ²¹ Marta que ñee Jesús je ra. —Sererecua, ndeico mose a, eĩ nda senongue manoãte rei. ²² Dios ra ndecheẽ ñandu. “Mbae mo embu seje”, i mose, i que Marta Jesús je ra. ²³ —Ndenongue ra quera si, i que Jesús ee ra. ²⁴ Marta que ñee ee cote ra. —Ae bei. Mbia raaque quera ja mose, aque mose ra senongue abe quera si. Mbae ua ja mose ra quera si. Aicuate raque se quia co, i que Marta ra. ²⁵ Jesús que ñee ee ra. —Mbia raaque mbuquerasa rei se. Mbia mingosa rei se. Ae seicua quia nae, ũquĩ nda mano ndaque, quera si rae. ²⁶ Ae seicua quia nae, ũquĩ nda uayã mbei. ¿Ūquĩ ereicua quia co re? i que Jesús ee ra. ²⁷ Marta que ñee ee ra. —Ae. Cristo chõ nde re. Dios rucucha chõ nde re. “Dios rucucha ra tu íbii”, i que mbia quia nyii nae, ae chõ nde re, i que Marta Jesús je ra.

Jesús nyeseo

²⁸ Aquere que Marta si María mbiirandu ra. —Nandembaaquiatusa que tu ra. Hue que eriqui nderequia ra, i que Marta ñee ngõngue ísaa ra. ²⁹ Echeẽ nduibe tuchi que María si juã asi Jesús rea ra. ³⁰ Jesús ngasẽ mose rocoĩ m̃bia chuchua ite re. Marta erobeishisa bei que Jesús riqui ra. ³¹ Mariaso rese que judíos chi mae ja ra. —Ngõngue atisa chõ María si nguiã nyeseo qui, i rei ngue judíos choi nguiã erui. ³² María que ngasẽ Jesús je ra. Ngoi que ngũã ndese ejii ra. Ñee ngue ee ra. —Ndeico mose a senongue ndasi mose, eĩ nda manoãte rei, i que María Jesús je ra. ³³ María que nyeseo ra. Judíos que chi erese, ùquĩ abe que nyeseo no nda. Nyebe que Jesús abe ia eãte ra. Echiã ngue ngoi eã tuchi ra. ³⁴ —¿Mangue jenyati mangue re? i que Jesús mbia je ra. —Nyao erea ae, i que mbia ee ra. ³⁵ Jesús que nyeseo ra. ³⁶ Judíos que ñee nyue ra. —¡Sã jẽ! Nyese-cua tuchi Lázaro rese. Eya eãte riqui erese co, i que mbia ra. ³⁷ Emo emo ngue ñee nda. —Jesús que eresayã ndesa mbucherõ. Eĩ nda Lázaro rasi mbucherõ nde chaẽ. Eĩ nda manoãte, i que mbia ra.

Jesús Lázaro mbuquera si

³⁸ Jesús ia eãte que ngasẽ Lázaro atiguia ra. Sita imi ye. Sita chõ ngue eatiquia no nda. ³⁹ —¡Sita eatiquia jẽjea jẽ! i que Jesús mbia je ra. Marta que ñee Jesús cheẽ mose ra. —¡Enete ra nande je jẽ! Curite que mano ndesẽ. Cuatro días tuchi que ra, i que Jesús je ra. ⁴⁰ Jesús que ñee ee ra. —“Seicua tuchi mose ra erema Dios quirãcuã ndese”, ae rei que ndeje nyii, i que Jesús ra. ⁴¹ Sita eatiquia que mbia jea cote ra. Jesús que mae ibate quiti ra. Ñee Dios je. —Paba, secheẽ ngue erechandu. “Íaanye”, ae bei quia ndeje co. ⁴² Nde quiarei seandu bei. Mbia resa rae aico ñee ndeje a. “Dios chimondo chõ eriqui re”, i nda ã serĩ ña, i que Jesús ñee Dios je ra. ⁴³ Jesús que ñeemombo

Lázaro raaque je cote ra. —Lázaro, jechu usẽ! i que ra. ⁴⁴ Eraaque que usẽ u juã cote ra. Eo cuasa resebe que usẽ nda. Ei abe ecua ji tiru je. Eruba abe ecua ji tiru je. —Jenyura mondo, i que Jesús mbia je ra.

Jesús nandeiquia, i judíos

⁴⁵ Judíos que nyoĩ María rese, ùquĩ ngue mae ja Jesús rese ra. Lázaro mbuquera mose. Ûquĩ tubiriã ngue Jesús icua cote ra. ⁴⁶ —Jesús que Lázaro raaque mbuchuruã nda, i que emo nyoĩ fariseos mbiirandu ra. ⁴⁷ Fariseos que ñumunua ja cote ra. Sacerdotes rerecua ja rese. Mbia rerecua ja. Ñee tuchi Jesús rĩ. —¿Mañi nande ra equia ee re? Mbia mae sayã naa naa tuchichĩ equia aque. ⁴⁸ Nande ereachõ mose ra mbia siqui ja techĩ erui re. ¡Roma jenda ra nandembae isichĩ ibi jẽ! ¡Dios chuchua ra embucoichĩ ngaẽ jẽ! i que ererecua ñee nyue ra. ⁴⁹ Caifás que sacerdote rerecua tuchi aque mose ra. Ae que ñee uataque je ra. —Mbae jẽicuayã tuchichĩ nguia ã. ⁵⁰ Jendua eã ñochĩ equia ã. Aque mĩ ño nda mano nguiã nande ja je chã. Eĩ nda judíos ua tuchi eã, i que Caifás uataque je ra. ⁵¹ Caifás ae que ñee eã nda. Dios ae quiatu ngue embucheẽ nguiã ùquĩ. Sacerdote rerecua tuchite quiatu ngue ae re. Nyebe Dios embucheẽ nguiã. —Jesús ra mano judíos mingo ja sacua. ⁵² A jenda achõ je eã nda Jesús mano. Dios riirĩ mangue chooñoa jenda je abe chõ nda Jesús mano nguiã. Dios riirĩ munua ja sacua, i que Caifás ñee nda. ⁵³ Aque mose bei que judíos rerecua ñee ñee nyue ra. —¡Jesús nandeiquia rei jẽ! i que equia ñee ñee nyue ra. ⁵⁴ Jesús que nyecua eã judíos je cote ra. Judea si que esi cote ra. Turuquia rurubi que esi ra. Efraín, i que sucha tubiriã je ra. Huee que eriqui arete uchimbuaquiatu rese cote ra. ⁵⁵ Fiesta de la pascua que ecurubite ra. Nyebe judíos nyoĩ choi ja nguiã Jerusalén. Suchamo jenda

emo emo ngue nyoï jate ra. Pascua nonde que echoï huïcuã mbitirõ sacua nda. ⁵⁶ Mbia que Jesús sequia quia ra. —¿Tu ra fiesta re? ¿Tu eã nda re? ¿Tu aroneate jêje re? i que mbia ñee ñee nyue Jesús rîï nda. I que mbia u ñee Dios chuchúaa ra. ⁵⁷ Mbia rerecua que ñee mbia je nyii ra. —Emo jirandu mose Jesús rese, sã urembiirandu jei. Eï nda ureisi. Eï nda uretarõ mïï, i que sacerdote rerecua ñee nyii ra. Fariseos abe no.

12

María aba mbushimbusa ichusê Jesús i rese

¹ —Seis días mose ra pascua cote, i que mbia ra. Aque mose que Jesús si Betania nda. Huee que Lázaro riqui ra. Ae Jesús mbuquera erua si. ² Mbia que ñio mïï Jesús chiurã nda. Marta que echurã mondo mondo ee ra. Mbia je abe. Lázaro abe que chï quiaru erese ra. ³ María que aba mbushimbusa queru Jesús je cote ra. Medio litro. Nardo, i que ùquï je ra. Mbae isiquia mumba tuchi que ùquï nda. María que eichusê Jesús i rese ra. Ua je que esi esi ra. Tuchua mbushimbu ja que ra. ⁴ Judas Iscariote abe que siqui ra. Simón ndiirï ngue aque ra. Jesús chimbaaquiato mo ndei que aque ra. Ae quiato que Jesús mee mbia icua je emo mose cote ra. Ae que ñee nda. ⁵ —¿Mbaerã eichusê ñooño nde? ¿Mbae isiquia ribishorõ ño nda aba emondo re? Tres cientos ribishorõ. Mbaecha reã je emee sacua, ùquï mbae isiquia, i que Judas ra. ⁶ Judas ndua eã ndaque mbaecha reã ndese. Mbae mbuquiachãsa tuchi que ae ra. Mbae isiquia riru que equereco quia Jesús je ra. Eyenda que esirõ sirõ nguia mbuchemi chemi nda. ⁷ Jesús que ñee Judas je ra. —¡Erecheẽchï nda María je jê! ¡Sã ae ae riqui jê! Seati nonde chõ aba mbushimbusa icherẽ nguia serese. ⁸ Mbaecha reã nguia nda chi are jiri nguia a. Se quia nda aïco bei eã nguia jêje a, i que Jesús ra.

Lázaro nandei quia, i rei judíos rerecua

⁹ Judíos que jirandu jate Jesús rese ra. Eriqui mose Betania. Nyoï jate que erea ra. Lázaro abe rea. Ae Jesús mbuquera erua si. ¹⁰ Nyebe judíos rerecua ñimbiirandu nguia. — ¡Lázaro abe nandei quia rei jê! i que ererecua ñee nyue ra. ¹¹ Judíos que siqui tuchite Jesús rese cote ra. Nguerecua que esecha jate cote ra. Lázaro que embuquera erua si nyii. Ùquï mbei bei que nyii ra. Jesús oso Jerusalén

¹² Mbia tubiriã ngue nyoï Jerusalén nda. Pascua raã naã sacua huee. Jesús abe que oso ra. Mbia que jirandu erese ra. Ecuasẽ nonde.

¹³ Mbia yate que Jesús cuasẽ mose ra. Sindo que ecuruchoï erobeishï nda. Mbia que tasẽ tasẽ tuchi ra. —Eturã tuchi ruchï nguia co. Dios rucucha ruchï nguia co. Israel rerecua ruchï nguia co cote, i que mbia tasẽ tasẽ tuchi ee ra. ¹⁴ Jesús que ngasẽ burro riirï mo je ra. Nyui que eato ra. Embesa ji rui si. ¹⁵ I que embesa ji quia nyii ra:

¡Jêreï ireïchï nda, Sion jenda!

Co jenderecua ru quia co.

Co eru quia burro átoo co,

i que embesa ji quia nyii ra. ¹⁶ Jesús chimbaaquiato que ã icuayãte nyii ra. Embesa ji. Jesús quera si mose que ã icua cote ra. —Embesa ji rui si chõ eriqui rei reaẽ, i que echimbaaquiato eicua ramo cote ra.

¹⁷ Jesús que Lázaro mbuquera, ùquï ndese maesa que mbia mbiirandu randu tuchi quia ra. ¹⁸ Nyebe mbia nyoï ja tuchi nguia Jesús robeishï. Jirandure Lázaro raaque mbuquera rese. ¹⁹ Fariseos que ñee ñee si nyue no nda. —Jesús rui ja tuchichï mbia. ¿Mañi nda aba mbia je re? i que ñee nyue ra.

Griegos mo Jesús requia

²⁰ Griegos mo abe que nyoï Jerusalén nda. Pascua raã naa Dios je. ²¹ Ùquï ngue nyoï ñee Felipe je ra. Felipe que Betsaida jenda ra. Galilea jenda. —Uremaese rete Jesús rese, i

que griegos Felipe je ra. ²² Felipe que oso Andrés mbiirandu ra. Ûquĩ ja que nyoĩ Jesús mbiirandu cote ra. ²³ Jesús que ñee ee ra. —Mbiarã ngue achu ibate si ra. Semano nonde arubite cote. Sequera si nonde arubite cote. ²⁴ Tacheẽ nyecua jẽje. Ibasĩ eĩ tiquia eã mose ra ia eã mbei. Chi chooño mbei rae. Etiquia mose ra suri cote. I a tuchi ra cote. Eĩ ae ra se. Ibasĩ eĩ na si. Amano nda se. Mbia ra setiquia. ²⁵ Ae nduate quia nyiese nae, ùquĩ nda nyoĩ eãte ibate. Ae ndua eãte quia nyiese nae, ùquĩ nguia ra nyoĩ ibate. Siqui bei sacua huee. ²⁶ Ae secheẽ mumba sereãte quia nae, sã ùquĩ ndiqui bei serui. Ae ra aico nae, huee ra ùquĩ abe riqui. Ae secheẽ mumba sereãte quia nae, ùquĩ nĩi nda Paba ñee turã.

Amano nda se, i Jesús mbia je

²⁷ Seya eãte aico co. ¿Mañi ae ra ñee Paba je re? “Semingobe rei se ae. Sembasiã ndei se ae”, ae aroneate Paba je. Æ sacua ño ngue achu resẽ. Sembasi sacua ño ngue achu resẽ. ²⁸ Paba, ndequirãcuã eteacuquia mbia je, i que Jesús ra. Ûquĩ mose que echeẽ mo ndu ee ibate si ra. —Sequirãcuã ngue ateacuquia mbia je ra. Ateacuquia si ra mbia je, i que ibatenda ñee ee ra. ²⁹ Mbia que ibatenda cheẽ ñandu ja rei ra. Ae chi Jesús rese, ùquĩ. —Ama ndieu ereae, i que mbia ra. —Tei. Angel mo ño ngue ñee nguia Jesús je, i que emo no nda. ³⁰ Jesús que ñee mbia je cote ra. —Seje eã ño ngue ibatenda ñee ndesẽ. Jẽ eandu sacua ño ngue ñee ndesẽ. ³¹ Paba ra seicua reã mbasi ja cote. Mbia icua nderecua ra Paba mombo ibi jenda cote. ³² Sembucha mose mĩi ibate, mbia ra siqui tuchi serese cote. Sucha mo jenda ja abete ra siqui serese cote, i que Jesús ra. ³³—Mbia ra seiquia mĩi sembucha ira rese, i ñene. ³⁴ Mbia que ñee Jesús je cote ra. —“Cristo ra siqui bei”, i que Dios cheẽ embesa ji urembiirandu. ¿Mbaerã erecheẽ nde? “Mbia ra sembucha ira rese”, i re. ¿Aba quia Cristo

re? ¿Aba quia tu mbiarã nde? i que mbia ñee Jesús je ra. ³⁵ Jesús que ñee ee ra. —Taico mbirimbe jendese jembaaquiatu quiatu. Jendesaebe mbirĩ. Tata rendi rãte aico co. Tata rendi siqui mose jendese, jengata turã ño nguia jẽ! Seicua reã ño siqui nguia itondaru. Ûquĩ quiachã ño nguia ùquĩ. ³⁶ Tata rendi raãte aico co. Seico beebe mose jendese, seicua tuchi rã. Eĩ nda jẽingo turã jendesae ji, i que Jesús mbia je ra. Aquere que esi ñemi mbia si cote ra.

Judíos Jesús icua eã mbei

³⁷ Jesús que mbia mae sayã saã saã tuchite rei mbia je ra. Mbia que Jesús icuayã mbei chõ nda. ³⁸ Ae Isaías mbesa mĩi nyii nae, ùquĩ na si chõ ngue mbia Jesús icuayã cote ra. Eĩ ngue Isaías embesa mĩi nda: Sererecua, ae uresenei senei nguia mbia je nae, ùquĩ mbia icua sereãte quia ã. Ndequirãcuã mbia tea sereãte quia ã, i que Isaías embesa ra. ³⁹ Mbia que Jesús icua aroneate ra. Isaías chimbesa rã si chõ ngue ra. Eĩ ngue Isaías embesa mĩi no nda: ⁴⁰ Dios que mbia chiã matã nda. Nyebe eriqui mbae icuayãte ã. Nyebe eriqui nguia uba eãte serese. Se embitorõ sacua, i que Isaías chimbesa huĩ nda. ⁴¹ Isaías que Cristo quirãcuã tea nyii ra. Nyebe ã mbesa mĩi nguia Jesús rĩi a. ⁴² Judíos tubiriãte que Jesús icua ra. Judíos rerecua emo emo abe que Jesús icua rei ra. Siqui checuayã ño ngue Jesús rui ra. Esiquichete quiatu ngue fariseos si re. —¡Fariseos ra nandemombochĩ mbia chumunuasa si jẽ! i que ra. ⁴³ —Dios cheẽ nandemumbayã jẽ, iã ñochĩ ngue re. —¡Mbia cheẽ nguiatu nandemumbayã jẽ! i chõchĩ ngue re.

Secheẽ nguia ra seucuayãsa mbasi, i Jesús

⁴⁴ Jesús que ñee irãtã mbia je ra. —Ae seicua quia nae, se mĩi icua eã. Paba abe icua. Ae sembu ibate si. ⁴⁵ Ae mae nguia serese co nae, Paba

abe rese mae. ⁴⁶ Mbia resae sacua ño achu nguiã co. Eĩ nda seicuasa siquĩã itondáruu. ⁴⁷ Jẽingo secheẽ andu ã. Jemo secheẽ mumba mose, se ra ambasiã. Secheẽ ae ra embasi. Mbia mingo bei sacua ño achu nguiã co. Mbia mbasi sacua eã ño achu nguiã. ⁴⁸ Secheẽ nguia ra seucuyãsa mbasi, mbae ua mose. Ibi ua mose. Secheẽ ae ra secheẽ mumbasa mondo tata cuasu. Secheẽ andu chooño nguiatu ngue re. ⁴⁹ Se ae eã ño acheẽ nguiã mbia je. Paba quia ñee nguiã seje. “Eĩ ere mbia mbaaquiato quiatu”, i que Paba sembu ra. ⁵⁰ Paba cheẽ ndei mbia mingo beisa. Echeẽ mumbayã mose. Nyebe aico nguiã Paba cheẽ nenei nenei co. Secheẽ ae eã ño ñene.

13

Jesús mbia i irei irei

¹—Namo jiri ra Paba sererao ibate ibi si cote, i que Jesús uchiangui re ra. Nyesecua tuchi que equia uchimbaaquiato rese ra. Mano nyee. ² Jesús que quiaru u uchimbaaquiato rese isa ra. Pascua nonde. —Jesús emondo mbia icua je, i que diablo Judas Iscariote je nyii ra. Simón ndiiri ndei aque. ³ Jesús que mbae icua jate ra. —Dios si chõ achu nguiã co. Asobe ra erea. Paba que uquirãcuã mee tuchi seje ra, i que Jesús uchiangui re ra. ⁴ Quiaru jare que Jesús juã huïrao mbui ra. Ngũmbi que echucua toalla je ra. ⁵ I que eichusẽ mbae mo ye ra. Uchimbaaquiato i que eirei irei ra. Mbũru iru que toalla je ra. ⁶ Pedro i nda eirei nguiã cote chã. —Sererecua chõ nde resẽ. ¿Mañi ere ra sei irei re? i que Simón Pedro ñee Jesús je ra. ⁷ Jesús que ñee ee ra. —Ã ereicuyãte. Ae asaã saã nguia ã. Ereicua rei ra cote, i que Jesús ñee Pedro je ra. ⁸ —Sei ra ereirei eã mbei, i rei que Pedro Jesús je ra. —Ndeirei eã mose, serese eã nda nde cote, i que Jesús Pedro je ra. ⁹ —Sei achõ eã eirei rõ. Seo abe eirei no. Seãquĩ abe no, i chee que Pedro ee cote ra. ¹⁰ Jesús que ñee ee ra. —Ae echasu quiite, equishĩte ùquĩ ndesẽ. Jẽi mi ño tairei. Jẽquishĩ ja

eãte raque. Aque miite raque echiã nondei, i que Jesús uchimbaaquiato je ra. ¹¹ Jesús que jirandu Judas rese ra. Nyebe eriqui nguiã ñee. —Aque miite raque echiã nondei, i.

¹² Ei irei jare que huïrao mingue cote ra. Ngoi si que ra. Ae ñee nguiã nguesenda je. —Jẽi que airei, ¿ũquĩ jẽicuate rei quia re? ¹³ Nyebe jẽingo nguiã ñee seje. “Sererecua, Sembaaquiatusa”, i seje. Coche jeñee nguiã seje. Ererecua rei se. ¹⁴ Jẽi que airei irei. Ererecua raque se. Nyebe jẽ abe jemo i jẽirei irei ae. ¹⁵ Nyebe que atecuquia jẽje resẽ. Serui sichõ jẽingo emo i irei irei ae. ¹⁶ Tacheẽ nyecua jẽje. Se rei jenderecua. Se chõ aemondo mondo nguiã mbia mbaaquiato sacua. Jengasu ra jẽsaã saãchĩ sesi jẽ. ¹⁷ Jẽ secheẽ icua mose, secheẽ mumbayã mose, jeya tuchi ra jẽingo. ¹⁸ Jẽ ja je eã aico nguiã ñee a. Jaẽirabo que se resẽ. Jaẽicuate que se resẽ. “Ae quiaru serese nae, aque icuãte ra seje cote”, sã embesa ji i no. Embesa ji rui si ra jemo icuã seje cote. Quiarure serese. ¹⁹ ¡A aico ñee jei jẽje a jẽ! Eicuã nonde seje. Eicuã mose seje, jẽ nda seicua cote. “Dios nducucha” jenyete tuchi ra seje cote. ²⁰ Tacheẽ nyecua jẽje. Ae secheẽ nenei neneisa isi quia nae, ùquĩ nda seisi se abe. Ae seisi quia nae, Paba abe isi rae, i que Jesús uchimbaaquiato je ra.

Jemo nda semondo mbia icua je, i Jesús

²¹ Jesús ia eã tuchi que cote ra. —Tacheẽ nyecua jẽje. Jemo nda semondo mbia icua je cote, i que ñee nyecua uchimbaaquiato je ra. ²² Echimbaaquiato que mae mae ja chõ nyiese ra. —¿Aba ra re? ¿Aba ra re? i jaaja nyue. ²³ Jesús chesecua tuchi que chĩ ngoi ejii ra. ²⁴ Aque je que Simón Pedro o mee mee nda. —“¿Aba ra re?” ere ee, i que Pedro ra. ²⁵ Jesús chesecua que ñimbucha i i ñee Jesús je ra. —¿Aba ra re? i ee. ²⁶ Jesús que ñee ee ra. —Mbichae monde ji ra amee jemo je. Ae je ra amee, aque

ra semee mbia icuã je, i que Jesús ra. Mbichae que emonde mondo Judas Iscariote je cote ra. ²⁷ Judas mbichae u mose que Satanás ndu embicua tuchi cote ra. Jesús que ñee ee ra. —Ae ra eresaã nae, ¡ũquí esaã jeichõ jẽ! i que Jesús Judas je ra. ²⁸ —¿Mbae rĩ Jesús riqui ñee Judas je re? i que eataque ra. Mbia iranuã ja que ra. ²⁹ Judas que mbae isiquia quereco ja quia ra. —Mbae mo eisi rã nandechiurã, i reĩ Jesús quia Judas je uchimbaaquiatu je. —Mbae mo emondo rã mbaecha reã je, i reĩ Jesús quia Judas je uchimbaaquiatu mo je. Echeẽ ngue eicuayã ja ra. ³⁰ Mbichae ure que Judas si usẽ cote ra. Itondaruqui rĩ.

Jesús ucheẽ yasu renei mbia je

³¹ Judas usẽ mose que Jesús ñee nda. —Mbiarã ngue achu ra. Sequirãcuã ndese ra mbia mae cote. Dios quirãcuã abe areco co. Dios quirãcuã abe rese ra mbia mae cote. ³² Aico Dios quirãcuã ndeacuquia mbia je a cote. Dios abe ra sequirãcuã teacuquia mbia je cote. Sequirãcuã nda eteacuquia jei mbia je cote. ³³ Seresenda, aico mbirĩ ño nguiã jendese a cote. Serequia rei ra se cote. Acheẽ ngue judíos je, ũquí sí aico ñee jẽje a. Ae ra aso nae, huee jengasẽ aroneãte. ³⁴ Aico secheẽ yasu nenei jẽje a. Secheẽ mumbayã sacua. ¡Jenyesequa ja jenyiese jẽ! Sã ñi aico nyesequa tuchi jendese no. ¡Eĩ jenye nyesequa tuchi jenyiese jẽ! ³⁵ Jenyesequa tuchi mose jenyiese, mbia ra ñee ja tuchi jenĩ. “Eĩ nguia Jesús chimbaaquiatu quia re”, i ra mbia jẽje, i que Jesús uchimbaaquiatu je ra.

Pedro ra ñee ñooño serĩ, i Jesús

³⁶ —¿Manguiti ra ereso re? i que Simón Pedro ñee Jesús je ra. —Ae ra aso nae, huee ereso aroneate namo. Emo mose jiri ra ereso serui cote, i que Jesús Pedro je ra. ³⁷ Pedro que ñeembe ee ra. —¿Mbaerã nda asoã nderese namo nde? Seso sete

nderese. Semano sete nderese, i que Pedro Jesús je ra. ³⁸ Jesús que ñee ee ra. —“Semano sete nderese”, erechĩ nguiã seje. Co isa ra erecheẽ ñooño serĩ tres veces. “Jesús aicuayãte resẽ”, ere chooño nda serĩ nguira cheẽ nonde, i que Jesús Pedro je ra.

14

Jesús rei ñeenda Dios icha

¹ Jesús que ñee uchimbaaquiatu je ra. —Jẽya eã eriquichĩ nguiã. Dios jẽicua chõ ae. Se abe jẽicua chõ ae. ² Ae Paba riqui, huee tuchia tubiriãte. Ũquí eande rae, eĩ nda acheẽ eãte rei jẽje. Aso ra tucharã naã jẽje. ³ Jenyucharã naa jare ra achube jendea cote, jenderao bei serese cote. Jẽ nda jẽingo bei serese pee cote, ae ra aico. ⁴ Ae ra aso, huee jẽicuate resẽ. Ñeenda abe jẽicuate resẽ, i que Jesús ee ra. ⁵ Tomás que ñee ee ra. —Ureicuayãte nyeresẽ. ¿Mangue ra ereso mangue re? Ñeenda ra ureicua eãte chi nde, i que Tomás Jesús je ra. ⁶ Jesús que ñee ee ra. —Ñeenda rei se. Ñee ñooñoã je rei se. Mbia mingo beisa rei se. Ae ra seicuayãte, ũquí nda ngaseã mbei Paba je. ⁷ Jẽ seicua mose, Paba abe jẽicuate quia ã. Jẽ Paba jẽicuate quia cote resẽ. Jemae ngue erese namo ndesẽ, i que Jesús ee ra.

⁸ Felipe que ñee ee cote ra. —Nderu eteacuquia rã ure je. Ũquí miĩ ño ureico nguiã ñee ndeje, i que Felipe ra. ⁹ Jesús que ñee Felipe je ra. —Aico tuchite que jendese, Felipe. ¿Mbaerã ereico seicuayãte re? Ae mae nguia serese, Paba abe rese maete. ¿Mbaerã ereico ñee seje re? “Nderu eteacuquia ure je”, i seje. ¹⁰ Co aico Paba rese co resẽ. Paba abe riqui serese co. ¿Ũquí ereicuayãte re? Ae aico ñee jẽje nae, secheẽ ae eã ño ũquí nde. Paba riqui serese co. Ae abe riqui mbae raã naa serese co. ¹¹ Secheẽ jẽicua rã. Co aico Paba rese co. Paba abe riqui serese co. “Nyia”, jenye eã mose secheẽ je, sechisaã je chõ “nyia” jenye.

12 Tacheẽ nyecua jẽje. Ae seicua quia nae, ũquĩ nda sechisaã saã saã se rã si cote. ũquĩ nda mbae saã saã tuchi sesi. Co quia aso nguiã Paba rea se co. 13 “Mbae emondo ure je” i mose seje, amondo ra jẽje. Jẽ seicua mose. Eĩ ae ra Paba quirãcuã ndeacuquia mbia je. 14 “Mbae emondo ure je”, i mose seje, amondo ra jẽje. Jẽ seicua mose.

Espíritu Turã tamondo jẽje, i Jesús

15 Jenyesequa mose serese, secheẽ jemumbayã ae. 16 Tacheẽ Paba je. “Espíritu Turã emondo sechimbaaquiato je”, ae ra Paba je. Espíritu Turã nda siqui bei jendese cote. Jẽquiato tuchi ra ae cote. 17 Espíritu Turã nda ñee ñooñoã jẽje, jembaaquiato quiatu. Ae ra siqui eã tuchi Dios quiatoã ndese. Espíritu Turã icuayãte quia ñe ne. Jẽ nguia jẽicuate nguiã. Co Espíritu turã ndiqui jendese co. Siqui bei ra jendese.

18 Aso raque quia co. Esi cheecha rã nda jẽingoã. Achube ra jembirõ. 19 Aichite aĩ oso a cote. Dios icuasa reã nda mae eã serese cote. Jẽ nguia nda jemaẽ nguiã serese. Aquera si ra siqui bei nonde. Jẽ abe ra jẽingo bei serĩ cote. 20 Espíritu Turã tu mose ra jẽicuate cote. “Jesús riqui ngu rese co. ã ureico Jesús rese ã. Jesús riqui urerese co”, janye ra serĩ cote. 21 Ae secheẽ icua quia nae, ae secheẽ mumbayãte quia nae, ũquĩ nguia nyesequate nguiã serese. Paba nyesequate ũquĩ ndese. Se abe achesequate ũquĩ ndese. Tachecua ñimbucha ũquĩ ndese, i que Jesús uchimbaaquiato je ra. 22 Judas, i que echimbaaquiato mo je ra. Judas Iscariote eã ño aque re. Judas mo ño aque re. Judas que ñee Jesús je ra. —¿Mbaerã nda erechecua ure je re? Mbia ja je nyecua rocoĩ, i que Judas ra. 23 Jesús que ñee ee ra. —Ae nyesequate quia serese, ũquĩ secheẽ mumbayãte quia ã. Paba abe ra nyesequate ũquĩ ndese. Paba ra siqui ũquĩ ndese. Se abe ra aico ũquĩ ndese. 24 Ae nyesequa eãte quia

serese, ũquĩ secheẽ mumba mumbate quia ã. Secheẽ ae eã asenei senei nguiã jẽje co. Paba cheẽ ño asenei senei nguiã jẽje. Ae chõ sembu nguiã.

25 Seso nonde aico co renei nenei jẽje a. Sereco mosebe jendese. 26 Paba ra Espiritu Turã mondo jẽje secheẽ ndui si. Jẽquiato tuchi ra Espiritu Turã cote. Ae ra jembaaquiato tuchi mbae ja rĩ cote. Ae ra jemundua tuchi secheẽ ndese cote. 27 Co aso quia co. Jẽyayã eã taemingo a. Seicuasa reã na si eã taemingo. ũquĩ nguia eya eãte riqui nguiã. Sã seyate se no. Eĩ tae jembia mingo a. ¡Jẽya bei chõ jẽ! ¡jẽsiquicheã ño jẽ! 28 Aso ra Paba rea cote. Aquere ra achube jembirõ. ũquĩ ndese que jẽirandu resẽ. Jenyesequa mose serese, eĩ ndei ra jẽyate secheẽ ndese. “Taso Paba rea”, i mose. Ae quiarei i tuchi sesi. 29 Seso nonde aico ñee tuchi jẽje a cote. “Ñee ñooñoã tuchi quia equia re”, janye tuchi ra seso mose cote. Huee ra jẽ seicua tuchi cote. 30 A nda aicobe ñee ñee jẽje chã. Diablo quia tu nguiã co. Mbia icuã nderecua ru quia co. Ae quiarei equirãcuã neã jiri sesi. 31 Paba cheẽ ndui si taico. Mbia seiquia arondete raque. “Nyesequa tuchi quia equia ngu rese re”, i ra mbia seje cote. Paba cheẽ mumbayã mose. Jẽhuã. Nyao, i que Jesús uchimbaaquiato je ra.

15

Jesús rei ira i rã

1 Jesús que ñeembe uchimbaaquiato je ra. —Se rei ira i rã. 2 Paba rei ira raarõsa rã. Ira rãquiã ndibisho ia eã mose, nyisia rae. Erãquiã ia mose, saarõ turã ndae. Mbeerera rera rae. Embitirõ sacua. Ia tuchi sacua cote. 3 Jẽ ngue secheẽ jẽisi turã ndesẽ. Nyebe Paba jembitirõ secheẽ je resẽ. 4 Jẽingo bei ñimbucha serese. Sã aico ñimbucha jendese no. Ira rãquiã ae ra ia eã. Siquiã mose ñimbucha hui rese. Eĩ janye ra jẽ. Mbae turã nda jẽsaã eã jẽ ae. Siquiã mose ñimbucha serese. 5 Se rei ira i rã. Erãquiã na ndei jẽ. Jẽingo mose ñimbucha serese,

seico mose ñimbucha jendese, jêturã tuchi ra jêingo cote. Jê ae ra mbae turã jêsaã eã, siquíã mose ñimbucha serese. ⁶ Ae siquíã ñimbucha serese nae, ùquí nda siqui ira rãquíã sia ji rã. Eiru mose ra mbia emunua nua. Eréi sacua. ⁷ Jêingo bei mose serese, jeñee nda amumbayã. “Mbae embu ure je”, i mose, amondo ra jêje. Jêtesareiã mose secheẽ si. ⁸ Jêingo turã mbei mose, mbia ra ñee turã turã mbei Paba rí. Jêingo turã mbei mose, “Jesús chimbaaquiatu tuchi quia eriqui re”, i ra mbia jeni. ⁹ Sã Paba riqui nyesequa serese nae, eĩ ae si equia nyesequa jendese co. Jêingo bei ñimbucha serese. Eĩ nda achesequa bei jendese. ¹⁰ Paba cheẽ amumbayãte quia co. Nyebe Paba riqui nguiã nyesequate serese co. Jê secheẽ mumbayã mose, achesequa bei tuchi ra jendese. ¹¹ Aico ñee jembaaquiatu co. Jembia sacua. Sã seyate se no, se rã si ra jêya.

¹² ã ndei secheẽ ã: ¡Jenyesequa tuchi quia jenyese jê! Sã aico nyesequa tuchi jendese no. ¹³ “Se tamano sequiato ribishorõ”, i mose emo, aque quiarei nyesequa tuchite uquiato rese. ¹⁴ Sequiato rei jê, secheẽ mumbayã mose. ¹⁵ “Serimba” aeã nda jêje cote. Ererequa quiatu “sequiato” i ãte nguiã ngũimba je. Ñee ja eãte ngũimba je. Sã eriqui ñee ja uquiato je no. Se quia ñi Paba cheẽ asenei senei jate nguiã jêje. Nyebe “sequiato” tae jêje cote. “Serimba” i rocoĩ. ¹⁶ Jê ngue seirabo eã ndesẽ. Se quiatu ngue jaẽirabo nguiã. ¡Mbae turã ño jêsaã saã mbei quia seje jê! ¡Jenyisaã nda uachĩ jê! Jê ngue seicuate. Nyebe jê “mbae mo embu ure je”, i mose Paba je, mondo ra jêje. ¹⁷ ã ndei secheẽ jêje ã: ¡Jenyesequa tuchi quia jenyese jê!

Mbia ataque Jesús rimba ucuayã

¹⁸ Dios icuasa reã nda jêucuayãte cote. ¡Jêicua quiatu jê! “Eĩ ngue equia Jesús ucuayã nyii resẽ”, jenye ra cote. ¹⁹ Jaẽirabo que se ra. Nyebe jêingo nguiã Dios icuasa reã na eã.

Nyebe eriqui nguiã jêucuayãte ã. Jê ùquí na mose, eĩ nda eriqui turãte rei jendese. ²⁰ Acheẽ ngue jêje nyii, ¡júquí ndese jendua jê! ¡Jengasu ra jêsaã saãchĩ sesi jê! Mbia icuã mose seje, jêje abe ra eicuã. Mbia secheẽ mumbayã mose, jê abe cheẽ mumbayã ndae. ²¹ Serí nda Dios icuasa reã jê jê jêje. Dios icuayãte quiatu nguiã ã. Nyebe ra eicuã icuãte jêje. ²² Achu que mbia mbaaquiatu quiatu ra. Nyebe ra Dios eicuã tea chooñoã cote. Eĩ nda Dios eicuã tea chooño ndei. Se embaaquiatu eã mose. “Ureicuã ureicuayãte quia ã”, i aronea ño emo cote re. ²³ Ae seucuayãte quia, Paba abe ucuayãte equia ã. ²⁴ Mbia mae sayã ngue ateacuquia tuchi rei ee ra. Sechisaã nda mbia mo saã eã. Eĩ nda Dios mbia icuã tea chooño ndei. Sechisaã ndese mae eã mose. Sechisaã ndese mae ndaque, seucuayã ño nguiã ã. Paba abe ucuayã ño nguiã ã. ²⁵ Mbia riqui seucuayãte ã. Sã embesa ji riqui ñee no: “Mbia seucuayãte. Se mbae icuã asaã eãte raque”, sã embesa ji riqui i no. Úquí ¡quechĩ cote. ²⁶ Seso mose Paba rea, Espiritu Turã tamondo jêje. Jêquiatorã. Ae ra tu Paba si jêje. Ae ra ñee ñooñoã jêje. Ae ra jembaaquiatu quiatu turã serí. ²⁷ Nyii mosenda bei chõ jêingo nguiã serese. Nyebe ra jê abe mbia jembaaquiatu quiatu turã serí, i que Jesús ra.

16

¹ Jesús que ñee i i uchimbaaquiatu je ra. —A aico ñee jêje a. Eĩ nda jêhui eã sesi, mbia icuã icuã mose jêje. ² Mbia ra jendiquisã quisã, jêso jêso mose mbia chumunuasa. “ã ureico rei nguiã mbae turã naa naa Dios je ã”, i ra mbia jêiquia iquia mose. ³ Seicuayãte quia ñe ne. Paba abe icuayãte quiatu nguiã ã. Nyebe ra eriqui mbae raã icuã icuã jêje. ⁴ Eĩ ae chõ nguiã ñee jêje co. Eĩ nda jendua secheẽ ndese, mbia icuã icuã mose jêje. “Jesús cheẽ ¡quechĩ cote”, jenye ra cote.

Espíritu Turã nda jembaaquiatsu quiatu, i Jesús

Acheẽ jei eã ngue jêje ùquĩ cose resẽ. Aicote quiatu ngue jendese re. ⁵ Co quia asote nguiã Paba rea co cote. Ae sembu. “¿Manguete ra ereso mangue re?” i eã ñochĩ jemo seje. ⁶ Se “taso” i mose jêje, jêya eãte chõ jêingochĩ nguiã ã. ⁷ Tacheẽ nyecua jêje. Coche aso nguiã jendecha co. Espiritu Turã nda ambu jêje. Jêquiatorã. Ae ra siqui jendese. Eĩ nda Espiritu Turã tuãte rei. Seso eã mose jêsi. ⁸ Espiritu Turã tu mose ra ñee ñee mbia je. “Mbia icuã ja chõ ñe ne. Jêingo turã Dios resa rae. Dios ra Jesús icuasa reã mbasi ja”, i ra Espiritu Turã ñee mbia mbaaquiatsu quiatu. ⁹ “Jê nguia Jesús jêicuayãte nguiã ã. Nyebe jêicuã ndiqui nguiã”, i ra Espiritu Turã ñee mbia mbiirandu. ¹⁰ Aso ra Paba rea cote. Mbia ra mae eãte serese cote. Nyebe ra Espiritu Turã mbia mundua mbae turã ndese cote. ¹¹ “Dios ra diablo mondo tata cuasu. Nyebe ra mbia icuã abe mondo tata cuasu”, i ra Espiritu Turã ñee mbia mbiirandu.

¹² “Taembaaquiatusube jiri”, ae rei se. Jêicuayã jeite chõ ndae. ¹³ Espiritu Turã tu mose, ae ra jembaaquiatsu quiatu turã mbae ja rese. Ñee ñooñoa tuchi rae. Ucheẽ ae ra esenei seneiã. Paba cheẽ ño esenei senei nguiã. Mbae tu nonde ra Espiritu Turã jembiiirandu erese. ¹⁴ Espiritu Turã nda jembaaquiatsu quiatu secheẽ ñi. Ùquĩ mose ra mbia ñee turã turã serĩ cote. ¹⁵ Ae Paba senei senei nguiã, ùquĩ asenei senei nguiã se abe co. Nyebe ra Espiritu Turã jembaaquiatsu quiatu secheẽ ñi.

Jêya eande nyii ra jêya tuchi cote, i Jesús

¹⁶ Namu jiri ra jemaẽ eã serese cote. Aquere ra jemaembe serese cote. Aso ra Paba rea, i que Jesús uchimbbaaquiatsu je ra. ¹⁷ Echimbbaaquiatsu que ñee ñee nyue ra. —¿Mbae i Jesús quia re? “Namu jiri ra jemaẽ eã serese cote. Aquere ra jemaembe serese cote.

Aso ra Paba rea”, i chõchĩ. ¿Mbae ùquĩ nde? ¹⁸ ¿Mbaerã eriqui “namu jiri” i re? ¿Mbae riĩ eriqui ñee nde? Nandeiranuã tuchichĩ, i que echimbbaaquiatsu ñee nyue ra. ¹⁹ Jesús que jirandu erese ra. —“Ndecheẽ embiasa jiri ure je” ¿jenye sete seje re? “Namu jiri ra jemaẽ eã serese cote. Aquere ra jemaembe serese cote”, ae que jêje, ¿aque jêicuayãte re? ²⁰ Tacheẽ nyecua jêje. Namu jiri ra jenyeseo. Jêya eãte rae. Sequiatoã nda eya tuchi. Aquere ra jêya tuchi cote no. Jêya eande nyii. ²¹ “Serasichĩ nda cote re”, i ra esi ndua ndua ãquẽ nyaacuquia serĩ mose. Eyayã tuchi ae. ãquẽ nyaacuquia mose cote, eya tuchi ra cote. Ndua eã tuchi ra ngasi rese cote. Eya tuchi chõ nda nguiirĩ ndese cote. ²² ãquẽ ndasi rã ño jê nde. Jêya eãte namu. Setube mose jendea, jêya tuchi ra cote. Emo nda jembia eã eã cote. ²³ “Ndecheẽ embiasa jiri ure je”, jenye eã nda seje cote. Tacheẽ nyecua jêje. Jê seicuate. Nyebe jê “mbae mo embu ure je”, i mose Paba je, mondo ra jêje. ²⁴ “Mbae mo embu ure je. Jesús icuasa je”, jenye eã mbeite equia Paba je ã. Jeñee ee. Jeñee mose ee, mondo ra jêje. Jêya tuchi ra cote.

Jesús quirãcua tuchi ibi jenda si re

²⁵ Acheẽ tuchi rei que jêje ra. Secheẽ ngue ambiasa tuchiã jiri jêje ra. Emo mose jiri quia ra secheẽ ambiasa tuchi jêje cote. Paba riĩ. ²⁶ Aque mose ra jeñee Paba je. “Mbae embu rã ure je”, jenye ra Paba je serĩ. Aque mose ra acheẽ eã ee jeni cote. Jê ae chõ nda jeñee ee cote. ²⁷ Paba sí nyesequa tuchite quia jendese co. Jenyesequate quiatu nguiã serese ã. “Dios que Jesús mondo nande je resẽ”, jenye quiatu nguiã seje ã. Nyebe Paba riqui nguiã nyesequa tuchi jendese. ²⁸ Paba si que achu íbii resẽ. Asobe ra ibi recha cote. Paba rea ra asobe íbátee cote, i que Jesús ñee uchimbbaaquiatsu je ra.

²⁹ Echimbaaquiatu que ñee ee ra. — Ereicochĩ ñee nyecuate ure je a cote. Ndecheẽ erembiasa tuchichĩ nguia ure je a cote. ³⁰ Mbae ereicua ja tuchi quiatu quia nde reaẽ. Mbia ndua ndua ereicuate quia equia co reaẽ. Ñee nonde ndeje. Nyebe ureico nguiã ndeicuate ã. “Paba si chõ erechu nguiã co”, ure equia ndeje ã, i que echimbaaquiatu ee ra. ³¹ Jesús que ñee ee cote ra. —Jẽ ngue seicuate rei nguiã. ³² Seandu rã se. Namu jiri ra jeñimbuchao chao oso sesi. Jẽso ja ra serecha namu. Se ae eã nda aico. Paba riqui nguiã serese co. ³³ Jẽ seicua mose, mbae ra jembia eã eã. Nyebe aico nguiã jembiirandu randu beite co. Mbia icuã icuã mbeite ra eriqui jẽje a íbii. ¡Jeñimbirãcuã jiri quia jẽ! Se quia sequirãcuã tuchi ibi jenda si re, i que Jesús ñee uchimbaaquiatu je ra.

17

Sechimbaaquiatu eteaquiatu, i Jesús Dios je

¹ Jesús ñee jare uchimbaaquiatu je que soboiba mae ibate ñee Dios je ra. —Paba, ndecheẽ ndiquichĩ io a cote. Seturã eteacuquia mbia je cote. Eĩ nda se abe ndeturã ateacuquia mbia je. ² Nde chõ ngue semii mbia rerecuarã, Paba. Mbia mingo bei sacuã. Mbia que ereme seje, ùquĩ mingo bei sacuã. Se rei nderucucha. ³ Paba, nde mii ndei Dios tuchi ereico co. Se rei Jesucristo ndechimbu ibate si. Ae ndeicuate quia nae, se abe icua equia nae, ùquĩ nda siqui bei. ⁴ Ndeturã ngue ateacuquia mbia je ra. “Ã esaã íbii”, ere que seje, ùquĩ ngue asaã ja cote ra. ⁵ Paba, seturã eteacuquiabe mbia je. Cose ndare rã. Mbae eã mosenda rã. Aso be ra siqui nderese. MSã ndeturã ereteacuquia mbia je nae, seturã abe eteacuquia mbia je.

⁶ Mbia que ereme seje, ùquĩ ngue ambiirandu tuchi nderese ra. Nembae rei que nyii ra. Ereme seje cote ra. Ndecheẽ ngue emumbayã nda. ⁷ Nde chõ ngue sembaaquiatu

quiatu nguiã, Paba. Ndecheẽ ae chõ ã nde. Secheẽ eã ño ñe ne. Ùquĩ ngue sechimbaaquiatu icuate ra. ⁸ Eresenei senei ngue seje, ùquĩ ngue asenei senei ja ee ra. Nandecheẽ ngue eisi ja turãte ra. “Paba si que Jesús ru ra. Paba que embu ra”, i equia nderiã ã. ⁹ Sechimbaaquiatu eteaquiatu, Paba. Seicua se reã je eã ño aico nguiã “eteaquiatu” i ndeje. Ae ereme seje nae, ùquĩ je chõ aico nguiã “eteaquiatu” i ndeje. Nderimbate quia ñe ne. ¹⁰ Ae nderimba nae, serimba chõ se abe re. Ae serimba nae, nderimba chõ ùquĩ no nde. Serimba riqui ñee turã mbei seriã ã. ¹¹ Aso be ra ndeje, Paba. A ra aicoã íbii cote. Serimba quia ra chichõ íbii. Eteaquiatu, Paba. Ae ereme seje, ùquĩ eteaquiatu ndequirãcuã je. Mbae mii ndese ja chõ emundua ndua mingo. Sã nande nandendua ndua mbae mii ndese no nae. ¹² Ae ereme seje, ùquĩ ngue ateaquiatu quiatu quia ndequirãcuã je ra. Seico mose íbii. Emo ngue quiachã eãte sesi ra. Aque mii nda quiachã. Embesa ji cheẽ ndui si ra aque mii quiachã. Huicua je. Emo ngue quiachãya cote ra. ¹³ Aso ra nderea cote. Seico bebe mose íbii, aico ñee ñee ndeje serimba riã a. I nda eya quiatu chi a. Sã seyate se no. ¹⁴ Ndecheẽ ngue asenei senei ee ra. Ibi jenda eã ño se re. Serimba abe rei ibi jenda eã. Nyebe ibi jenda riqui nguiã serimba ucuayã. ¹⁵ “Serimba erao ibi si”, ae eã ño nguiã ndeje co, Paba. “Eteaquiatu diablu si”, ae chõ nguiã ndeje co. ¹⁶ Se rã si rei serimba. Ibi jenda eã ndiqui ã. ¹⁷ Serimba emingo tuchi icúe nembraerã. Ndecheẽ je emingo icúe. Nde quia erecheẽ ñooño eãte nguiã. ¹⁸ Sã nde sembu mbia je no, ei ae si chõ nguiã serimba mondo mondo mbia mbaaquiatu quiatu co. ¹⁹ Aico ñimondo tuchi ndeje co, Paba. Mano sacuã serimba je. I nda serimba abe ñimondo tuchi ndeje.

²⁰ ã nii achõ eã aico ñee ndeje. “Eteaquiatu” i ndeje. ã nda secheẽ

senei senei emo je abe cote. Ûquĩ abe ra seicua cote. Serimbarã. Ae ra seicua icua nae, ùquĩ abe eteaquiatsu. ²¹ Mbae mĩ ndese ja chõ ùquĩ emundua ndua mingo. Mbae mĩ naanguia tuchi emingo nanderese, Paba. Sã ereico serese no nae. Sã aico nderese no nae. Eĩ nyere si ùquĩ mingo mbae mĩ na. Eĩ nda mbia seicuasa reã ñee serĩ. “Dios chimbu quia eriqui re”, i nda mbia ñee serĩ ña. Seicuasa siqui mose mbae mĩ ndese. ²² Ndeturã ngue ereme seje, eĩ ae que seturã mondo seicuasa je ra. Eĩ nda eriqui mbae mĩ na. Sã nandeico mbae mĩ na nande no, Paba. ²³ Nyebe aico nguiã seicuasa rese co. Nde ereico serese co no. Nyebe seicuasa riqui mbae mĩ na co. Eĩ nda seicuasa reã ñee nderĩ. “Dios quia Jesús mbu quia reaẽ. Dios quia nyesequa quia Jesús icuasa rese re. Jesús rese rã si nyesequa”, i nda mbia ñee nderĩ ña. ²⁴ Paba, serimbarã ngue ereme seje. Ae ra aso, sã echoi serea siqui bei huee serese cote. Ndecheẽ turã andu sacua serĩ huee. Erecheẽ turã mbeite serĩ. Ibi eã mosenda bei chõ ereico nguiã nyesequa serese co. ²⁵ Ndeturã tuchi, Paba. Seicuasa reã ndeicuayãte quia ã. Se quia areicuate nguiã co. Serimba abe que ndeicuate quia ã no nda. “Dios chimbu”, i seje nderĩ. ²⁶ Arerenei nenei tuchi que serimba je ra. Tarerenei nenei tuchi be ee. Eĩ nda nyesequa tuchi nyiese. Sã ereico nyesequa tuchi serese no nae. Taico bei serimba rese cote, i que Jesús Dios je ra.

18

Mbia icuã ngaẽ Jesús ruruchoi

¹ Jesús ñeende ngu je que echoi ama ñetẽ ndobei ra. Cedrón, i que aque ama je ra. Aque robei que esi uchimbaaquiatsu rese ra. Iraqui turã mo ngue echoi ra. ² Jesús que oso oso beite quia huee ra. Iraqui re. Uchimbaaquiatsu rese. Nyebe Judas riqui nguiã hue icuate. —Jesús tateacuquia checuayã mbia je, i que

Judas ra. ³ Nyebe Judas mbia ruruchoi nguiã huee Jesús isi sacua. Soldados que ecuruchoi ra. Policía jenda abe que ecuruchoi no nda. Sacerdotes rerequa chimondo rei policía. Fariseos chimondo abe no. Ûquĩ ja que nyoĩ ngasẽ Jesús je ra. Tiquise que ecuruchoi quia ra. Lámparas abe no. Mbae rendi abe no. ⁴ Jesús que mbae icuate ra. —Mbia ra jeĩ jeĩ seje, i que eicuate ra. —¿Aba rea jenyu quia co re? i que oso ñee ee ra. ⁵ —Jesús rea urechu quia co. Nazaret jenda, i que mbia ñee nda. —Se chõ Jesús resẽ, i que ee ra. Judas abe que siqui mbia rese huee ra. Ae que siqui Jesús mee mbia icuã je huee ra. ⁶ —Se chõ Jesús resẽ, i mose que mbia siri siri choi uquite quitu ra. Ngoi ngoi chee que echoi ra. ⁷ —¿Aba rea jenyu quia co re? ibe que Jesús ñee ee ra. —Jesús rea urechu quia co, i que ra. ⁸ Jesús que ñeembe ee ra. —“Se chõ nyeresẽ”, ae que jẽje. Serequa mose, sererao se ae. Sã seresenda chichõ, i que Jesús ee ra. ⁹ —Ae Paba mee seje serimbarã, ùquĩ mo quiachãyãte sesi, i que Jesús nyii ra. Nyebe ñee nguiã mbia je cote. —Sã seresenda chichõ, i mbia je cote. ¹⁰ Simón Pedro que uchuuru siqui tiquise ra. Sacerdote rerequa rimba rese que tiquise rereque requia ra. Eisa que echisia equiatocuti quitinda ra. Malco, i que aque je ra. Ae isa Pedro chisia. ¹¹ Jesús que ñee Pedro je ra. —Ndechuuru emingue chõ eriru ye. Paba cheẽ tamumbayã na. Tachecuachõ na mbia je. Sã mbia icuã sembasi tuchi cote, i que Jesús Pedro je ra.

¹² Soldados que Jesús isi cote ra. Soldados rerequa rese. Policía rese. Ûquĩ ja que Jesús isi ra. Nyucua que suruchoi ra. ¹³ Anás chuchua rane ngue eruruchoi ra. Anás ndiirĩ ngue Caifás ninisi ra. Caifás que sacerdote rerequa aque mose ra. ¹⁴ Caifás sí quia que ñee nyii ra. —Aque mĩ ño nda mano nguiã nande ja je chã, i que judíos je nyii ra.

Jesús aicuayãte, ichõiño Pedro

¹⁵ Mbia Jesús ruruchoi mose que Simón Pedro nyoï erui ra. Jesús chimbaaquiatu nongue rese. Co mii ndese. Enongue que sacerdote rerecua icua ra. Nyebe ique oso nguiã Jesús rui. Sacerdote rerecua itaicuee. ¹⁶ Mbia que Pedro siquisã mii etaronda robei ra. Sacerdote chucua que tu nyebi ñee echiquesa raarõsa je cote ra. —Sã Pedro ique rã serese, i que ra. Nyebe emingue nguiã cote. ¹⁷ Echiquesa raarõsa que ñee Pedro je ra. —¿Jesús resenda nde re? i que nyucuaaque Pedro je ra. Echiquesa raarõsa. —Tei, ichõiño ngue Pedro ee ra. ¹⁸ Nyiiseïte mose que ra. Nyebe policia jenda tata mbucha nguiã. Sacerdote rimba rese. Uqui ja que chi nyee ra. Pedro que chi nyee erese ra.

Sacerdote rerecua ñee Jesús je

¹⁹ Sacerdote rerecua que ñee Jesús je ra. —¿Aba ndechimbaaquiatu re? ¿Mbae rii ereico mbia mbaaquiatu quiatu re? i que ererecua ra. ²⁰ Jesús que ñee ee ra. —Se que acheë ja mbia resa rae ra. Mbia chumunua nuásaa ja que aico mbia mbaaquiatu quiatu ra. Dios chuchúaa abe no. Acheë nyecuayã cuayã eã ngue se quia mbia ísaa ra. ²¹ ¿Mbaerã ereico ñee seje re? Secheë andusa je quia echeë. Sã uqui ñee. Mbae rii acheë ee re. Uqui ngue secheë ñandu ja quia ra, i que Jesús ererecua je ra. ²² Jesús cheë mose que policia jenda mo ucua eritii rese ra. —¿Mbaerã ereico ñee sacerdote rerecua je uqui nde? i que policia mo ñee ucua Jesús rese ra. ²³ Jesús que ñee ee ra. —Secheë icuã mose quia echeë seje. Mbae icuã nii aico ñee nde. Secheë turã mose chõ eracuachi nguiã serese, i que Jesús ee ra. ²⁴ Anás que Jesús mondo Caifás je cote ra. Ecuasa que ecuruchoi Caifás je ra. Caifás que sacerdote rerecua ra.

Jesús aicuayãte, i si Pedro

²⁵ Pedro que nyee beite u tata ra. Mbia mo ngue ñee ee ra. —¿Jesús resenda nde re? i ee. —Tei, ichõiño ngue Pedro ee ra. ²⁶ Ae isa Pedro

chisia nae, aque resenda que siqui huee ra. Sacerdote rerecua rimba chõ ae re. Ae que ñee Pedro je ra. —Nde rese amae iraqi re Jesús rese reae, i que Pedro je ra. ²⁷ —Tei, ichõiño ngue Pedro ee no nda. Aque mose tuchi que nguira ñee cote ra.

Pilato ñee Jesús je

²⁸ Policia jenda que Jesús curuchoi Caifás chuchua si cote ra. Ererecua tuchi chuchúaa que eruruchoi cote ra. Pretorio, i que hue tuchia je ra. I que nyaashí u quia cote ra. Judíos que iqueã ererecua chuchua ra. Mbaeiaete que abae chuchua ee ra. Pascua raã nonde. —Ei nda oveja roo nandeuãte rei pascua mose, ique mose abae chuchua, i que ra. ²⁹ Nyebe Pilato si nguiã usë ñee ee. —¿Mbaerã jëingo ñee Jesús je re? ¿Mbae icuã esaã nde? i que Pilato ra. ³⁰ Mbia que ñee ee ra. —Jesús que mbae icuã saã saãte ra. Ei nda uremondoãte rei ndeje. Mbae icuã naa naa eã mose, i que mbia Pilato je ra. ³¹ Pilato que ñee mbia je ra. —Jë ae Jesús jendao ae. Jë ae jëingo erese ae. Jë ae Jesús jembasi mbasi ae. Jenamei ñimbasa mumba mose, i que Pilato ee ra. Judíos que ñee Pilato je ra. —Ure rei judíos. Ure mbia mo ureiquia aroneate. Nde chõ echb ë. “Jëiquia” ere chõ soldados je, i que mbia ñee Pilato je ra. ³² Jesús cheë iquechí cote. —Mbia ra sei quia sembucha ira rese, i rei nyii. Echeë iquechí cote.

³³ Pilato que ique si oso uchuchúaa ra. Ae “quiatuchu” i nguiã Jesús je. —¿Judíos rerecua tuchi nde re? i que Pilato Jesús je ra. ³⁴ Jesús que ñee ee ra. —¿Nde ae erecheë nguia seje a re? Emo ñee ndeje nyii reae, i que Jesús ee ra. ³⁵ Pilato que ñee ee ra. —Judío eã ño se resë. Judíos sí chõ ngue nemondo seje resë. Sacerdote rerecua abe no. ¿Mbae icuã eresaã nde? i que Pilato ra. ³⁶ Jesús que ñee ee ra. —Ererecua raque se. Ererecua eã ño se a íbii re. Ei nda serimba nyarõ tuchi rei serese, judíos ndiquisã quisã tuchi sesi. Ibi jenda rerecua eã ño

se re, i que Jesús Pilato je ra. ³⁷ — ¿Ererecua rei nde re? i si que Pilato ñee Jesús je ra. Jesús que ñeembe ee ra. —Ae. Achu que íbii ra. Sechusua rei íbii. Achu que mbia mbiirandu randu Dios cheẽ nã nda. Ichõĩñosa reã ñee nã. Ichõĩñosa reã ndesenda ra seandu ja, i que Jesús Pilato je ra. ³⁸ —¿Mbae ichõĩñosa reã nde? i que Pilato ee ra.

Jesús jembucha iquia ira rese, i ererecua

Aquere que Pilato usẽ si oso ñee judíos je ra. —Mbae icuã Jesús saã eãt e reae. ³⁹ Pascua mose bei que aico etarõ ji mbusẽ mondo bei jẽje ra. ¿Aba ra ambulẽ mondo jẽje namo nde? ¿Judíos rerecua ra ambulẽ mondo jẽje re? i que Pilato ñee mbia je Jesús rã nda. ⁴⁰ Mbia que ñee mombo mombo ja Pilato je ra. —Tei. Aque eã. Barrabás quia embusẽ imbu ure je, i ja que mbia ñee nda. Mbae mbuquiachãsa tuchi rei Barrabás.

19

¹ —Jesús jẽiruã nua, i que Pilato ra. Mbia que Jesús iruã nua cote ra. ² Nyu ritiméi uma ji que soldados mii Jesús ãquĩ ndese ra. Tiru ireĩ ngue emingue ee ra. ³ —Judíos rerecua tuchi chõ nde re, ichõĩño ngue soldados ucua ucua Jesús rese ra. ⁴ Pilato que usẽ si oso ñee mbia je ra. —Secheẽ jeñandu rã. Acheẽ ndei que Jesús je ra. Mbae icuã esaã eãte reae. Nyebe anosembe nguiã jẽje co, i que Pilato ra. ⁵ Jesús que econosẽ mbia je ra. Nyu ritiméi uma ji que equerao quia uãquĩ ndese ra. Tiru ireĩ ngue equerao quia nguete rese ra. —A Jesús a resẽ, i que Pilato Jesús ndeacuquia mbia je ra. ⁶ Sacerdote rerecua que chi ja huee ra. Policía jenda mo abe que chi huee ra. Ûquĩ ja que ñee mombo mombo Pilato je ra. —¡Embucha ira rese! ¡Embucha ira rese! i ja que ñee mombo mombo ee ra. Pilato que ñee ee ra. —Jẽ ño jembucha ira rese ae. Mbae icuã esaã eã arõte seje, i que Pilato mbia je ra. ⁷ Judíos que ñee Pilato je cote ra. —“Dios rucucha rei se”, ichĩ Jesús

nguiã. Nyebe eiquia. Sã embesa ji riqui i no: “Ae Dios ririã saã saã nguiã, aque jẽiquia”, i que embesa ji ra, i que judíos ñee Pilato je ra. ⁸ —Dios rucucha, i mose que Pilato siquiche tuchi cote ra. ⁹ Pilato que ique si oso ñee Jesús je ra. —¿Ma jenda rei nde re? i que Pilato Jesús je ra. Jesús que ñee eã tuchi echeẽ mose ra. ¹⁰ Pilato que ñee si ee ra. —¿Mbaerã ereico ñee ãte secheẽ mose re? Arembucha arõte ira rese. Arembui abe arõte se. Se chi mbia rerecua, i que Pilato ñee Jesús je ra. ¹¹ Jesús que ñee Pilato je ra. —Dios nemii eã mose mbia rerecuarã, ei nda ereoco ãte rei serese. Ae semondo ndeje, ae quiarei eicuã tuchi ndesi, i que Jesús ee ra.

¹² Aque mose bei que Pilato ndua ndua Jesús rese ra. —Jesús tambui mondo, i raque ndua ndua. Judíos quiatu que ñee ee ra. —Nya. ¡Erembui chĩ nda jẽ! Nde embui mose, César quiato eã nda nde cote. “Ererecua rei se”, i quia ñi Jesús re. Nyebe eicuãte riqui nguiã César je, i que judíos tasẽ tasẽ Pilato je ra. ¹³⁻¹⁴ Judíos cheẽ andu mose que Pilato ngoi ngũenda tose ra. Huee que eriqui ñee mbeite mbia je ra. Gábata, i que erenda je ra. “Sita mbiitee ji”, i ñi Gábata re. —Jesús jendu rã seje, i que Pilato policía jenda je cote ra. Pascua nonde. Mbia ico quiatu mose pascua nonde. Tenda nandeite re mose. —A jenderecua ñi a resẽ, i que Pilato mbia je ra. ¹⁵ Mbia que tasẽ tasẽ ee ra. —¡Eiquia rei! ¡Embucha ira rese! i que mbia Pilato je ra. —¿Se ra jenderecua aiquia re? i que Pilato mbia je ra. —Urererecua mo eãte nyeresẽ. César mii ño nyeresẽ, i que sacerdote rerecua Pilato je ra. ¹⁶ Aque mose que Pilato Jesús mondo mbia je cote ra. —Jẽiquia. Jembucha ira rese, i que mbia je ra. Hue si que mbia Jesús ruruchoi cote ra.

Mbia Jesús mbucha ira rese cote

¹⁷ Jesús que usẽ oso cruz resebe cote ra. Mbia que ecuruchoi ibi ibátee ra. “Eresa cuare” i que hue ibi ibate je ra. “Gólgota” i que judío cheẽ hue

je ra. ¹⁸ Huee que soldados Jesús mbucha ira rese ra. mbia nyeremo abe que embucha ira rese ra. Co mii Jesús ribisho quiti. Enongue eribisho quiti no. Jesús que emii eite re ra. ¹⁹ Pilato que letrero mbesa ra. JESUS DE NAZARET REI JUDIOS RERECUA, i que embesa ra. Embesa ji que emii ibate Jesús ãquĩ nguiti ra. ²⁰ Judíos tubiriã ngue chi mae embesa ji rese ra. Sucha tubiriã jiite quiatu ngue Jesús mbucha nguiã ira rese. Embesa ji que chí mbia cheẽ mbuae jaaja ra. Judío cheẽ. Griego cheẽ. Latín ñee. ²¹ Sacerdotes rerecua que ñee ja Pilato je ra. —“Judíos rerecua” erechĩ nguiã embesa. “Judios rerecua raã ñooño” ere chõ embesa mii ae, i rei que judíos rerecua Pilato je ra. ²² — Ae ambesa, sã ãquĩ ñi ño, i que Pilato judíos rerecua je ra.

²³ Cuatro soldados que chi huee ra. ãquĩ ngue Jesús mbucha ira rese ra. ãquĩ ngue Jesús irao isirõ sirõ ja ra. Jesús irao mii ngue chichõ cote ra. Tejido turã tuchi que aque tiru ra. Eiasa eã tuchi que ra. Eao ji chõ eresebe que ra. ²⁴ Soldados que ñee nyue ra. —Aque ra nandechisia eã. Sita ñetẽ nandesurubaba baba rã nandechue. Aba ra ja. Aba ra eirao querao ja, i que nyue ra. Sita ñetẽ ngue esurubaba baba uchue cote ra. Embesa ji cheẽ iquechĩ cote. Jesús irao soldados mbuchao chao mose. “Seirao que embuchao chao nyue ra. Sita ñetẽ ngue esurubaba baba uchue ra”, i que embesa ji huĩ nyii ra. Embesa ji iquechĩ cote.

²⁵ Jesús mbuchasa ira rese que cuña mo chi ra. Jesús si que ra. Esí nongue abe que ra. María Magdalena abe que ra. Cleofas ninisi abe que ra. María, i que aque je ra. ãquĩ ngue chi ja Jesús ji ra. ²⁶ Juan abe que chi Jesús si ji ra. Jesús mae mose usi rese que ñee ee ra. —Taĩ, aque quia nderiirina cote, i usi je. Juan nii eriqui ñee. Jesuubi tuchi quia ñi Juan nde. ²⁷ —Aque ndesirã cote, i que Juan je cote ra. Juan ngue Jesús si querao bei uchuchua cote ra.

Jesús mano cote

²⁸ —Achimbirãcuã tuchi que mbae ja je Dios cheẽ nguire ra, i que Jesús uchiangui re cote ra. —Seisei, i cote. ²⁹ Vinagre mo ngue chí mbae mo ye huee ra. Mbia que esponja monde vinagre ye ra. Mondo que Jesús chúruu ra. ³⁰ Jesús que vinagre mocõ esponja resenda cote ra. —Dios cheẽ ngue asaã ja cote ra, i que Jesús ra. Uãquĩ ngue embucheseco cote ra. Mano ngue cote ra.

Soldado Jesús cúa chiõ tiquise je

³¹ Judíos que ñee nyue ra. —Ae embucha ji chi ira rese nae, sã ãquĩ chiã ira rese pascua mose huee, i que mbia ra. Pascua nonde que embucha ira rese ra. Mbia icoquiato mose pascua nonde. Mbia chumunuasa tuchi quiarei pascua. Sábado mose rei pascua. Nyebe mbia ñee nguiã Pilato je. —Sã soldados ira resenda timasiquio ja jẽ. Eĩ nda mano jei. Eĩ nda soldados ecuruchi sábado nonde, i que judíos Pilato je ra. ³² Soldados que nyoĩ ira resenda tima ndiquio ra. Ae chi Jesús rereco chobei. ³³ Ngasẽ mose Jesús je, eraaquete que ee ra. Nyebe etima ndiquio eã nguiã. ³⁴ Soldado mo ngue Jesús cúa chiõ tiquise je ra. Eruqui que uchẽ nda. Eri abe que uchẽ nda. ³⁵ Nyebe aico nguiã ã mbesa mbesa a. Amae jee ngue erese re. Acheẽ ñooñoã se quia a. Eĩ nda jẽ abe “ae bei jẽ” jenyee Jesús rii. ³⁶ Embesa ji cheẽ ngue ique cote ra. Jesús tima ndiquio eã mose. —Etima nda mbia siquio eã, i que embesa ji nyii ra. ³⁷ —Ae embucha uquia ira rese nae, ãquĩ nda mae si erese, i abe que embesa ji huĩ nyii no nda.

Jesús ruruchoi eraaque atisa

³⁸ José de Arimatea, i que emo je ra. Jesús rimba checuayã ngue ae ra. —Sã judíos jiranuã serese, i que equia uchiangui re ra. Ae que “Jesús rete embu seje” i Pilato je ra. Pilato que “eno” i ee ra. José que Jesús rete curuchi ira si cote ra. Ae equerao nguiã. ³⁹ Nicodemo

abe que tu erea ra. Ae tu ñee Jesús je isa nyii nae, aque. Aque que tu aba mbushimbusera tubiriã tuchi reru ra. Eraaque mbaerã ndei aba mbushimbusera. Ira shimbu turã mbucúi ji. Mbae a mbucúi ji abe no. ⁴⁰ Ñquĩ ja que Jesús rete querao cote ra. José. Nicodemo ndese. Aba mbushimbusera resebe que eraaque uma uma tiru je ra. Eĩ mbei que judíos quia mbia raaque je ra. Eati nonde. ⁴¹ Jesús iquiasa rurubi que sita imi mo ñi nda. Eao ramo ji. Mbia raaque mondosa eã nyii. ⁴² Huee que Jesús raaque nduruchoi nyati ra. —Cochite quia sábado ru nguiã nande je co, i que eati aichi chõ nda.

20

Jesús quera si

¹ Domingo mose que María Magdalena nyoĩ mae Jesús tãsa rese ra. Nyaasĩ nonde. Jesús atiquia nduruba ji que chi sita ra. ² Nyebe echoi nguiã uchã ñee Simón Pedro mbiirandu. Jesús chimbaaquiato nongue abe mbiirandu. Ae Jesús quiato tuchi nae, aque. —Aba chõ nandererecua raaque sirõ suruchoi. Mangue eno mangue reae, i que María Magdalena nda. ³ Nyebe Pedro si nguiã ea tiquia rea. Uquiato rese. ⁴ Nyoĩ ja que uchã nda. Enongue rane ngue Pedro chucua oso ngasẽ nda. ⁵ Nyibi que mae Jesús atiquia rese ra. I que Jesús umanda achõ u tiru ra. Ique tuchiã ngue oso sita imi ni nda. ⁶ Aquere que Simón Pedro ngasẽ cote ra. Ae quiato que ique oso sita imi ni nda. Ae abe que mae Jesús umanda achõ ndese cote ra. ⁷ Eãquĩ umanda rese abe que mae nda. Tiru ataque rese ja eã ngue eãquĩ umanda chi ra. Eacua ji que chi icue ra. ⁸ Ae rane ngasẽ nguiã nyii nae, aque abe que ique tuchi oso sita imi ni cote ra. Mae tuchi que Jesús oreã ndese cote ra. —Jesús quera chõ nguiã re, i que eicua cote ra. ⁹ Ñquĩ ngue embesa ji icuayãte ra. “Jesús ra quera si”, i que eicuayãte ra. ¹⁰ Nyebi si que echoi uchuchúaa ra.

Jesús nyecua María Magdalena je

¹¹ María que chiño nyeseo eatiquia jii ra. Echeseo que nyibi mae Jesús rua rese ra. ¹² Angeles mo ngue chi huee nyeremo ee ra. Eiraoshĩ ja que chi ee ra. Enongue que chĩ ngoi Jesús ãquĩ ndúa quitu ra. Enongue ecuii rúa quitu no. ¹³ Angeles que ñee María je ra. —¿Mbaerã ereico nyeseo re? i que María je ra. —Aba chõ sererecua raaque querao. Nyebe aico nguiã nyeseo. Mangue chõ eriqui ererequia mangue, i que María ra. ¹⁴ Ucheẽ nduibe que mae ndei uquite quitu ra. I que Jesús uã ee ra. Icuã eãte que ra. ¹⁵ —¿Mbaerã ereico nyeseo re? ¿Aba eresequia quia re? i que Jesús María je ra. Ira a raarõsa Jesús riqui reĩ nguiã María je. Nyebe María ñee nguiã ee. —¿Nde Jesús raaque ererao re? ¿Mangue erechono mangue re? Taso erea ae. Tarao ae, i que María ra. ¹⁶ Jesús que “María” i María cheẽ mose ra. María que uba tuchi Jesús icua cote ra. Judíos cheẽ ño ngue María ñee Jesús je ra. —Raboni, i que ra. —Sembaaquiatusa, i ñee Jesús icua re. ¹⁷ Jesús que ñee María je ra. ¡Seisi jeichĩ nda re! ¡Aso ãte Paba rea resẽ! Eso rã ñee senongue je. “Jesús que ñee jẽje ra. ‘Aso ra ibate Paba rea. Dios rea. Ae abe chõ jendu re. Huee ra aso’, i que Jesús ñee jẽje ra”, ere rã senongue je, i que Jesús ñee María je ra.

Jesús nyecua uchimbbaaquiato je

¹⁸ María Magdalena que oso Jesús chimbaaquiato mbiirandu ra. — Amaechĩ Jesús rese, i que ee ra. Jesús cheẽ ngue esenei ja ee ra. ¹⁹ Aque mose que domingo ra. Aque isa que Jesús chimbaaquiato chi ñumunua nda. Etaronda matã ji que chĩ nda. Siquichete quia judíos si re. Jesús que oso ique uchimbbaaquiato mbuate ra. Eite re que esi ñee ee ra. —¡Jẽya eãte jirichĩ nda jẽ! i que Jesús ñee ee ra. ²⁰ Aquere que Jesús o iõsa reacuquia ee ra. Ucuã iõsa abe no. Echimbbaaquiato ía tuchi que mae Jesús rese ra. ²¹ Jesús que ñee si ee ra.

—jĕya eãte jirichĩ nda jĕ! Sã ñi Paba sembu no, eĩ tae si jemondo secheẽ nenei nenei sacua mbia je, i que Jesús uchimbaaquiatu je ra. ²² Jesús que uchimbaaquiatu ichu ñee nda. —Espíritu Turã ndu jĕje a cote, i que eichu ra. ²³ —“Dios chõ jĕicua mbutiã nguiã jĕsi co”, jenyemose emo je, Dios ra ũquĩ icua mbutiã esi cote. “Dios chõ jĕicua mbutiã eã nguiã jĕsi co”, jenyemose emo je, Dios ra ũquĩ icua mbutiã eã esi, i que Jesús ra.

Tomás mae Jesús quera si rese

²⁴ Tomás oreãte que Jesús nyecua mose uchimbaaquiatu je ra. Jesús chimbaaquiatu raque Tomás. Eata, i que Tomás je ra. ²⁵ —Jesús rese que uremae nda, i que eataque embiirandu ra. Tomás que ñee nda. —Jesús eã ndei e. Se mae eã mose eo iõsa rese, se ocoã mose eo iõsa rese, se ocoã mose ecua iõsa rese, “nyia” aeã nda se, i que Tomás ñee nda. ²⁶ Jesús chimbaaquiatu que ñumunua si domingo nongue mose ra. Tomás abe que siqui uataque rese huee cote ra. Etaronda matã ji que chĩ nda. Jesús que ique oso ra. Eite re que esi ñee ee ra. —jĕya eãte jirichĩ nda jĕ! i que ee ra. ²⁷ Ñee ngue Tomás je cote ra. —jSã seo jĕ! Seo iõsa rese eco. Secua iõsa rese abe eco ae. “Jesús quera si eãte” jere sichĩ nda jĕ! “Jesús que quera si ra”, ere chõ cote, i que Jesús ñee Tomás je ra. ²⁸ —Sererecua. Nde rei sembae Dios, i que Tomás Jesús icua cote ra. ²⁹ Jesús que ñee Tomás je ra. —Nde mae mose serese, aque mose chõ seicuachĩ. Mae eã mose serese chõ ngue emo ndiqui seicua ra. ũquĩ nguiarei eya tuchi ndesi, i que Jesús ee ra.

Je Jesús icua sacua ño co ambesa nguiã jĕje

³⁰ Jesús que mbia mae sayã saã saã tuchi uchimbaaquiatu je ra. ũquĩ ambesa ja eã nguia a. ³¹ ã nguia ambesa ja quia a. Jĕ Jesús icua sacua.

—Jesús rei Cristo. Jesús rei Dios rucucha, jenyemose nda chã. ũquĩ icua mose ra jĕingo bei.

21

Jesús nyecua siete uchimbaaquiatu je

¹ Aquere que Jesús nyecua si uchimbaaquiatu je ra. Ama nimia ndese que eñi nda. Tiberias, i que aque ama ndisa je ra. Eĩ ngue Jesús uã nyecua ee ra. ² Echimbaaquiatu que chi nyiese ra. Simón Pedro. Tomás ndese. Ae je eriqui “Eata” i. Natanael ndese. Caná de Galilea jenda rei Natanael. Zebedeo riirĩ abe que chi ra. Echimbaaquiatu nongue abe que chi nyeremo no nda. ³ —Taso rã sira rea, i que Simón Pedro ra. —Ure abe ra ureso nderese, i que eataque ee ra. Nyoi ja rei que sira rea ra. Nyui ja que echoi canoa ye ra. Sira que embua mbua eãte aque isa ra.

⁴ Jesús que chĩ erimia ndese echimbaaquiatu je ra. Jesús eã eriqui rei nguiã ee. ⁵ —¿Sira mo jembua re, Áquẽ? i que Jesús ñee mombo ee ra. —Tei, i que echimbaaquiatu ee ra. Jesús icua rocoĩ. ⁶ —Sira mbua mbuasa jenduba canoa quiato cuti. Sira ra jembua cote, i que Jesús ee ra. Jesús cheẽ ngue emumbayã nda. Sira que ua jate embua mbuasa ye cote ra. —Nandenosẽ ama si. Nandechuchã canoa ye, i rei que ra. Eusite que ee ra. ⁷ Ae Jesús quiatote, aque que ñee nda. —Jesús chõ eriqui re, i que uataque je ra. Pedro eandu mose que huĩrao mingue asi oso ii ra. Jesús rea. Sira mbua mbua nonde quia huĩrao mbui nguiã nyii. ⁸ Isho tuchiã ngue ama nimia nda. Cien metros chõ ngue ra. Pedro ataque que canoa querao ama nimia ndichã nda. Sira mbua mbuasa que ecuruchoi quia mbutiriri sira resebe ra.

⁹ Nguichi que canoa si ibi rĩ cote ra. I que tata u ee ra. Sira miĩ ngue chi tata rĩ ee ra. Mbichae abe que chi ra. ¹⁰ —Sira mo jendu rã. Ae jembua ramo, i que Jesús uchimbaaquiatu je

ra. ¹¹ Simón Pedro que nyui oso canoa ye ra. Sira mbua mbuasa que embutiriri serao sonosẽ ama nimia ndese cote ra. Embisẽ sira resebe. Sira mbua mbuasa que soroãte enonosẽ mose ra. Sira cuasu achõte raque. Sira ¹² 153 raque. ¹² —Jenyu quiaru cote, i que Jesús ee ra. —¿Aba nde re? i ãte que emo ñee ireĩ nguĩã ee ra. Mbia que Jesús icua jate ra. ¹³ Jesús que oso tãtaa cote ra. Mbichae que esirõ nda. Mbuchao chao que uchimbaaquiatu je ra. Sira abe que embuchao chao ee ra. ¹⁴ Jesús que mano nyii ra. Quera si que ra. Nyecua nyecua que uchimbaaquiatu je cote ra. Co rei tercera vez co.

Jesús ñee Pedro je

¹⁵ Quiaru jare que Jesús ñee Simón Pedro je ra. Jonas ndiirĩ ndei Simón Pedro. —Simón, ¿erechesequa tuchi quia serese ã si re? i que Jesús Pedro je ra. —Ae. Achesecua tuchite sequia nderese co resẽ. Seicuate se resẽ, i que Pedro ñee ee ra. —Oveja raarõsa rã eico no. Seicuasa embaaquiatu quiatu quia secheẽ je no, i que Jesús Pedro je ra. ¹⁶ —Simón, ¿erechesequate quia serese re? i si que Jesús ñee Pedro je ra. Pedro que ñee ee ra. —Ae. Achesecua tuchite sequia nderese co resẽ. Seicuate se resẽ, i si que Pedro ñee ee ra. —Oveja raarõsa rã eico no. Seicuasa esaarõ turã nguia no, i que Jesús Pedro je ra. ¹⁷ —Simón, ¿erechesequate quia serese re? i si que Jesús ñee Pedro je ra. Co que tercera vez cote ra. Jesús ñee tres veces mose que Pedro ía eã tuchi ra. Pedro que ñee ee cote ra. —Mbae ereicua jate quia co, Sererecua. Achesecua tuchite sequia nderese co resẽ, i que Pedro ñee Jesús je ra. —Oveja raarõsa rã eico no. Seicuasa esaarõ turã nguia no. ¹⁸ Tacheẽ nyecua ndeje, Pedro. Ndeyasu mose que ereico ndeirao mingue oso ngata chooño ndesose quitu ra. Nde amei mose ra ndechiba ereira cote. Mbia ra ndecua cote. Ndeso sere ãsa quitu ra mbia nderuruchoi cote, i que Jesús

Pedro je cote ra. ¹⁹ —Eĩ nda mbia Pedro iquia, i chõ Jesús re. —Eĩ nda Pedro Dios quirãcuã ndeacuquia mbia je, i chõ Jesús re. —Eico serui, i que Jesús Pedro je cote ra.

Ae uchimbaaquiatu rese Jesús nyesequa tuchi

²⁰ Pedro que uba mae serese cote ra. Se rei Juan. Jesús nyesequa tuchi rei se. Se chõ ngue acoi huĩ quiaru Jesús jii aque isa resẽ. Se chõ ngue “¿Aba ra neme mbia icuã je re?” ae Jesús je resẽ. ²¹ Pedro que mae serese cote ra. Ñee ngue Jesús je cote ra. —¿Mañi ite ra mbia quia Juan je re? i que Pedro Jesús je ra. ²² Jesús que ñee ee ra. —¿Mbaete ere? Serui chõ eicochõ nde. “Sechube mose chee ra Juan manoã”, se i mose, manoã ndae. Eico chõ serui nde, i que Jesús Pedro je ra. ²³ —Juan nda manoã mbeichĩ nde, i que Jesús icuasa Juan nii cote ra. Jesús cheẽ abi chõchĩ. —Juan nda manoã, ire rocoĩ Jesús nyii. —Se cheẽ mose ra manoã, i chõ ndei ngue Jesús re. —Juan nda manoã, i ãte que Jesús ra.

Juan ñimbese hui bei

²⁴ Jesús chimbaaquiatu chõ se re. Se chõ ã ambesa ja nguĩã. Amae jate que se quia Jesús chisaã ndese ra. Acheẽ ñooño eãte se quia ã mbesa mbesa co. ²⁵ Jesús chisaã saã tubiriãte quia ñene. Ambesa ja aroneãte quia a. Jesús chisaã saã mbesa ja mose, eĩ ndei ra papel mbesa ji mbia recua mbiitayã jate. Amén.

LOS HECHOS DE LOS APOSTOLES

Espíritu Turã nda tu, ¡ Jesús

¹⁻² Ambesa que ndeje nyii, Teófilo. Arembiirandu ja que Jesús chiao rese. Eresco mose íbii. Jesús que mbia mbaaquiato quiato ereco mose íbii ra. Dios que equerao bei jiri ibate cote ra. Ñquĩ ngue asenei senei ndeje nyii ra. Oso nonde ibate que ucheẽ nenei nenei sacua irabo ra. Uchiirabo que embaaquiato quiato ra. Siqui que Espíritu Turã ndese mbia mbaaquiato quiato ra. Eaquiato que esecha oso ibate cote ra. ³ Manonde que eru si nyecua ñquĩ je ra. Oso nonde ibate. Ngucco que eteacuquia cuquia si ee ra. Cuarenta días que eriqui nyecua nyecua bei uchi mbaaquiato je ra. Dios rese que eriqui embiirandu randu ra. Dios rei ererecua tuchi. Ae rĩ eriqui embiirandu randu. ⁴ Jesús oso nonde ibate que eriqui ñee ñee uchimbaaquiato je ra. —¡Jẽsochĩ nda sucha tubiriã si jẽ! ¡Jẽsochĩ nda Jerusalén si jẽ! ¡Paba cheẽ nguire jengu Espíritu Turã ndaarõ aa jẽ! “Espíritu Turã tamondo jẽje”, i que Paba jẽje ra. Aque rĩ ngue acheẽ jẽje nyii resẽ, i que Jesús ee ra. ⁵ —I je que Juan bautizar i mbia je ra. Namo jiri ra Espíritu Turã ndu. Ae ra ique jeñiangui re. Eĩ nda Espíritu Turã bautizar i jẽje. I je eã cote. Espíritu Turã nda ique chõ jeñiangui re cote, i que Jesús uchimbaaquiato je ra.

Jesús oso ibate

⁶ Emo mose que Jesús chimbaaquiato ñee ee ra. Jesús oso nonde ibate. —¿Manose ra urererecua ishonda erembutiã ure si re? Israel jenda rei ure. ¿Namo nda ure mo eremii urererecuarã nde? i que mbia Jesús je ra. ⁷ Jesús que ñee ee ra. —Manose chõ ndae. Paba mii eicua. Mbia eicuayã. Jẽ nguia jẽicuayãte nguia no. Manosete chõ ndae. ⁸ ¡Co rese

chõ jendua jẽ! Espíritu Turã nda tu jẽje cote. Ae ra jembuquirãcuã. Ae ra jembucheẽ ñee serĩ. Jẽ nda jẽingo serenei nenei tuchi cote. Serenei nenei Jerusalén jenda je. Judea jenda je abe no. Samaria jenda je abe no. Mbia mangue choõnoa jenda ja je abe no. Ñquĩ ja je jẽingo serenei nenei, i que Jesús ra. ⁹ Ñeende que Jesús si ibate cote ra. Uchimbaaquiato resa rae que esi erecha ra. Ibeishĩ ngue embuchecuayã cote ra. ¹⁰ Echimbaaquiato que soboiba bei u mae ibei rese ra. Ibei rese mae mose que mbia nyeremo ngaẽ erea ra. Ibate si. Huee que echi ra. Eiraoshĩ tuchi que ngaẽ ejii ra. ¹¹ Ibatenda que ñee ee ra. —Galilea jenda, ¿mbaerã jengu beite mae ibei rese a re? Jesús oso quia ibate nae, ae si ra tube no. Jemae ngue u eso rese nae, eĩ si ra u íbii no, i que ibatenda ee ra.

Dios que Matías irabo ra

¹² Jesús chimbaaquiato que nyoĩ nyebi hue recha ra. Monte de los Olivos recha. Nyoĩ que sucha tubiriã Jerusalén cote ra. Aichi jiri. Monte de los Olivos rei Jerusalén ndurubi. ¹³ Ngasẽ ngue Jerusalén nda. Nyoĩ que uchuchúaa cote ra. ã ja que ra. Pedro. Juan. Jacobo. Andrés. Felipe. Tomás. Bartolomé. Mateo. Alfeo riirĩ. Jacobo, i ee. Simón el Cananista. Judas. Jacobo riirĩ ndei Judas. ¹⁴ Ñquĩ ja que ñumunua mbei bei quia ñee ñee Dios je ra. Ari abe no. Acuanĩ abe no. María abe no. Jesús si rei María. Jesús nongue abe no. Ñquĩ ja que ñumunua mbei bei quia ñee ñee Dios je ra.

¹⁵ Emo jiri mose que Jesús icuasa ñumunua ja ra. Ciento veinte que ra. Pedro que uã ñee ee ra. ¹⁶ —Seandu rã se, Seresenda. ¡Sã embesa ji ñee ñooño eã ño jẽ! Cose que Espíritu Turã ñee Judas rĩ nda. David que embesa Espíritu Turã ñee nguire ra. Judas rĩ. Judas rei Jesús reacuquiasa mbia icuã je. Jesús rerao nonde iquia. ¹⁷ Jesús que Judas irabo rei nyii ra. Nandere-senda cuã. Nyebe rei Judas nandere-senda nyii. ¹⁸ Judas que mbae isiquia

isi icuã nda. Mbae isiquia je que ibi mo isi ra. Hue ereco mose que mano nda. Ibate si eru ngoi mano. Uãquĩ nguiti que eru ngoi ra. Erie que oo ra. Echique mburiri. ¹⁹ Jerusalén jenda que jirandu ja erese ra. Acéldama, i que hue ibi je cote ra. Mbia ruqui rua, i chõ nguiã hue je. Ecoisa ibi je. ²⁰ I ñi embesa ji Salmos nde:

Sã echuchua oreã mbei.

Sã mbia mo ndiquiã mbei equi re.

Sã eriquicharomba riqui Dios cheë nenei nenei cote,

i que embesa ji Judas rĩ nda. ²¹ Emo nandeirabo Judas riquicharõ. Mbia chi bei quia nanderese nae. Jesús nandembaaquiату quiату bei mose.

²² Juan mbia mbiirandu randu mosenda bei. Dios Jesús querao chee quia ibate. Ae siqui beite quia nanderese nae, ãquĩ mo nandeirabo nanderesendacuã. Jesús quera rese mbia mbiirandu randu sacuã, Judas riquicharõ, i que Pedro ñee ee ra.

²³ Mbia nyeremo ngue etea cote ra. José Justo, i emo je. Barsabás, i abe ee no. Matías, i enongue je.

²⁴ Jesús chimbaaquiату que ñee Dios je cote ra. —Urererecua, aba chiã ereicuate quia co. ã nyeremo ndiquiã. ¿Aba ndechiirabo re? ¿Aba ereirabo urembirõ sacuã nde? ²⁵ ¿Aba eretea ndechimbaaquiатubirá nde? ¿Aba eretea Judas riquicharõ nde? Ae hui quia ndecheë si. Ae oso quiachã ndesi cote. ¿Aba eretea eriquicharõ nde? i que Dios je ra. ²⁶ Sita que embaba mbaba o ye cote ra. —¿Aba Dios chiirabo re? i ñene. Eĩ ngue Matías irabo ra. Dios que Matías mingo Jesús chimbaaquiату rese cote ra. Mbia once mbirõ. Docerã. Doce que Jesús chimbaaquiату cote ra.

2

Espíritu Turã tu Jesús icuasa je

¹ Fiesta de Pentecostés mose que Jesús icuasa chi ja ñumunua nda. Hue mii ngue echi ja ñumunua nda. ² Ibei rieu que embuate ra. Ama ndieu raanguia. Tuchua mbieu tuchi Jesús

icuasa je. ³ Tata rendi raanguia que tungiuchi eãquĩ ndes e ra. Jesús icuasa ãquĩ ja rese. ⁴ Espiritu Turã ngue ique tuchi hue jenda chiangui re ra. Ique ja que Jesús icuasa chiangui re ra. Mbia que echeë ata mo saã saã cote ra. Echeë uchianuã ngue esaã saã nda. Espiritu Turã nguia rei embucheë echeemo. Mbia cheë mbuae jaaja que cote ra.

⁵ Aque mose que judíos tubiriã nyi Jerusalén nda. Ishonda tubiriã nyi huee. Mangue chooñoa jenda ja chõ chi nguiã huee. ãquĩ ndei Dios cheë mumbasa reã judíos ataque rã si.

⁶ Ibei rieu andu mose que ãquĩ ngãe uchã nda. Nyuruira tuchi eandu. Jesús resenda mbia cheë mbuae saã saã ja chõchĩ nguiã u. Espiritu Turã ño ngue embucheë nguiã. Mbiamo ñee icuasa reã ndaque. Mbia que ucheë ñandu ñandu ja u ra. Jesús icuasa ñee mose. Nyebe que mbia chi nguiã nyuruira eandu. ⁷ Mbia nyuruira ja eandu. —¿Mañi equia mbiamo ñee icua ja re? Galilea jenda achõ ño ndaque ã, i tuchi que mbia u nyuruira eandu ra. ⁸⁻¹¹ —¿Mañi equia nande ja cheë naa naa ã nde? Nandechë Jesús icuasa saã jaaja chõchĩ nguiã ã. Partia jenda cheë esaã saã ñochĩ nguiã ã. Media jenda cheë abe no. Elam jenda cheë abe no. Mesopotami a jenda cheë abe no. Judea jenda cheë abe no. Capadocia jenda cheë abe no. Ponto jenda cheë abe no. Asia jenda cheë abe no. Frigia jenda cheë abe no. Panfilia jenda cheë abe no. Egipto jenda cheë abe no. Libia jenda cheë abe no. (Cirene ndobei.) Roma jenda cheë abe no. (Roma jenda mo ndei judíos. Roma jenda ataque rei judíos eã.) Creta jenda cheë abe no. Arabia jenda cheë abe no. Jesús icuasa ãquĩ ñee saã saã ja chõchĩ nguiã ã. Nandechë esaã saã ja chõchĩ nguiã ã. Jesús icuasa riquichĩ nandechë naa naa tuchi Dios chiao turã nenei nenei ã, i ja que mbia ucheë andu jaaja mose. ¹² I jate que mbia u nyuruira eandu ra. Ndua ndua tuchi que u

eandu ra. —Mañi equia ñee ã nde, i nyue. Jesús icuasa mbia cheẽ mbuae naa naa mose. ¹³ Emo emo ngue ñee icuã icuã Jesús icuasa je ra. — Quiacua chõ eriqui nguiã ã, i raque Jesús icuasa rĩĩ.

Pedro ñee mbia je

¹⁴ Pedro que uã ñee mbia je cote ra. Nguesenda once rese que echi uã ñee mbia je ra. Tasẽ jiri ñee ee. —¡Seandu ja u jẽ! Tacheẽ jẽje, Jerusalén jenda. Judea jenda abe no. ¹⁵ ¿Quiacua reĩ Jesús icuasa riqui jẽje re? Quiacua eã ño ñene. Tenda que nyui ramote resẽ. Mbua quiacuasa eã ño huee tenda resẽ. ¹⁶ ã niĩ ngue Joel embesa mbesa cose ra. Dios cheẽ mbuchecua que embesa ã niĩ nda. Eĩ ngue embesa ra: ¹⁷ “Mbae ua jiri mos e ra Espiritu Turã amondo mbia ja je”, i que Dios ra.

“Jendiirĩ nda secheẽ mbuchecua mbia je.

Acuanĩndu ra serea rea tuchi cuu.

Amei abe ra serea rea cuu no.

¹⁸ Aque mose ra Espiritu Turã amondo serimba ja je.

Serimba ra secheẽ mbuchecua checua mbia je.

¹⁹ Mbua mae sayã nda asaã saã ibi rĩ no.

Eruqui rese ra mbia mae no.

Tata rese ra mbia mae no.

Tatashĩ ndese ra mbia mae no.

²⁰ Mbua rerecua tu nonde ra tenda ñimoo.

Eruqui rã nda nyasi mbia rerecua tu nonde”, i que Dios ra.

²¹ “Ndeya eã ño serese, Sererecua”, i mose emo ñee Dios je, aque ra Dios sirõ eicuã si,

i que Joel embesa ra. ²² Israel jenda, ¡seandu rã! Nazaret jenda rĩĩ aico ñee ñee jẽje a. Jesús rĩĩ. Dios que Jesús mbuquirãcuã tuchi ra. Nyebe que Jesús mbia mae sayã saã saã nda. Ñquĩ ndese que jemaẽ nda. ²³ “Mbua icuã nda seriirĩ iquia”, i que Dios Jesús mano nonde ra. Jẽ nguia Jesús jẽiquia tuchi nguia cote. Jẽ nguia jemee nguia mbia icuã je. Eiquia nonde. Dios rane ngue jirandu Jesús rese ra.

“Mbua icuã nda Jesús iquia”, i que Dios quia nyii ra. ²⁴ Dios que Jesús mbuquera si ra. Jesús mano mbei aroneãte. ²⁵ David que Jesús cheẽ senei cose ra. ã ngue ñee nda:

Sererecua riqui sembui eã mbei co.

Eriqui bei serese co.

Mbae riqui sembusiquiche aroneãte co.

²⁶ Nyebe seya tuchi riqui co.

Nyebe aico ñee turãte Dios rĩĩ co.

Semano mose abe ra Dios hui eã mbei sesi.

²⁷ Seaingue ra eresechayã semano mose, Sererecua.

Serete abe ra erembuquera si mingo.

Ndechesequate aico co.

²⁸ Semingosa tuchi rei nde.

Sereco mose nderese ra seya tuchi, i que David Jesús cheẽ nenei cose ra.

²⁹ Tacheẽ nyecua jẽje, Seresenda.

Nanderu David que mano cose resẽ. Mbua que echati resẽ. Eatisa nandeicua ja quia co resẽ. ³⁰ David rei Dios cheẽ mbuchecua. Dios que ñee ee ra. “Nderiirĩ mo nda Cristo. Ae ra mbia rerecuarã tuchi.

Nderiquicharõ nda mbia rerecuabi tuchi”, i que Dios David je cose ra.

“Dios ñee ñooñoa tuchi chõ nguia”, i que David ra. ³¹ David que Dios cheẽ icuate quia ra. Nyebe que ñee Jesús rĩĩ nda. “Seaingue ra eresechayã semano mose. Serete ra erembuquera si mingo”, nyebe David i nguia Jesús rĩĩ. ³² Dios que Jesús mbuquera si ra. Ñquĩ ureicua ja quia ã. Nyebe ureico nguia jembiiirandu randu ñquĩ ndese ã. ³³ Dios que Jesús querao ibate nyiese ra. Dios jii eriqui pee cote. Dios que Espiritu Turã mee Jesús je cote ra. Ucheẽ nguire que emee ee ra. Jesús riqui Espiritu Turã mondo ure je co. ã Espiritu Turã nyisaã jeñandu ñandu quia ã. Espiritu Turã ndiqui ã mbucheẽ mbia mo ñee ã. ³⁴⁻³⁵ David osoã ibate aque mose. Jesús rĩĩ ngue David embesa ra. ã ngue embesa ra:

Dios que ñee sererecua je ra. “Ecoi seji. Nde abe ra ererecua serese.

Ae ndeucuayãte quia nae, ùquĩ je ra ndequirãcuã ateacuquia tuchi. Ndequirãcuã tuchi ra ùquĩ si”, i que Dios sererecua je ra, i que David embesa mbesa ra. ³⁶ Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguia, ae si rei Jesús. Jesús rese tẽirandu ja, Israel jenda, i que Pedro ñee ocote ra.

³⁷ Mbia ia eã tuchi te que Pedro cheẽ andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiato ja je. ³⁸ Pedro que echeẽ sibishorõ nda. —¡Jẽicuã si jẽhui rã jẽ! Sã bautizar ure jẽje Jesucristo rĩ. Dios jẽicuã mbutiã sacuã. Aquere ra Dios Espiritu Turã mondo jẽje. ³⁹ “Espiritu Turã nda amondo jẽje. Jendiirĩ je abe ra amondo. Ishonda je abe ra amondo. Sechiirabo ja je ra Espiritu Turã amondo”, i que Dios ñee nande je ra, i que Pedro Dios cheẽ nenei nda. ⁴⁰ Eĩ ngue Pedro ñee ocote mbia je ra. Ñee turã ngue ee ra. —Mbia icuã achõte eriqui ibi jenda ã. Quiachã ja equia Dios si ã. Ùquĩ si jẽhui chõ. Jẽ abe jẽquiachãyã sacuã Dios si, i que Pedro mbia mbaaquiato ra. ⁴¹ —¡Ae beite jẽ! i que mbia tubiriã Pedro cheẽ andu ra. Ùquĩ j e que bautizar i ra. Aque mose que mbia tres mil Jesús isi ra. ⁴² Ùquĩ abe que ñumunua nua nguia Jesús quiato ataque rese ra. Jesús chimbaaquiato ñee ñee mose mbia je. Ñumunua nua ñee Dios je. Eturã mbei que eriqui nyue ra. Mbichae que eu eu quia ndua ndua Jesús rese ra.

Jesús icuasa siqui turã nyue

⁴³ Mbia que siquiche ja Dios si ra. Jesús chimbaaquiato que Dios mbuquirãcuã nda. Nyebe mbia mae sayã naa naa tuchi nguia. ⁴⁴ Jesús icuasa que ñumunua nua mbei quia ra. Abei tuchi que eriqui nyue ra. ⁴⁵ Umbae je que eriqui vender i tuchi ra. Mbae isiquia que emee mee nguia mbaecha reã je cote ra. ⁴⁶ Ñumunua

nua mbei que equia Dios chuchúaa ra. Quiaru quiaru que equia nyiese uchuchúaa ra. Dios rĩ ngue eriqui ñee turã turã nyue ra. Eya tuchi que eriqui Dios rese ra. ⁴⁷ Dios rĩ ngue eriqui ñee turã turã nda. Mbia ataque que ñee turã turã nguia Jesús icuasa rĩ nda. Jesús icuasa que Dios mbeta mbeta bei quia ra.

3

Ecuatayã mbucherõ

¹ Emo mose que Pedro nyoĩ quia Dios chuchúaa ra. Juan ndese. Tenda nyeseco mose. Hue tenda bei que mbia riqui ñee ñee Dios je ra. ² Huee que amei mo ngatayã ndiqui bei huee ra. Echaacuquia mosenda bei eiquieĩ icuã. Mbia que ecuruchoĩ choĩ bei quia huee ra. Dios chuchúaa. Eiquesa turã, i que hue eiquesa je ra. Huee que eriqui ecuatayã mĩ mĩ mbei eiquesa jii ra. Ache ache i sacuã mbia ique mose Dios chuchúaa. ³ Dios chuchúaa nda Pedro ique nguia Juan ndese chã. Ecuatayã ngue mae erese ache ache i ee ra. ⁴ Pedro que nguesa mbui reã mae erese ra. Juan abe. —¡Ure rese emae jẽ! i ecuatayã je. ⁵ Eandu mose que mae erese ra. —Mbae mo nda emee seje reae, i mae nguiatu erese. ⁶ Pedro que ñee ee ra. —Mbae isiquia eã ndaque sembae. Mbae mo nda asaã ndeje. Jesucristo quirãcuã nembucherõ na mbucua. Ehuã na ngata. Nazaret jenda quirãcuã nembucherõ na, i que Pedro ee ra. ⁷ Pedro que eo isi ra. Mua ngue eo rese ra. Aque mosebe que ei nyerõ nda. Eiquieĩ abe nyerõ eo isi ruibe. ⁸ Ecuatayã ngue juã asi cote ra. Ngata cuata que ra. Ique Dios chuchúaa ùquĩ ndese. Eya tuchi que ra. Oo oo tuchi que ra. Ianye, i tuchi que equia Dios je ra. ⁹ Mbia que mae ja u ecuatayã ngata rese ra. Ñee turã mose Dios je que mbia nyiisaquia u echeẽ ndese ra. ¹⁰ Mbia que nyuruira u mae erese ra. Mbia que eicua ja ra. —Ecuatayã ño aque re. Ache ache i beite que equia Dios chuchúaa, ae chõ co re, i

que mbia nyuruira tuchi mae erese ra.

Pedro ñee oco judíos je

¹¹ Embucherō ji que Pedro chiba isi isi quia ra. Juan chiba abe no. Mbia que ngaē ucha mae erese ra. Nyuruira erea. Portal de Salomón, i eiquesa je. Huee que echi ra. ¹² Pedro que mae mbia chumunua ndese ra. Ñee ngue ee ra. — ¿Mbaerã jëingo nyuruirate mae erese re, Israel jenda? ¿Mbaerã jëingo nyurui rate mae urerese re? Ure ae eã ño Ecuatayã urembucherō nguiã. Urequirãcuã eã Ecuatayã mbucuata nguiã. Dios quiarei uquiracuã mee ee embucherō. Urecuata turã embucherō eã nguiã. ¹³ Dios rei nanderu rerecua bei. Abraham. Isaac. Jacob. Ũquĩ nderecua bei Dios. Dios ñee turã mbei nguiirĩ ñi. Jesús rĩ. Ae que jemee icuã mbia je eiquia sacua nda. “Jesús tambui”, i mose Pilato, ũquĩ mose que jëisi quiatu quiatu chõchĩ nguiã. ¹⁴ “Embui”, jenye eã ñochĩ ngue Jesús turã ñi nde. “Embui”, jenye chõchĩ ngue mbia iquiasa rĩ nde. ¹⁵ Eĩ jenye chõchĩ ngue mbia mingosa iquia nguiã. Dios que embuquera si ra. Equera si rese que uremae nda. Ñ ureico mbia mbjirandu randu equera rese ã. ¹⁶ Ñ jengu mae Ecuatayã ndese ã. Jë Ecuatayã jëicuate resë. Jendesa rae que Dios embucherō nda. Ure Jesús ureicuate quia ã. Nyebe Ecuatayã mbuquirãcuã nguiã.

¹⁷ Jëaquiatuã ño Jesús jëiquia nguiã, Seresenda. Jenderecua aquiatuã ño Jesús iquia nguiã no. ¹⁸ Dios quia que ucheẽ mbuchecuada mbucheẽ cose ra. Cristo rĩ embucheẽ. “Mbia icuã icuã nda Cristo je. Cristo mbasi mbasi rae”, i que embuchecuada cose ra. Ũquĩ ñee nguire quia Cristo mbasi mbasi nguiã cote. ¹⁹ Jëicuã si jëhui chõ jë! Jemba rã Dios icha cuti. Dios jëicuã mbutiã sacua. Eĩ jenye mose ra Dios jembiate cote. ²⁰ Dios ra Jesucristo mbuquichi imbu cote. Ae que emi jenderecua rã cos e ra.

²¹ Namu ño nda Jesús riquichõ ibate. Dios mbae mbitirõ ja mose ra eru cote. Eĩ ngue Dios cheẽ mbuchecuada ñiinda ñee nda. ²² Nyebe Moisés ñee nguiã nanderu cose ndare je. “Dios ra nanderesenda mo isi. Dios cheẽ mbuchecua sacua. ¡Ae cheẽ nda jemumba jirichĩ jë! ²³ Echeẽ mumbasa ra Dios mbuquiachã nyesi”, i que Moisés ñee nda. ²⁴ Dios cheẽ mbuchecuada ja que mbia mbiirandu randu mbae rĩ nda. Ae riqui nyecua namo ã cote. Samuel nane ngue mbia mbiirandu randu ã ñi nda. Samuel nduinda ja abe que embiirandu randu ã ñi no nda. ²⁵ Jëje chõ Dios cheẽ mbuchecuada ñee ñee nguiã. “Seturãte ra jendiirĩ ja je”, i que Dios ñee nanderu ñiinda je ra. Jëje abe Dios ñee. Ucheẽ nda embuchebi eã. Dios que ñee Abraham je cose ra. “Nderiirĩ mo nda mbia mbia ja tuchi quia. Ibi jenda ra embia ja tuchi”, i que Dios Abraham je ra. ²⁶ Dios que nguiirĩ mondo íbii cote ra. Jë nane je que embu ra. Jembuturã sacua. Jëhui sacua jëicuã si, i que Pedro judíos je ra.

4

Ererecua paama i ja Pedro je, Juan abe je

¹ Sacerdotes que ngaē cote ra. Pedro ñee mbei mose mbia je. Juan abe ñee mose ee. Dios chuchua raarõsa abe que tu erese huee ra. Saduceos mo abe que ngaē erese huee ra. ² Ũquĩ paama i ja Pedro je. Juan abe je. Mbia mbaaquiatu quiatu mose chõ ngue paama i ra. — Jesús que quera si manonde ra. Eĩ nda mbia abe quera si, i que Pedro ee nyii ra. Nyebe ũquĩ ndiqui nguiã paama i ee. ³ Nyebe eisi suruchoi nguiã policiaa. Eresaitõ ño emingue nguiã tarõ. — Isamami nguia nda nandechandu nguiã, i que ererecua nyue ra. ⁴ Mbia tubiriã Dios cheẽ ñandu erenei nenei mose. Eatate que Jesús icua ra. Jesús icuasa rei cinco mil hombres.

⁵ Isamami ngue mbia tubiriã ñumunua nda. Judíos rerecua que

ngaẽ ñumunua huee ra. Amei abe que ngaẽ ñumunua erese ra. Embesasa abe que ngaẽ ñumunua erese no nda. Ûquí ja que ñumunua Jerusalén nda. ⁶ Anás abe que chí erese ra. Ae rei sacerdote rerecua. Caifás abe que chí erese ra. Juan abe no. Alejandro abe no. Sacerdotes nducucha ja que chí ñimbaacua ra. ⁷ Pedro que emi mbia ite re ra. Juan ndese. Mbia ñee ee cote. —¿Aba jembirãcuã nde? ¿Aba jembirãcuã nguia ecuatayã mbucuata nonde re? i que ee ra. ⁸ Espíritu Turã ngue Pedro mbucheẽ cote ra. —Tacheẽ jêje, mbia rerecua. Tacheẽ jê abe je, Amei. ⁹ “Ecuatayã ndese urembiirandu rã”, jenyê chõ nguia ure je ã. “¿Aba jembirãcuã ecuatayã mbucherõ nonde re?” jenyê chõ nguia ure je ã. ¹⁰ Tacheẽ nyecua jêje. Sã mbia ureandu ja. Sã Israel jenda ureandu ja. A ecuatayã embucherõ ji riqui jendesa rae a. Jesucristo quirãcuã nguiarei embucherõ. Aque sí quirãcuã ño ñene. Ae jêiquia. Ae jembucha ira rese. Ae Dios mbuquera si. Aque quirãcuã ño ñene. Nazaret jenda quirãcuã. ¹¹ ðhuaẽ nandechirirõ na ño Jesús re. Sañi nandeco mae mae ðhuae nandechirirõ ndese no. “Aque chõ ndei que eturã nda”, sañi nandeco erirõ i no. Eĩ nyee ra mbia Jesús ndiichã i no. Mbia ra eisi tuchi nguerecarã cote. Jesús momboi isi. Eisire rocoĩ nyii. ¹² Aba mo eã ndei nanderirõsa nandecuã si. Jesús ae nanderirõ nguia nandecuã si. Dios aba mo abe mbu eã nguia mbia rirõ sacua huicuã si. Jesús ae ñene, i que Pedro ra.

¹³ Mbia rerecua nyuruira Pedro cheẽ andu. —¿Mbaerã eriqui siquicheãte ñee nde? Papel ndesenda eã ndaque. Mbia ataque rã ño ndaque, i que ererecua nyue ra. Pedro rĩ. Juan ñi. —Jesús resenda quia eriqui reaẽ. Nyebe eriqui siquicheãte ñee nde, i nyue cote. ¹⁴ Hue que embucherõ ji riqui huee ra. Nyebe mbia rerecua ñee icuã

aroneate erĩ. ¹⁵ Ererecua ñee ja cote. —Sã Pedro choi usẽ taicuee. Juan abe no. Nandechẽ nandechue nande ae, i que ererecua nyue ra. ¹⁶ —¿Mañi nande ra Pedro je re? ¿Mañi nande ra Juan abe je re no? Pedro chimbucherõ ndese mbia riqui jirandu randu jate ã. Jerusalén jenda riqui jirandu randu jate ã no. “Mbucheroã ngue ra”, nande aroneate. ¹⁷ Nandembusiquiche rã no. Ñee ñee siã nda equia Jesús rĩ ña. Mbia nda jiranua nguia mámbi chã. Jesús rese chã. “¡Jesús cheẽ nda jẽsenei senei sichĩ jê!” nande rã ee, i que ererecua nyue ra. ¹⁸ —Jenyu, i Pedro je cote. Juan abe je. —¿Mbia ra jembaaquiatuchi Jesús rĩ jê! ¡Jesús ra jẽsenei seneichi mbia mo je jê! i rei que ee ra. ¹⁹ Pedro que echeẽ sibishorõ nda. Juan ndese. —¿Aba cheẽ nguia ra aba mumbayã nguia re? ¿Jẽnee nguiatu ra aba mumbayã nguia re? Dios cheẽ aba mumba aroneate. ¿i jêje re? ²⁰ ¿Mañi nda aba umaesa reneia nde? ¿Mañi nda aba uchiandu abe reneia ne no? i que Pedro ee ra. Juan abe. ²¹ Ererecua ñee icuã Pedro je. Juan abe je. —Nandembusiquiche nandechesi, i raque. Hui chõ ngue esi cote ra. Embasiã mondo cote. Ererecua ireite mbia tubiriã si. Nyebe eiruã nuã eã nguia. Pedro ecuatayã mbucherõ mose mbia ñee turã turã ño nguia Dios rĩ neaẽ. Nyebe ererecua ireite riqui nguia esi. ²² Ae Dios mbucherõ nae, aque amei. Cuarenta años que ae ra.

Urembusiquicheã, i equiato Dios je

²³ Mbia rerecua hui ja Pedro si. Juan abe si. Nyoĩ nguesenda mbiirandu ja mbia rerecua cheẽ ndese. Amei ñee ndese. Sacerdotes cheẽ ndese. Nguesenda mbiirandu ja. ²⁴ Eresenda eandu mose que ñee ja Dios je ra. Ñee nyecha ee. —Dios, urererecua tuchi nde. Nde rei mbae aosa. Ibei aosa. Ibi aosa. Ama abe aosa no. ²⁵ Sã David erembucheẽ nderimba cose no. Sã eĩ erembucheẽ no:

¿Mbaerã ño mbia pare pare i ja re?
 ¿Mbaerã mbia riqui ndua ndua
 chõõnote mbae mo ndese re?
 26 Ibi jenda rerecua ja rei eicuã Dios
 je.

Mbia rerecua ja ñumunua icuã Dios je.
 Ñumunua icuã ja eriirí abe je no.
 Cristo je,

sã David i cose no. 27 Eĩ si tuchi mbia
 rerecua quia ñumunua icuã Jesús je
 co. Nderiirí turã je co. Herodes.
 Poncio Pilato. Judíos. Judíos eã
 abe no. Ñquĩ ja que siqui icuã icuã
 nguia Jesús je ra. Ndechiirabo raque
 Jesús. 28 Eĩ ere que ñee cose, eĩ si
 eicuã nguia ã namo. 29 Echiisaquia
 echeẽ icuã ndese, Urererecua. Nan-
 dembusiquiche, i tuchi equia ure
 rĩ ã. Urembusiquicheã na, Ure-
 rerecua. Urembusiquicheã ndecheẽ
 nenei nenei sacua. 30 Ndequirãcuã
 embu ure je. Mbia rasi mbucherõ
 cherõ sacua. Mbia mae sayã naa naa
 sacua. Jesús rĩ. Nderiirí turã ñi, i
 que Pedro resenda ñee nyecha Dios
 je ra. 31 Ñeende Dios je que ibi nyere
 ee ra. Ñumunuásaa que ibi nyere
 mbia je ra. Espíritu Turã ngue ique
 tuchi echianguí re ra. Esiquicheãte
 que mbia mbiirandu randu Dios cheẽ
 ndese cote ra.

Jesús quiato abeichiã eã

32 Hue rĩ ja Jesús icuasa ndua ndua
 checha. Eicuasa tubiriã. Ndua ndua
 ja. —Sembae ae chõ co re, i eã
 emo umbae je. —Nandembaerã
 ja chõ ã nde, i umbae ja je nyue.
 33 Jesús chi mbaaquiato que mbia
 mbiirandu randu tuchi Jesús quera
 resera. Jesús que uquirãcuã mee mee
 nguia uchimbaaquiato je ra. Dios
 que siqui tuchi erese ra. 34-35 Mbae
 tiã eã ngue eriqui Jesús icuasa mo
 je ra. Tuchuacha que vender i
 jaaja uchuchua je ra. Ibicha abe
 que vender i jaaja umbae ibi je
 no nda. Mbae isiquia que emee
 mee Jesús chimbaaquiato je cote ra.
 Jesús chimbaaquiato que emee mee
 mbaecha reã ja je cote ra. Nyebe
 mbae tiã eãte riqui nguia emo je.

Jesús quiato mo je. 36 Sã José no.
 Bernabé, i Jesús chimbaaquiato José
 je. Mbia mbiasa, i chõ nguia Bernabé
 i. Ae rei Chipre jenda. Levita mo ngue
 ae ra. 37 Ae rei ibicha. Ibi umbae je
 que vender i ra. Mbae isiquia que
 emee Jesús chimbaaquiato je cote ra.

5

Ananías ñee ñooño

1 Ananías, i que emo je ra. Safira, i
 que eninisi je ra. Ñquĩ ngue vender i
 ibi mo je ra. 2 —Mbae isiquia ataque
 nandembuchimi nandembaerã, i
 nyue. Eataque que emee Jesús
 chimbaaquiato je cote ra. Eninisi
 abe que eicua ja ra. 3 Pedro que
 ñee Ananías je ra. —¿Mbaerã Satanás
 ndiqui ique ndechianguí re re?
 ¿Mbaerã erecheẽ ñooño Espíritu Turã
 je re? ¿Mbaerã ño mbae isiquia
 ataque erembuchimi nde? ¿Mbaerã
 ño ibi ribishoronda erembuchimi
 nde? 4 ¿Mbaerã ño ere? Ibi rei nembae
 vender i nonde. Mbae isiquia abe
 rei nembae. Mbia je rocoĩ erecheẽ
 ñooñocheĩ nde. Dios je chõ erecheẽ
 ñooño nguia, i que Pedro ra. 5 Ananías
 eandu mose que esi ngoi mano
 nda. Eandusa que siquiche ja ra.
 6 Acuanindu mo ngue ngaẽ eraaque
 uma nda. Nguruchoi que nyati ra.

7 Emo mose jiri que mano je nin-
 isi ru ra. Tres horas. Jiranuãte
 que ngu rese ra. 8 Pedro que ñee
 ee ra. —¿Manya rei ibi ribishoronda
 re? ¿Nderu ibi ribishoronda queru
 ja rei re? i que Pedro ee ra. —
 Ae. Ñquĩ ja chõ nyeresẽ, ichõ:ño ngue
 eninisi Pedro je ra. 9 Pedro ñee ee
 cote. —¿Mbaerã ere? ¿Mbaerã jen-
 dua nduachĩ ñquĩ ndese re? Jeñee
 ñooñocheĩ nguia Espíritu Turã je. Ae
 nderu curuchoi nyati nae, ñquĩ nyi
 nderaarõ arõ a. Eiquesa ji a. A ecuaẽ
 ndererao sacua a, i que Pedro ee ra.
 10 Pedro cheẽ mose tuchi que esi ngoi
 mano nda. Ngu rã si. Pedro resa
 rae mano. Acuanindu que ique ja
 eraaque rea ra. Nguruchoi que nyati
 ra. Eru atiquia jii que eruruchoi nyati

ra. ¹¹ Jesús icuasa que siquiche jate ra. Eandusa abe que siquiche jate no nda.

Mbia mae sayã

¹² Jesús chimbaaquiato que Dios quirãcuã teacuquia cuquia mbia je ra. Mbia mae sayã ngue esaã saã nguia mbia je ra. Milagros, i que ùquĩ je ra. Jesús icuasa que ñumunua nua ja quia eiquésaa ra. Portal de Salomón, i que eiquesa je ra. ¹³ Jesús icuasa rĩĩ ngue mbia ñee turã ja quia ra. Mbia ataque que siquichete ra. Nyebe ñumunua eã nguia ere se. ¹⁴ Jesús icuasa tubiriãt e que cote ra. Hombres tubiriã. Mujeres abe tubiriã no. ¹⁵ Erasi abe que mbia curuchoi choi quia ñeenda jĩe ra. Huee que eriqui eno eno ngua ye ra. —Sã Pedro aĩ ño ubi ubi erasi rese, i que mbia ñee Pedro ucu mose ra. ¹⁶ Jerusalén ndurubinda abe que ngaẽ ngaẽ nguia ra. Erasi rurucuaẽ cuaẽ Jerusalén. Aba checuayã nyireco abe que ecurucuaẽ cuaẽ nguia ra. Dios que embucherõ cherõ ja quia ra.

Jesús quiato tarõ policíaa

¹⁷ Sacerdote rerecua que paama i ra. Saduceos mo abe que chi ere se ra. Ùquĩ abe que paama i no nda. ¹⁸ Nyebe que Jesús chimbaaquiato isi icuã nda. Tarõ ngue policíaa ra. ¹⁹ Isa que ibatenda mo nguichi ee ra. Angel. Etaronda que embuquiata ra. Jesús chimbaaquiato que equerao itaicuee ra. Ñee nonde ee. ²⁰ —Dios chuchúaa jẽso. Mbia je mbiirandu randu tuchi Dios cheẽ ndese. Dios cheẽ ndei aba mingosa. Aque rese mbia jembiiirandu randu, i que ibatenda Pedro je ra. Juan abe je. ²¹ Jesús chimbaaquiato eandu mose que echoi Dios chuchúaa ra. Mbia mbaaquiato quiato que echoi ra. Isamamimbe cote. Isamamimbe echoi mbia mbaaquiato. Sacerdote rerecua que “jenyu” i mbia rerecua ja je ra. Sacerdote resenda abe. Amei je abe ñee. Ñumunua ja u nyiese. Ñee ngue policíaa raarõsa

je cote ra. —Jẽso policíaa. Jesús chimbaaquiato jendu rã ure je, i rei que ee ra. ²² Ecuasẽ mose policíaa que Jesús chimbaaquiato oreã ño ee ra. Ae nyebi chõ ecuaẽ nguia sacerdote rerecua mbiirandu. Ñee ee. ²³ —Puerta atã ngue chi ndei nguia ure je. Soldados ngue chi rei nguia itaicuee. Eraarõ ndaque. Ureequia rei ngue re. Eoreã ngue ra. Jesús chimbaaquiato oreãte que ure je ra, i que ra. ²⁴ Sacerdote rerecua que nyuruira eandu ra. Dios chuchua raarõsa abe nyuruira eandu. —¿Mañi mañite equia re? i que u ñee ñee nyue ra. ²⁵ Emo ngue tu ñee ee cote ra. —Huee que jenyitarõ nyi Dios chuchúaa ra. Mbia mbaaquiato quiato, i que embiiirandu ra. ²⁶ Eandu mose que Dios chuchua raarõsa nyoĩ erea ra. Nguesenda rese echoi erea. Curucuaẽ ja nguerecua je. Curucuaẽ turã. —Mbia tubiriã nda sita mombo mombochi nande je, i ñene. Nyebe eicuã eã ee.

²⁷ Jesús chimbaaquiato que ecurucuaẽ mbia rerecua je ra. Sacerdote rerecua que ñee ee cote ra. ²⁸ —“iMbia ra jembiiirandu randuchi Jesús rese jẽ!” ure rei que jẽje. Urecheẽ jemumba chõchi. Jerusalén jenda ja jembiiirandu randu chõchi nguia. “Jesús iquiasa chõ ùquĩ nde”, ijenyechĩ nda ure rĩĩ jẽ! i que sacerdote rerecua Jesús chimbaaquiato je ra. ²⁹ Pedro que echeẽ sibishorõ nda. Nguesenda rese echeẽ ndibishorõ. —Dios cheẽ nguia aba mumba aroneate nguia. Mbia cheẽ nguia nda aba mumba jiri nguia ña. ³⁰ Jẽ nguia Jesús jembucha nguia ira rese. Eiquia sacua. Dios que embuquera si ra. Nanderu rerecua que embuquera si ra. ³¹ Dios que nguiirĩ mingo mbia rerecuarã tuchi cote ra. Ujii bei que emingo ra. Mbia rerecuarã. Mbia rirõ sacua eicuã si. Israel jenda mbui sacua huicuã si. Dios eicuã mbutiã sacua esi. ³² Ùquĩ ndese que uremae ja ra. Nyebe ureico nguia mbia mbiirandu randu ã. Espíritu Turã abe mae ja ere se. Nyebe a e abe riqui nguia

mbia mbiirandu randu co. Dios quia Espiritu Turã mee mee nguiã ucheẽ mumbasa reã je, i que Pedro ra.

³³ Ererecua que paama i ja Pedro cheẽ mose ra. Nyebe eriqui nguiã eiquia ja serite. ³⁴ Fariseo mo abe que chĩ erese ra. Gamaliel, i que ee ra. Ae abe que ererecua ra. Mbia chĩcua jat e que ae ra. Mbia mbaaquiato quiatusa que ae ra. Dios cheẽ nenei neneisa que ae ra. Ae que juã ñee nda. — Jesús chĩmbaaquiato jemondo mbiirĩ conosẽ itaicuee, i que ra. ³⁵ Ñee ngue ererecua uataque je cote ra. — Tacheẽ jẽje, Israel jenda. ¡Jendua tuchi jẽ! ¡Jẽocochĩ nda Jesús chĩmbaaquiato rese jẽ! ³⁶ ¿Teudas si jẽtesarei re? ¿Jendua eãte quia erese re? Teudas quiatu ucuasu saã saã nguia resẽ. Erimbarã tubiriãte chee. Cuatro cientos chee erimba. Mbia Teudas iquia chee. Teudas mano nyee. Erimba que saseĩ saseĩ ja chee. Erimba que ua ja ra. ³⁷ Aquere que Judas abe riqui ra. Galilea jenda. Censo mose. Mbia que siqui jate eru i no nda. Erimbarã. Ae abe que mano cote ra. Erimba abe que saseĩ saseĩ nda. Erimba que ua ja no nda. ³⁸ Nyebe ã jẽteachõ. Jesús chĩmbaaquiato jẽteachõ. Sã ae ae quia ua, Dios siquiã mose erese. ³⁹ Dios quirãcuã siqui mose erese ra nandesiquisã aronea. ¿Mañi nande ra eriquisã nde? ¡Jesús rimba nandeteachõ ño jẽ! Dios quirãcuã nguia siqui rei erese. Dios je ra nandeicua abareãte, i que Gamaliel ra.

⁴⁰ Gamaliel cheẽ ndui si chõ ngue ererecua siqui ja nguiã cote. —Jenyu, i nguiã Jesús chĩmbaaquiato je cote. Iruã nua cote. —¡Mbia je ra Jesús cheẽ jẽsenei senei sichĩ core jẽ! i rei que ee ra. Ererecua que hui esi cote ra. ⁴¹ Jesús chĩmbaaquiato que nyo i mbia rerecua recha cote ra. Eyate que nyo i ra. —Jesús rĩ ño ureiruã nua nguiã, i que ra. Eya tuchi chõ ngue ra. ⁴² Mbia que embaaquiato quiato bei ra. Jesucristo rĩ mbia mbiirandu randu bei. Mbia chuchua que em-

buchesea sea quia mbia mbiirandu randu Jesús rĩ nda. Dios chuchúaa abe mbia mbiirandu randu.

6

Mbia siete irabo mbia mbuquiaru sacua

¹ Jesús quiato tubiriãte que cote ra. Ae griego cheẽ saã nguia, ũquí ngue paama i ra. Ae judío cheẽ saã nguia, ũquí je que paama i ra. Jesús quiato ja raque. —Uresenda eru cheecha ja ngue jembuquiaru icuã icuã ñochĩ nguiã, i que griegos judíos je ra. ² Nyebe Jesús quiato rerecua mbia munua nguiã. Jesús quiato munua ja. Ñee sacua ee. —Ã ureico Dios cheẽ nenei nenei mbei mbia je ã. Urehui aronea tuchi quiarei Dios cheẽ si. Mbia urembuquiaru quiaru aroneate. Dios cheẽ nenei nenei ndocoi. ³ Nyebe Jesús quiato siete chõ jẽirabo. Mbia mbuquiaru sacua. Mbia chĩcua siete chõ jẽirabo. Hombres aracua chõ jẽirabo. Espiritu Turã ndesenda tuchi chõ jẽirabo. Sã ũquí ño mbia mbuquiaru quiaru quia. ⁴ Ure quiatu ra urecheẽ mbei quia Dios je. Ure quiatu ra Dios cheẽ uresenei senei mbei quia mbia je, i que Jesús quiato rerecua ra. ⁵ —Coche ñene, i jat e que Jesús quiato ra. Nyebe que siete irabo ra. Esteban irabo. Ae rei Jesús quiato tuchi. Ae rei Espiritu Turã ndesenda tuchi. Felipe. Prócoro. Nicanor. Timón. Parmenas. Nocolás. ũquí ja que eirabo ra. Nicolás ndei Antioquia jenda. Judío eã ngue ae ra. ⁶ Curuchoi ja que Jesús quiato rerecua je ra. Jesús quiato rerecua que o chono ñono ja ũquí ãquí arõ nda. ũquí siete ãquí arõ. Ñee ngue Dios je cote ra. ⁷ Mbia tubiriã ngue Dios cheẽ isi isi quia ra. Jesús quiato tubiriã tuchi que mbia Jerusalén jenda cote ra. Sacerdote tubiriãte abe que Jesús quiato cote ra.

Mbia icuã tuchi Esteban je

⁸ Dios que siqui tuchi Esteban ndese ra. Dios quirãcuã ngue siqui tuchi erese ra. Nyebe eriqui nguiã

mbia mae sayã naa naa tuchi mbia je. ⁹ Mbia emo emo ngue paama i Esteban je cote ra. Esclavos Libertados, i que mbia chumunuasa mo je ra. Hue jenda que paama i ee ra. Cirene jenda abe no. Alejandría jenda abe no. Cilicia jenda abe no. Asia jenda abe no. Ũquĩ jate que paama i Esteban je ra. ¹⁰ Ũquĩ ngue Esteban ñee sobeishĩ aroneate quia ra. Espiritu Turã nguia Esteban mbaaracuate nguia. Espiritu Turã nguia Esteban mbuch eẽ aquiatute nguia. Nyebe ũquĩ ndiqui Esteban ñee ndibishorõ aroneate. ¹¹ Paama isa que mbae isiquia mee mbia mo je ra. Ñee ñooño nonde Esteban ñii. —Esteban ngue ñee icuãte Moisés rĩĩ nda. Esteban ngue ñee icuãte Dios rĩĩ no nda, ichõĩño nonde Esteban ñii. ¹² Ñee ñooño je que mbia mbicuãte Esteban je ra. Amei abe mbicuãte Esteban je no. Embesasa abe mbicuãte Esteban je no. Nyebe mbia Esteban isi suruchoi nguia ererecua je. ¹³ Ñee ñooño je que ñee icuã si Esteban ñii huee no nda. —iEsteban ngue ñee icuã icuãte quia Dios chuchua rĩĩ nda jẽ! iDios cheẽ ñii abe que Esteban ndiqui ñee icuã icuãte ra jẽ! ichõĩño Esteban ñii. ¹⁴ —iEsteban ñee ngue urechandu ra jẽ! “Jesús ra Dios chuchua mbucoi. Moisés cheẽ nda Jesús mbutiã”, i que Esteban nda jẽ! ique ñee ñooño ererecua je ra. ¹⁵ Mbia que mae ja u Esteban ndese cote ra. Ererecua abe que mae ja u erese ra. Ibatenda nduba rã tuchi quiarei Esteban. Eruba nininya tuchi quiarei ũquĩ mose.

7

Esteban ñee mbia je

¹ Sacerdote rerecua que ñee Esteban je cote ra. —¿Mbia ñee ñooño nguia nderĩĩ nde? i Esteban je. ² Esteban ngue ñee oco ee cote ra. —Tacheẽ jẽje, Seresenda. Tacheẽ jẽje, Amei. Dios Turã ngue nyecua u nanderu Abraham je ra. Abraham siqui mose Mesopotamia. Oso nonde

Harán. ³ Dios que ñee Abraham je ra. “Ibi mo nguia eso. Nderecua esecha. Nderesenda abe esecha ja. Ibi mo tateacuquia ndeje. Huee eso rã. Huee quia tereico”, i que Dios ee ra. ⁴ Abraham ngue oso nguecua recha ja ra. Ibi Caldea recha ja. Oso ibi mo. Harán, i que hue ibi je ra. Emo mose que eru mano ee ra. Aquere que Dios Abraham ndurucuaẽ aa ra. A nandeico a. Aa que erurucuaẽ nda. ⁵ Dios que ibi mo mee eã Abraham je ra. Ibi boque ñetẽ mo mee eã tuchi ee. “Ibi tamondo nderiirĩ mbaerã. Ndetiã mose ra amee nderiirĩ je”, i que Dios ee ra. Abraham nguiirĩ ndea eã mose qu e Dios ñee ee ra. ⁶ “Nderiirĩ nda siqui ja rei mbiamo ndese. Ndetiãmbaa. Mbiamo ndécuaa ra eriqui bei. Mbia icuã tuchi ra eriqui nderiirĩ je. Mbia rimbarã nda nderiirĩ. Cuatro cientos años nda eriqui mbia rimbarã”, i que Dios Abraham je ra. ⁷ “Nderiirĩ mbuquieĩ quieisa ra ambasi mbasi. Ũquĩ mos e ra nderiirĩ cuaẽ usẽ aa. Aa ra ñee ñee turã seje aa cote”, i que Dios ra. ⁸ Dios que ñee Abraham je ra. Abraham ngue Dios cheẽ ñanduchõ eã nda. Nyebe Dios circuncisión ndeacuquia Abraham je cote. Erãcoĩ ire ai o ji je chõ eriqui nguia circuncisión, i ũquĩ je. Dios cheẽ si embutesareĩã sacua ndei circuncisión. Nyebe Abraham circuncisión saã nguiirĩ je. Eitãquieĩ mose. Ocho días mose. Isaac, i que eriirĩ je ra. Isaac cuasu mose que ae abenguiirĩ tea ra. Jacob, i que eriirĩ je ra. Isaac abe que circuncisión saã nguiirĩ je no nda. Embutesareĩã sacua Dios cheẽ si. Jacob abe que nguiirĩ tea ecuasus mose ra. Ae abe que circuncisión saã nguiirĩ je no nda. Doce eriirĩ. Ũquĩ ndei nandei cose.

⁹ José, i que Jacob riirĩ mo je ra. José nongue que paama i ja José je ra. Nyebe José mee nguia mbia rimbarã cote. Mbia que José isi suruchoi Egíptoo ra. Huee ab e que Dios riqui tuchi José rese ra. ¹⁰ Mbia icuã mose José je, huee que Dios riqui eraarõ tuchi ra. José ia eã

eãte que eriqui ra. Dios embaaracua tuchi. Nyebe mbia rerecua turãte riqui nguiã ee. Faraón, i Egipto jenda rerecua je. Ererecuabi tuchi que José riqui ra. Nyebe emingo nguiã ererecuarã. Egipto jenda rerecuarã. Nyebe emingo nguiã uchuchua jenda rerecuarã. ¹¹ Emo mose jiri que mbaetiã mbia je ra. Mbia chiurã tiã ngue Egiptoo ra. Canaán abe mbia chiurã tiã. Nandei riãcuã ja que eriqui cose ra. ¹² Quiata a mbuae que Egiptoo ra. Jacob jirandu mose que nguiirĩ mondochoi erea ra. “Nandechiurã mo jëisi rã oso”, i que emondochoi Egiptoo ra. Aque ramo tuchi que eriirĩ nyoĩ Egiptoo ra. Jacob ndiirĩ ndei nandei ja. ¹³ Aquere que echoi si uchiurã ndea ra. Aque mose chõ ngue José nyecua nguiã ngõngue je cote ra. Nyeb e Faraón José nongue icua nguiã cote. ¹⁴ José que ngõngue mondochoi ngu rea cote ra. Jacob, i que eru je ra. “Nanderu jendu rã. Jeninisi abe jendu rã. Jendiirĩ abe jendu rã”, i que José ee ra. Curucuaẽ ja que ra. Setenta y cinco que mbia ra. ¹⁵ Eĩ ngue Jacob oso siri Egiptoo ra. Huee que eriqui bei ra. Mano nyee. Nandei ja abe que chi bei huee ra. Mano nyee. ¹⁶ Emo mose que mbia Jacob quiangue ruruchoi Siquem nda. Ibicua rie que eno huee ra. Ae Abraham isi ibi nyii, huee que equiangue no nda. Huee que nandei quiangue no nda. Ae ibi Abraham isi quia Hanor ndiirĩ si nae, huee que equiangue no nda.

¹⁷ “Cuatro cientos años nda nderiirĩ nyi bei Egiptoo. Aquere Ibi Canaán tamee ee”, i quia Dios Abraham je nyii reaẽ. Cuatro cientos años ua jiri mose que nandei tubiriãte cote ra. ¹⁸⁻¹⁹ Aque mose que emo Egipto jenda rerecua rã cote ra. Ae que jiranuã José rese ra. Nyebe ngue eriqui nguiã nandei mbiirĩ irĩ. Eicuã tuchi que eriqui nandei je ra. “Jendiirĩ itãquieĩ jësecha chõ. Sã ae ae mano ja”, i que ererecua nandei je ra. ²⁰ Aque mose que Moisés nyaacuquia ra. Diosbi tuchi que Moisés ra. Nyaacuquia

ramo mose. Tres nyasi que esi embutiarõ nyecuayã nda. Mbia rerecua si. Eru abe siqui embutiarõ nyecuayã. Eitãquieĩ mose. ²¹ Nguereco checuayã aroneate chee que ra. Nyebe ererecua riirĩ ngasẽ nguiã ee. Isi turã ngue ra. Mbutiarõ ngue nguiirina nda. Nyucuaaque que ererecua riirĩ nda. Ae que Moisés itãquieĩ mbutiarõ cote ra. ²² Nyebe Moisés mbaaquiату tuchi nguiã Egipto jenda rã si. Earacua tuchi que ecuasú mose cote ra. I tuchi que ra.

²³ Moisés que ndua tuchi uataque rese cote ra. “Taso rã israelitas rea”, i que cuarenta años mose cote ra. ²⁴ Oso que cote ra. Egipto jenda mo icuã icuã mose israelita mo je que Moisés si ngasẽ nda. Moisés que esiquisã nda. Iquia que ra. Egipto jenda iquia que ra. ²⁵ Moisés que ñee uchiangui re ra. “Sere senda ra seisi turã. Seicuate rae. ‘Dios chimbu chõ tu nguiã co. Urerirõ sacua a si’, i ra seresenda serĩ”, i rei ngue Moisés uchiangui re re. Eresenda que eisiã ñochĩ nguiã. ²⁶ Isamami nongue que israelitas mo icuã icuã nyue ra. “Tacheẽ turã ee. I nda eturã si nyue”, i rei que Moisés ra. “¿Mbaerã jëicuã icuã ndiqui jenyue re? Nandei ja chõ nyeresẽ”, i que Moisés ee cote ra. ²⁷ Ae rane eicuã icuã ndiqui nyue nae, aque que ñee icuã Moisés je ra. Moisés maña mondo. “¿Aba nemingo ererecuarã nde? Urereachõ ño ae”, i que ñee icuã Moisés je ra. ²⁸ “Ae ereiquia curi, ¿aque rã si ra seiquia re?” i que ñee icuã Moisés je ra. ²⁹ ã andu mose que Moisés si uchã nda. Ibimo. Madián, i que ibimo je ra. Huee que eriqui arete ra. Nguiirĩ nyeremo ngue etea huee ra.

³⁰ Huee que eriqui arete ra. Cuarenta años. Emo mose que esi turuquia rĩ nda. Ibi ibate jii que eriqui ra. Sinaí, i que hue je ra. Huee que ira ruri riqui sendi ee ra. Tata rendi mbirõ ngue ibatenda mo nyecua ee ra. Angel que nyecua Moisés je ra. Ira ruri rendi ite re que

nyecua ee ra. ³¹ Moisés que nyuruira tuchi erea ra. Erurubi que mae tuchi erese cote ra. Dios que ñee ee cote ra. ³² “Dios chõ se re. Ndei rerecua chõ se re. Abraham nderecua. Isaac abe rerecua no. Jacob abe rerecua no. Ñquĩ nderecua ja chõ se re”, i que Dios ra. Moisés que titi titi i ra. Siquichete que mae ndocoĩ erese ra. ³³ Dios que ñeembe ee ra. “Ndeiyao esirõ na. Seturã ño se re. Sésaa ndeiyao esirõ. ³⁴ Serimba rese aico mae mae mbeite Egíptoo co. Mbia icuã tuchite ee. Mbia embasi mbasi beite. Amae mae mbeite que erese ra. Echeseo seo rese que aico mae mbei ra. A achu erirõ sacuã a. Tasirõ eicuã si cote. Eso Egíptoo. Taremondo Egípto cote”, i que Dios Moisés je cote ra.

³⁵ Dios que Moisés mingo mbia rerecuarã cote ra. Mbia rirõ sacuã Egípto si. Mbae icuã si. Mbia que Moisés isi sereã nea nyii ra. “¿Aba nemingo urererecuarã nde?” i que mbia Moisé je nyii ra. Ñquĩ sí je que Dios Moisés mondo si ra. Ererecuarã. Dios que tata rendi ite renda mbucheẽ Moisés je ra. ³⁶ Moisés que mbia mae sayã saã saã nguia nandei je ra. Mbia mae sayã tubiriãte que esaã saã nguia ra. Moisés que mbia curuchoi Egípto si cote ra. Curuchoi que Ama Ireĩ ndasa ra. Moisés que mbia quereco bei turuquia rui ra. Cuarenta años. Mbia mae sayã tubi riãte que esaã saã nguia ra. ³⁷ Amei mose que Moisés ñee mbia je ra. “Dios ra jemo irabo ucheẽ mbuchecua sacuã jêje. Seraanguia si ra eirabo. ¡Aque cheẽ nda jemumbachĩ jê!” i que Moisés israelitas je ra. ³⁸ Moisés bei chõ ngue ererecua ra. Moisés bei chõ ngue nandei quereco quia turuquia ri ndesẽ. Ae je chõ ngue ángel ñee ndesẽ. Mbia chumunua mose Ibi Ibate Sinaí. Ibatenda mo ngue ñee ñee u Moisés je ra. Moisés que ñee ñee nandei je cote ra. Ibatenda cheẽ mbuchecua ee. Mbia mingosa cheẽ nenei nenei mbia je. Nandei je. ³⁹ Nandei que Moisés cheẽ ñandu sereãte quia ra. Echeẽ mumba

mumba. “Nyaso rei nyebi Egípto ae”, i que equia ra. ⁴⁰ Nandei que ñee ñee Aarón je ra. Moisés cutiã ngue ñee ñee ee ra. “Mbae raanguia mo esaã jiri ure je ae. Imagen. Urererecuarã. Ae je nda ureico ñee ñee jiri chã. Ae nda urererao Egíptoo chã. Moisés tiãte ure je cote. Ae urereru Egípto si. Maranguiti chõ esi urerecha”, i que mbia Aarón je ra. ⁴¹ Nyebe que Aarón ticuasú raanguia raã ee ra. Imagen. Nandei que mbae iquía iquía ticuasú raanguia je ra. Eroo que emii ticuasú raanguia jii ra. Mendi que ee cote ra. Mbia ia tuchi que uchiao rese cote ra. ⁴² Ñquĩ icuã tuchi que Dios je ra. Nyebe Dios hui nguia nandei si cote. Nandererecua, i chõchĩ mbia tenda je cote. Nyasi je abe no. Nyasi tata je abe no. Ñquĩ je chõ mbia riquichĩ ñee ñee. Ñquĩ mose que Dios ucheẽ mbu cote ra. Dios cheẽ mbuchecua que Dios cheẽ senei senei mbia je ra. Co rei embesa ji co:

Israelitas, ¿aba je jẽingo mbae roo mendi mendi cose re?

Jẽingo mose turuquia cuarenta años mose.

¿Seje chõ jẽingo mbae roo mendi mendi cose re?

⁴³ Tei. Seje eã ñene.

Jenyiao je chõ jẽingo mbae roo mendi resẽ.

Tuchua ñetẽ jendaso raso bei chõchĩ. Mbae aingue raanguia resebe. Moloc, i ee.

Aque je chõ jẽingochĩ nguia ñee ñee.

Seje ñee ñee ndocoĩ.

Nyasi tata je abe jẽingochĩ nguia ñee ñee.

Nyasi tata rei Refán mbae.

Mbae raanguia jenyiao je abete que jẽingo ñee ñee nda.

Nyebe ra jaemondo jembae ibi si.

Babilonia ndobei ra jaemondo.

Mbia rimbarã nda jaemondo,

i que Dios nandei je cose ra. ⁴⁴ Nandei que chi arete turúquiaa ra. Aque mos e que nandei riqui tuchua rurucuata bei cose ra. Mbae ire que tucharã cose ra. Aque tuchuaqui re que mbia riqui ndua ndua Dios rese ra. Dios

que tuchia nyao uquia Moisés je ra. “¡Ei ere chõ eao jê!” i que Dios Moisés je ra. Dios cheẽ ndui si tuchi que Moisés eao ra. ⁴⁵ Moisés manonde que Josué nandei rerecua cote ra. Ae que nandei curuchoi turuquia si cote ra. Ngasẽ nonde ibi mo je. Dios chimee, hue ibi je que ngasẽ cote ra. Nandei que guerra saã saã hue jenda je ra. Dios que mbia mombo ja hue jenda ra. Aque mose que nandei riqui tuchia ruruchoi bei ra. Tuchia, i chõ nguiã mbae ire ao ji je. Aque tuchia que equereco bei quia ra. David abe mbia rerecua mose. ⁴⁶ Dios que sigui tuchi David rese ra. David que ñee ee ra. “Tuchia cuasu tasaã ndeje”, i rei ngue David Dios je re. Jacob nderecua rei Dios. ⁴⁷ David ndiirĩ nguiatu que tuchia saã Dios je ra. Salomón, i que eriirĩ je ra. ⁴⁸ Mbia rã eã ndei Dios. Dios siguiã tuchi chõ nguiã tuchiaqui re. Mbia chiaqui re. Dios cheẽ mbuchecua que Dios cheẽ saã nda:

⁴⁹ Se quia ererecua tuchi re.

Ibatenda rerecua abe rei se.

Ibi jenda rerecua abe rei se no.

¿Mañi nda mbia sechucharã ao re?

Equi re ra aicoã ndesẽ.

⁵⁰ Se quiatu que mbae achao ja resẽ, i que Dios nandei je ra. ⁵¹ Jeñia icuã ñochĩ. Jëisayã ñochĩ. Espiritu Turã jëisiteã teã ñochĩ. Jendu rã si chõ Espiritu Turã jëisiteã teã ñochĩ.

⁵² Jendu icuã bei que eriqui Dios cheẽ mbuchecua ja je ra. Jendu que Dios cheẽ mbuchecua iquia iquia bei quia ra. Ibatenda Turã nda tu, ae i quia cose nae, ñquĩ abe que jendu iquia iquia quia cose resẽ. Ibatenda Turã tu mose que jemee ñochĩ nguiã mbia icuã je ra. Eiquia nonde que jemee ñochĩ nguiã mbia icuã je. ⁵³ Dios que ángeles mbu rei jêje ra. Ucheẽ nderu raque jêje. Jê echeẽ mumbayã sacua. Echeẽ ngue jemumba mumba bei chõchĩ nguiã, i que Esteban ñee oco tuchi ee ra.

Mbia Esteban iquia sita je

⁵⁴ Eandusa que paama i tuchi Esteban je ra. Esteban i quia serĩ. ⁵⁵ Espiritu Turã ngue sigui tuchi Esteban ndese ra. Esteban ngue mae tuchi ibei rese mbia paama i mose ee ra. Dios Turã ndese que mae ibate ra. Jesús rese abe que mae nda. Jesús que chĩ juã Dios ji ee ra. ⁵⁶ Esteban ngue ñee nda. —Jemae jẽ. Ibei nyiequia rese aĩ mae a. Huee mbia rucucha ñi juã Dios ji huee. Huee Jesús ñi juã Dios ji huee, i que Esteban nda. ⁵⁷ Mbia que tasẽ tasẽ tuchi paama i ra. Huisacua que emitao ja Esteban ñee si ra. —Nandecua recua erese, i que o oe Esteban ndese ra. ⁵⁸ Mbia que Esteban curuchoi sucha tubiriã si ra. Huee que sita mombo mombo erese ra. Sita mombo mombo que huiirao mbui mbui acuanindu mo je ra. —Esarõ, i que ee ra. Saulo, i que eieirao raarõsa je ra. ⁵⁹ Mbia que sita mombo mombo Esteban ndese ra. Sita mombo mombo mose que Esteban ñee Ibatenda je ra. —Aque aso quia ndeje aque, Sererecua Jesús. Seisi cote, i que Esteban Ibatenda je ra. ⁶⁰ Ngoi que nguiã ndese cote ra. Tasẽ tasẽte que ñee mombo mombo ra. —Sererecua, ã icuã ndaque seje. ¡Erembasi mbasichĩ nda huiicuã ñi jê! i que Esteban Jesús je ra. Esteban ngue mano cote ra.

8

Saulo icuã Jesús quiato je

¹ —Coche rei mano, i que Saulo Esteban mano mose ra. Aque mose tuchi que mbia icuã icuã tuchi Jesús quiato je cote ra. Jerusalén jenda. Jesús quiato que nyoĩ ja ñimbuchao Judea rĩ nda. Samaria rĩ abe que echoi ñimbuchao ra. Jesús chimbaaquiato achõ ngue chichõ Jerusalén nda. ² Mbia turã mo ngue Esteban nyati ra. Nyeseo tuchi que eati mose ra. ³ Saulo icuã tuchi que eriqui Jesús quiato je ra. —Jesús quiato tambutiã, i tuchi que Saulo quia ra. Nyebe eriqui nguiã mbia chuchua mbuchesea seate. Jesús quiato rea rea ererao sacua tarõ

policíaa. Saulo icuã tuchi que eriqui Jesús quiato je ra.

Samaria jenda Dios cheẽ ñandu

⁴ Ae uchã nyoï quia Jerusalén si nae, ãquĩ ngue nyoï mbia mbiirandu randu tuchi quia Jesús rĩ nda. Mbía recua ja que eriqui nyoï nyoï mbia mbiirandu randu Jesús rĩ nda. ⁵ Felipe que oso Samáriaa ra. Sucha tubiriã mo. Huee que eriqui mbia mbiirandu randu Jesús rĩ no nda. ⁶ Dios que Felipe mbuquirãcuã nda. Mbía mae sayã ngue esaã saã nda. Mbía tubiriã ngue nyiisaquia tuchi quia echeẽ ndese ra. ⁷ Aba checuayã icuã ngue Felipe jea jea tuchi mbia si ra. Aba checuayã icuã ngue tasẽ tasẽ nguia hui mose mbia si ra. Felipe que mbia cuatayã mbucuata ja quia ra. Mbía umi sayã abe que embucherõ cherõ nguia ra. ⁸ Nyebe hue jenda ia tuchi sucha tubiriã jenda.

⁹ Huee sucha tubiriã ngue Simón ndiqui ra. Brujo que ae nyii ra. Ae que mbia mbiirã irĩ tuchi quia nyii ra. Mbía Samaria jenda chũcua tuchi que ae ra. ¹⁰ Mbía que nyiisaquia tuchi quia Simón ñee ndese cose ra. Mbía riirĩ abe que nyiisaquia quia echeẽ ndese ra. —Dios embuquirãcuã tuchi quia co, i rei que mbia Simón ñi nda. ¹¹ Simón ngue mbia mbiirã irĩ tuchi quia brujería je ra. Nyebe que mbia riqui nyiisaquia tuchi eres e nyii ra. ¹² Huee que Felipe Jesús renei nenei tuchi cote ra. —Dios ra mbia rerecuarã tuchi, i que Felipe quia hue jenda je ra. ãquĩ mose que mbia Jesús icua icua tuchi ra. Bautizar i que mbia atate je ra. ¹³ Simón Brujo abe que Jesús icua cote ra. Bautizar i que ee ra. Felipe rui bei que eriqui cote ra. Felipe que mbia mae sayã saã saã nguia ra. Simón ngue nyuruira tuchi quia mae erese ra.

¹⁴ —Samaria jenda riqui Dios cheẽ isi isi tuchi ã, i que mbia Jerusalén jenda mbiirandu randu ra. Nyebe que Jerusalén jenda Pedro mondochoi Samáriaa ra. Juan abe mondo.

¹⁵ Ngasẽ mose que ñee Dios je ra. —Espíritu Turã emondo rã Jesús quiato a jenda je, i que Dios je ra. ¹⁶ Espíritu Turã iqueã mose hue jenda chiangui re que Pedro choi erea ra. Jesús rimbarã ño ngue mbia bautizar i nguiã ee nyii. Espíritu Turã iqueã ño nguia echiangui re nyii reaẽ. ¹⁷ Pedro que o chono Jesús quiato ãquĩ arõ nda. Juan ab e o chono earõ. Espíritu Turã ngue tu Jesús quiato je cote ra. ¹⁸ Simón ngue mae erese ra. O chono mose earõ. Espíritu Turã tu mose ee. Nyebe que mbae isiquia reacuquia Pedro je ra. Juan abe je. ¹⁹ Ñee ngue ee ra. —Sembaaquiatu se abe. Ndequirãcuã embu seje. Sã se abe seo tachono ñono mbia arõ. Sã se abe Espíritu Turã quirãcuã tamee mee mbia je. Mbae isiquia tamee jẽje jẽquirãcuã ndibishorõ, i rei que Simón nda. ²⁰ Pedro que ñee asi ee ra. —Sã mbae isiquia nembae quiachã ja. Nde abe equiachã tuchi. ¡Dios ra uquirãcuã mee eã mbae isiquia ribishorõ jẽ! ²¹ Ndeturã eã ñochĩ ndechiangui re. Nyebe ra Dios uquirãcuã mee eã ndeje. ²² ¡Ndeicuã si ehui rã jẽ! Echeẽ ñee Dios je. Sã Dios nendua icuã mbutiã ndesi. ²³ ¡Sã ndeicuã tuchi riqui ndechiangui re jẽ! Ndeicuã aicuate quia co, i que Pedro ee ra. ²⁴ Simón ngue ñee Pedro je cote ra. —Echeẽ turã Dios je serĩ. Sã Dios seicuã mbutiã. I nda aquiachãyã esi, i que Simón nda.

²⁵ Pedro que Dios cheẽ senei senei nguia ra. Juan abe esenei senei no. Aquere que echoi nyebi Jerusalén nda. Ñeend a cua jenda que embuchesea sea sucha tubiriã nda. Samaria jenda mbuchesea sea Jesús renei nenei mbia je.

Carro yenda Dios cheẽ ñandu

²⁶ Angel mo ngue tu Felipe je ra. Ibate si que eru nguichi ñee ee ra. —Eso chõ turúquiaa. Eso chõ ñeenda icoĩ Jerusalén icha. Gaza icha abe, i que ibatenda Felipe je ra. ²⁷ Felipe que oso Dios cheẽ nguire ra. Echia o ji mo ngue esobeishĩ ñeenda cúaa ra. Etiopía

jenda rei echia o ji. Ae rei ererecua resenda. Candace, i que ererecua je ra. Reina. Mbae isiquia Candace mbae que esaarõ arõ tuchi quia ee ra. Echia o ji oso quiatu quia Jerusalén nyii reaë. Oso quia equia Jerusalén ñee ñee sacua Dios je nyii reaë. ²⁸ Uba que u quia uchuchua quiti cote ra. Carro ye que eru quia cote ra. Isaías chimbesa rese que eru quia mae mae carro ye ra. Dios cheë. ²⁹ Espiritu Turã ngue ñee Felipe je ra. —Eso rã carro jii, i que ee ra. ³⁰ Felipe que oso ra. Oso que Etiopía jenda andu ra. Isaías chimbesa rese que esi quia maemae nda. Nyebe Felipe ñee ee. —¿Isaías chimbesa checuete eriqui ndeje re? i que Felipe ee ra. ³¹ —Tei. ¿Mañi ae ra eicua re? Aba mo eicuayãte seje resë. Echi rã. Ecoi sejii. Sembaaquiату rã se, i que carro yenda ee ra. ³² ã Isaías chimbesa rese que eriqui mae mae nda. ã ndei e ã:

Nanderiquicharõsa rei oveja rã.

Mbia que oveja querao eiquiãsa ra.

Mbia que ovejara nyisia sia ra.

Oveja ñee ñeeã ee.

Ei ngue nanderiquicharõsa ñee ñeeã huiiquia mose ra.

³³ Nanderiquicharõsa turãte raque.

Mbia icua tuchi ee. Mbia eiquiachõ.

Emosenda icua tuchite ee.

Emosenda eiquia chee.

Nanderiquicharõsa siquiã ibi rĩ cote, i qu e Isaías embesa ra. Embesa ji rese que Etiopía jenda riqui mae mae nda. ³⁴ Etiopía jenda que ñee Felipe je ra. —Embesa ji embuchecua seje. ¿Aba rĩ Isaías riqui embesa mbesa re? ¿Mbiamo nĩ eriqui embesa re? ¿Ngũĩ eriqui embesa re no? i que Felipe je ra. ³⁵ Felipe que embuchecua ee ra. Mbaaquiату tuchi que Jesús rĩ cote ra. ³⁶ Carro que ngasë ama moo cote ra. —¿Co ama ñi co! ¿Aa ra bautizar ere seje re? i que Etiopía jenda Felipe je ra. ³⁷ —¿Jesús ereicua quia cote re? Jesús icua tuchi mose ra bautizar ae ndeje cote, i que Felipe ee ra. Etiopía jenda ñee ee cote. — Jesús aicuate quia co cote. Jesucristo

rei Dios ndiirĩ. Aicua sequia co cote, i que ra. ³⁸ Carro que embutiba cote ra. Nguichi que esi ra. Ama ndie que echoi ra. Felipe que bautizar i ee cote ra. ³⁹ Usë ngue ama si cote ra. Espiritu Turã ngue Felipe querao hue si cote ra. Etiopía jenda que mae eã mbei Felipe rese cote ra. Etiopía jenda ia tuchi que oso ra. ⁴⁰ Felipe que ngasë Azótoo ra. Sucha tubiriã ngue embuchesea seã ra. Mbia mbiirandurandu tuchi Jesús cheë ndese. Ngasë nyee que Cesarea ra.

9

Saulo uba ramo Dios icha rui

¹ Saulo icua mbei que eriqui Jesús quiato je ra. Taiquia ja, i rei que equia ra. Nyebe que esi ñee sacerdote rerecua je ra. ² —Papel embesa rã sechiraorã. Tarao Damáscoo. Judíos chumunua mose ereacuquia sacua ee. Jesús quiat o hue jenda taru taru Jerusalén. Ecuasa taru taru quia etarõ sacua policiaa. Mujeres abe taru. Hombres abe taru taru no, i rei que Saulo ñee icua Jesús quiato rĩ nda. ³ Damasco rurubi mose que tata mo tu tuchi ee ra. Tata mo ngue tu tuchi ee ibate si ra. Tata que Saulo tesae tuchi ra. ⁴ Saulo que ngoi oso íbii ra. Echeë mo ngue ehandu ra. —¿Mbaerã ndeicuãte riqui seje re? i que ibatenda ñee ee ra. ⁵ Saulo que ñee ee ra. —¿Aba nde re? i ee. Ibatenda que ñee ee ra. —Jesús rei se. Seje quia ndeicuãte riquichĩ nguiã. Ndeicuã mose seje, nde sí chõ ereico ñimbasi co. Sã ticuasu riqui nambacua mbuti no. Sã eriqui hui mbaba ira racua echi no. ¿Quĩ na tuchi quiarei nde, i que Jesús ee ra. ⁶ Saulo que titi titi i eandu ra. —¿Mañi ae ra sequia se re, Sererecua? i que Saulo Jesús je ra. —Ehuã. Eso sucha tubiriã. Huee ra sequiato mo secheë nenei ndeje, i que Jesús Saulo je ra. ⁷ Saulo resenda que siquiche tuchi ra. Echeë andu mose. Mbia mo ndese que maeã nda. Nyebe siquichete echeë andu. ⁸ Saulo que juã ndei nguesa ira ra. Emae sayã tuchi. Eresayã ngue ra. Nyebe que

mbia eo isi suruchoi sucha tubiriã nda. Sucha tubiriã Damáscoo. ⁹ Tres días que eresayã tuchi riqui ra. Aque mose que eresayã mbae mo uãte ra. Aque mose que yu eã no nda.

¹⁰ Huee sucha tubiriã ngue Jesús quiato mo ndiqui ra. Ananías, i que ee ra. Aque nda Dios tea cuu ra. — Ananías, i nda Dios eque re ra. — ¿Mbae? i nda Ananías e e ra. ¹¹ — Eso rã Ñeenda Chaa Chaareã. Huee que Judas chuchua ñi nda. Huee eso Saulo rea. Saulo rei Tarso jenda. Hue eriqui ñee ñee seje hue. ¹² Saulo que nderea cuu ra. Ereso que ndeo no erese cuu ra. Eresa que erembucherõ cuu ra. Ñquĩ sí esaã oso ee, i nda Dios Ananías je ra. ¹³ Ananías que teã ndei ra. —Mbia Saulo icuã icua tuchi quia co, Dios. Eicuã tuchi Jesús quiato Jerusalén jenda je. Mbia sembiirandu ja quia co, Dios. ¹⁴ A eru Jesús quiato isi ererao sacuaã a. Ñquĩ je chõ sacerdote rerecua embu nguiã a. Uretarõ ja sacuaã, i que Ananías Dios je ra. Esiquichete que Saulo si ra. ¹⁵ Dios que ñee ee ra. —Eso chõ erea. Ae quia airabo mingo serimbarã co. Ae ra Israel jenda mbiirandu randu secheẽ ndese. Ae ra mbia mangue choõnoa jenda abe mbiirandu randu secheẽ ndese no. Ae ra mbiamo nderecua abe mbiirandu randu secheẽ ndese no. ¹⁶ Saulo secheẽ nenei nenei mose ra mbia embasi mbasi tuchi. Mbia icuã icuã tuchi ra ee serĩ mambi. Ñquĩ ndese Saulo tambiirandu, i que Dios ra. ¹⁷ Ananías que oso cote ra. Dios cheẽ nguire. Ique que Judas chuchúaa ra. O que echono Saulo rese ra. — Seresenda ereico co cote, Saulo. Jesús que nyecua ndeje ñeenda cúaa, ae sí sembu quia ndeje co. Jesús sembu ndeje co. Espiritu Turã ique sacuaã ndechiangui re. Nemaee sacuaã abe sembu co no, i que Ananías Saulo je ra. ¹⁸ Aque mose tuchi que sira quishĩ naanguia tu ngoi eresa si ra. Saulo que mae turã cote ra. Jesús quiato que bautizar i Saulo je cote ra. ¹⁹ Saulo que quiaru ñimbuquirãcuã cote ra. Itõ mocoĩ jiri que Jesús quiato

rese huee ra. Damasco jenda rese itõ mocoĩ.

Saulo Dios cheẽ nenei namo

²⁰ Saulo que oso oso quia Jesús renei nenei judíos chumunuásaa ra. —Jesús rei Dios riirĩ, i tuchi que equia mbia je ra. ²¹ Mbia que nyuruira tuchi quia echeẽ andu ra. —Co chõ Jesús quiato iquia iquia quia cose nye. Jerusalén jenda. Co chõ tu a Jesús quiato rerao sacuaã nye. Co chõ Jesús quiato queraose rete quia sacerdote rerecua je nye. Ae Jesús quiato riqui quia namo co cote, i que mbia nyuruira Saulo rea ra. ²² Saulo quirãcuã tuchi que eriqui cote ra. Ererecua rã ño eriqui nguiã mbia mbaaquiato quiato Jesús rĩ. —Jesús rei Cristo. Ae jësaarõ arõ nguia, aque rei Jesús, i tuchi que Saulo quia judíos je ra. Judíos Damasco jenda que Saulo cheẽ sibishorõ aronea nda.

Saulo uchã judíos si

²³ Emo mose jiri que judío rerecua ñee nyue ra. —¿Saulo nandeiquia j! i rei que ñee nyue ra. ²⁴ Mbia mo ngue Saulo mbiirandu ra. — Nandeiquia, i nda mbia nderĩ nda. Hue echĩ nyiquitirõ nderese eiquésaa hue. Isa abe echĩ nyiquitirõ nderese hue, i que embiirandu ra. ²⁵ Itondaru mose que Jesús quiato mo Saulo mbuchemi nda. Nyuchã ngue iru ye ra. Iru resebe que embuquichi mondo etaronda robei ra. Muralla robei.

Saulo siquibe Jerusalén Jesús quiato ramo mose

²⁶ Saulo que oso Jerusalén cote ra. —Taico Jesús quiato rese, i rei que ngasẽ nda. Jesús quiato que siquiche ja esi ra. —Saulo Jesús quiato saã saã ño nguiã nande je co, i rei que mbia ra. Nyebe siquiche rei nguiã esi. ²⁷ Bernabé miĩ ngue Saulo isi turã nda. Ae que Saulo querao Jesús quiato rerecua je ra. Embiirandu tuchi Saulo rese. —Saulo que oso rei Damáscoo ra. Nandererecua Jesús que nyecua ee ñeenda cúaa ra. Jesús que ñee ee ra. Saulo que siqui Jesús

rui cote ra. Saulo que siquicheã nguia Jesús renei nenei Damasco jenda je cote ra, i que Bernabé uataque je ra. ²⁸ Aquere que Jesús quiato Saulo isi turã cote ra. Saulo que siqui are jiri Jerusalén cote ra. Hue jenda Jesús quiato rese que eriqui tuchi ra. ²⁹ Saulo siquicheã ngue eriqui Jesús renei nenei mbia je ra. Ae griego cheẽ saã saã nguia nae, ũquĩ je abe que erenei nenei nda. Ñee asi asi que Saulo je Jesús rĩĩ nda. Saulo abe que ñee tuchi ee Jesús rĩĩ nda. Nyebe mbia riqui nguia “nandei quia” i Saulo rĩĩ. ³⁰ Jesús quiato que jirandu erese ra. Nyebe Saulo ruruchoi nguia Cesarea. Mondo que echuchúaa sí cote ra. Tarso, i que Saulo chuchua je ra. ³¹ Aquere que mbia icuã icuã eã Jesús quiato je cote ra. Judea jenda je. Galilea jenda abe je. Samaria jenda abe je no. Jesús quiato hue jenda que ñimbuquirãcuã nacuã ja ra. Siqui i i tuchi Jesús rese. Espíritu Turã ngue embeta mbeta ra. Etubiriã nyee. Jesús quiato que Dios cheẽ mumba mumbayã nguia ra.

Jesús quirãcuã Eneas mbucherõ

³² Pedro que mbia mbuchesea sea tuchi quia ra. Oso que Jesús quiato Lida jenda rea no nda. ³³ Hue que umi sayã mo ndiqui ra. Ae ngatayã mbei quia ocho años. Nyaara bei chõ ngue equia ra. Eneas, i que umi sayã je ra. ³⁴ Pedro que ñee ee ra. — ¡Jesús riqui nembucherõ a jẽ! Ehuã na. Nderua abe enua, i que Pedro umi sayã je ra. ũquĩ mose que nyerõ nda. ³⁵ Mbia que mae ja u umi sayã ngata rese ra. Nyebe que mbia Jesús icua ja cote ra. Lida jenda Jesús icua ja. Sarón jenda abe que eicua ja n o nda. Ngãmeĩ ñee si que hui Jesús isi cote ra.

Dios quirãcuã Dorcas mbuquera si

³⁶ Dorcas, i que ari mo je ra. Jope jenda que ra. Dorcas, i que griego cheẽ quicuã je ra. Jesús quiato que ae ra. Ae que eturã mbei riqui mbia je ra. Ae que mbae mee mee mbei quia mbaecha reã je ra. ³⁷ Dorcas

rasi que eiquia cote ra. Mbia que eraaque mbuchasu ra. Mii ngue equesa nongue ibatenda ye ra. Segundo piso. ³⁸ Pedro que siqui aichi ra. Lida, i que sucha tubiriã je ra. Nyebe que Jesús quiato mbia nyeremo mondochoi Pedro reru sacuã nda. ³⁹ Pedro que oso erese ra. Ngasẽ mose que mbia eruruchoi equesa ibatenda ra. Dorcas raaque rese mae. Hue eru chiecha tubirĩ a nyi nyeseo eraaque res e hue. Dorcas chimee tubiriã ngue eteacuquia cuquia u nyue hue ra. Mbia irao tubiriã ngue Dorcas chiao ra. ⁴⁰ Pedro que mbia mbusẽ ja mondo taicuee ra. Ngũiã ndese que ñee Dios je cote ra. Aquere que ñee eraaque je cote ra. —Ehuã na, Dorcas, i que ee je ra. Eraaque que nguesa ira mae Pedro rese ra. Nyuruã ngue ngoi cote ra. ⁴¹ Pedro que emua eo rese ra. Jenyu, i que Jesús quiato je cote ra. Eru chiecha ja je abe no. Ngaẽ ngue mae equera rese cote ra. ⁴² Mbia Jope jenda que jirandu tuchi erese ra. Nyebe que mbia tubiriã Jesús icua cote ra. ⁴³ Pedro que itõ mocoĩ hue ra. Sucha tubiriã. Simón curtidor chuchúaa que eriqui uque ra.

10

Pedro oso Cornelio rea

¹ Soldados rerecua mo ngue siqui sucha tubiriã Cesaréaa ra. Italia jenda rei ũquĩ soldados. Cien ngue soldados ra. Cornelio, i que soldados rerecua je ra. ² Ae que ñee ñee mbei quia Dios je ra. Ae que eturã ndiqui Dios je ra. Mbae isiquia que emee mee tuchi quia mbaecha reã je ra. Echuchua jenda abe que eturã ndiqui Dios je ra. ³ Tenda nyeseo ramo mose que Cornelio ibatenda mo ndea cuu ra. Angel. Ehecua tuchi que ee cuu ra. Ique que echuchúaa ee cuu ra. —Cornelio, i que ñee ee cuu ra. ⁴ Cornelio que mae quiatu tuchi erese ra. —¿Mbae ere, Sererecua? i que siquiche ñee ee ra. Ibatenda que ñee ee cote ra. —Co ereico ñee ñee mbeite Dios je co. Co ereico mbae mo mee mee mbeite mbaecha reã je

co. Nyebe Dios ia tuchi riqui nguiã nderese co. ⁵ Huee que Simón Pedro mo ndiqui Jópee ra. Nderimba mo emondochoi erea. Ereru sacua ñee ndeje. ⁶ Huee eriqui Simón Curtidor chuchúaa huee. Am a ndisha rimia eriqui hue. Sã nderimba ecurucuaẽ hue si. Ñee ñee sacua ndeje, i que ibatenda Cornelio je cuu ra. ⁷ Dios chimondo ibatenda que oso Cornelio rechta cote ra. Cornelio que ñumumba cote ra. Jenyu, i que ngũimba nyeremo je ra. Aque mi soldado je abe no. Ae rei Cornelio raarõsa. Ae que ndua ndua bei quia Dios rese ra. ⁸ Ñquĩ je que Cornelio uquereicuã nenei nenei ja ra. —Jẽso Pedro reru Jope si, i que ee cote ra.

⁹⁻¹⁰ Isamami ngue Cornelio rimba ngasẽ Jope rurubi cote ra. Aque mose que Pedro chi tuchia arõ nda. Huee rei equesa no. Huee que Pedro chi ñee ñee Dios je ra. Tenda ibate mose que Pedro riãcuã nda. Echiurã ngue uchi ãte ra. Nyebe que uque u ra. Uchiurã naa mose. Equereicuã ngue cote ra. ¹¹ Ibei que nyiequia ee cuu ra. Tiru icoi que tu ibei si ra. Tiru chimangũiana isi ji que tu nguichi ee cuu ra. Echimangũiana isi ji ja. ¹² Mbae tubiriã ngue tu nguichi tiru icoi y e ee cuu ra. Mbae chumumbara tuchi. Quiaa riinda ja. Mbei abe no. Nguireĩ abe no. Mbae ibi riinda ja tuchi que chi tiru ye cuu ra. ¹³ Pedro que echeẽ mo ñandu cote ra. —Ehuã na, Pedro. Emo eiquia ndechiurã, i que ra. ¹⁴ —Tei, Sererecua. Urechiu eã ño ã ndesẽ. ã mo ngue ureu eã mbei quia ra. Mbaeiaie tuchi ure je judíos ja je, i que Pedro ee ra. ¹⁵ Dios que ñeembe ee ra. —¡Sechimee ndechiurã nda ereisiteãchĩ jẽ! i que ra. ¹⁶ Eĩ si que tiru icoi ru tres veces ra. Mbae chumumba ra ja resebe. Tiru que oso bei ibate cote ra.

¹⁷ Pedro que ñumumba cote ra. Ndua ndua tuchi que uquereicuã ndese ra. Aque mosete que Cornelio rimba ngasẽ nda. —¿Ma Simón chuchua ma nde? i que ngasẽ nda. ¹⁸ —¿Simón Pedro riqui a re? i que ra.

¹⁹ Pedro qu e ndua ndua beite quia uquereicuã ndese ra. Nyebe Espiritu Turã ñee nguiã ee. —Mbia tres ngaẽ nguia nderequia co. ²⁰ Equichi. Eso rã erese. ¡Esiquicheã oso erese jẽ! Se chõ ngue ambu nderea resẽ, i que Dios Pedro je ra. ²¹ Pedro que nguichi u ee cote ra. Cornelio rimba je. —Serequia chõ jenyu nguiã co. ¿Mbaerã jẽingo serequia re? i que Pedro ra. ²² —Cornelio quia urembu nguiã nderea co. Ae rei soldados rerecua turã. Judío chiicua tuchi que ae ra. Eturãte eriqui Dios je co. Angel que oso ñee Cornelio je ra. “Mbia emondo rã Pedro reru sacua. Pedro cheẽ echandu rã”, i que ángel Cornelio je ra, i que Cornelio rimba Pedro je ra. ²³ —Jenyu rã ique. Jengue a, i que Pedro ee ra. Isamami ngue Pedro oso erese cote ra. Jesús quiato Jope jenda abe que nyoĩ erese ra. ²⁴ Isamami ngue ngasẽ Cesarea cote ra. Cornelio que esaarõ arõ nguia huee ra. Nguesenda rese que eriqui eraarõ arõ nda. Nguiriĩ abe rese que eriqui eraarõ arõ nda. —Jenyu Pedro raarõ serese. Echeẽ andu sacua, i nda nguesenda je nyii ra. ²⁵ Pedro que ngasẽ oso Cornelio chuchúaa ra. Cornelio que oo erese ra. Aquere que ngoi ngũiã ndese ñee ñee ee ra. Ibatenda Pedro riqui reĩ nguiã Cornelio je. ²⁶ Pedro que ñee ee ra. —Ehuã na. Dios eã ño se re. Nderã si chõ se re. Mbia chõ se re, i que Pedro ra. ²⁷ Ñee ñee ngue equia nyue cote ra. Nyoĩ que ique mbia tubiriãsa cote ra. ²⁸ Pedro que ñee ñquĩ je ra. —Se rei judío. Judío siqui aronea ndaque mbiamo ndese. Judío ique aronea mbiamo nyuchúaa. Ñquĩ jẽicua raque quia ã. Dios que ñee seje cuu ra. Dios que sembaaquiato cuu ra. “Mbiamo abe que eturãte riqui ra. Mbiamo ndese abe eico jiri”, i que Dios seje ra. ²⁹ Nyebe achu jei nguiã ndecheẽ mose co. ¿Mbaerã “echu” ere seje re? i que Pedro Cornelio je ra.

³⁰ Cornelio que ñee ee cote ra. — Hue tenda bei aico ñee ñee Dios je co. Tenda nyeseco mose aico bei ñee ñee

Dios je co. Se cheẽ mose que ibatenda mo ndu seje ra. Angel. Tu que seje hace cuatro días ra. Tirushĩ tuchi que ecunua nda. ³¹ Ibatenda que ñee seje ra. “Cornelio, Dios ndecheẽ ñandu bei quia co. Dios mae mbei quia nderese co. Mbae mee ndese mbaecha reã je eriqui mae co. Dios riqui ndeicuate co. ³² Mbia mo emondo rã Jópee. Hue Simón Pedro ndiqui hue. Hue eriqui Simón Curtidor chuchúaa hue. Ama ndisha rimiã ndese eriqui hue. Sã nderimba mo erurucuaẽ aa”, i que ángel seje ra. ³³ Nyebe serimba amondo jei nderea. Coche erechu nguiã seje aa. Ndecheẽ andu sacua ño urecu nguiã aa. Dios cheẽ esenei na ure je cote. Ae Dios mondo ndeje, erenei sacua ure je, i que Cornelio Pedro je ra.

³⁴ Pedro que ñee ee cote ra. — Judíos achõ je eã ño Dios turã ndiqui reaẽ. Mbiamo abe chõ ebi riqui reaẽ. ³⁵ Mbiamo abe ireĩ ireĩ chĩ nguiã Dios si re. Ibimo jenda re. Ñquĩ siqui turã ño nguiã Dios je reaẽ. Nyebe Dios abe eturã ndiqui ñquĩ je reaẽ. Judíos achõ eã ndaque. ³⁶ Dios que ucheẽ turã mondo judíos je ra. Dios cheẽ turã ngue tu Jesucristo rĩ nda. Ae rei aba mbiãsa. Jesucristo rei mbia rerecua tuchi. ³⁷ Judío recua ja que Dios cheẽ turã ndiqui ã ndesẽ. Juan Bautista reco mose que Dios cheẽ ngasẽ judíos ja je ra. Juan Bautista que Dios cheẽ senei senei Galilea ra. Aque mose rane ngue Dios cheẽ ngasẽ judíos ja je cote ra. Ñquĩ jẽicua tuchi quia ã ndesẽ. ³⁸ Jesús siqui turã jẽicua quia resẽ. Jesús Nazaret jenda siqui turã mbei. Dios que Jesús mbuquirãcuã Espíritu Turã je ra. Dios que siqui tuchi erese ra. Nyebe eriqui nguiã mbae turã naa naa. Nyebe eriqui nguiã aba checuayã icuã jea jea mbia si. Ñquĩ jẽicua quia ã ndesẽ. ³⁹ Jesús chimbaaquiãtu chõ ureico nguiã ã. Jesús chisaã ndese que ureico mae mae huee ra. Judea rui ja. Jerusalén abe que ureico mae mae echisaã ndese ra. Huee Jesús reco mose que

mbia eiquia cote ra. Huee que mbia embucha ira rese ra. Eiquia sacua. ⁴⁰⁻⁴¹ Dios que Jesús mbuquera si cote ra. Tres días mose. Dios que Jesús mbuchecua ure je cote ra. Mbia ja je embuchecuayã. Ure je achõ ngue embuchecua ra. Uchiirabo achõ je. Jesús renei nenei sacua ngue Dios ureirabo ra. Urequiaru que Jesús rese ra. Jesús quera ico. Mbae mo abe que urembei erese ra. ⁴² Jesús que uremondo mbia mbiirandu randu sacua ngũĩ nda. “Secheẽ turã jẽsenei senei nguia mbia je. ‘Dios que Jesús mĩ nda. Mbia mano je icuã ndea sacua. Manoã je abe icuã ndea sacua. Jesús r a eicuã tea ja’, jenyẽ quia mbia mbiirandu randu”, i que Jesús ure je ra. ⁴³ Dios cheẽ mbuchecuasa ja que embesa mbesa Jesús rĩ cose ra: “Dios turã nda eriqui Jesús icuasa je. Dios ra Jesús icuasa icuã mbutiã tiã esi”, i que Dios cheẽ mbuchecuasa ra, i que Pedro Cornelio je ra.

Espíritu Turã ique judíos eã chianguire

⁴⁴ Pedro cheẽ mose que Espíritu Turã ndu ique eandusa chianguire ra. Eandusa chianguire ja ique. ⁴⁵ Pedro resenda judíos que nyuruira tuchi ra. — Judíos eã je abe chõ Dios riqui Espíritu Turã mondo mondo re, i que judíos Jesús quiato u nyuruira ra. ⁴⁶ Judíos eã ngue mbiamo ñee saã saã nda. Espíritu Turã ique mose echianguire. Ñee turã ja Dios rĩ. Nyebe judíos ñee. — Ñ ñiangui re abe Espíritu Turã iquechĩ. Judíos eã ndaque, i que eandu ra. Pedro que ñee nguesenda je cote ra. ⁴⁷ — Espíritu Turã ngue ique echianguire cote ra. Nyebe bautizar tae ee i je cote. Emo nda seriquisãyã, i que Pedro ra. ⁴⁸ Nyebe que Pedro bautizar i ee ra. Jesucristo rimbarã ngue bautizar i ee ra. Aquereque ñee ja Pedro je ra. — Eitõ mocoĩ jiri quia ure rese aa, i que ee ra.

11

Pedro Jerusalén jenda mbiirandu ja

¹ Jesús chĩmbaaquiato que jirandu erese ra. Judíos eã ndese. Jesús quiato Judea jenda abe que jirandu erese ra. —Judíos eã abe riqui Dios cheẽ isi isi ã, i que mbia ee ra. ² Pedro que oso Jerusalén cote ra. Huee que judíos ñee asi asi ee cote ra. ³ —Mbiamo je ereso chõchĩ. Judíos eã je ereso chõchĩ. Judíos eã ndese ereiaru chõchĩ, i que ñee asi Pedro je ra. ⁴ Pedro que embiirandu tuchi cote ra. ⁵ —Emo mose que aico Jope ra. Huee que aico ñee ñee Dios je ra. Mbae mo ngue atea cuu ra. Tiru icoi mo ngue tu ibate si cuu ra. Echimangũiana isi ji que tu nguichi seje cuu ra. Echimangũiana isi ji ja. ⁶ Mbae chumumbara tuchi que tu aque tiru ye cuu ra. Quiaa rĩnda ja. Mbei abe no. Nguireĩ abe no. Mbae ibi rĩnda ja tuchi que chi tiru ye cuu ra. ⁷ Echeẽ mo ngue tu seje cote ra. “Ehuã na, Pedro. Emo eiquia ndechiurã”, i que seje cuu ra. ⁸ “Tei, Sererecua. Urechĩu eã ño ã ndesẽ. ã mo ngue ureu eã mbei quia ra. Mbaeia tuchi ure je judíos ja je”, ae rei que ee ra. ⁹ Dios que ñeembe seje ra. “¡Sechĩmee ndechiurã nda ereisi teãchĩ jẽ!” i que seje ra. ¹⁰ Eĩ si que tiru icoi ru tres veces ra. Oso bei que ibate serecha cote ra. ¹¹ Aque mosete que Cornelio rimba ngasẽ seje ra. Seruruchoi sacua ngue ecuaẽ Cesarea si ra. Tres que ngaẽ seruruchoi sacua nda. ¹² “Eso rã erese. ¡Esiquicheã oso erese jẽ!” i que Espĩritu Turã seje ra. ã nanderesenda seis que nyoĩ serese ra. Urecuasẽ ngue emondosa chuchua ra. Cornelio chuchua. ¹³ Cornelio que uquereĩcuã senei ure je ra. “Angel mo ngue tu ñee seje ra. ‘Mbia emondo Jópee Simón Pedro rea. ¹⁴ Ae ra ñee ñee nguia jẽje. Ndechuchua jenda je abe ra eriqui ñee ñee. Dios jendirõ sacua jẽicuã si’, i que ángel seje ra”, i que Cornelio seje ra. ¹⁵ Se ñee namo mose ee que Espĩritu Turã nguichi ee ra. Ique que echiangui re ra. Ique que nandechiangui re nyii nae, eĩ si que ique Cornelio chiangui re cote ra. Cornelio chuchua jenda chiangui re

abe. ¹⁶ Jesús cheẽ ndese que andua ndua cote ra. ã ndei echeẽ ã: “I je que Juan bautizar i rei mbia je ra. Espĩritu Turã je bautizar tae jẽje cote”, i que Jesús cose ra. Aque rese que andua ndua cote ra. ¹⁷ Nande judíos achõ je eã ño Dios riqui nguia Espĩritu Turã mondo. Judĩ eã je abe chõ eriqui nguia Espĩritu Turã mondo. Jesús icua mose. ¿Mañĩ ae ra Dios riquisã se re? i que Pedro ñee oco judíos je ra. ¹⁸ Mbia que Pedro cheẽ sobeishiãte ra. Ñee turã turã ngue Dios je cote ra. —Dios judío eã abe mbui mbui quiato quia huĩcuã si reaẽ. Judío eã abe chee ra siqui bei Dios rese nye, i que judíos ra.

Antioquia jenda Jesús quiato

¹⁹ Mbia icua tuchi que eriqui Jesús quiato je cote ra. Esteban icua mosebe bei que mbia icua ndiqui Jesús quiato je ra. Nyebe Jesús quiato choi nguia uchã Jerusalén si. Emo nyoĩ Feniciaa. Emo nyoĩ Chipre no. Emo nyoĩ Antioquia no. Huee ja que echĩ Jesús cheẽ turã nenei nenei nda. Judíos achõ je que echĩ erenei nenei nda. Judío eã je erenei nenei eã. ²⁰ Chipre jenda rei emo. Cirene jenda rei emo no. Ñquĩ nguia que nyoĩ Antioquiaa ra. Ñquĩ nguiatu que Jesús cheẽ senei senei judío eã je ra. ²¹ Dios quirãcuã ngue siqui tuchi embiirandusa rese ra. Nyebe que hue jenda tubiriã Jesús icua ra. ²² Jesús quiato Jerusalén jenda que jirandu erese ra. Antioquia jenda rese. Nyebe Bernabé mondo Antioquiaa. ²³ Bernabé que ngasẽ ñee Jesús quiato je ra. —Dios turã tuchi riqui nguia jẽje co. Aque rese seyate riqui co. ¡jẽingo tuchi nandererecua rese jẽ! ¡jẽhuichĩ nda esi jẽ! i tuchi que Bernabé quia mbia je ra. ²⁴ Bernabé turãt e que eriqui ra. Espĩritu Turã ngue siqui tuchi erese ra. Ae que Dios icua tuchi quia ra. Nyebe mbia tubiriã ndiqui nguia Jesús isi isi. ²⁵ Aquere que Bernabé si Tarso ra. Oso que Saulo requia huee ra. Tea que ra. Nguerao que Antioquiaa ra. ²⁶ Huee que echĩ bei

Jesús quiato mbaaquiato quiatu ra. Un año que echi huee ra. Mbia tubiriã mbaaquiato quiatu bei. Hue jenda je rane ngue “Cristianos” i Cristo quiato je ra.

²⁷ Aque mose que Dios cheẽ mbuchecuaa mo ngaẽ Antioquíaa ra. Ngaẽ ngue Jerusalén si ra. ²⁸ Emo ngue juã ñee mbia je ra. Agabo, i que ee ra. Espíritu Turã ngue Agabo mbucheẽ ñee nda. —Mbia chiurã eã nda namo jiri. Mbia riãcuã ja ra cote, i que Agabo ra. Echeẽ nguire tuchi que mbae ua cote ra. Mbia riãcuã tuchi que cote ra. Claudio mbia rerecua mose. ²⁹ Nyebe Jesús quiato Antioquíaa jenda ñee ñee nyue. —Mbae mo nandemondo rã Jesús quiato Judea jenda je. Nandembae mbae mo nandemondo ee, i que nyue ra. ³⁰ Eĩ ngue umbae mondo mondo Judea jenda je ra. Mee mee ja que Saulo je ra. Bernabé abe je. Ũquí ngue ecuruchoi cote ra. Ae emee nguiã Jesús quiato rerecua je. Judea jenda.

12

Mbia Jacobo iquia; mbia Pedro tarõ

¹ Aque mose que ererecua icuã tuchi riqui Jesús quiato je ra. Herodes, i que ererecua je ra. ² Ae que Jacobo ãquĩ ndoso ti quise je ra. Jacobo rei Juan nongue. ³ Judíos ia tuchi que Jacobo ãquĩ ndoso mose ra. —Judíos tambiabe no, i que ererecua ra. Nyebe Pedro abe isi nguiã. Fiesta de Pascua mose que Pedro isi nguiã. ⁴ Tarõ ngue mi mbia icuã tarõsaa ra. Diez y seis soldados que chi eraarõ mbei ra. —Pedro tamee je mbia je. Eiquia sacua. Fiesta ua mose r a amee ee, i rei que ererecua uchiangui re ra. ⁵ Nyebe que soldados Pedro tarõ ji raarõ tuchi u ra. Pedro resenda que ñee ñee tuchi Dios je ra. Jesús quiato mo. Ñee ñee tuchi que equia Pedro rii ee ra.

Dios Pedro sirõ nyecuayã etaronda si

⁶ Isamami nda ererecua Pedro mee nguiã mbia je chã nde. Eiquia sacua. —Isamami nda amee mbia je, i rei

que Herodes ra. Aque isa que Pedro uque u soldados joõ ñi nda. Ecuã ji que uque u ra. Cadena nyeremo je que ecua ino nda. Soldados nyeremo ngue uqueã u eraarõ nda. ⁷ Ibatenda mo ngue tu Pedro je isa ra. Angel. Nyaashĩ na tuchi que tuchia ra. Mbae resae ja. Ibatenda que oco Pedro rese ra. Emumba. —¡Ehuã asi jẽ! i que Pedro je ra. Ehuã mose que cadenas nyera eo si ra. ⁸ —Ndeirao emingue ja rã. Ndeiyao abe emingue, i que ibatenda ee ra. Ae que Pedro emingue echeẽ mose ra. —Ndeirao aronda abe emingue. Nyao serese cote, i que Pedro je ra. ⁹ Pedro que oso erese ra. Etaronda si que Pedro rerao cote ra. —Seque re chõ aico rei co, i rei que Pedro ra. Equereicuã eriqui rei nguiã ee. ¹⁰ Eraarõsa cuaãcuã ngue echoi quia ra. Eraarõsa jiranua tuchi erese. Ngasẽ nyee que etaronda icoi ra. Fierro que etaronda ra. Etaronda a e que nyeequia ee ra. Usẽ ngue ra. Pe jiri que echoi nyiese ra. Ibatenda que oso Pedro recha cote ra. ¹¹ —Cu u eã ño eriqui re. Echecua chõ eriqui re, i que Pedro eicua cote ra. —Dios chõ ibatenda mo mbu serirõ sacua nde. Serirõ ño equia Herodes si re. Judíos ra sei quiayã cote, i que Pedro uchiangui re ra.

¹² Pedro que ndua ndua huĩ nda. Ae esi nguiã María chuchúaa. María rei Juan Marcos si. Mbia tubiriãte que chi ñumunua huee ra. Ñee ñee ngue u Dios je ra. ¹³ Pedro que ngasẽ eiquesa mbuu mbuu ra. Nyucuaaque mo ngue oso rei ee ra. Rode, i que ee ra. ¹⁴ Pedro cheẽ ngue eicua ra. Eya tuchi que nyebi asi oso mbia mbiirandu ra. Eiquesa equia rocoĩ Pedro je. —Hue Pedro ñi taicuee hue, i que embiirandu ra. ¹⁵ —Tei. Echeẽ ñooñoa na, i chõ ngue mbia Rode je ra. —Ae beite. Acheẽ ñooñoa ño jẽje re, i tuchi Rode. —Pedro eã ño ñene. Eãingue chõ ñee ndei ndeje, i ja rei que mbia nyucuaaque je ra. ¹⁶ Eiquesa que Pedro mbuu mbuu bei huĩ mbia je ra. Emo ngue oso cheete rei eequia ee

ra. Pedro que ique cote ra. Ñumunua je que nyuruira tuchi mae erese ra. ¹⁷ Pedro que mbia mbuquiriri o je ra. Mbae que esenei ja ee cote ra. —Eĩ ngue Dios serirõ setarõsa si ra, i que erenei nenei ja ee ra. —Jacobo jembiirandu ja rã serese. Jesús quiato ja jembiirandu, i que Pedro ra. Pedro que oso mbia recha cote ra.

¹⁸ Isamamimbe que soldados pare pare i tuchi ra. Pedro oreã ndese mae. —¿Mañi Pedro usẽ nde? i que u ñee ñee nyue ra. ¹⁹ Herodes que ñee nda. Ererecua. —Pedro jendu rã seje, i rei que soldados je ra. Pedro oreã ngue ee ra. —Sembiiirandu ja rã se. ¿Mañi Pedro si usẽ nde? i que ererecua soldados je ra. Soldados que eicuayãte ee ra. Nyebe que ererecua soldados iquia nguiã. Pedro raarõsa iquia ja. Aquere que Herodes si siri Cesaréaa ra. Judea si siri.

Herodes mano

²⁰ Herodes que mbia chiurã mondo mondo Tiro jenda je nyii ra. Sidón jenda je abe no. Paama i que ee cote ra. Nyebe echiurã mondo monoa ee cote. Nyebe que ñquĩ nyoĩ ja Herodes chuchúaa ra. —¡Nandeturã mbei chõ ee jẽ! ¶ nda nandechiurã mondobe nande je, i que nyue ra. Herodes re- senda mo ngue ñee turã ee ra. Blasto, i que aque je ra. —Echeẽ turã turã Herodes je ure rĩ. ¶ nda eturambe ure je, i que mbia Blasto je ra. ²¹ Emo mose jiri que Herodes huirao turã mingue ra. Ngoi que ngũenda icoi tose ra. Jenyu seje, i que Tiro jenda je cote ra. Sidón jenda je abe no. Herodes que ñee ocote ñquĩ je cote ra. ²² Mbia abe que ñeete ee cote ra. — Dios chõ nde resẽ. Dios cheẽ na si nde. Mbia cheẽ na eã, i que mbia Herodes mbucuasú i i ra. ²³ —Dios eã ño se re, i eã mbei que Herodes mbia je ra. Ñee turã eã ngue equia Dios rĩ nda. Nyebe Dios embasi nguiã. Nyebe Dios ángel mo mbu nguiã Herodes mbasi tuchi. Erosee que erie u ra. Eiquia nonde. Mano ngue cote ra. ²⁴ Jesús quiato que

Jesús cheẽ senei senei tuchi quia ra. Mbia tubiriã ngue echandu chandu quia ra. Mbia tubiriã ngue Jesús icua icua quia cote ra. ²⁵ Bernabé que nyoĩ Jerusalén nda. Saulo rese. Mbae isiquia ruruchoĩ sacua. Mbae isiquia que emee mee Jesús quiato hue jenda je cot e ra. Nyoĩ que Antioquíaa cote ra. Juan Marcos abe que ecuruchoĩ nyiese ra.

13

Espíritu Turã Bernabé mondo Dios cheẽ nenei nenei sacua, Pablo rese

¹ Jesús quiato que ñumunua nua nguia Antioquíaa jenda ra. Mbia mbaaquiato quiatusa abe que chi erese ra. Dios cheẽ mbuchecua mo abe que chi erese ra. Bernabé, i que emo je ra. Simón nondeĩ abe que ra. Lucio de Cirene abe que ra. Manaén abe que ra. Ae rei que Herodes re- senda eñetẽ mose ra. Herodes erere- cua nonde. Saulo abe que ra. Ñquĩ ja que mbia mbaaquiato quiatusa ra. ² Emo mose que ñquĩ nyi ñumunua nda. Ñee ñee ngue u Dios je ra. Uchiu si que hui ra. Ndua ndua sacua Dios rese. Aque mose que Espiritu Turã ñee ee ra. —Bernabé jemee na seje. Saulo abe jemee na seje no. Ñquĩ ngue airabo ra. Airabo que secheẽ nenei nenei sacua nda, i que Espiritu Turã ñee ñumunua je je ra. ³ Mbia que ñee turã mbei Dios je ra. Quiaruã mbei que u ra. O que echono ñono Bernabé ñquĩ ndese cote ra. Saulo ñquĩ ndese abe no. Mondo que Dios cheẽ nenei nenei sacua cote ra.

Pablo Dios cheẽ senei senei Chípree, Bernabé rese

⁴ Aquere que Espiritu Turã Bernabé curuchoĩ Selúciaa ra. Saulo rese. —Ama ndui nyao Chipre, i que ua canoa cuasu ye ra. ⁵ Ngasẽ ngue sucha tubiriã Salamina nda. Salamina ndeĩ Chipre jenda mo. Judíos chumunuasaa que echoĩ Dios cheẽ nenei nenei nda. Juan Marcos abe que siqui erese Dios cheẽ nenei nenei nda. ⁶ Tuchua que embuchesea sea tuchi ra. Ngasẽ nyee Pafos. Huee

que brujo mo ndiqui ee ra. Barjesús, i que brujo je ra. Judío mo ndei aque brujo. —Dios cheẽ mbuchecuasa rei se, ichõ:ño mbei que equia mbia je ra. ⁷ Brujo que siqui ererecua rese ra. Sergio Paulo, i que ererecua je ra. Ererecua aquiatu tuchi que ra. —Jenyu, Dios cheẽ tachandu rã, i que ererecua Bernabé je ra. Saulo je abe no. ⁸ Brujo que Bernabé cheẽ siquisã nda. Pablo cheẽ abe riqisã. —ƒ nda sererecua Jesús icuayã, i tuchi brujo ùquĩ ñee ndiquisã. Elimas, i abe que brujo je ra. ⁹ Espíritu Turã ngue siqui tuchi quia Pablo rese ra. Pablo, i abe que equia Saulo je ra. Pablo que ma e quiatu brujo rese ra. ¹⁰ Ñee ngue ee ra. —Mbia mbiĩrĩ irĩsa tuchi quiarei nde. Diablo resenda tuchi quiarei nde. Mbae turã ndesenda reã tuchi quiarei nde. ¿Mbaerã ereico mbia riqisã quisã Dios icha si re? ¿Manose ra erehuĩ ùquĩ si re? i que Pablo ñee icuã ee ra. ¹¹ —Dios ra nembasi tuchi cote. Nderesayra cote. Tenda rese ra ereico mae eã are jiri, i que Pablo brujo je ra. Echeẽ mosebe que eresa uque tuchi ra. Mae eã mbae rese cote. —Jenyiba taisi. ¡Sembucuata turã na nguia jẽ! i tuchi eresayã nguia mbia je cote. ¹² Ererecua que echandu ja ra. Nyebe ngue Jesús icua nguia cote. Nyuruira tuchi que huĩ Jesús cheẽ andu ra.

Pablo que siqui Antioquíaa ra; Bernabé rese

¹³ Pablo que nyoĩ Pafos recha cote ra. Nguesenda rese que echoĩ ama ndui ra. Ngasẽ ngue Perge de Panfíliaa ra. Huee si que Juan Marcos si nyebi Jerusalén nda. Pablo recha. Bernabé abe recha. ¹⁴ Emo mose que echoĩ Perge si ra. Ngasẽ ngue sucha tubiriã Antioquíaa ra. Pisidia, i que hue ibi je ra. Sábado mose que ique judíos chumunuásaa ra. Huee que echĩ ngoi ra. ¹⁵ Judíos que leer i Dios cheẽ je ra. Moisés chimbesa je. Dios cheẽ mbuchecuasa chimbesa je abe no. Aquere que judíos ñee Pablo je ra. Bernabé je abe no. —¿Mbia ra

jembaaquiato quiatu jẽ nde? i que ee ra. ¹⁶ Pablo que juã cote ra. O je que mbia mbuquirĩ ra. Ñee ngue ee cote ra. —Seandu rã se, Israelitas. Seandu rã se, Dios quiato. ¹⁷ Dios que Israelitas rerecua ra. Dios que nanderamei cose ndare irabo ra. Siqui tuchi que equia nanderamei ndese ra. Nanderamei chi mose Egipto. Dios que nanderamei mbeta mbeta ra. Dios quirãcuã ngue nanderamei sirõ nyee Egipto si ra. ¹⁸ Dios que nyecuachõ tuchi quia nanderamei je ra. Cuarenta años que eriqui nyecuachõ tuchi ra. Nanderamei chi mose turuquia. ¹⁹ Sucha tubiriã jenda que mano ja mbiamo nda. Dios que eiquia ja ra. Siete rei sucha tubiriã. Canaán jenda. Dios que ùquĩ iquia ja nanderamei si ra. Ùquĩ mbae ibi que Dios mee nanderamei je cote ra. ²⁰ Dios que jueces mii mii nanderamei nderecuarã cote ra. Jueces que emii mii nguia cuatro cientos cincuenta años nda. Aquere que Dios Samuel mii nanderamei nderecuarã nda. ²¹ Aquere que nanderamei ñee Dios je ra. “Rey mo nguia emii urererecuarã”, i que Dios je ra. Nyebe que Dios Saúl mii ererecuarã nda. Rey. Ae rei Cis riirĩ. Cis rei Benjaminito. Saúl que siqui arete nanderamei nderecuarã nda. Cuarenta años que eriqui ererecuarã nda. ²² Cuarenta años ua mose que Dios Saúl mombo cote ra. Dios que David mii nanderamei nderecuarã cote ra. Saúl rendaque re. David rei Isaí riirĩ. Dios que ñee David je ra. “David sebi tuchi. Ae quia ra secheẽ mumba mumbayã”, i que Dios cose ra. ²³ David sí que Jesús ramei nda. Dios que Jesús mbu Israel jenda rirõ sacua huĩcuã si ra. Ucheẽ nguire que Jesús mbu ra. Dios que ucheẽ mbuchebiã nda. ²⁴ Jesús tu nonde que Juan Bautista riqui ñee ñee nanderamei je ra. Israel jenda je. “Jẽicuã si jẽhui. Jemba Dios icha rui. ƒ nda bautizar ae jẽje”, i tuchi que Juan nguia mbia je ra. ²⁵ Umano nonde que Juan ñee mbia je ra. “Ae jësaarõ

nguia nae, ae eã ño se re. Ae ra tu serui. Ae rei ererecua tuchi sesi. Se oco aronea eiyao rese”, i que Juan ñee Jesús rĩ nda.

²⁶ Seresenda, Abraham ndiirĩ ndei jẽ. Jemo ndiqui Dios icua ã. Nande je quia Dios ucheẽ mondo nguiã. Nanderirõ sacua nandecuã si. Dios que Jesús mondo nande je ra. ²⁷ Jerusalén jenda que Jesús icuayãte ra. Ererecua ja que chi Jesús icuayãte ra. Dios cheẽ mbesa ji abe que eicuayãte ra. Eraã naa mbei raque sábadu mose, eicuayã mbei. Dios cheẽ mbuchecua cheẽ nguire que Jesús iquia ra. ²⁸ “Jesús eiquia rã”, i tuchi que mbia quia Pilato je ra. Jesús icua eã ndaque. ²⁹ Nyebe que Jesús mano ndei ra. Embesa ji cheẽ nguire que Jesús mano nda. Jesús raaque que embuquichi ira si cote ra. Ñono ngue sita ribicoi ji ye ra. ³⁰ Jesús que quera si manonde cote ra. Dios que embuquera si ra. ³¹ Galilea jenda que siqui bei quia Jesús rese Jerusalén nae, ñqui ngue mae mae equera si rese cote ra. Mae mae mbei equia Jesús quera si rese cote. Ñqui ñee mbei quia Jesús rĩ ã cote. ³² A ureico Dios cheẽ turã nenei nenei jẽje a. Dios ñee ñee nguia nanderamei je nyii nae, ñqui uresenei senei nguia jẽje a. ³³ Nande je que Dios Jesús mbuquera si ra. Ucheẽ nguire que embuquera si ra. Dios ñee ñee nguia nanderamei je nyii nae, eĩ si que Jesús mbuquera ra. “Nde rei serucucha. Namo ngue arembuchecua mbia je ra”, i que Dios Jesús rĩ cose ra. Eĩ ngue Salmo dos nda. ³⁴ Dios que Jesús mbuquera si ra. Jesús roo ra soõ eã mbei cote. Nyebe que Dios ñee nyii ra. “Seturãte ra jẽje. Seturã David je nyii nae, eĩ si ra seturãte jẽje”, i que Dios ra. “Jesús tambuquera si jẽje”, i ñene. ³⁵ Co abe rei embesa ji. Ñ ndei e ã: “Se rei Ibatenda rucucha turã. Ibatenda ra seroo sechayã. Seroo ra emoo eã. Sembuquera si rae”, i que embesa ji ra. ³⁶ David que siqui turã mbei quia uchabenda ja je ra. Dios

cheẽ nguire que eriqui turã ee ra. Aquere que mano nda. Mbia que echati ngãmei jii rĩ nda. Aquere que David roo soõ cote ra. ³⁷ Jesús roo quiatu que soõ eã nda. Dios que embuquera si resẽ. Nyebe ae roo soõ eã nguiã. ³⁸ Seresenda, Jesús mĩ ndiqui nandecuã mbutiã sacua co. A ureico ñqui nenei nenei jẽje a. Jẽirandu sacua erese. ³⁹ Dios que ucheẽ senei senei nguia Moisés je nyii nae, aque cheẽ nguia r a aba icua mbutiã eã. Jesús mĩ ndiqui nandecuã mbutiã sacua co. Nande Jesús icua mose. ⁴⁰ “Mbae icua nda tuchi jẽje”, i que Dios cheẽ mbuchecua ra. Jẽtesa bei u jẽ. Sã Dios cheẽ mbuchecua io eã jẽje. Eĩ ngue Dios cheẽ mbuchecua ra:

⁴¹ Co jẽ, mbae turã ucuayãsa.

Je nyuruira rae. Jemano ndae.

Mbia mae sayã nda asaã ndaque jẽje. Jẽicua sereãte ra equia.

Mbia embuchecua raque jẽje. Nyebe ra jemano,

i que Dios cose ra, i que Pablo ra.

⁴² Pablo que usẽ nyoĩ echumunua si cote ra. —Jenyube rã sábadu nongue. Ñqui jẽsenei seneimbe rã u ure je, i que mbia ee ra. ⁴³ Mbia que usẽ ja echumunua si cote ra. Judíos tubiriã ngue nyoĩ Pablo rui ra. Bernabé rui abe no. Judíos resenda tubiriã abe no. Pablo que ñee tuchi mbia je ra. Bernabé rese. —Dios rese jẽingo tuchi jẽ, i tuchi que equia ee ra.

⁴⁴ Sábado nongue mose que sucha tubiriã jenda ñmunua ja ra. Ñmunua nua ja Dios cheẽ andu. ⁴⁵ Judíos mo ngue chi mae mae mbia chumunua ndese ra. —Pablo cheẽ ño echanuchi nguiã. Nandechẽ andu rocoi, i que judíos ngueteã mbia rese Pablo si ra. Nyebe judíos ñee icua icua nguiã Pablo je. ⁴⁶ Pablo que siquicheã tuchi ñee judíos je ra. Bernabé rese. — Jẽ nane je ureico rei Dios cheẽ nenei nenei ã. Dios cheẽ nguire ureico rei nguiã erenei nenei jẽ nane je ã. Ibate jẽingo bei sereã ñochĩ. Nyebe jẽingo nguiã Dios cheẽ isiteã teã ã. Nyebe ureso nguiã erenei nenei judíos eã je

co. ⁴⁷ ã ngue Dios ñee ure je cose ra: “Aremingo que secheẽ nenei nenei sacua mbia ja je ra. Judíos eã ja je. Mbia ibi jenda ja je. Secheẽ isiquia ra siqui bei”, i que Dios ure je ra, i que Pablo ra.

⁴⁸ Judíos eã ia tuchi que Pablo cheẽ ndese ra. Ñee turã turã ngue Dios cheẽ nã nda. Dios que mbia irabo ata ra. Emingo bei sacua ibate. Ûquí ngue Jesús icua ja cote ra. ⁴⁹ Hue jenda ja que embucha mbucha quia Dios cheẽ nenei nenei nda. ⁵⁰ Judíos que mbia mbuqueta queta tuchi Pablo je ra. Bernabé je abe. Ari mbia chucua mbuqueta tuchi que ra. Amei mbia chucua abe mbuqueta que ra. Nyebe mbia paama i ja Pablo je. Bernabé je abe. Nyebe Pablo mombo nguiã hue si. Bernabé abe mombo no. ⁵¹ Nyo nonde que hui tubi mbutomo tomo mbia je ra. —Jêicuã têicua, i ñe hue jenda je re. Aquere que echoi Iconio nda. ⁵² Jesús quiato ia tuchi que chi ra. Espiritu Turã ngue siqui tuchi quia erese ra.

14

Pablo que siqui Iconio nda, Bernabé rese

¹ Pablo que ngasẽ Iconio nda. Bernabé rese. Judíos chumunuasa que echoi ra. Dios cheẽ ngue esenei senei huee ra. Nyebe que judíos tubiriã Jesús icua ra. Judíos eã abe que eicua no nda. ² Judíos ataque que Jesús cheẽ isiteã teã no nda. Ûquí ngue judíos eã mbucua icua Pablo je ra. Bernabé je abe no. Ñee icua icua tuchi eriã. ³ Pablo que chi arete huee ra. Bernabé abe no. Siquicheã tuchi que equia Dios cheẽ nenei nenei nda. Ebia tuchi Dios rese. Dios que embuquirãcuã nda. Nyebe que eriqui mbia mae sayã naa naa nda. —Ichõño eã ño equia re, i chee mbia Pablo cheẽ je. Bernabé cheẽ je abe no. ⁴ Mbia cuabẽ ndua turã ja eã. Emo emo ngue siqui Jesús resenda rui ra. Emo emo ngue siqui judíos rui no nda. ⁵ Nyebe judíos icua icua

Pablo je. Pablo resenda je abe no. Judíos eã abe eicua icua ee no. Mbia rerecua abe que eicua icua ee ra. — ¡Pablo nandei quia jê! ¡Bernabé abe nandei quia jê! ¡Sita nande mombo mombo erese jê! i rei que mbia ra. ⁶ Pablo que jirandu erese ra. Bernabé abe. Nyebe echoi uchã sucha tubiriã mo. Licaonia jenda. Listra, i sucha tubiriã mo je. Derbe, i emo je. Hue rurubi que echoi ra. ⁷ Hue jenda je que Dios cheẽ nenei nenei nda.

Mbia sita mombo mombo Pablo rese

⁸ Ngasẽ ngue Listra ra. Huee que emo ngatayã ñi ee ra. Eitãquei mosenda bei ei icua. Nyebe ngatayã mbei. ⁹ Aque que Pablo cheẽ ñandu ra. —Sembucherõ arõ, i ndua uchianguire. Pablo que eicua ra. Nyebe e mae nguiatu erese. ¹⁰ Ñee nyecua que ee ra. —Ehuã ndei rese, i que Pablo ee ra. Ecuatayã ngue juã asi ngata cote ra. ¹¹ Mbia tubiriã ngue chi mae Pablo chimbucherõ ndese ra. Nyebe ucheẽ naa naa u nyue. Pablo rii ñee ñee. —Dios ngaẽ nguichi nande je mbia rã sí a, i rei que nyuruira ra. Tasẽ tasẽ. Licaonia, i hue jenda cheẽ je. ¹² Mercurio reĩ nda Pablo mbia je. Mercurio, i mbia umbae dios mo je. Pablo que ñee mbeite quia ra. Nyebe “Mercurio” i mbia ee. Jupiter reĩ nda Bernabé mbia je. Jupiter, i mbia umbae dios mo je no. ¹³ Hue jenda que ñumunua nua nguia ñee ñee Jupiter je ra. Ae ñee ñee nguia Jupiter je, aque que ticuas quimbae queru Pablo je ra. Ira uti resebe ereru ee. —Ticuas nandei quia quia rã Pablo je. Nandesei sei ee, i ja que mbia ra. —Pablo rei Dios rã si. Bernabé rese. Nyebe ticuas nandei quia quia rã ee. Dios raanguia je, i rei que mbia ra. ¹⁴ Pablo que ehandu ra. Bernabé rese. Nyebe huira ndoro ndoro paama i ee. —Ureya eã jendese, i ñe ne. Ique que echoi mbia ite ite rii nda. Ñee asi asi mbia je. ¹⁵ —¿Mbaerã nda re, mbia? ¿Mbaerã nda ticuas jêiquia ure je re? Mbia chõ ure re.

Jē na si chō ure resē. Dios eã ño ure resē. Nyebe urechu nguiã Dios cheē turã nenei nenei jēje ã. Ñ mbae icuã jēsecha ja chō. Dios quiarei ereco. ¡Ae rui jēingo! Ae que ibei chao ra. Ae que ibi chao no nda. Ae que ama nyao no nda. Ae que mbae chao ja ra. Mbae aosa rui jēingo. ¹⁶ Dios que mbia teachō cose ra. Mbia tesarei mose esi. ¹⁷ Dios que eturã saã saã mbei quia mbia je ra. Mbi a eicua sacuã. Dios chō ama mbuchaaqui bei nguiã nande je. Ae quia mbae a mee mbei nguiã nandechiurã. Dios chō nandembia mbia bei nguiã co, i que Pablo mbia je ra. ¹⁸ Eĩ ngue Pablo embiirandu Dios rese ra. Nyebe que mbia ticuasú iquia eã nyee ee ra.

¹⁹ Emo jiri mose que judíos ngaē huee ra. Antioquíaa si. Iconio si abe no. Ũquí ngue mbia mbicuã icuã Pablo je ra. Nyebe que mbia sita mombo mombo tuchi Pablo rese ra. Pablo manote rei nguiã ee. Mbia que ecuruchoi mbutiriri pe jiri sucha tubiriã si. ²⁰ Hue que Jesús icuasa chi Pablo matãte hue ra. Pablo que juã quera cote ra. Oso be que nyebi sucha tubiriã nda. Isamami ngue esi Derbe ra. Bernabé rese. ²¹ Dios cheē turã ngue esenei senei nguia huee ra. Derbe jenda je. Mbia tubiriã ngue Jesús icua hue jenda cote ra. Aquere que nyebi Lístraa ra. Iconioo abe. Antioquíaa abe. Huee sucha tubiriã ngue echoi nyebi ra. ²² Pablo que Jesús icuasa mbaaquiato quiato hue jenda ra. Bernabé rese. —¡Jesús rese jēingo tuchi jē! Mbia ra nandembasi mbasi tuchi. Aquere ra Dios nandererecuarã tuchi cote, i que Pablo mbia je ra. Bernabé rese. ²³ Amei mo ngue eirabo rabo mii ino huee ra. Jesús icuasa rerecuarã no hue. Ñmunua je rerecuarã jaaja. Aquere que hui uchiu si ra. Quiaruã. Ñee ñee ngue equia Dios je ra. Ñee ñee ee ererecua namonda rii. —Ñ jēingo Dios icuate ã. Sã Dios jendaarõ arõ, i que Pablo ererecuarã je ra. Bernabé rese.

Pablo ngãembe Antioquíaa, Bernabé

rese

²⁴ Nyoí que erecha cote ra. Pisidia, i equia ibi je, hue rii ngue echoi ra. Ngasē ngue Panfilia no nda. ²⁵ Jesús cheē turã ngue esenei senei sucha tubiriã Perge jend a je ra. Aquere que echoi Atalia no nda. ²⁶ Hue si que echoi ama ndui ra. Nguique riita quti que ecuaē tiba Antioquíaa cote ra. Mbia hue jenda rane nguiatu que Pablo mondo Bernabé rese Dios cheē nenei nenei sacuã nyii ra. —Chã Dios turã jendeaquiato jēso mose, i que ee nyii ra. Huee que tiba obeí cote ra. ²⁷ Ngasē mose Antioquíaa, Jesús icuasa que emunua nua cote ra. Mbae ja que esenei tuchi ee ra. —Dios que urereaquiato tuchi quia ra. Dios que urembucheē ñee nguia judíos eã je ra. Dios que Jesús icua tuchi ee ra. Nyebe etubiriã ndiqui nguiã Jesús icua cote, ure echeē nenei nenei mose, i que Pablo ra. Bernabé rese. ²⁸ Chi arete que Antioquíaa ra. Jesús icuasa ja rese echi huee.

15

Jesús quiato rerecua ñmunua ja

¹ Judea jenda mo ngue ngaē Antioquíaa ra. Ngaē ngue Jesús icuasa mbaaquiato quiato icuã nda. —Circuncisión jēsaã saã ja. Moisés cheē nguire jēsaã saã, i rei que Jesús icuasa je ra. Eracoí ire o ji je chō eriqui nguiã circuncisión, i ũquí je. —Eĩ jenyee eã mose ra jēsoã ibate, i rei que ra. ² —Tei, eĩ eã ñene, i tuchi que Pablo ee ra. Bernabé rese. —Ae beite. Pablo ñee ñooño nguiã, i tuchi Judea jenda. Nyebe ñee tuchi nguiã nyue circuncisión nii. Nyebe Jesús icuasa mondochoi Jerusalén. Jirandu sacuã circuncisión ndese. Pablo mondochoi. Bernabé abe no. Mbia mo abe no. Ũquí mondochoi ja. —Jēso Jerusalén. Jeñee Jesús quiato rerecua je. “¿Circuncisión nda uresaã saã nde?” jenyee oso ee. Sã Jesús quiato rerecua ñee jēje. Jenyu ñee ure je cote, i que ñee uchimondo je ra. ³ Jesús icuasa que embucuata turã cote ra. Mondochoi Jerusalén. Fenicia rui que

echoi ra. Samaria rui abe no. Judíos eã je rese que hue jenda mbiirandu randu ra. —Judíos eã abe que Jesús isi isi quia cote ra. Judíos eã ngue hui hui quia huicuã si cote ra, i que hue jenda mbiirandu randu ra. Jesús icuasa ia tuchi que eandu ra. ⁴ Pablo que ngasẽ Jerusalén cote ra. Bernabé rese. Nguesenda rese no. Hue jenda Jesús icuasa que eisi turã nda. Jesús quiato rerecua abe que eisi turã no nda. Pablo que Dios turã senei senei ee ra. —Dios quirãcuã ngue siqui quia ure rese ra. Ure echeẽ naa naa mose, i que embiirandu ra. ⁵ Fariseos Jesús icuasa mo ngue juã ñee cote ra. —Judíos eã Jesús icua mose, circuncisión jësaã saã ee. Jeñee na ee. “Moisés cheẽ ndui jëingo bei”, jenyẽ chõ ee, i rei que Fariseos ee ra.

⁶ Nyebe Jesús quiato rerecua ñumunua ja aque riĩ. ⁷ Ñee ñee tuchi nyue circuncisión niĩ. Aquere que Pedro juã ñee nda. —Tacheẽ se, Seresenda. Dios que seirabo cose ra. Ucheẽ turã nenei nenei sacua judíos eã je. Ûqui Jesús icua sacua ngue seirabo cose ra. Ûqui jëicuate quia ã. ⁸ Dios quia aba chiã icua jate nguiã co. Judíos eã je abe Dios Espiritu Turã mondo mondo cote. Nande achõ je eã emondo. Ûqui abe je emondo mondo Jesús icua mose no. “Judíos eã abe sequiato”, i ñee Dios re. ⁹ Judíos eã Jesús icua mose, Dios ùqui ñia mbiasu cote. Nande rã si. Nyebe Dios riqui nguiã judíos eã je abe siqui turã. Nande rã si. ¹⁰ ¿Mbaerã jëingo Dios cheẽ abi abi chõ nde? Dios cheẽ jembeta mbeta chõchĩ nguia re. Judíos eã je chõ jëingochĩ embeta re. Embeta ji chĩ nda eãtã tuchi aba je cot e re. Ûqui nanderu cose ndare saã aroneate. ¹¹ Dios turã nguia nandemingo bei nguiã ã. Dios turã nguia nandemingo bei nguiã ibate. Nande Jesucristo icua mose. Dios turã nguia judíos eã abe mingo bei nguiã ã no. Nande rã si no, i que Pedro ra.

¹² Pablo que mbae senei ja mbia je

cote ra. Bernabé rese. Mbia tubiriã ngue quiriri cote ra. Nyiisaquia que Pablo cheẽ ndese ra. Bernabé cheẽ ndese abe. —Dios que urererao judíos eã je ra. Urembirãcuã tuchi que equia ee ra. Nyebe mbia mae sayã uresaã saã tuchi ee, i que Pablo ra. Bernabé rese. ¹³ Pablo cheẽ huire que Jacobo ñee cote ra. —Seandu rã se, Seresenda. ¹⁴ Pedro que ñee jëje namo nda. Dios turãte que judíos eã je ra. Dios que ùqui mo irabo rabo nguesendarã nda. Pedro que jembiirandu erese namo nda. ¹⁵ Eĩ ngue Dios cheẽ mbuchecuasa embesa cosete ra. Nyebe eriqui nguiã eĩ eĩ ã cote. ¹⁶ Æ ndei embesa ji ã:

Se rei Dios. David reco mose que serimba siqui tuchi serese ra.

Aquere hui ja sesi cote.

Achube ra echiã mbitirõ si cote.

Siqui si ra serese cote.

¹⁷ Judíos eã abe ra siqui serese cote.

Mbia sembaerã nda siqui ja serese cote,

i que Dios ra. ¹⁸ Eĩ ngue Dios ñee mbia mbiirandu cose ra, i que Jacobo ra. ¹⁹ —Judíos eã mo ngue Dios icua icua quia cote ra. ¡Nandechẽ nandembetayã jiri ee jë! ²⁰ ¡Nandechẽ mii ño nandembesa mondo ee jë! Nandechẽ mumbayã sacua. “Mbia soo mondo mondo mose dios raanguia je, ¡aque soo ra jëuchĩ jë!” nande rã ee. “¡Jeninisi rese siqui rocoĩ nda jëingochĩ emo ndese jë! ¡Jendu rese siqui rocoĩ nda jëingochĩ emo ndes e jë!” nande chõ ee. “¡Eruqui resebe ra soo jëuchĩ jë! ¡Mbae ruqui ra jëuchĩ jë!” nande chõ ee. Ûqui mii nandembesa rã mondo ee. Nandechẽ mumbayã sacua. ²¹ Ûqui mii nande rã ee. Ûqui ño mbia ñandu ñandu mbei quia cose ndare bei. Mbia Moisés chimbesa saã saã sucha tubiriã ja je. Sábado mose bei. Judíos chumunua nua mose, i que Jacobo ra.

²² —Coche ñene, i ja Jesús quiato rerecua Jacobo cheẽ je. Jesús icuasa ja abe. Nyebe mbia nyeremo mondo Pablo rese. Bernabé rese abe. Silas, i que ee ra. Judas, i que enongue je

ra. Barsabás, i abe que equia Judas je ra. Ũquĩ ndei Jesús quiato rerecua mo. Ũquĩ ngue emondo Antioquíaa ra. —Urecheẽ jēsenei senei Jesús icuasa hue jenda je, i que Jerusalén jenda ra. ²³ Jesús icuasa que ucheẽ mbesa mondo ee ra. A rei embesai a: —Ure rei Jesús quiato rerecua. Ure rei Jesús icuasa. A ureico embesa mbesa jēje a, Jesús icuasa. Judíos eã je. Antioquíaa jenda je. Siria jenda je. Cilicia jenda je. Saludos. ²⁴ Ureresenda mo ngue nyoichĩ jembaaquiatu icuã icuã nda. Ũquĩ ñee jemingo asi asite rei. “Circuncisión jēsaã saã”, i chõchĩ equia jēje reaẽ. “Moises cheẽ ndui jēingo bei”, i chõchĩ equia jēje re. Ũquĩ uremondo eã ñee jēje. Ae ae chõ nyoĩ nguiã ñee ñooño jēje. ²⁵ Nyebe ureico nguiã ñumunua a. Emo ngue ureirabo emondo sacuã jendea ra. Nyeremo uremondo quia aque. Pablo rese. Bernabé abe rese. Urequiatio tuchi que ũquĩ nda. ²⁶ Ũquĩ ireĩ ireĩ eã tuchi nyoĩ Jesucristo cheẽ nenei nenei. Mbia eiquia arondete raque. Siquicheã tuchi. ²⁷ Aque Judas uremondo quia jendea aque. Silas rese. Ũquĩ nda jembairandu ja. Ũquĩ nda urecheẽ senei senei jēje. ²⁸ Espiritu Turã ngue urembaaquiatu ra. Nyebe ra urecheẽ tuchiã jēje. Echeẽ mumbayã sacuã. ã mii ño uremondo quia jēje aque. ²⁹ “Mbia soo mondo mondo mose dios raanguia je, ¡aque soo ra jēuchĩ jē! ¡Eruqui resebe ra soo jēuchĩ jē! ¡Mbae ruqui ra jēuchĩ jē! ¡Jenisi rese siqui rocoĩ nda jēingochĩ emo ndese jē! ¡Jendu rese siqui rocoĩ nda jēingochĩ emo ndese jē!” Coche ũquĩ jemumbayã nguiã. Aque mii ño urecheẽ urembesa mondo aque, i que embesa ra. Eĩ ngue Jerusalén jenda embesa ee ra.

³⁰ Uchimondo que emondochoi turã nda. Ngasẽ ngue Antioquíaa cote ra. Jesús icuasa hue jenda que emunua ja ra. Embesa ji que emee ee ra. ³¹ Echumunua mos e que leer i ee cote ra. Eya tuchi que erese ra.

Eya tuchi Jerusalén jenda chimbesea isi mose. ³² Dios cheẽ mbuchecuaa rei Judas. Silas rese. Nyebe que ũquĩ Dios cheẽ nenei nenei tuchi Jesús icuasa je ra. Jesús icuasa mbaaquiatu quiatu tuchi. ³³ Chi are jiri que huee ra. Jesús icuasa que embuchebi turã mondochoi cote ra. Nyoĩ que nyebi Jerusalén nda. ³⁴ Silas que siquichõ nda. ³⁵ Pablo abe que siquichõ Antioquíaa ra. Bernabé rese. Mbia que embaaquiatu quiatu quia ra. Dios cheẽ turã ngue esenei senei nguia ra. Jesús icuasa tubiriã ngue esenei senei erese ra.

Pablo nyao Bernabé si

³⁶ Aquere que Pablo ñee Bernabé je ra. —Nyao nanderique ruĩ Jesús icuasa mbuchesea sea mae ja erese. Dios cheẽ ngue nandesenei senei, hue jenda mbuchesea sea nyao. Mañi Jesús icuasa u mambi reae. Nyao erea, i que Pablo ra. ³⁷ —Eno. Juan Marcos abe nanderao, i rei que Bernabé ra. ³⁸ —Tei. Ae que nanderecha Panfiliaa nyii resẽ. Hui jei que nande si resẽ, nande Dios cheẽ nenei nenei mose. ¿Mañi nande ra ererao si re? i que Pablo ra. ³⁹ Ñee asi asi chee que nyue ra. Marcos rĩ. Nyebe que nyao nyesi ra. Bernabé que Marcos querao ra. Ama ndui que echoi Chípree ra. ⁴⁰ Pablo que ñee Silas je ra. —Nyao serese, i que ee ra. Jesús icuasa que ñee ee ra. —Chã Dios turã jendeaquiatu bei jēso mose, i ja que ee ra. Pablo que nyoĩ cote ra. Silas rese. ⁴¹ Siria rĩ ngue echoi ra. Cilicia rĩ abe no. Hue jenda Jesús icuasa mbaaquiatu quiatu que echoi ra.

16

Pablo resenda bei que Timoteo cote ra

¹ Pablo que nyoĩ Dérbee ra. Lístraa abe echoi. Huee que Jesús icuasa mo ndiqui ee ra. Timoteo, i que ee ra. Esi rei judía. Esi rei Dios icuasa. Judío eã ngue eru ra. ² Jesús icuasa hue jenda que Timoteo icua ja ra. Timoteo turãte, i ja que Jesús quiato quia ee ra.

³—Timoteo tarao serese, i que Pablo ra. Judíos tubiriã ngue chi aque ibi rui ra. —Judío eã ndei Timoteo ru, i ja judíos. Nyebe Pablo circuncisión naa Timoteo je. Nguerao nguesendarã cote. ⁴Nyoï que sucha tubiriã mbuchesea sea cote ra. Jesús quiato rerecua cheë ngue esenei senei ja quia mbia je ra. Jerusalén jenda cheë. —¡Ûquĩ ñee nda jemumba mumbachĩ jẽ! i que Pablo nyoï quia ra. ⁵Pablo que Jesús oseï uquia Jesús quiato je ra. Jesús icuasa tubiriã nia ngue esi quia cote ra.

Echu urembaaquiato quiatu, i que Macedonia jenda Pablo je cuu ra

⁶—Nyao Dios cheë nenei nenei Asia, i rei ngue re. Espíritu Turã ngue nya i ee ra. Nyebe echoï nguiã Frígiaa. Galáciaa abe. ⁷Ngasë ngue Mísiaa ra. Nyao Bitinia, i rei ngue re. Espíritu Turã ngue nya i ee ra. ⁸Misia que echucuaño nyoï ra. Ngasë nyee Troas. ⁹Huee que Pablo Macedonia jenda mo ndea isa ra. Tea que cuu ra. Chĩ nda juã ñee ñee Pablo je cuu ra. —¡Echu aa Macedóniaa jẽ! Echu urembaaquiato quiatu, i nda Pablo je cuu ra. ¹⁰Nyebe ureso nguiã ereare. Se abe que aso erese ra. Se rei Lucas. —Dios urererao quia Macedonia co. Ucheë nenei nenei sacua, ure que urechue cote ra. Nyebe urecuata nguiã cote.

Pablo tarõ ji que chi Filipos ra

¹¹Ama ndui que ureso Troas si ra. Erĩmbe que ureso iasa ra. Urecuasë nyee que oso Samotracia ra. Isamami ngue ureso Neápolis cote ra. ¹²Hue si que ureso ibi rĩ nda. Urecuasë nyee oso sucha tubiriã tuchi je. Filipos, i hue sucha tubiriã je. Romanos mbae rei sucha tubiriã. Macedonia, i que ibi ja je ra. Huee que urecu arete ra. ¹³Sábado mose que ureso ama nimíaa nda. Sucha tubiriã ndecha. Huee que judíos riqui ñumunua nua mbei ñee ñee Dios je ra. Ari que ngaë ngaë nguia huee ra. Acuanĩ mo ndese. Urecoi que Dios cheë nenei nenei ee ra. ¹⁴Lidia, i que urecheë andusa mo

je ra. Ae rei tiru rubi vender isa. Ae rei Tiatira jenda. Ae rei Dios icuasa. Dios que Pablo cheë mbuchecua ee ra. Pablo cheë ngue eisi ra. ¹⁵Nyebe que bautizar i ee ra. Echuchua jenda je abe que bautizar i ra. —Se Jesús resenda tuchi mose jẽje, jenyu uque sechuchúaa, i que Lidia ure je ra. Ñee tuchi ure je. Nyebe urererao nguiã uchuchua.

¹⁶Emo mose que ureso quia mbia ndua nduásaa Dios rese ra. Nyucuaaque mo ngue uresobeishĩ nda. Aba checuayã icuã ngue siqui tuchi quia erese ra. Aba checuayã icuã ngue mbae icua icua quia ee ra. Nyebe mbia mbae isiquia mee mee tuchi quia nyucuaaque rerecua je. Nyucuaaque cha je. ¹⁷Nyucuaaque que tu Pablo rui ra. Tu ure ja rui. Ñee ngue urerĩ nda. —Ã ndei Dios rimba ã. Ibatenda rimba. A echi aba icuã mbutiãsa nenei nenei jẽje a. A echi Jesús renei nenei jẽje a, i bei que nyucuaaque quia urerĩ nda. ¹⁸I bei que nyucuaaque quia urerĩ nda. Pablo que echeë nyoseï chiã nyee ra. Uba que ñee aba checuayã icuã je cote ra. —Jesús rĩ aico ñee ndeje a. Esë nyucuaaque si, i que Pablo aba checuayã icuã je ra. Echeë mosebe que usë esi ra.

¹⁹Nyucuaaque rerecua que paama i Pablo je ra. —Mbia ra mbae isiquia mondo monoa techĩ nande je cote re, i nyue. Nyebe que Pablo isi ra. Silas rese. Curuchoï que plaza ra. ²⁰Mondo que mbia rerecua je ra. —Ã ndei judíos ã. Mbia mbaicua icuãte equia ñee ñee ã. ²¹“Ure rã jẽingo”, ichĩ nguiã nande je. Romanos ndaque nande. Ûquĩ nandesaã aronea tuchi quiarei, i que mbia nguerecua je ra. ²²Nyebe que mbia paama i Pablo je ra. Silas abe je. Ererecua que eirao mbui asi ra. —Ira je jẽiruã nua, i que ererecua ra. ²³Mbia que eiruã nua tuchi ra. Tarõ ngue cote ra. —Jësaarõ tuchi, i que ererecua eraarõsa je ra. ²⁴Echeende que etarõ tuchi cote ra. Ei abe que emumbi ño ira je ra.

25 Pablo que ñee ñee nguia Dios je itondiite mose ra. Silas rese. frasei rasei abe no. Etarõi que echandu ja quia ra. 26 Aque mose que ibi titi titi i ra. Etarõsa abe que quiata quiata ja ra. Eiquesa abe que quiata ja ra. Eicuasa que nyera ja cadenas nda. Etarõ ji si que nyera ja ra. 27 Eraarõsa que ñumumba ra. Eiquesa eequia ji rese que mae nda. Etarõ ji uchã nei nguia ee. Nyebe ñee nguia. —Tachiquia, i que tiquise rirõ nda. 28 Pablo que tasẽ ee ra. —¿Mbaerã nda erechiquia re? ¡A urecu chõte a resẽ! i que Pablo ee ra. 29 —Tata eru, i que eraarõsa mbia mo je ra. Ique que Pablo rea cote ra. Titi titi i tuchi que ra. Ngoi que nguia ndese Pablo je ra. Silas abe je. 30 Eraarõsa que ecuruchoi taicuee cote ra. Ñee ee. —Sã Dios serirõ seicua si. ¿Mañi ae ra se re? Siqui bei sacua Dios rese re, i que eraarõsa ra. 31 Pablo que ñee ee cote ra. Silas rese. — Jesucristo eicua. Uqui mose ra Dios nderirõ ndeicua si. Uqui mose ra Dios ndechuchua jenda abe rirõ huicua si, i que Pablo ee ra. 32 Jesús cheẽ ngue esenei senei ee ra. Echuchua jenda je abe que erenei nenei nda. 33 Pablo iruã nua ji que eraarõsa irei irei ra. Silas iruã nua ji abe. Itondii mose raque. Bautizar i que eraarõsa je cote ra. Echuchua jenda ja je abe que bautizar i ra. 34 Eraarõsa que Pablo querao mbuquiaru uchuchua ra. Silas abe no. Ey a tuchi que ra. Echuchua jenda abe ia tuchi. — Nandeico Dios icua co cote, i ñene. Nyebe eya tuchi Dios rese.

35 Isamamimbe que ererecua ñee policia je ra. —Jẽso Pablo mbusẽ cote. Silas abe jembusẽ, i que ee ra. 36 Eraarõsa que ñee Pablo je ra. —A policia cuaẽ a. Jembusẽ sacua. Hui que jesi ra. Jẽso turã cote, i rei que eraarõsa Pablo je ra. 37 — Nya, i que Pablo ee ra. —¿Mbaerã ererecua ureiruã ñooño nde? Mbiase. Mbae icua naa mose rocoi. Romanos ndaque ur e abe. Uretarõ ñooño ngue ra. “Nandembusẽ checuayã”, i

raque ure je co cote. Tei. Sã uqui ngaẽ urembusẽ nyecua, i que Pablo ee ra. 38 Pablo cheẽ ngue policia senei nguerecua je ra. “Romanos”, i mose que ererecua chiã cuaãcua i ja ra. 39 Ererecua que nyoï Pablo rea cote ra. Silas abe rea. —Ureicua ñochi jẽje. Ureicua eã nda cote. Jẽso a si cote, i que ererecua embusẽ turã mondo cote ra. 40 Pablo que usẽ etarõsa si cote ra. Silas rese. Nyoï que Lidia chuchua ra. Hue que echi mbirĩ Jesús icuasa mundua ndua ra. Nyoï que hue si cote ra. Sucha tubiriã si.

17

Pablo que siqui Tesalónicaa ra

1 Pablo que nyoï Antípõlis rĩ nda. Apolonia ñi abe echoi. Silas rese. Hue si que echoi ngasẽ Tesalónicaa ra. Huee que judíos chumu nuasa mo huee ra. Sina goga, i equia tuchia je. 2 Pablo que oso hue sábado mose ra. Querabe que eriqui oso oso bei judíos chumunuásaa ra. Tres sábado que Pablo mbia mbaaquiato quiato huee ra. 3 Dios cheẽ ngue esenei senei ee ra. —“Mbia ra Cristo mbasi tuchi. Manonde ra quera si”, i que Dios cheẽ nda. Eĩ ngue mbia Jesús je cote ra. Jesús ae rĩ aico ñee ñee jẽje, ae rei Cristo. Ae jẽsaarõ arõ mbeite quia, aque rei Jesús, i que Pablo embaaquiato quiato ra. 4 Emo emo ngue Jesús isi cote ra. Siqui que Pablo rui ra. Silas rui abe. Griegos tubiriã ngue siqui erui no nda. Dios icuasa rei uqui. Griego ninisi tubiriã abe que siqui Pablo rui ra. Mbia chucua tuchi rei uqui. 5 Judíos que ngueteãte quia mbia rese Pablo je ra. Mbia siqui mose Pablo rui. Ae Dios cheẽ andu sereãte quia, uqui ngue ngueteãte quia mbia rese ra. Nyebe ngata choõño je munua nguia. Uqui ngue sucha tubiriã jenda mbupaama i tuchi ra. Mbia tubiriã ngue mbaba chee Jasón chuchua je cote ra. — ¿Ma Pablo ma nde? ¿Ma Silas ma nde? Uremee nda mbia icua je, i rei que judíos ra. 6 Pablo oreã ngue

ee ra. Silas abe oreã ngue ee ra. Nyebe que Jasón nduruchoi mbutiriri nguerecua je ra. Jasón ndesenda rese. Ñee nguerecua je. —Pablo ngaẽ ñochĩ mbia mbĩcuã icuã ja aa. Pe jenda mbĩcuã icuã jare. ⁷ Jasón eisi turã ñochĩ nguia uchuchúaa a. Ûquĩ icuã ja que eriqui nandererecua je. César cheẽ emumba mumba bei chõchĩ nguia ã. “Jesús quia ererecua tuchi César si re”, i chõchĩ Pablo, i que mbia paama i Pablo je ra. ⁸ Mbia ataque eandu mose que paama i ra. Ererecua abe que paama i ra. ⁹ Ererecua que mbae isiquia isi Jasón si ra. Jasón ndesenda si abe. —Uremeembe ra jẽje Pablo choi mose, i que ererecua ee ra. Ererecua que hui ja esi cote ra.

Pablo que siqui Beréaa ra

¹⁰ Jesús icuasa que Pablo mondochoi jei Bera ra. Silas rese. Aque isa mose bei. Ngasẽ ngue Bera ra. Nyoĩ que judíos chumunuasa cote ra. ¹¹ Judíos Bera jenda que earacua ra. Tesalónica jenda si. Bera jenda quiatu que Dios cheẽ ñanduse rete ra. Bera jenda que embesa ji tea jei jei ra. —Ma Pablo ñee Dios cheẽ ndui si, i que nyue ra. ¹² Nyebe que mbia tubiriã Jesús icua ra. Griegos tubiriã abe que Jesús icua ra. Griegos ninisi abe. Mbia chĩcua rei griego s ninisi. ¹³ Pablo que Dios cheẽ senei senei Bera jenda je ra. Judíos Tesalónica jenda que jirandu ra. Jirandure que echoi Beréaa mbia mbĩcuã icuã Pablo je ra. ¹⁴ Jesús icuasa que Pablo mondo ama ndisha quitira. Silas que siquichõ Beréaa ra. Timoteo rese. ¹⁵ Ae Pablo curuchoi, ùquĩ ngue tibia esi ra. Atenas, i que sucha tubiriã je ra. —A ureico nyebi a, i que Pablo je ra. Echebi mose que Pablo ñee ee ra. —Silas jembu jei seje. Timoteo rese, i que Pablo ee ra.

Pablo que siqui Atenas nda

¹⁶ Pablo que siqui Silas raarõ arõ Atenas nda. Timoteo abe raarõ arõ. Dios abareã tubiriã ngue huee ra.

Ûquĩ ndese quiatu que mbia riqui oo tuchi ra. Pablo que mae icuã ùquĩ ndese ra. Pablo que paama ite mbia rese mae nda. Mbia Dios abareã nderequia requia mose. ¹⁷ Nyebe Pablo oso oso bei nguia judíos chumunuasa. Ñee ñee tuchi hue jenda je. Judíos eã je abe ñee ñee tuchi hue jenda mbia je. Dios icuasa je. Plázaa abe que Pablo riqui ñee ñee tuchi mbia je ra. ¹⁸ Epicúreos resenda mo ngue ngaẽ ñee tuchi Pablo je ra. Estoicos resenda mo abe que ngaẽ ñee Pablo je ra. —¿Mbae ichõte Pablo quia nande je re? Echeẽse rete eriqui reae, i que emo emo nda. —Dios mo nii eriqui ñee ñee nande je reae, i que emo emo nda. Pablo ñee ñee mose Jesús rĩ. Pablo Jesús quera renei nenei mose. ¹⁹ Mbia que Pablo curuchoi ibi ato mo cote ra. Huee que ererecua riqui ñumunua nua mbei ra. Ñee ngue Pablo je cote ra. —¿Mbae rĩ ereico ñee ure je re? Embuchecua ure je. ²⁰ Ñe ngue urechuanate quia ra. Ndecheẽ embuchecua ure je. ¿Mbae ere quia re? i que mbia Pablo je ra. ²¹ Atenas jenda mingo uquia reã mbae mo ndese. Ae siqui Atenas jenda rese, ùquĩ abe mingo uquia reã mbae mo ndese. Echeemo andu andu bei. Echeemo ndese bei.

²² Nyebe que Pablo juã mbia ite re ra. Ibi ato. Ñe e ngue mbia je cote ra. —Tacheẽ jẽje, Atenas jenda. Dios ata rete rese jẽingo reae. ²³ Secuatasa que amae mae dios tubiriã jembae rese ra. Emo ndese que amae nda. “Co Dios mbia mae sayã”, jenye que embesa mi nda. Ae je jẽingo ñee ñee ùquĩ. Jemae sayã ndaque. Ae rĩ aico ñe e jẽje co. ²⁴ Co Dios que ibi chao ra. Mbae ao ja. Ae rei mbae rerecua. Ibi rĩnda rerecua. Ibei jenda abe rerecua. Dios siquiã ño nguia tuchiaqui re mbia chiao. ²⁵ —¿Aba ra mbae chao seje re? i eã ngue Dios quia ra. Ae quiarei mbae meesa. Nandembuquiarusa rei ae. Nande mĩngosa rei ae. ²⁶ Mbia mĩ ngue Dios chao ra. Aque rei mbia i ja aque. Emo

eã ño nandeico nguiã ã. Nande ja chõ nandeico nguiã ã. Dios rei nandeaosa. Nyebe Dios mbae rerecua ja. —Co ra nyeacuquia co mose. Co ra mano co mose, i bei que Dios quia ra. Mbia recuarã ngue Dios mee mee mbia je ra. ²⁷ Dios que mbia mingo ibi rĩ nda. ¶ nda mbia Dios requia. ¶ nda mbia Dios icua. Isho eãte Dios riqui a. Nande ja jii eriqui a. ²⁸ Dios rĩ ae nandeico nguiã. Eriĩ ae nandeico nguiã ngata. Jemo abe que ñee nda. “Dios ririĩ ño nandeico ja nguiã ã”, i que jemo nda. ²⁹ Ae bei chõ nandeico nguiã ã. Dios ririĩ. “Dios” nandechĩ nguiã mbia chiao je. Oro ao ji je. Plata ao ji je. Sita ao ji je. ³⁰ Dios que mbia icuã teachõ cose ra. Mbia aquiatuã mose. Namõ ño Dios riqui nguiã ñee mbia je co. “Jẽhui chõ jẽicuã si”, i Dios quia mbia jaje co. ³¹ Dios que Jesucristo irabo ra. Jesucristo turã mbei. Jesucristo ra ñee emo je. “Jẽso tata cuasu”, i ra ee. “Jẽso ibate”, i ra emo je no. Manose chõ nda ñee. Dios mĩ ño eicua nguiã. Dios que Jesucristo mbuquera si manonde ra. Nyebe ra Jesucristo emo mondo ibate. Emo mondo tata cuasu no. ³² —Jesucristo que quera si manonde ra, i que Pablo ee ra. Mbia que icuia icuia chõchĩ nguiã Pablo cheẽ mose. Emo emo ngue ñee ee ra. —Emo mose quiatu ra ndechẽ urechandu, i que eataque ra. ³³ Pablo que oso mbia recha cote ra. ³⁴ Emo emo ngue siqui erui ra. Ae Jesús cheẽ isi turã, ùquĩ ngue siqui bei erui ra. Dionisio, i que ùquĩ mo je ra. Ae rei mbia rerecua mo. Dámaris, i que cuña mo je ra. Emo emo abe que siqui Pablo rui ra.

18

Pablo que siqui Coríntoo ra

¹ Pablo que oso Atenas ndecha cote ra. Ngasẽ ngue sucha tubiriã mo cote ra. Corinto, i que hue je ra. ² Hue que judío mo ndiqui ee ra. Aquila, i que ee ra. Ponto jenda que ae ra. Priscila, i que eninisi je ra. Ùquĩ ngue ngaẽ namo Italia si ra. Italia recha ramo.

Claudio judíos mombo ja mose Roma si. Pablo que oso Aquila chuchua ra. ³ Pablo que tuchia saã saã nguia mbae ire je ra. Eĩ ngue Aquila no nda. Tuchua raã naa mbei mbae ire je. Nyebe Pablo siquichõ nguiã erese. Quiei quiei erese. ⁴ Sábado mose que Pablo riqui oso oso judíos chumunuasa ra. Hue que eriqui bei Dios cheẽ nenei nenei judíos je ra. Judíos eã je abe no.

⁵ Silas que ngasẽ Macedonia si cote ra. Timoteo rese. Pablo que Dios cheẽ senei senei tuchi quia judíos je cote ra. Jesús mbuchecua checua tuchi ee. —Jesús rei Cristo. Ae jësaarõ arõ mbeit e quia, aque rei Jesús, i tuchi que Pablo ee ra. ⁶ Judíos que paama i Pablo je cote ra. Ñee icuã icuã tuchi que ee ra. Nyebe Pablo huĩrao mbaaba aba ee. Taso jendecha, i ñene. —“Aemingo bei ra se”, i rei Dios nande je. Jẽ nguiarei Dios cheẽ isi sereã tuchi. “¿Mbaerã Dios cheẽ eresenei eã ure je re?” jenyechĩ nda seje. ¿Dios cheẽ ngue asenei tuchi rei jẽje ra jẽ! Nyebe taendecha. Judíos eã je Dios cheẽ tasenei senei cote, i que Pablo huĩrao mbaaba aba ee ra. ⁷ Pablo que oso judíos recha cote ra. Judíos chumunuasa jii esi. Justo chuchúaa. Judío eã ndei Justo. Dios quiato que Justo ra. ⁸ Crispo que judíos chumunuasa rerecua ra. Aque que Jesús icua cote ra. Echuchua jenda ja abe que Jesús icua cote ra. Corinto jenda tubiriã ngue Dios cheẽ ñandu ra. Mbia tubiriã ngue Jesús icua cote ra. Batizar i que cote ra. ⁹ Itondaru mo ngue Pablo Jesús rea ra. Ñee ngue Pablo je cuu ra. —Eresiquichechĩ nda mbia si jẽ. Secheẽ esenei senei mbei. Erehuichĩ nda esi jẽ. ¹⁰ Co aico nderea quiatu co. Mbae icuã nda ñ eã ndeje. Secheẽ esenei senei mbei. A jenda ra seicua ja jiri cote, i que Jesús Pablo je cuu ra. ¹¹ Pablo que siqui arete Corinto ra. Un año ndobeichõ jiri que eriqui huee ra. Mbia mbaaquiatu quiatu bei Dios rĩ.

¹² Galión ngue Acayo jenda rerecua

ra. Aque mose que judíos ñimb#cuã tuchi Pablo je ra. Oo que erese ra. Curuchoi que nguerecua je ra. ¹³ Judíos que ñee ererecua je ra.

—Pablo que mbia mbaaquiato icuã icuã nguia ra. Dios rñ. Nandererecua cheẽ ndui eã, i que judíos ra. ¹⁴ Pablo nda ñee nguia ña. Ererecua Galión nane nguia ñee nguia esi. Ñee judíos je. —Mbae icuã ndese que Pablo riqui ãte. Eĩ nguia nda jeñee achandu nguia ña. ¹⁵ Mbae icuã ngue esaã eãte. Pablo cheẽ je chõ jẽingo nguia paama i. Judíos cheẽ ñi ño jẽingo nguia paama i Pablo je. Nyebe ra jeñee achana. Jẽ ae jeñee turã jenyue ae, i que Galión judíos je ra. ¹⁶ Mombo ja que uchuchua si cote ra. ¹⁷ Sóstenes, i que judíos chumunua nuasa rerecua je ra. Judíos eã ngue paama i Sóstenes je ra. Isi icuã ngue ra. Iruã nua tuchi que ra. Ererecua Galión ndésaa que eiruã nua nda. Ererecua que teachõ nda.

Pablo tube Antioquíaa

¹⁸ Pablo que siqui atate Coríntoo ra. —Co acua quia jendecha co, i que uataque je cote ra. Jesús quiato je. Aquila abe que oso erese ra. Priscila abe no. Ngasẽ ngue ama nimíaa nda. Sucha tubiriã. Cencrea, i que hue sucha tubiriã je ra. Pablo que ua chisia cote ra. —Acheẽ ngue Dios je, aque que amumbayã nda, i que ua sia cote ra. Siria icha rui que echoi cote ra. Ama ndisha icoi tuchi rui. ¹⁹ Sucha tubiriã je que ngasẽ cote ra. Efeso, i que sucha tubiriã je ra. Aquila que siquichõ eresebe huee ra. Priscila, i que eninisi je ra. Pablo que oso judío s chumunuásaa ra. Ñee ñee tuchi que judíos je ra. ²⁰ —Eico are jiri aa, i rei que judíos ee ra. Pablo que echeẽ mumba bei oso ra. ²¹ —Taso Jerusalén. Mbia chumunua mose taico rã Jerusalén. Achube ra mae jendese. Dios sembu mose ra achube mae jendese, i que Pablo ra. Oso que Efeso si cote ra. Ama ndisha rui bei que echoi ra. ²² Ngasẽ ngue Cesaréaa ra. Hue si que Pablo si

Jerusalén cote ra. Hue jenda rese que mae nda. Jesús quiato. Hue si que esi Antioquíaa ra. ²³ Siqui arete que Antioquíaa ra. Oso que Galacia cote ra. Frigia abe no. Sucha tubiriã ngue embuchesea sea tuchi quia hue jenda ra. Jesús quiato mundua ndua hue jenda.

Apolos Dios cheẽ senei senei

²⁴ Aque mose que judío mo ngasẽ huee ra. Efésoo. Apolos, i que ee ra. Alejandría jenda que ae ra. Dios cheẽ nenei neneisa tuchi mbia je. Dios cheẽ icuasa tuchi. ²⁵ Apolos que Dios icha icuate ra. Mbia que embaaquiato quiato turã tuchi quia ra. Mbia mbaaquiato turã Jesús rñ. Juan Bautista cheẽ achõ ngue eicua quia ra. Juan bautizar i mose mbia je. ²⁶ Apolos siquicheã tuchi que eriqui mbia mbaaquiato quiato ra. Judíos chumunuásaa. Aquil a que echandu ra. Priscila rese. Nyebe que ñquĩ Apolos rerao mbaaquiato quiato tuchi ra. Dios icha que embuchecua tuchi ee ra. ²⁷ Apolos que osose Acáyaa ra. Nyebe Jesús quiato emondo turã. Papel que embesa Acaya jenda je ra. Jesús quiato je Acaya jenda je. —Apolos jẽisi turã, i ee. Apolos que ngasẽ cote ra. Ae Jesús icua quia, ñquĩ mbaaquiato quiato tuchi. ²⁸ Apolos que judíos cheẽ siquisã tuchi ra. Judíos mbia mbaaquiato choño mose. Jesús rñ eã. Nyebe Apolos echeẽ ndiquisã. Dios cheẽ ngue esenei senei nguia ee ra. —Jesús rei Cristo. Ae jësaarõ arõ nguia, aque rei Jesús i tuchi que Dios cheẽ nenei ee ra.

19

Pablo que siqui Efésoo ra

¹ Sita ibate bate ite rñ ngue Pablo si ra. Ngasẽ ngue Efeso cote ra. Apolos siqui mose Corinto. Jesús quiato mo je que Pablo ngasẽ Efésoo ra. ² Pablo que ñee ee ra. —Jẽ Jesús isi mose, ¿Espíritu Turã abe ique jeñiangui re re? i que Pablo ee ra. —Espíritu Turã ndese ureiranuate, i que mbia Pablo

je ra. ³ Pablo que ñee ee ra. —¿Mbae rĩĩ bautizar i jėje re? i que ra. —Juan ñee nĩĩ ngue bautizar i ure je ra, i que Pablo je cote ra. ⁴ Pablo que ñee ee ra. —Juan ngue bautizar i mbia je ra. Mbia hui mose huĩcuã si. “Ae ra tu serui, aque jęcua ję. Jesucristo chõ aque re”, i que Juan nda, i que Pablo ra. ⁵ Pablo cheẽ andu mose que bautizar i Jesús rĩĩ cote ra. ⁶ Pablo que o chono earõ nda. Espĩritu Turã ngue ique echiangui re cote ra. Ucheemo ngue esaã saã nguia cote ra. Dios cheẽ ngue embuchecua checua quia mbia je cote ra. ⁷ Doce que ũquĩ nda. Jesús quiato.

⁸ Pablo que oso oso quia judĩos chumunuasa ra. Tres meses. Siquicheã tuchi que equia Dios cheẽ nenei nenei nda. —Ererecua tuchi quiarei Dios. Jesús jęcua rã, i que Pablo quia mbia je ra. ⁹ Emo emo ngue Pablo cheẽ ñandu sereã nda. Echeẽ mumba mumba. Jesús rĩĩ ñee icuã icuã mbei mbia ja je. Nyebe Pablo nyao nguia esi. Pablo que Jesús quiato curuchoi esi ra. Curuchoi que Tiranno chuchúaa ra. Huee que eriqui embaaquiato quiato cote ra. ¹⁰ Dos años ngue Pablo riqui huee ra. Nyebe mbia Asia jenda jirandu ja nguia Jesús rese. Judĩos jirandu ja erese. Judĩos eã abe no.

¹¹ Pablo que mbae saã saã tuchi quia Dios quirãcuã je ra. Mbia mae sayã ngue esaã saã nguia ra. ¹² Mbia rasi mbucherõ sacua ngue mbia riqui tĩru mbucha mbucha Pablo rese ra. ũquĩ tiru que ecuruchoi choi quia mbia rasi je cote ra. ũquĩ tiru ruruchoi mose, mbia rasi que nyerõ nyerõ nguia cote ra. Aba checuayã icuã abe que usẽ usẽ nguia mbia chiã si cote ra. ¹³ Judĩos mo ngue ngata beĩte quia ra. Sucha tubiriã mbuchesea sea beĩ que equia ra. —Aba checuayã icuã mbusẽ aquiatute que ure ra, i que equia ra. —Jesús rĩĩ aba checuayã icuã nandembusẽ, i rei que nyue ra. Nyebe que ñee aba checuayã icuã mo je ra. —Jesús quirãcuã nĩĩ aico jembusẽ mbia si co. Ae Pablo senei senei

nguia, i rei que judĩos aba checuayã icuã je ra. ¹⁴ Sacerdote rerecua riirĩ abe que eĩ si ra. Siete eriirĩ. Esceva, i que sacerdote rerecua je ra. Judĩo que ae ra. Ae riirĩ ngue eĩ si rei no nda. ¹⁵ ũquĩ ngue ñee ndei aba checuayã icuã je ra. Aba checuayã icuã ngue echeẽ mumba ra. —Jesús aicua. Pablo abe aicua. ¿Aba chõ ję nde? Jaęcicuayãte se, i que aba checuayã icuã nda. ¹⁶ Aba checuayã nyireco que oo erese cote ra. Ucuu tuchi que ũquĩ ja rese cote ra. ũquĩ siete rese. Aba checuayã icuã nyireco quirãcuã tuchi que esi ra. Aba checuayã nyireco que ũquĩ mbasi ja ra. Nyebe ũquĩ ndasi rasi uchã aba checuayã icuã si. Eirao eã ngu e nyoi uchã itaicuee rĩĩ nda. ¹⁷ Efeso, i que hue sucha tubiriã je ra. Hue jenda que jirandu ja erese ra. Judĩos que jirandu ja erese ra. Judĩos eã abe no. Nyebe hue jenda siquiche ja. Nyebe mbia ñee turã turã jate Jesús rĩĩ. ¹⁸ Jesús quiato mo ngue ngaẽ ngaẽ nguia ra. Eya eãte que huĩcuã ndese ra. Nyebe huĩcuã nenei nenei. ¹⁹ Mbia tubiriã ngue mbae icuã papel mbesa ji curucuaẽ nda. Libros de brujería. Munua ja que huee ra. ũquĩ ngue esei sei mbia ja rėsaa cote ra. Mba e isiquia ata tuchi raque que ũquĩ libros isiquia ra. Cincuenta mil plata. ²⁰ Mbia tubiriã ngue Dios cheẽ isi isi quia ra. Dios cheẽ irãtãte que mbia tea quia cote ra.

²¹ Aquere que Pablo ñee nda. —Taso Macedonia. Acaya abe. Aquere ra aso Jerusalén cote. Jerusalén osore ra aso Roma cote, i que ra. ²² Nguesenda nyeremo ngue emondo Macedonia nda. Timoteo. Erasto rese. Pablo que siquichõ are jiri huee ra. Asia.

Efeso jenda paama i ja Pablo je

²³ Aque mose que mbia paama i tuchi Jesús rĩĩ nda. ²⁴ Demetrio quia rei mbia mbĩcuã icuã nyii. Dios mbuae chuchua que esaã saã nguia ra. Mbae rendi ãtã je que eriqui

sucha ñetē naa naa nda. Sucha ñetē tubiriã ngue esaã saã nguia ra. Dios mbuae chuchuarã. Diana, i que Dios mbuae je ra. Demetrio que mbae isi tuchi quia sucha ñetē ndibishorō nda. Eresenda tubiriãte que sucha ñetē naa naasa ra. ²⁵ Nguesenda ja que emunua nda. Dios mbuae chuchua raãsa que emunua ja ra. Ñee ngue ee ra. —Mbae nandeisi turãte rei nguia nandechiao ribishorō ã. ²⁶ Pablo riqui ñee ñee mbia je co. “Dios mbuae mbia chiao rei eicuãte”, i Pablo quia co. Mbia riqui echeē mumbayãte ã. A jendachō eã ñene. Efeso mii eã ñene. Asia jenda abe eriqui echeē andu ã. ²⁷ Ūquĩ icuãte nande je. Nandechiao ra mbia isi isiã ñochĩ cote re. Mbia ra hui ja chōchĩ Diana chuchua si cote re. Diana abe si ra mbia hui chōchĩ nde. Nandererecua tuchi que Diana. Mbia chũcua tuchi que ae. Asia jenda chũcua tuchi que ae. i Mbia ra hui chōchĩ esi jē! i que Demetrio ra.

²⁸ Demetrio resenda echeē andu mose que paama ite ra. —i Diana quirãcuãte jē! i Efeso jenda rerecua quirãcuãte jē! i tuchi que mbia tasē tasē nda. ²⁹ Hue jenda que paama i ja ra. Pare pare i tuchi. Pablo resenda nyeremo ngue eisi ra. Gayo. Aristarco rese. Macedonia jenda. Ūquĩ nyeremo ngue ecuruchoi mbia chumunuãsa ra. ³⁰ —Taique se abe. Tacheē ñee mbia je, i rei que Pablo ra. Jesús quiato que Pablo siquisã nda. ³¹ Asia jenda rerecua mo abe que ucheē mondo Pablo je ra. —i Eriquechĩ nda nde jē! i Pablo je. Pablo quiato que ūquĩ nda. ³² Mbia que pare pare i tuchi ra. Tasē tasē ja que ra. Hue rĩ ja mbia ndua eãte. Mbae mii ndese ndua eã. Paama i chooño ja. Eaquiataũ ño ñumunua ñooño nguia. ³³ Mbia mo ngue mbae senei senei ja Alejandro je ra. Judíos que Alejandro mua mbia ite re cote ra. —Echeē mbia ja je, i que ee ra. Alejandro que o mee mbia je ra. —i Jēquiriri chō jē! i rei ngue ee re. —Mbia je tacheē. I nda paama iã judíos je, i rei ngue re. ³⁴ —Judío chō Alejan-

dro riqui re, i ja que mbia ra. Nyebe mbia riqui tasē tasē mbeite re. Dos horas. —i Diana quirãcuãte jē! i Efeso jenda rerecua quirãcuãte jē! i tuchi que mbia tasē tasē nda. ³⁵ Secretario rei ererecua mo. Aque que mbia cheē siquisã cote ra. Ñee ngue ee cote ra. —Tacheē jēje, Efeso jenda. Efeso jenda chō nande re. Diana ndei nandererecua. Nande rei Diana ndaarōsa. Diana naanguia ngue tu ibei si, aque raarōsa chō nande re. Diana chuchua raarōsa abe chō nande re. Mbia jirandu jate ūquĩ ndese. ³⁶ Emo eicuayã eãte. Nyebe jēquiriri chō jē. i Jēaquiataũ jēsaã saã eã ño jē! ³⁷ Ae jēisi seru nae, ūquĩ mbae mbuquiachã eãte dios mbuae chuchúaa. Ūquĩ ñee icuã icuã eãte dios mbuae rĩ. Dios mbuae jendererecua rĩ. ³⁸ Demetrio ñee icuãse mose emo nii, sã esi nandererecua chuchúaa. Demetrio resenda ñee icuãse mose emo nii, sã echoi nandererecua chuchúaa. Huee chō ererecua riqui nguia mbia cheē andu. Sã echoi ja ererecua je. Sã ñee ñee ja nyue ererecua resaa. Mbae icuã nii. ³⁹ Mbae mo nii abe mose, jeñee mbia chumunua mose. ⁴⁰ Jesús quiato que nandeisi chooño chĩ nda. Nandechimbũcuã ñooño ño nguia. Nandererecua ñee arōte nande je. Echeē nda nandesibishorō eã, i que secretario ra. ⁴¹ Aquere que hui mbia si ra. Mbia mbui que cote ra.

20

Pablo nyoĩ Macedóniaa, Gréciaa abe

¹ Mbia quiriri mose que Pablo Jesús quiato munua nda. Embaquiata quiatu jiri. —Co acua quia co, i que ee cote ra. Macedóniaa ngue echoi cote ra. ² Hue jenda sucha mbuchesea seate que echoi ra. Jesús quiato mundua ndua. Ngasē ngue Gréciaa cote ra. ³ Huee que eriqui are jiri ra. Tres nyasi. —Taso Siria ama ndisha rui, i rei que cote ra. Jirandu que judíos icuã ndese cote ra. —Nandeisi, i nda judíos quia Pablo rĩ nda. Nyebe Pablo ru nguia nyebi

si Macedonia. ⁴ Ñngue nyoï erese ra. Eata rete. Sópater. Berea jenda. Aristarco. Segundo abe. Tesalónica jenda rei ñquí. Gayo. Derbe jenda. Timoteo. Tíquico. Trófimo. Asia jenda rei ñquí. ⁵ Ñquí ja rane nguia nyoï nguia ure si. Troas que echí nguia ureraarõ. ⁶ Fiesta de Pascua mose que urecu Filipos ra. Aquere que ureso ama ndisha rui cote ra. Cinco días que tu ure je ama ndisha ite re ra. Urecuasẽ namo ngue Troas cote ra. Ae ureraarõ arõ nguia, ñquí ngue uresiiti cote ra. Urecu are jiri que hue cote ra. Siete días.

Pablo nyoï Troas

⁷ Jesús quiato que ñmunua ja domingo mose cote ra. Mbichae sia sia nyue. Pablo que embaaquiatu quiatu quia ra. —Taso isamami, i que ra. Nyebe embaaquiatu quiatu itondiite mose chee. ⁸ Sucha ibátee que echí ñmunua nda. Eironguia ibate tuchi que ra. Ibate tuchi que echí ñmunua nda. Tata rendi tubiriã ngue etesae tuchi ra. ⁹ Mbia mo ngue chí ibate ra. Ventana tose. Etiarõ namo ngue ra. Eutico, i que ee ra. Uque que huñgoi ibate ra. Pablo que ñee oco tuchi embeesi esi ra. Eque que tu ngoi ibate si ra. Mano ndei que ra. Tambuchuruã, i rei que emo nda. Eraaque chõ eriqui reaẽ. ¹⁰ Pablo que nguichi u erea ra. Oo tuchi que erese ra. Quiaama ngue ra. —¡Jësiquichechí nda jẽ! Manoãte, i que Pablo mbia je ra. ¹¹ Pablo que osoï nyui ra. Mbichae que echisia sia ra. U que ra. Mbia que embaaquiatu quiatube ra. Eresaitõ ndabe chee. Oso que erecha cote ra. ¹² Ae ngoi nae, erasiã ño ngue mbia curuchoichí nguia. Mbia ia tuchi que ngoi je rese cote ra.

Pablo nyoï Milétoo

¹³ Pablo que ñee nda. —Ibi rĩ taso se Asón. Hue si ra aso jendese cote. Ama ndisha rui, i que ra. Nyebe ure rane ureso nguia ama ndisha rui. ¹⁴ Ae urecuasẽ nguia Pablo je Asón cote. Pablo que oso urerese am a ndisha rui cote ra. Canoa naanguia

ye. Urecuasẽ ngue Mitilene cote ra. ¹⁵ Hue si que ureso ra. Isamami ngue ejoõ acua mo urechucuã cote ra. Quío, i que hue ejoõ acua je ra. Isamami nongue que urecuasẽ Samos cote ra. Hue si que ureso Trogíloo ra. Huee que urequeneã urecua ra. Isamami ngue urecuasẽ Milétoo cote ra. ¹⁶ Pablo que quicoï asi Asia si ra. Nyebe uresoã Efésoo. — Tacuasẽ quicoï oso Jerusalén. Fiesta de Pentecostés taicusu oso ngasẽ, i que Pablo ra.

Pablo ñee Jesús quiato rerecua je, Efeso jenda je

¹⁷ Mileto si que Pablo emo mondo Efésoo ra. —Jenyu, i que amei je ra. Jesús quiato rerecua je. ¹⁸ Ñquí ngue ngaẽ ee ra. Pablo que ñee ee ra. — Cosete que achu Asia ra. Seicuate raque se. Sechisaã jëicuate raque. ¹⁹ Dios cheẽ ngue asenei senei turã tuchi quia jëje. Secuasú que asaã saã eãte quia jëje. Acheseo tuchi que sequia mbia rese. Judíos que sembasi mbasi tuchi quia ra. “Taiquia”, i rei que judíos quia seje ra. ²⁰ Dios cheẽ ngue asenei senei mbeite quia jëje. Asiquicheã mbei que sequia erenei nenei jëje. Jembitirõ sacua. Jeñmunua nua mose. Jenyuchúaa ja abe que aico Dios cheẽ nenei nenei jëje. ²¹ Acheẽ tuchi que jëje. Judíos je. Judíos eã je ab e no. “¡Jëicuã si jëhui rá! Jesucristo jëicua rá”, ae tuchi que sequia jëje. ²² Co aso quia Jerusalén co. Co Espíritu Turã sererao quia Jerusalén co. Mañi ño nda seje pee. ²³ Co miñ ño aicua nguia. Espíritu Turã ngue ñee seje ra. Sucha mbuchesea sea mose que eriqui ñee ñee seje. Mbia icuãte ra seje. Sembasi rae. Sematã ndae. Setarõ ndae. Espíritu Turã ngue sembiirandu ra. ²⁴ Sesiquicheãte ñquí si. Sã seiquia quiatu. “Dios turã esenei senei mbei quia mbia je”, i que Jesús seje ra. Aque miñ ndese chõ aico nguia ndu a co. Echeẽ miñ ndese. † nda echeẽ amumba eã. ²⁵ Dios nandererecua que asenei senei tuchi jëje. Jemae

eã mbei ra serese cote. Aicuate se quia co. ²⁶ Jemo siqui sereã mose Jesús rese, se eã ño cote re. Jẽ ño cote re. Jẽ ja je chõ ngue asenei senei ndesẽ. ²⁷ Dios cheẽ ngue asenei senei jate jẽje. Asiquicheã mbei que sequia erenei nenei jẽje. Dios cheẽ mo ngue atibo tibo eãte jẽje. ²⁸ ¡Jẽingo turã ño nyiese jẽ! ¡Jesús quiato abe jẽteaquiato quia jẽ! Espiritu Turã ngue ñee jẽje resẽ. “Jesús quiato rerecuarã jẽ”, i que Espiritu Turã jẽje resẽ. Jesús quiato jẽteaquiato quia jẽ. Ūquĩ ndibishorõ ngue Jesús nguqui mondo ra. Umano mose. ²⁹ Seso mose ra emo ngaẽ ñee ñooño jẽje. Tambiĩrĩ irĩ, i ra jẽje. Eicuã ño ūquĩ nde. Nyacua rã sí. ³⁰ Jendese ra emo ndiqui. Jesús quiato mbaaquiato icuã icuã. Jesús quiato mbiĩrĩ irĩ. “I nda Jesús quiato siqui nanderese”, i ra ūquĩ. ³¹ Jẽteaquiato jẽ. Jaembaaquiato quiato tuchi que se. Tres años. Jẽ ja que jaembaaquiato quiato. Acheseo tuchi que sequia jendese. ³² Aico jendecha Dios je a. Aico jendecha Dios turã je a. ¡Dios cheẽ turã jemumbayã mbei quia jẽ! Dios cheẽ nda jembuquirãcuã. Dios cheẽ nda jemingo tuchi Jesús quiato rese. ³³ Mbae isiquia que achosei chosei ãte quia mbia mbae aẽ. Mbia irao abe que achosei chiãte quia aẽ. ³⁴ Seicuate rei que equia aẽ. Se sí chõ aquiei quiei nguiã icua. Seresenda mbaerã abe que aquiei quiei quia aẽ. ³⁵ Jaembaaquiato quiato beite que se. “Jẽquiei quiei”, ae beite que sequia jẽje. “Mbaecha reã je mbae jemee mee”, ae que sequia jẽje. Jesús cheẽ ndese jendua. “Ae mbae meeño nguia emo je, eya tuchi chõ aque re. Ae eo jenda isi, aque quia eya tuchiã jiri”, i que Jesús nande je ra, i que Pablo Efeso jenda je ra.

³⁶ Aquere que Pablo ngoi ngũĩã ndese ra. Ñee ngue Dios je ra. Ūquĩ ndes e ja. ³⁷ Mbia que nyese o ja Pablo rese ra. Quiaama ama ngue ra. Eritii que esiite it e ra. ³⁸ —Jemae iã nda serese cote, i que Pablo ee ra. Nyebe

que eya eã tuchi ra. Pablo rese que echoi erasaa ra. Ama ndisha rimia ndese. Pablo so rese mae.

21

Pablo nyoĩ Jerusalén

¹ Urecuata que ūquĩ ndecha cote ra. Canoa naanguia ye que ureso cote ra. Cos que ureso ra. Isamami ngue ureso Rodas cote ra. Hue si que ureso Pátaraa cote ra. ² Huee que canoa mo chi ure je ra. Fenisia rĩ ngue esi quia ra. Aque ye que urea cote ra. Eye que ureso cote ra. ³ Chipre rese que uremae nda. Ejoõ acua. Ejii rĩ ngue ureso ra. Síriaa que ureso ra. Tiro que ure cu mbiĩrĩ cote ra. Huee que canoa yenda jea jea ra. ⁴ Jesús quiato que urembirõ hue jenda ra. Siete días que ureico erese ra. Espiritu Turã ngue hue jenda mbucheẽ Pablo je ra. —¡Eresochĩ nda Jerusalén jẽ! i rei ngue Pablo je re. ⁵ Aquere que ureso cote ra. Jesús quiato que nyoĩ ja urerese ra. Ama nimia ndese. Eresebe echoi urerese. Nguiĩrĩ abe ruruchoi. Ama ndisha rimia ndes e que urecoi ja urenia ndese ra. Ñee ñee Dios je. ⁶ Urechiquiaama ama ja que cote ra. —Co urecu quia co, ure que ee ra. Canoa ye que ureso cote ra. Hue jenda que nyoĩ nyebi uchuchúaa cote ra.

⁷ Tiro si que ureso cote ra. Ureso que Tolemaida ra. Huee que urecheẽ ñee Jesús quiato je ra. Ureitõ miĩ ngue erese ra. ⁸ Isamami ngue ureso cote ra. Cesaréaa que urecuasẽ nda. Felipe chuchúaa que ureso ra. Ae que Jesús cheẽ nenei neneisa ra. Ae que mbaecha reã mbuquiaru sa ra. Diáconos, i que mbaecha reã mbuquiarusa je ra. Aque chuchúaa que urecu ra. ⁹ Cuatro que Felipe rucucha ra. Eruã ja. Dios cheẽ nenei neneisa ja que ūquĩ nda. ¹⁰ Huee urecu are jiri mose que emo ndu ra. Judea sí. Agabo, i que ee ra. Dios cheẽ nenei neneisa que ae abe ra. ¹¹ Ae que tu ure je ra. Pablo numbicuasaa que eisi ra. O que echucua eye ra. Hui abe que echucua ra. Pablo numbicuasaa

Pablo quia Trófimo querao abareãte nguiã Dios chuchúaa judíos je. Nyebe ngue mbia riqui nguiã ñee icuã icuã ee. Judíos eã nguia ñi ngue Trófimo nde. Efeso jenda quia ñi ngue Trófimo nde. Nyebe ngue mbia riqui nguiã ñee icuã icuã Pablo je. ³⁰ Hue jenda que ñimbicua tuchi Pablo je ra. Oo ja que erese ra. Isi que ra. Mbutiriri que Dios chuchua si ra. Dios chuchua que ematã cote ra. ³¹ Pablo nda mbia iquia nguiã ña. Emo ngue oso ñee soldados rerecua je ra. —Mbia Pablo iquia serite quia pee, i que oso ee ra. ³² Soldados rerecua que soldados munua nda. Oficiales abe no. Nyo: asi que mbia icuã ndea cote ra. Mbia que Pablo iruã nua eã cote ra. Soldados rese mae mose. ³³ Ererecua que oso Pablo rea ra. Pablo isi que ra. —Echucua cadenas je, i que soldados je Pablo rii nda. Ererecua que ñee mbia je cote ra. —¿Aba co re? ¿Mbae icuã esaã jêje re? i que mbia je ra. ³⁴ Hue rii ja mbia ñee eã ee. Mbia que ñee ata ata ee ra. Tasê tasête que ñee ee ra. Ñee ñooño ererecua je. —¿Mbae ra aba icua jeñee nde? i chee que ererecua mbia je ra. —Pablo jencya mbirii na cuartel, i que ererecua soldados je ra. ³⁵ Pablo ruruchoi que ra. Ngasê ngue eiquesa rurubi cote ra. Hue que mbia icuã icuã sí Pablo je no nda. Nyebe soldados ecuruchoi nguiã sui cote. ³⁶ Mbia que tasê tasê ngaê nguia eru ra. —¡Jêiquia rei ae! i que mbia cuaê nguia eru ra.

Pablo ñee mbia cuabê je

³⁷ Pablo nda emingue nguiã soldados chuchúaa chã. Ae Pablo ñee ño nguiã ererecua je. —Tacheê na, i que ererecua je ra. ³⁸ Ererecua que ñee Pablo je cote ra. —¿Griego cheê ereicuate nde re? Egipto jenda ereico rei seje. Ae eicuã icuã ndiqui gobierno je, ¿ũquí nderecua eã nde re? ¿Nde mbia iquia iquiasa rerecua eã nde re? Cuatro mil mbia iquiasa. ¿Nde ererao eã turúquiaa re? i que ererecua Pablo je ra. ³⁹ Pablo que ñee ee

ra. —Tei. Judío chõ se re. Tarso jenda chõ se re. Sucha tubiriã tuchi que Tarso de Cilíciã ra. Tacheê na mbia je, aechi nguiã ndeje, i que Pablo ererecua je ra. ⁴⁰ —Eno. Echeê ee, i que ererecua ra. Eironguia ibate rese que Pablo ñi juã nda. O que emee mbia mbuquiriri ra. Mbia quiriri mose que ñee ee ra. Judíos cheê ngue esaã mbia je ra.

22

¹ —Seataque, seandu rã. “Eicuã”, jenyechi nguiã seje. Nyebe tacheê jêje, i que Pablo ra. ² Pablo judíos cheê naa mose, mbia que quiriri ja tuchi cote ra. Pablo que ñee mbei mbia je ra. ³ —Judío chõ se re. Társoo que achaacuquia ra. Tarso de Cilicia. Aa que atiarõ nda. Jerusalén ngue atiarõ nda. Gamaliel que sembaaquiatusa ra. Nanderamei ndui si que sembaaquiatusa quiatusa ra. Eraã si. Dios cheê ngue amumba sereã tuchi ra. Sã jêingo namo ã no. ⁴ Seicuã tuchi que eriqui Jesús quiato je nyii ra. Emo emo ngue aiquia chee ra. Emo emo ngue aru aru quia tarõ nda. Mbia ninisi abe que atarõ tarõ nguia ra. ⁵ Sacerdote rerecua que cartas mondo seje ra. Judíos rerecua abe que cartas mondo seje ra. Damáscoo nda aso nguiã ererao chã. Judíos je nda cartas arao nguiã ña. Hue jenda je. Damáscoo nda aso nguiã ña. Jesús quiato requia requia. Aa nda aru nguiã tarõ ña. Aa nda aru nguiã eiruã nua ña. Jenderecua ũquí icuate raque. Jeñee ee ae.

Aico uba Dios rese co cote, i Pablo

⁶ Acuasê nda Damáscoo chã nde. Tenda ibate que tata mo tu seresae ra. Ibate si que eru ra. Tata rendi que seresae tuchi ra. Sembua tuchi que ra. ⁷ Tata rendi rese mae mose que acoi oso íbii ra. Echeê mo ngue achandu ra. “Saulo, Saulo. ¿Mbaerã ndeicuate riqui seje re?” i que seje ra. ⁸ “¿Aba nde re?” ae que ee ra. “Jesús rei se. Nazaret jenda. Ae je ndeicuate riqui”, i que seje ra. ⁹ Seresenda que siquiche tuchi ra. Mae ndei ngue

tata rese re. Echeẽ nguia echanuate nguia. ¹⁰ “¿Mañi ae ra se re, Sererecua?” ae que se ra. “Dios que ndeirabo ra. Ehuã cote. Ecuasẽ oso cote. Damáscoo. Mbae riñ nda acheẽ ja ndeje huee cote”, i que Jesús seje ra. ¹¹ Tata rendi que seresa mungue ra. Seresayã. Nyebe seresenda sererao nguia seo rese. Damáscoo.

¹² Huee que emo ndiqu i ra. Ananías, i que ee ra. Moisés cheẽ ngue emumbayã tuchi quia ra. Judíos hue jenda que ñee turã ja quia ee ra. ¹³ Ananías que tu serea ra. Ñee ngue seje ra. “Saulo, Jesús quiato ereico co cote. Emae cote”, i que seje ra. Seresa turã ngue cote ra. Amae ngue erese cote ra. ¹⁴ Ananías que ñee seje ra. “Nanderu rerecua que Dios ra. Dios que ndeisi cose ra. Ae Dios chosei quia, ñquĩ icua sacua ngue Dios ndeisi cose ra. Jesús turã ndese mae sacua ngue ndeisi cose ra. Jesús cheẽ andu sacua ngue ndeisi cose ra. ¹⁵ Dios cheẽ nda eresenei senei mbia ja je cote. Ae erechandu, ñqui nda eresenei senei mbia ja je cote. Ae rese erema, ñqui nda eresenei senei mbia ja je cote. ¹⁶ ¿Mbaerã ereico chõte a re? Ehuã na. Sã Jesús quiato bautizar i ndeje. Echeẽ na Jesucristo je. Sã Dios ndeicua mbutiã”, i que Ananías seje ra.

Dios que atea cuu ra, i Pablo

¹⁷ Achube que Jerusalén nda. Aso que ñee Dios je ra. Dios chuchúaa. Huee que Jesús atea cuu ra. ¹⁸ Jesús que atea ra. Ñee ngue seje ra. “Eso asi Jerusalén si. A jenda ra ndecheẽ mumba mumbate, nde serenei nenei mose. Eso erecha” i que Jesús seje ra. ¹⁹ Acheẽ ngue Jesús je ra. “Sererecua, a jenda que seicuate nyii ra. Seicuate que eriqui nyii ra. Jesús quiato que asirõ sirõ nguia judíos chumunuasa si nyii ra. Atarõ tarõ ngue sequia ra. Airuã nua ngue sequia nyii ra. ²⁰ Mbia Esteban iquia mose, seyate que ñqui mose ra. Huee que aico ra. Eiquiasa irao que asarõ nda”, ae que Jesús je cuu ra. ²¹ Jesús que ñee seje ra.

“Eso. Taremondo isho. Secheẽ nda eresenei seneite judíos eã je”, i que Jesús seje ra, i que Pablo mbia je ra.

²² Judíos eã ñi ñee mose que mbia nyiibute cote ra. Pablo cheẽ andu serea cote. —¿Pablo nandequia rei jẽ! I nda eriquiã cote, i que judíos tasẽ tasẽ nda. ²³ Mbia paama i ja Pablo je. Tasẽ tasẽ. Huirao mbaaba aba. Ibi tuba ara ara mombo mombo ibate. ²⁴ Soldados rerecua que ñee cote ra. —Pablo jendao matã. ¡Nanderuã nua jẽ! I nda ñee, i que ererecua ra. —¿Mbaerã mbia ñee icua icua ndeje re? i Pablo je. ²⁵ Soldados que Pablo chucua ra. Iruã nua nda eña nde. Pablo que ñee capitán je cote ra. —¿Mbaerã nda seiruã nua nde? Romano ño se resẽ. Mbae icua asaã eãte resẽ, i que ra. ²⁶ Capitán ngue oso ererecua mbiirandu cote ra. Pablo cheẽ nguire. —¿Ereiruã nuachi nda jẽ! Romano ño ae re, i que capitán nda. ²⁷ Ererecua que oso ñee Pablo je cote ra. ¿Romano nde re? i que ee ra. Ae, i que ee ra. ²⁸ Ererecua que ñee mbe ee ra. —Mbae isiquia que amondo tuchi mbia je ra. “Romano” i nonde seje, i que ererecua Pablo je ra. Pablo que ñee ee ra. —Romano mbei chõ se re. Sechiacuquia mosenda bei, i que ra. ²⁹ Pablo iruã nua eã ngue cote ra. Mbia que hui esi cote ra. Mbia siquiche ja tuchi que cote ra. —Pablo nandechucuachĩ. Romano ño eriqui re, i que mbia cote ra. Ererecua abe que siquiche tuchi cote ra. Pablo o cuare.

Ererecua ñu munua Pablo cheẽ andu

³⁰ —¿Mbaerã judíos paama i Pablo je re? i que soldados rerecua ra. Isamami ngue ererecua ataque munua cote ra. Sacerdote rerecua ja. Amei ererecua ja. Pablo que ecuruchoi ererecua achõ je cote ra. Ñqui ererecua ñee sacua ee.

23

¹ Pablo que mae huĩ ererecua ja rese ra. Ñee ngue ee ra. —Seresenda, mbae turã ndese aico bei co. Namobe. Nyebe sesiquicheã mbei riqui

Dios si co, i que Pablo ra. ² Ananías, i sacerdote rerecua je. Aque que ñee Pablo ji jenda je ra. —Pablo churu rese jengua, i que ra. ³ Pablo que ñee ee cote ra. —Dios ra ucua nderese jẽ. Ndeturã eresaã ñooñochĩ nguiã. “¡Moisés cheẽ nda jemumbachĩ jẽ!” ere rei que ure je. ¿Mbaerã ereico echeẽ mumba mumba nde re? “Jengua Pablo churu rese”, ere chõchĩ nguiã serĩ. Moisés cheẽ mumba, i que Pablo ee ra. ⁴ Pablo cheẽ andusa que ñee asite ee ra. —¿Mbaerã erecheẽ icuã sacerdote rerecua je re? Dios emingo rei a resẽ, i que Pablo je ra. ⁵ Pablo que ñee ee ra. —Sacerdote rerecua eã eriqui reĩ nguiã seje. I nda acheẽ eãte erĩ. Aicuayãte quia ñi se re. “Jenderecua rĩ jẽingochĩ nguiã ñee icuã”, i rei que Dios ñee nande je resẽ, i que Pablo ra.

⁶ Hue rĩ ja ererecua ndua eã. Fariseos, i que ererecua ataque je ra. Saduceos, i que eataque je no nda. Nyebe Pablo ñee nguiã ee. —Seresenda, se rei fariseo. Seru ja rei fariseos no. “Mbia mano je ra quera si”, ae quiatu nguiã co. Ñquĩ je chõ mbia riqui nguiã paama i seje. Ñquĩ je chõ ngue sereru nguiã jẽje, i que Pablo ererecua je ra. ⁷ Pablo cheẽ nguire que ererecua ñee icuã icuã nyue ra. Saduceos que ñee icuã icuã fariseos je ra. Fariseos abe que ñee icuã icuã saduceos je no nda. ⁸ Saduceos que ñee nguia ra. —Mbia raaque ra quera si eã. Angeles eã ibatenda. Mbia aĩ abe eã, i que saduceos quia ra. Fariseos que echeẽ sobeishĩ nda. —Eraaque ra quera si. Angeles siqui ã ndesẽ. Mbia aĩ abe siqui ã ndesẽ, i que fariseos ra. Nyebe ererecua ñee icuã icuã nguiã nyue. ⁹ Tasẽ tasẽ tuchi que nyue ra. Fariseos mo ngue juã ñee nda. Ñquĩ ndei embesasa. Ñee ngue Pablo rĩ nda. —Pablo que mbae icuã saã eãte quia. Emo aĩ ñee ee reae. Angel mo ñee ee re no ae. Nyebe nandeico turã ee no. Ñquĩ mose ra nandeico turã

Dios je abe, i que fariseos ra. ¹⁰ Mbia que ñe e icuã icuã mbei chõchĩ nguiã nyue. Soldados rerecua ireite que eriqui ra. Mbia que Pablo iquia serĩte quia ee ra. Nyebe ñee soldados je. —Jẽso Pablo rea. Jendao rã jenyuchúaa, i que ererecua soldados je ra.

¹¹ Isa que Jesús ru ñee Pablo je ra. —Eresiquiche techĩ nda, Pablo. Serenei nenei ngue se a, eĩ ere si ra oso serenei nenei Roma, i que Jesús Pablo je ra.

Pablo nandeiquia, i rei mbia

¹² Isamami ngue judíos ñee ja nyue ra. —¡Pablo nandeiquia jẽ! i ja nyue. Mbae mo nda nandeu eã mbei, Pablo iquiayã mbei mose. Nandeyu eã mbei ra Pablo iquiayã mbei mose. Chã Dios nandembasi, Pablo iquiayã mose, i tuch i que judíos ñee nyue ra. ¹³ Ae Pablo iquia serĩte quia, ñquĩ cuabẽte que ra. Cuarenta que ra. ¹⁴ Ñquĩ ngue nyoĩ ja ñee mbia rerecua je ra. Sacerdote rerecua je abe no. —Mbae mo nda ureu eã mbei, Pablo iquiayã mbei mose. Chã Dios urembasi, Pablo iquiayã mose. ¹⁵ “¡Pablo embu ureje!” jenyẽ soldados rerecua je. “Pablo rese uremae na”, jenyẽ soldados rerecua mbiĩrĩ irĩ. Ñeenda cúa ra urechiquitirõ erese. Pablo ra ureiquia chã, i rei que judíos ra.

¹⁶ Pablo nongue riirĩ ngue jirandu erese ra. Aque que oso Pablo mbiirandu ra. Soldados chuchúaa. —¡Mbia ra nyiquitirõ tirõ nderese jẽ! ¡Ndeiquiachĩ nda jẽ! i que Pablo je ra. ¹⁷ Nyebe Pablo ñee soldado mo je ra. —Senongue riirĩ erao ndererecua je. Ñee nda ndererecua je chã, i que Pablo ra. ¹⁸ Nyebe erao nguiã nguerecua je. —Pablo que acuanindu mbu ra. Mbae i chõ nda ndeje, i nguerecua je. ¹⁹ Ererecua que acuanindu querao eo rese ra. Pe jiri que eĩ ñee ee ra. —¿Mbae ere u ñee seje re? i que ererecua ra. ²⁰ Acuanindu que ñee ererecua je cote ra. —Judíos ra ñee ndeje. “Pablo embu ererecua chumunua mose. Ererecua ra Pablo cheẽ ñandu”,

í ra nembirĩ irĩ. ²¹ Ñee ñooño nda ndeje. ¡Echeẽ nda erembumbayãchĩ jẽ! Judíos cuabẽ nda nyiquitirõ tirõ erese. Cuarenta. “Mbae mo nda nandeu eã mbei Pablo iquiayã mbei mose. Nandeyu eã mbei ra Pablo iquiayã mbei mose”, í tuchĩ judíos, í que acuanĩndu ererecua mbiirandu ra. ²² Soldados rerecua que ñee acuanĩndu je ra. —¡Equirirĩ chõ oso! ¡Erecheẽchĩ nda emo je jẽ! í que ee ra.

Pablo mondo ererecua Félix je

²³ Ererecua que ñee ererecua ataque mo je cote ra. —Sã soldados icociatu. Sã echoi Cesarea itondáruu. Sã doscientos choi ibi rĩ. Sã setenta choi ticuasú ato. Sã doscientos choi ira racuatirõ ji rerecua. Cesarea ra jẽso itondaru, í que soldados rerecua ñee nda. ²⁴ — ¡Ticuasú jẽisi mua Pablo rendacuã jẽ! ¡Pablo jendao turã nguia jẽ! Jendao turã ererecua Félix je, í que soldados rerecua ra. ²⁵ Embesa ji que emondo Félix je ra. ¶ ngue carta mbesa ra: ²⁶ —Se rei Claudio Lisias. Co ambesa quia ndeje co, Félix. Mbia rerecua tuchĩ quiarei nde. ²⁷ Co amondo quia ndeje co. Pablo, í equia ee. Judíos eisichĩ neaẽ. “Nandeiquia”, í rei ereaẽ. Se chõ ngue asiquisã nguia. Romano ndei ae. Nyebe mbia asiquisã nguia esi. ²⁸ Judíos rerecua chumunua mose que Pablo arao ee ra. “¿Mbaerã mbia icuat e riqui Pablo je re?” ae rei ngue ñee ererecua je re. ²⁹ “Pablo nandetarõ”, í rei que judíos quia ra. “Pablo nandeiquia”, í rei que judíos quia ra. Pablo siquã ndaque mbae icuã ndese. Judíos cose ndare cheẽ nguire chõ ngue judíos paama í Pablo je ra. ³⁰ Airandu que erese ra. “Judíos ra Pablo iquia”, í que mbia mo ñee seje ra. Nyebe aico nguia Pablo mondo ndeje aque. Ae eicuã icuãte riqui Pablo je, ñquĩ je que acheẽ nda. “Jẽso quia ñee Félix je”, ae chõ ngue ee ra. Hasta luego. ¶ ngue carta mbesa ra.

³¹ Soldados que Pablo curuchoi isa ra. Nguerecua cheẽ nguire. Ngasẽ ngue Antípatris ra. ³² Soldados que

nyoi ibi rĩ, ñquĩ ngue ngaẽ nyebi isamami nda. Ae nyoi ticuasú ato, ñquĩ ngue nyoi bei ngasẽ Pablo ruruchoi ra. ³³ Ngasẽ ngue Cesaréaa ra. Soldados rerecua chimbesea que emondo mbia rerecua je ra. Pablo abe que emondo mbia rerecua je ra. ³⁴ Mbia rerecua que mae huĩ carta echimbesea rese ra. —¿Ma jenda nde re? í que Pablo je cote ra. —Cilicia jenda rei se, í que Pablo ee ra. ³⁵ — Ae ñee icuã icuã nguia ndeje, ñquĩ ngasẽ mose ra ndecheẽ achandu ja, í que ererecua Pablo je ra. —Pablo jẽteaquiato tuchĩ Herodes chuchúaa, í que soldados je cote ra.

24

Judíos ererecua mbicuãse Pablo rĩ

¹ Cinco días mose que sacerdote rerecua ngasẽ Cesaréaa cote ra. Ananías, í equia sacerdote rerecua je. Ererecua ataque mo ngue ngasẽ erese ra. Tértulo abe que ngasẽ erese ra. Abogado rei Tértulo. Ngasẽ ngue ecuaẽ ñee ñooño Félix je ra. Pablo rĩ. ² Soldados que Pablo curucuaẽ ererecua chumunua mose ra. Tértulo que ñee icuã tuchĩ Pablo rĩ cote ra. Ererecua nda embicuã nguia Pablo rĩcharã ña. Ñee ngue ererecua je ra. —Ndeturãte eriqui ure je co, Urererecua. Ndeaquiatute eriqui ur e je co. Urembiate equia co. ³ Nyebe “iaanye” ure bei nguia ndeje co, Félix. ⁴ Ureandu mbirĩ na. Urecheẽ oco eã nda ndeje nye. ⁵ Pablo quiarei siqui chooñoa judíos je. Judíos mbuchesea sea ja. Embicuã icuã uchue. Nazarenos, í que judíos ataque mo je ra. Ñquĩ nderecua rei Pablo. ⁶ Pablo que Dios chuchua mbicuã serite rei ra. Nyebe ureisi nguia. Urerao rei que judíos rerecua chumunua mose ra. ⁷ Lisias tu chõchĩ soldados rurucuaẽ cote. Ueriquisã. Pablo rirõ icuã ureo si. ⁸ “Jeñee icuãse mose Pablo rĩ, jeñee ño oso Félix je”, í que Lisias ure je ra. Echeẽ Pablo je no. Ereirandu ra Pablo rese cote. Eicuã ndese, í rei que Tértulo Félix je

ra. ⁹—Ae beite, i ja judíos Tértulo cheé mose. Ñee icuã icuã ja Pablo ríi.

Pablo ñee ererecua Félix je

¹⁰ Ererecua que ñoomee Pablo je cote ra. —Nde echeé seje cote, i chõ ñoomee nguiã ee. Pablo que ñee ee cote ra. —Urererecua ima nde. Ndeaquiatute. Nyebe sebite riqui nguiã secheé mose ndeje. ã ngue ñee ñooño nguia seríi nda. Echeé tasibishorõ ndeje. ¹¹ Namó jiri que aso Jerusalén nda. Doce días. Acheé ñee ngue oso Dios je ra. Echeé ñee mbia je ae. Sã mbia nembirandu ae. “Ae beite” i ra mbia ndeje. ¹² Emo je que aico ñee icuã icuã eãte Dios chuchúaa ra. Mbia que ambucheé icuã eã nguia nyue ra. Judíos chumunuásaa que aico eã mbia mbícuã icuã nda. Mbia chuchua ite re abe que aico eã mbia mbícuã icuã no nda. ¹³ ã ñee ñooño ño nguiã seríi. ã mae ãte seicuã mo ndese resē. ¹⁴ Aque mii ndese chõ aico resē. Dios cheé yasu rui bei chõ aico nguiã co. Dios cheé yasu quiarei eicuã eã. Dios rei ureru rerecua bei. Co aico Dios icua co. Co aico Moisés cheé icua co no. Co aico Dios cheé mbuchecuaasa chimbesa icua co no. ¹⁵ Co aico Dios icua ñquí na si co. Mbia raaque ra quera si no. Ñquí aicuate. Mbia icuã nda quera si. Mbia turã na si. Quera ja chõ ndae. ¹⁶ Nyebe aico Dios cheé ndui bei co. Nyebe sechiã cuaãcuã i eã Dios si. Mbia si abe. ¹⁷ Cosete que aso a si ra. Muchos años. A achube a cote. Mbae mee mee sacua mbaecha reã je. Seresenda je. Dios je abe mbae mee. ¹⁸ Achimbuturã ngue Dios chuchúaa ra. Mbia eãsa. Mbia ambícuã eã. Judíos Asia jenda que maé serese ra. Dios chuchúaa. ¹⁹ Sã ñquí ngaé serenei ndeje. Seicuã mose, sã ñquí ngaé ñee ndeje. ²⁰ Sã ã abe ñee ndeje. Seruruchoi rei que judíos rerecua chumunua mose ra. Mbae i ãte que seje ra. “Mbae icuã ngue eresaã nda”, i eã ngue ererecua seje ra. ²¹ “Mbia mano je ra quera si, ae chõ ndei nguiã co. Ñquí je chõ ngue sereru nguiã jêje”, ae que ererecua je

ra. Ñquí i equia seje reae, i que Pablo Félix je ra. Félix rei ererecua.

²²—Emo mose ra acheé ndeje, i que Félix Pablo je ra. Félix jirandu tuchi rei Jesús chimbaaquiatu rese reaé. —Sã soldados rerecua ru rã. Huee quia nda acheé nguiã cote. Mañi ño nda aba ndeje cote, i que ererecua Pablo je ra. ²³ Félix que ñee capitán je cote ra. —Pablo jêteaquiato bei jê. Jêhui jêhui jiri esi. Sã equiato ngaé ngaé erea. Mbae mondo mondo ee, i que Félix ra.

²⁴ Emo mos e jiri que Félix ngasembe Cesaréaa ra. Eresebe que eru ra. Drusila, i que eninisi je ra. Judía rei eninisi. —Pablo jendu rã. Pablo cheé tachandu rã. Jesucristo ríi tachandu, i que Félix ra. ²⁵ Pablo que tu ñee ee ra. —Sã mbia siqui turã Jesús rã si. Sã mbia ñimbirãcuã mbae icuã si. Dios ra mbia icuã mbuchao, embasi sacua, i tuchi que Pablo Félix je ra. Félix chiã ngue cuaãcuã i Pablo cheé mose ra. Nyebe ñee Pablo je. —Eso cote. Serecochí mose ra acheembe ndeje, i que Félix Pablo je ra. ²⁶—Pablo ra mbae isiquia mondo chee seje. Se embui sacua, i rei que Félix ra. Nyebe Félix “echu” i i bei nguiã Pablo je. ²⁷ Eí mbei que Félix quia ra. Dos años. Aquere que Félix ererecua eã cote ra. Porcio Festo que esiquicharõ nda. Félix que Pablo tarõ mbei mii nda. —I nda judíos paama iã seje, i que ra.

25

Pablo ñee ererecua Festo je

¹ Festo que ngasē Cesaréaa cote ra. Félix rendaque re, mbia rerecuarã. Tres días mose que esi Jerusalén cote ra. ² Huee que sacerdote rerecua ñee icuã ja Pablo ríi nda. Judíos rerecua abe ñee icuã ja Pablo ríi. Festo je ñee ñee Pablo ríi. ³—Urembia jiri rã. Pablo eru Jerusalén, i ja rei que sacerdote rerecua Festo je ra. Iquia nda eña nde. Ñeenda cúaa. ⁴—Pablo tarõ ji ñi Cesarea pee. Aruã nda se. Namó jiri ra aso pee, i que Festo ra. ⁵—Sã

jenderecua abe nyoi serese Cesaréaa. ¿Mbae jenye quia Pablo je re? ¿Mbae icuã esaã nde? Nyao pee teñee seje, i que Festo ra.

⁶ Festo que siqui mbirĩ Jerusalén nda. Ocho o diez días. Hue si que eru nyebi Cesaréaa ra. Isamami ngue esi mbia chumunuásaa ra. Ae que mbia rerecua cote ra. Ngoi que huee ra. — Pablo jendu rã. Echeẽ tachandu cote, i que mbia je cote ra. ⁷ Pablo que ique cote ra. Judíos Jerusalén jenda que ñee icuã icuã Pablo rĩ nda. Maende rocoĩ mbae icuã naa mose. Ñee ñooño erĩ. ⁸ Pablo que ñee echeẽ mose ra. Judíos cheẽ ngue esibishorõ nda. — Mbae icuã mo asaã eãte resẽ. Judíos chimbesa amumbayãte resẽ. Romanos nderecua cheẽ amumbayãte no ndesẽ. Dios chuchua abe ambicuã eãte no ndesẽ, i que Pablo ra. ⁹ — ¿Ndeso sereãte Jerusalén nde? Mañi ae ra se quia ndeje hue reae, i rei que Festo Pablo je ra. — ñ nda judíos paama iã seje. Judíos tambia jiri, i que equia ndua ra. ¹⁰ Pablo que ñee ee ra. — Romanos nderecua raque jẽ. Aico raque jẽsaa a. Jẽ nguiatu jeñee seje. ã jẽingo raque seicuate ã. Mbae icuã mo asaã eãte judíos je resẽ. ¹¹ Se mbae icuã naa tuchi mose, i seiquia se jẽ! Judíos ñee ñooño mose serĩ, ¿mbaerã nda semondobe judíos je re? Semondo aroneate ee. Ererecua tuchi je semondo rã. Sã ae quia ñee seje, i que Pablo Festo je ra. ¹² Festo que ñee nyecuayã cuayã nguesenda je ra. Aquere que ñee Pablo je cote ra. — “Semondo ererecua tuchi je”, ere que seje. Taremondo ee cote, i que Festo Pablo je ra.

Pablo cheẽ tachandu, i Agripa

¹³ Aquere que Agripa si Cesaréaa ra. Ererecua rei ae. Berenice rese que esi ra. Festo rea. ¹⁴ Huee que itõ mocoĩte ra. Festo que Agripa mbiirandu ja Pablo rĩ nda. — A emo tarõ ji ñi a. Félix que etarõ mii nda. ¹⁵ Seso mose Jerusalén, sacerdote rerecua ñee tuchi seje. “Pablo eiquia”, i rei ngue seje re. Judíos rerecua abe ñee

icuã icuã tuchi Pablo rĩ. ¹⁶ Acheẽ ndei ngue ee re. “Tei. Mañi ae ra mbia mo iquiachõ nde. Mbia eicuã nenei eã mose seje. Ae ñee icuã nguia erĩ, sã ñee ñee ee. Sã ñee nguia nyue sésaa”, ae que ee ra. ¹⁷ Judíos que ngaẽ a cote ra. “Isamami jeñee tachandu Pablo je”, ae que ee ra. “Pablo jendu rã”, ae que isamami serimba je cote ra. ¹⁸ Pablo ucuayãsa que juã ja rei cote ra. Ñee icuã tuchite reĩ nda Pablo rĩ seje. Pablo chisaã icuã mo ngue embuchecuayã ñochĩ nguia seje. “Mbia ra Pablo mbicuã tuchichĩ nde”, aechĩ ngue se re. ¹⁹ “Judíos rã eã ño Pablo. Judío ndua rã eã ño Pablo riqui nguia ndua”, i chõ ngue judíos ñee ñee seje ra. Jesús, i que emo je ra. Judíos que ñee icuã icuã tuchi Jesús rĩ nda. “‘Jesús que quera si manondera’, i que Pablo judíos je ra”, i que Festo Agripa je ra. ²⁰ — “¿Mañi ae ra se re?” aete que se ra. Nyebe que acheẽ ee ra. “¿Ndeso sereãte Jerusalén nde? Huee quia nandechẽ”, ae rei que ee ra. ²¹ “Sã ererecua tuchi quia ñee seje. Semondo ee Roma”, i que Pablo seje ra. “Eno. Aremondo je nda ee re”, ae que ee ra. Nyebe ngue atarõ mbeite mii nguia, i que Festo Agripa je ra. ²² Agripa que ñee ee ra. — Se abe nda aque cheẽ achandu rã ña, i que Festo je ra. — Eno. Isamami nda echeẽ erechandu cote, i que Festo ra.

²³ Isamami ngue Agripa huirao turã mingue ra. Berenice rese. Ererecua irao. Ererecua ataque chumunua mose que echoi ique ra. Soldados rerecua que chi ja huee ra. Mbia rerecua mo abe que chi ra. — Pablo jendu cote, i que Festo mbia je cote ra. ²⁴ Festo que ñee cote ra. — Tacheẽ ndeje, Agripa. Jẽ abe je tacheẽ, mbia rerecua. A eriqui a cote. Pablo, i equia ee. Ae rĩ judíos riqui ñee mbeite seje. “Eiquia”, i bei seje. Jerusalén jenda abe ñee mbei erĩ. Cesarea jenda rã. “Sã mano”, i bei seje. ²⁵ ¿Mbae rĩ nda aba eiquia re? Mbae icuã mo esaã eãte resẽ. Ae quiarei ñee. “Semondo rã ererecua tuchi je”,

i que Pablo seje ra. Nyebe tamondo ee. ²⁶ ¿Mbae i ra aba embesa mondo ee re? Mbae icuã ngue esaã eãte. Nyebe Pablo aru nguiã jêje a. Ndeje chõ ngue aru nguiã, Agripa. Echeẽ ee. I nda eicuã erembuchecua. I nda eicuã ambesa mondo ererecua tuchi je. ²⁷ ¿Ma nda aba etarõi mondochõ nde? Eicuã mbesa iriã mose, i que Festo Agripa je ra.

26

Pablo ñee ererecua Agripa je

¹ Agripa que ñee Pablo je ra. — ¿Mbae i mbia quia ndeje re? Nde quia echeẽ cote, i Agripa. Pablo que o sui ñee ee ra. ²—Secheẽse rete ndeje, Sererecua. Judíos que ñee icuã tuchi quia serĩ nda, Sererecua. ³ Nde quiarei ureicuasa tuchi. Judíos icuasa tuchi nde. Urecheẽ icuã icuã ereicuate nde. Nyebe nderoseĩ nguiatu rã secheẽ andu.

⁴ Judíos maesate raque se, señetẽ mosenda bei. Serecua quiti. Jerusalén abe. ⁵ Se rei fariseo. Setiarõ namo mosendachõ ndei fariseo se. Judíos seicuate raque. Fariseos achõ ño ureramei ñee mumbayã mbei. ⁶ “Mbia raaque ra ambuquera si”, i que Dios ureramei je cose ra. Dios ra ucheẽ nyabiã. Nyebe “ae bei” ae nguiã ee. Ũquĩ ñi ño judíos riqui nguiã seucuayã ã. Ũquĩ ñi ño mbia riqui nguiã ñimbicua seje ã. ⁷ “Mbia raaque ra ambuquera si”, i que Dios ra. “Ae bei”, i ja Israel jenda quia ee ã. Nyebe Israel jenda riqui bei nguiã echeẽ ndui si ã. “Mbia raaque ra Dios mbuquera si”, ae sequia se abe co. Ũquĩ je chõ judíos icuã icuã ndiqui nguiã seje, Agripa. ⁸ ¿Jẽ abe je Dios mbia raaque mbuquera aroneate re?

Seicuã tuchi Jesús quiato je nyii, i Pablo

⁹ Se abe que seicuã icuãse rete riqui Jesús quiato je cose ra. Nazaret jenda chõ Jesús re. ¹⁰ Seicuã icuãte que ee Jerusalén nda. Sacerdote rerecua que ñee seje ra. Nyebe ngue aico nguiã Jesús quiato tarõ tarõ mbeite

cose. Sacerdote rerecua cheẽ nguire. Jesús quiato iquia iquia mose, “coche rei” ae que sequia ra. ¹¹ Jesús quiato que airuã nua tuchi quia ra. “I nda hui Jesús si”, ae rei que sequia ra. Sucha tubiriã ngue ambuchesea sea quia ra. Jesús quiato je seicuã sacuaã. Judíos chumunuasa mbuchesea sea. Paama ae tuchi que sequia Jesús quiato je nyii ra. Isho tuchi que aico oso oso Jesús quiato requia ra. Seicuã tuchi sacuaã ee.

Aico uba Dios rese co cote, i Pablo

¹² Emo mose ngue aso rei nguiã Damáscoo. Sacerdote rerecua semondo mose. ¹³ Tacheẽ tuchi ndeje, Sererecua. Tenda nandeite re mose que tata mo tu seresae ra. Ibate si que seresae ra. Seresenda abe resãe. Tata rendi que ureresae tuchichi nguiã tenda si. ¹⁴ Tata rendi rese ma e mose que urecoi íbii ra. Echeẽ mo ngue achandu ra. Hebreo cheẽ. “Saulo, Saulo, ¿mbaerã ndeicuãte riqui seje re? Nde sí chõ erechimbasi mbasi nguiã aque. Ticuasu rã tuchi quiarei nde aba cheẽ mumba mose. Sã ticuasu riqui nambacua mbuti no. Sã eriqui hui mbaba ira racua echi no. Ũquĩ na tuchi quiarei nde”, i que seje ra. ¹⁵ “¿Aba nde re?” ae que ee ra. “Jesús rei se. Ae je ndeicuãte riqui”, i que seje ra. ¹⁶ “Ehuã na. Aico nyecua ndeje a. Serenei nenei sacuaã mbia je. ‘Jesús rese que amae nda’, ere bei quia mbia je. Mbae mo abe ra ambuchecua ndeje. Ũquĩ abe teresenei senei mbia je. ¹⁷ Judíos eã je taremondo. Secheẽ nenei nenei sacuaã. Ũquĩ o taisi eicuã icuã mose ndeje. Judíos o abe taisi eicuã icuã mose ndeje no. ¹⁸ Taremondo judíos eã je. Terembaaquiatu quiatu. I nda eriquiã mbae icuã ndese. I nda eriqui mbae turã ndese. I nda eriquiã aba mbiirĩ irĩsa rui. I nda eriqui Dios rui. I nda Dios icua. I nda eicuã ambutiã esi. I nda Dios Ũquĩ ngue recoe umbaerã”, i que Jesús seje ra.

Pablo Dios cheẽ senei tuchi Agripa je

¹⁹ Ibatenda cheẽ ngue amumbayã nda, Agripa. ²⁰ Dios cheẽ ngue asenei senei tuchi mbia je ra. Mbia Damasco jenda je. Jerusalén jenda je abe no. Judea rurubinda je abe no. Judíos eã je abe no. “¡Jêicuã si jêhui chõ jê! Dios icha rui jêingo. Jêingo turã. ‘Dios icha rui eriqui’, i nda mbia jêje chã”, ae que ee ra. Embaaquiату quiatu. ²¹ Nyebe judíos seisi nguiã Dios chuchúaa. Nyebe eriqui nguiã “nandeiquia” i seje. ²² Dios que serea quiatu bei quia ra. Namó abe. Nyebe aico echeẽ nenei nenei mbei mbia ja je. Mbaecha je. Mbaecha reã je abe. Moisés cheẽ ndui si aico ñee ñee mbia je co. Dios cheẽ mbuchecuasa rui si aico ñee ñee mbia je co. ²³ ¶ ngue Dios cheẽ mbuchecuasa embesa cose ra: “Mbia ra Cristo mbasi mbasi. Aquere ra mbia eiquia. Ae rane nda quera si mbia raaque si. Ae ra mbia mbiirandu ngueco mose uquera rii. Judíos mbiirandu. Judíos eã ab e mbiirandu”, i que Dios cheẽ mbuchecuasa mbia je cose ra, i que Pablo Agripa je ra.

²⁴ Festo que ñee Pablo je cote ra. — Erequiachã ño nguiã co, Pablo. Embesai rese mae tuchire erequiachãte equia co, Pablo, i que Festo tasẽ Pablo je ra. ²⁵ —Aquiachã eãte se resẽ, Festo. Acheẽ nyecuate raque jêje. Dios cheẽ tuchi chõ asenei nguiã jêje co. ²⁶ A Agripa riqui raque a. Nandererecua tuchi. Echeẽ ee. Ae rii aico ñee jêje, ñquĩ ngue Agripa icua tuchi ra. Nyebe sesiquiche eãte riqui nguiã ñee ee. Secheẽ icua jate equia co. Jesús que ñee nyecuayã eã mbia je ra. Jesús mbae saã nyecuayã eã, i que Pablo ra. ²⁷ —¿Dios cheẽ mbuchecuasa cheẽ ndebite re, Agripa? Ndebite que ra, i que Pablo ee ra. ²⁸ —“Jesús quiato ra nde cote”, ¿erechĩ equia seje re? i que Agripa Pablo je ra. ²⁹ Pablo que ñee ee ra. —Nde mii eã. Seandusa ja. A jengu ja a. Jesús quiatorã na jê, se rã si, ae chĩ nguiã jêje. Jengasa ra chi eã nguiã, se rã si, i que Pablo ra.

³⁰ Pablo ñeende que ererecua juã cote ra. Agripa. Festo abe. Berenice

abe. Ae chi ngoi erese, ñquĩ abe que juã nda. ³¹ Nyoĩ que pe jiri cote ra. Ñee ñee nyue. —Pablo mbae icuã saã eã tuchi chõ nguia re. Eiquia aroneate quia eriqui re. Etarõ abe aroneate quia eriqui re, i que ererecua nyue ra. ³² Agripa que ñee Festo je ra. —“Semondo rã ererecua tuchi je”, i chõchĩ Pablo. ¶ nda aa chõ nandehui esi, ñee eã mose. “Semondo rã pe ererecua tuchi je”, iã mose, i que Agripa ra.

27

Pablo mondo Roma quiti

¹ —Pablo tamondo Italia, i que ererecua ra. —Jêisi suruchoi, i que soldados rerecua mo je ra. Julio, i que soldados rerecua je ra. Augusto rimba, i que ñquĩ soldados je ra. Emo abe que ecuruchoi isi ra. Se abe que aso erese ra. Lucas rei se. ² Aristarco abe que oso urerese ra. Macedonia jenda rei ae. Tesalónica, i sucha tubiriã je. Ureique ja que canoa cuasu ye ra. Adramitio jenda rei canoa. Asia quiti que urecuata ra. Sucha mbuchesea sea sacuã hue jenda. ³ Isamami ngue urecuasẽ Sidón cote ra. Julio turãte que Pablo je ra. Ecuatasa que eriqui ra. Nyebe Pablo si uquiato rea. Equiato que etequiату ra. ⁴ Urecuata si que amandui ra. Quiririã ngue ureriquisã nda. Canoa mbucuatayã. Nyebe ejoõ acua mo uresichã nguiã. Eibichi que ureso quia cot e ra. —I nda quiririã nandembutiba eã, ure que ra. Chipre, i que ejoõ je ra. ⁵ Cilicia que urechucuã cote ra. Panfilia abe que urechucuã nda. Urecuasẽ ngue Mira cote ra. Licia, i que ibi je ra. ⁶ Huee que soldados rerecua canoa cuasu nongue tea ra. Alejandría jenda rei canoa. —Oso ra Itáliaa, i que ure je ra. —Aque ye jêingue, i que ure je ra. Ae ureso nguiã eye cote. ⁷ Ureitõte que oso quia ra. Ureque atate que ama ndisha rasa ra. Urecuasẽ nyee que Gnídoo ra. Quiririã mbeite que ureruba quiti ra. Nyebe ejoõ acua mo uresichã nguiã. Creta, i

que ejoõ je ra. Salmón ngue urechucua nda. ⁸ Ejoõ acua que uremama jiri ra. Quiririã icuã icuã ngue ure je ra. Buenos Puertos que urecuasẽ cote ra. Lasea, i que hue rurubinda je ra. Sucha tubiriãte que ra.

⁹ Ureitõ mocoĩte que huee ra. Quiririã tuchite chee que ra. Aba ireĩte que quiririã cote ra. Ama mose. Nyebe que Pablo ñee mbia je ra. ¹⁰ — Nandecuata i i mose ra canoa ñimi nande je. Mbae ra ñimi ja canoa yenda. ¡Nande abe ra nandemanochĩ jẽ! i que Pablo ee ra. ¹¹ Soldados rerecua que Pablo cheẽ mumba ra. Canoanya cheẽ mumbayã. —Nyao rei, i que soldados rerecua ra. ¹² — Canoa ndua icuãte a. Quiririã aronea. Nyao rei a si. Ma nandecuasẽ ãte Fenice. Huee nda nandecu are jiri nguiã. Huee que quiririã eã jiri. Nyao huee, i que ureataque ra. Fenice rei sucha tubiriã. Ejoõ acua jenda.

Quiririã mbia iquia serĩ

¹³ Quiririã ngue uba cote ra. Ichu chooño jiri que cote ra. — Nandecuatasã jirichĩ cote, i que ureataque ra. Canoa que embucuata cote ra. Ejoõ acua ibi que ureso quia ra. ¹⁴ Urecuata ramo mose que quiririã icuã tu ure je ra. Ejoõ acua quti que eru ra. Noreste, i que aque quiririã je ra. ¹⁵ Quiririã ngue canoa mbucuatayã ureruba quti ra. —Sã quiririã ae nanderuruchebi serao, ure chee que ra. ¹⁶ Ejoõ quitera quti que ureso ra. Ejoõ ngue quiririã nyoote ure si ra. Claudia, i que ejoõ je ra. Canoa ñetẽ ngue urembuti serao quia ra. Canoa cuasu riita rese. Ejoõ quitera quti que canoa ñetẽ urechuchã canoa cuasu ye cote ra. Eusite raque. ¹⁷ Canoa ñetẽ ngue urechuchã canoa cuasu ye ra. Canoa cuasu que echucua chucua ra. — Quiririã nda embuquiatachĩ nande je re, i que ra. Mbia siquiche tuchi que ra. —¡Eriiri iri quti ra nyaochĩ jẽ! Nandejaã ndae, i que nyue ra. Nyebe que tiru canoa aronda mbuquichi cote ra. —Sã canoa ae si quia

nandererao surucuata, i que nyue ra. ¹⁸ Isamami abe que quiririã icuã icuã mbeite ra. Nyebe mbia mbae mombo mombo nguiã ii. Canoa yenda. Emumbebi sacua. ¹⁹ Aquere que ureitõ si no nda. Isamami ngue mbae uremombo mombo ja cote ra. Canoa mumbebi tuchi cote. ²⁰ Ureitõ mocoĩ mocoĩ tuchi ama ndisha riite re. Itõ nguicoi bei que ure je ra. Quiririã mbei. Pã i bei. Tenda checuayã mbei que ra. Nyasi tata abe checuayã bei que ra. —Nandecuaseã mbeichĩ nda ibi je re. Ama ndisha riite re ra nandemanochĩ nde, ure chee que ra.

²¹ Mbae que ureu eã mocoĩ mocoĩ nda. Nyebe que Pablo juã ñee mbia je ra. Canoa yenda je. — Seresenda, secheẽ ngue jemumbachĩ nda. Secheẽ aba mumbayã mbichĩ. Crétaa nandecuchõ mbichĩ. ĩ nda canoa yenda nandemomboate ii. Mbae mbuquiachã nondechĩ. ²² ¡Jeñimbirãcuã ño jẽ! Nande mo nda mano eã. Canoa nda quiachã. Nande quiatu ra nandequiachã. ²³ Dios rimba rei se. Dios que ángel mo mbu ñee seje isa ra. ²⁴ “¡Eresiquichechĩ nda jẽ, Pablo! Eremano eã ndae. Erecuasẽ nyee r a ererecua Roma jenda je. Nderĩ nda nderesenda mo manoã. Dios ra etequiatu ja,” i que ibatenda seje ra. ²⁵ Seresenda, ¡jeñimbirãcuã ño jẽ! Dios aicua tuchite quia co. Dios ra ucheẽ nyabiã nande je. Angel cheẽ nguire ra nandemanoã. ²⁶ Quiririã nda nandemondo ejoõ acua mo ndese, i que Pablo ra.

²⁷ Ureitõ mocoĩ mocoĩte que ama ndisha riite re ra. Catorce días. Quiririã ngue urerurucuata chõte quia ra. Adria, i que ama ndisha je ra. —Ama nimia nanderubite rei reae, i que canoa yenda ra. Itondiite mose. ²⁸ Ama ndiite que embuchecha ra. ¿Ecuã tuchi ere? i que nyue ra. Treinta y seis metros. Pe jiri que embuchecha si no nda. Veintisiete metros cote. ²⁹ —¡Canoa nda cua ichĩ sita je jẽ! ¡Quiatachĩ nda jẽ! i que mbia nyue ra. Nyebe mbae usi mondo mondo

nguiã ii canoa ndiquisã sacuaã. Mbae usi cuatro. Anclas, i que ũquĩ je ra. Ae ecuasa chi nguiã canoa ndese embutiba. —Quiatuchu, nyaashĩ, i tuchi que equia ra. ³⁰ —Nandechã nyecuayã, i que canoanya rimba ra. Nyebe canoa ñetẽ mbuquichi mondo ii. —Mbae usi urechucua mondo ii. Urechucua canoa ai rese, i que urembĩĩĩ irĩ nda. —Nandechã nyecuayã, i chõ mbei que equia nyue ra. ³¹ Pablo que ñee soldados je ra. Ererecua abe je. —Ñ chichõ eã mose canoa ye, jeñĩmi ja rae. Ama nda jẽiquia, i que Pablo ra. ³² Ae soldados canoa ñetẽ sã nyisia nguiã. Emondo ii. Hui esi cote.

³³ Nyaashĩ namo mose que Pablo ñee ja mbia je ra. —Mbae mo jẽu jiri cote. Jeniãcuã mocoĩ mocoĩte que. Mbae mo ngue jẽuãte catorce días. Jengueãte que catorce días no. ³⁴ Mbae mo jẽu rã cote ae. ¶ na jẽquirãcuã jiri. Mbae mo nda jeĩ eã jẽje. Jemo nda mano eã, i que Pablo ee ra. ³⁵ Aquere que Pablo mbichae sirõ nda. Ianye, i que Dios je ra. Mbia resa rae. Nyisia que ra. U que cote ra. ³⁶ Pablo cheẽ ngue mbae oseĩ uquia mbia je ra. Mbia ja que mbae u cote ra. ³⁷ Urecuabẽte que canoa yenda ra. Doscientos setenta y seis que ure ra. ³⁸ Mbia ja que mbae u tuchi ra. Quiata a raanguia que emombo mombo ii cote ra. Canoa mumbebi sacuaã.

Canoa jaã

³⁹ Ureachaashĩ ngue cote ra. Ibi rese que uremae cote ra. —A ureicuayãte, i que mbia ibi je ra. Eicoĩnda rese que uremae nda. Ama nimia turã. —Nyao nguichi huee. Eicoĩnda, i rei que ererecua ra. ⁴⁰ Anclas sã ngue echisia sia ra. Anclas recha bei ii. Canoa mbuchaa chaasa que embuquiata ra. Tiru icoĩ que embuchesecobe quiririã je ra. Canoa ngue ngata ama nimia turã nguiti cote ra. ⁴¹ Iaãcuã eicoĩnda que canoa jaã nda. Eriquiraa eãsaa. Canoa ai que jaã tuchi ra. I rebera tubiriã ngue ra. Canoa ndiita mbaaba aba.

Eriita que nyiquiso ra. Quiata que ra. ⁴² Soldados que ñee cote ra. —Ñ ecuasa riquiã ã nae, ja nandẽiquia ja jẽ! ¶ nda echoĩ eã ita. Oso chee eã, i rei ngue soldados re. ⁴³ Soldados rerecua que Pablo iquia sereã nda. Nyebe ñee nguiã soldados je. —Ecuasa monda jẽiquiachĩ jẽ! i que soldados je ra. Ererecua que ñe e mbia je cote ra. —Eita aquiatu jẽso ii. Jẽso usẽ ama nimia ndese. ⁴⁴ Eita aquiatuã, jẽso mbebi ira rese, i que soldados rerecua ure je cote ra. Eĩ ure ja que usẽ ama nimia ndese cote ra.

28

Ngasẽ ejoõ ácuua Máltaa

¹ Uresẽ ja que ama nimia ndese ra. —Malta, i que a je ra. Ejoõ acua je, i que hue jenda ure je ra. ² Hue jenda turãte que ure je ra. Tata que emendi ure je ra. Urechee sacuaã. Tiquindi-seĩte que eriqui ure je ra. ³ Pablo que nyea queru mbuchuuta ra. Nyea mbucha mose que mbei usẽ asi Pablo echĩ ra. Mbei que Pablo o shiu ra. ⁴ Eo resebe tuchi que eñĩ nda. Nyebe hue jenda ñee ñee nyue. —Mbia iquia iquiasa Pablo reae. Oso chee que amandisha si no. A mbei riqui eshiu a no. Mano nda cote reae. Huiicuã mose, i rei que hue jenda nyue ra. ⁵ Pablo que mbei mbaba tátaa ra. Erasiã mbei que Pablo je ra. ⁶ Mbia que mae nguiatu Pablo rese ra. —Ma eruru. Embusiate rei rae. Mano ndae, i rei que ra. Mbia que mae nguiatute rei u nguiã erese. Erasiã mbeite que ee ra. Nyebe mbia ucheẽ mbuchebi nguiã. —Dios mo ndei Pablo, i que mbia cote ra.

⁷ Hue robeichõ ngue ererecua mbae ibi ra. Ejoõ acua rerecua. Publio, i que ererecua je ra. Urererao que uchuchúaa ra. Urembuquiaru turãte que ra. —Jẽitõ mocoĩ jiri, i que ure je ra. Tres días que ureitõ erese ra. ⁸ Publio ru rasite que ra. Eracuta que ra. Eruushi ruquite que ra. Pablo que oso erea ra. O que echono earõ nda. Ñee ngue Dios je ra. Nyerõ ngue cote ra. ⁹ Aquere que mbia rasi ngãe

ngaẽ ja Pablo je cote ra. Ejoõ jenda ja. Dios que embucherõ ja ra. ¹⁰ Mbia que mbae mee mee tuchi ure je ra. Urecuata mose que mbae chuchã nyuchã tuchi canoa ye ra. Urechurã.

Pablo ngasẽ Rómaa

¹¹ Ejoõ acua que urecu bei ra. Tres meses. Canoa cuasu mo abe que chi beite aque rĩ nda. Alejandría jenda rei aque canoa. Dios Nyeremo, i que aque canoa je ra. Aque canoa ye que ureso cote ra. ¹² Siracusa, i que sucha tubiriã mo je ra. Huee que urecuasẽ nda. Huee que ureitõ mocoĩ nda. Tres días. ¹³ Hue si que ureso siquiibi cot e ra. Urecuasẽ ngue Regio ra. Huee que ureitõ nda. Isamami ngue quiririã ureichu urequite quitira. Canoa maña turã. Co mii ngue ureque ama ndiite re ra. Urecuasẽ ngue Puteoli ra. Huee que urequichi bei canoa si cote ra. ¹⁴ Jesús quiato mo ngue uretea huee ra. —Jenguchõ na urerese, i que ure je ra. Ae urecuchõ nguiã una semana erese. Aquere que ureso Roma nguiti cote ra. Ibi rĩ. ¹⁵ Jesús quiato que jirandu urerese cote ra. Roma jenda. Nyebe ecuaẽ nguiã urerobeishĩ. Foro de Apio, huee que urerobeishĩ nda. Tres Tabernas, hue abe que urerobeishĩ nda. —Iaanye, i que Pablo mae mose Jesús quiato rese ra. Pablo ia tuchi erobeishĩ mose. ¹⁶ Urecuasẽ ngue Roma cote ra. Sucha tubiriã tuchi que Roma nda. Soldados rerecua que ecuaasa mondo ja mbia icuã ndaarõsa je cote ra. Pablo mbuchao que ra. —Ndechuchua chõ eico nde, i que ee ra. Soldado mii ngue Pablo reaquiato bei quia ra.

Pablo Dios cheẽ senei senei Rómaa

¹⁷ Urecuasẽ namo jiri mose que Pablo judíos rerecua munua ja ra. Roma jenda. Pablo que ñee ee ra. —Seresenda, mbae icuã ngue asaã eãte judíos je ra. Nanderamei ñee abe que amumba eãte ra. Judíos que semeeño Romanos je ra. Jerusalén seico mose. ¹⁸ Romanos ngue ñee tuchi seje ra.

“Nandehui esi”, i rei ngue serĩ cote re. “¿Mbaerã nda nandehui quia re? Mbae icuã mo ngue esaã eãte”, i que serĩ nda. ¹⁹ “¡Jēhuichĩ nda esi jē!” i bei que judíos quia ra. Romanos je. Judíos quia ñi hui sereãte nguiã sesi. “Semondo ererecua tuchi je”, ae chee que se ra. Ererecua saa ra acheẽ icuã eã ndei judíos rĩ. ²⁰ Nyebe “Jenyu. Tamae jendese. Tacheẽ jēje”, ae que jēje ra. Mbia mano je ra quera si, nande chõ ndaque equia co. Ñquĩ je chõ secuasa riqui nguiã co, i que Pablo judíos je ra. ²¹ Judíos rerecua que ñee Pablo je ra. —Jerusalén jenda que ucheẽ mbesa eãte imbu ure je ra. Ae ngaẽ ngaẽ nguia hue si, ñquĩ abe que ñee icuã eãte quia nderĩ nda. ²² Ndecheẽ urechandu rã. Mangue chooño eã mbia ñee icuã icuã jeni. Jesús quiato rĩ. Nyebe echeẽ ure je, i que Roma jenda Pablo je ra.

²³ —Aque mose ra urechu ndecheẽ andu, i que judíos Pablo je ra. Aque mose que ecuaẽ jate cote ra. Pablo chuchúaa. Isamamimbe. Pablo que embaaquiato quiato tuchi ra. Tenda mondo chee. Jesús rĩ ngue eriqui ñee ñee mbia je ra. Moisés chimbesa que esenei senei ee ra. Dios cheẽ mbuchecuasa chimbesa abe que esenei senei ee ra. † nda mbia Jesús icua. —Dios quiarei ererecua tuchi, i tuchi que Pablo judíos je ra. ²⁴ Emo emo ngue Jesús isi ra. Pablo cheẽ mose judíos je. Eataque que Pablo cheẽ isiteã teã nda. Ichõño nei equia ee reaẽ. ²⁵ Pablo cheẽ ndui ja eã ngue ra. —Nyao rei erecha, i que eataque ra. Nyebe Pablo ñee ee. —Espíritu Turã ngue Isaías mbucheẽ turã nanderamei je cose ra. Ñĩ ngue ñee nda:

²⁶ Eso rã ñee judíos je: “Secheẽ nda jeñandu rei nguiã.

Jeñandu eã naanguia rae.

Jemae ndei nda erese re.

Jemae eã naanguia ra erese.

²⁷ Jeñia ãtãte.

Aba cheẽ mumba mumba.

Jendesa jemungue munguete.

Secheẽ jēicua sereãte.

Jemba sereãte seicha rui.
 Nyebe aico nguiã jembucheroãte”, i
 que Dios ra, ere ee,
 i que Isaías chimbesa ra, i que Pablo
 ra. ²⁸ Pablo que ñee mbei ra. —
 Tacheẽ jẽje, judíos. Judíos eã je ra
 Dios cheẽ uresenei senei cote. Ûquĩ
 nguia ra eya tuchi erese. ¶ nda Dios
 erirõ eicuã si, i que Pablo ra. ²⁹ Pablo
 cheẽ ñii ngue judíos choi guiã ñee icuã
 icuã nyue ra. ³⁰ Dos años ngue Pablo
 riqui huee ra. Roma. Mbae isiquia
 que emondo mondo tuchuacha je
 ra. Huee eico mose. Pablo iate que
 eriqui ra. Mbia nyoĩ nyoĩ mose erea.
³¹ Mbia mo ngue Pablo cheẽ siquisã
 eãte ra. Jesucristo rĩĩ ngue eriqui
 ñee ñee mbia je ra. —Dios ra mbia
 rerecua tuchi, i que equia mbia je ra.
 —¿Mbaerã ereico ñee Jesús rĩĩ nde? i eã
 ngue emo Pablo je ra.

LA CARTA DEL APOSTOL SAN PABLO A LOS ROMANOS

Pablo ucheẽ mbesa mondo Roma jenda je

¹ Co aico co mbesa jẽje co. Se rei Pablo. Jesucristo rimba rei se. Dios que seirabo ra. Ucheẽ nenei nenei sacua. Dios que semingo icue ra. Ucheẽ turã nenei nenei sacua. ² —Secheẽ turã tamondo mbia je, i que Dios cose ra. Ucheẽ nenei neneisa je ñee. Echeẽ ngue ique cote ra. ³ Dios cheẽ turã nandembiiranduchi Jesucristo rĩ cote. Dios riirĩ ndei Jesucristo. David riirina ngue tu íbii cote ra. ⁴ Jesucristo manonde, Espíritu Turã ngue embuquera ra. Dios quirãcuã je que embuquera ra. Dios riirĩ ndei Jesucristo. Nyebe Espíritu Turã embuquera nguiã. Mbia mbiirandu randu sacua Dios riirĩ ndese. ⁵ Dios turãte que ure je ra. Jesucristo rĩ. Nyebe ureirabo mingo nguiã ucheẽ nenei nenei sacua. ¶ nda mbia mangue chooñoa jenda abe Jesucristo icua. ¶ nda mbia mangue chooñoa jenda abe Jesucristo cheẽ mumbayã no. ⁶ Sã jẽ Jesucristo cheẽ jemumbayãte no. Sã Dios jẽirabo no. Jesucristo rimbarã. ⁷ Co ambesa mondo quia Rómaa jẽje co. Dios chesecua tuchi chõ jẽ nde. Dios que jemingo icue uquiatorã nda. Nanderu chõ Dios re. Nandererecua chõ Jesucristo re. Sã ùquĩ turã mbei riqui jẽje. Sã ùquĩ ndiqui jembia tuchi.

Pablo oso sete raque Rómaa

⁸ —Jesús quiato tuchi chõ ùquĩ ndiqui re, i jate mbia quia jeniã. Mangue chooñoa jenda abe. Nyebe aico nguiã gracias i tuchi Dios je co. ⁹ Dios cheẽ asenei senei mbeite quia mbia je co. Eriirĩ ñi. Dios resa rae aico embesa mbesa jẽje a. Aico ñee mbeite Dios je jeniã co. ¹⁰ Aico ñee ñee mbeite Dios je co. ¶ nda Dios semondo jendea. Semondose mose ra aso jendea. ¹¹ Sesó sete raque

jendea. Jembaaquiato quiato sacua Jesús rĩ. Jembirãcuã sacua Jesús rĩ. ¹² Sesó sete jendea. Ñimbã sacua nyiese. Nandeico tuchi sacua Jesús rui. Nande Jesús nandeicuate resẽ. ¹³ Taso jendea, ae beite rei que se quia ra. Taembaaquiato quiato Jesús rĩ, ae rei se. Eĩ nda Jesús jẽicua secheẽ nguire. Sã mbiamo Jesús icua tuchite secheẽ nguire no. Mbae seriquisã quisã mbeite. Nyebe asoã mbeite nguiã jendea. ¹⁴ Jesús cheẽ nenei nenei si ahui aroneãte. Tasenei senei tuchi mbia ja je. Griego ja je. Mbiamo abe je. Eaquiato je. Eaquiata abe je. ¹⁵ Nyebe aico nguiã icoquiature co, Jesús cheẽ nenei nenei sacua jẽje. Roma jenda je.

Jesús cheẽ quirãcuã tuchi

¹⁶ Aireĩ ireĩ eãte Jesús cheẽ nenei nenei mbia je. Jesús cheẽ quirãcuã tuchi quia ique nguiã aba chiangui rĩ. Aba rirõ sacua mbae icua si. Judíos je rane ngue Jesús cheẽ quirãcuã nda. Judío eã je abe no. ¹⁷ Jesús cheẽ nandembiirandu quia ã. Nande Jesús icua mose, Dios ra nandesi turã uquiatorã. Mbae turã mo nandesaã eãte raque.

Ae Jesús icua quia nae, Dios ra ùquĩ isi turã tuchi. Ùquĩ nda siqui bei cote, i ñi embesa ji re.

Mbia icua tuchi Dios je

¹⁸ Ae siqui Dios rã eãte nae, ùquĩ nda Dios mbasi ja. Ae siqui icuaãte quia nae, ùquĩ nda Ibatenda mbasi ja no. Ùquĩ nandeicuate quia nande co. Ichõiñosa reã ñee andu sereãte quia ñene. ¹⁹ Jirandu tuchi rei que Dios rese ra. —Eĩ ae chõ nguiã co, i rei que Dios ee ra. Dios icua sereãte quia ñene. ²⁰ Dios rese mbia mae aroneãte raque. Dios quirãcuã ndese mbia mae aroneãte raque. Mbia ra Dios icua uchiangui re, echiao rese mae mae mose. Dios que mbae chao ja nyii ra. Aque mose bei mbia riqui mae mae Dios chiao rese co. Nyebe eriqui nguiã “Dios rese ureiranuãte”,

i aroneâte. ²¹ Jirandu tuchi rei que Dios rese resẽ. Ñee turãyã tuchi chõchĩ Dios rĩĩ. Gracias iã ñochĩ Dios je. Nyebe eriqui nguiã ndua icuã icuã mbei. Nyebe eriqui nguiã itongui rĩ mbei. ²² “Ureaquiatute” ichõĩño ñochĩ equia ũquĩ. Eaquiataũ ño siqui nguiã ũquĩ. ²³ Hui tuchi que Dios si ra. Ae manoã mbeite quia, aque si. Sererecua i chõchĩ mbae ao ao ji je cote. Ae ra mano, ũquĩ je chõ eriquichĩ nguiã “sererecua”, i. Mbia raanguia je. Quiaa rĩnda je chõ eriquichĩ nguiã “sererecua” i. Ae mbebe quia. Ae uchã nguiã. Ae nguata quia nguie rese. ũquĩ je chõ eriquichĩ nguiã “sererecua” i.

²⁴ Nyebe Dios hui nguiã esi cote. Mbae icuã naa naa mbei sacua cote. ²⁵ Ñee ñooño tuchi Dios rĩĩ cote. “Nandererecua” i chõchĩ Dios chiao je cote. “Nandererecua” i rocoĩ Dios mii je. “Nandererecua” i bei chõ mbichĩ aba quia Dios mii je. Amén.

²⁶ Nyebe Dios erecha ja nguiã cote. Oco chooño sacua mbae icuã ndese. Ubi icuã ndese. Cuña mo oco oco nyiese si. Cuña ngu raã naa cuña nongue je. Siqui rocoĩ ngu rese. ²⁷ Hombre mo abe hombre nongue mo oseĩ oseĩ. —Seninisirã nde, i ñee ñee uchue si. Oco oco nyiese. Siqui rocoĩ ngũinisi rese. Icha tuchi Dios si. Nyebe Dios riqui nguiã embasi tuchi co cote.

²⁸ Dios rese jirandu sereã. Nyebe Dios hui nguiã esi. Siqui bei bei sacua ubi icuã ndese. Nyebe eĩ eĩ nguiã nyue mbae icuã ndese. ²⁹ Eicuã tuchi eriqui ũquĩ. Ico chooño tuchi equia cuña ndese ũquĩ. Ndua ndua icuã mbei tuchi equia ũquĩ. —Aque rã nda se chã, i beite equia emo mbae je ũquĩ. Mbia mbasi chooñote equia ũquĩ. Mbaecha ucuayã ñooño tuchi equia ũquĩ. Mbia iquia iquia chooño tuchi equia ũquĩ. Paama i chooñote equia uchue ũquĩ. Mbia mbiĩrĩ iĩ ñote equia ũquĩ. Mbia ucuayã ñooño mbeite equia ũquĩ. ³⁰ Ñee ñooño mbeite equia mbia mo ñi ũquĩ. Dios

ucuayã tuchi equia ũquĩ. Ñee icuã icuã mbeite equia aba cheẽ ndibishorõ ũquĩ. Ucuasu raã naa ñooñote equia ũquĩ. “Se quiarei i tuchi”, i beite equia ũquĩ. Emo mbiicuã icuã mbeite equia ũquĩ. Ngu cheẽ mumba mumba chooñote equia ũquĩ. Usi cheẽ abe mumba mumba chooñote equia ũquĩ. ³¹ Eaquiataũ tuchite ũquĩ. Ucheẽ mumba mumbate ũquĩ. Emo je eturã eãte riqui ũquĩ. Emo icuã si eriqui tesareiate ũquĩ. Eya eã eãte riqui emo ndese ũquĩ. ³² —Ae ũquĩ saã saã nguiã mbae icuã nae, ũquĩ nda amondo tata cuasu, i que Dios ra. Dios cheẽ icuare quiatu eriqui nguiã mbae icuã naa i ite. —Sã emo abe mbae icuã naa naa nandechabe, i chee chee.

2

Dios mbia cuata tea ja

1 —Dios ra ũquĩ mbasi rã ña, erechĩ nda ũquĩ mbia icuã je. Nde i mose, nde abe ra ndeicuã nyecua mbia je. —Seturãte aico co, jerechĩ nda jẽ! — ũquĩ ndiqui mbae icuã naa naa ũquĩ, nde i mose, ũquĩ icuã sí chõ eresaã saã nguiã nde abe aque. ² —Ae ũquĩ icuã saã saã nguiã, ũquĩ tambasi, i mose Dios, Dios ra embasi chooño eã. Maende erese quia ra embasi. ³ — Dios ra ũquĩ mbasi rã ña, erechĩ nguiã huee. Eraã sí tuchi chõ ereicochĩ nguiã ũquĩ sí raã naa aque. Nde abe ra Dios nembasi ũquĩ ndese resẽ. ⁴ Dios ia eãte raque aba icuã ndese. Dios aba mbasi jei eã ndaque aba icuã mosebe. Ñimbirãcuãte aba icuã je. Coche ñene, ereã ñochĩ Dios chimbirãcuã mose ndeje. —Eyayã jé nda huicuã ndese chã, i Dios quia nderĩ co. Nyebe eriqui nguiã ñimbirãcuã ndeicuã je. ⁵ Ndechiã átã tuchi chõchĩ. Ndeico sereã tuchi chõchĩ Dios rui. Ndeicuã eremunua tuchi chõ nguiã aque re. Dios nembasi nonde. Dios mbia icuã mbasi ja mose ra nde abe mbasi. ⁶ Aque mose ra Dios mbia mbuchao chao. Emo emo nda emondo tata cuásuu. Emo emo nda emingo bei no.

⁷ Ae eturã mbeite riqui, ùquĩ nda Dios mingo bei. Nyoĩ sete quia Dios rea re. Siqui bei serete quia mbia mingo beisa rese re. Nyebe ra Dios emingo bei cote. ⁸ Dios ra paama i tuchi mbia icuã je. Mbasi tuchi rae. Mbiambũcuãsa tuchi quia ùquĩ nde. Dios cheẽ mumbate quiatu nguiã. Nyebe ra Dios embasi tuchi. ⁹ Ae siqui mbae icuã ndese, ùquĩ ja ra Dios mbasi. Judíos icuã nane nda embasi. Judíos eã abe ra embasi no. ¹⁰ Ae siqui mbae turã ndese, ùquĩ je ra Dios turã mbei. Judíos turã nane. Judíos eã abe cote. Mbiamra ùquĩ turã icua tuchi. Dios ra ùquĩ mbiam tuchi. ¹¹ Co quiatu, i eã nda Dios mbiam mo mĩ je. Mbiam mĩ ndese ra ebia eã. Mae turã ja chõ nda erese.

¹² Ae jirandu eãte Moisés chimbese rese nae, ùquĩ siqui icuã mose ra Dios embasi. Jirandu eãte raque Moisés chimbese rese. Ae Moisés chimbese icua nae, ùquĩ siqui icuã mose ra Dios embasi. Moisés chimbese cheẽ nguire ra Dios embasi. ¹³ Ae Dios cheẽ ñandu chooño nguia nae, “taẽisi turã” iã nda Dios ùquĩ je. Ae Dios cheẽ mumbayã nguia nae, ùquĩ nguiatu ra Dios isi turã. ¹⁴ Ae judíos eã nae, ùquĩ Moisés chimbese ñandu eã mbeite raque. Ùquĩ mo ae siqui turã turã mbei mbae turã ndese. —Mbae turã nandesã, ite eicua. Dios cheẽ andu eãte raque emo mose. ¹⁵ Ae ae chõ mbae turã icua nguiã. Mbae icuã abe icua. Mbae icuã naa mose, “eicuã asaã ñochĩ”, i tuchi eicua uchiangui re. Mbae turã abe raã mose eicua tuchi uchiangui re no. ¹⁶ Aque mose ra Dios ñee Jesucristo je. Ae icuã mbiam saã nyecuayã cuayã nguia nae, ùquĩ nda Jesucristo mbuchecua ja cote. Jesucristo ra mbiam icuã mbasi mbae icuã nĩ cote.

Judíos Moisés cheẽ mumba mumba

¹⁷ —Judíos chõ ure re, jeyne equia ùquĩ. —Moisés chimbese ra nandemingo bei, jeyne chõchĩ equia ùquĩ. —Dios quiarei ebia tuchi ure mĩ ndese, jeyne chõchĩ equia ùquĩ. ¹⁸ Ae Dios bite nae, ùquĩ jẽicuate quia jẽ

ùquĩ. —Moisés cheẽ ureicuate quia ã. Nyebe mbae turã ureicua jate quia ã, jeyne chõchĩ nguia ùquĩ. ¹⁹ —Ure mĩ ño ñeenda Dios icha ureicuachĩ, jeyne bei chõchĩ equia ùquĩ. —Itondaru jenda uretesaete, jeyne chõchĩ equia ùquĩ. ²⁰ —Mbiam aquiatuã urembaaquiato quiato, jeyne chõchĩ nguia ùquĩ. —Mbiam aracuayã urembaaquiato quiato, jeyne chõchĩ nguia ùquĩ. Jẽ Moisés chimbese jẽicua abareãte quia ùquĩ. —Moisés chimbese ñee ñooño eãte, jeyne raque quia eicua ùquĩ. ²¹ Jẽ aracuayã mbiam jembaaquiato quiatuchĩ nguiã. ¿Mbaerã jẽmbaaquiato iã jẽ nyii re? —Mbae ra jembuquiachãchĩ, jeyne chõchĩ equia ùquĩ. Jẽ sí chõ mbae jembuquiachã nguiã ùquĩ. ²² —Emo ninisi rese ra jẽingochĩ, jeyne chõchĩ equia ùquĩ. Jẽ sí chõ jẽingo nguiã emo ninisi rese ùquĩ. —Ae je mbiam riqui “Dios” i chooño nae, ùquĩ ndese ra jẽingochĩ, jeyne chõchĩ equia ùquĩ. Dios abareã mbae jembuquiachã quiachã ñochĩ nguiã ùquĩ. ²³ —Dios cheẽ ureicua tuchi quia ure ã, jeyne chõchĩ equia ùquĩ. Jẽ sí echeẽ jemumbate quia ùquĩ. Nyebe mbiam riqui nguiã ñee turã eãte Dios rĩ ã. ²⁴ Nyebe embese ji cheẽ ndiqui nguiã ique ã cote. Jẽ Dios cheẽ mumba mose, judíos eã ndiqui ñee icuã tuchi Dios rĩ ã.

²⁵ Coche circuncisión jẽsaã saã nguiã Dios je, jẽingo bei mose Dios cheẽ ndese. Jẽingo eã mose Dios cheẽ ndese, circuncisión naa eã naanguia chõ jẽingo nguiã ùquĩ. ²⁶ Ae circuncisión saã eã nguia nae, ùquĩ siqui mose Dios cheẽ ndese, circuncisión naande raanguia chõ eriqui nguiã ùquĩ. ²⁷ Ae circuncisión saã eã nguia nae, ùquĩ siqui mose Dios cheẽ ndese, Dios ia tuchi chõ ùquĩ ndese re. Eyare rocoĩ jendese. Jẽ nguia Dios cheẽ jemumba mumbate nguiã. Dios cheẽ jẽicuate raque. Circuncisión jẽsaã saãte raque. ²⁸ Ae judíos Dios cheẽ mumba mumba quia nae, judíos

tuchi eã ño ùquĩ nde. Circuncisión naa naa ndaque. Ae circuncisión saã nguia nae, ùquĩ siquĩã mose Espiritu Turã ndese, circuncisión turã eã ño ùquĩ nde. ²⁹ Ae Dios isi tuchi quia uchiangui re, ùquĩ nguiarei judíos tuchi. Ae siqui Espiritu Turã ndese, circuncisión tuchi chõ ùquĩ cote re. Ùquĩ je ra mbia achõ ñee turã eã. Dios abe quia ra ñee turã ee.

3

¹ ¿Mbaerã judiorã sete riqui mbia re? ¿Mbaerã circuncisión sete riqui mbia re? ² Eturãte quia mbia je re. Judíos je quiatu ngue Dios ucheẽ mondo nguĩã. Mbiamo je eã. ³⁻⁴ Judíos mo hui hui raque Dios cheẽ si. Dios quia ra ñee ñooñoã mbei. Echeẽ nguia ra io bei. Mbiamo hui hui raque esi. Mbiamo ñee ñooño ndaque. I ñi embesa ji re:

Ndecheẽ nda io tuchi mbia resa rae. Mbiamo icuã mose ndeje, nde quia ra ere tuchi mbia si, i que embesa ji ra. ⁵ Jemo ngue ñee no nda: —Dios turãte riqui nandeicuã je co. Mbae icuã nandesã saã mbei chõ nguia. Mbiamo mae sacua Dios turã ndese. Dios nandeicuã mbasi mose, Dios icuãte, i chõchĩ jemo. ¿Mañi nande ra ùquĩ ñee mose re? ⁶ Ichõiño tuchi chõ ùquĩ nde. Dios icuã aroneãte. Dios icuã mose, eĩ nda Dios mbiamo icuã mbasi aroneãte rei. ⁷ Jemo ngue ñee ño nda. — ¡Nandecheẽ ñooño ño nguia jẽ! Nandecheẽ ñooño mose, mbiamo ra ñee turã Dios rii. “Ñee ñooñoosa reã tuchi quia Dios riqui re,” i ra mbiamo Dios rii cote. Nyebe Dios riqui nguĩã nandembasi ãte nandecheẽ ñooño mose, i chõchĩ jemo. ⁸ —Mbae icuã nandesã saã ño. I nda Dios turã nyecua mbiamo je, i chõchĩ jemo. Urecheẽ ãte ure ùquĩ ndesẽ. Ae ñee nguia ùquĩ, ùquĩ nda Dios mbasi.

Mbiamo eturã eãte

⁹ Judíos chõ nande re. ¿Nandeturã nda eriqui reĩ mbiamo si re? Tei. Nandeturã eã ño esi re. Nandeicuã ja chõ ñene. Judíos eã icuã ja chõ ñene.

Judíos icuã ja chõ eno nde. ¹⁰ I ñi embesa ji re:

Emo eturã eãte. Aque mii mo eã.

¹¹ “Dios icha taicua”, iãte emo.

“Dios rese taico”, iãte emo.

¹² Mbiamo que icha icha jate Dios si ra.

Eicuã jate que eriqui ra.

Emo mbae turã mo saã eãte.

Aque mii mo eã.

¹³ Ùquĩ quiarei mbiamo raaque tã tãsa rã.

Aba mbiamo eã.

Sã eriqui ñee icuã mbei.

Mbiamo mbiirĩ irĩ tuchi ñee ñooño uchuru je.

Mbei rasi rã ño echeẽ nde.

Aba mbasi.

¹⁴ Echeẽ icuã achõ tuchi chõ ñene.

Mbiamo mbiicuãsa tuchi chõ echeẽ nde.

¹⁵ Mbiamo iquia chooño ño ñene.

¹⁶ Mangue chooñoa ño eriqui nguĩã mbae icuã naa naa.

Mbiamo mbiayã ñooño.

¹⁷ Ico chooñoa mbei mbiamo je.

¹⁸ Dios rese ndua eã tuchi,

i ñi embesa ji re. ¹⁹ Dios que Moisés chimbesa mee ja judíos je ra. Embesa ji mumbayã sacua. Mbiamo huicuã icua ja sacua. —Dios cheẽ nandemumba tuchi chõ nguia re, i nda mbiamo ja chã.

²⁰ Emo ñee aroneãte. —Embesa ji amumbayã mbeite quia co. Nyebe ra Dios seisi turã, i aroneãte emo. Dios que Moisés chimbesa mee mbiamo je ra. Mbiamo huicuã icua ja sacua.

Dios icuasa quia ra siqui bei

²¹⁻²² Dios que Jesús turã teacuquia nande je cote ra. Ae que mano nandeicuã ndiquicharõ sacua nda. Nande Jesús icua mose, Dios ra nandehisi turã cote. Eĩ ja chõ Dios mbiamo je re. Dios bia eã ño mbiamo mii ndese. —Jẽ Moisés chimbesa mumbayã mose, taehisi turã, iãte Dios. —Jẽ Jesús icua mose, ùquĩ mose quiatu ra jaehisi turã, ite Dios. Embesa ji ñiinda abe que ñee ñee Jesús rii nyii no nda. ²³ Nandeicuã ja chõ ñene. —Aque eturãte, iã nda Dios nandemo je. ²⁴ Nandeicuãte raque. Dios quia eturãte nande je re. —Mbae mo jemondo jẽicuã ndibishorõ, i ãte Dios. Jesucristo que

mano nandeicua ndibishorõ ndesẽ. Nyebe Dios riqui nguiã mae turã nanderese co. ²⁵ Dios que Jesucristo mondo mbia je ra. Mano sacua mbia icua ndiquicharõ. —Jesús que mano seicua ndibishorõ nda, nande i mose, ùquĩ mose ra Dios nandemingo bei. Dios que mae ñooño mbia icua ndese nyii ra. —Seriirĩ nguia ra mano nguiã eicua ndiquicharõ, i que ra. Echeẽ ngue ique cote ra. Dios uturã ndeacuquia mose que echeẽ ique cote ra. ²⁶ Dios riirĩ ngue mano mbia icua ndiquicharõ nda. Mbia mae sacua Dios turã ndese. Dios turã mbeite. Mbia icua isi turã nonde. Mbia Jesús icua mose ra Dios mbia isi turã.

²⁷ Nande ae ra nandeicua nandembutiã eã. Dios ae quia nandeicua mbutiã nguiã, Jesús icua mose. Nyebe nandeco nguiã nandecuasuraã naa aroneãte. Moisés chimbesa que nandemumba mumbate quia resẽ. ²⁸ Mbia Jesús icua mose, aque mose quia ra Dios mbia isi turã. —Taëisi turã, jẽ Moisés chimbesa mumbayã mose, iãte Dios nande je. —Jẽ Jesús icua mose, ùquĩ mose quiatu ra jaëisi turã, ite Dios nande je. ²⁹ Judíos achõ nderecua eã ño Dios re. Judíos eã abe rerecua chõ ñene. ³⁰ Emo abe eãte Dios. Dios mi ño ñene. Ae Jesús icua quia nae, ùquĩ nda Dios isi turã ja. Judíos abe isi, Jesús icua mose no. ³¹ Nande Jesús icua mose, Dios cheẽ mbesa ji riqui ua eã mbeite nande je co. Nande Jesús icua mose, Dios cheẽ nda nandemumbayã tuchi cote.

4

Abraham abe Dios icua

¹ Nandendua mbiri na Abraham ndese. Nandei ñiinda tuchi quia Abraham nde. ² Cose que Dios Abraham isi turã nda. Abraham mbae turã naa naa eã mose que Dios eisi turã nda. Dios icua mose quiatu que Dios eisi turã nda. Nyebe Abraham uturã naa naa aroneãte nguiã. ³ I ñi embesa ji re: Abraham ngue Dios icua ra.

Nyebe Dios eisi turã nguiã, i ñi embesa ji re. ⁴ Sã emo ndiqui quiei quiei emo je no. Mbae mo ndibishorõ. Ae echa mondo quia ee, mondochõ eã ño nguiã ee. Embae raã naa ndibishoronda chõ ùquĩ nde. Eĩ eã ño Dios re. ⁵ Dios chõ mbia icua isi turã nguiã. Emo Jesús icua mose, ùquĩ nda Dios isi turã. Emo mbae turã naa naa eã ndaque. Jesús icua mose, aque mose chõ Dios “ndeturãte seje,” i ee. Mbae turã naa naa eã ndaque. ⁶ David abe que ñee nda: “Ae je Dios ñee, ‘ndeturãte seje,’ i mose ee, aque ia tuchi chõ ñene. Mbae turã naa eã ndaque. Dios icuate quia ñene,” i que David ñee nda. ⁷ Co rei David chimbesa co:

Ae icua Dios mbutiã nae, ùquĩ ia tuchi chõ ñene.

⁸ Ae icua ndese Dios riqui mae ãte nae, eicuaate raque, Dios ra eisi turã.

Ùquĩ ia tuchi chõ ñene,

i ñi David chimbesa re. ⁹ ¿Aba icua ño nda Dios mbutiã ña? Embia sacua ña. ¿Judíos icua achõ nda embutiã nde? ¿Ae circuncisión saã nae, ùquĩ achõ icua nda embutiã nde? Tei. Ùquĩ achõ eã ñene. Abraham Dios icua mose, aque mose tuchi chõ Dios eicua mbutiã nguiã esi. ¹⁰ Abraham circuncisión naa eã mose chõ Dios eicua mbutiã nguiã. Circuncisión naa nonde. ¹¹ Abraham Dios icua mose chõ ngue Dios eicua mbutiã nguiã. Aquere quiatu ngue Abraham circuncisión naa nguiã cote. Circuncisión ndei marca Dios mbae. Dios Abraham isire chõ circuncisión naa nguiã Abraham je. —Abraham ngue aisi turã nda, i ñe Dios re. Ae circuncisión saã eã nae, ùquĩ abe chõ “seru” i nguiã Abraham je, Jesús icua mose. ¹² Ae circuncisión saã nae, ùquĩ abe chõ “seru” i nguiã Abraham je, Jesús icua mose. Ùquĩ nyicua chõ Dios re. Sã Abraham nyicua Dios no. Circuncisión naa eã mose no.

Abraham Dios icua mose, Dios ucheẽ mbuchebiã mbei ee

13 Dios que ñee Abraham je cose ra. —Ibi tamondo ja ndeje nembaerã. Nderiirĩ mbaerã abe no, i que ee ra. Secheẽ mumbasa reã je chõ ibi tamondo, iã ño Dios re. —Ae seicua quia, aque je chõ tamondo, i que Dios Abraham ñii nda. 14 —Nandeico bei mose Moisés chimbesa rui, aque mose ra Dios nandemingo bei, i chõchĩ judíos mo. Ñquĩ mose quiatu ra nandeico rei Jesús icua chooño. Ñquĩ mose quiatu ra Dios cheẽ ique ãte rei nande je. 15 —Ñjẽsaã saã, i mose Dios, emo echeẽ mumba mose, ñquĩ nda embasi. —Ñjẽsaã saã, iã mose, emo nda embasiã cote.

16 Dios turãte quia ñene. Nyebe eriqui nguiã mbae mondo chooño nande je icua mose. Judíos achõ je eã ño eriqui nguiã mbae mondo mondo. Judíos eã je abe chõ eriqui nguiã mbae mondo mondo, Dios icua mose. Sã Abraham Dios icua no. Sã Dios mbae mondo mondo ee no. Nyebe nandeico nguiã “nanderu” i Abraham je co. Ae rane nguiatu ngue Dios icua nguiã. 17 Nyebe embesa ji riqui nguiã i:

Dios que ñee Abraham je ra.

“Nde ra mbia i tuchi.

Ibi jenda ja i tuchi ra nde”, i que Dios Abraham je ra,

i que embesa ji ra. Dios ra mbia mangue chooñoa jenda ja isi turã, Jesús icua mose. Dios cheẽ sí tuchi chõ ã nde. Dios ae mbia raaque mbuquera nguiã. Ae emoãte namo nae, Dios ae ra ñquĩ nyao no. 18 —Nderiirina tamee ndeje. Eretiirĩ nda cote. Mbja ja i ra nde cote, i que Dios Abraham je ra. Abraham ngue “nyia, eno”, i Dios cheẽ mose ra. Amei tuchi raque. Tiirĩ aroneãte raque abaja je. 19 Amei tuchite raque. Cien añote raque. Eninisi abe arite raque. Eninisi rie chuimate raque. —Dios ra seriirina mee seje ucheẽ nguire, i que Abraham nda. —Ureimate nyeresẽ. ¿Mañi nda Dios ureriirĩ mee ure je re? i ãte que Abraham nda. 20 Abraham ngue “nducua” iã mbeite quia Dios cheẽ mose ra. “Nyia, eno”, i beite que

equia Dios cheẽ mose ra. Ñee turã mbei que equia Dios rĩi nda. 21 —Dios quirãcuã tuchi quia ñene. Ae ra ucheẽ nyabiã mbei ñeende seje, i que Abraham nda. 22 Nyebe Dios Abraham isi turã nguiã. —Abraham ndiqui seicua tuchite co, i que Dios ra. 23-24 Abraham mii je eã ño Dios riqui nguiã ñee. —Abraham seicuate. Nyebe aico nguiã eisi turã co, i que Dios ra. Abraham mii je eã ño embesa ji riqui nguiã ñee. Nande abe je chõ eriqui nguiã ñee. Nande Dios icua mose, Dios ra nande abe isi turã. Dios sí que Jesús raaque mbuquera ra. 25 Dios que Jesús mbu íbii nande je ra. Mano ngue nandeicua ndiquicharõ nda. Aquere que Dios embuquera si cote ra. Nandembitirõ sacua ngue Dios embuquera ra.

5

Nande Jesús icua mose, Dios riqui nandeisi turã

1 Ñ nandeico Jesucristo icuate ã. Nyebe Dios riqui nguiã nandeisi turãte cote. Nyebe Dios riqui nguiã nandembiate cote. 2 Ñ nandeico Jesucristo icuate ã. Nyebe Dios riqui turãte nguiã nande je co. Dios turã tuchi. Dios ra nandemingo Jesucristo rã si tuchi cote. Ñquĩ ño nandesaarõ arõ nguiã ã. 3 Ñquĩ mii eã ño nandembia nguiã. Mbja icua icua ndaque ra nande je, ñquĩ mose abe chõ nda Dios nandembia no. Mbja icua icua mose nande je, Dios ra nandechiã mbucoi turã. Nandeico tochi sacua. 4 Nandeico tochi mose, Dios ia tuchi ra nanderese. Dios ia mose nanderese, Dios cheẽ nandesaarõ arõ na. Sã echeẽ ique rã nande je. 5 Nande Dios cheẽ ndaarõ arõ mose, ae ra ucheẽ nyabiã. Ae quiatu ngue Espiritu Turã mondo nguiã nande je. —Dios riqui nyesequate jendese co, i Espiritu Turã nguia nande je co.

6 Mbae turã ngue nandesaa aroneãte nandechue, aque mose que Cristo mano nande je ra. Nandeicua mbitirõ sacua. 7 Mbja mo mano aroneate emo ndibishorõ. Nande

turã mose, aque mose abe ra emo mano aroneãte nanderibishorõ. Eturã tuchi mo ndibishorõ nguia emo mano sete raque reae. ⁸ Cristo quiatu que mano nanderibishorõ nandeicua tuchi mose ra. Nyebe nandeico nguiã ñee: —Dios riqui nyesequa tuchite nanderese co, i. ⁹ Cristo mano mose que nandeicua mbitirõ cote ra. Ae ra nandemingo icue Dios mbia icua mbasi mose. ¹⁰ Dios riiri ngue mano nande je ra. Nande Dios ucuayã mose. Ae quia ngue eturã mbeite riqui nguiã nande je. Dios que “sequiatorã jẽ”, i nande je cote ra. Nyebe ra nandeico tuchi erese cote. Jesús quiatu ngue quera sichĩ nguiã nande je cote. ¹¹ Nyebe nandeya tuchi riqui nguiã Dios rese co. Jesucristo riĩ. Jesucristo quiatu ngue mano nguiã nande je.

Adán na eã tuchi chõ Jesucristo re

¹² Mbia mi nane ngue siqui nyii ra. Aque rane ngue mbae icua saã nande je ra. Nyebe mbia icua jate riqui nguiã cote. Nyebe Dios riqui nguiã ñee. —Mbia ra mano ja, i cote. ¹³ Mbia que mbae icua saã saã ndei quia nyii ra. Moisés Dios cheẽ mbesa nonde. —Dios cheẽ ngue jemumbachĩ nda, i aroneãte que aque mose ra. Dios cheẽ mbuchecua iriãte quiatu ngue aque mose re. ¹⁴ Adán nane ngue Dios cheẽ mumba cose ra. Aque mose bei chõ ngue mbia mbae icua naa naa nguiã cote. Nyebe mbia riqui nguiã mano mano ja huicua mose cote. Moisés que Dios cheẽ mbesa chee ra. Moisés embesa nonde que mbia mano mano ja huicua mose ra. Jesucristo rã eã tuchi chõ Adán nde.

¹⁵ Adán nane tuchi que mbae icua saã nda. Jesucristo quiatu que mbia rirõ nguia mbae icua si ra. Adán mbae icua naa mose, aque mose bei que mbia mano mano cote ra. Jesucristo mbae turã naa mose, ae que mbia icua mbitirõ tirõ cote ra. Dios turã ni. Jesús chisaã nguia rei Adán chisaã na eã tuchi. ¹⁶ Adán ae rane ngue mbae icua saã cose ra. —Mbia ra mano mano ja cote, i que Dios cote

ra. Adán icua ndese maende. Ae Adán saã icua nande je nae, aque je que Jesucristo mano nda. Jesucristo turãte que mbia je cote ra. Nyebe Dios riqui nguiã nandeisi turã, nandeicua ndese mae ndocoi. ¹⁷ Adán ae que mbae icua saã nyii ra. —Mbia ra mano mano ja cote, Adán mbae icua naande, i que Dios cote ra. Jesucristo ae que mbae turã saã mbia je cote ra. Mbia icua mbutiã sacua esi. Ae Jesús turã icua quia nae, uqui nda Dios mingo turã mbei, uqui icua ndese mae ndocoi.

¹⁸ Adán ae que mbae icua saã nyii ra. —Mbia ra mano mano ja cote, i que Dios cote ra. Adán icua ndese maende. Aquere que Jesucristo mbae turã naa mbia je cote ra. Mano nguiatu ngue mbia riquicharõ nde. Nyebe Dios riqui nguiã nandemingo bei co cote. Jesús riĩ ae ñene. ¹⁹ Adán Dios cheẽ mumba mose, mbia mbicua ja que uqui cote ra. Jesucristo Dios cheẽ mumbayã mose chõ mbia tubiriã mbuturã nguiã no. ²⁰ Dios que ñee Moisés je ra. —Secheẽ embesa mbia je, i que ee ra. † nda mbia jirandu tuchi huicua ndese. Mbia icua i i tuchi mose, eĩ ño Dios turã i i tuchi mbia je no nde. ²¹ Adán mbae icua naa mose, mbia mbicua ja chõ uqui nde. —Mbia ra mano mano cote, i que Dios cote ra. Jesucristo que mano nandeicua ndiquicharõ cote ra. Aque mose que Dios uturã ndeacuquia tuchi nande je cote ra. Nandembuturã sacua cote. Nandemingo bei sacua cote.

6

Nandeyasu chõ nandeico nguiã ã cote

¹ ¿Mañi nande ra cote re? ¿Mbae icua nda nandesã i i re? ¿Dios turã i i sacua nande je re? ² Tei. Dios biãte uqui. Jesús rese que nandemano ndesẽ. Nandemano ngue mbae icua naa eã sacua ndesẽ. ¿Mañi nande ra mbae icua naa naa si re? ³ ¿Jëiranuãte bautizar i rese re? —Jesús resenda tuchi chõ uqui ndiqui re, i nda mbia

bautizar ire nande je chã. Nande bautizar ire, nandemanonde raanguia chõ ãquĩ nde. Mbae icuã naa eã sacuã cote. ⁴ ¿Mbaerã ño bautizar nande chã? —Amano ngue Jesús rese ra, i chõ bautizar i re. —Seati que Jesús rese ra, i chõ bautizar i re. —Dios que sembuquera si Jesús rese ra, i chõ bautizar i re. Sã Dios quirãcuã Jesús mbuquera eraaque mose no. Eĩ nande chõ siqui nandeyasu ae.

⁵ Nandeico Cristo rese ã. Nandemano mose Cristo rese, nandereco yasu chõ nandeico nguiã erese ã. ⁶ Cristo mbucha mose ira rese, nandeicuã abe que Dios mbucha ira rese ra. Nande mbae icuã osei chiã sacuã ño ãquĩ nde. Mbae icuã nimba nda nandeico eã cote chã. ⁷ Mbia raaque quia mbae icuã saã aroneãte nguiã. Eĩ nande chõ nguiã mano mose Cristo rese ã. Mbae icuã naa aroneã. ⁸ Nandemano mose Cristo rese ira rese, nandemingo bei ra uchiese cote. Ae rã si. ⁹ Cristo que mano nda. Quera si que cote ra. Aquere ra mano siã cote. ¹⁰ Aque mii ngue Cristo mano mbia icuã je ra. Quera si que cote ra. Mano si eã ndae. Siqui bei equia Dios rese co. ¹¹ Jendaaque chõ jësaã saã mbae icuã je. Jenderecuarã eã mbae icuã cote. Jesucristo rese nandeico tuchite ã cote. Mbae yasu rã ño nandeico nguiã Jesucristo rese ã cote.

¹² ¡Mbae icuã ndese ra jëingochĩ jenderecuarã jë! Jë mba e icuã osei mose, ¡jëteachõ ño jë! ¹³ ¡Jendete ra jeme meechĩ mbae icuã je jë! Dios je quia jendete jeme. Mbae turã naa sacuã. Cristo rese que jemano ndesë. Jëyasu chõ ngue jëquera si Cristo rese resë. ¹⁴ Nandererecuarã eã nda mbae icuã cote. Moisés chimbasa rui eã ño nandeico nguiã ã cote. Dios turã ndui ae chõ nandeico nguiã ã cote.

Mbae turã nimba chõ nandeico cote

¹⁵ Dios turã ae nandemingo nguiã. ¿Ûquĩ mose ra mbae icuã nandesaã saã nde? Tei. Dios biãte ãquĩ. ¹⁶ Nande nandechimondo mose mbae icuã je, mbae icuã nda

nandererecuarã cote. Mbae icuã nda nandeiquia chee cote. Nande nandechimondo mose Dios je, ae ra nandererecuarã cote. Ae ra nandemingo bei mbae turã ndese cote. ¹⁷ Jëingo bei que mbae icuã ndese jenderecuarã nyii ra. Mbia Jesús cheẽ nenei nenei mose jëje, jëisi turã ño ngue cote ra. ã jëingo echeẽ mumbayã ã cote. Nyebe aico nguiã gracias ite Dios je co. ¹⁸ Dios que jendirõ mbae icuã si cote ra. Mbae icuã ndese ra jëingoã cote. Mbae turã ndese bei ra jëingo cote. ¹⁹ Secheẽ ambuchecua tuchi quia jëje co. Jë eicua tuchi sacuã. Jendete que jemondo tuchi mbae icuã je nyii ra. Jë ngue jëingo i i tuchi mbae icuã ndese nyii ra. Jendete jemondo Dios je cote. Mbae turã naa i i sacuã cote.

²⁰ Mbae icuã mbaerã ño jëingo nguiã cose. Mbae turã ngue jësaã aroneãte quia aque mose ra. ²¹ Jëireite mbae icuã naa naande cote. Jenyisaã saã mbae icuã ñiinda, ãquĩ ngue mbae turã mo mondo ãte jëje resë. Ae mbae icuã saã i ite quia, ãquĩ nda mano. ²² Dios que jendirõ mbae icuã si cote ra. Dios rimba chõ jë cote re. Nyebe Dios jemingo nguiã icúe mbae icuã si. Nyebe ra Dios jemingo bei ibate manonde cote. ²³ Ae mbae icuã saã saã nguia nae, ãquĩ nda Dios mbasi bei manonde. Ae Jesucristo icua quia nae, ãquĩ nguiatu ra Dios turã mingo bei. Mbae turã naa eã ndaque. Dios turãte quia ee re.

7

Eraaque rã ño nandeico nguiã Moisés chimbasa je cote

¹ Sã jenderecuã ibi jenda mo no. Echeẽ jemumba aroneate no. Jemano mose, jenderecuayã nda cote. ² Sã cuña mo ndiquingu rese no. Cuña mo ngu rerequia mose, sã eriqui bei erese. Eru mano mose, aque mose ramo nda siquiã erese cote. Aque mose ramo nda ae ae riqui cote. ³ Ngu reco mose, siqui aroneãte emo ndese. Siqui mose emo ndese, Dios cheẽ mumba chõ ãquĩ nde. Eru mano

mose, aque mose quiatu ra ngu mo ndea cote. Dios cheẽ mumba eã ño ãquĩ nde.

⁴Eraaque rã ño jẽingo nguiã Moisés chimbese je ãquĩ cote. Cristo quiatu que mano jeni nda. Quera si que jeni no nda. Cristo rese chõ jẽingo nguiã ãquĩ cote. Dios je mbae turã naa naa sacua ño jẽingo nguiã erese ãquĩ cote. ⁵Nandeico mose mbae icua ndese nyii, mbae icua achõ ño ngue nandehosei chosei quia aque mose ra. Nandebi tuchi que Dios cheẽ mumba mumba aque mose ra. Nyebe que nandeico mbae icua naa i i tuchi aque mose ra. Eĩ nda nandeicua nandeiquia rei aque mose. Espiritu Turã nandembiasu eã mose. ⁶Eraaque rã ño nandeico nguiã Moisés chimbese je ã cote. Moisés chimbese rui eã ño nandeico nguiã ã cote. Dios cheẽ mii ndui chõ nandeico nguiã ã cote. Espiritu Turã nguiatu ngue nandembiasu nguiã. Espiritu Turã ño nandembaaquiatu nguiã ã cote. Moisés chimbese achõ eã ño cote re.

⁷—Moisés chimbese icuaate, ae ate raque quia co. Moisés chimbese quiatu que sembiirandu seicua ndese resẽ. —Eicuaate quia emo mbae osei osei riqui re, i que Moisés chimbese ra. Eĩ nda seiranuate rei ãquĩ ndese. Moisés chimbese eande ndae. Moisés chimbese ae ngue sembiirandu nguiã ãquĩ ndese. —Eicuaate ãquĩ, i seje. ⁸Moisés chimbese sembiirandure mbae icua ndese, mbae icua achosei i i tuchichĩ cote. —Mbae icua nda jesaã saãchĩ, i mose chõ mbae icua achosei i i tuchichĩ cote. Emo Moisés chimbese icuayã mose, mbae icua abe ra eicuayã no. ⁹Moisés chimbese que aicuayãte quia nyii ra. Seturã aico reĩ aque mose. Moisés chimbese que aicua cote ra. Eicua mose que echeẽ amumba i i tuchi cote ra. ãquĩ mose que seicua aicua cote ra. ¹⁰Mbia mingo bei sacua ndaque Moisés chimbese. Ae que semingo bei eã nda. Moisés chimbese amumba mumba bei chõchĩ. Nyebe aico nguiã

isho tuchi Dios si aque mose. ¹¹Seicua ño ngue sembiirĩ irĩ mbei quia nyii ra. Se Moisés chimbese icua mose, seya eã tuchi que aque mose cote ra. Seicua nda seiquia chee, ae que se ra. ¹²Moisés chimbese turãte raque. Dios cheẽ ndaque.

¹³Moisés chimbese turãte. ãquĩ je eã ngue Dios paama i seje ra. Seicua ae quiatu que Dios mbupaama i seje ra. Moisés chimbese que sembiirandu tuchi seicua ndese ra. Se Moisés chimbese turã icua mose, ãquĩ mose que seicua Dios mbupaama i seje ra. Nyebe Dios Moisés chimbese mee nguiã nande je. Nandeicua mbuchecua tuchi sacua nande je.

Nandechianqui renda icua ño nandesei isi nguiã

¹⁴Moisés chimbese turãte raque. Se ae seicua nde. Mbia chõ se re. Moisés chimbese amumba mumba chõchĩ nguia co. ¹⁵Mbae turã asaã mbite raque. Mbae icua asaã eã mbite raque. Mbae icua nguia seisi isite nguiã. Mbae turã uquia reã. ¿Mbaerã aico mbae turã naa eãte re? ¹⁶Ae asaã sereãte quia nae, ãquĩ asaã mbeichĩ. Moisés chimbese turãte raque. Aico echeẽ mumba mumba beichĩ. ¹⁷Se ae chõ eã ño aico nguiã mbae icua naa naa co. Sechiangui renda icua nguia “mbae icua esaã saã”, ite nguiã seje co. Nyebe aico nguiã mbae turã mo naa eã mbeite co. ¹⁸Seicua tuchi chõchĩ se. Seturã mo eã tuchichĩ se. —Mbae turã tasaã, aete raque quia co. Aico mbae icua naa naa mbei chõchĩ co. ¹⁹Sebite raque mba e turã. ¿Mbaerã aico mbae turã naa eãte re? Sebiãte raque mbae icua. ¿Mbaerã aico mbae icua naa naa mbeite re? ²⁰Se ae eã mbae icua asaã saã nguiã. Sechiangui renda icua nguia “mbae icua esaã saã” ite nguiã seje. Sechiangui renda icua ño seisi isi nguiã mbae turã si co.

²¹“Mbae turã tasaã”, i mose se, mbae icua ño seriquisã quisãchĩ nguiã co. ²²Sebite raque Dios cheẽ sechiangui re. ²³—Dios cheẽ ndese taico, ae rei nguiã sechiangui re

co. Sechiangui renda icuã nguia seriquisã quisãte nguia. Nyebe aico nguia mbae icuã naa i ite. ²⁴⁻²⁵ Dios cheẽ ndese aico sete raque. Sechiangui renda icuã nguia semingo beite nguia mbae icuã ndese. Seraa-quete aico co. Nyebe seya eãte aico co. ¿Aba quia ra seicuã mbitirõ nde? Jesucristo quia ra seicuã mbitirõ cote. Nyebe aico gracias i tuchi Dios je co.

8

Espíritu Turã ndiqui nandembui mbae icuã si

¹ Ae Jesucristo icua quia nae, ùquĩ nda Dios mbasiã mbei. ² Nande Jesucristo icua mose, Espíritu Turã nda nandechiã mbiasu. Espíritu Turã nda siqui nanderese, mbae icuã naa eã sacuã. Eĩ nda nandemano mbeite rei, mbae icuã naa naa mbei mose. ³ Moisés chimbessa que nanderirõ aroneãte mbae icuã si ra. Echeẽ nguiatu ngue nandemumbayã aroneãte nguia. Mbiate quiatu ngue nande re. Nandequirãcuã nea. Dios que ndua nanderese ra. Nyebe nguiirĩ mondo nguia nande je. Mbia rã ngue Jesús ru íbii ra. Mbia icuã jate raque. Ae mii ngue eicuã eã nda. Ae que mano nandecuã ndiquicharõ nda. Nyebe nandererecua eã ño mbae icuã cote re. ⁴ Jesús que mano nande je ra. Nyebe mbae icuã ñimbirãcuã eãte nande je cote. Nyebe Dios cheẽ nandemumbayã arondete namo cote. Espíritu Turã ndui chõ nandeco nguia cote. Mbia icuã ndui eã ño nandeco nguia ã cote. ⁵ Ae siqui quia Espíritu Turã ndese nae, ùquĩ ño siqui nguia Dios cheẽ ndui si. Ae siquiã nguia Espíritu Turã ndese nae, ùquĩ ño siqui nguia uchiangui renda icuã ndui si. ⁶ Ae siqui quia Espíritu Turã ndese, ùquĩ ia bei ra eriqui. Siqui bei rae. Ae siquiã nguia Espíritu Turã ndese, ùquĩ nda siquiã. Mano ndae. ⁷ Nandechiangui renda icuã nguia siqui icuã icuã mbeite nguia Dios je. Nandechiangui renda icuã nguiare i Dios cheẽ mumbayã aroneã. ⁸ Ae siqui bei quia uchiangui renda icuã

ndui, ùquĩ siqui aroneãte Dios cheẽ ndui.

⁹ Eĩ jenye eãte raque jẽ. Espíritu Turã ndui chõ jẽingo nguia jẽ. Espíritu Turã nguia siqui nguia jeñiangui re. Espíritu Turã siquiã mose emo ñiangui re, Cristo rimba eã ño ùquĩ nde. ¹⁰ Jesucristo riqui jeñiangui re ùquĩ. Jendete ra mano ndaque mbae icuã je. Espíritu Turã nda jeãingue mingo bei ibate. Dios quiatu ngue jëisi turã nguia. ¹¹ Dios que Jesucristo raaque mbuquera ra. Eĩ si ra Dios nanderete raaque mbuquera Espíritu Turã quirãcuã je no. Eĩ si ra nanderete mbiasu, Espíritu Turã siqui mose nandechiangui re.

¹² Nandechiangui renda icuã ndui nandeco aroneãte cote. ¹³ Nandechiangui renda icuã ndui nandeco mose, nandemano mbei ra equia. Espíritu Turã nandebi icuã mbutiã mose, nandemingo bei rae. ¹⁴ Ae je Espíritu Turã ndiqui ñee nae, “eĩ jenye” i nae, Dios rimba chõ ùquĩ nde. ¹⁵ Nande Espíritu Turã isi mose, aque mose bei chõ Dios riirĩ nande cote re. Dios rimbachõ eã ño nande cote re. Dios riirĩ tuchi chõ nande cote re. Nandesiquiche tuchi que equia Dios si nyii ra. Nandesiquicheãte esi namo cote. — Paba, nande chõ nguia e e co cote. ¹⁶ —Dios riirĩ tuchite jẽ, i chõ Espíritu Turã nguia nandembiirandu tuchi. —Dios riirĩ tuchi rei nande re, nande chõ nguia nande abe nandechiangui re co. ¹⁷ Dios riirĩ tuchite quia nande re. Nyebe ra Dios mbae mondo tuchi nande je Jesucristo rese. Sã ñi mbia Jesucristo mbasi cose no, eĩ si ra mbia nandembasi nande abe. Aquere ra nandeco turã mbei erese ibate cote.

Mbae turã mbei jee ra nande je nandeco mose ibate

¹⁸ Mbia ra nandembasi raque a nyii. Dios ra nandererao bei ibate cote. Aque mose ra mbae turã mbei nande je cote. Nyebe ra nandetesarei nanderasi jua si cote. Nandeco bei mose ibate. ¹⁹ Dios ra huicua mbuchecua ja aque mose. —Co rei

seicuasa co. Co abe no. Co abe no, i ra Dios aque mose. Ũquĩ ño nandesaarõ arõ nguiã ã. Ae Dios chao mbae ja, ũquĩ abe riqui ũquĩ ndaarõ arõ ã. ²⁰ Adán mbae icuã naa namo mose, mbae icuã ja que aquere cote ra. Dios chiao icuã ja cote. Dios que mbae mbũcuã ja Adán mbae icuã naa namo mose ra. ²¹ Eĩ mbei eã nda mbae. Mbae ra ñimbitirõ ja cote. Ñimbiasu ra cote, Jesús tu mose íbii cote. Mbae ra manoã cote. Mbae ra shi eã cote. Jesús quiato rese ra mbae nyũcuabo ja aque mose cote. ²² Dios chiao ra nyũcuabo ja aque mose. Dios chiao ia eãte quia namo nde. ãquẽ ndasi rá ño eriqui nguiã namo. Nyebe ra Dios uchiao mbiasu ja cote. ²³ Dios que Espiritu Turã mondo nande je ra. Nyebe nandeico nguiã ñee, “Dios ra nandembiasu nguiirina tuchi cote”, i. Aque mose ra Dios nandembuchũcuabo tuchi uchiao ja rese cote. Namó ño nanderasi rasi re. Nandeya eãte abe no. Nandembuchũcuabo mose, nanderete abe ra embiasu. ²⁴—Jendete tambiasu, i que Dios nanderirõ mose mbae icuã si ra. Ũquĩ ño nandesaarõ arõ nguiã ã. Nanderete yasu eãte namo. Nyebe nandeico nguiã eraarõ arõ ã. ²⁵—Jendete tambiasu, i que Dios nande je ra. Nyebe nandeico nguiã eraarõ arõ mingue ã.

²⁶ Nandequirãcuã neate nande. Nyebe Espiritu Turã ndiqui tuchi nguiã nanderese. Sã nandeico ñee: “¿Mañi nande ra ñee Dios je re?” i nandechiangui re. Nandechẽẽ ndequia requia mose chõ nandeico nguiã iabu abu. Nandeiabu mose chõ Espiritu Turã ndiqui nguiã ñee turã Dios je nanderiĩ. Nandeuru ñee Dios je nandechiangui re. ²⁷ Dios mbia chiã icua jate quia co. Espiritu Turã ñee mose Dios je nandeuru, Dios echeẽ icua chõ nguiã aque. Dios cheẽ ndui si chõ Espiritu Turã ndiqui nguiã ñee Dios je Dios icuasa riĩ. ²⁸ Ae nyesecua quia Dios rese, ũquĩ je chõ Dios riqui nguiã mbae turã naa ja. Dios quiatu ngue eirabo nguiã. Ndua

quiatu ngue erese nyii re.

²⁹ Ae res e Dios riqui nduate nyii nae, ũquĩ ngue Dios mingo icúe nyii ra. Jesucristo rá si embiasu sacuã. Nyebe nandeico nguiã Dios riirĩ tuchi Jesucristo rese cote. Jesucristo rei nanderiqui cote. Nande tubiriãte ra Dios quiato cote. ³⁰ Dios que ndua nanderese nyii ra. Aquere que nandemingo icúe umbaerã cote ra. Nandeisi turã ngue cote ra. —Mbia tamumae turã ja jendese jẽingo mose ibate, i que Dios nande je cote ra.

Mbae mo nda nandembui eã mbei Dios si

³¹ Dios riqui tuchi nanderese co resẽ. Nyebe ra emo ñimbirãcuã eã nande je cote. ³² Dios que nguiirĩ mii mondo nande je ra. Mano sacuã nandeicuã je. Eĩ nda mbae mondo ja nande je no. Sã nguiirĩ mondo nande ja je no. ³³ Dios chesecua tuchi chõ nande re. Emo ñee icuã aroneãte nande je. Dios quiatu ngue nandeisi turã nguiã. ³⁴ Cristo que mano nandeicuã je ra. Quera si que ra. Dios quiatocuti eñi ngoi hue cote. Ñee turã turã nanderiĩ Dios je hue cote. Nyebe emo ndiqui nguiã ñee icuã aroneãte nande je cote. ³⁵ Mbae mo Dios mbesarei aroneãte nandesĩ. Nyesecua beite quiatu nguiã nanderese co. Nanderasi arondete raque. Mbae nandembia eã arondete raque. Mbi a icuã arondete raque nande je. Nanderiãcuã arondete raque. Nanderao eã arondete raque. Mbia nandequia arondete raque. Ũquĩ ja ra Dios mbesarei eã tuchi nandesĩ. ³⁶ Mbia icuãte riqui nande je ã. Sã embesa ji riqui i no:

Nderiĩ ño mbia riqui nguiã ureiquia serĩ mbeite ã.

Oveja iquia iquia rá ño eriqui nguiã ure je ã,

i ñi embesa ji re. ³⁷ Mbia icuã icuãte raque nande je. Ñimbirãcuã eã mbei ra nande je. Jesucristo quia siqui nguiã nanderese co. Nyesecua beite quiatu nguiã nanderese co. ³⁸⁻³⁹ Dios nyesecua tuchite quiatu nguiã nanderese co. Dios hui aroneãte nandesĩ.

Mbia nandei quia i quia mose, aque mose abe Dios hui aroneãte nandesí. Mbae mo nda embui eã nandesí. Angeles. Aba checuayã icuã. Mbia rerecua. Ae icuã icuã ndiqui nande je namo. Ae icuã icuã nda nande je emo mose. Ibatenda mo. Ae siqui ibiqui rĩ no. Dios chiao mo. Ũquĩ ja ra Dios mbui eã nandesí. Dios quia nyesecua tuchite nguiã nanderese Jesucristo rĩ co.

9

Dios que judíos m̄i icúe umbaerã tuchi ra

¹ Jesús icuasa chõ se resẽ. Aico ñee ñooño eãte co resẽ. Espíritu Turã abe riqui sembiirandu sechiangui re co resẽ. ² Seya eãte aico co. Seya eãte aico judíos rese co. ³ Se sí raque judío. Judíos ja chõ ure re. Judíos siqui sereãte chõchĩ Jesús rese. Seso sete raque tata cuasu, judíos mingo bei sacuã Jesús rese. Eĩ ndei ra sesose rete tata cuasu judíos rendaque re. Seresenda tuchite quia ñene. ⁴ Israel ndei judíos i tuchi. Seriiĩ, i rei que Dios judíos je ra. Dios que uquirãcuã teacuquia rei judíos je ra. Dios que contrato saã ndei judíos je ra. Moisés chimbesa que judíos quereco rei ra. —Eĩ jenye chõ ñee seje, i rei que Dios judíos mbaaquiato quiatu ra. —Mbae turã nda asaã saã mbei quia jẽje, i bei que Dios quia judíos je ra. ⁵ Nanderamei ñiinda tuchi quiarei judíos i. Cristo tu mose ibi, judío que ae abe cote ra. Cristo rei Dios tuchi. Mbia rerecua bei tuchi rei Cristo. Amén.

⁶ Dios turã tuchi raque judíos je. Judíos que siquiãte Dios rese cote ra. Dios quiatu que ucheẽ mbuchebiã ndei ee ra. Ũquĩ mo nguiatu que judíos tuchi eã nda. Siquiã tuchi que Dios rese ra. ⁷ Abraham ndiirĩ nyeremo ndei que ra. Ismael. Isaac. Ũquĩ nyeremo ngue eriiĩ ja rei ra. Dios que Isaac m̄i isi ra. —Abraham ndiirĩ, i eã ngue Dios Ismael riiĩ je ra. —Abraham riiĩ, i chõ ngue Dios Isaac ndiirĩ je ra. Isaac ndiirĩ jaje que

Dios “judíos” i cote ra. ⁸ Abraham ndiirĩ nducucha que Dios isi turã ja eã ndese. Ae Dios cheẽ isi turã nguia, ũquĩ je chõ Dios riqui nguiã “seriiĩ” i. ⁹ Dios que ñee Abraham je ra. —Tenda nongue ra achu. Aque mose ra ãquẽ nacuí mo nyaacuquia neninisi Sara je, i que Dios Abraham je ra. ¹⁰ ãquẽ ngue tiarõ cote ra. Isaac, i que ee ra. Isaac que ngūinisi tea chee ra. Rebeca, i que eninisi je ra. Eata riru rerequia mose que Dios ñee ee ra. ¹¹⁻¹² —Ae rane nda nyaacuquia ãquẽ, ngõngue rimba tuchi chõ nda aque, i que Dios Rebeca je ñee nda. Echaacuquia nonde. Eriiĩ mbae icuã naa nonde. Mbae turã abe naa nonde. —Co chõ taisi, i que Dios ra. —Co chõ taisi, i beite Dios quia co no. Mbia mbae turã naa nonde chõ Dios eirabo nguiã. Dios turãte quia ñene. Nyebe mbia mo irabochõ nguiã. Ebite quia ñene. ¹³ Dios que ñee Rebeca riiĩ ñi nda. Ũquĩ nyeremo ñi: Jacob ndese chõ aio nguiã nyesecua. Esaú rese achesequa eãte, i que Dios ra, i que embesa ji ra.

¹⁴ ¿Mbaerã Dios riqui aque m̄i irabo re? ¿Mbaerã eriqui enongue abe isiã nde? ¿Dios icuãte ere? Tei. Eicuã eãte raque. ¹⁵ Sã Dios ñee Moisés je nyii no: Seya eãse mose emo ndese, seya eãte erese.

Setutãse mose je, seturãte ee, i que Dios Moisés je ra. ¹⁶ —Dios turã naa nda seje chã, i mose emo, ũquĩ je eã ño Dios turã ndiqui nguiã. Ae mbae turã saã saã ndei quia, ũquĩ je eã ño Dios turã ndiqui nguiã. Ae rese Dios ia eã ndiqui, ũquĩ je quiatu Dios turã ndiqui nguiã. ¹⁷ Sã faraón no. Egipto jenda rerecua. Dios que ñee ee ra. —Arem̄i ngue mbia rerecuarã nda. Sequirãcuã ndeacuquia sacuã mbia je. Mbia jirandu ja sacuã serese, i que Dios faraón je ra. ¹⁸ Dios ia eãse mose emo ndese, eya eã nda erese. Dios emo ñia matãse mose, matã ndae.

Dios ra judíos isi turã sí

19 Jemo nda ñee seje reae. —Dios ae emo ñiã mãtã mose, ¿mbaerã nda jeñee asi echiã ãtã je re? i ra jemo ñee seje reae. 20 Dios cheẽ nandesobeishĩ aroneãte. Sã nandembaecua ñio ñee aroneãte uaosa je no. —¿Mbaerã seraã eĩ nde? i aroneãte ñio ñee uaosa je no. 21 Ñio aosa ra ñio saã ñooño ño ubi mose no. Ñio turã tuchi raã arondete no. Ñio icuã abe raã arondete tuchu sigue je no. Embae quia tuchu re. Tuchu rã ño nande re. Ñio aosa rã ño Dios re. 22 Ae eicuã icuã mbeite riqui Dios je nae, ãquĩ je Dios siqui mingue i ite co. ãquĩ nda nyoi je tata cuasu. ãquĩ Dios mbasi serite cote. 23 Dios mbae turã saã sete ubi je. Nyebe uquirãcuã ndeacuquia nguiã ubi je. Diobi chõ nande re. Dios que nandeao ucheseclarã nda. Nandeico sacua erese. 24 Diobi chõ nande re. Dios que nandeirabo ra. Nandemo ndei judíos. Judíos eã abe abe. Dios chiirabo ja chõ nande re. 25 Sã Oseas Dios cheẽ mbesa no: Ae serimba eã nyii nae, ãquĩ nda serimbarã cote. Ae rese mbia nyeseclarã nyii, ãquĩ ndese ra achesecua tuchi se cote. 26 “Seresenda eã ño jẽ nde”, i que Dios ñee ee nyii ra. Hue jenda sí je ra Dios ñee cote. “Seresenda chõ jẽ cote re”, i ra Dios si ñee ee cote, i que Oseas Dios cheẽ mbesa ra. 27 Eĩ ngue Isaías Dios cheẽ mbesa cose ra: Judíos tubiriã tuchite raque rae. Siqui ja eã nda Dios rese. Co mii mii ño nda siqui erese. 28 Dios quia ra uquiatoã mbasi ja ibi jenda cote. Mbasi jei ra cote, i que Isaías embesa ra. 29 Isaías que ã mbesa cose no nda: Mbiam rese Dios ndua eande rae, eĩ nda judíos ua ja rei. Dios judíos mo ndecha eande rae, eĩ nda judíos ua ja rei. Sã Sodoma jenda ua ja no. Gomorra jenda abe no, i que Isaías embesa ra.

Judíos siqui sereã Jesús rese

30 Tacheẽ nyecua jẽje. Ae judíos eã nae, ãquĩ ngue “taico Dios rese”, iã ndei ra. Aque mose que Jesús icua cote ra. Jesús icua mose que Dios echiã mbitirõ cote ra. 31 Judíos quiatu que ñee ndei ra. —Dios cheẽ ndui si tuchi nandeico. Nandeico mose erui, Dios ra nandemingo bei, i rei que judíos ra. Dios que emingo bei eã nda. Siqui bei eã nguiatu ngue Dios cheẽ ndese re. 32 —Jesucristo nandeicua, i eã ñochĩ judíos. —Nande ae nandeico Dios cheẽ ndui, i chõchĩ. —Nandeico mose erui, Dios ra nandemingo bei, i chõchĩ. Judíos biãte que Jesús riqui ra. Nyebe judíos riqui turã eãte nguiã. 33 Eĩ ngue embesa ji Dios cheẽ nda: Serucucha que amii judíos rae ra. Judíos ra eisiteã. Judíos ra cuá i nyoi ee. Ngoi ra echoi cuá i mose ee. Sita rã ño serucucha ee re. Ae serucucha icua quia nae, ãquĩ nguia ra ngoi eã nyoi. “Dios rucucha aisi jirichĩ nguia no”, i eã nda Cristo icuasa mo ñee, i que Dios cheẽ mbesa ji ra.

10

1 —Sã Dios judíos rirõ mbae icuã si, ae rei quia co. —Paba, judíos emingo Jesucristo rese, ae tuchi rei quia co. 2 Judíos siqui sete raque Dios cheẽ ndui. Ñeenda quia eicuayãte nguiã Dios icha. 3 —Dios ra nandechiã mbitirõ Jesucristo rii, i eã ñochĩ. Ae ae uchiã mbitirõse chõchĩ. Jesucristo icua sereã nea mbei chõchĩ. Nyebe Dios riqui nguiã echiã mbitirõ eã mbei. 4 Jesucristo tu nonde que judíos siquise tuchi Moisés chimbesa rese ra. Jesús que tu íbii cote ra. —Moisés chimbesa rui jẽingo mose, taembitirõ turã, i ãte que Jesús ra. —Seicua mose quiatu ra jaembitirõ, i que ra.

Sã mbiam siqui ja serese, i Dios

5 —Emo mbae icuã mo saã eã mbei emo mose, ãquĩ nda Dios mingó bei, i rei que Moisés ra. 6-7 ã nandeico Jesús

icuate ã. Nyebe ae riqui nguiã nandemingo bei i ite ã. Nyebe nandeico nguiã ñee ãte. —Aba quia ra oso Jesús reru ibate si nande je, i ãte. —Aba quia ra oso mbia raaque rea, Jesús mbuquera sacua, i ãte nande mo. ⁸ ã ureico Jesucristo renei nenei mbia je ã. —Jê Jesucristo icua mose, jêingo bei rae, ure equia mbia je ã. Jesucristo icuasa ra ñee: —A Jesucristo cheẽ ndiqui aba jiite a. Echeẽ aba chucua bite aba chiangui re, i ra Jesucristo icuasa ñee. ⁹ —Jesucristo rei sererecua, ere chõ ñee. —Dios que Jesucristo raaque mbuquera ra, ere chõ nguia ndechiangui re. Nde i mose, Dios ra nemingo bei. ¹⁰ Emo Jesucristo icua mose uchiangui re, Dios ra echiã mbitirõ. —Jesucristo aicua quia co, i mose, Dios ra esirõ mbae icua si. ¹¹ —Jesucristo aisi jirichĩ nguia no, i eã nda Jesús icuasa mo ñee, i que embesa ji Dios cheẽ nda. ¹² Dios quia mbia ja rerecua tuchi re. Judíos achõ ndeecua eã. Judíos eã achõ nderecua eã no. Eĩ ja chõ mbia Dios je re. —Mbae mo embu seje, i mose emo Dios je, mondo turã tuchi ra ee. ¹³ Sã embesa ji riqui i no:

“Paba, seicua embitorõ”, i mose emo, Dios ra ãquĩ mingo bei tuchi, i que embesa ji ra. ¹⁴ Mbia mo Jesús icuayã mose, ñee aroneãte ee. Mbia jiranuã mose Jesús rese, Jesús icua aroneãte. Emo Jesús cheẽ nenei nenei eã mose mbia je, mbia jirandu aroneãte Jesús rese. ¹⁵ Dios mbia mo mondo eã mose echeẽ nenei nenei sacua, echeẽ nenei nenei aroneãte. Sã embesa ji riqui ñee no. Eĩ si chõ ñene: Aba bite emo tu mose Dios cheẽ nenei nenei ure je.

Ureya tuchite erese, i que embesa ji cose ra. ¹⁶ Mbia mĩ mĩ ño siquichĩ Dios cheẽ turã ndese ãquĩ. Sã Isaías ñee no:

Dios, mbia que urecheẽ ñandu sereãte ra, i que Isaías embesa ra. ¹⁷ Mbia ra Jesucristo icuayã mbeite, jiranuã mose erese. Mbia ra jiranuãte Jesucristo

rese, emo echeẽ nenei neneiã mose ee.

¹⁸ ¿Judíos Dios cheẽ turã ñanuãte re? Ñandu ja rei que ra. Dios cheẽ ngue judíos chandu ja rei resẽ. Mangu chooño eã ngue echoi Dios cheẽ nenei nenei ndesẽ. ¹⁹ ¿Judíos jiranuãte Jesús cheẽ turã ndese re? Jirandu tuchite rei que ra. Sã Moisés Dios cheẽ mbesa no:

Dios rei se. Judíos eã ndese taico turã. Mbia aquiatuã taisi serimbarã. Judíos nda queteã tuchi serese chã,

i que Moisés Dios cheẽ mbesa ra. ²⁰ Isaías abe que Dios cheẽ mbesa ra. ã ngue embesa ra:

Ae serequia eãte quia, ãquĩ ño ngue serea ra.

Ae ndua eãte quia serese, ãquĩ je chõ achecua nguiã, i que Dios ra, i que Isaías siquicheãte Dios cheẽ mbesa ra. ²¹ Isaías que ñee judíos je no nda:

Dios riqui ñee jêje co. “Jêingo serese”, ae beite raque se quia judíos je co.

Secheẽ mumba bei chõchĩ.

“Jêingo serese”, ae beite raque quia secheẽ mumbasa je co,

i que Dios ra, i que Isaías Dios cheẽ mbesa ra.

11

Dios ia eãte judíos rese

¹ Dios que hui eã judíos si ra. Judío chõ se no nde. Abraham ndei sei. Benjamín abe rei sei no. ¿Mañi nda Dios hui judíos si re? ² —Serimbarã mbei ra judíos, i que Dios cose ra. Nyebe eriqui nguiã emombo eã mbei. ¿Jêtesarei chõ Elías cheẽ si Dios je re? Elías que ñee icuãte judíos ataque rĩ aque mose ra. ³ —Dios, judíos que ndecheẽ nenei neneisa icua ja ra. Altar abe que embucoi coi nembae ra. Se ae tuchi aico nderimba co cote. Se abe ra judíos seiquia chee, i rei que Elías Dios je ra. ⁴ Dios que ñee Elías je cote ra. —Nde mĩ eã ño serimba re. Serimba tubiriãte nyeresẽ. Siete mi l serimba que ngoi eãte ngũfã ndese ñee ñee Baal naanguia je ra, i que Dios

ñee Elías je cose ra. ⁵ Eĩ ño namo abere. Judíos emo emo ño siqui nguiã Dios rese ã. Ñquĩ mii ño Dios chiirabo ñquĩ nde. Uturã je chõ Dios ñquĩ irabo nguiã. ⁶ Mbae turã naa mose eã ño Dios eirabo nguiã. Uturã je ae chõ Dios eirabo nguiã. Mbae turã naa naa ndibishorõ eã ño Dios riqui nguiã aba irabo umbaerã. Mbae turã naa naa ndibishorõ mose, eĩ nda Dios aba irabo eãte rei uturã je. ⁷ Dios quiatorã nande, i rei que judíos ra. Dios quiatorã tuchi que eriqui ra. Jesucristo icua sereãte que equia ra. Co mii mii ño ngue Dios irabo uquiatorã nda. Eataque que Jesucristo icua sereãte quia ra. ⁸ Sã embesa ji riqui ñee no:

Dios que embaaracua eã nda.
Nyebe mbae icua eãte nguiã, mae mose Dios chiaose.

Nyebe Dios cheẽ icua eãte nguiã eandu mose no,

i que embesa ji cose ra. Eĩ mbei chõ namo abere. ⁹ David abe que ucheẽ mbesa ra. Eĩ ngue embesa ra:

Sã eya chooño umbae tubiriã ndese.
“Nandeico turãte ã”, sã i, siqui icuã mose.

Sã Dios embua tuchi embasi mose.

¹⁰ Sã eresa nyiati ati bei.

Mae eã sacua.

Sã mbae usi riqui eituquia bei,

i que David ñee nda.

¹¹ Judíos que Dios cheẽ secha rei ra. Uba je quia ra ecuaẽ Dios rese. Dios si judíos hui mose quiatu que judíos eã siqui arõte Dios rese cote ra. Dios judíos eã mingo bei tuchi sacua cote. Judíos ra queteã tuchi chee Dios rese cote. Uba si sacua erese cote. ¹² Judíos que Dios cheẽ isiteã nda. Nyebe mbia judíos eã ja Dios cheẽ andu ja nguiã cote. Judíos Dios cheẽ mumba mose, Dios que uturã teacuquia ja mbia mangue chooñoa jenda ja je cote ra. Judíos uba si mose Dios rese, mbia mangue chooñoa jenda ra siqui tuchi Dios rese cote.

Judíos eã ño Dios cheẽ isi

¹³ Jẽje judíos eã je aico Dios cheẽ nenei nenei a. —Judíos eã je eico

secheẽ nenei nenei, i que Dios semondo ra. Nyebe aico nguiã Dios cheẽ nenei nenei sete. ¹⁴ Judío chõ se no nde. Sã jẽ jẽingo Dios rese no jẽ. Sã judíos abe riqui Dios rese jẽ na si. Dios erirõ sacua mbae icua si. ¹⁵ Judíos Dios isiteã mose que Dios hui chõ judíos si ra. Judíos eã nguiatu que Dios isi uquiatorã cote ra. —Mbia mo ja sequiãtorã cote, i que Dios judíos eisiteã mose ra. Judíos ra uba si chee Dios rese emo mose cote. Mbia raaque quera si rã tuchi ra aque mose cote. ¹⁶ Sã mbia mo mbichae raã no. Mbichae ñinda uchi turã mose, eruinda abe ra uchi turã no. Mbichae ñinda rã ño Abraham nde. Judío i tuchi chõ Abraham nde. Sã Abraham siqui turã tuchi Dios je no. Nyebe ra eriri abe uba chee Dios rese no. Ei turã mose, erãquiã abe ra eturã no.

¹⁷ Olivo rãquiã na ño judíos re. Judíos siquiã mose Dios rese, olivo rãquiã na ño ngue Dios echisia mombo ra. Ñquĩ naquiã nendaque re chõ ngue Dios jemii nda. Jẽ judíos eã. Injertar i raanguia chõ Dios jembucha nguiã ei rese. Jemingo tuchi sacua Dios rese. Olivo rãquiã na eã ndaque jẽ. ¹⁸ ¡Jenguasú ra jesaã saachĩ judíos je jẽ! ¡Dios jẽisi turã mose jẽ! Erãquiã injertar i ji rã achõ ño jẽ nde. Erãquiã nda hui mingo eã. Ei quia nda erãquiã mingo nguiã. Erãquiã na ño jẽingo nguiã jẽ. ¹⁹ —Olivo rãquiã ngue Dios chisia urembucha sacua ei rese, ¡jenyechĩ nda jenguasú raã naa jẽ! ²⁰ Dios que echisia sia Jesucristo icua sereã mose ra. Jẽ Jesucristo icua mose chõ ngue Dios jembucha olivo i rese ra. Jemingo bei sacua. Nyebe jẽingo jenguasú raã naa eã. Jẽireĩ ireĩ jiri quia Dios si. ²¹ Dios que olivo rãquiã nyisia mombo Jesús icuayã mos e ra. Eĩ nda Dios jemombo jẽ abe Jesús icuayã mose. ²² ¡Sã Dios turãte mbia siqui mose eru no jẽ! ¡Sã mbia mbasi echeẽ mumba mose no jẽ! ¡Sã eturãte jẽje no jẽ! ¡Jẽingo bei chõ Dios turã ndese jẽ! Jẽingo eã mose Dios rui, Dios ra jemombo. Ira rãquiã sia ji

mombo rã si. ²³ Judíos uba si mose Dios rese, Dios ra embucha si esiasa rese. Injertar i si ra ee. Dios mii ño eaquiato ũquí naa nde. ²⁴ Judíos eã ño jẽ nde. Olivos turã naquiã eã ño jẽ nde. Olivo mbuae rãquiã na ño jẽ nde. Dios ae que jembucha nguiã olivo i rese. Injertar i jẽje. Ae Dios nyisia nyii nae, ũquí nda Dios mbucha si uchisia rese.

Judíos abe ra siqui chee Jesús rese

²⁵ Tacheẽ nyecuayã na jěisaa. Mbia chũcuayã tasenei na jẽje. Jenguasu raã naa sacua eã judíos je. Judíos yete tuchi que hui rei Dios si ra. Judíos eã nguiã siqui tuchi Dios icua ã cote. Judíos eã Dios chiirabo Jesús icua ja mose, judíos abe ra uba ja erese cote. ²⁶ Aque mose ra Dios judíos rirõ ja huũcuã si cote. Sã embesa ji riqui i no: Mbia mbuturãsa ra tu Sion si.

Ae ra Jacob riri sirõ ja huũcuã si. Judíos rirõ ja huũcuã si.

²⁷ Aque mose ra judíos icua ambutiã ja esi.

Secheẽ nda ique aque mose cote, i que Dios ra,

i que embesa ji ra. ²⁸ Judíos yete tuchi chõ Jesús cheẽ turã ucuayã nguiã ũquí. Nyebe Dios uturã ndeacuquia nguiã jẽje. Judíos eã je. Dios quia nyesecua beite nguiã judíos rese. Irabo que nyii ra. Eramei ja rĩ ño Dios judíos irabo nguiã. ²⁹ —Mbae mo tamee jẽje, i mose Dios, mondo rae. Dios ra uchimondo sirombe eã. Dios ra hui eã mbei uchiirabo si. ³⁰ Jesucristo que jẽicuayãte quia nyii ra. Judíos hui mose Dios si, Dios que uturã teacuquia jẽje cote resẽ. ³¹ Judíos quia Jesucristo icuayãte nguiã cote. Sã Dios ia eãte riqui jendese no, eĩ si ra eya eãte judíos rese cote. Uturã nda eteacuquiabe chee judíos je. ³² Eĩ ja chõ mbia Dios je re. Emo ngue echeẽ mumbayã eãte quia ra. Nyebe eya eãte riqui nguiã nande ja rese.

³³ Dios turã tuchite. Dios aracua tuchite. —¿Mbaerã Dios ũquí naa nde? nande aroneate. Dios chisaã nandeicua aroneate quia ã. ³⁴ ¿Emo

ndua ndua quia Dios rã nde? ¿Emo mose mbia riqui Dios mbaaquiato re? ³⁵ ¿Emo nane mbae mo mondo quia Dios je re? ¿Dios mbae mondo nonde re? ³⁶ Dios ae que mbae chao ja ra. Umbaerã ño echao ja nguiã mbae. Ae quia ecuasú jiri mbae ja si re. Nandechẽ turã mbei ra equia eriĩ. Amén.

12

Je sí chõ jeñimondo Dios je

¹ Dios ia eã mbeite riqui nanderese co. Nyebe jẽ sí chõ jeñimee Dios je. Jendeco chõ jemee Dios je. Jeñia turã jemee Dios je. Ebite ũquí. Dios que mbae mondo tuchi nande je ra. Eĩ nande chõ ñimondo ee ae. ² ¡Jesús quiatoã na nda jẽingochĩ jẽ! —Nde rã si semundua ndua ramo, Paba, jenyẽ chõ nguiã Dios je. Eĩ jenyẽ mose ra Dios ñeenda huũcha teacuquia jẽje. — Eĩ jenyẽ, eĩ jenyẽ chõ, i bei ra Dios quia jẽje cote.

³ Dios turã ngue seirabo ucheẽ nenei nenei sacua jẽje ra. Nyebe aico nguiã jembirandu randu co. —Se jiri quia mbia si re, jenyẽ tuchite chí na jẽ! ¡Endua ndua turã ño ndechue jẽ! Dios nembaaquiato tuchi mose, ebite quia nde re. ⁴⁻⁵ Mbae tubiriãte nanderete rese. Nanderesa. Nandeo. Nandeisa. Ũquí jate nanderete rese. Mbae mii nda siquiã nanderete rese. Nandeo oco mbae rese. Nandeisa mbae andu. Nanderesa mae mbae rese. Nandechuru ñee. Nanderete quiarei “ã nandesã”, i tuchi nyue. Eĩ sí chõ Jesús icuasa nande re. Jesús rete ja chõ nande re. “Ã nandesã”, nandete equia nandechue ã. Mbae rese jaajate que Dios uquiato mingo ra. ⁶ Dios turã tuchi que nande je ra. —Co rese eico nde. ã ndese eico nde, i Dios quia nandembuchao chao co. Ũquí naa sacua Dios riqui uquirãcuã mee mee nande je co. — Secheẽ esenei senei, i mose Dios emo je, sã aque echeẽ nenei nenei turã echeẽ ndui si. ⁷ —Mbae turã esaã saã mbia je, i mose Dios emo je, sã

aque mbae turã naa naa mbei mbia je. —Mbia embaaquiato quiato, i mose Dios emo je, sã embaaquiato turã tuchi. ⁸ —Seosei uquia mbia je, i mose Dios emo je, sã aque Dios osei uquia turã tuchi mbia je. —Mbae emee mee mbia je, i mose Dios emo je, sã aque abei tuchi. Sã ngueteã eã tuchi mbae rese ee. Dios emo mii mose ererecuarã, sã ererecuã turã tuchi aque. —Mbae cha reã je mbae esaã saã, Dios i mose emo je, sã aque ia tuchi mbae turã naa naa mbae cha reã je.

⁹ ¡Jenyese cuã chooño chí nda jenyese jê! ¡Mbae icuã si jenyicuasẽ cuasẽ tuchi quiato jê! ¡Mbae turã ndese chõ jêingo tuchi jê! ¹⁰ ¡Jembi turã ño jenyese jê! ¡Jenongue rã nguiatu jêingo turã tuchi jenyue jê! ¡Jeñee turã turã ño nguia emo nii jê! ¡Nderi nda erecheẽ turã turã chí jê! ¹¹ ¡Jeñimbutomo tomochi nda jê! ¡Jeñimbirãtã tuchi quiato Dios je jê! ¹² Jesucristo cheẽ nda io chee nande je emo mose cote. Ñquĩ ño nandesaarõ arõ nguia ã. Nyebe jêya tuchi quiato siqui eraarõ arõ. Mbia jembasi mbasi mose, jenyecuachõ ño nguia ee. Jeñee ñee mbei quiato quia Dios je. ¹³ Mbae eã mose Jesús quiato je, mbae mo jemondo ee. Mbia mo oso mose jenyuchúaa, ¡jêisi turã ño jê!

¹⁴ Mbia mo icuã icuã mose jêje, ¡jêturã ño ee jê! —Paba, mbae turã emondo rã ee. Ae icuãte riqui seje, ñquĩ je, jenyese chõ Dios je. ¹⁵ Ae eyate riqui, ñquĩ ndese chõ jêya jê abe. Ae nyeseo quia, ñquĩ je ndese abe jenyeseo no. ¹⁶ Hue rĩ ja chõ jêingo ndua turã. ¡Jenguasu ra jêsaã saã chí emo je jê! ¡Jêseteã ño jêingo jê! ¡Jêaquiato ra jêsaã saã chí jê! ¹⁷ Mbia mo icuã icuã mose jêje, jenyecuachõ ño nguia ee. Mbae turã ño jêsaã nguia mbia resa rae. ¹⁸ ¡Jêingo turã ño mbia je jê! ¡Nda jêingo ubi turã jenyese. ¹⁹ Mbia icuã mose jêje, ¡jeñee icuã chí nda erobeishi jê! Dios quia ra embasi nguia eicuã mose. Sã embesa ji riqui i no:

Se quia mbia tambasi eicuã mose, i

que Dios ra, i que embesa ji ra. ²⁰ Ae eicuãt e riqui jêje, ñquĩ jembuquiato chõ eriãcuã mose. Ñquĩ jembiu chõ eisei mose. Eĩ jenyese mose ee, eireĩ te ra huicua mose cote. ²¹ Mbia icuã mose jêje, jeñee chí nda echeẽ ndibishorõ. Jêingo turã ño ee. Mbae turã nguia equirãcuã jiri mbae icuã si re. Mbae icuã mombo jiri.

13

Sã mbia riqui turã ererecuã ja je

¹ Mbia ja ererecuã cheẽ mumbayã nguiatu. Dios ae chõ ererecuã mii nguia. Dios chimii ja chõ mbia rerecuã re. ² Ae mbia rerecuã cheẽ mumba quia, Dios cheẽ abe mumba chõ nguia aque. Dios quia emii tare nguia. Ae ererecuã cheẽ mumba mumba quia, ñquĩ nda mbae rasi saã cote. ³ Mbia turã mbusiquiche sacua eã ño ererecuã re. Mbia icuã mbusiquiche sacua nguia ñene. Nde ndeico turã mose, ererecuã ra nembusiquiche eã. Ndeico turã mose, ererecuã ra ñee turã mbei ndeje. ⁴ Dios ae chõ ererecuã mii nguia. Nandereaquiato turã sacua. Nde mbae icuã naa mose, ndesiquiche jiri nda esi chã. Ndeicuã mose ra ndeiruã nua arõte. Dios quiato emii nguia ererecuarã mbia icuã mbasi mbasi sacua. ⁵ Ererecuã cheẽ nandemumbayã ño nguia. Nandembaasi asiã sacua achõ eã ño ñene. Nandendua turã sacua abe chõ ñene. ⁶ — Impuestos jêisi isi mbia si, i que Dios ererecuã mii nda. Nyebe nandeico nguia impuestos mondo mondo turã ererecuã je. Dio s cheẽ nguire chõ ererecuã riqui nguia eisi isi. ⁷ Jê deber i mose emo je, mbae jembuchebi jei chõ ee. Jê deber i mose impuestos, jemondo chõ ee. Ererecuã je jêingo turã ño. Jeñee turã ño eri.

Jenyese cuã ja quia jenyese

⁸ Emo mbae mondo mose jêje, jêingo are arete chí nguia mbae mondo rocoĩ ee. Deber jenyechi nda emo je. ¡Jenyese cuã ja quiato quia jenyese jê! Jenyese cuã mose mbia

rese, Moisés chimbese ja jemumbayã ño nguiã ãquĩ. ⁹ ã ndei Moisés chimbese ã:

Emo ninisi rese ra ereicochĩ.

Mbia mo nda ereiquiachĩ.

Mbae mo nda erembuquiachãchĩ.

Emo je ra erecheẽ ñooñochoĩ.

Emo mbae ra erechesei choseichĩ, i que Moisés chimbese ra. Nandechesea mose mbia rese, nandeico embesa ji cheẽ mumbayã ã. ã ndei Jesucristo cheẽ ã: Sã ereico nyesea nderete rese no, eĩ ere si chõ nyesea emo ndese. Nde ã naa mose, Moisés chimbese ja eremumbayã nguia ã. ¹⁰ Ae nyesea quia mbia rese, ãquĩ nda mbae icuã saã eã mbei emo je. Emo nyesea mose mbia rese, Dios cheẽ ndui si chõ eriqui nguiã mbae turã naa naa ãquĩ.

¹¹ Dios rese jẽingo tuchi ãquĩ. Nandemae jei ra Jesucristo rese cote. Nandechẽe ngue equia nyii. —Nandemae je ra Jesucristo rese, nande que equia nyii. Namo nda nandemae erese cote. Aichite eñi tu a cote. ¹² Itondaru rã ño mbae icuã ja namo nde. Jesucristo ra tu mbae mbuturã cote. Nyaashĩ na nda cote. Nyebe nandeico bei rã mbae turã ndese cote. Dios rese nandeico tuchi rã cote. Mbae icuã ndiquisã sacua nandesi. ¹³ Nandeico turã ño Dios resa rae. ¡Mbia quiacua ra nandesichãchĩ jẽ! ¡Nandequiacuachĩ nda jẽ! ¡Emo ninisi rese ra nandeico ichõchĩ jẽ! ¡Mbae icuã nda nandechesei choseichĩ je! ¡Nandeicuã icuãchĩ nda emo mbiacuã icuã jẽ! ¡Emo mbae ra nandechesei choseichĩ jẽ! ¹⁴ Jeñimee tuchi quia Jesucristo je. Ae nda uquirãcuã mee tuchi jẽje chã. Mbae icuã ndiquisã sacua jẽsi. Ae icuã mbia chosei chosei quia nae, ãquĩ nda jẽsaã saãchĩ jẽ Jesús resenda chõ jẽ ndesẽ.

14

Jeñee asiã mbei jenongue je

¹ Jesús quiato mo Jesús icua tuchiã mose, jẽisi turã ño. Jeñee asi asichĩ nda ee. ² Emo emo mbae u ja. Emo

emo soo u eã tuchi no. Ae soo u eãte quia nae, embaaquiato tuchi iriã ño ãquĩ nde. ³ Ae soo u guia nae, saã ãquĩ ñee asiã mbei soocua reã je. Ae soo u eãte guia nae, saã ãquĩ ñee asiã mbei soocua je no. Dios quiato ja chõ ñene. ⁴ Erecheẽ icuã aroneãte ererecua rimba mo je. Ae ae mbae saã nguiã nguerecua je. Dios ae nda ñee nguiã nguimba je. Mbae raã turã mose. Mbae raã icuã mose abe no. Dios quirãcuã ae nda nguimba mingo nguiã mbae turã ndese.

⁵ —Nyaashĩ mo ngue Dios irabo mbiicúe cose ra. ãquĩ nyaashĩ mose nandechimbaacua rã, i Jesús quiato mo nguia co. Jesús quiato mo nguia ñee nguiã: —Eĩ ja chõ nyaashĩ ndesẽ, i emo no. Sã Dios quiato ja ae riqui ndua ndua uchiangui re ae. ⁶ Dios quiato mo ñimbaacua mose aque nyaashĩ mose, Dios je chõ eriqui nguiã ñimbaacua. Dios quiato mo mbae raã naa mose aque nyaashĩ mose, Jesús je chõ eriqui nguiã mbae raã naa aque nyaashĩ mose. Ae soo u quia, Dios je chõ eriqui nguiã soo u. Gracias, i que Dios je nyii ra. Ae soo u eã nguia, Dios je chõ eriqui nguiã soo u eã no. Ae abe gracias i chõ nguiã Dios je ague. ⁷ —Sebi rese chõ taico bei, nande aroneãte. —Semanose mose quia tamano, nande aroneãte. ⁸ Dios ae chõ nandereco mingo nguiã. “Emano”, i mose Dios nande je, nandeico nguiã mano. Nandereco siqui mose, Dios rimbarã ño ñene. Nandemano mose, Dios rimbarã ño nda nandeico nguiã no. ⁹ Cristo que mano nda. Quera si que ra. Mbia rerecuarã ngue quera si ra. Mbia reco rerecuarã. Mbia mano je rerecuarã abe no.

¹⁰ Nandechẽe icuã icuã aroneãte nanderesenda mo je. Emo mose quia ra Dios mae tuchi nanderese cote. Nandechiangui renda ra etea tuchi cote. Ae quia nda nandeicuã tea nguiã. Nandeturã abe rea. ¹¹ ã ndei embesa ji ã:

Dios ndei se. Se rei sereco bei. Sésa ra mbia chi ja ngoi nguiã ndese.

Ñee jaaja ra seje cote.
 “Dios tuchi chõ nde re”, i jaaja ra seje
 cote, i que Dios ra,
 i que embesa ji ra. ¹² Nande ae ae ra
 mbae nandesenei senei Dios je aque
 mose. —Ã ngue asaã saã nguia seico
 mose íbii ra, nande ja ja ra ee cote.

Jenongue jemb#cuã eã

¹³ Nyebe nandechẽe icuã eã nguia
 nanderesenda mo nii. ¡Nandembia
 eãte chĩ nda jẽ! ¡Mbae icuã nda
 nandesã uquiachĩ ee jẽ! ¹⁴ Jesucristo
 que sembaaquiatu ra. —Mbae turã ja
 chõ mbia chiurã nde, i que ra. —¡Co
 ra jẽuchĩ jẽ! iãte Dios mbae mo nii. —
 Eicuãte co, i mose emo, sã ae mii eu
 eã. Ae eu mose, eicuãte ee. ¹⁵ —¡Co
 nandeu eã jẽ! Eicuãte, i mose ndere-
 senda mo ndeje, eu eã. Nde eu mose,
 erechesequa eã ño nguiã nderesenda
 rese aque. Nderesenda je abe
 chõ ngue Jesucristo mano ndesẽ.
 ¿Mbaerã nda nderesenda eremb#cuã
 ndechuubi je re? ¹⁶ Ndechuubi turã
 ndaque ndeje. “Eicuãte” i mose
 nderesenda mo, eu eã ae. Nde eu
 mose, mbia ra erembucheẽ icuã
 ndechue. ¹⁷ Dios chõ nandererequa
 cote re. Nyebe nandendua tuchi
 eã nguia nandechiurã ndese. Ae
 nandembei quia, ùquĩ abe rese.
 Dios rese quia nandendua. Ae chõ
 nandemingo nguiã mbae turã ndese
 co. Ae chõ nandechiã mbucoi nguiã
 co. Espíritu turã ae nandembia mingo
 nguiã co. ¹⁸ Eĩ nande mose Cristo
 je, Dios ia tuchi ra nanderese. Mbia
 abe ia ra nanderese. ¹⁹ Nandeico
 turã nda nandechue chã. Eĩ nande
 nda Jesús osei osei uquia nandechue
 chã. ²⁰ —¡Aque soo ra nandechĩ jẽ! i
 mose Jesús quiato mo, jereuchĩ nda jẽ!
 Jesús quiato ra eremb#cuã arõte nde
 eu mose. Mbae turã ja raque mbia
 chiu. “Eicuãte”, i mose Jesús quiato
 mo, eu eã ae. ²¹ Soo Jesús quiato
 mb#cuã mose, soo ra nandeu eã.
 Vino Jesús quiato mb#cuã mose, vino
 nda nandembei eã. Mbae mo Jesús
 quiato mo mb#cuã mose, nandeco
 eã erese nande abe. Mbae mo Jesús

quiato mo mb#cha serĩ mose Dios
 icha si, ùquĩ ndese nandeicoã nande.
 Eĩ nda ichayã esi. ²² —So o icuã eã ño
 ñene, i mose Dios ndeje, echecuachõ
 ño nguia eu. Endua tuchi mbae
 mo naa nonde. Eicuã arõ mose
 ndeje, esaã eã. Eturã mose ndeje,
 echecuachõ ño eraã. Nde ùquĩ naa
 naa mose, ndeya tuchi rae. ²³ Nde
 ndeiranuã mose mbae mo ndese,
 esaã eã. —Eturãte ereae. Eicuãte
 ere no ae, nde i mose erisu isu, esaã
 eã ño. Ndeiranuã eraã ñooño mose,
 eicuãte ùquĩ. Ndechisu isu u mose
 soo, eicuãte ùquĩ. —Eicuãte ereae, nde
 i mose, ereicochĩ nguiã eu.

15

Nandebi rese ra nandecochoĩ jẽ; nandenongue bi rese quia nandeico

¹ Nande mo Jesús icuat e quia co.
 Ae Jesús icua tuchiãte quia nae, ùquĩ
 je nandeico turã jiri ae. Nandem-
 baaquiatu quiatu ae. Nandebi achõ
 ndese ra nandendua eã. ² Ae nandeb-
 ite nande ae, ùquĩ ndese nandeicoã.
 Ae Jesús quiato nongue bite nae, ùquĩ
 ndese quia nandeico. Ùquĩ mose
 nandeico nanderesenda mbaaquiatu
 tuchi Jesús rĩ co. ³ Cristo chee que
 siquiã ubi rese ra. Sã embesa ji riqui
 ñee Cristo rĩ no:
 Paba, ae ndeucuayãte quia nae, ùquĩ
 ngue ñee icuã mbeite quia seje
 ra,
 i que Cristo ñee ngu je ra,
 i que embesa ji ra. ⁴ Dios cheẽ mbesa
 ji cose ndare chõ nandembaaquia-
 tusa re. Nandemingo mingue sacuã.
 Nandembirãcuã sacuã Jesucristo rĩ.
 Nyebe nandeico nguiã Jesucristo
 raarõ arõ minguete ã. ⁵ Dios chõ
 nandemingo mingue nguiã. Dios
 chõ nandembirãcuã nguiã. Dios nda
 jemingo turã mbei nyiese Jesucristo
 cheẽ ndui si chã. ⁶ Ùquĩ mose ra jẽingo
 ñee turã mbei Dios je. Hue rĩ ja ra
 jẽingo ndua turã Dios rese. Dios quia
 Jesucristo ru re.

Dios iate judíos eã ndese

⁷ Sã Cristo nandeisi turã no, eĩ jenyẽ si chõ nguia nyiisi turã. Eĩ nda mbia ñee turã Dios rĩĩ. ⁸ —Eĩ tae tae, i que Dios judíos i ñiinda ja je cose ra. Nyebe Cristo ru nguiã mbae turã naa naa judíos je cote. —Dios cheẽ iochĩ cote, i nda judíos chã. ⁹ Judíos eã abe mundua sacuaã Dios rese que Cristo ru ra. Dios turã ndese emundua sacuaã ño ngue eru nguiã. Co rei David chimbesa co:

Paba, ndeturã tasenei senei judíos eã je.

Tairasei rasei abe ndeje, i que David embesa ra. ¹⁰ Co rei embesa ji cheẽ mo co:

Judíos eã, jẽya chõ Dios rese.

Sã Dios rimba iate erese no, eĩ jenyẽ chõ jẽ abe jẽya erese,

i que embesa ji ñee nda. ¹¹ Co rei embesa ji cheẽ mo co no:

Sã mbia ibi jenda ja ñee turã ja Dios rĩĩ,

i que embesa ji ra. ¹² Isaías que co mbesa ra:

Isaí riirĩ nguia ra mbia judíos eã nderecuarã tuchi cote.

Mbia judíos eã nda “ichõiñosa reã”, i tuchi ee,

i que Isaías embesa Jesús rĩĩ nda.

¹³ Ñquĩ jẽingo Dios icuate ñquĩ. Dios nda jembia tuchi mingo chã. Dios nda jeñia mbucoi chã. Dios ae chõ “Cristo jësaarõ arõ”, i chõ nguiã nandemingo mingue ã. Espíritu Turã ndiqu i nandembirãcuã tuchi ã. Nandembia mingo Cristo raarõ arõ ã.

¹⁴ Seyate aico jendese co, Sere-senda. Jẽingo turãte quia jenyiese ñquĩ. Mbae jẽicua tuchite cote. Jẽ ae jẽingo ñimbaaquiatu quiatu turã jenyue ñquĩ. ¹⁵ Aireĩ ireĩ ãte ã mbesa jẽje, Seresenda. Jẽtesareĩã sacuaã ã si. Dios turã ae ngue seirabo nguiã. Mbia mbesareĩ eã sacuaã Jesús cheẽ si. ¹⁶ Dios que seirabo Jesucristo rimbarã nda. Ucheẽ nenei nenei sacuaã mbia judíos eã je. Mbia judíos eã secheẽ isi turã mose, Espíritu Turã nda emingo icúe Dios mbaerã cote. Ñquĩ mose ra Dios judíos eã isi turã cote. ¹⁷ Se Dios cheẽ nenei

nenei mose mbia je, mbia que siqui tuchi erese secheẽ nguire ra. Nyebe ñquĩ ndiqui nguiã sembia tuchi.

¹⁸ Jesucristo que sembirãcuã nda. Ucheẽ nenei nenei sacuaã judíos eã je. Nyebe judíos eã ndiqui nguiã siqui tuchi Dios rese cote. Secheẽ nguire cote. Sechisaã ndese abe maende cote. Mbae mo ñi abe ra acheẽ iã cote. Jesucristo que sembirãcuã, ñquĩ mĩ ño aico nguiã ñee jẽje a. ¹⁹ Espíritu Turã ngue uquirãcuã mee seje ra. Nyebe aico nguiã mbia mae sayã naa naa tuchi mbia je. Ñquĩ mos e que mbia riqui tuchi Dios rese cote ra. Jesucristo cheẽ ngue asenei senei Jerusalén nda. Mbia mangue chooñoa jenda je abe. Ilírico jenda je abe. ²⁰ —Ae mbia riqui Jesucristo cheẽ nenei nenei eãte nae, huee Jesucristo cheẽ tasenei senei se, ae que se ra. Emo Jesucristo cheẽ nenei neneisa, huee taico bei eã, ae que se ra. ²¹ Sã embesa ji riqui ñee no:

Ae jiranuãte quia Cristo rese, ñquĩ nda jirandu erese cote.

Ñquĩ nda eicua cote,

i que embesa ji ra.

Aso ra Rómaa, i Pablo

²² Ae mbia riqui Dios cheẽ nenei nenei eãte, huee quiatu ngue aico nguiã Dios cheẽ nenei nenei. Nyebe aico nguiã osoãte jendea. ²³ Cose ndarechõ mbei chõ aico rei nguiã “taso jendea”, i. A jenda mbia que Dios cheẽ ñandu tuchi cote ra. Nyebe taso jendea cote. ²⁴ Seso mose España nda aso jendea. Sembia jiri sacuaã jendese. Taico mbirĩ na jendese huee. Jẽ nda sembucuata turã mondo hue si cote chã. ²⁵ Jerusalén nane nda aso. Ofrenda mo arao quia Jesús quiato je co. ²⁶ Jesús quiato Macedonia jenda que ofrenda munua nua nda. Jesús quiato Acaya jenda rese. — Jesús quiato mbaecha reã je mbae nandemondo rã Jerusalén jenda je, i que ñee nyue nyii ra. Ñquĩ ño arao nguiã co. ²⁷ Coche ñquĩ ndiqui nguiã mbae mondo judíos Jesús quiato je. Judíos rane nguia

Dios cheẽ senei senei tare nguiã judíos eã je. Nyebe ra judíos eã mbae mo mondo judíos Jerusalén jenda je cote. ²⁸ Nyebe ra ofrenda munua ji arao ee. Jesús quiato mbaecha reã je. Aquere ra aso España quitu cote. Aicha ra ñeenda cúa si mae jendese. ²⁹ Jesucristo ra semondo turã jendea. Ae ra nandembia ja uturã je. ³⁰ Seresenda, Jesucristo quiato quia jẽ nde. Espíritu Turã ño jembuchesequa nguiã jenyiese ùqui. Nyebe jeñee tuchi quia Dios je serí. Nandechẽ ja tuchi quiatu ee serí. ³¹ —Paba, mbia icuã Judea jenda esiquisã Pablo si. Paba, ndequiatio Jerusalén jenda nda ofrenda isi turã Pablo si chã, jenyẽ chõ Dios je. ³² Ùqui mose ra seya tuchi mae jendese cote, Dios “eno” i mose seje. Jendese seico mose ra sequenea aucua tuchi cote. ³³ Sã Dios riqui bei jendese. Sã eriqui jembia.

16

Pablo saluda i ja mbia je

¹ Febe jëisi turã ño. Jesús quiato chõ aque cuña nde. Mbae turã esaã saã mbeite quia Jesús quiato Cencrea jenda je aque. ² Jëisi turã ño nguia Jesús rí. Sã Jesús quiato riqui nyiisi turã no, eĩ jenyẽ chõ Febe isi turã no. Ae que mbae turã saã saã mbeite Jesús quiato je ra. Seje abe no. Nyebe jëturã ño jẽ abe ee. ³ Aquila je saluda jenyẽ rã seje. Eninisi Priscila je abe no. Serese que ùqui ndiqui Jesucristo cheẽ nenei nenei tuchi ra. ⁴ Mbia que eiquia serí seríte rei quia serí nda. Siquicheã mbeite que equia ra. Nyebe aico nguiã gracias i tuchi ee. Se ae eã. Jesús quiato judíos eã abe riqui gracias i jate ee ã. ⁵ Ae Jesús quiato ñumunua nua nguia Aquila chuchua, ùqui je abe saluda jenyẽ. Epeneto je abe saluda jenyẽ. Sequiatio tuchite que aque ra. Ae rane ngue Cristo isi Acaya jenda ra. ⁶ María je abe saluda jenyẽ. Ae que mbae saã saã tuchi Dios je jësaa ra. ⁷ Andrónico je abe saluda jenyẽ. Junias je abe. Se sí

chõ ùqui nde. Serese que etarõ ji riqui cárcel nda. Dios cheẽ nenei neneisa tuchi chõ ùqui nde. Ùqui nane ngue Cristo icua sesi cose ra. ⁸ Amplias je abe saluda jenyẽ. Sequiatio tuchi chõ Dios resenda aque re. ⁹ Urbano je abe saluda jenyẽ. Ae que Dios cheẽ senei senei nguia urerese ra. Sequiatio Estaquis je abe saluda jenyẽ. ¹⁰ Apeles je abe saluda jenyẽ. —Seicuaa tuchi Apeles riqui co, i que Dios Apeles rí nda. Aristóbulo chuchua jenda je saluda jenyẽ seje. ¹¹ Herodión je abe saluda jenyẽ. Se sí chõ ae re. Narciso chuchua jenda, ae Jesús quiato nae, ùqui je saluda jenyẽ. ¹² Trifena je abe saluda jenyẽ seje. Trifosa je abe. Ùqui ndiqui mbae raã naa tuchi Dios je ùqui. Nandequiatio Pércida je abe saluda jenyẽ. Ae que mbae saã saã tuchi quia Dios je ra. ¹³ Rufo je abe saluda jenyẽ. Dios chiirabo tuchi chõ ae re. Esi je abe saluda jenyẽ. Taĩ na tuchi que eriqui seje ra. Mbae que esaã ja tuchi quia seje ra. ¹⁴ Asíncrito je saluda jenyẽ seje. Flegonte je abe. Hermas je abe. Patrobas je abe. Hermes je abe. Ae Jesús quiato riqui ùqui ndese, ùqui je abe saluda jenyẽ. ¹⁵ Filólogo je abe saluda jenyẽ. Julia je abe. Nereo je abe. Enongue je abe. Olimpas je abe. Ae Jesús quiato riqui ùqui ndese, ùqui je abe saluda jenyẽ. ¹⁶ Jenyiquiaama ama saluda i nyue. Tuchuamo jenda ja Cristo quiato riqui saluda i jëje ã.

¹⁷ Huee emo ndiqui Jesús quiato mbicuã sete hue. Hue emo ndiqui “Jesús quiato tambicha Jesús sí”, ite hue. Jenyicuasẽ ño nguia ùqui si. Jesús cheẽ ndui si eã ño eriqui nguiã mbia mbaaquiato quiatu ùqui. ¹⁸ — Ae Jesucristo bite, ùqui nandesã saã, iã ño nguiã ùqui. Ubi achõ ño esaã saã nguiã ùqui. Echeẽ turã aba reã ño eriqui nguiã mbia je ùqui. Ae Jesucristo icua tuchi eãte quia nae, ùqui mbirí irí ño nguiã ùqui. Jenyicuasẽ tuchi chõ nguia ùqui si. Aba mbirí irisa tuchi chõ ùqui nde. ¹⁹ Jẽ ngue

Dios cheẽ jemumbayãte ra. Mbia que jirandu jate jendese ra. Nyebe seyate riqui nguiã jendese co. Jẽingo bei nda equia mbae turã ndese chã. Mbia nda jembĩrĩĩrĩ eã jiri quia mbae icuã je chã. ²⁰ Dios quiarei aba mbi-asa. Namõ jiri ra ae Satanás ndiquisã mbei jẽsi cote. Sã Jesucristo riqui turã mbei jẽje.

²¹ Timoteo ucheẽ mondo quia salu-
dar i jẽje aque. Siqui beite equia serese Dios cheẽ nenei nenei co. Lucio abe ucheẽ mondo quia salu-
dar i jẽje aque. Jasón abe no. Sosipáter abe no. Se sí chõ ãquĩ nde.

²² Se abe secheẽ amondo quia salu-
dar i jẽje aque. Tercio rei se. Se chõ aico nguiã Pablo cheẽ mbesa mbesa jẽje co. Jesús icuasa ja chõ nande re.

²³ Gayo abe ucheẽ mondo quia salu-
dar i jẽje aque. A aico rã echuchua uque a. Jesús quiato chumunua nusa bei chõ a re. Gayo chuchua. Erasto abe ucheẽ mondo quia jẽje aque. Ae chõ tesorero sucha tubiriã jenda je. Cuarto nandequiato abe ucheẽ mondo quia jẽje aque. ²⁴ Sã Jesucristo riqui jendeaquiato turã mbei. Amén.

Pablo ñee hui bei sacua cote

²⁵ Nandechẽ turã mbei chõ nguia Dios rĩĩ. Ae ra jembirãcuã tuchi mingo ucheẽ turã je. Echeẽ turã ngue asenei senei nguia Jesucristo rĩĩ nda. Aque cheẽ turã ngue mbia icuayãte quia cose nyii ra. Dios que embuchecua eã mbei mbae ao ramo mosenda bei ra. ²⁶ Namõ ñõ Dios ucheẽ turã mbuchecua nguiã mbia je cote. Je-

sucristo rĩĩ. Dios cheẽ nenei neneisa que echeẽ mbuchecua nande je cote ra. Mbesa que nande je ra. Dios que ñee seje ra. —Secheẽ turã esenei senei mbei quia mbia jaje cote. Siqui sacua secheẽ ndese. Secheẽ mumbayã sacua, i que Dios seje cote ra.

²⁷ Dios mĩĩ nguiarei siqui bei. Dios mĩĩ ñõ mae ja nguiã mbae ja rese. Sã Jesucristo riqui mbia mbucheẽ turã mbeite Dios rĩĩ. Amén.

PRIMERA CARTA DEL APOSTOL SAN PABLO A LOS CORINTIOS

Pablo embesa Jesús quiato Corinto jenda je

¹ Pablo, i que seje ra. Dios que seirabo Jesucristo renei nenei sacuã nda. Aico ã mbesa jêje a. Nandere-senda Sóstenes ndese aico embesa jêje a. ² Aico ã mbesa jêje a. Jesús icuasa je. Corinto jenda je. Jê ndei Dios quiato jêingo Jesucristo rîi ãquî. Dios riqui jemingo icúe umbaerã ãquî. Sã Dios riqui mangue jenda chooñoa mingó icúe umbaerã no, eî si. Ñee mose Jesucristo je. Jesucristo rei ãquî abe rerecua no. Sã nandererecua nande no. ³ Sã Dios nanderu uturã mingó tuchi jendese. Sã Dios jembia bei mingó. Sã Jesucristo abe siqui jembia bei mingó.

Dios turãte riqui jêje co, i Pablo

⁴ Dios turã tuchi que eriqui jêje Jesucristo rîi nda. Nyebe aico nguiã gracias i tuchi Dios je jeni co. ⁵ Jesucristo quiato chõ jê cote re. Nyebe Dios riqui turã tuchi nguia jêje co cote. Jembaaquiato tuchi ucheẽ nenei nenei sacuã mbia je. Jembaaracua tuchi que ucheẽ nîi nda. ⁶ Ure Jesucristo renei nenei mose jêje que jêisi turãte ra. Jê Jesucristo jêicuate quia ãquî cote. ⁷ Nyebe Dios turã ndiqui nguiã hui ãte jêsi co. Jembirãcuã mbeite equia querabe co. ãquî jêingo Jesucristo raarõ arõ ãquî. ⁸ Dios ra jembirãcuã mbei mingó mbae ua ja chee. Mbia mo nda ñee icuã eã jêje Jesucristo tu mose. ⁹ Dios ra jendeaquiato bei. Ucheẽ nda embuchebiã mbei ñeende jêje. Ae quiatu ngue ñee nguiã jêje. — Taemingo bei seriirî ndese Jesucristo rese, i.

Jesús quiato nyao nyao chõchî nyesi

¹⁰ Seresenda, nandererecua ja chõ Jesucristo resẽ. Jenyao chao mose

nyesi, eicuãte ãquî. Hue rîi ja chõ jêingo ndua ndua. Mbae mîi ndese chõ jêingo. ¹¹ Mbia quiatu ngue ñee nguiã seje. — Eicuã icuãte que nyue ra, i que Cloé chuchua jenda ñee sembiirandu jeni nda. ¹² — Pablo mbae chõ se re, i chõchî jemo nguiã serîi ãquî. — Apolos mbae chõ se re, i chõchî jemo nguiã ãquî no. — Pedro mbae chõ se re, i chõchî jemo nguiã no. — Cristo mbae chõ se re, i jemo no. ¹³ ¿Cristo mbuchao chao ji ere no? ¿Pablo mano jendiquicharõ nde no? ¿Pablo rîi bautizar i jêje re no? ¹⁴ Se que bautizar ae eã jêje resẽ. Crispo mîi je que bautizar ae ra. Gayo je abe. ¹⁵ — Pablo rîi ño ngue bautizar i nguiã seje, i aroneate jemo ñee serîi. ¹⁶ Estéfanos chuchua jenda abe que bautizar ae ra. Aquere que bautizar ae ãte jemo je ra. ¹⁷ Bautizar i sacuã eã ngue Cristo semondo ra. Ucheẽ turã nenei nenei sacuã ño ngue semondo nguiã. Seaquiato asaã saã eã ño nguiã Dios cheẽ nenei nenei co. Cristo cheẽ ambiasa mingue turã ño nguiã co. Se seaquiato raã naa mose, i nda mbia ndua ndua eãte rei Cristo mano ndese.

Dios cheẽ quirãcuã tuchi Jesús rîi

¹⁸ Ae ra nyoî tata cuásuu, ãquî ndei “ichõiñosa” isa Dios cheẽ nenei neneisa rîi. — Cristo que mano mbia riquicharõ nda, i mose ee, “ichõiño ñene” i chõ nguiã. Nande quiatu que Dios nanderirõ nandeicuã si ra. Nyebe Dios cheẽ turã ndiqui nguiã uquirãcuã ndeacuquia nande je co. ¹⁹ ã ndei Dios cheẽ mbesa ji ã: Ae “seaquiato tuchi” i quia, ãquî aquiato ra ambuquiachã esi. Ae “searacua tuchi” i quia, ãquî aracua abe ra ambuquiachã esi no, i que Dios cheẽ mbesa ji ra. ²⁰ Ae uaquiato saã saã nguia, ibi jenda ja chõ ãquî nde. Ae ucheẽ aquiato saã saã nguia, ibi jenda ja chõ ãquî no nde. Eaquiataẽte ãquî, i chõ Dios nguiã ãquî je. ²¹ Mbia ae ra Dios icuayã mbei uaquiato ae je. Dios

cheẽ ae je quia nda mbia Dios icua nguiã emo Dios cheẽ nenei nenei mose ee. Ae Dios cheẽ isi nae, ãquĩ nda Dios sirõ eicuã si. Ichõiño nguiã, i raque mbia ataque Dios cheẽ nĩ. ²² —Mbia mae sayã ndese nda uremae na ña, i bei que judíos quia ra. —Urechimbaaquiatu tuchi rã, i bei que judíos eã nguia ñee nyue no nda. ²³ Nande quiatu Cristo nandesenei senei nguia ã. Ae mbia mbucha quia ira rese, aque chõ nandesenei senei nguia nande ã. ãquĩ si judíos ireĩte riqui ã. Cristo renei nenei mose, judíos eã ndua eã tuchi chõ nguiã erese ã. ²⁴ Nande quiatu nandebite riqui nguia Cristo renei nenei mose ã. Dios judíos mo irabo chõ nguiã. Judíos eã mo abe irabo chõ nguiã no. ãquĩ je chõ ngue Cristo Dios quirãcuã mee nguia. ãquĩ je chõ Cristo Dios aquiatu mee nguia. ²⁵ Dios aquiatuãte, i raque mbia mo ñee Jesús mano je rĩ. Dios quia equiatu tuchi jiri riqui nguia mbia si co. Dios quirãcuã neate, i raque emo ñee no. Dios quia equirãcuã tuchi jiri riqui nguia mbia si co.

²⁶ Dios que jẽirabo ja ra. Jẽaquiatu tuchi eã ndaque ee. Ererecua eã ndaque jẽ. Mbaecha eã ndaque jẽ. Dios ae chõ ngue jẽirabo nguia. ãquĩ ndese jendua jiri. ²⁷ Ae je mbia riqui “equiatuãte” i nae, ãquĩ ño ngue Dios irabo nguia. Ae ucuasu saã saã nguia nae, ãquĩ ireĩ ireĩ sacua esi. ²⁸ Ae mbia ataque ucuayãte quia nae, ãquĩ ño ngue Dios irabo nguia. Ae ucuasu saã saã nguia nae, ãquĩ mbutiã sacua. ²⁹ Nyebe nandeco nguia nandeaquiatu raã naa aroneate Dios je ã. Nande mĩ mo jiri jiriã. ³⁰ Dios quiatu que nandembucha Jesucristo rese ra. Ae quiatu que nandembiirandu Dios rese ra. Ae chõ ngue nandechiã mbuturã no nda. Ae chõ ngue nandemingo icúe Dios mbaerã no nda. Ae que mano nanderiquicharõ no nda. ³¹ Sã embesa ji riqui ñee ã no: Ae Dios saã nande je nae, ãquĩ nĩ

nandechẽ turã.
A e nandesaã nande ae nae, ãquĩ nĩ
nandechẽ turã eã,
i que embesa ji ra.

2

Jesucristo mĩ Pablo senei senei mbia je

¹ Seresenda, seso mose jendea que Dios cheẽ asenei senei turã jẽje huee resẽ. Seaquiatu asaã saã eã ño nguiã jẽje Dios cheẽ nenei nenei. ² —Jesucristo mĩ ño tasenei senei jẽje. Jesucristo mano nguia mbia icuã ndiquicharõ nae, ãquĩ mĩ ño tasenei senei jẽje, ae chõ ngue oso nguia ñee jẽje. ³ Seireĩte que seso mose ñee jẽje nyii ra. Semburirite que aque mose ra. ⁴ Seaquiatu que asaã saã eãte quia ra. Dios cheẽ ngue ambuchecua tuchi quia ñee ñee jẽje ra. Espĩritu Turã nguiatu que secheẽ mbirãcuã tuchi quia ñee ñee jẽje ra. Nyebe mbia ñee nguia. —Dios cheẽ ño eriqui re, i nguia secheẽ mose. ⁵ Dios quirãcuã ae jemingo nguia Jesucristo rese ãquĩ. Mbia mo aquiatu eã ño jemingo nguia Jesucristo rese ãquĩ.

Espĩritu Turã ndiqui mbae icua jate nande je co

⁶ Ae seaquiatute, ãquĩ ja chõ asenei senei mbei nguia Jesús quiato je co. Ae seaquiatute nae, ibi jenda rã eã ño seaquiatu riqui nguia co. Ae seaquiatu nae, ibi jenda rerecua rã eã ño seaquiatu riqui nguia co. ãquĩ aquiatu quia ra tiã jei. ⁷ Ae ureico ñee ñee nae, ãquĩ nguia mbia mbaaquiatu jiri nguia. Dios cheẽte quia ñene. —Secheẽ nda ambuchecua je nguia mbia je. Mbia mingo bei sacua, i que Dios nyii mbae ao nonde ra. Dios que esenei eã nyii ra. Namõ ño embuchecua nguia nande je cote. ⁸ Mbia rerecua que Dios aquiatu icua eãte ra. f nda eriirĩ mbucha eãte rei ira rese. ⁹ Sã embesa ji riqui ñee ã no: Dios ra mbae turã saã tuchi nande je. Uchsecua je.

Ae ra Dios saã nande je, ùquĩ ndese emo iranuate namo.

Emo mae àte erese namo, i que embesa ji ra. ¹⁰ Nande quia nandeico nguiã irandu erese ã. Espíritu Turã quiatu nandembi-irandu nguiã. Espíritu Turã nguia mbae icua jate nguiã co. Dios chiao abe icua jate equia co. ¹¹ Ae rese emo ndiqui ndua, mbia mo ùquĩ ndua ndua icuayãte. Ae rese nandeico ndua, nande ae nandeicua nguiã. Ae rese Dios riqui ndua, Espíritu Turã mii ño eicua nguiã. Dios sí chõ Espíritu Turã nde. ¹² Dios que espíritu mbuae mo monoã nande je ra. Espíritu Turã ño ngue emondo nguiã nande je. Ae Dios saã turã nguia nande je nae, ùquĩ ndese nandembiirandu sacua ño ngue Espíritu Turã mondo nguiã nande je. ¹³ Ae Dios saã turã nguia ure je nae, ùquĩ uresenei senei nguia ã. ã ndese chõ ngue Espíritu Turã urembaaquiato nguiã. Mbia cheeño eã ño ñene. Nyebe aico nguiã Dios chisaã nenei nenei Dios quiato je co.

¹⁴ Ae Jesucristo icua eãte, ùquĩ sí Espíritu Turã ñee icuayãte quia ã. Echeẽ mbaranguiatuãte riqui ee ã. Nyebe eriqui nguiã echeẽ isiãte. ¹⁵ Ae Jesucristo icuate nae, ùquĩ nguia mbae icua jate nguiã ã. Ae eturãte nae, ae eicuãte nae, ùquĩ icua ja equia ã. ¿Mañi Jesús quiato quia re? i chõ mbia nguiã Jesús quiato cheẽ icuayã ã. ¹⁶ Tarembaaquiato, i aroneate mbia mo Dios je. Dios quiato eã mo ndua eãte quia Dios rã si ã. Nande quia nandendua ndua nguiã Cristo ndua rã si ã. Dios resendate quia nandeico nguiã ã.

3

Mbae mii na ño ureico nguiã Dios cheẽ nenei nenei

¹ Jesús resenda jẽingo raque ùquĩ. Jẽingo tuchiãte quiato nguiã erese ùquĩ. Ae jembite riqui nae, ùquĩ mii ndese chõ jẽingochĩ nguiã ùquĩ. Ae Cristo bite nae, ùquĩ ndese jẽingoã

ñochĩ nguiã ùquĩ. Nyebe jaembaaquiato tuchi aroneate equia co. ² Mbia riirĩ na ño jẽingochĩ nguiã secheẽ andu mbirĩ mbirĩ cose. Querabe chõ jẽingo nguiã secheẽ andu sereã ùquĩ. Nyebe jaembaaquiato quiato tuchiã nguiã Jesús cheẽ ndese. Ae jembite riqui nae, ùquĩ ndese jẽingo mose ra Dios cheẽ jẽicuayã mbei. ³ Jẽicuã icuãte quia jẽingo nguiã jenyue ùquĩ. Jendua turã ja eãte equia ùquĩ. Jeñee turã turã eãte quiato nguiã jenyue ùquĩ. Nyebe acheẽ nguiã jẽje. —Ae Cristo bite nae, ùquĩ ndese jẽingoã ñochĩ nguiã ùquĩ, ae chõ ndei nguiã jẽje co. ⁴ —Se rei Pablo mbae, i chõchĩ jemo nguiã ñee ùquĩ. —Se rei Apolos mbae, i chõchĩ jemo no. Nyebe jẽingo eã nguiã Cristo bi rese ùquĩ.

⁵ ¿Aba chõ se chã? ¿Aba chõ Apolos no ña? Mbia rerecua eã ño ureico nguiã ã. Dios cheẽ nenei neneisa chõ ureico nguiã ã. Ure Dios cheẽ nenei nenei mose jẽje que Jesús jẽicua resẽ. ⁶ Mbae tiquia ji rã ño jẽ nde. Sã emo mbae eĩ tiquia no. Sã emo i icherẽ cherẽ erese no. Dios ae chõ embusuri nguiã. Anyae chõ ngue Dios cheẽ mingue nguiã jendese. Apolos chõ ngue jembaaquiato quiato nguiã cote. Dios quiarei ucheẽ mbusuri raanguia jeñiangui re. ⁷ Ae echitiquia nae, aque embusuri aroneate. Ae i icherẽ cherẽ erese nae, aque abe embusuri aroneate no. Dios ae embusuri nguiã. ⁸ Ae echitiquia quia, ae i icherẽ cherẽ nguia erese, eĩ si chõ ùquĩ nde. Dios ra mbae turã mee ee, ae esaã ùquĩ ndibishorõ. ⁹ Ure rei Dios cheẽ naa naasa. Sã chacocho no, eĩ si chõ Dios mbae jẽ nde. Sã tuchuacha no, eĩ si chõ Dios mbae jẽ nde.

¹⁰ Dios turã tuchi que seje ra. Seje quiato ngue ucheẽ mee nguiã. Mbia mbaaquiato quiato sacua. Tuchua ao aquiato rã ño se re. Tuchua i raanguia chõ asaã nguiã base cote. Aque arõ ño emo ndiqui nguiã tuchua ao hue no. Ae tuchua chao sechisaã arõ nae, sã eraã mingue turã. ¹¹ Tuchua

i raanguia chō Jesucristo riqui nguiã. Ae mii tuchi chō tuchia i raanguia re. ¹²⁻¹³ Ae arō tuchia mo nandesaã arondete. Sita je eraã mose, siqui turã mbei rae. Oro je eraã mose, siqui turã mbei ra eno. Plata je eraã mose, siqui turã mbei ra eno. Ūquĩ je eraã mose, oquei eã nda Dios tata mbu mose. Ira je eraã mose, oquei chō ndae. Quiata je eraã mose, oquei chō nda eno. Nandechisaã nda Dios tea ja. ¹⁴ Nandechisaã siqui i i mose, Dios ra mbae turã mee nande je. ¹⁵ Nandechisaã oquei mose, nandembae ra quiachã nandesi. Nande quia ra nandequiachãya ndaque. Nandecuasẽ ndaque ra ibate Dios je. Nandochi quiatu ra nandeico cote.

¹⁶ ¿Jētesarei chō ere? Dios chuchua chō nanderete riqui co resẽ. Dios riqui beite nandeye co. Espiritu Turã ndiqui beite nandeye co. ¹⁷ Emo Dios chuchua mbiicua mose, aque ra Dios mbutiã. Nande quia Dios chuchua re. Dios que uchuchua mii icúe umbaerã nda. Nanderete je sichō nandeico nguiã ñee co. Dios chō nandemingo nguiã icúe umbaerã co.

¹⁸ —Nandeaquiatute, jenyechĩ nguiã jeñiangui re ūquĩ. Ae eaquiatute ibi jenda achō ndese, sã ūquĩ uaquiatu raã naa eã. Siqui mingue mose ra Dios embaaquiatu turã cote. ¹⁹ Ae eaquiatute ibi jenda achō ndese, “eaquiatuã”, i chō Dios nguiã ūquĩ je co. Sã embesa ji riqui ñee no:

Dios ra ūquĩ aquiatu mbutiã ño cote. “Seaquiatu tuchite aico co”, i quiatuchĩ ngue nyii re, i que embesa ji ra. ²⁰ Sã embesa ji riqui ñee no:

Ae rese eaquiatu riqui ndua nae, ūquĩ Dios icua tuchite quia co.

Ndua ndua iru chō nguiã, i que embesa ji ra. ²¹ ¡Mbia aquiatu mo ndese ra jeñimbucha chooñochĩ jē! Dios quiatu que mbae mondo ja jēje ra. ²² Jembae chō se re. Apolos abe rei jembae no. Pedro abe rei jembae no. Mbae ibi jenda ja rei

jembae. Dios mbia mingo mose, jēje chō emingo. Dios mbia mingo eã mose, jēje chō emingo eã. Ae siqui quia namo, jembae ja chō ūquĩ nde. Ae ra siqui aquere, jembae ja chō ūquĩ no nde. Jembae ja chō ñene. ²³ Cristo mbae chō jē nde. Dios mbae chō Cristo no nde.

4

Ureaquiatu tuchi Jesús chimbaaquiatu si, jenyechĩ nda jē

¹ —Cristo rimba ja chō ūquĩ nde, jenye chō serĩ. Apolos rii abe no. — Ae ambuchecua eã mbia je nyii, ūquĩ jembuchecua checua mbia je serĩ cote, i que Dios ure je ra. ² Dios rimba mose nande, Dios cheẽ nandemumbayã mbei chō nguia. ³ —Serimba turã ño nde re, i ra Dios seje reae. Nducuã. Aicuayãte se. —¿I se jēje re? ae ãte se quia jēje co. Ae ãte se quia emo je co no. Dios mii ño seicua nguiã. ⁴ Dios rimba turãte aico reae. Dios ae chō seicua nguiã. ⁵ —Dios rimba turã ño aque re, jjenye jeichĩ nda emo nii jē! Jesucristo tu mose, ae quia ra mbae mbuchecua ja. Ae ra nandendua ndua mbuchecua ja. Aque mose quia ra Dios ñee. —Co rei serimba turã tuchi co, i ra Dios mbia mbiirandu aque mose cote.

⁶ Jembaaquiatu sacua ño aico nguiã ñee jēje co. Sechue si chō aico nguiã ñee. Apolos rii abe chō aico nguiã ñee. Dios rimba achō ño ure re. Ure mii mo ndui jēingo bei aroneate. Dios rimba ja rui chō jēingo. Eĩ jjenye mose ra embesa ji jemumbayã. ⁷ ¿Mbaerã nda jēcua su jēsaã saã nde? Ae jendeco jembaerã nae, Dios chimondo ja chō ūquĩ nde. Jēaquiatu mose, Dios ae jembaaquiatu nguiã. —Se ae que sembae asaã saã nda, jjenyechĩ nda jēcua su raã naa jē!

⁸ —Ureaquiatu tuchite cote, jenyechĩ ngue ñee nda. —Ureico Dios cheẽ icua jate co, jenyechĩ ngue ñee no nda. Ererecua tuchi jēsaã saãchĩ ureririrõ cote. Ererecua jēsaã ñooño na jē no. Se abe ra ererecua asaã saã

ndeí jē na ndeae. ⁹ Dios ucheē nenei neneisa quirirō jiri ure reae. Mbia tarō ji rā ño ureico uremano ndaarō arō ndeae. —¿Mañi ã nguia re? i tuchi mbia quia mae nguia uerese co. Angeles abe ñee nyee mae nguia uerese. ¹⁰ Ureico tuchi mose Cristo rese, “eaquiatuã”, jenyē chōchī equia ure je ũquĩ. “Ureaquiatute ure”, jenyē chōchī equia jē jēingo mose Cristo rese ũquĩ. Urequirācuã neāte ure, jē jēquirācuã mose. Mbia ureosei chiāte ure; jē nguia mbia jēoseite nguia. ¹¹ Mbae eã mbeite urembae namo abe. Urieriācuã ācuāte que eriqui emo mose ra. Ureiseite abe que eriqui ra. Ureirao eāte abe no. Mbia icuã icuã mbeite ure je. Urechuchua eāte abe no. ¹² Mbae uresaã saã tuchi quia ureo je co. Mbia icuã icuã mbeite riqui ure je co. Urecheē turā turā mbeite equia ure ee ã, ũquĩ ñee icuã icuã mose ure je. Urehecua chōte equia ñimbirācuã ee ã. ¹³ Urecheē mingue beite equia ũquĩ ñee icuã mose ure je ã. Mbae quia rā tuchi chō ureico nguia mbia je ure ã. Mbia ureririrō mbeite quia namo nyee ure ã.

¹⁴ Jēireĩ ireĩ sacua eã ño aico nguia ã mbesa jēje ã. Jemundua ndua sacua ño ñene. Seririĩte quia jē nde. ¹⁵ Jembaaquiatu quiatusa tubiriāte raque Cristo rĩ. Se mi tuchi chō jendu re. Se rane nguia tu ngue echeē turā asenei senei nguia jēje nyii. Se quiatu ngue Cristo aicua uquia nguia jēje. Nyebe aico nguia “seririĩ” i beite jēje co. ¹⁶ Nyebe jēingo se rā si. ¹⁷ Timoteo amondo quia jēje aque. Ae rei sechimbaaquiatu tuchi. Nyebe “seririĩ” ae tuchi nguia ee. Ae quiarei siqui turā tuchi Dios rese. Ae ra jemundua bei secheē ndese. Sechisaã ndese abe no. —Eĩ ngue Pablo quia Jesús quiato mbaaquiatu quiatu sucha mbuchesea sea mose ra, i ra Timoteo jēje seriĩ. ¹⁸ Jemo ndiqui uaquiatu raã naa tuchichĩ ũquĩ. —Pablo ra tu eã mbei ure-re, i chōchĩ jemo nguia seriĩ ũquĩ.

¹⁹ Aso jei ra jendea, Dios eno i mose seje. Ae uaquiatu saã saã tuchi quia jemo nae, ũquĩ tatea cote. Mañi nda equia mbae raã ndeae. Echeē achō achandu sereã. ²⁰ Dios rimba cheē achō aroneate. Siqui eã mose Dios quirācuã ndese. ²¹ Manyae rajēje seso mose jendea reae. Acheē asi asi ra jēje reae. Aico mingue chō nda jēje renoae. Jēhui mose jēicuã si, acheē asi asi eã nda seso mose jendea.

5

Ae siqui ngu ninisi rese, aque jemombo

¹ Mbae icuã tuchi rese que ureirandu jendese ra. Jemo nda siqui siqui ngu ninisi rese ra. ¿Mbaerã jēataque jētea chooño mbae icuã naa mose re? Ae Jesús quiato āte nae, ũquĩ ño siqui āte ngu ninisi rese. ¿Mbaerã Jesús quiato quiatu siqui ngu ninisi rese re? ² Jēturā jēsaã saã mbei chōchĩ nguia jē ũquĩ. Jēya eã eã ño jēingochĩ ũquĩ ndese ũquĩ. Jēireĩ ngūiã tuchi chōchĩ. Ae siqui ngu ninisi rese, ae jemombo eã ñochĩ jeñumunua nuasa si.

³ Ishote aico raque jēsi co. Andua beite sequia jendese co. —Ae siqui ngu ninisi rese, aque jemondo Satanás je, ae chō nguia sechiangui re co. Se siqui raanguia jendese. ⁴ Jeñumunua na Jesús quiato hue jenda. Se abe ra andua ndua jendese. Jesucristo quirācuã abe ra siqui tuchi jendese jeñumunua mose. ⁵ Ae siqui ngu ninisi rese nae, aque jemombo chō jēsi. Jesús quiato si. Jemee ño Satanás je. † nda Satanás erete mbasi. † nda eã siqui bei Jesucristo tu mose cote.

⁶ ¿Mbaerã jeingo jēturā naa naa mbae icuã ndea chooño nde? Levadura rā ño mbae icuã nde. “Levadura ñetē nda oso raque mbichae raã namo mose. Mbuchimatā ja rae”. ¿Ūquĩ jeñanuāte quia re? ⁷ Ae eicuāte nae, aque jemombo jēsi. † nda jē abe mbae icuã jēsaã eã. Dios que Jesucristo iquia nandeicuã ndibishorō nda. Sã

mbia riqui oveja iquia iquia hu#cuã ndibishorõ no. ⁸ Nyebe nandeico turã na Dios rese, mbae icuã naa naa ndocoĩ. Cochee nandeico. Nandeicuã nandesecha ja.

⁹ —Ae siqui emo ninisi rese, ùquĩ je ra jeñee ñeechĩ, ae que secheẽ mbesa mondo jẽje nyii. ¹⁰ Ae Jesús quiato ãte, ùquĩ nĩ eã ño ngue acheẽ nguiã jẽje. Nandechẽ eã aroneate Jesús quiatoã je nandeico mose ibii. Ae siqui quia emo ninisi rese nae, ae abei chiãte riqui nae, ae mbae mbuquiachã nguia nae, ae siqui Dios abareã ndese nae, ùquĩ je nandechẽ eã aroneate. ¹¹ Jesús quiato mo ùquĩ icuã naa mose, jemombo chõ jẽsi. Jeñee ñeechĩ nda ee. Emo ninisi rese siqui mose. Abei chiã mose. Dios abareã ndese siqui mose. Uchuru rerequia chooñoã mose. Quiacua mose. Mbae mbuquiachã mose. Jesús quiato ùquĩ naa naa mose, jẽhuĩ chõ esi. Jẽquiaru jiri jiriã tuchi ùquĩ ndese. ¹² Jesús quiatoã nandeteaquiato aroneate. Ae Jesús quiato, ùquĩ nguiatu nandeteaquiato. ¹³ Dios quia ra Jesús icuasa reã mbasi. Ae siqui ngu ninisi rese nae, “Jesús quiato se”, i rei quia nae, aque jemombo chõ jẽsi.

6

Jemo icuã icuã mose nyue, jẽ ae chõ jẽingo

¹ Jemo icuã icuã mose nyue, jẽsochĩ nguiã ñee Jesús quiatoã nderecua je. Jẽ ae chõ jemaere ere se ae. Jẽicua ae. Sã Dios quiato achõ ño ñee ùquĩ je. — ¡Eĩ jenyẽ jẽ! i ùquĩ je. ² Dios quiato quia ra “¡eĩ jenyẽ jẽ!” i ja Dios quiatoã je emo mose. Jẽ nguia ra “¡eĩ jenyẽ jẽ!” jenyẽ mbia ataque je emo mose. ¿Mbaerã jẽingo “¡eĩ je nye jẽ!” ise reã mbae ñetẽ naa mose re? ³ Angeles je abe chee ra “¡eĩ jenyẽ jẽ!” nande. ¿Ùquĩ ndese jẽiranuãte re? ã ibi jenda je “¡eĩ jenyẽ jẽ!” nande turã ja rã ae. ⁴ Jesús quiato chõ jẽ nde. Ibi jenda mo nĩ jemo icuã icuã mose nyue, jẽ ae

chõ jemaere ùquĩ ndese. Jẽsochĩ nguiã ñee Jesús quiatoã nderecua je. Dios quiato eãte quia ùquĩ nde. ⁵ Jesús quiato mo ñee icuã icuã mose nyue, ¿jemo jẽaquiatoãte ñee ee re? “¡Eĩ jenyẽ jẽ!” i ee re. Jẽ jẽireĩ ireĩ sacua ño aico nguiã ñee jẽje ùquĩ. ⁶ —¿Mañi ure ra re? i aroneate Jesús quiato ñee Jesús quiatoã nderecua je.

⁷ Jemo Jesús quiato mo icuã icuã mose nyue, echã turã tuchi ãte quia ñene. Jeñimbirãcuã ño mbae icuã naa mose jẽje. Jeñimbirãcuã ño jembae mbuquiachã mose no. ⁸ Jẽ abe mbae icuã jẽsaã saã ñochĩ, ñimbirãcuã ndocoĩ. Jẽ abe jendesenda mbae jembuquiachã ñochĩ Jesús quiato mbae, ñimbirãcuã ndocoĩ.

⁹⁻¹⁰ Mbia rerecuarã tuchi ra Dios cote. Aque mose ra mbia icuã siquiã tuchi Dios rese. Ae siqui emo ninisi rese nae. Ae siqui ngũinisiã ndese nae. Ae ndua chooño nguia Dios abareã ndese nae. Ae siqui quia nyiese ngũinisi raã naa nguesenda je nae. Ae mbae mbuquiachã quiachã nguia nae. Ae abei chiãte riqui nae. Ae quiacua quiacua quia nae. Ae ucheẽ mondo chooño mbeite quia mbia je nae. Ùquĩ nda siquiã tuchi Dios rese. —Eicuã abe ra siqui bei Dios rese, ¡jenyechĩ nda ñimbiĩrĩ irĩ jẽ! ¹¹ Eĩ ngue jemo icuã cose ra. Dios ae jembitirõ nguiã cote. Dios chõ jemĩ nguiã icúe umbaerã cote. Espiritu Turã ngue jẽisi turã Jesucristo rĩ cote ra.

Espiritu Turã nyuchua chõ jendete re

¹² —Co rese ra ereicochĩ, i ãte raque Dios quia seje mbae mo nĩ. Dios biãte nande mbae raã ja chooño mose. Mbae mo sembũcuã serĩ mose, asaã eã mbei ra se. ¹³ Nandechiurã ndei nanderie ye sacua. Nanderie rei nandechiu rirurã. Ùquĩ ja ra Dios mbutiã emo mose cote. Dios mbaerã ño nanderete re. Siqui chooño sacua eã ño emo ninisi rese chõ nanderete re. Nanderete rerecua chõ Dios re. ¹⁴ Dios quirãcuã ño ngue Jesucristo raaque mbuquera

nguiã. Eĩ ño nda Dios quirãcuã nanderaaque mbuquera nguiã nande abe no. ¹⁵ ¿Jëiranuãte quia jendete rese re? Cristo nanderete mbucha quia uchiese co. Cristo rete chõ nandeico nguiã co cote. Cristo rete nandembucha aroneate cuña icuã ndete mo ndese. ¹⁶ Emo siqui mose cuña icuã mo ndese, erete ucha chõ nguiã nyiese aque. Erete nyeremo eã ño cote re. Uquĩ ndete ja ra co mii cote, i que Dios cose ra. ¹⁷ Emo siqui mose Cristo rese, nguete mbucha chõ nguiã erese uquĩ cote. Erete mii na ño uquĩ cote re. ¹⁸ ¡Jenisiã ndese ra jëingochĩ jẽ! Mbae icuã mo naa mose, uquĩ nda nanderete mbicuãya jiri. Siqui mose ngüinisiã ndese, uquĩ nguia ra nanderete mbicuã tuchi cote. ¹⁹ Espiritu Turã siqui chee jëñiangui re uquĩ. Espiritu Turã nyuchua chõ jendete re. Dios mbae chõ jẽ nde. Jembae ae eã ño jendete re. ²⁰ Eicuã nimba rei ngue jẽ nyii re. Dios quiatu ngue jëisi nguiã cote. Nguiirĩ ngue emondo jendibishorõ nda. Nyebe jëingo jendete mee Dios je. Jëaĩ abe jemee ee noae.

7

Pablo mbia mbaaquiato emo ngüinisi rerequia rĩ

¹ Jënee ngue jembesa mondo seje nyii nae, uquĩ tasibishorõ jëje cote. Coche emo siquiã nguiã cuña mo ndese. ² Coche mbia ngüinisi ae rerequia nguiã. Coche cuña ngu mii nderequia nguiã no. Emo ndese siqui choño eã sacua ño uquĩ nde. ³ Sã eru riqui turã ngüinisi rese. Sã eninisi abe riqui turã ngu rese. Nyao aroneate nyesi. ⁴ Eninisi rete chõ eru mbae cote re. Eru rete chõ eninisi mbae cote no nde. ⁵ Nya i aroneate eru ngüinisi je nguete rese ngueteã. Nya i aroneate eninisi nguete rese ngueteã ngu je no. —Nandechẽ mbei Dios je namo, siqui rocoĩ nyiese, i mose nyue, eturãte uquĩ. Sã eriquibe nyiese aquere cote. Ñee ñeende Dios je cote. Siquibe eã mose nyiese, ñimbirãcuã

eã arõ ndete. Satanás embicuã arõte cote. ⁶ —Jenirisirã jendeco, ae ãte quia jëje co. —Jenisisibi mose, jendeco ae, ae chõ nguiã jëje co. ⁷ —Sã Jesús quiato ja ninisiã ndiqui se rã si, ae rei que se ra. Dios cheẽ eã ño uquĩ nde. Nandechisaã ae aerã ño Dios mondo nguiã nande je. Emo ninisiã siqui turã arondete. Emo ae ngüinisi quereco sete nguiã no.

⁸ Ae eninisiãte nae, uquĩ je tacheẽ. Eru cheecha je abe tacheẽ no. Coche jëingo nguiã jendu eã. Coche jeninisiã ndiqui nguiã no. Se rã si. ⁹ Jëñimbirãcuãya mose jendete je, jenirisirã mo jëtea ae. Jendurã mo jendeco noae. Mbia mo oseĩ oseĩ rocoĩ.

¹⁰ Ae ngu quereco nae, sã uquĩ ngu rechayã mbei. Jesús cheẽ tuchi chõ uquĩ nde. Secheẽ ae eã ño uquĩ nde. ¹¹ Cuña mo ngu recha mose, sã eriquiã mbei emo ndese. Sã ae ae chõ ndiqui bei, ñimbuca si eã mose ngu rese. Sã eru abe ngüinisi rechayã mbei.

¹² Se ae tacheẽ cote. Jesús cheẽ eã ño ã cote re. Jesús quiato mose emo, sã eriqui bei ngüinisi rese. Jesús quiatoã ndaque eninisi. Eninisi siquise mose ngu rese, sã eru siquichõ erese. ¹³ Jesús quiato mose cuña mo, sã eriqui bei ngu rese no. Jesús quiatoã ndaque eru. Eru siquise mose ngüinisi rese, sã eninisi siquichõ erese no. ¹⁴ Jesús quiato mose eru, eru ngüinisi mbucha arõte quia Jesús rese co. Jesús quiato mose eninisi, eninisi ngu mbucha arõte quia Jesús rese co no. Eĩ nda eriirĩ abe Jesús icuayãte rei, uquĩ ande. ¹⁵ Jesús quiato mo ninisi siquiã mose Jesús rese, “seru tasecha” i bei mose, sã eru eriquisã quisã eã. Cuña mo Jesús quiato mo ndu siquiã mose Jesús rese, “seninisi tasecha” i bei mose, sã eninisi ngu riquisã quisã eã no. Uquĩ naa mose, Jesús quiato mbae icuã saã eãte. —Sã seriirĩ ndiqui turã nyue, i quiatu que Dios nande je ra. ¹⁶ Ae Jesús quiato nae, uquĩ ngüinisi mingo arõte Jesús rese. Ae Jesús quiato cuña

nae, ũquĩ ngu mingo arõte Jesús rese no.

¹⁷ —Eĩ jenye chõ nguia jẽ ae ae, i que Dios nandechiaorã mee mee nande je ra. Ũquĩ ndese nandeico bei quiatu nande ae ae. Dios que ñee nande je nyii, aque mosenda rã si bei chõ nandeico. Ũquĩ ño asenei senei nguiã Jesús quiato ishonda jaje abe. ¹⁸ —Echu serui, i mose Dios judío mo je, sã judío bei chõ ae riqui. —Echu serui, i mose Dios judío eã mo je, sã ae riqui judío raã naa eã. ¹⁹ Sebite judíos achõ, iã nda Dios. Sebite judíos eã achõ, iã nda Dios no. Ae Dios cheẽ mumbayãte quia nae, ũquĩ nguia Dios bite re. ²⁰ Eĩ nande que equia Dios ñee namo mose nande je nyii, aque mosenda rã mbei chõ nandeico. ²¹ Mbia rimba mose nde, Dios “eico serui” i mose ndeje, eico chõ erui. Mbia mo nimba raque nde. Erechãchĩ nda ndererecua si. Ndererecua huise mose ndesi, nde ae eico cote ae. ²² —Eico serui, i mose Dios mbia rimba mo je, Dios embui chõ nguiã eicuã si cote. —Eico serui, i mose Dios emo ae siqui mose, Cristo rimba chõ aque cote re. ²³ Jesucristo que mano jẽje ra. Nyebe Jesucristo rimba ae chõ jẽingo nguiã ũquĩ cote. Mbia rimba ae eã ño jẽingo nguiã ũquĩ cote. ²⁴ Dios que ñee nande je nyii, aque mosenda raanguia bei chõ nandeico Dios rese.

²⁵ Nyucuaaque rĩ tacheẽ ndaque jẽje cote. Dios que ñee ãte seje ũquĩ ñi nda. Se ae chõ tacheẽ jẽje. Airandu que Dios ia eã mose serese ra. Nyebe aico nguiã ñee ñooño eã tuchi jẽje co. ²⁶ Sã mbia ngũinisirã mo ndea eã namo. Sã nyucuaaque ae riquichõ ngurã mo ndea rocoĩ. Mbia icuãte quiatu eriqui nguiã Jesús quiato je ã cote. ²⁷ Neninisi mose, eico bei chõ erese erechayã mbei. Neninisiã mose, nde ae eico bei. ²⁸ Neninisirã ndea mose, eicuã eã ño ũquĩ no nde. Nyucuaaque ngurã mo ndea mose, eicuã eã ño ũquĩ no nde. Mbae icuã nda eĩ eĩ ee ngurã ndea mose cote reae. Nyebe aico nguiã ñee jẽje. —

Jẽ ae jẽingo jeninisiã, i jẽje. ²⁹ Tacheẽ tuchi rã jẽje, Seresenda. Mbae ra ua jei ja nande je cote. Ae ngũinisi quereco quia, sã ũquĩ ndiqui ngũinisi rerequia eã naanguia. ³⁰ Ae eya eãte riqui, sã ũquĩ ia tuchi raanguia riqui no. Ae eyate riqui, sã ũquĩ ia eãte raanguia riqui no. Ae mbae isi quia, sã ũquĩ ndiqui mbae isiã naanguia no. ³¹ ã nandeico rei nguiã íbii ã. jibi jenda rese ra nandendua tuchichĩ jẽ! jã ibi jenda ja ra ua ja chõ jẽ!

³² —Jeninisiã ño jẽingo, ae que se ra. Jendua ndua eã jiri nda ibi jenda rese chã. Ae eninisiã, ũquĩ ndua ndua bei arõte Dios mi ndese. Ae Dios bite, ũquĩ esaã saã mbei arõte. ³³ Ae eninisi nae, ũquĩ ndua ndua bei arondete ibi jenda achõ ndese. Ae eninisi bite nae, ũquĩ esaã saã mbei arondete. ³⁴ Eĩ si chõ cuña no nde. Eru eã mose, ndua ndua arondete Dios achõ ndese. Ae Dios bite, ũquĩ nda esaã saã mbei ee. Siqui tuchi ra Dios rese. Ae ngu quereco nae, ũquĩ ndua ndua bei arondete ibi jenda achõ ndese. Ae eru bite nae, ũquĩ esaã saã mbei arõte. Siqui rocoĩ Dios rese. ³⁵ Jaendiquisã quisã eãte raque se jeninisirã mo ndea mose. Jemu-ndua sacua Dios rese chõ aico nguiã ñee jẽje co. Jendua eã sacua mbae mo ndese chõ ñene. Jeninisi mose jendua bei aroneate Dios rese.

³⁶ —Serĩrĩ ndu bite chĩ cote. Etiarõte chĩ cote, i mose amei mo, sã eriĩrĩ ngurã mo nderequia. Eicuã eã ño nguiĩrĩ ndurã mee ee re. ³⁷ —Sã seriĩrĩ ndu eã ae riqui. Erurã nda amee eã ee, i tuchi mose amei mo, eturãte ũquĩ abe. ³⁸ Ae nguiĩrĩ ndurã mo mee ee, eturã ño ũquĩ nde. Ae nguiĩrĩ ndurã mo mee eã ee, eturã tuchi chõ ũquĩ cote re.

³⁹ Eru mbae bei chõ eninisi re. Nyao aroneate nyesi. Eru mano mose, ngurã mo nderequia arõte Dios quiato mo cote. ⁴⁰ Eru mano mose, siqui turã arondete ngurã mo ndea eã mose cote. Eya tuchi ra siqui ngu eã mose reae. Se chõ acheẽ nguia ũquĩ

ndae. Espíritu Turã abe sembucheẽ nguia reae.

8

Ae soo mbia mondo rei dios abareã je nae

¹ —Mbia soo mondo mundo quia dios abareã je nae, ¿ũquí soo ra nandeu re? jenyete que seje. Ũquí tasenei jẽje cote. —Seaquiatute se, nande ja jate raque quia ã. Emo eaquiatu tuchi mose, ucuasu raã naa arondete. Emo nyesequa mose mbia rese, Dios abe rese ra nyesequa bei. ² Seaquiatute se, i mose emo, eaquiatuã ño ũquí nde. ³ Emo nyesequa mose Dios rese, Dios ũquí icua chõ nguia ũquí.

⁴ Mbia soo mundo mundo quia dios abareã je, ¿ũquí nda nandeu re? ¿Nandeu eã tuchi chõ nda re? Dios eã tuchi chõ dios abareã nde. Co mii tuchi chõ Dios re. ⁵ Dios abareã nguia etubiriãte re. Ibi jenda. Ibei riinda abe no. Dios raanguia tubiriãte raque no. ⁶ Dios quia co mii tuchi nande je re. Ae quiarei nanderu tuchi. Ae mii ngue mbae chao ja tuchi ra. Ae mii ngue nandeaõ umbaerã nda. Nandererecua mii tuchi chõ siqui nguia co no. Jesucristo, i equia ee. Ae que mbae chao ja tuchi Dios rese ra. Ae mii ño nandemingo nguia ã.

⁷ Dios quiato mo iranuate quia ũquí ndese ã. Siquiche beite quiatu nguia dios abareã si ũquí. Ae soo mbia mundo dios abareã je, ũquí mbaeiaie riqui reĩ nguia ee. —i ũquí soo jẽu eã jẽ! i reĩ Dios nguia ee. ⁸ Ae nandeu quia nae, ũquí nda nandembuturã eã Dios je. Nandechiu mo nda nandembuturã eã mingo. Nandechiurã nandehi teã teã mose, ũquí nda nandembicuã eã no. ⁹ —i ũquí soo ra jẽuchĩ jẽ! iãte raque Dios nande je. Mbaeiaie eãte raque ũquí soo. Mbaeiaie nda eriqui reĩ Jesús quiato namonda je raẽ. Jẽ eu mose, ũquí abe ra eu chee. —Mbaeiaie au chõchĩ, i ra ñimbicuã tuchi cote. ¹⁰ Jẽquiaru mose dios abareã chuchua, Jesús quiato namonda ra mae jendese. Ũquí abe

ra soo u chee, ae mbia mondo Dios abareã je. Maende jendese. Eicuã ndaque eriqui reĩ nguia ee. ¹¹ Jẽ ndaque jẽirandu ũquí soo rese. Eicuã eã ndaque eu mose. Jẽu eã ndei. Jẽ eu mose, Jesús quiato namonda abe ra eu chee. Siquichete raque esi. Eĩ jenyete chõchĩ ũquí mbiicha arõte Dios si. Ũquí nii abe chõ ngue Jesucristo mano nguia. ¹² Soo mbaeiaie riqui reĩ mose ee, jẽu eã uquia ee ae. Jẽ eu quia mose Cristo quiato namonda je, eicuãte ũquí Cristo je. ¹³ Jesús quiato mo ambicuã sereã tuchi chõ nguia se. Se soo u mose, ũquí Jesús quiato mo mbicuã mose, soo ra auã mbei cote.

9

Mbae mo jembu seje Dios cheẽ nenei nenei ndibishorõ, i ãte Pablo

¹ Jesús cheẽ nenei neneisa tuchi chõ se re. Sererecua mo eãte ibi jenda mo. Amae tuchi que Jesucristo rese se ra. Secheẽ nguire chõ jẽingo nguia Jesucristo icua ũquí cote. ² Jesucristo cheẽ nenei neneisa eã ño co re, i arõte raque emo seje. Jẽ quiatu jeñee aroneate nguia ũquí seje. Ũquí jẽingo seicua tuchite ũquí. Secheẽ nguire quiatu que Jesús jẽicua cote resẽ.

³ Eĩ ae chõ nguia ñee mbia ñee icuã mose seje. ⁴ Se abe Jesús quiato sembuquiaru quiaru arondete raque. ⁵ Seninisirã Jesús quiato mo arao arondete raque mananguiti. Secuata cuata mose mbia mbiirandu randu Jesús rii. Sã Pedro riqui ngũinisi rerao rao no. Jesús nongue abe no. Sã Jesús cheẽ nenei neneisa ja ngũinisi rerao rao no. ⁶ ¿Se mii ño nda Jesús quiato sembuquiaru aroneate reĩ jẽje re? Bernabé abe rese. Ure Jesús cheẽ nenei nenei mose. ⁷ Sã soldado siqui chooño eã comandante mbae mee eã mose ee. Sã emo ndiqui mbae tiquia chooñoa no. —Sechitiquia nda au chã, i chõ nguia. Sã emo ndiqui ticuasuarã ñooñoa no. —Equiandi nda ambei chã, i chõ nguia.

⁸ Secheẽ ae eã ño ãquĩ nde. Embesa ji chõ asenei nguiã jẽje. ⁹ Co rei Moisés chimbese co:

Jẽ ticuasú mbuquieĩ quieĩ mose, echuru jemumbi eã.

Sã ae ae si quia mbae cua, i que embesa ji ra. Ticuasú achõ je eã ngue Dios ñee nguiã. ¹⁰ Nande abe je chõ ngue ñee nguiã. —Sã Jesús quiato abe riqui mbae mee mee echeẽ nenei neneisa je, i chõ ñene. Ae mbae chitiquia quia nae, “sechitiquia tau”, i chõ nguiã etiquia. Ae mbae a chiqui chiqui quia nae, “sechiqui tau”, i chõ nguiã eiqui iqui.

¹¹ Dios cheẽ ngue uremingue mingue tuchi quia jendese resẽ. ¿Jẽ urembuquiaru quiaru aroneate quia cote re? ¿Ureiraorã jemee aroneate quia ure je cote re? ¹² Mbae mo jemee mee nguia Jesús cheẽ nenei neneisa mo je ãquĩ. ¿Mbaerã jẽingo emee eã ure abe je quiatu re? —iMbae mo nandeisi teã eo si jẽ! ure que equia oso mose jendea ra. Dios si jembucha eã sacua ño ngue mbae mo ureisi teã nguiã jẽsi. ¹³ Sã Dios ñee sacerdotes je cose no. —Ae siqui quia sechuchua sacrificio raã naa nae, sã ãquĩ ndiqui ofrenda u u beĩ ae, i que Dios ñee cose ra. ¹⁴ Eĩ si chõ ngue Jesús ñee nguiã ucheẽ nenei neneisa je. —Ae secheẽ turã senei senei nguia nae, sã sequiato ataque riqui mbae mee mee mbeĩ ãquĩ je, i que Jesús ra.

¹⁵ Dios cheẽ nenei neneisa tuchi raque se. Mbae mo ngue aisi chõ ãte jẽsi ra. Se ae chõ mbae achao chao nguiã sembaerã co. —Mbae mo jemee seje, ae ãte chõ nguiã co mbesa mbesa jẽje co. Tamano ae, “mbae embu seje”, i rocõĩ jẽje. ¹⁶ Dios cheẽ nenei neneisa tuchi chõ se re. ãquĩ ñi seturã asaã saã aroneate. —Secheẽ esenei senei mbia je, i quiatu Dios nguiã seje. Se erenei nenei eã mose mbia je, Dios ra paama i seje. ¹⁷ Se ae que andua eã nda. —Dios cheẽ tasenei senei, aeã ngue se ae ra. Dios chõ ngue ñee nguiã seje. —Secheẽ esenei senei mbia je, i nguiã seje. Se ae andua mose, eĩ nda Dios

mbae mo mee ndei seje ucheẽ nenei nenei ndibishorõ. Dios rimbate quia se re. ¹⁸ ¿Mbae chõ sebite riqui chã? Mbae mo isiã Dios cheẽ nenei nenei ndibishorõ, ãquĩ ño sebi re. —Mbae mo embu seje Dios cheẽ nenei nenei ndibishorõ, ae ãte quia co. ãquĩ nguia sebi re.

¹⁹ Mbia mo nimba eã ndaque se. Mbia rimba asaã saã ño nguiã Dios cheẽ nenei nenei mbia je co. Mbia Jesucristo icua sacua. ²⁰ Seico mose judíos ite re, judío asaã saã ño nguiã. Judíos Jesucristo icua sacua. Ae siqui tuchi quia Moisés chimbese rui nae, ãquĩ ite re seico mose, Moisés chimbese asaã saã ño nguiã se abe. ãquĩ Jesucristo icua sacua. —Moisés chimbese rui eico, i ãte raque Dios seje. ²¹ Ae siquiã nguia Moisés chimbese cheẽ ndui nae, ãquĩ ite re seico mose, se abe Moisés chimbese asaã saã eã ño nguiã cote. ãquĩ Jesucristo icua sacua. Cristo mi ñee ño amumba mumbayã nguiã co. ²² Jesús quiato quirãcuã nea ite re seico mose, ãquĩ asaã saã ño nguiã se abe, sequirãcuã nea naa naa. ãquĩ Jesucristo icua sacua. Ae ite re aico oso oso beite nae, ãquĩ na ño aico nguiã se abe. ãquĩ Jesucristo icua sacua. ²³ ãquĩ ja chõ asaã saã nguiã Dios cheẽ turã ñi co. Nandeico turã ja sacua Jesús rese.

²⁴ Sã mbia carrera raã naa no. Mbia ja chõ uchã ndaque. Co mi ño nda premio isi. Aque rã tuchi chõ jẽingo Jesús rese. Premio isi sacua naanguia. ²⁵ Ae ra carrera saã saã nae, ãquĩ mbae icua secha ja chõ nguiã ãquĩ. Premio isi sacua ño eriqui nguiã mbae icua naa eã. Premio nda ua jei raque. Ae Jesús mee arõte quia nande je premio nae, ãquĩ nguia ra ua eã mbeĩ nandesi. ²⁶ Se aico choõñoa nguia Jesús rese co. Jesús rese aico turã tuchi chõ nguiã se co. ²⁷ Mbae asaã saã ño nguiã serete mbirãcuã co. Serete secheẽ mumbayã sacua. Se premio ganar i sacua ño aico nguiã eraã naa co. Premio isiã sebiãte, se

Dios cheẽ nenei nenei tuchi. Nyebe aico nguiã siqui tuchi Jesús rese co.

10

Dios raanguia rese ra jẽingochĩ jẽ

¹ ¡Jẽtesareichĩ nda nandei ñiinda si jẽ! ¡Moisés mosenda si jẽ! ¡Ûquĩ ngue siqui ja rei ibeishĩ ndui ra jẽ! ¡Ûquĩ ngue nyoĩ ja rei Ama Ireĩ ndasa Dios ñee mose ee ra jẽ! ² —Moisés rese nandeico bei, i ja rei que mbia siqui ja mose ibeishĩ ndui ra. —Moisés rese nandeico bei, i ja rei que mbia Ama Ireĩ ndasa mose ra. ³ Ae Dios mee ndei ee echĩurã nae, ùquĩ ngue mbia ja u u rei ra. ⁴ Ae Dios mee ndei ee embei sacua nae, ùquĩ ngue mbia ja mbei mbei rei ra. I que tuutu quia sita si nae, ùquĩ ngue mbia ja mbei mbei rei ra. Aque sita rei Cristo rã. Cristo que siqui tuchi quia ùquĩ mbia rese ra. ⁵ Ûquĩ ataque rese que Dios ia eã tuchi riqui ra. Siqui turã eã tuchi que equia Dios rui ra. Nyebe Dios eataque iquia iquia nguiã turúquiaa.

⁶ Nandemundua sacua ño ùquĩ nde. Mbae icuã oseĩ oseĩ eã sacua nande chõ ùquĩ nde. Sã ùquĩ mbae icuã oseĩ oseĩ no. ⁷ Jẽingochĩ nda dios abareã ndese. Sã ùquĩ ndiqui dios abareã ndese no. Sã embesa ji riqui ñee no: “Mbia que quiaru quiaru ra. Mbae abe que embei mbei ra. Aquere que nyuruqui ruqui ticuas raanguia je ra”, i que embesa ji ra. Jẽ nguia jẽingo eã dios abareã ndese. ⁸ Ûquĩ nandei que siqui siqui ngũinisiã ndese no nda. Nyebe Dios eiquia iquia tuchi nguiã. Veintitrés mil que mano aque nyaashĩ mose ra. ¡Mbae icuã nda nandesaã saãchĩ ùquĩ na jẽ! ⁹ —Ma Cristo roseĩte, nandechĩ nda mbae icuã naa jẽ. Sã nandei riqui “ma Dios roseĩte” i nyii no. Sã ñi ngue eriqui mbae icuã naa mbei cose no. Sã mbei tásie riqui eiquia iquia no. ¡Ûquĩ nandesaã saã eã tuchi chõ nguia nande jẽ! ¹⁰ ¡Jeñee icuã icuãchĩ nda Dios rĩ jẽ! Sã ùquĩ nandei ñee icuã icuã nguia Dios rĩ no. Nyebe

ángel nandei ñiinda iquia iquia tuchi nguiã. ¹¹ Eĩ si tuchi que nandei ñiinda quia nyii ra. Dios que embesa mĩ nandetesareĩ eã sacua nda. Mbae ua ja serĩ mose chõ Dios riqui nguiã nandembesareĩ eã co. ¹² —Sequirãcuã tuchi chõ se re, i mose emo, ¡sã aque riqui nyĩcua tuchi quiatu jẽ! Mbae icuã jeĩ nonde ee. ¹³ —¡Mbae icuã esaã jẽ! i mose diablo jẽje, eĩ si chõ nguiã ñee mbia ataque je. Jẽ mĩ je eã. Dios quia ra ucheẽ mbuchebiã mbei. Jendeaquiato bei ra diablo ñee mose jẽje. Jembirãcuã ndae. Jẽ “nya” i sacua mbae icuã je.

¹⁴ Seresenda, ¡dios raanguia rese ra jẽingochĩ jẽ! ¹⁵ Jẽaracuate rei jẽ ndesẽ. Secheẽ ndese jemaie quiatu. ¿Acheẽ ñooño se re? Acheẽ ñooño eã se reae. Jẽtea quiatu. ¹⁶ Nande Santa Cena naa naa mose, Cristo ruqui mbei raanguia chõ nandeico nguiã uva rique mbei mbei. —Cristo ruqui nandembitirõ ja bei quia ã, i chõ nguiã uva rique mbei mbei. Mbichae nandesiquio quio quia eu nonde nae, Cristo roo rã ño ùquĩ nde. —Cristo roo nandembitirõ ja bei quia ã, i chõ nguiã mbichae u u. ¹⁷ Nandetubirĩãte raque Jesús quiato. Nande ja chõ aque mbichae mĩ nandeu ja nguiã. Mbae mĩ na nguiatu nandeico nguiã nande ja ã. ¹⁸ Judíos rese chõ jendua. Ûquĩ sacrificio raã naa mose, sacrificio eu chõ nguiã ã. —Dios re-sete quia nandeico nguiã ã, i equia ã. ¹⁹ —Dios abareã mbae mo saã arondete, ae ãte raque quia co. Ae soo mbia mondo mondo quia dios abareã je, soo chõ ndaque ùquĩ. ²⁰ Mbia soo mondo mondo mose dios abareã je, Dios tuchi je eã ño eriqui nguiã emee mee. Aba checuayã icuã je chõ eriqui nguiã emee mee. ¡Aba checuayã icuã ndese ra jẽingo jiri jirichĩ jẽ! ²¹ Jẽ mbae mbei mose aba checuayã ndese, Jesús ruqui mbei raanguia jesaã aronea ño nguiã cote. Jẽquiaru quiaru mose aba checuayã nyuchua, Santa Cena jesaã aronea ño nguiã cote. ²² ¿Mbaerã jẽingo Jesu-

cristo mbupaama ite re? ¿Jẽquirãcuã tuchi chõ eriqui esi jẽ nde?

Jesús quiato ataque rese quia jẽingo ndua

²³ —Ae soo mbia mee mee nguia dios abareã je nae, ùquĩ ndese ra jẽocochĩ, i ãte raque Dios nande je. Dios biãte nande mbae raã ja chooño mose. Ûquĩ nĩi Dios ñee ãte raque nande je. Nande ae chõ nandeicua. Mbae mo Jesús quiato mo mundua icuã mose, ùquĩ si nandehui chõ. ²⁴ —Nande ae nandeico Dios rese, jenyechĩ nda jẽ. —Mbia ja quiatu nandemingo erese, jenye quiatu. ²⁵ Soo jẽisichõ ño nguia mbae vender ísaa. —¿Dios abareã je co soo jemondo nyii re? jjenye chĩ nda ñee ee jẽ! Jẽiranua mose, mbaeiaie eã ño soo jẽje cote re. Jẽisichõ ño nguia jẽiranua. ²⁶ Jesucristo mbae chõ ibi re. Mbae ibi jenda ja abe rei embae no. Ae Jesucristo chao ja nae, ùquĩ ndei nandechiurã ja. ²⁷ —Nyao rã quiaru serese, i mose emo jẽje, jẽso chõ quiaru erese jẽsose mose. Ae ra echara mondo jẽje, jẽuchõ ño. —¿Co mbia mondo dios abareã je nyii re? jenyechĩ nda ee. Jẽiranua mose, mbaeiaie eã ño jẽje cote re. Jẽiranua ño jẽquiaru. ²⁸ —Co soo que mbia mondo dios abareã je ra, i mose emo jẽje, jẽu eã ño cote. Ae ñee jẽje nae, aque mbĩcuã eã sacua ño jẽu eã. Aque soo jẽu eã cote, jẽirandu mose erese. Jẽ eu mose, Jesús quiato ra ndua icuã icuã cote. ²⁹ Jendua icuã eã ndaque jẽ. Emo nguia ndua icuã arõte nguia cote, jirandu mose jẽ eu rese. —¿Mbaerã nda aque soo au eã sebi mose re? i arõte jemo seje. —¿Mbaerã nda emo ñee amumbayã nde? i arõte jemo seje. ³⁰ —Se “gracias” i mose Dios je aque soo u nonde, eicuã eã ño cote reae. ¿Mbaerã nda emo ñee icuã seje re? i arõte jemo seje. —¿Mbaerã nda au eã eicuã eã mose re? i arõte jemo seje.

³¹ ã ndese chõ jendua. Ae nandesaã saã nguia nae, Dios je chõ nandesaã. Ae nandeu ndeu quia mbae

nae, Dios je chõ nandeu. Ae nandembei mbei quia mbae nae, Dios je chõ nandembei no. Mbia ra ñee turã Dios je, nandeico turã mose. ³² iMbia ra jemundua ata atate chĩ jẽ! —ã icuã ereae, i mose emo jẽje, jũquĩ nda jẽsaãchĩ jẽ! Jẽ eraã mose, ùquĩ nda ndua icuã Jesús rese cote. Judíos. Judíos eã abe. Jesús quiato abe. Ûquĩ ndua icuã arõ Dios rese, jẽ eraã mose. ³³ —Se ae taico Dios rese, ae ãte quia co. —Mbia ja quiatu tamingo erese, ae quia co. Dios mbia rirõ sacua eicuã si. Mbia siqui bei sacua Dios rese.

11

¹ Se rã si chõ jẽingo. Sã aico Cristo rã si se no.

Eĩ jenye chõ nguia u ñumunua nua mose, i Pablo cuña je

² Acheẽ turãte quia jeni co. Jendua beite quiatu quia serese. Acheẽ ngue jẽje nyii, ùquĩ jemumbayã mbeite quia secheẽ ùquĩ. ³ Ae ra ambesa jẽje namo, jũquĩ jẽicua tuchi quiatu jẽ! Cristo rei hombre ja rerecua. Hombre rei ngũinisi rerecua no. Sã Dios Cristo rerecua no. ⁴ Mbia ñumunua mose, sã hombre mo ñee eã Dios je huiite sucha resebe. Sã eãquĩ nye-cua chõ siqui Dios cheẽ nenei nenei. Uãquĩ ati mose, aba ireĩte ùquĩ. ⁵ Mbia ñumunua mose, sã cuña mo ñee eã Dios je huiite suchayã. Sã cuña ãquĩ ati ji chõ siqui Dios cheẽ nenei nenei. Cuña uãquĩ ati eã mose, aba ireĩte ùquĩ. Uãquĩ huĩ na ño eriqui nguia uãquĩ ati eã no. ⁶ Cuña mo uãquĩ ati sereã mose, sã uãquĩ huĩ tuchi quiatu no. Eireĩ mose uãquĩ huĩ, sã uãquĩ ati quiatu ua sia rocoĩ no. ⁷ Hombre mo nguia uãquĩ chati aroneate nguia Dios cheẽ nenei nenei. Dios quiatu ngue hombre chao nguia umbaerã. Aquere que cuña mo ao hombre mbaerã cote ra. ⁸ Cuña ndoquieĩ je eã ño ngue Dios hombre ao nguia. Hombre roquieĩ je quiatu ngue Dios cuña mo ao nguia. ⁹ Cuña chirecorã eã ño ngue Dios hombre ao nguia. Hombre chirecorã nguia tu ngue Dios cuña

ao nguiã. ¹⁰ Nyebe ra cuña uãquĩ ati quiatu. —Seru chõ sererecua re, i chõ nguiã uãquĩ ati. Angeles quia maete nguiã erese. ¹¹ Jesucristo quiato ja chõ nande re. Hombre achõ nda siqui turã eã cuña eã mose. Cuña achõ nda siqui turã eã hombre eã mose no. ¹² Hombre roquieĩ je chõ ngue Dios cuña ao rei nguiã nyii. Cuña abe riqui tiirĩ irĩ hombre co cote. Dios chiao ja chõ ñene. Cuña. Hombre abe. ¹³ Jẽ ae chõ jendua mae erese. Eicuãte cuña ãquĩ ati iriã ñee Dios je. ¹⁴ Hombre a boco mo siqui mose, aba ireĩte ùquĩ. —Eicuãte ùquĩ, i ja tuchi mbiamo ñooñoa nguia ùquĩ je ã. ¹⁵ Cuña mo nguiatu ea boco siqui mose, ùquĩ nguia earõte re. Ea boco que Dios mee ee ra. Eãquĩ ati sacua. ¹⁶—Cuña a boco sebiã, i mose jemo, sã ndua chõ Jesús quiato ataque rese. —Sã cuña a boco riquichõ, i ja chõ Jesús quiato nguiã serese ùquĩ.

Jenyao chaochĩ nda Santa Cena u mose jẽ

¹⁷ —Santa Cena naa icuã icuã ño ngue equia ñumunua nua nda, i que mbia mo sembiirandu jeniĩ nda. Nyebe seya eãte riqui nguiã jendese. ¹⁸ —Hue rĩ ja eã eriqui ndua ndua ñumunua nua mose ùquĩ, i que emo sembiirandu jeniĩ nda. —Ichõĩño eã ereae, ae sequia ndua ndua co. ¹⁹ Jeñimbuchao chao chõchĩ equia ùquĩ. Mbia Jesús quiato tuchi icua sacua ño jeñimbuchao chao nguiã. ²⁰ Santa Cena naa naa mose, abei chiã tuchi chõ jẽingo nguiã jenyue ùquĩ. Eĩ eã tuchi que Jesucristo nandembaaquiato ra. ²¹ —Se rane sembae tau ja, jenyee jaaja chõchĩ nguiã Santa Cena naa naa ùquĩ. Mbae mee ndocoĩ emo je. Nyebe mbaecha riqui nguiã quiaru tuchi. Mbae mbei tuchi no. Mbaecha reã niacuã mose. ²² Jẽquiaru tuchi mose Santa Cena, jẽingo icuã ño nguiã Jesús quiato ataque je ùquĩ. Mbaecha reã ireĩ ireĩ ño nguiã jẽsi ùquĩ. ¿Mañi ae ra ñee jẽje

re? Eicuãte ùquĩ ndesẽ. Jenyuchua ae ae rei jẽquiaru sacua ndesẽ.

Jesús quiaru mose uchimbaaquiato rese

²³ Jesucristo ae sí que sembaaquiato ra. ã ngue asenei ndei jẽje nyii resẽ: Judas Jesucristo reacuquia nonde mbia icuã je, aque isa sí que Jesucristo mbichae sirõ nda. ²⁴ Gracias, i que ñee Dios je cote ra. Mbichae que esiquio uchimbaaquiato je cote ra. —¡Co jẽ! Jẽu. Serete rã ño mbichae riquio ji co re. Jeniĩ ño nda serete riquio ji cote. Co jẽu mose, jendua ndua bei quia serese, i que Jesús mbichae mondo ee ra. ²⁵ Quiaru jare que Jesús eyuquia rirõ cote ra. Ñee ngue uchimbaaquiato je cote ra. —Seruqui rã ño uva rique co re. Mbia icuã mbutiã sacua tuchi chõ seruqui re. Dios cheẽ yasu rui si chõ seruqui riqui nguiã mbia icuã mbutiã co. Co mbei mbei mose, jendua ndua bei quia serese, i que Jesús ee ra. ²⁶ Jẽ co mbichae u mose, jẽ uva rique mbei mose, Santa Cena, i chõ nguiã ùquĩ je. Jẽ Santa Cena naa naa mose, Jesucristo mano nenei nenei ño nguiã mbia je ùquĩ. Santa Cena jẽsaã saã mbei quia Jesucristo tu mose chee.

Jendua tuchi Jesús rete rese Santa Cena u mose

²⁷ Emo Santa Cena naa icuã icuã mose, ùquĩ siqui icuã icuã ño nguiã Jesucristo rete je ùquĩ. ùquĩ siqui icuã icuã ño nguiã Jesucristo ruqui je ùquĩ no. ²⁸ Nyebe nandendua ndua tuchi quiatu quia Santa Cena naa nonde. ²⁹ Emo Santa Cena naa icuã icuã mose, emo ndua eã mose Jesucristo rete rese, ùquĩ nda Dios mbasi. ³⁰ ùquĩ je chõ jendasi rasi bei riqui nguiã. ùquĩ je chõ jẽingo nguiã mano mano tuchi. ³¹ Nande ae nandereco nandeicua jiri ae. Eĩ nda Dios nandembasiã cote. ³² Jesucristo nandembasi mose, nandemundua sacua ño ùquĩ nde. Nandembitirõ sacua ño cote re. Dios nandemombo eã sacua tata cuasu chõ ùquĩ nde. Jesús quiatoã mombo mose tata cuasu.

³³ Nyebe aico nguiã ñee nyecua jêje co. Jê Santa Cena naa naa mose, jeñumunua nua turã ño. Jêingo turã ño jenyue. Jenyisaarõ turã ja chõ Santa Cena u nonde. ³⁴ Jemo niacuã siqui mose, sã quiaru uchuchua, Santa Cena naa nonde. Eĩ jenye mose, Dios ra siqui turã jêje cote, jeñumunua nua mose. Seso mose jendea ra secheẽ ataque asenei jêje cote.

12

Espíritu Turã ño nandechisaã saã sacua mondo nguiã nande ae ae je

¹ Espíritu Turã ngue mbae mee jaaja nande ae ae je ra. —Co esaã nde, co rese eico nde, i jaaja que nande je ra. Uquĩ ndese taembiirandu cote. ² Dios abareã ndese que jêingo tuchi nyii ra. Mbia que jemingo tuchi dios abareã tubiriã ndese nyii ra. Dios abareã aba cheẽ andu aroneãte. Uquĩ jêingo Jesucristo rese uquĩ cote. ³ ã ndese jendua tuchi: —Jesús icuãte riqui Dios je co, i mose emo, echeẽ ae chõ uquĩ nde. Espíritu Turã embucheẽ eã ño nguiã uquĩ. —Jesús rei Dios tuchi, i mose emo, echeẽ ae eã ño uquĩ nde. Espíritu Turã ño embucheẽ nguiã uquĩ.

⁴⁻⁶ —Co esaã nde, co rese eico nde, i jaaja que Dios nande ae ae je ra. Espíritu Turã mii ño siqui bei nguiã nande ja rese co. Jesucristo mii ño siqui nguiã nanderese co. Jesucristo mo eãte emo. Dios mii ño siqui nguiã nandembuquirãcuã co no. Dios mo eãte emo. ⁷ Espíritu Turã uquirãcuã teacuquia chõ nguiã nande ae ae je co. Nandeico turã ja tuchi sacua Dios rese. ⁸ Espíritu Turã mii ño siqui nguiã co. Hue rĩ ja eã ño eriqui nguiã uquirãcuã mee nande je. —Nde ra erecheẽ aracua bei quia, i chõ nguiã nandemo je. —Nde ra mbia erembaaquiatu turã mbei quia, i chõ nguiã nandemo je no. ⁹ —Jesucristo ra ereicua tuchi quia nde, i chõ nguiã nandemo je co no. —Mbia rasi ra erembucherõ cherõ mbei quia nde, i

chõ nguiã nandemo je co no. ¹⁰ —Mbia mae sayã nda eresaã saã mbei quia nde, i chõ nguiã nandemo je co no. —Dios cheẽ nda eresenei senei tuchi quia mbia je nde, i chõ nguiã nandemo je co no. —Espíritu eicua icua bei quia nde. Eaturã icua. Eicuã abe icua no, i chõ nguiã nandemo je co no. —Mbiamo ñee esaã saã tuchi quia nde. Mbia cheẽ chumumbara, i chõ nguiã nandemo je co no. —Mbia cheẽ mo eicua icua quia mbia je, i chõ nguiã nandemo je co no. ¹¹ Eĩ ño Espíritu Turã mii nguiã ucheẽ mbuchao chao nande je co. Nandechisaã saã sacua mee mee nande ae ae je co. Eĩ ño Espíritu Turã mii nguiã uquirãcuã mbuchao chao nande je co no. —Co esaã nde, co esaã nde no, i chõ nguiã nande ae ae je co.

Mbae mii na ño nandeico nguiã nande ja

¹² Jesús rete rã ño nandeico nguiã nande ã. Nande tubiriãte raque Jesús quiato. Sã aba rete resenda tubiriãte no. Eresa. Erie. Eo. Erete mii ndaque. Eĩ ño nande no nde. Jesús rete mii na. ¹³ Jesús rete rã ja chõ nande re. Erete mii na ño nande ja re. Judíos mo ño nandeico nguiã nande ã. Judíos eã abe mo ño nandeico nguiã ã no. Mbia rimba mo abe abe nandeico ã no. Mbia rimba eã mo abe abe nandeico ã no. Mbae mii na ño nandeico nguiã Jesús quiato ja ã. Erete mii na. Eĩ ño Espíritu Turã mii nguiã nandemingo ã.

¹⁴ Nanderete mii ae siqui ãte. Nanderete resenda tubiriãte riqui ã. ¹⁵ Nandei achõ ñee aroneate. —Eo eã ñochĩ se. Nyebe erete resenda eã se re, i aroneate nandei ñee. Nanderete resenda bei chõ nandei re. ¹⁶ Nandesa achõ ñee aroneate. —Eresa eã ñochĩ se. Nyebe erete resenda eã se re, i aroneate nandesa ñee. Nanderete resenda bei chõ nandesa re. ¹⁷ Nanderesa achõ mose nanderete resenda, i nda nandeico rei mbae anuate co. Nandesa achõ mose nanderete resenda, i nda nandeico rei mbae retõ ãte co. ¹⁸ Dios ae que nanderete resenda mii ja ja

cose ra. —Co tamii a, co abe tamii a no, i jaaja que nanderete resenda mii mii nda, ¹⁹ Nanderete resenda mii mose, eĩ ndei ra nanderete eãte. ²⁰ Nanderete resenda ja que Dios mee nande je ra. Nanderete resenda tubiriãte raque. Nanderete mii tuchi chõ ñene. ²¹ —Arerecoã nda se, i aroneate nanderesa ñee nandeo je. —Arerecoã nda se, i aroneate nandeaquĩ nandei je no. ²² Ae nanderete resenda ñetẽ tuchi nae, ae nanderete resenda quirãcuã nea tuchi nae, ãquĩ nguiarei nandechireco tuchi. ²³ Ae nanderete resenda aba ireĩte nae, ãquĩ nandetea quiatu chõ nguiã. Nandechati turã ño nguiã. ²⁴ Ae nanderete resenda checuate riqui nae, ãquĩ nguiatu nandechatiã nguiã. Dios que nanderete resenda saã turã ja ra. Ae nanderete resenda aba ireĩte nae, ãquĩ quiatu aba queteambare. ²⁵ Nyebe nanderete resenda riqui nguiã ñee aroneate nanderete resenda nongue je. —Arerecoã nda se, i aroneate ee. Nyebe nanderete resenda riqui nguiã siqui turã ja nyiese. ²⁶ Nanderete resenda mo ndasi mose, nanderete mbasi ja chõ nguiã. Nande ñee turã mose nanderete resenda mo je, nanderete ia ja tuchi ra erese.

²⁷ ã ño secheẽ tuchi ã nde: Cristo rete rã ño nandeco ja nguiã nande ã. Cristo rete resenda rã ja chõ nandeco nguiã nande ae ae ã. ²⁸ —Co esaã nde, co rese eico nde, i jaaja chõ Dios nguiã iglesia jenda uquiato je ã. —Cristo chimbaaquiato tuchi chõ nde re, i chõ nguiã emo je. —Secheẽ nenei neneisa chõ nde re, i chõ nguiã emo je no. —Mbia mbaaquiatusa chõ nde re, i chõ nguiã emo je no. —Mbia mae sayã esaã saã nguiã nde, i chõ nguiã emo je no. —Mbia rasi embucherõ cherõ nguiã nde, i chõ nguiã emo je no. —Ayudante eico nde, i chõ nguiã emo je no. —Iglesia rerecurã nde, i chõ nguiã emo je no. —Mbia cheemo esaã saã nguiã nde, i chõ nguiã emo je no. ²⁹ Cristo chimbaaquiato ja eã ño nande re. Dios cheẽ nenei neneisa ja

eã ño nande no nde. Mbia mbaaquiatusa ja eã ño nande no nde. Mbia mae sayã naa naasa ja eã ño nande no nde. ³⁰ Mbia rasi mbucherõ cherõsa ja eã ño nande no nde. Mbia cheemo naa naasa ja eã ño nande no nde. Mbia cheemo mbiasa asasa ja eã ño nande no nde. ³¹ Nandechẽ ño Dios je. —Ndequirãcuã emee na seje. Ae je erecheẽ ñee ure je, eĩ nda ãquĩ mo asaã saã se abe, nande quia ñee Dios je. Mbae turã tuchi mo tasenei na jẽje.

13

Nandechesecua eã mose, Dios chirirõ ño nande re

¹ Se nyesecua eã mose mbia rese, secheẽ iru iru beite ra eriqui. Mbia cheẽ nda aicua ja raque. Angeles cheẽ abe ra aicua raque no. ² Se nyesecua eã mose mbia rese, mbae turã mo naasa eã ño se re. Dios cheẽ nda ambuchecua checua tuchi raque. Se ra mbae aicua ja raque. Se ra Dios aicua tuchi raque. Ibi ibate mo nda arusuri raque Dios quirãcuã je. ³ Se nyesecua eã mose mbia rese, aico choõno mbei chõ nda se. Sembae ra amee ja raque mbia mbae cha reã je. Mbia ra serei raque, se Dios cheẽ nenei nenei mose.

⁴ Ae nyesecuate quia mbia rese nae, ãquĩ nguiã siqui minguete nguiã mbia je ã. ãquĩ nguiã eturãte riqui nguiã mbia je co. ãquĩ nguiã mae icuã icuã eãte nguiã emo mbae rese ã. ãquĩ nguiã “seaquiato tuchi te se”, iãte nguiã co. ⁵ Ae nyesecua quia mbia rese nae, ãquĩ nguiã “se quiatu”, iãte nguiã mbae mo je. Ae aba ireĩte nae, ãquĩ mo esaã saã eãte quia co. Ae nyesecua quia mbia rese nae, ãquĩ nguiã paama i jei jei eãte nguiã ã. ãquĩ nguiã ndua icuã icuã eãte nguiã emo icuã mose ee ã. ⁶ Ae nyesecua quia mbia rese nae, ãquĩ nguiã eya eãte riqui nguiã, emo mbae icuã naa mose ã. Emo mbae turã naa mose quia eyate riqui nguiã ã. ⁷ Ae nyesecua quia mbia rese nae, ãquĩ ñimbirãcuã ño nguiã mbae ja je ã. —Ifchõ: ño

nguiã, iã ño nguiã mbia cheẽ je. Siqui tochi chõ nguiã.

⁸ Dios quiato ra nyesequa bei mbia rese, mbae ua ja chee. Dios cheẽ nda nandesenei senei eã emo mose cote. Mbia cheẽ ata mo nda nandesã eã emo mose cote. Mbia mbaaquiatusa mo eã nda emo mose cote. Ûquĩ nda ua ja chee. Dios quiato quiatu ra nyesequa bei quia. ⁹⁻¹⁰ Mbae mii mii ño nandeicua icua nguiã namo ã. Jesús tu mose quia ra mbae mii nandeicua eã cote. Dios cheẽ miite nandesenei senei nguiã namo ã. Jesús tu mose quia ra mbae nandeicua ja cote. ¹¹ Señetẽ mose que aico ñee ñee mbia riirĩ na nda. Mbia riirĩ na ño ngue aico ndua ndua señetẽ mose ra. Mbae que aicua icua chõ nguiã mbia riirĩ na no nda. Secuasu mose que señetẽ mosenda asecha ja cote ra. ¹² Mbae cuu rese mae naanguia chõ nandeico nguiã mae namo. Jesús tu mose quiatu ra mbae checua ja nande je cote. Mbae mii mii ño aicua icua nguiã namo co. Jesús tu mose quia ra mbae aicua ja cote. ¹³ ã nandeico Dios icuate ã. ã nandeico Jesucristo ru raarõ arõ ã. ã nandeico nyesequa jate mbia rese ã. Nandechesecua mose quiarei, ùquĩ eturã tuchi mbae ja si.

14

Mbiamo cheẽ naa naa mose

¹ ¡Jenyesequase tuchi quiatu quia mbia rese jẽ! Jeñee ño nguiã Dios je. —Paba, ndequirãcuã emee na seje. Mbae raã naa sacuaã ndeje, jenyese bei chõ nguiã Dios je. —Ndecheẽ asenei senei sete ndequirãcuã je, jenyese chõ nguiã ee. ² Jesús quiato mo mbiamo cheẽ naa naa mose, mbia ra eicuayã jate. Dios mii ño nda eicua nguiã. Dios mii je chõ eriqui nguiã ñee. Uchue si chõ eriqui nguiã ñee. Mbia quia echeẽ icuayãte nguiã. ³ Ae Dios cheẽ senei senei nguiã, ùquĩ nguiã ñee nyecuate nguiã mbia je. Ûquĩ nguiã mbia mbaaracua turãte nguiã Jesucristo rii. Ûquĩ nguiã mbia mingo uquia tuchi nguiã Jesucristo

rese no. Ûquĩ nguiã mbia mbia tuchi nguiã Jesucristo rese no. ⁴ Ae mbiamo cheẽ saã saã nguiã nae, mbia mingo uquia reã ño nguiã Jesucristo rese. Ae ae umingo uquia nguiã erese. Ae Dios cheẽ senei senei nguiã nae, ùquĩ nguiã Jesús quiato mingo uquiate nguiã Jesús rese. ⁵ Mbiamo cheẽ nda jesaã aquiatu ja raquete seje chã. Dios cheẽ nenei nenei aquiatu mose, ùquĩ nguiã eturã tuchi re. Ûquĩ nguiã eturã tuchi mbiamo cheẽ naa naa si re. Ae mbiamo cheẽ saã saã nguiã nae, aque ucheẽ mbiasa mose Jesús quiato je, eturã ño ùquĩ no nde. Jesús quiato mingo uquia chõ nguiã Jesús rese ùquĩ.

⁶ Se mbiamo cheẽ naa naa mose jẽje, ùquĩ nda jemingo uquia reãte Dios rese. Se ñee nyecua mose jẽje, ùquĩ nguiã eturãte re. Ae rese Dios sembiirandu nae, ùquĩ nenei nenei mose jẽje, ùquĩ nguiã eturãte re. Se Dios cheẽ mbuchecua tuchi mose jẽje, ùquĩ nguiã eturãte no nde. Se Dios cheẽ icua icua tuchi mose jẽje, ùquĩ nguiã eturãte no nde. Mbiamo cheẽ naa naa si. ⁷ Sã música no. Emo flauta mbucheẽ icuã icuã mose, mbia ra tonada icuayãte. Emo guitarra mbucheẽ icuã icuã mose, mbia ra tonada icuayã no. ⁸ Sã soldados no. Emo corneta mbucheẽ icuã icuã mose, soldados ra icuayãte. ⁹ Eĩ si chõ jẽ no nde. Jẽ mbiamo cheẽ naa naa mose, mbia ra jeñee icuayãte. Jẽ mbiamo cheẽ naa naa mose, mbia eãsa ñee ñee na ño ùquĩ nde. ¹⁰ Mbia cheẽ ñnumbarate eriqui rei. Ucheẽ ae raã naa mose, echecuate ee. ¹¹ Emo ucheẽ naa naa mose seje, se eicuayã mose, mbiamo ño aico nguiã ee. Mbiamo ño ae riqui nguiã seje no. ¹² Espiritu Turã quirãcuã jenyosei tuchi quia reae. Coche tuchi chõ ùquĩ nde. Jesús quiato mingo tuchi sacuaã Jesús rese chõ equirãcuã jenyosei jẽ.

¹³ Nde mbiamo cheẽ naa naa mose Jesús quiato je, echeẽ na Dios je. —Paba, ndequirãcuã emee na seje. Secheẽ mbiasa sacuaã mbia je, ere

chõ Dios je. ¹⁴ Se mbiamo cheẽ naa mose Dios je, acheẽ ñee ndaque Dios je. Mañi ae quiatu ñi se quia ñee ee. ¹⁵ Mbiamo cheẽ abe ra asaã saã ndaque Dios je. Secheẽ abe ra asaã saã ee no. Mbia secheẽ icua ja sacuaã. Mbiamo cheẽ abe ra asaã saã se irasei rasei mose. Secheẽ abe ra asaã saã se irasei rasei mose no. ¹⁶ Nde mbiamo cheẽ naa naa mose Dios je, mbia ra ndecheẽ icuayãte. Ae eaquiatuãte, ùquĩ nda ndecheẽ icuayãte. Nyebe eriqui nguiã ñee aroneate Dios je nderese. Nyebe nandecheẽ sí chõ nandesaã Dios je. ¹⁷ Coche jẽingo nguiã ñee Dios je. Jeñee sí quia nda aba saã Dios je re. Jẽ mbiamo cheẽ naa naa mose ee, jendesenda quia nda jeñee icuayãte nguiã. Ûquĩ mose ra jendesenda jemingo uquia reãte Jesús rese. ¹⁸ Mbiamo cheẽ aicua tuchite raque quia jẽsi co. Gracias, aete raque quia Dios je ùquĩ ñi co. ¹⁹ Dios quiato ñumunua mose, acheẽ nyecuase rete ee. Secheẽ jua chõ ndaque. Cinco palabras. Mbiamo cheẽ nda asaã eã ee. Mbiamo cheẽ icuayãte quia ñene. Emo nda ñee oco raque ee, icuayãte rae.

²⁰ Mbia riirĩ naate ra jẽingochĩ, Seresenda. Jendua quiatu secheẽ ndese mbia cuasu rã. Coche jẽingo nguiã mbia riirĩ na mbae icuaã naa ndocoĩ. ²¹ ã ndei Dios cheẽ mbesa ji ã:

Mbiamo tamondo rei secheẽ nenei nenei sacuaã ã serimba je.

Secheẽ nda esenei senei ndei serimba je mbiamo cheẽ je.

Aquere ra serimba secheẽ mumba i i tuchi querabe, i que Dios ra,

i que embesa ji ra. ²² Jemo mbiamo cheẽ naa naa mose, Jesús quiatoã mundua sacuaã Dios rese chõ ùquĩ nde. Jẽ Dios cheẽ nenei nenei mose, Jesús quiato mundua sacuaã ño Dios rese chõ ùquĩ no nde. ²³ Jesús quiato ñumunua nua mose u, sã mbiamo cheẽ naa naa ja eã u. Jẽ mbiamo cheẽ naa naa ja mose ra Jesús quiatoã ñee jẽje. “Earacuayã” i ra ique mose mae jendese. ²⁴ Coche jẽingo nguiã

Dios cheẽ nenei nenei ja jeñumunua mose. Jesús quiatoã mo ique mose jendea, ndua ndua tuchi ra huicuaã ndese. —Seicuã tuchi chõ aico se re, i ra jeñee andu mose. ²⁵ Ae rese ndua ndua uchiangui renda icuaã nae, Espiritu Turã ae ra ùquĩ mbuchecua checua nguiã ee. Nyebe ra ngoi ngũia ndese ñee turã Dios je. —Dios riqui tuchi jendese a, i ra ñee jẽje.

Mbae jẽsaã turã turã ja chõ nguia jeñumunua nua mose

²⁶ —Eĩ jenye quiatu quia ñumunua Jesús riĩ, ae ra jẽje cote. Emo irasei rasei. Emo mbia mbaaquiato quiato Jesús riĩ. Emo Dios cheẽ icua icua mbia je no. Emo mbiamo cheẽ naa naa no. Emo mbiamo cheẽ mbiãsa asa ee no. Jenyuuru uru chõ nguia. Mbia mingo ja sacuaã Dios rese chõ ùquĩ nde. ²⁷ Mbiamo cheẽ jẽsaã saã mose ñumunua mose, jẽ nyeremoño ño jeñee ñee. Jenyuuru uru chõ nguia. Sã emo ndiqui echeẽ mbiãsa asa.

²⁸ Jemo echeemo mbiãsa aquiatoã mose, mbiamo cheẽ nda jẽsaã saãchĩ, jeñumunua mose. Jeñumunua eã mose quiato mbiamo cheẽ jẽsaã saã jẽ ae Dios je. ²⁹ Ae ra Dios cheẽ senei senei mbia chumunua mose nae, sã nyeremoño ño ñee. Sã eataque ndua ndua ùquĩ ñee ndese. Eĩ ngue ra, i sacuaã. Eĩ eã ngue ra, i sacuaã abe echeẽ icuaã mose no. ³⁰ Emo chĩ mose Jesús quiato ataque mbaa quiato quiato, emo nda ñeechĩ echeẽ cúaa. —Nde abe ã embuchecua mbia je, i mose Dios emo je, sã ñiinda ñee ja rã nyii.

³¹ —Nde abe ã embuchecua mbia je, i mose Dios jemo je, jenyuuru uru chõ nguia ñee. Mbia Dios cheẽ icua ja sacuaã. Mbia siqui tuchi sacuaã Dios rese. ³² —Nde abe ã embuchecua mbia je, i mose Dios emo je, sã emo ndaarõ mbirĩ na huĩ, emo chĩ mose Dios cheẽ nenei nenei. ³³ Jemo ñee mose jenongue cheẽ cúaa, Dios biãte ùquĩ. Jeñee turã mose nyuuru uru, ùquĩ nguia Dios bite re. Eĩ ja chõ Dios quiato nguiã iglesia jenda ja.

³⁴ Jeñumunua nua mose Dios riĩ, cuña

mo nda ñeechĩ. Eĩ si que Moisés chimbresa no nda. Sã cuña ndiqui mbia cheẽ mumbayã mbei. ³⁵ —Ūquĩ embuchecua seje, i aroneate cuña ñee mbia chumunua mose. Uchuchua quia cuña ñee ngu je, ñimbaaquiatus mose. Cuña mo ñee aroneate Jesús quiato chumunua nua ite re. ³⁶ —Íchõĩño nguiã ¿jenye quia secheẽ mose re? Jẽ nane je eã ngue Dios ñee ndesẽ. Jẽ mĩ je eã ngue Dios ñee ndesẽ.

³⁷ Secheẽ ae eã ambesa nguiã jẽje co. Dios cheẽ ño ambesa nguiã jẽje. —Dios que uquirãcuã mee seje ra. Ucheẽ nenei nenei sacua, i mose jemo ñee, sã ũquĩ nane ñee serĩ. —Dios cheẽ tuchi chõ Pablo senei senei nguiã, sã i serĩ. ³⁸ Ūquĩ secheẽ isi sereã mose, jẽhuĩ chõ esi. Sã eaquiataũ ae riqui. ³⁹ ¡Dios cheẽ jẽsenei seneise tuchi quiatu jẽ! Jemo mbiamo cheẽ naa naa mose ¡echeẽ nda jẽsiquisã quisãchĩ jẽ! ⁴⁰ ¡Mbae jẽsaã turã turã ja chõ nguia jeñumunua nua mose jẽ! Jenyuuru uru turã ño nguia.

15

Cristo quera si mose

¹ Dios cheẽ turã ngue asenei senei nguia jẽje Jesucristo rĩ nae, ũquĩ si rese chõ aico nguiã jemundua ndua co. Ūquĩ ngue jẽisi turãte. Jẽingo beite ũquĩ ndese ũquĩ. ² Ūquĩ ndiqui jemingo beite ũquĩ, jẽtesareĩã mose secheẽ si. Ūquĩ jẽingo Jesucristo icua iruã ũquĩ. ³ Ae Dios senei senei seje nae, ũquĩ nane ngue asenei senei jẽje ra: Jesucristo que mano nandecuã ndiquicharõ. Embesa ji cheẽ nguire. ⁴ Mbia que echati rei. Tres días mose que quera si. Embesa ji cheẽ nguire. ⁵ Quera si mose que nyecua Pedro je. Aquere que nyecua uchimbaaquiato doce je cote. ⁶ Quinientos uquiato je que nyecua cote. Hue equiato chi ja mose ñumunua. Ūquĩ tubiriãte riqui ã. Emo emo ngue mano nda. ⁷ Nyecua que Jacobo abe je cote no. Aquere que nyecua uchimbaaquiato jaje cote. ⁸ Nyecua nyecua jare mbia je que nyecua chee se abe je cote

ra. Sã cuña ndiqui erã mo mbua no, ũquĩ na si chõ aico rei nguiã se co. ⁹ Se quia señetẽ jiri riqui nguiã Jesús chimbaaquiato ataque si co. —Jesús chimbaaquiato chõ se re, ae eã jiri quia co. Seicuã tuchi quiatu ngue Dios quiato je nyii re. ¹⁰ Dios turã ae semingo turã nguiã co cote. Dios turã ñooño eã ño eriqui nguiã seje co. Se abe que serecoteã jiri riqui nguiã Jesús rese echimbaaquiato ataque si ra. Mbae raã naa Jesús je. Se ae eã ño ngue aico nguiã mbae rese. Dios turã ae ngue semingo nguiã mbae rese. ¹¹ —Aba Dios cheẽ senei senei tuchite quia reae, ure ãte equia co. Ūquiã ñene. Uresenei senei ja chõ equia ã ndesẽ. Jẽ ngue urechisenei senei jẽisi turãte quia resẽ.

Mbia raaque quera si mose

¹² —Cristo que quera si manonde ra, ure que equia erenei nenei jẽje. Urecheẽ ngue jẽisi turã ndei nyii. ¿Mbaerã jemo ndiqui ñee cote re? —Mbia raaque ra querayã mbei, i cote re. ¹³ ¿Cristo raaque bei namo nde? —Mbia raaque ra querayã mbei, jeny mose, ¿mañi Cristo raaque quera re no? ¹⁴ Cristo raaque quera si eã mose, eĩ nda ureico rei echeẽ nenei nenei iru chõ. Eĩ nda Jesucristo jẽicua iru chõ ndei. ¹⁵ Cristo raaque quera si eã mose, eĩ nda ureico rei ñee ñooño Dios rĩ mbia je. —Dios que Cristo mbuquera si ra, ure bei equia ã ndesẽ. Mbia raaque quera si eã mose, i nda Dios Jesucristo raaque mbuquera si eã ndei no. ¹⁶ Mbia raaque querayã mose, eĩ nda Cristo raaque quera eãte rei no. ¹⁷ Cristo raaque quera eã mose, eĩ nda jẽingo rei Cristo icua iru no. Eĩ nda jẽingo rei jẽicuã nderequia beite no. ¹⁸ Eĩ nda Cristo quiato quiachã mbei rei manonde no. ¹⁹ A mĩ eã ño Cristo riqui nguiã nanderese. Nandemanonde abe ra eriqui bei nanderese no. A mĩ mose, eĩ nda nandeya eã tuchite riqui rei mbia mo si no. ²⁰ Cristo que quera si ra. Ae bei tuchi. Ae rane ngue quera nyii ra. Nyebe ra mbia abe

quera si eraã si cote no. ²¹ Adán miï nane ngue mano huïcuã je cose ra. Nyebe nandeico nguiã mano mano mbei cote. Eï si chõ Cristo miï quera si nguiã cote. Nyebe ra uquiato mbuquera si ja cote. ²² Sã nandeico mano mano ja Adán ndui ã no, eï si ra Cristo nandembuquera quera no. ²³ Dios que Cristo rane mbuquera nandesira. Cristo tube mose, uquiato raaque ra embuquera ja cote. ²⁴ Cristo tube mose ra mbae ibi jenda ua ja cote. Mbia mo nda siquiã ererecua cote. Cristo ra mbae mee ja Dios je cote. Cristo ra mbia rerecua mbutiã ja cote. ²⁵ Ererecuarã tuchi ra Cristo cote. Uquiatoã nda embuquiachã ja tuchi chee cote, ae siqui mose ererecuarã. ²⁶ Mbia mano mano mose, Cristo biãte ùquï. Ùquï abe ra Cristo mbuquiachã tuchi mbia si cote. Mbae icuã ataque ra embuquiachã ja rã nyii. ²⁷ Dios que mbae mee ja Cristo je ra. Cristo mbae rerecua ja tuchi sacua. —Cristo ra mbae rerecua ja tuchi, i ñi embesa ji re. Dios rerecua eã ndaque. Mbae ja rerecua chõ nda Cristo. ²⁸ Dios mbae mee ja mose Cristo je, Cristo ra ñimee Dios je cote no. Eriirite quia ñene. Eï nda Dios mbia rerecua ja tuchi cote.

²⁹ Emo emo ño bautizar i nguiã eraaque riï ùquï. Eraaque quera si eã mose ¿mbaerã ùquï ndiqui bautizar i eraaque riï nde? ³⁰ Mbia raaque quera eã mose, eï nda ureico rei Dios cheë nenei nenei ãte mbia je co. Eï nda mbia riqui rei ureiquia serï serï ãte. ³¹ Mbia “taiquia” i bei beite quia seje ã. Acheë ñooño eãte jêje. Sã seyate riqui jendese co no. ³² Nyacuarã tuchi que Efeso jenda riqui seje ra. Ùquï ngue asiquisã tuchi rei quia ñee nda. Eï nda asiquisã quisã iru rei no, mbia raaque quera eã mose. Mbia raaque quera eã mose, eï nda nandeico rei ñee. —Mbae nandembei chooño. Mbae nandeu chooño. Mano mbei cote, i. ³³ —Eï jenyè quiatu ¡ichï nda mbia jembïrï irï jê! Jeingo mose mbia icuã ndese, jembïcuã icuã nda

jê abe cote. ³⁴ Jendua quiatu. Mbae turã nguiatu jêsaã saã nguia. Mbae icuã jêsaã eã nguiatu quia. Jemo emonduqui Dios icuayãte ùquï. Aba ireï tuchi quiarei ùquï.

Jesús quiato rete yasu ja ra cote

³⁵ Jemo nda ñee ndei. —¿Mañi nda eraaque quera si re? ¿Mañi nda erete cote re? i ra jemo ñee ndeae. ³⁶ Ndua eã ño nguiã ùquï. Sã nandeico mbae eï tiquia no. Mbae eï nda soõ suri sacua cote. Eï si chõ nda nanderete soõ nandemano mose. Nanderete yasu sacua cote. ³⁷ Sã nandeico mbae eï tiquia no. Ei ra nandechitiquiyã. Ieï achõ ño nandechitiquia nguiã. Quiata a eï. Mbaemo eï abe no. Ei quia nda suri nguiã cote. ³⁸ —I ño nda ndei, i chõ Dios nguiã mbae eï jaje. ³⁹ Nanderete rã ño mbae eï nde. Eï ja eã ño mbae rete re. Emo ño mbia rete no nde. Emo ño quiaa rãnda rete no nde. Ae mbebe quia, erete ae chõ ùquï no nde. Sira ae erete mo no nde. ⁴⁰ Ibatenda ae rei erete mo no. Ibi jenda ae erete mo no. Ibatenda ae rei erete turã mo no. Ibi jenda ae rei erete turã mo no. Eï ja eã ño mbae rete re. ⁴¹ Nyasi rendi rã eã ño tenda rendi re. Nyasi tata rendi rã eã abe no. Nyasi tata rendi chiabi abi chõ eno nde. Erendi turã ja raque.

⁴² Eï si chõ mbia raaque quera je re. Ae mbia raaque nandechitiquia quia nae, ùquï ndei soõ je ùquï. Ae ra quera si nae, ùquï nda soõ eã mbei cote. Manoa mbei ra eno. ⁴³ Ae nandechitiquia quia nae, eraaque tuchi chõ ùquï nde. Ae ra quera si nae, enininya tuchi chõ ùquï cote re. Etiquia mose, equirãcuã nea tuchi chõ aque mose re. Equera si mose, equirãcuã tuchi chõ aque mose cote re. ⁴⁴ ã nanderete nandereco ã nae, erete achõ ño ùquï nde. Quera si mose ra nyiicabo tuchi cote. Mbae ibi jenda ra mano ja. Ae ibi jenda eã nae, ùquï nda manoa no. ⁴⁵ ã ndei embesa ji cheë ã: “Ae Dios chao Adán nyii nae, aque reco que siqui rei nyii ra”, i que embesa

ji ra. Ae tu Adán ndui Jesucristo, mbia mingo beisa rei aque. ⁴⁶ ã nanderete nandereco ã nae, mano mano mbei arõte. Ûquĩ nane nandereco nanderete ã. Aquere quiatu ra nanderetemo nandereco cote. Manoa mbei sacua cote. ⁴⁷ Ae Dios chao Adán nyii nae, ibi je chõ eao nguiã nyii. Nyebe ibi jenda bei ae re. Ae tu Adán ndui nae, Jesucristo i equia ee nae, ibatenda chõ aque re. ⁴⁸ ã nanderete nandereco ã nae, Adán ndete rá si chõ nanderete nandereco nguiã ã. Ibi jenda chõ ã nanderete re. Ae nanderete ra quera si nae, ibatenda rete rá ño nda ùquĩ cote. ⁴⁹ Ae Dios chao ibi je nyii nae, Adán i equia ee nae, aque rá si chõ nandeco nguiã nandebetenda rete rá cote. ⁵⁰ Nanderoo achõ ño nanderete re. Nanderuqui abe no. Ûquĩ oso aroneate ibate Dios récuua. Ae mano nguia soõ nae, ùquĩ nyoi aroneate Dios récuua. Ae mbia riqui manoa mbeite nae, huee nanderoo oso aroneate.

⁵¹ Ae rese mbia riqui jiranuate nae, ùquĩ tasenei na jẽje. Nandemano ja eã ndae. Nandechiicabo ja chõ ndae. ⁵² Corneta pu i mose ra Dios nanderete mbuchiicabo asi cote. Nanderesa pirirá i rá nda Dios nanderete mbuchiicabo asi. Corneta pu i mose ra eraaque abe quera si manoa mbei nonde cote. Aquere mose ra nandechiicabo bei nandebetenda cote. ⁵³ Ae nanderete nandereco namo ã nae, ã nda nyiicabo tuchi cote. Manoa mbei sacua cote. Soõ eã mbei nonde cote. ⁵⁴ Nanderete nyiicabo mose, ùquĩ mose ra embesa ji cheẽ io cote: “Nandemano ngue ua tuchi cote ra”, i ñi embesa ji re. ⁵⁵ Nanderasi ra nandechiicabo cote. Ibicua ra nanderaarõ cote. ⁵⁶ Nandechiicabo ño nandemano mbuquã nguiã nandebetenda je co. Moisés chimbesa chõ nandechiicabo mbuchecua nguiã nandebetenda je co. ⁵⁷ Dios ra nandemano siguisã mbei nandechiicabo cote Jesucristo rii. Nyebe nandechiicabo nguiã gracias i tuchi Dios je ã cote. ⁵⁸ Seresenda jjeñimbirãcuã tuchi quiatu quia jẽ! jje-

sucristo rese jẽingo bei quiatu quia jẽ! jjecheẽ jẽsenei senei mbei tuchi quiatu quia jẽ! Ae jẽsaã saã nguia Jesucristo rese nae, jẽsaã iru iruã ño nguiã ùquĩ.

16

Ofrenda jembae jendecoquiato, i Pablo

¹ Ae ofrenda ra jemondo Jesús icuasa je nae, ùquĩ tasenei jẽje. Acheẽ ngue Jesús quiato je ra. Galacia jenda je ra. Eraã si chõ jẽingo ae. ² Domingo mose bei jẽingo mbae rerecúe cúe ae. Ofrendar ã. Ae mbae isi atate quia, sã aque mbae rerecúe ata jiri ae. Ae mbae isi mite quia, sã aque co mii jiri rerecúe ofrendarã ae. Ûquĩ jemunua ino seso nonde jendea ae. Eĩ mose ra ofrendarã jẽsaã eã seico mose jendese cote. ³ Secuasẽ mose huee, jjeñimondo sacua mo jẽirabo ino, ofrenda rerao sacua. Cartas nandemondo ùquĩ oo. Ofrenda rese. Ûquĩ nda amondo Jerusalén ña. Ofrenda rerao sacua hue jenda Jesús quiato je. ⁴ Ofrenda tubiriã mose ra aso se abe erese.

Aso ra jendea, i Pablo

⁵ Macedonia ñi nane nda acua. Aquere ra aso ngasẽ jẽje cote. ⁶ Aico arete jiri ra jendese huee reae. Ama mose bei ra aico jendese huee reae. Eĩ jenje nda sembucua turã mondo cote, seso mose mbaranguiti. ⁷ Amaeño sereate jendese secua mose. Aico arese rete jendese huee, Dios eno i mose seje. ⁸ Efeso taico are rá nyii. Fiesta de Pentecostés mose. ⁹ Dios cheẽ asenei senei arõ tuchite mbia je a. Mbiam seanduse rete. Emo emu icua icuate riqui Dios cheẽ nenei nenei mose seje ã no.

¹⁰ Timoteo ngasẽ mose jẽje jjeisi turã ño jẽ! jjsã eirei nguiã tuchi jesi jẽ! Se rá si chõ eriqui bei nguiã Dios cheẽ nenei nenei mbiam je aque. ¹¹ jNyebe jemo Timoteo isiteã eã jẽ! jJembucua turã ño imbu seje jẽ! Aico eraarõ arõ tuchi se a. Nanderesenda ataque rese.

¹² Acheẽ ndei que nanderesenda Apolos je ra. —Nde abe eso erea, ae rei que ee jeni nda. Oso sereã ngue namo nda. Oso mose quia nda esi nguiã jendea cote.

Pablo ñee hui bei

¹³ ¡Jendua tuchi quiatu quia jẽ! ¡Jesucristo jẽicua tuchi quiatu quia jẽ! ¡Jẽsiquicheã tuchi quiatu quia jẽ! ¡Jẽquirãcuã tuchi quiatu quia jẽ! ¹⁴ ¡Mbia rese jenyesequa tuchi quiatu quia mbae raã naa mose jẽ! ¹⁵ Seresenda, jẽingo Estéfanos chuchua jenda icua jate ñquĩ. Ñquĩ nane tuchi ngue Jesús icua Acaya jenda nyii nae. Ñquĩ ndiqui mbae mondo mondo bei Jesús quiato je ñquĩ. Ñquĩ ndiqui mbae raã naa mbei Jesús quiato je ñquĩ. ¹⁶ Ñquĩ na si chõ jẽingo. Ñquĩ ñee nda jemumbachĩ. Ae Dios cheẽ senei senei nguia nae ¡ñquĩ ñee nda jemumbachĩ jẽ! ¹⁷ Seya tuchi Estéfanos ngaẽ mose serea. Fortunato abe. Acaico abe. Ñquĩ ngue sembia tuchi ngaẽ jẽingoã mose a ra. Ae jẽsaã aroneate quia seje nae, ñquĩ ño ngue esaã ngaẽ seje a ra. ¹⁸ Ñquĩ ngue sechiã mbucoite Dios rese ra. Jeñia abe mbucoite ereae. Gracias janye bei ñquĩ je.

¹⁹ Jesús quiato Asia jenda ja chõ saludos mundo quia jẽje aque. Aquila abe saludos mundo quia jẽje aque. Priscila abe. Ae Jesús quiato ñmunua nua nguia ñquĩ nyuchua nae, ñquĩ ja abe saludos mundo quia jẽje Jesucristo rĩ aque. ²⁰ Jesús quiato a jenda ja saludos mundo quia jẽje aque. Jenyiquiaama ama ja quiatu quia Jesús rĩ.

²¹ Seo je tuchi co saludo ambesa mundo quia jẽje aque. Pablo tuchi chõ se re. ²² Emo nyesequa mose Jesucristo rese, sã Dios embasi. Echu, Jesucristo. ²³ Jesucristo turã nda siqui jendese chã. ²⁴ Achesecua ja chõ nguiã jendese Jesucristo rĩ co. Amén.

SEGUNDA CARTA DEL APOSTOL SAN PABLO A LOS CORINTIOS

Pablo ucheẽ mbesa mondo Corinto jenda je

¹ Pablo chõ se re. Dios chiirabo chõ se re. Jesucristo chimondo chõ se re. Timoteo rese co ambesa mondo quia jẽje aque. Jesús quiato Corinto jenda ja je. Acaya jenda ja je abe no. ² Sã Dios uturã mingo tuchi jendese. Sã Dios jembia bei mingo. Sã Jesucristo abe jembia bei mingo.

Pablo mbae rasi saã tuchi

³ Gracias nande bei tuchi quiatu quia Dios je. Jesucristo rute quia ae re. Ae quia eya eãte riqui nguiã nanderese co. Ae chõ nandeya eã mbuquiachã quiachã nguiã co. ⁴ Mbae icuã tu mose ure je chõ Dios riqui nguiã ureya eã mbuquiachã quiachã ure si co. Ure mbia mo mbia sacuã abe chõ ñene. Mbae icuã tu mose ee. ⁵ Cristo rane ngue mbae rasi saã tuchi nyii ra. Mbia urembasi mbasi tuchi quia ure abe Cristo rĩ ã. Cristo riqui urembia tuchi ure abe ùquĩ mose co. ⁶ Ure mbae rasi raã mose, jẽje chõ ñene. Ure mbae rasi raã mose nyii, jẽingo sacuã Dios rese chõ ñene. ¶ nda jẽya bei riqui mbae rasi raã mose. Dios ureya eã mbuquiachã mose, jẽya eã mbuquiachã sacuã abe chõ ñene. Eĩ nda jeñimbirãcuã tuchi mbae rasi raã mose. Sã ureico mbae rasi raã ure no. ⁷—Mbae icuã tu mose ee, ñimbirãcuã turã nda Dios rĩ, ure beite equia jeniã ã. Mbae icuã tu mose jẽje, Dios ra jẽya eã mbuquiachã jesi. Sã seya eã mbuquiachã sesi no.

⁸ Mbae rasi que uresaã tuchite ureico mose Asia ra. Ûquĩ ndese taembirandu. Mbia que urecuayãte quia ra. Aete ureico ñimbirãcuã eã. —Mbae icuã nda hui eã mbeichĩ nandesĩ re, ure rei que equia ra. ⁹—Mbae icuã nda nandemingoã nyee, ure rei que equia ra. Mbae icuã tuutu bei

mose ure je. Ure Dios icua sacuã ño ngue ùquĩ nde. —Nande ae eã ñene, ure i sacuã ño ñene. Sã Dios ae riqui mbia raaque mbuquera uquirãcuã je no. ¹⁰ Mbae icuã ureiquia serĩ nguia nae, ùquĩ si que Dios ae urerirõ nda. Ûquĩ si eriqui urerirõ ndirõ mbei ã. Ûquĩ si ra eriqui urerirõ mbei no. Ûquĩ ureicuate quia ã. ¹¹ Jẽ abe jeñee Dios je urerĩ no. Mbia tubiriã ñee mose Dios je urerĩ, Dios ra ùquĩ ñee ñandu. Dios ra uturã mondo tuchi ure je. Ûquĩ nda gracias i tuchi Dios je urerĩ cote.

Pablo oso jei eã Corinto

¹² Ure que mbia mo urembĩrĩ irĩ ãte quia ra. Jẽ abe mbĩrĩ iriã no. Dios resendate que ureico jẽje ra. Ureyate mbae turã naa naa mose jẽje. Nyebe urechiã iate riqui nguiã. Dios ae chõ ngue uremingo mbae turã ndese huee ra. Ureaquiato ae eã ngue ra. ¹³ Ae urembesa mondo quia jẽje nyii, ùquĩ jẽicuate raque quia ùquĩ. Urechimbesa checuate raque. Urechimbesa nda jẽicua ja tuchi rã seje chã. ¹⁴ Jẽ seicua jiri raque quia ùquĩ. Jẽya tuchi rã nda urerese Jesucristo tu mose chã. Sã ureyate riqui jendese ã no.

¹⁵ Sã jẽyate riqui serese co no. Ûquĩ aicuate quia se abe co. Nyebe acheẽ ndei nguiã sechiangui re nyii. —Tasobe rã erea. ¶ nda eyabe jiri sesobe mose erea, ae rei que se nyii ra. ¹⁶—Seso mose Macedonia, taicha bei oso jendea, ae rei que se ra. —Obei abe nda aichabe erea chã. ¶ nda mbae mo mee seje sembu bei sacuã Judea, ae rei que se no nda. ¹⁷ Se ndua mose ùquĩ ndese, ¿eicuãte ùquĩ nde? ¿Acheẽ ñooño ño se quia ùquĩ nde? Se eno i mose, eno ae bei chõ nda se. Secheẽ nda ambuchebiã mbei. Jesús quiatoã ae ùquĩ saã nguiã. ¹⁸ Sã Dios ñee ñooñoa no. Eĩ ure quia ure abe urecheẽ mbuchebiã jẽje ã. ¹⁹ Sã Dios rucucha ucheẽ mbuchebiã mbei no. Jesucristo i equia ee. Ae abe eno i bei quia co. Jesucristo sí cheẽ

ño ngue asenei senei nguia jêje resê. Timoteo rese. Silvano abe rese no. ²⁰—Mbae turã nda asaã jêje, i tuchi rei que Dios quia nande je nyii ra. Jesús rĩ ño eriqui nguia ãquĩ naa naa nande je ã cote. Jesús rĩ ño nandeico nguia Amén i Dios je ã cote. ²¹ Dios ae chõ nandembirãcuã mingo nguia Cristo rese co. Nandemingo icúe umbaerã. ²² Dios que nandesisirõ umbaerã nda. Umbae marca que emi naanguia nanderese ra. Espíritu Turã ngue emondo nandechiangui re ra. Nanderereco quiatu sacua umbaerã.

²³ Aso eã equia jendea nae, jêireĩ ngũia sacua ño asoã nguia jendea aque mose. Seso sereã ae eã ngue eno nde. Acheẽ ñooño eã ño nguia jêje co. Dios riqui sechiã icuate co. ²⁴—Jenderecuarã nda se, ae ãte quia co. —Co rese chõ jêingo ndua, ae aroneate quia jêje co. Taambia chõ Jesús rese. Ñquĩ mi ño asaã nguia jêje. Jê ae chõ jeñimbirãcuã nguia Jesús icua ãquĩ.

2

¹—Aso si eã nda ñee asi asi jêje jembia eã, ae que se ra. ² Seso mose jembia eã, aba quia ra sembia se cote. Jê ño sembia quia resê. ³ Nyebe ambesa mondo jêje nyii resê. Jê mbae mbitirõ sacua seso nonde jendea. Seso sereãte que oso mae jêicuã ndese ra. Sembia eã sacua. Jê nguia nda sembia nguia ña. —Seya mose ra jêya jê abe, ae que se ra. ⁴ Ae ambesa mondo jêje nyii nae, ãquĩ mose que seya eã tuchi riqui jendese ra. Acheseo chee que jendese ra. Jembia eã sacua eã ño ngue aque ambesa mondo nguia jêje. —Pablo ndua tuchichĩ nanderese, i sacua ño ngue ambesa mondo nguia jêje.

Ae mbae icua saã nguia nyii nae, aque jêisi turã ño cote, i Pablo

⁵ Ae siqui ngu ninisi rese nyii nae, sembia eã tuchi chõ aque re. Se mi eã ngue sembia eã nda. Jemo abe abe mbia eã ngue ra. ⁶ Mbae rasi que esaã tuchi huicuã ni cote ra. Jê

emombo mose nyii. Jêisi turã ño cote. ⁷ Aque icua si jêtesarei chõ cote. Jêturã ño ee cote. Jembia jiri. I nda eya eã embiicha eã Dios si. ⁸ Jenyesequa tuchi chõ nguia erese jê. Jêturã sí chõ ee jê. ⁹—Ma secheẽ mumba eã, ae que embesa mondo jêje nyii ra. ¹⁰ Jêtesarei mose aque icua si, se abe atesarei chõ nguia esi co. Jeni ño aico nguia tesarei esi co. Cristo resa rae chõ aico nguia tesarei esi. ¹¹ Nandetesarei mose emo icua si, Satanás siquiã sacua nanderese chõ ñene. Sã Satanás ndiqui aba mbiĩ irĩ mbeite no.

Sechiã ngue ngoi eã mbei Troas ra, i ñi Pablo re

¹² Secuasẽ mose Troas Cristo cheẽ nenei nenei sacua, Cristo que mbia mbuchiisaquia tuchi rei secheẽ andu ra. ¹³ Tito oreãte que seje huee ra. Nyebe sechiã ngoi eã mbeite nguia. Nyebe “co acua quia co” ae nguia hue jenda je. Macedóniaa ngue aso cote ra.

Dios uremingo turã mbeite quia Cristo rĩ co

¹⁴ Aico gracias i beite Dios je co. Ae chõ uremingo turã mbeite nguia Cristo rĩ co. Ae chõ urembirãcuã nguia mbae icua si co. Ae chõ ucheẽ senei senei uquia nguia ure je mangue jenda chooñoa je co. Aba mbushimbuserã tuchi chõ echeẽ nde. Sã aba mbushimbuserã riqui mbae mbushimbu turã jate no. ¹⁵ Cristo riqui urechiangui re co. Nyebe ureico nguia aba mbushimbuserãte Dios je ã. Ure Dios cheẽ nenei nenei mose, emo emo ño echeẽ isi nguia. Siqui bei sacua. Emo emo ño echeẽ isiã nguia no. Nyoĩ sacua tata cuasu. ¹⁶ Ae ra nyoĩ tata cuasu nae, mbae shimbu icua naanguia chõ Dios cheẽ ndiqui nguia ee. Ae ra siqui bei quia nae, aba mbushimbuserã turã naanguia chõ Dios cheẽ ndiqui nguia ee. ¿Aba chõ eaquiato Dios cheẽ nenei nenei ña? ¹⁷ Ae Dios cheẽ senei senei ñooño nguia nae, ãquĩ na eã ño ureico nguia Dios cheẽ nenei nenei ure ã. —Mbae

mo jembu rã ure je, ureã tuchi chõ nguiã Dios cheẽ nenei nenei mose jêje ã. Sã eataque riqui Dios cheẽ abi abi erenei nenei mose no. Eĩ eã ño ure re. Dios cheẽ uresenei turã ja chõ nguiã ure. Ureico mingue chõ nguiã erenei nenei ure ã. Dios chõ ngue ureirabo nguiã ure. Cristo quiato chõ ure re. Dios résaa chõ ureico nguiã echeẽ nenei nenei ã.

3

Jesús cheẽ yasu nandereco quia ã cote

¹ ¿Ureuasú uresaã saã sí reĩ nguiã jêje ã nde? Tei. Jenyĩcua ja chõ ure resẽ. ¿Emo nda ureturã senei mbesa mondo jêje re? ¿Emo nda jêturã senei mbesa imbu ure je re no? Tei. Nandechĩcua ja chõ equia ã ndesẽ. ² Aico jenderequia beite sechiangui re co. Embesa ji rese mae na ño mbia riqui nguiã mae jendese ã. ³ Urechĩmbaaquiato chõ jê ndesẽ. Cristo chĩmbesa rã ño jẽingo nguiã. Tinta je eã ngue jembesa ra. Espĩritu Turã je chõ ngue jembesa nguiã. Sita eã ngue Cristo mbesa nguiã. Jeñia ño ngue embesa nguiã.

⁴ Cristo chõ ã icua nguiã seje. Dios résaa chõ aico nguiã ñee jêje ã. ⁵ Sequirãcuã ae je ra mbae aicuayã. Dios chõ uquirãcuã mee nguiã seje mbae icua sacuã. ⁶ Dios chõ uquirãcuã mee nguiã seje, ucheẽ yasu renei nenei sacuã. —Embesa ji cheẽ jemumbayã mose ra jaemingo bei, i ãte Dios quia nande je ã. Espĩritu Turã ae chõ aba mingo bei nguiã. — Embesa ji cheẽ tamumbayã mbei chõ nguiã seico bei sacuã, i mose emo, aque ra siqui bei eã. Espĩritu Turã ae nandemingo beisa re.

⁷ Sita mbesa ji Moisés quereco quia nae, mbae nininya tuchi que eriqui aque mose ra. Mbía mae sayã tuchi que Moisés ruba riqui ra. Moisés ruba nininyate quiato ngue eriqui nguiã ee. Enininya que uque uquete oso quia cote ra. Moisés chĩmbesa mbía mingo bei aroneate. —Mbía siqui icuã mose, mbía ra mano, i que

Moisés chĩmbesa mbía mbiirandu ra. ⁸ Mbae nininyate raque aque mose. Ae Jesús cheẽ yasu nandereco namo ã nae, ùquĩ nguiarei enininya tuchi Moisés chĩmbesa sí. ⁹ Moisés chĩmbesa quiato que mbía mbiirandu tuchi huĩcuã ndese ra. Jesús cheẽ yasu quiarei nandembiirandu nandecua mbitirõ ndese. Jesús cheẽ yasu quiarei enininya tuchi Moisés chĩmbesa sí. ¹⁰ Moisés chĩmbesa quiarei enininya eã jiri Jesús cheẽ yasu sí. Jesús cheẽ yasu quiarei i tuchi Moisés chĩmbesa sí. ¹¹ Moisés chĩmbesa que siqui bei sacuã eã nda. Jesús cheẽ yasu quia siqui bei sacuã nde. Nyebe Jesús cheẽ yasu enininya tuchi Moisés chĩmbesa sí re.

¹² Jesús cheẽ yasu ra siqui bei. Ùquĩ nandecuate quia ã. Nyebe ureico nguiã ñee tuchi jêje ã. Mbae mbuchecua tuchi jêje. ¹³ Moisés rã eã ño ureico nguiã ure ã. Moisés que nguba chatite quia aque mose ra. —I nda judíos mae eã seruba nininya que rese, i. ¹⁴ Judíos que Moisés chĩmbesa icuayãte quia ra. Namó abe eicuayãte. Emo leer i mose Moisés chĩmbesa je judíos je, icuayã mbeite. Ae siqui Cristo rese nae, ùquĩ mĩ ño Moisés chĩmbesa icua nguiã. ¹⁵ Namó abe judíos Moisés chĩmbesa icuayãte quia ã. Emo leer i mose ee, echecuayã mbeite riqui ee ã. ¹⁶ Emo uba mose Jesús rese, Moisés chĩmbesa abe ra echecuate ee cote. ¹⁷ Jesús sí rei Espĩritu Turã. Nandecó mose Espĩritu Turã ndese, ae chõ nandembui mingo nguiã Moisés chĩmbesa sí ã. ¹⁸ Nande Jesús icua mose, espejo rã ño nanderuba riqui nguiã. Jesús ruba nininya rã i i chõ nande re. Espĩritu Turã abe siqui i i chõ nguiã nanderese. Nyebe nandecó i i nguiã Cristo rã ã.

4

¹ Dios turãte eriqui ure je co. — Jesús cheẽ yasu jêsenei senei mbei mbía je, i Dios quia ure je co. Nyebe ureico nguiã ñimondocho ãte echeẽ nenei nenei mbía je ã. ² Mbae

icuã asaã saã nyecuayã eãte quia co. Ae aba ireĩte riqui nae, ũquĩ asaã saã eãte quia co no. Mbia ambĩrĩ irĩ eãte quia Dios cheẽ nenei nenei co no. Secheẽ ambeta mbeta eãte quia Dios cheẽ je co. Dios cheẽ ndui si tuchi chõ aico nguiã erenei nenei co. Dios rėsaa chõ aico nguiã erenei nenei co. Secheẽ ñooñoa mbia icuate raque quia uchiangui re ũquĩ. ³ Ae asenei senei mbeite quia Jesús rĩĩ nae, echecuayã eã ño ũquĩ nde. Ae ra nyoĩ tata cuasu nae, ũquĩ mĩĩ je chõ echecuayã nde. ⁴ Jesús icua eãte quiatu nguiã. Nyebe aba checuayã nderecua riqui nguiã embaacuayã Cristo cheẽ turã ñĩ co. Nyebe eriqui nguiã Cristo nininya icuayãte co. Dios rã tuchi rei Cristo. ⁵ Se mbia mbaaquiatu quiatu mose, serĩĩ eã ño aico nguiã ñee ee. Jesucristo rĩĩ ño ñene. Ae rei mbia rerecuarã tuchi. Jenimba rã ño aico nguiã Jesús rĩĩ se co. ⁶ Dios que nyaashĩ saã nyii ra. Itondaru beire nyii. Ae sí que nandembaaquiatu quiatu Jesucristo rĩĩ nda. Ae sí que Jesucristo nininya mingue nandechiangui re ra. Dios nininya rei Cristo nininya rã si.

Dios ae rese aico co, i ñĩ Pablo re

⁷ Ure ae urenininya eãte raque. Tuchu achõ na ño ureico nguiã Jesucristo nininya siquĩã mose urerese. Dios ae chõ uquirãcuã mee nguiã ure je co. ⁸ Mbae icuã tã i bei beite raque ure je. Urechimondocho eã mbei rae. Mbae aba mbecoteã chíchĩte raque. Urehuĩ eã mbei ra Jesús si. ⁹ Mbia siqui icuã icuãte raque ure je. Dios quia hui ãte nguiã uresi co. Mbia ureririrõte raque. Urembui eã mbei quia nda Dios si re. ¹⁰ Sã mbia icuã icuã ndiqui Jesús je cose no. Sã eiquia no. Eĩ si chõ mbia nguiã ureiquia serĩ serĩte ã no. Mbia mae sacua Jesús quirãcuã ndese chõ ũquĩ nde. Ae quera si nae, aque quirãcuã ndese mae sacua ño ũquĩ nde. ¹¹ Ureico raque ure ã. Mbia ureiquia serĩ serĩ mbeite quia Jesús

rĩĩ ã. Jesús quirãcuã siqui sacua urerete quirãcuã nea ndese chõ ũquĩ nde. Mbia mae sacua Jesús quirãcuã ndese chõ ũquĩ nde. ¹² Uremano serĩ serĩte equia ã. Jẽingo turã sacua Jesús rese chõ ũquĩ nde. ¹³ Sã embesa ji ñee no: “Dios icuare chõ aico nguiã ñee”, sã i no. Eĩ si chõ ure no nde. Dios icuare chõ ureico nguiã ñee. ¹⁴ Sã Dios quirãcuã Jesús raaque mbuquera no. Eĩ si ra Dios nandembaquera Jesús rĩĩ nande abe. Ae ra nandemingo turã ja ujii cote. ¹⁵ Seje mbae icuã icuã mose, jemingo turã sacua ño ũquĩ nde. ¶ nda Dios uturã mee mbia tubiriã je. ¶ nda mbia tubiriã gracias i tuchi Dios je. Dios iate mbia ũquĩ naa mose.

¹⁶ Nyebe ureico nguiã ñimondocho eã mbei. Urerete si raque quia ngoite qui cote. Urechimbiasu i i chõ nguiã urechiangui re ã. ¹⁷ Ae rasi uresaã nguia ã nae, ũquĩ ndasi ra ua jei chõ. ũquĩ ndasi raande nyii ra Dios mbae turã mee mbei ure je cote. Dios chimee turã nda ua eã mbei uresi cote. ¹⁸ Ae rese nandeico mae mbae nae, ũquĩ nda ua jei. Ae rese nandeico mae eãte nae, ũquĩ nguia ra ua eã mbei. Nyebe ureico nguiã ndua mbae nandemae sayã ndese.

5

¹ Sã tuchia riqui shĩĩ jeite no jẽ. Eĩ si chõ nanderete no nde. Mano jei. Mbia serete iquia mose, tuchia ao ji mo ñĩ ibate seraarõ arõ pe. Dios chisaã ño hue re. Hue tuchia ra shĩĩ eã mbei. Mbia chisaã eã ño ñene. ² Tuchua mo na ndei nanderete. Shĩĩ jei. Co serete rerequia mose, aico jiabute co. Co aico oso sete sechuchua ibatenda rea co. ³ ¶ nda serete yasu areco bei pee ibate. ⁴ Tuchua mo na ndei nanderete. Co serete rerequia mose, aico jiabute co. Seya eãte aico co. Semano sereãte raque. Serete yasu quia areco sete nguiã. Mbae yasu ja ra aque mose seje cote. Amanoa mbei ra aque mose cote. ⁵ ũquĩ je chõ ngue Dios sererecoquiatu nguiã. Semingo turã mbei ra cote. Nyebe Espĩritu Turã mondo

nguiã seje. Sembiirandu sacuaã ùquĩ ndese. Dios Espíritu Turã mondo mose seje, umbae marca mii naanguia serese chõ ùquĩ nde.

⁶ Nyebe aico nguiã ñimondocho eãte co. ã nanderete rerequia bei mose, eĩ nda nandeso aroneate rei ibate siqui Jesús rese. ⁷ Aico beite Dios icua co. Amae ãte raque erese. Ae rese nandeico mae nae, ùquĩ ndese aico ãte co. ⁸ Nyebe aico nguiã ñimondocho eãte co. Co serete ajea bite raque oso sacuaã ibate siqui bei nonde Jesús rese. ⁹ Ae Dios bite nae, ùquĩ asaã sete quia ee co. Dios seisi turã nonde chõ ùquĩ nde. Aa seico mose. Pee ibate seico mose abe no. ¹⁰ Cristo résaa ra nandecu ja emo mose. Ae nanderea sacuaã. Nandeicua sacuaã. Ae mbae turã saã saã nguia siqui mose íbii nae, Cristo ra mbae turã mondo ùquĩ je pee cote. Ae mbae icuaã saã saã nguia siqui mose íbii nae, ùquĩ je ra Cristo mbae icuaã mondo

Dios ae nandemingo turã nguiã uchiese Jesucristo rii co

¹¹ Aba siquichesa tuchi cho Dios re, mbia siqui eã mose erese. Nyebe ureico nguiã mbia mbuti mbuti tuchi co. Dios riqui ureicuate co. Jẽ abe jẽingo ureicuate ùquĩ ndenoae. ¹² ã ureico urecuasu raã naa si ãte raque ã. Jembia sacuaã ño ureico nguiã ñee urerĩ sí ã. ¶ nda jeñee aquiatu mbia icuaã ñee ndibishorõ. Ae uturã saã ñooño nguia nae, ùquĩ ñee ndibishorõ sacuaã ño ñene. ¹³ Urearacuayã mose, Dios cheẽ ndese siqui sacuaã ño ñene. Urearacua mose, jembaaquiato sacuaã ño ùquĩ no nde. ¹⁴ Sã Cristo nyesecua tuchite nanderese no. Ae chõ sembuti mbuti nguiã co no. Cristo que mano nande ja je ra. Nyebe nande abe nandemano ja nguiã erese. ¹⁵ Cristo que mano nande ja je ra. Ae nandebite riqui nae, ùquĩ ndese nandeico eã sacuaã ño Cristo mano nguiã. Ae Cristo bite riqui nae, ùquĩ ndese nandeico sacuaã nguiatu ngue Cristo mano

nguiã. Nande je que Cristo mano nda. Nande je que Cristo quera si no nda.

¹⁶ Jesús quiatoã na eã ño ureico nguiã mae mbia rese ã. Urechesequa chõ nguiã mbia rese ã cote. Urechesequa eãte raque Cristo rese nyii. ¹⁷ Emo ñimbucha mose Cristo rese, mbia yasu rã ño ùquĩ cote re. Ae esaã saã nguia mbae icuaã nyii nae, ùquĩ si que hui ja cote ra. Mbae yasu ja chõ ee cote re. ¹⁸ Dios ae ùquĩ saã ja nguiã nande je co. Dios ae nandemingo turã nguiã uchiese Jesucristo rii co. — Mbia emingo mingo bei serese sequia torã jẽ, i que Dios seje ra. ¹⁹ — Sã mbia sequiatorã ja, i que Dios Cristo rii nda. ùquĩ je chõ ngue Cristo mano nguiã. Mbia icuaã mbutiã sacuaã esi chõ ngue Cristo mano nguiã. — Mbia emingo mingo bei serese sequiatorã jẽ, i que Dios seje ra. ²⁰ Cristo chõ sembucheẽ nguiã co. Secheẽ ae eã ñene. Dios ñee na jẽje chõ aico nguiã ñee jẽje co: Dios quiatorã ño jẽingo jẽ. ²¹ Mbae icuaã mo ngue Cristo saã eãte rei ra. Dios que mbae icuaã naasa saã tuchi ee ra. Dios nandemingo turã mbei sacuaã ño ùquĩ nde. Sã Dios nandemingo turã mbei nandeico mose Cristo rese no.

6

¹ Dios resenda chõ ureico nguiã Dios cheẽ nenei nenei ã. Dios turã jẽisi chooñoa ño nguia jẽ. Jẽisi tuchi quiatu jẽ. ² Eĩ ngue embesa ji hui Dios cheẽ nda:

“Jeñee mose seje, jeñee ngue achandura.

Aendirõ ngue mbae icuaã si ra”, i que Dios mbi a je cose ra,

i ñi embesa ji re. Namõ ño Dios riqui nguiã aba cheẽ anduse co. Namõ ño Dios riqui nguiã mbia rirõse eicuaã si co no. ³ ã ureico mbia mo mbiĩrĩ irĩ eãt e ã. ¶ nda mbia urecheẽ andu turã Jesús rii. ⁴ Mbae uresaã turã sete quia ure ã. — Dios rimba turã ño ùquĩ nde, i nonde mbia ure rii. Nyebe ureico nguiã ñimbirãcuã tuchi mbia icuaã mose ure je ã. Mbae tiã mose abe ure je. ⁵ Ureiruaã nua ngue equia ra. Uretarõ tarõ mbei que

equia ra. Urerecoteã mbei que eriqui ra. Ureque reã tuchi que equia ra. Uteriãcuã tuchi que eriqui no nda. ⁶ Ũquĩ icuã eĩ eĩ mose ure je, ureico turâte que equia ra. Ure que Dios ureicuate quia ra. Urechimbirãcuãte que equia ra. Ureico turâte que equia mbia je no nda. Espíritu Turã ngue siqui tuchi urerese no nda. Urech- esecua choõñoa ngue equia mbia rese no nda. ⁷ Dios cheẽ ichoiñosa reã ngue uresenei senei tuchi quia mbia je ra. Dios quirãcuã ngue siqui tuchi quia urerese ra. Ae uturã Jesucristo mee nguia ure je nae, ũquĩ mĩ ño urereaquiato bei nguia co. ⁸ Emo emo mose mbia riqui ñee turã urerĩã. Emo emo mose mbia ñee icuã urerĩ no. —Aba mbĩrĩ irĩsa, i tuchi que mbia quia ure je emo emo mose no nda. —¡Ae bei jê! i tuchi que equia urecheẽ je emo emo mose no nda. ⁹ Mbia riqui ureririrõ ndirõ emo mose ã. Emo emo mose eriqui ureisi turã turâte ã no. Mbia ureiquia arõ arõte raque quia ã. Urereco ureico beite ã. Mbia urembaasi asite raque quia ã. Ureiquia eãte no. ¹⁰ Ureya eãte raque. Dios rese quia ureyate re. Mbaecha reã ndaque ure no. Mbaecha que uresaã uquia tuchi mbia je ra. Mbae eã tuchi raque urembae. Dios rese quia urembae tubiriã tuchi re.

¹¹ Urecheẽ nyecuate que jêje ra. Urecheẽ ngue jembĩrĩ iriã tuchi quia ra, Corinto jenda. Ureico nyesecua tuchi jendese a. ¹² Ure que urechao eã jêsi ra. Jê nguiatu ngue jenyao nguia ure si. ¹³ Sã mbia mo ndiqui ñee nguiirĩ je no. Eĩ ae chõ nguia ñee jêje. Jendu rã ño aico nguia jêje. Jenyesecua tuchi chõ nguia serese. Sã aico nyesecua jendese no.

Dios chuchua tuchi chõ jendete re

¹⁴ Dios quiatoã ndese ra jembũchachũ jê. Dios quiatoã na eã ño jê nde. Sã mbae turã ndiqui mbae icuã mbĩroã no. Sã nyaashĩ ndiqui itondaru mbĩroã no. ¹⁵ Sã Cristo riquiã Satanás ndese no. Eĩ si chõ Cristo quiato

siqui aroneate nguia Cristo quiatoã ndese no. ¹⁶ Sã Dios abareã siqui aroneate Dios chuchua no. Jendete rei Dios chuchua tuchi. Dios riqui tuchi jendete ye ũquĩ. Sã Dios ñee ã no:

Erete ye ra aico. Ererecuarã nda se.

Mbia ra siqui serui,

sã i Dios no. ¹⁷ Dios cheẽ ño ã no nde:

Jêhui chõ mbae icuã si. Icuẽ jêingo.

Mbae icuã ndese ra jêocochĩ.

Jaëisi turã nda se chã.

¹⁸ Jendurã nda se chã.

Seriirina nda jê ña.

Sequirãcuãte se,

i que Dios cheẽ mbesa ji ra.

7

¹ Dios cheẽ ño ã nde. —Aico bei ra jendese, i que ra. Nyebe nandehui mbae icuã si ñimbitirõ mbei. Cochee chõ nandeco Dios je. Nandereco nandemee tuchi ee.

Seyate aico jendese co cote, i ñi Pablo re

² Ureisi turã ño jê. Mbae icuã mo ngue uresaã ãte jemo je ra jê. Ureico que equia jembĩrĩ irĩ ãte ra jê.

³ Jêicuã i sacua eã ño aico nguia ñee jêje. Achesecua tuchite quia jendese co. Semano mose chee. Sã ñi acheẽ jêje nyii no. ⁴ Seyate aico jendese co. Secheẽ nda emumbayã, aete se quia jeni co. Mbia icuã icuã mose seje, seyate aico jendese co.

⁵ Urechu que aa Macedóniaa, aque mose bei que urerecoteãte ra. Mbae icuã ngue uremingo asi asite rei quia ra. Mbia icuã icuãte que eriqui rei ure je ra. Sechiã ngue ngoi ãte rei quia ra.

⁶ Dios que sechiã mbocoi Titõ ngasẽ mose cote ra. Sã Dios riqui uquiato mbia beite eya eã mose no. ⁷ Tito mĩ ndese eã ño seya re. Seya tuchi que sembiirandu mose jendese no nda. Jê nane ngue jeñee Tito mbirãcuã nda.

Aquere que Tito ru sembirãcuã cote ra. —Hue echi ndua tuchite nderese huee, i que u ñee seje ra. Nyebe seya tuchite riqui nguia jendese. Jêtesarei eãte quia equia sesi reaẽ. ⁸ Ae ambesa mondo jêje nyii nae, ũquĩ ngue jembia

eãte rei ra. Erea ramo mose. — Amondo jirichĩ nguia, ae rei que se quia nyii ra. — Amondo jirichĩ nguia, ae ãte se quia co cote. ⁹ Seyate aico jendese co cote. Jẽya eã nĩ eã ño ñene. Jeñimbitirõ nguiatu ngue re. Maende sechimbesa rese. Sechimbesa jembia eã mose jẽicuã ndese, Dios rese que jendua cote ra. Sechimbesa chõ jemingo turã nguiã cote. ¹⁰ Emo ia eã ñooño mose huicua ndese, ũquĩ nda nyoĩ tata cuasu. Emo ia eã tuchi mose huicua ndese, hui ra huicua si cote. Dios ra emingo bei cote. — Ahui jirichĩ nguia seicuã si, iã tuchi rae. ¹¹ Sechimbesa oso mose jẽje, jẽya eã tuchi que jẽicuã ndese ra. Nyebe Dios ia tuchi riqui nguiã jendese. Jendua tuchi que ra. — Mbae icua ngue uresaã eãte resẽ, jenyẽ eãte que ra. Mbae icua ndese que jemae sereã tuchi cote ra. Jẽireĩ ireĩte que equia mbae icua si ra. Jemae sete que equia serese ra. Ae siqui ngu ninisi rese nae, aque que jemombo cote ra. Mbae que jẽsaã turã jate ra. Eicuãte i aroneate que emo nguia jẽje ra. ¹² Ae siqui ngu ninisi rese nae, aque je eã ngue ambesa mondo nguiã. Eru je eã ño ngue eno nde. Jẽ ja je chõ ngue ambesa mondo nguiã. — Pablo riqui nyesequa tuchichĩ nanderese, i ja nonde chõ ngue ambesa mondo nguiã. ¹³ Nyebe ureya tuchi riqui nguiã jendese co cote. Jẽ ngue Tito abe jembia cote ra. Jẽ hui mose mbae icua si. Seirandu mose ũquĩ ndese que seya tuchi se abe cote ra. ¹⁴ Sã ñi aico jẽturã nenei nenei Tito je nyii no. Eĩ jenyẽ si tuchi equia siqui turãte ũquĩ. Nyebe seireĩ ngũĩate riqui nguiã ñee jeniũ ũquĩ. Acheẽ ñooñoa ngue jẽturã nĩ Tito je ra. Sã aico ñee ñooñoa emo mose jẽje no. ¹⁵ Tito riqui nyesequa i ite jendese co. Ndua beite equia jendese co. Echeẽ nguiatu que jemumbayã tuchi quia ra. Cocheete quiatu que jẽingo ee ra. Jẽisi turãte quiatu que equia ra. ¹⁶ — ũquĩ nda siqui tuchi Dios rese, ae tuchi se quia jeniũ co. Co seyate aico jendese co.

8

Jembae jemee jiri quia Dios je

¹ Jesús quiato Macedonia jenda tasenei jẽje cote, Seresenda. Hue jenda ja iglesias. Dios turã tuchi que eriqui ũquĩ ja je ra. ² Mbia icuãte que eriqui rei ee ra. Eya beite chõ ngue eriqui ra. Mbaecha reã ndaque. Mbae que emondo tuchi guia Jesús quiato je ra. Mbaecha rã tuchi mbae mondo mbia je. ³ Umbae que emee tuchi ra. Embae tubiriã eã ndaque. Abei tuchi quiatu ngue re. Amae ngue erese ra. ⁴ — Ure abe ra urembae uremee tuchi Jesús quiato je, i tuchi que seje ra. ⁵ Mbaechõ eã ngue emee Dios je ra. Nguete rane ngue emee ee ra. Ure je abe que ngueco mee nda. Mbae turã naa naa mbei sacua ure je Dios rĩ. Aquere que umbae mee tuchi Jesús quiato je cote ra. ⁶ Macedonia jenda umbae mee tuchi mose Dios je, urendua que jendese cote ra. Nyebe Tito amondobe quia aque. Tito jembae ofrenda munua nua ja sacua. Sã Tito ñee nyii no. — Tamunua nua ja, sã i no. ⁷ Sã jẽingo Dios icua tuchi no. Sã jẽingo Dios cheẽ icua jate no. Sã jẽaquiatute mbia mbaaquiatu no. Sã jẽingo sete riqui Dios cheẽ ndese no. Sã jẽingo nyesequate serese no. Nyebe jembae jemee tuchi quiatu ofrendarã cote.

⁸ — Secheẽ nguire quiatu jembae jemondo Dios je, ae ãte se quia co. Jẽ ae chõ jendua mbae mee nonde. Jesús rese jenyesequa tuchi mose, jembae ra jemee mee Jesús quiato je. Sã Macedonia jenda umbae mee mee Jesús quiato je no. ⁹ Nandererequa tuchi chõ Jesucristo re. Jesucristo turã jẽicuate quia ũquĩ. Mbaecha tuchi rei que ae ereco mose ibate ra. Mbaecha reã ngue esaã tuchi u íbii nande je ra. Eriũ ño Dios riqui nguiã mbae mondo tuchi nande je. Ae mbaecha reã naa mose u íbii. ¹⁰ Tacheẽ tuchi rã jẽje. Tenda nongue mose que jenduate Jesús quiato mbaecha reã ndese ra. Mbae que jemondo sete quia ee ra. Jẽ nane

ngue “ofrenda nandemondo” jentye Macedonia jenda si ra. Cosete que jeñee ñee. Jemondo turã cote. ¹¹ Ae ra jemondo nae, ùquĩ ja jemondo jei eae. Mbae jemondose jiri quia ee. Sã mbae jemondose ee nyii no. Jembae tubiriã mose, jemondo tuchi ee. Jembae mii mose, co mii jemondo ee. ¹² Nande mbae mo meese mose, Diobi tuchi chõ ùquĩ nde. —Mbae tubiriã embu seje, iã nda Dios mbaecha reã je. ¹³ —Jembae jemondo ja tuchi mbaecha reã je, ae ãte quia jẽje co. ¹⁴ Sã jembae nyiabiã jiri mbaecha reã mbae rese. Sã jembae tubiriã namo no. Emee sacua ùquĩ je. Emo mose ra ùquĩ mbae tubiriãte no. Emondo sacua jẽje jembae eã mose no. Ùquĩ mose ra jembae nyiabiã jiri ja cote. ¹⁵ Sã embesa ji riqui ñee no: Ae mbae tubiriãte nae, embae rire eãte que ra. Ae embae mite nae, embae que ua eãte ra, i que embesa ji ra.

Tito ra nyoi jendea, i Pablo

¹⁶ Sã aico ndua tuchi jendese co no. Eĩ si tuchi Dios quia Tito mundua jendese co. Nyebe aico nguiã gracias ite Dios je co. ¹⁷ Tito si quia jendea aque. Secheẽ nguire achõ eã esi nguiã jendea aque. Ae abe que ndua jendese ra. ¹⁸ Tito rese Jesús quiato mo amondo quia jendea aque. Jesús quiato ñee turã jate quia aque riĩ aque. Jesús cheẽ nguiatu esenei senei mbeite nguiã aque. ¹⁹ Jesús quiato que aque irabo ra. Oso sacua serese. Ofrenda munua nua sacua serese. Sã ureico ofrenda munua nua Dios mbia sacua no. Mbiam “abei” i sacua jẽje. ²⁰ Ae que siqui beite urerese ofrenda isi isi mose ra. Mbiam ñee icua eã sacua ure riĩ. “Ofrenda que embuquiachã nda”, i eã sacua mbiam ureriĩ. ²¹ Mbae uresaã turãse rete quia ã. Dios ia tuchi sacua ure rese. Mbiam abe ñee icua eã sacua ure riĩ. ²² Ureresenda mo abe uremondo quia ùquĩ ndese aque. Ae quiarei mbae raã naase bei Dios je. Oso sete equia jendea co. ²³ Tito rei seresenda tuchi. Siqui

bei que equia serese Dios cheẽ nenei nenei mose ra. Ae nyoi quia jendea Tito rese nae, iglesias chõ emondo nguiã jendea ùquĩ. Cristo quiato tuchi chõ ùquĩ nde. ²⁴ Ùquĩ jẽisi turã ja chõ jẽ. Sã urecheẽ ee jeni nyii no. —Jẽisi turã ndae. Nyesecua tuchi ra jendese, ure que ee nyii ra. Nyebe jẽisi turã ño. Eĩ nda iglesias jenda ja abe “eturã” i jeni.

9

Jembae ofrenda jemunua ja rã emondo sacua mbaecha reã je

¹ Aete aico embesa eã jẽje ofrenda riĩ. —Ae ae chõ nda mbae mo mondo nguiã Jesús quiato je, se ñee mose rocoĩ ee, ae que se ra. ² Jẽ ae chõ mbae jemondose nguiã Jesús quiato mbaecha reã je ùquĩ. Jeni ño aico nguiã ñee Macedonia jenda je co. —Tenda nongue mosenda bei chõ Acaya jenda riqui nguiã mbae mondose Jesús quiato je ùquĩ, ae se quia Macedonia jenda je jeni co. Nyebe ùquĩ abe riqui nguiã mbae mee sete ee cote. Jirandure jendese. ³ Aque mbiam amondo quia jendea aque. Jẽ icoquiato sacua. Mbae jemondo sacua Jesús quiato mbaecha reã je. Ureireite ra jẽ ofrenda mondo eã mose se ñeende jeni nyii. ⁴ Seso mose jendea, Macedonia jenda mo abe ra nyoi serese reae. Jẽ ofrenda munua eã mbei mose, ureireite ra urecuasẽ mose hue. ⁵ Nyebe ã nane amondo nguiã jendea aque. Jembae ofrenda munua ja sacua. Ae riĩ jeñee ndei tenda nongue mose. —Ofrenda jemunua na, ae bei sereãte se. Jẽ ae chõ ofrenda jemunua nua, jenyese-cua mose mbiam rese.

⁶ Jendua rã ã ndese: Ae mbae mii jiri chitiquia quia, aque ra mbae a ucua mii jiri. Ae mbae chitiquia tuchi quia, aque quia ra mbae a ucua tuchi. ⁷ Mbae ata nandemondose mose nandechiangui re, mbae ata nandemondo chõ. Mbae mii nandemondose mose nandechiangui re, mbae mii nandemondo chõ. —Mbae

amondo jirichĩ, nande mose nandechiangui re, eicuãte ũquĩ. Ae eyate riqui umbae mee mose emo je nae, Dios bite ũquĩ. ⁸ Dios quirãcuã tuchite riqui co. Mbae emondo ja arõte quia nande je co. Mbae ua eã mbei sacuã nandesĩ. Mbae nandemondo mondo bei sacuã Dios quiato mbaecha reã je. ⁹ Sã embesa ji riqui ñee no:

Mbae que Dios quiato mondo mondo bei quia mbaecha reã je ra.

Echisaã turã si ra mbia tesarei eã mbei,

i que embesa ji ra. ¹⁰ Dios chõ mbae eĩ mondo nguiã nande je etiquia sacuã. Dios chõ mbae mondo nguiã nandechiurã no. Dios chõ “jabei chõ jẽ jẽ!” i nguiã nande je. Dios chõ mbae mee nguiã nande je emondo sacuã mbia mo je. ¹¹ Dios ra mbae mondo tuchi jẽje. Eĩ nda jẽ mbae jemondo tuchi ofrendarã. Se jeñimee ofrenda mondo mose mbaecha reã je, gracias i tuchi ra Dios je cote. ¹² Nande mbae mo mondo mose Jesús quiato mbaecha reã je, quiaru turã jiri ra equia cote. ũquĩño eã nda esaã nguia. Gracias i abe ra Dios je. ¹³ Jẽ mbae mo mee mose Jesús quiato mbaecha reã je, mbaecha reã nda ñee turã Dios je jeni cote. —Cristo cheẽ emumbayã tuchi quia ã, i ra jeni cote. —Eriqui mbae mee tuchi chĩ mbia ja je, i ra ñee turã jeni cote. ¹⁴ Mbaecha reã nda ñee tuchi jeni Dios je cote. Dios jendeaquiato sacuã. Mbaecha reã nda ndua tuchite jendese cote. Jẽ mbae mondore ee nyii. ¹⁵ Dios quiato que mbae turã tuchi mondo nande je ra. Nyebe nandeico nguiã gracias i ee.

10

Mbia mbaaquiato sacuã ño Dios semĩ nguiã

¹ Se rei Pablo. Tacheẽ nyecua jẽje. Nandeico mingue chõ nguia Cristo rã si jẽ. Cochee chõ nandeico Cristo rã si jẽ. —Cochee chõ Pablo riqui nguiã siqui mose nanderese. Siqui eã mose nanderese, ucuasu esaã saã ño nguiã aque, jenyẽ chõchĩ equia seriĩ ũquĩ.

² Mbae jësaã turã turã ja chõ nguia. f nda acheẽ asi asiã jẽje seso mose jendea. Emo emo ñee icuã ño nguiã seriĩ. —Dios je eã ño Pablo riqui nguiã mbae raã naa, i seriĩ. ũquĩ je quiato acheẽ asi asi arõte nguiã. ³ Mbia chõ ndaque se. Mbia quirãcuã je eã ño aico nguiã mbae raã naa co. Dios quirãcuã je chõ aico nguiã mbae raã co. ⁴ Sequirãcuã je eã ño aico nguiã mbae raã. Dios quirãcuã je chõ ñene. Nyebe aico nguiã mbia icuã ndiquisã quisã co. Mbia icuã quirã cuãteraque. ⁵ Ae mbia mundua icuã icuã nguia Dios riĩ nae, ũquĩ asiquisã quisã ño nguiã co. Mbia amundua turã ja quia Cristo riĩ co. Cristo cheẽ mumbayã sacuã cote. ⁶ Jẽ nane Dios cheẽ jemumbayã na jẽ. Aquere ra Dios cheẽ mumbasa amombo ja cote.

⁷ Mbia chiangui renda rese jemae ãte. Earonda rese chõ jẽingo nguiã mae. —Cristo mbae chõ se re, i mose emo, ae miĩ eã ño Cristo mbae re. Se abe chõ ñene. ⁸ Se ecuasuraã naa mose, seirei ngũiate. Dios quiato ngue semĩ nguiã ererecuarã. Jembaaquiato turã sacuã ño ngue Dios semĩ nguiã ererecuarã. Jembicuã sacuã eã ño ñene. ⁹ Jaembusiquiche sereãte sechimbesa je. ¹⁰ Mbia ñee icuãte raque seje. —Pablo reco mose isho, ñee asi asite equia ucheẽ mbesa mbesa mondo nande je co, i jemo nguia seriĩ ũquĩ. —Siqui mose nanderese, ererecuarã raã naa aquiatoate cote, i jemo nguia seriĩ ũquĩ. ¹¹ Ae ñee nguia ũquĩ nae, ũquĩ je tacheẽ. Co secheẽ asi asi ambesa mondo quia jẽje aque nae, anyae sí ra ñee asi asite seso mose jendea huee. Secheẽ mbesa ji ra achabiã seso mose jendea huee. ¹² Ae ñee mbeite quia uturã niĩ, ũquĩ na eã ño se re. —Aque rã si chõ aico nguiã se co, i beite equia ũquĩ. —Seturãte aico aque si co, i beite equia ũquĩ no. ũquĩ ñee mose ũquĩ, earacuayãte riqui ũquĩ.

¹³ Seturã nda asaã saã eã. Dios ae chõ “hue eso, pe eso”, i nguiã seje co. Ae chõ ngue semondo nguiã jendea.

14 Se rane ngue Dios semondo jêje Cristo cheẽ nenei nenei sacua nda. Nyebe hue jenda ja sembaerã, se embaaquiato sacua Dios cheẽ ndese. Ae Dios riqui “hue eso” i ãte seje nae, huee ra asoã. ¹⁵ —Sechimbaaquiato chõ uqui nde, ae aronea tuchi quia emo ñimbaaquiato je co. Jẽ Cristo icua i i tuchi mose, jendobeinda quia ra ambaaquiato i i tuchi oso cote reae. ¹⁶ Seso sete jendobei Cristo cheẽ nenei nenei hue jenda je. Sechimbaaquiato ae aroneate emo ñimbaaquiato je. ¹⁷ Emo ñee turãse mose mbae mo ñi, sã Dios rĩ nguiatu ñee turã. ¹⁸ Ae uturã saã saã nguia nae, Dios biãte uqui. Ae rĩ nguiatu Dios riqui ñee turãte nae, uqui nguiatu Diobi tuchi re.

11

Mbia mbaaquiato icua icuãsa rese ra jẽingo chĩ

¹ Jeñimbirãcuã jiri se ñee mose jêje jẽ. Seturã tasaã saã jiri ñee jêje. ² Aqueteãte jendese jẽ. Dios mbaerã jẽ, ae que se ra jẽ. Sã acuan mo ndiqui siqui eã mbei ngu mo ndese no. Sã mbia emee acuanindu mo je cote no. Eĩ tae si chõ jemee Cristo je. Cristo mĩ mbaerã nda jẽ cote chã. ³ Sã mbei Eva mbirĩ irĩ cose no. Eĩ jenyete si arõte jẽ ndeae. Eĩ si arõ mbia jembiãcha Cristo icha si. Jemundua icuãte chõ nda reae. Cristo mĩ ndese chõ jẽingo jẽ. Sã acuan ndiqui ngu mĩ ndese no. ⁴ ¿Mbaerã jenyiisaquia turã mbia jembaaquiato icua icuã mose re? Mbia Jesús abareã nenei nenei mose jêje re. Mbia Espiritu Turã abareã abe renei nenei mose jêje re. Mbia Jesús cheẽ turã abareã nenei nenei mose jêje re no. Se que uqui asenei senei ãte quia jêje resẽ. ⁵ Uqui ñee ndese que jenyiisaquia, ¿mbaerã nda jenyiisaquia eã secheẽ abe rese re? Se quia Jesús cheẽ aicua tuchi quia uqui si co resẽ. ⁶ Secheẽ turã eã e raque. Seaquiature quia aico nguã Dios cheẽ ndese co. Jẽingo seicuate uqui ndesẽ.

⁷ —Mbae jemondo seje, ae ãte que se quia Dios cheẽ nenei nenei mose jêje ra. ¿Eicuãte uqui nde? Aico mingüete que se quia jêje ra. Jẽingo turã sacua Cristo rese. ¿Eicuãte uqui nde no? ⁸ Seico mose jendese jembaaquiato quiato mose, mbae mo ngue jemee ãte quia seje ra. Jesús quiato ishonda quiato que mbae mo mee mee nguia seje ra, se siqui mose jendese. ⁹ Seico mose jendese que mbae jemondo eãte seje resẽ. Sembae eã mose que “mbae embu seje” ae ãte jêje resẽ. Jesús quiato que ngaẽ Macedonia si nae, uqui nguiatu que mbae mee tuchi sembae eã mose resẽ. “Mbae embu seje” ae eã mbei ra jêje. ¹⁰ Cristo riqui sechianguire co. Uqui aicuate. Sebite “mbae embu seje” iã mose se jêje. “Acaya jenda que mbae mee tuchi ndeje ra”, i aroneate emo seje jeni. ¹¹ ¿Mbaerã ño mbae aisiã jẽsi chã? Achesecua eãte quia jendese reae. Tei. Uqui eã ñene. Achesecuate rei jendese resẽ.

¹² Mbia ñee eã sacua nda mbae aisiã mbei jẽsi resẽ. Ae Jesús abareã senei senei nguia nae, uqui ñee eã sacua. “Pablo rã sí chõ ure re” uqui i eã sacua. ¹³ Cristo cheẽ nenei neneisa turã eã ño uqui nde. Mbia mbirĩ irĩsa chõ uqui nde. Cristo cheẽ nenei neneisa raã ñooño ño nguã uqui. ¹⁴ Satanás na sí chõ uqui ndiqui nguã uqui. Satanás uturã saã saã ño nguã. Angel turã naa naa ño nguã no. ¹⁵ Ae siqui Satanás ndui nae, uqui nda uturã saã ñooño Satanás na sí. Nyebe ra Dios uqui mbutiã tuchi emo mose.

Pablo mbae rasi saã tuchi

¹⁶ “Earacuayã” jenyechĩ nda seje jẽ. “Earacuayã” jenyete raque seje, seandu rã se. Secuasú tasaã saã mbirĩ na jêje. ¹⁷ Ae aico ñee jêje namo nae, Dios cheẽ eã ño uqui nde. Earacuayã na ño aico nguã ñee jêje. Secuasú asaã saã ño nguã ñee jêje co. ¹⁸ Sã mbia riqui ucuasu raã naa jate no. Eĩ tae rã se abe secuasú raã naa jêje. ¹⁹ Jẽaquiature

reĩ jẽ ndeae. Jẽingo ñĩmbirãcuãte eaquiataũ je ũquĩ. Seaquiataũ je abe jeñĩmbirãcuã ño. ²⁰ Ae icuã icuã mbeite riqui jẽje nae, ũquĩ je jẽingo ñĩmbirãcuã mbeite ũquĩ. Jembuquieĩ quieĩ chooño mose. Jembae mbutiã chooño mose abe no. Ucuasu raã naa mose abe no. Ucuã mose jẽsiba rese abe no. ũquĩ je jẽingo ñĩmbirãcuãte ũquĩ. ²¹ Se quiatu que ũquĩ asaã saã eãte quia jẽje ra. Aico mingue chõchĩ jẽje. Acheẽ asi asi eã ñochĩ jẽje. Emo ucuasu raã naa mose, se quia secuasua asaã saã mbite nguiã esi. Earacuayã na ño aico nguiã ñee se co. ²² ¿Hebreos ũquĩ nde? Se abe chõ ñene. ¿Israelitas ũquĩ nde? Se abe chõ ñene. ¿Abraham nducucha ririĩ ũquĩ nde? Se abe chõ eno nde. ²³ ¿Cristo rimba chõ ũquĩ nde? Se quia Cristo rimba tuchi esi re. Earacuayã na ño aico nguiã ñee co. Se quia serecoteã tuchite Dios cheẽ nenei nenei mose esi re. Se quia mbia seiruã nua tuchi nguiã esi. Se quiatu ngue mbia sematã matã tuchi nguiã esi. Se quiatu ngue mbia seiquia serĩ serĩ tuchi nguiã. ²⁴ Judíos que seiruã nua mbei quia ra. Treinta y nueve azotes bei que eriqui seiruã nua nda. Emo mose treinta y nueve no. Emo mose eĩ sí no. Cinco veces chee. ²⁵ Ira que euru uru serese tres veces ra. Emo mose que sei sei sita je ra. Tres veces que barco ñĩmi ama ndiite re seje ra. Emo mose que aitõ ama ndiite re barco eã nda. Abebi chõ ngue sequia ra. Nyaashĩ miĩ abe que amumba quia mbebi ra. Barco ñĩmi mose seje. ²⁶ Acuata tuchi que sequia ra. Mbae icuã ngue seiquia arõ arõ tuchi quia ra. Secuata mose ama ndui. Seico mose abe sucha cuasu no. Seico mose turuquia ri no. Mbia mbae mbuquiachãsa que seiquia arõ arõ tuchi quia no nda. Seresenda abe que seiquia arõ tuchi no nda. Judíos eã abe que seiquia arõte no nda. Jesús quiato chooño abe que seiquia arõte no nda. ²⁷ Serisirõ ngue nyichuarõ arõ tuchi quia ra. Aqueã mocoĩ mocoĩ tuchi que se quia

no nda. Seriãcuã mocoĩ mocoĩ tuchi que eriqui ra. Seisei abe tuchi que eriqui ra. Nyiiseĩ ngue airara mocoĩ mocoĩ tuchi quia ra. Seirao eã tuchi que eriqui no nda. ²⁸ ũquĩ miĩ eã ngue ra. Jesús quiato rese abe que aico ndua ndua ra. Sã iglesia jenda ja ja siqui tuchi Jesús rese, ae beite sequia ndua co. ²⁹ Jesús quiato mo mbae rasi raã mose, se abe seya eã ndasite riqui erese co. Emo icuã icuã mose Jesús quiato mo je, se abe paama i rasite aico co.

³⁰ Sequirãcuã ndese eã nda seya riqui nguiã. Sequirãcuã nea ndese chõ nda seya riqui nguiã. ³¹ Acheẽ ñooño eãte quia co. Dios quia secheẽ icuate nguiã. Jesucristo ru chõ Dios re. Sã mbia riqui ñee turã mbei erĩ. ³² Aretas resenda que serequia rei Damáscoo ra. Seiquia sacuã. Ae que alcalde ra. Ae que mbia mondo rei eiquesa raarõ nda. Setarõ nda eã nde. ³³ Hue ri ngue asoã mbei ra. Mbia que sembuquichi imbu irairu ye ra. Ventana ni. Eĩ ae que oso chee mbia icuã si ra.

12

Pablo ibatenda tea cuu

¹ Secuasua asaã saã ñochĩ nguia co. Ae rese Dios semumae mae mbeite cuu nae, ũquĩ nguiatu tasenei jẽje. ²⁻³ Cosete que Dios sererao ibate cuu ra. Hace catorce años. Serete resebe Dios sererao reae. Seaĩ achõ ere no ae. Aicuayãte se. Dios ae eicua nguiã. ⁴ Dios que sererao ibate ra. Huee que ibatenda cheẽ turã achandu ra. —Ae erechandu nae, ũquĩ nda ereseneichĩ mbia je, i que Dios seje ra. ⁵ Ibatenda cheẽ andure secuasua asaã saã arondete raque se. Sequirãcuã je ra secuasua asaã saã eã. Sequirãcuã nea ndese chõ seya riqui nguiã. Sequirãcuã nea mose quia Dios uquirãcuã mee tuchi nguiã seje cote. ⁶ Secuasua ra asaã saã ndaque, asaã ñooño eã ño se re. Dios quia que uquirãcuã mee seje ra. Mbae ja raã sacuã. Secuasua ra asaã saã eãte jẽje. Jẽ ae chõ nda jemaẽ nguiã serese

seicua nonde. Jẽ ae chõ nda secheẽ jeñandu nguiã seicua no. ⁷ Ae rese Dios semumae cuu nae, ùquĩ eturã tuchite seje. Ûquĩ ndese maende que aico secuasu raã naa arõte raque ra. Nyebe Dios nyu raanguia mondo nguiã sequi rĩ. Satanás sembecoteã sacua. Dios semingo tochi sacua. ⁸ — Nyu raanguia esiqui sesi, ae tuchi rei que Cristo je tres veces ra. ⁹ Cristo que ñee seje ra. —Coche rei ñene. Sã ñiño ndei. Seturã nguiatu amondo mbeite nguiã ndeje co. Ndequirãcuã nea mose quiatu sequirãcuã amee tuchi nguiã ndeje, i que Cristo seje ra. Nyebe seyate riqui nguiã sequirãcuã nea ndese co cote. Ûquĩ mose quia Cristo riqui nguiã uquirãcuã mee tuchi seje co. ¹⁰ Nyebe seyate riqui nguiã sequirãcuã nea mose. Mbia ñee icuã mose abe. Mbia icuã icuã mose seje abe. Mbae eã mose seje abe no. Se mbae icuã irara mose Cristo rĩ abe no. Ûquĩ ja mose seyate riqui co. Cristo quiatu uquirãcuã mee tuchite nguiã seje, sequirãcuã nea mose.

Jeñia jembitorõ se oso nonde jendea, i Pablo

¹¹ Sebiãte raque se sí ñee turã mose serĩ. Jẽ nguiatu jeñee turã mbite raque serĩ, mbia ñee icuã mose seje. Ae rui jẽingo nae, ùquĩ eaquiutu ãte riqui sesi ùquĩ. Seaquiutu eã ndaque se abe. Ae rui jẽingo nae, Jesús cheẽ mbuchecuasa chooño ño ùquĩ nde. ¹² Dios cheẽ mbuchecuasa tuchi chõ se re. Seico mose jendese. Aico minguete que sequia seico mose jendese ra. Mbia mae sayã ngue asaã saã tuchi quia ra. Dios quirãcuã ngue siqui tuchi quia serese ra. ¹³ Aico turãte que sequia jẽje ra. Sã aico turãte iglesias ataque jenda je no. Eĩ si. Jẽ mii je chõ ngue “mbae jembu seje” ae eã nguiã. ¿Ûquĩ eicuãte jẽje re? “Mbae jembu seje”, iã mose jẽje.

¹⁴ Aico icoquiutu oso nonde jendea a. Co rei tres veces co cote. Co aico oso jendea co. “Mbae jembu seje” aeã tuchi ra jẽje. Mbae achosei chiãte jembae. Jesús rese jẽingo

mose, ùquĩ mii ño achosei nguiã. Jendu rã ño aico nguiã jẽje. Sã mbia riirĩ ndiqui mbae mo mondo mondo eã ngu je no. Sã eru chõ ndiqui mbae mondo mondo nguiirĩ je no. ¹⁵ Sembae amondo ja bite raque jẽingo sacua Cristo rui. Sereco abe amondo bite raque jẽingo sacua Cristo rui. Sechesequa tuchi mose jendese, ¿mbaerã jẽingo nyesequa eãte serese jẽ nde? ¹⁶ “Mbae jembu seje”, ae ãte que sequia jẽje. Ûquĩ jẽicuate raque. ¿Mbaerã nguia jẽingo ñee ñooño nde? “Pablo que nandembirĩ irĩ nda”, ¿mbaerã jenyere? ¹⁷ ¿Mbaerã jeñee ùquĩ nde? Ae amondo jẽje jembaaquiutu sacua nae, ùquĩ abe que jembirĩ irĩ eãte resẽ. Ûquĩ ngue jembae isiãte sembaerã ndesẽ. ¹⁸ Tito que amondo jendea nanderesenda rese resẽ. Ae abe que jembae isiãte resẽ. Se rã si chõ ngue eriqui jẽje resẽ.

¹⁹ Achiquisã eãte sequia jẽsi co resẽ. Dios résaã chõ aico nguiã ñee jẽje. Cristo rĩ ño aico nguiã ñee jẽje. Se mbae mo naa mose jẽje, jẽingo tuchi sacua Cristo rese chõ ñene. ²⁰ Seso mose jendea, sembia eã arõte. Ae sebite se, ùquĩ jẽsaã eã arõte seje. Ae jembite nae, ùquĩ asaã eã arõte se abe jẽje. Jeñee icuã icuã nda jenyue serésaa reae. Jẽingo icuã icuã ja ra jenyue reae. Jenongue mbae ra jenyosei chosei jẽ sí chõ ndeae. Jenguasu ra jẽsaã ñooño sésaa reae. ²¹ Seso mose jendea ra Dios sembia eã tuchi se mae mose jẽicuã ndese reae. Seireite ra jẽicuã ndese mae mose. Jẽicuã cose ndare si jẽhui eã mbei chõchĩ namo nyee. Ae jeninisiã nae, ùquĩ ndese jẽingo bei chõchĩ ùquĩ. Ae jendu eã nae, ùquĩ ndese abe jẽingo bei chõchĩ ùquĩ no. Mbae aba ireingua rese jẽingo bei chõchĩ ùquĩ.

13

Hui bei Pablo saludar i mbia je

¹ Aso quia jendea aque cote. Co rei tres veces co cote. Emo mii sembiirandu mose mbae icuã ndese,

achanduchõ nda se. Emo nyeremo ñee mose, aque mose quiatu ra echeẽ achandu cote. ² Ae eicuã saã saã nguia nyii nae, sã aico ñee asi asite ee nyii no. Ñquĩ sí je chõ aico nguiaã ã mbesa ã. Huiçuã ndecha eã mose ra achimbirãcuã eã ee cote. Jẽ ja je chõ aico nguiaã ñee ñquĩ. Seico mose raanguia jendese. ³ —¿Ma Cristo quirãcuã ndiqui Pablo rese ma nde? jenyee equia nyii nae. Cristo quirãcuã ndese ra jemaee secheẽ asi mose quiatu jẽje cote. Cristo que mbae saã ja tuchi jẽje uquirãcuã je ra. ⁴ Cristo mbia mbucha quia ira rese iquia nyii nae, aque mose que equirãcuã neate rei ra. Dios quirãcuã nguia emingo bei nguiaã co cote. Sã Cristo quirãcuã nea ndei nyii no. Eĩ ño urequirãcuã nea ure namo nde. Ureico rei nguiaã erese co. Ae chõ uremingo nguiaã Dios quirãcuã je co. Ae quirãcuã je ra ureico jembaaquiato quiatu.

⁵ Jẽ ae chõ jendua. —¿Cristo aicua quia sechiangui re re? jenyee ja ja chõ jeñiangui re. Jemaee nguia jenyiese sí. Jẽ Cristo icua chooñoa mose, Cristo riqui jeñiangui re ñquĩ. ¿Ñquĩ ndese jẽingo iranuate re? ⁶ Ure quia Cristo ureicua chooñoa nguiaã ã. Ñquĩ ndese nda jẽirandu rã seje chã. ⁷ Urecheẽ tuchi quia Dios je jeniã ã. Jẽ mbae icuã naa eã sacuã. Mbia ndua turã sacuã eã ure rã ño ureico nguiaã ñee Dios je jeniã ã. Jẽ mbae icuã naa eã sacuã ño ñene. Mbia ra ñee icuã ndaque ure je. ⁸ Mbae icuã mo nandesã aroneate Dios cheẽ ndobeishĩ. Mbae turã nguiatu nandesã Dios cheẽ mose. Dios cheẽ nguia ichõiño eã nde. ⁹ Coche mbia riqui nguiaã ñee icuã icuã ure je. Jẽ nguia jẽingo bei Cristo quirãcuã ndese. Jẽ nda Cristo jẽicua tuchi rã seje chã. ¹⁰ Secheẽ asi asi ambesa quia seso nonde jendea a. Se ñee asi eã sacuã seico mose jendese. Dios quiatu ngue uquirãcuã mee nguiaã seje. Jembãcuã sacuã eã ño ngue Dios uquirãcuã mee nguiaã seje. Jemingo tuchi sacuã Cristo rese chõ ñene.

¹¹ Aico hui secheẽ mbesa mbesa si

a cote, Seresenda. Jesucristo jẽicua tuchi quia. Jẽya bei tuchi jẽingo erese. Jẽingo turã mbei chõ nguia jenyiese. Ñquĩ mose ra Dios siqui tuchi jendese. Ae ra jemingo turã mbei jenyiese. ¹² Saludar jenyee turã mbei quiatu quia jenyue. ¹³ Jesús quiato a jenda saludos mondo quia jẽje aque. ¹⁴ Sã Jesucristo turã ndiqui bei jendese. Sã Dios riqui nyesecua tuchi jendese. Sã Espiritu Turã ndiqui bei jendese no. Amén.

LA CARTA DEL APOSTOL SAN PABLO A LOS GÁLATAS

llo ucheẽ mbesa mondo Galacia jenda je

¹ Pablo chõ se re. Jesucristo chirabo chõ se re. Mbia mo ngue seirabo eã nguiã. Dios ae chõ ngue seirabo ra. Ucheẽ nenei nenei sacuaã. Ae sí que Jesucristo raaque mbuquera ra. ² Seresenda ja rese chõ aico nguiã ã mbesa jêje a. Jesús quiato Galacia jenda ja je.

³ Sã Dios turã ndiqui bei jendese. Sã ae riqui jembia bei. Nanderu chõ ae re. Sã Jesucristo turã abe riqui jendese. ⁴ Ae quiatu ngue mano nguiã nandeicuaã ndibishorõ. Nandembui sacuaã mbae icuaã si. Ae icuaã ndese nandeico mae mae nae, ãqui si. Nanderu cheẽ nguire chõ ngue Jesucristo mano nguiã nande je. ⁵ Sã mbia riqui ñee turã mbei Dios je. Amén.

Cristo mii mbia rirõsa huicuaã si

⁶ ¿Mbaerã jẽingo hui hui jei Dios si ãqui nde? Ae sí chõ ngue “jẽingo Cristo turã ndese” i jêje resẽ. ¿Mbaerã jẽingo Cristo cheẽ abi abi re? Siqui emo ñee ndese re. ⁷ Nyeremo eã ño Cristo icha ñeenda re. Uturã mii je chõ Cristo riqui nguiã nandemingo bei. Nandechisaã turã je eã ño Cristo riqui nguiã nandemingo bei co. —Nandechisaã turã je ra Cristo nandemingo bei, i chõchĩ mbia nguiã jêje ãqui. ⁸ Acheẽ se quia jêje nyii nae. —Uturã je achõ ño Dios riqui nguiã nandemingo bei co, ae se quia jêje nyii nae. Eĩ mbei chõ ñene. —Hue rĩ eã ño Dios icha re, i mose emo jêje, sã Dios ãqui mbasi tuchi. —Hue rĩ eã ño Dios icha re, se abe i mose, sã Dios sembasi tuchi se abe. Angel iba-tenda abe mbasi rae, ãqui ñee mose. ⁹ Acheẽ namo ngue jêje, ãqui tasenimbe jêje: —Nandechisaã turã je chõ Dios riqui nguiã nandemingo bei co, i mose emo, sã Dios ãqui mbasi tuchi.

Ae acheẽ jêje nyii nae, ãqui abi tuchi chõ eriqui nguiã ñee ãqui. ¹⁰ “Sã mbia riqui turã seje”, ae ãte quia co. “Dios ae chõ nda seisi turã nguiã”, ae chõ nguiã co. “Sã mbia riqui turã seje”, se i bei mose, eĩ nda Cristo rimba eãte rei se.

Cristo chimbaaquiatu chee que Pablo ra

¹¹ Tacheẽ nyecua jêje, Seresenda. Dios icha asenei nguia jêje nae, secheẽ ae eã ño ãqui nde. Mbia cheẽ ae eã ño eno nde. Dios cheẽ ae chõ ñene. ¹² Mbia mo ngue esenei eãte seje ra. Jesucristo mii ño ngue esenei nguiã seje. ¹³ Jẽirandu que equia serese cose resẽ. Jesús icuayã mose se nyii. Seico mose judíos ramei ñee ndui. Siqui rocoĩ Jesús cheẽ ndui. Seicuaã tuchite que eriqui Dios quiato je nyii ra. “Jesús quiato tambutiã ja tuchi”, ae que se quia aque mose ra. ¹⁴ Moisés cheẽ ndui que aico tuchi rei sembuchecha ja si ra. Seramei ñee ndui que aico tuchi rei quia mbia ja si ra. ¹⁵ Aquere que Dios seisi Jesús quiatorã cote ra. Dios que seirabo cose seã mose nyii ra. Uturã je que seirabo ra. ¹⁶ Dios que nguiirĩ teacuquia seje cote ra. Se Dios riirĩ nenei nenei sacuaã judíos eã je. “¿Mañi ae ra se re?” ae eã ngue oso ñee mbia mo je ra. Dios nguiirĩ ndeacuquia mose seje. ¹⁷ Jerusalén abe que asoã no nda. “¿Mañi ae ra se re?” ae eã ngue oso hue jenda Jesús chimbaaquiatu ñiinda je no nda. Arabia que aso jei se ae ra. Aquere que aso nyebi Damasco ra.

¹⁸ Tres años mose ramo ngue aso Jerusalén cote ra. Pedro rea que aso aque mose ra. Huee que aico erese quince días ra. ¹⁹ Jacobo abe rese que amae huee ra. Jesús nongue que ae ra. ãqui mii ndese que amae Jesús chimbaaquiatu ra. ²⁰ Acheẽ ñooñoa tuchi chõ nguiã ã mbesa jêje a. Dios secheẽ ñandute quia co. ²¹ Jerusalén ngue asecha oso Siria cote ra. Cilicia abe no. ²² Jesús quiato Judea jenda que seicuayã mbeite quia aque

mose ra. ²³ Jirandu randuchõ ño ngue equia serese ra. “Ae icuã icuã ndiqui Jesús quiato je nyii nae, aque riqui Jesús renei nenei co cote. Mbia Jesús icua sacuã”, i que equia jirandu randu serese ra. ²⁴ Nyebe eyate riqui nguiã serese cote. Ñee turã turã Dios je.

2

Cristo chimbaaquiatu ataque Pablo isi turã

¹ Catorce años mose ramo ngue asobe Jerusalén cote ra. Bernabé rese. Tito abe que arao serese ra. ² Dios ae que “eso Jerusalén” i seje ra. Huee que acheẽ nyecuayã Jesús quiato rerecua ja je ra. Ae asenei senei mbeite quia Dios cheẽ judíos eã je co nae, ùquĩ ñii ngue acheẽ ja Jesús quiato rerecua je ra. Ùquĩ secheẽ icua sacuã. Ùquĩ sembaaquiatu sacuã se Dios cheẽ abi mose. ³ “Circuncisión nandesaã na Tito je”, i ãte que Jesús quiato rerecua quia ra. Judío eã ndaque Tito. ⁴ Jesús quiato chooño abe que chi hue Jesús quiato tuchi mumbara mbara ra. Ndua ndua rei que equia ra. Ure mbae icuã naa naa sacuã ndaque. “Sã circuncisión naa naa Moisés cheẽ ndui”, i rei que equia urerĩ nda. Ebiã tuchi que eriqui ureico mose Cristo mii ndese ra. “Sã eriqui judíos ramei ñee ndui bei”, i chõ ngue equia ra. ⁵ Ùquĩ ñee ngue uresiquisã tuchi quia ra. Jẽingo bei sacuã Dios cheẽ turã mii ndese. “Jesucristo turã ae nandemingo bei nguiã co”, jenyẽ sacuã. Jẽingo rocoĩ judíos rerecua cheẽ ndui. ⁶ Dios quiato rerecua que sembaaquiatu quiatu eãte mbae mo ñii nda. “Ã abe esenei senei nguia judíos eã je”, i ãte que ererecua seje ra. Dios quiato rerecua tuchi ùquĩ ndeae. Aicuayãte se. “Ererecua achõ ño taisi turã”, i ãte Dios. Nandechiã ndese quia eriqui nguiã mae ja. ⁷ Jesús quiato rerecua iate que serese ra. Se Dios cheẽ nenei nenei mose judíos eã je. Ererecua que ñee nyue ra. —Sã Dios Pedro mondo

judíos je no jẽ. Dios cheẽ nenei nenei sacuã no. Eĩ si chõ Dios Pablo mondo quia judíos eã je re. Dios cheẽ nenei nenei sacuã ee re, i que ererecua ñee nyue ra. ⁸ Sã Dios Pedro mondo judíos je no. Dios sí chõ ngue semondo nguiã judíos eã je no. Se echeẽ nenei nenei sacuã ee. Dios ùquĩ mingo bei nonde. ⁹ —Dios chõ Pablo mondo quia judíos eã je re, i ja que Jesús quiato rerecua ja cote ra. Jacobo. Pedro rese. Juan ndese. Nyebe eriqui nguiã seo isi isi. Bernabé o abe isi no. —Coche jẽingo nguiã Dios cheẽ nenei nenei judíos eã je. Ure Dios cheẽ nenei nenei mose judíos je, i que ñee turã ja ure je ra. ¹⁰ —Mbaecha reã je chõ jẽingo mbae mondo mondo, i mii ño ngue ure je ra. Ùquĩ ño asaã saã mbei rei nguiã co.

Pablo ñee asi Pedro je Antioquía

¹¹ Pedro tu mose Antioquía, acheẽ asite que ee ra. Mbae icuã nguiatu que esaã huee ra. ¹² Quiaru turãte que equia judíos eã ndese nyii ra. Aquere que judíos mo ngaẽ ngasẽ cote ra. Jacobo resenda. Pedro que quiaru sereã judíos eã ndese cote ra. Eireĩte que judíos si ra. Nyebe nyicuasẽ nguiã judíos eã si cote. Ucuasu raã naa esi cote. Judíos abe raque Jesús quiato. ¹³ Nyebe Jesús quiato judíos abe nyicuasẽ nguiã judíos eã si cote. Pedro rui sí. Ucuasu raã naa judíos eã si cote. Bernabé abe chee que nyicuasẽ judíos eã si cote ra. Pedro rui si no. ¹⁴ Dios cheẽ ndui si eã ño ngue Pedro riqui nguiã. Judíos nguesenda rese. Nyicuasẽ mose judíos eã si. Nyebe acheẽ asi nguiã Pedro je mbiásaa. —Nde Jesucristo icua mose, erehui que judíos ramei ñee si cote ra. Judío raque nde. ¿Mbaerã ereico ñee judíos eã je re? “Judíos ramei ñee ndui jẽingo”, i ee re.

Judíos abe ra siqui bei Jesucristo icua mose

¹⁵ Judíos chõ ndaque nande. Judíos eã na eã ndaque nande. Mbia icuã na eã ndaque nande. ¹⁶ Emo mii siqui turãyã mbeite quia Moisés cheẽ ndui

si co. Dios emingo bei sacua. Moisés cheẽ mumbasa ja tuchi chõ nande re. Jesucristo icua mose quiatu ra Dios nandemingo bei. Nyebe nandeico nguiã Jesucristo icua ã. Dios nandemingo bei sacua. Moisés cheẽ ndui si nandeico eã ndaque, ae que ee ra. ¹⁷ “Cristo que mano nandeicuã nã nda”, nande bei equia ã. ¿Ûquĩ ño nandembicuã nguia re? Tei. Cristo riqui nandembicuã eã mbei co. Cristo quiatu nandembiirandu quia nandeicuã ndese co resẽ. ¹⁸ Se Jesucristo icua mose, judíos ramei ñee si que ahui cote ra. Se siqui si mose erui, eicuãte ùquĩ cote. ¹⁹ Moisés cheẽ ngue aicuate rei ra. Ûquĩ ngue seicuã mbutiã eã mbei ra. Moisés cheẽ sí chõ ngue sembiirandu Jesucristo rese cote ra. Jesucristo que seicuã mbutiã cote ra. Seico bei nonde cote. ²⁰ Cristo mano mose, se abe que amano erese ra. Se ae aicoã nguiã co cote. Cristo riqui sechiangui re co cote. Equirãcuã je chõ aico nguiã mbae rãã naa co. Dios ririã aicuate quia co. Ae chõ ngue nyesequa tuchi nguiã serese. Ae chõ ngue mano nguiã seicuã nã. ²¹ Dios turã aisiteã teã eãte quia co. Moisés cheẽ mumbayã mose eã ño Dios riqui nguiã aba icuã mbutiã. Ûquinde rae, Jesús manoño.

3

Moisés chimbasa aba mingo bei aronea

¹ ¿Mbaerã jëaquiatuã tuchi riqui re, Galacia jenda? ¿Aba jembaaquiatsu icuã tuchi quia Cristo rã nde? Cristo mano ngue asenei tuchi rei jëje resẽ. Jëisi turãte rei que equia nyii. ¿Mbaerã jëingo hui serĩ serĩte esi cote re? ² Moisés cheẽ mumbayã mose eã ño Espiritu Turã ique nguiã jëiangui re. Jë Jesucristo icua mose chõ ngue re. Se Jesucristo renei mose jëje chõ ngue re. ³ ¿Mbaerã jëaquiatuãte riqui re? Moisés chimbasa que jëicuã mbutiã eã ndesẽ. ¿Mbaerã jëingo siqui beite erese re? Siqui rocoĩ Jesucristo mii ndese. ⁴ Mbae rasi que jësaã tuchi

quia Jesucristo rã nyii resẽ. Jëhui eã ño esi jë. ¹ nda ae rasi jësaã nguia nyii nae, ùquĩ iru eã. ⁵ ¿Mbaerã Dios Espiritu Turã mondo jëje chã? ¿Mbaerã ño Dios mbia mae sayã naa naa jëje chã? ¿Moisés cheẽ jemumbayãte quiatu quia ee re? Tei. Ûquĩ eã ñene. Jë nguia Jesucristo jëicuate nguiã ùquĩ.

⁶ Sã Abraham no. Abraham ngue Dios icuate quia ra. Nyebe Dios Abraham isi turã nguiã. ⁷ Nyebe Dios riqui nguiã “Abraham nducucha” i huicua je co. ⁸ “Judíos eã abe ra Dios ririã icua. Ûquĩ abe ra Dios mingo bei”, i que embesa ji cose ra. “Nderĩ nda aico turã mbia ja je’, i que Dios Abraham je ra”, i que embesa ji ra. ⁹ Sã Abraham Dios icua tuchi no. Sã Dios turãte riqui ee no. Ae Dios icua quia namo nae, ùquĩ je abe chõ Dios turã ndiqui nguiã Abraham ndese.

¹⁰ Sã emo ndiqui ñee no. “Moisés cheẽ ndui taico bei Dios semingo bei nonde”, sã emo ndiqui i no. Ûquĩ nda nyoĩ chõ tata cuasu. Sã embesa ji riqui ñee no. “Emo embesa ji cheẽ mumba mbirĩ mose, echeẽ mumba tuchi raanguia chõ ùquĩ nde”, i que embesa ji ra. ¹¹ Dios ra ñee jiri jiriã emo nã. “Co que embesa ji cheẽ mumbayã mbei quia ra. Nyebe taisi turã”, i eã nda Dios emo je. Ae je Dios riqui “co taisi turã”, i nae, Dios icuate quiatu nguiã ee ùquĩ. Nyebe ra ùquĩ ndeco siqui bei. ¹² “Dios cheẽ mumba eã mbei mose quia ra Dios nandemingo bei”, i mose emo, Dios icuayã ño nguiã ùquĩ. ¹³ Cristo que nandembuĩ Moisés cheẽ si cote ra. Nande Moisés cheẽ mumba mose, ùquĩ nda nandemombo eã tata cuasu cote. Cristo quiatu ngue mbae rasi aba ireingua saã tuchi nguiã nande je. Sã embesa ji riqui ñee no. “Aba ireingua tuchi mae mose embuchesecco ji ira resenda rese”, i que embesa ji cose ra. Jesús mbucha nonde ira rese. ¹⁴ Dios turã sacua judíos eã je chõ ngue Jesús mbae rasi aba ireingua saã tuchi nguiã. Dios judíos

eã mingo bei sacuã ño ngue re. Sã Dios turãte riqui Abraham je nyii no nae. Eĩ si sacuã Dios turã judíos eã je chõ ngue eno nde.

Dios contrato saã Abraham je

¹⁵ Sã mbia mo ndiqui contrato raã emo je no. Sã firmar i embesa mi no. “Eĩ nguiatu”, i aroneate emo ee cote. Embesa jite quia cote re. ¹⁶ Eĩ si que Dios contrato raã Abraham je no nda. Abraham ndiirĩ je abe no. “Abraham ndiirĩ ja je”, i eã ngue embesa ji ra. “Abraham ndiirĩ je”, i chõ ngue ñee nguiã aque mi je. Cristo ri ño ngue ñee nguiã. ¹⁷ Tacheẽ nyecua tuchi rã jẽje. Dios que contrato saã Abraham je cose ra. —Mbae tasaã ndeje. Nderiirĩ je abe no, i que Dios Abraham je cose ra. Mbesa que aque mose ra. Aquere que Moisés ucheẽ mbesa cote ra. Aquere tuchi 430 años ua mose cote. Moisés cheẽ ngue contrato mbutiã aroneate ra. Dios cheẽte quiatu ngue contrato re. ¹⁸ Dios que ñee Abraham je cose ra. —Mbae tasaã ndeje. Nde mbae mo naa ndocoĩ seje, i que Dios ñee Abraham je cose ra. —Nde Moisés cheẽ mumbayã mose quiatu mbae tasaã ndeje, iã ngue Dios ee ra. —Nde mbae mo naa ndocoĩ, i chõ ngue ee ra. ¹⁹ ¿Mbaerã ño nda Moisés chimbese cheẽ nandechandu chã? Mbia huicua icua sacuã ño Moisés chimbese re. Cristo tu mose chõ ngue Moisés chimbese cheẽ ua nguiã. Sã Dios contrato naa Abraham ndiirĩ je nyii no. Cristo je chõ eriqui nguiã “Abraham ndiirĩ” i. Dios rane ngue ucheẽ mondo ángeles je ra. Angeles que emondo Moisés je cote ra. Aquere que Moisés embesa mbia je cote ra. Mbia echeẽ mumbayã nonde. ²⁰ Sã Dios contrato naa Abraham je no. Ae sí chõ ngue ñee nguiã Abraham je. “Secheẽ esenei Abraham je”, iã ngue Dios emo mondo ñee Abraham je ra.

Nandeico Cristo icua ã cote; Moisés cheẽ ndui siqui rocoĩ

²¹ Ae contrato Dios saã Abraham je nae, Moisés chimbese uqui mbutiã

aroneate quia co. Moisés chimbese aba mingo bei arõ mose, eĩ nda Jesucristo manoate rei. Moisés chimbese aba mingo bei aroneate. Nandechiã abe mbitirõ aroneate no. ²² “Mbia icuã ja chõ ñene”, i que embesa ji ra. Nyebe nandemo mbae mo turã naa aroneate siqui bei sacuã. Jesucristo icuasa quia ra Dios mingo bei ucheẽ nguire. Jesucristo icuate quia ñene. Mbae mo naa ndocoĩ Dios je nyii.

²³ Cristo tu nonde que nandeico rei ñee nda. “Moisés cheẽ nandemumbayã” i rei ra. Moisés cheẽ ngue nandemumbayã aroneate quia ra. “Cristo ra tu” i que equia nande je, uqui ño ngue nandesaarõ arõ nguia ra. ²⁴ Mbia mbaaquiatusa rã ño Moisés chimbese re. Mbia mbiirandu que Cristo rese ra. Mbia siqui nonde Cristo mi ndese tu mose cote. Cristo icua nonde. Dios Cristo icuasa isi turã mbei nonde cote. ²⁵ Nandeico Cristo icua ã cote. Nyebe ra nandeicoã Moisés cheẽ ndui cote. ²⁶ Nandeico Jesucristo icua jate ã. Nyebe Dios riirĩ ja chõ nande re. ²⁷ Nandembucha ji nandeico mose Cristo ri, Cristo rã sí chõ nandeico nguiã ã cote. ²⁸ Nande Jesucristo icua ja mose, nyiabiã ja chõ nandeico nguiã ã cote. Judíos ra siqui turã judíos eã je cote. Ererecua ra siqui turã ngũimba je cote no. Mbia ra siqui turã ja nyiese no. Aque mi na tuchi chõ nda nandeico ja nguiã Cristo rese cote. ²⁹ Cristo icuasa chõ jẽingo nguiã uqui. Nyebe Abraham ndiirĩ abe chõ jẽingo nguiã uqui no. Ae turã nda Dios saã Abraham ndiirĩ je nae, jẽje chõ nda eraã nguiã.

4

¹ Sã mbaecha riri mo no. Sã mbae raã aroneate ae ae uñetẽ mose no. Erimba rã si chõ nda eriqui mbia cheẽ mumba eã. Mbaecha riirĩ ndaque. ² Ae rese eriqui ndua nae, uqui ndese eriqui aroneate. Uraarõsa nduasa achõ ndese chõ nda eriqui. Ucuasu mose ramo ño nda eriqui ndua ae ae cote. “Co tasaã”, i cote. ³ Eĩ si chõ nande nyii re. Mbia riirĩ na si. Jesús tu nonde. Mbia cheẽ achõ ndui

chõ ngue nandeico nyii ra. Jesús tu nonde. ⁴ Dios que “coche ñene” i cote ra. Ûquĩ mose que nguiirĩ mondo mbia je íbii cote ra. Dios riirĩ ngue tu mbiarã nda. Moisés cheẽ ngue emumbayã mbei quia eico mose íbii ra. ⁵ Ae que tu nandembui bei Moisés cheẽ si cote ra. Dios nandererequia sacua nguiirĩ na cote. ⁶ Dios riirĩ ño nande cote re. Nyebe Dios Espiritu Turã mondo nguiã nandechiangui re cote. Nyebe nandeico nguiã Paba i tuchi Dios je namo cote. ⁷ Dios riiri tuchi chõ nande cote re. Erimbachõ eã. Nyebe ra Dios mbae mondo tuchi nande je cote ucheẽ nguire.

Pablo ndua tuchi Jesús quiato rese

⁸ Jẽ ngue Dios jẽicuayãte quia nyii ra. Dios abareã ndese chõ ngue jẽingo aque mose ra. ⁹ Ûquĩ jẽingo Dios icuate ùquĩ cote. Dios abe riqui jẽicuate co cote. ¿Mbaerã nguia jẽingo hui serĩte esi cote re? ¿Mbaerã nda jẽingo sí dios abareã nimbarã nde? Dios abareã quirãcuã eãte nyeresẽ. Mbae mo naa aroneãte nande je resẽ. ¹⁰ “Co tenda mbae mo nandesaã Dios je Dios nandesi turã sacua”, jenyẽ chõchĩ nguiã ùquĩ. “Co nyasi mbae mo nandesaã Dios je Dios nandesi turã sacua”, jenyẽ chõchĩ nguiã ùquĩ no. Eicuã tuchi chõ ùquĩ nde. ¹¹ Jaembaaquiato quiato iru chõ se reae.

¹² Se rã ño jẽingo ae. Sã aico eãte Moisés chimbessa cheẽ ndui sí co no. Sã jẽ abe jẽingo eãte erui nyii no. Sã jẽicuã eãte emo mose seje no. ¹³ Se Jesucristo renei namo mose jẽje, serasite quiato ngue se aque mose re. Ûquĩ jẽicuate quia ùquĩ. ¹⁴ Mbae rasi que asaã tuchite rei aque mose ra. Serasi que jẽucuyã eãte quia aque mose ra. Serasi que jẽisiteã eãte quia aque mose no nda. Angeles que jẽsaã ño seisi turã aque mose ra. Jesucristo que jẽsaã ño seisi turã aque mose ra. ¹⁵ Seisi turã tuchi que se aque mose ra. Jendesa que jẽmondo bite quia seje aque mose ra. ¿Mbaerã jẽingo secheẽ isi sereãte cote re? ¹⁶ Dios

cheẽ ngue asenei turã tuchi quia jẽje. ¿Ûquĩ je chõ jẽingo seucuayãte cote re? ¹⁷ Ae riqui jembaaquiato icuã icuãte ùquĩ nae, ùquĩ siqui sete raque jendese ùquĩ. Mbae turã ñi eã ño ñene. Jembhicha sacua ure si chõ ñene. Jẽingo sacua ùquĩ achõ ndese chõ ñene. ¹⁸ Coche rei ùquĩ siqui jendese Dios cheẽ nenei nenei turã mose jẽje. Sã eriqui jembaaquiato turã turã mbei. Seicoã mose abe jendese. ¹⁹ ¿Mbaerã jẽingo sembia eã tuchi ùquĩ nde? Jẽhui serĩ serĩ mose Dios turã si. Sã ãquẽ ndasi riqui cuña je no. Eĩ ño seya eã ndasi nguiã jendese co. Jẽingo sacua Cristo rã si. ²⁰ ¿Mañi ae ra se quia jẽje re? Aico rã nda jendese chã. Se ñee tuchi nonde jẽje. Secheẽ mbesa rocoĩ mondo jẽje.

Sã Abraham ndiirĩ nyeremo no

²¹ ¿Mbaerã jẽingo ñee nde? “Moisés cheẽ nandemumbayã, Dios nandemingo bei sacua”, ¿mbaerã jẽingo i re? Moisés cheẽ jẽicuayãte quia reae. ²² Moisés chimbessa chõ nandembiirandu nguiã Abraham rese co. Abraham ndiirĩ nyeremo ndei que ra. Co mi ngue eninisite riirĩ nda. Sara, i que eninisite je ra. Agar, i que erimba je ra. Aque abe que Abraham nbiirĩ ndei ra. Nyebe Abraham ndiirĩ nyeremo ndei nguiã. ²³ Mbia rã si chõ ngue erimba tiirĩ ee ra. Dios ñeende ee nyii quiato que eninisite tiirĩ ee ra. —Neninisi ra tiirĩ ndeje, sã Dios i ee nyii no. Ûquĩ io sacua ño eninisite tiirĩ cote ra. ²⁴ Nandemundua sacua ño ùquĩ nde. Contrato rã si chõ Sara re. Contrato mó na ño Agar no nde. Ae contrato Dios saã Moisés je Sinaí no nae, Agar rã si chõ ùquĩ nde. Ae siqui bei quia ùquĩ contrato rui nae, mbia rimbachõ na ño ùquĩ nde. ²⁵ Sinaí rã si chõ Agar re. Arabia jenda chõ Sinaí re. Jerusalén na si chõ Sinaí re. Ae siqui quia Jerusalén nae, erimba rã si chõ ùquĩ nde. Erimba rã si chõ judíos ja no nde. Jesucristo icua rocoĩ. ²⁶ Jerusalén mo ño chĩ nguiã ibate pe no. Ae mbia hue jenda nae, mbia

rimba mo eã ño ãquĩ nde. Hue jenda chõ nande abe no nde. ²⁷ Sã embesa ji riqui ñee no:

Ndeya chõ eico, tiiriã je.

Ndeya chõ eico, ãquẽ ndasi raãsa eã.

Nderiirĩ nda eretea tuchi cote.

Eru chirirõ nguia ra tiirĩ tuchi eru rerecua si cote,

i que embesa ji ra. ²⁸ Dios riirĩ tuchi chõ nande re. “Seriirĩ tuchi ra ãquĩ”, ã i Dios nanderĩ nyii no. Sã ñee Isaac ni nyii no. ²⁹ Sã Dios ñee Abraham je nyii no. “Nderiirina tamondo ndeje Isaac”, sã i ee no. Sã Isaac nyaacuquia Espiritu Turã ni no. Sã Agar riirĩ icuã icuã Isaac je cote no. Eĩ si chõ namo no nde. Ae siqui tuchi judíos cheẽ ndui nae, ãquĩ icuã icuã ndiqui namo nande je ã no. ³⁰ ¿Mañi ño embesa ji cheẽ ña? “Erimba emombo chõ. Eriirĩ ndese. Eninisite riirĩ na eã ño erimba riirĩ nde. Erimba riirĩ siqui aroneate eninisite riirĩ ndese”, i que embesa ji ra. Eĩ si chõ ae siqui tuchi quia judíos cheẽ ndui nae. Siqui aroneate Jesús quiatorã. ³¹ Erimba riirĩ na eã tuchi chõ nande re. Eninisite riirĩ na tuchi chõ nande re. Nande Jesús icua mose.

5

Cristo nandembui Moisés chimbesa si cote

¹ Cristo que nandembui Moisés chimbesa si cote ra. “Moisés chimbesa cheẽ nda semingo bei”, jenyechĩ nda jẽ. Ae ra i ãquĩ, mbia rimba rã ño ãquĩ nde. ² Tacheẽ nyecua tuchi rã jẽje. Circuncisión nda jẽsaãchĩ. Moisés chimbesa cheẽ ndui ra jẽngochĩ cote jẽ. Cristo mi ndese chõ jẽingo cote. Jẽ circuncisión naa mose, jẽingo turã eã ño nguã Cristo rui ãquĩ cote. ³ “Moisés chimbesa cheẽ tamumbayã mbei”, i raanguia chõ circuncisión nde. ⁴ “Dios ra seisi turã seico bei mose Moisés cheẽ ndui” i mose jemo, Dios chẽẽ abi tuchi chõ ãquĩ nde. Dios turã si nyicuasẽ tuchi chõ ãquĩ nde. ⁵ Espiritu Turã ndiqui nanderese co. Nande Jesucristo nandeicuate quia ã. Nyebe ra Dios nandeisi turã Jesucristo mi ni.

⁶ Nandeico mose Jesucristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Jesucristo icua mose, ãquĩ nguia eturã tuchi re. Nandechesecua mose mbia rese, ãquĩ nguia eturã tuchi no nde. ⁷ Jẽingo turãte rei que equia nyii. ¿Aba jembui Cristo cheẽ si cote re? ⁸ Dios eã ño ngue jembui nguia esi. Dios chõ ngue “jenyu” i nguia jẽje. ⁹ Sã levadura riqui no. Eñetẽ mondo mose mbichae ye, mbuquiche ja rae. ¹⁰ Dios ra jendeaquiatu bei. Mbiamo jembui eã sacua esi. Ae jembui serite quia esi nae, ãquĩ nda Dios mbasi. Ererecua raque ra emo. ¹¹ “Circuncisión jẽsaã na”, ae ãte quia mbiamo je co. “Circuncisión jẽsaã na”, se i mose, eĩ nda judíos icuã icuã eãte rei seje. Eĩ nda judíos paama i ãte rei seje Cristo mano nenei nenei mose mbia je. ¹² Ae “circuncisión jẽsaã na”, i quia jẽje nae, ãquĩ nda nguete chisia tuchi rã jendecha chã.

¹³ Jesucristo que jembui Moisés cheẽ si ra, Seresenda. Ae icuã jenyosei chosei quia nae, ãquĩ ndese ra jẽngochĩ cote jẽ. Jẽingo turã nguia quia jenyue. Jenyese tuchi quiatu quia jenyese. ¹⁴ Dios cheẽ ja tuchi chõ ã nde: “Sã ereico nyesequa ndechese no. Eĩ ere si chõ nyesequa emo ndese”, i que Dios cheẽ nda. Nandechesecua mose mbia rese, Dios cheẽ nandemumbayã tuchi chõ nguã ãquĩ. ¹⁵ Paama jenyechĩ nda jenyue jẽ. Jenyishiu shiuchĩ nda eno jẽ. ãquĩ naa naa mose ra jẽhui ja ja chee Cristo si.

Ae icuã nandehosei chosei quia nae, ãquĩ si nandehui

¹⁶ Tacheẽ nyecua tuchi jẽje. Espiritu Turã ñee ndui bei jẽingo. Ae icuã jenyosei chosei quia nae, ãquĩ ndese nda jẽingoã cote chã. ¹⁷ Ae mbae icuã nandehosei chosei quia nae, Espiritu Turã quiatoã tuchi chõ ãquĩ nde. ãquĩ quiatoã tuchi chõ Espiritu Turã no nde. Ae nandehosei chosei

quia, nyebe ra ũquĩ nandesaã eã. ¹⁸ Jẽingo mose Espíritu Turã ndui, “Moisés cheẽ nda nandemingo bei” jenyẽ eã nda cote. ¹⁹ Ae siqui quia ubi icuã ndese nae, mbae icuã esaã ata atate quia ã. Siqui siqui chõ nguiã ngũinisiã ndese. Cuña abe siqui siqui chõ nguiã ngu eã ndese no. Siqui chooño mbia rese. ²⁰ Dios abareã ndese siqui chooño. Brujería abe rese siqui chooño. Mbia ucuãyã cuãyã. Siqui icuã icuã nyue. Mae icuã icuã emo ndese. Paama i jei jei emo je. Abei chiã. Mbia mbuqueta queta. ²¹ “I ãchĩ sembae”, i mbia mbae oseĩ oseĩ. Mbia iquia. Quiacua. Siqui chooño mbae ja rese. Ae ã icuã ñumumbara saã saã mbeite quia nae, ũquĩ nderecuarã eã mbei ra Dios.

Espíritu Turã ño aba mingo nguiã mbae turã ndese

²² Ae siqui quia Espíritu Turã ndese nae, Espíritu Turã ño emingo nguiã mbae turã ndese ã. Nyesequa chõ nguiã mbia rese. Eya chõ eriqui nguiã. Quicoĩ coi eã ño nguiã. Siqui tochi chõ nguiã. Siqui turã ño nguiã. Ucheẽ mbuchebi chebiã ño nguiã. ²³ Eseteã ño eriqui nguiã. Ae ae chõ nyiteaquiatu nguiã mbae icuã si. Nande ũquĩ naa naa mose, emo ñee aroneãte nande je cote. ²⁴ Sã Cristo mano nyii no. Eĩ si chõ Cristo quiato undua icuã mbutiã nguiã no. Cristo mano nyabe.

²⁵ Sã Espíritu Turã ndiqui nandereco mingo turã co no. Eĩ nande sí siqui turã erui jẽ. Ae nandererequia turã bei nonde mbae turã ndese. ²⁶ Nandecuasu ra nandesaã saãchĩ jẽ. Nandeicuã techĩ nda nandechue jẽ. “Aque rã eãchĩ se”, nandechĩ nda mae icuã icuã nandenongue rese jẽ.

6

Jendua chõ nguia nyiese mbae mo naa jenongue je

¹ Emo mbae icuã naase i i mose, “Dios rui eico” jenyẽ chõ ee. Ae jemo siqui tuchi quia Dios rese, ũquĩ mo ñee ee. Embucuata turã sí nonde

Dios rese. Jeñee mingue mingue chõ nguia ee. “Mbae icuã tã i arõte se abe je”, jenyẽ chõ nguia ndua jẽ abe. ² Jendesenda ia eã ndasi mose, jendua chõ nguia erese mbae mo naa naa ee. Cristo cheẽ mumbayã ja chõ ũquĩ nde. ³ “Seaquiatute rei ñene”, i mose eaquiatuã mo, ae sí chõ ñimbĩĩrĩ irĩ nguiã aque. ⁴ Ae ra eresaã mbae mo nae, esaã turã mbei chõ nguia. ũquĩ mose ra ndeya quiátu tuchi ndechisaã ndese. Mae ndocoĩ emo nyisaã ndese. ⁵ Nande ae ae nandechimbirãcuã nguiátu nandeya eã ndasi ae ae je.

⁶ Emo siqui mose jembaaquiatu quiatu Cristo riĩ, mbae ja quia jemondo mondo quia ee. ⁷ Erechimbĩrĩ irĩchĩ nda ndechue si jẽ. Dios abe erembĩrĩ irĩ aroneate. Ae ra erechitiquia mbae mo nae, ũquĩ sí chõ nda ereucua. ⁸ Ae siqui quia ubi achõ ndese nae, ũquĩ nda ua chee. Ae siqui Espíritu Turã ndui nae, ũquĩ nda Espíritu Turã mingo bei. ⁹ Nandechimondocho eã ño nguia mbae turã naa naa mbei jẽ. Nandehui eã mbei chõ nguia esi jẽ. ũquĩ mose ra Dios mbae mee tuchi jee nande je cote. ¹⁰ Mbae turã nandesaã saã mbei chõ nguia mbia je. Jesús quiato je quia mbae turã nandesaã saã tuchi jiri.

Pablo hui bei saludar i mbia je

¹¹ Seo ae je chõ co ambesa mondo nguiã jẽje aque. Sã letras cuasute. ¹² Ae “circuncisión jësaã”, i quia jẽje nae, siqui turã sacua mbia rese chõ ũquĩ nde. Siqui turã ndocoĩ Cristo rese. “Cristo ae ra aba mingo bei” i sereã. Siquichete quiatu mbia si re. ¹³ Ae circuncisión saã nguia nae, ũquĩ abe riqui eã Moisés cheẽ ndui ũquĩ. “I nda mbia riqui ureruĩ”, i chõ nguiã “circuncisión jësaã” i jẽje ũquĩ. Ucuasu ra esaã saã jẽ circuncisión naa mose. Eyate ra jendese cote, jẽingo mose erese. ¹⁴ Jesucristo mĩ ndese chõ nda seya se. Ae mano ira rese. Ae mĩ nĩ nda acheẽ ñee

mbia je. Mbaemo ndese abe eã nda seya se. Jesucristo mano mose ira rese, se abe que amano mbae icuã si ra. Mbae icuã abe que mano sesi no nda. ¹⁵ Nandeico mose Cristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Dios nandechiã mbiasu mose, ãquĩ nguiatu eturã tuchi re. ¹⁶ Ae siqui quia Jesucristo mĩ ndese nae, sã Dios turã ndiqui bei ãquĩ ndese. Sã Dios riqui embia bei. Sã Dios turã ndiqui bei ngũimba ja je. ¹⁷ Secheẽ nda jẽsibishorõchĩ namo jẽ. Emo mose abe jẽ. “Pablo eaquiãtuãte”, sã emo i eã cote. Sã mbae rasi airara rara beite quia Cristo rĩ co no. Sã seiruã nuasa cherõ areco serete rese co no jẽ. Jesucristo rĩ ãno ãquĩ nde. ¹⁸ Sã Jesucristo turã ndiqui bei jendese, Seresenda. Amén.

LA CARTA DEL APOSTOL SAN PABLO A LOS EFESIOS

Pablo embesa Jesús quiato Efeso jenda je

¹ Se rei Pablo. Dios que seirabo ra. Jesucristo chimbaaquiatu sacuã. Co ambesa mondo quia jêje aque. Jesús icuasa je. Efeso jenda je. ² Sã Dios riqui uturã ndeacuquia bei jêje. Jesucristo abe no. Sã ũquĩ ndiqui jembia bei.

Cristo mbae turã saã ja nande je

³ Nandechẽ turã mbei chõ nguia Dios rĩĩ. Jesucristo ru rĩĩ. Jesucristo rese chõ nandẽico nguĩã ã cote. Ibatenda chõ nandẽico nguĩã ã cote. Nyebe Dios riqui nguĩã mbae turã naa jate nande je co. ⁴ Dios que nandẽirabo nyii ra. Cristo rĩĩ. Mbae ao ja nonde. Nyesequa tuchi que nanderese ra. Nyebe nandẽicuã mbutiã ja nguĩã nandesi. Nandẽico turã sacuã enonde. ⁵ Dios que nandẽirabo tuchi coose ra. Mbae ao nonde. —Jesucristo rĩĩ nda seriirina jẽ, i que nande je nandẽicuã mose ra. ⁶ Nandechẽ mbei sacuã Dios turã nĩĩ. Uturã je chõ nandẽisi nguĩã Jesucristo rĩĩ. ⁷ Jesucristo mĩĩ ngue mano nanderirõ sacuã mbae icuã si ra. Ae rĩĩ ño Dios nandẽicuã mbutiã nguĩã nande si cote. Dios turãte quia nande je re. ⁸ Dios que uturã teacuquia ja nande je ra. Nyebe eriqui nguĩã mbae icua jate nande je. ⁹ —Seriirĩ nda amondo mbia je íbii. Ae ra mbia mangue choõnoa jenda mingo ja serese cote, i que Dios cose ra. ũquĩ ngue eteacuquia nande je cote ra. Nande eicua sacuã. ¹⁰ Dios icoquiatu mose ra mbae mbuchĩcuabo ja cote. Nandemunua ja ra ino Cristo nonde. Cristo ra mbae rerecua ja tuchi aque mose cote. Ibi jenda rerecua ja. Ibatenda abe rerecua ja.

¹¹ Ae Cristo saã nande je nae, ũquĩ nĩĩ ño ngue Dios nandẽirabo nguĩã

cose. Mbae tiã mose que Dios nandẽirabo nyii ra. Ae sí mbae turã naa naa sacuã nande je. Dios cheẽ nguire mbae riqui nyecua bei ã. ¹² Urecheẽ turã mbei sacuã Dios rĩĩ ño ngue ureirabo nguĩã. Ure rane ngue Cristo ureicua nyii ra. ¹³ Jẽ abe que Cristo jẽicua chee cote ra. Jẽ echeẽ turã andu mose. —Cristo ra jendirõ jẽicuã si, i mose jêje. Jẽ Cristo icua mose que Espiritu Turã Cristo mbae marca mĩĩ jendese ra. —Espiritu Turã tamondo Cristo icuasa je, i Dios quia nyii nae, aque sí que Cristo mbae marca mĩĩ jendese cote ra. ¹⁴ Espiritu Turã ndiqui nandechiangui re co. Nyebe nandẽico nguĩã ñee. —Dios ra mbae mee ja nande je ucheẽ nguire, i. Dios que nandẽisi Jesús ruqui ribishorõ nda. Nandemingo bei ra erese cote. ũquĩ nĩĩ ño Espiritu Turã Cristo mbae marca mĩĩ nguĩã nanderese. Nandechẽ turã mbei sacuã Dios rĩĩ ño ngue ũquĩ nde.

Sã Dios jembirandu uquirãcuã ndese, i Pablo

¹⁵ Airandu que jendese ra. Jesús jẽicua tuchite quia ũquĩ. Jenyesequa tuchite equia Dios quiato ja rese ũquĩ. ¹⁶ Nyebe aico nguĩã ñee hui ãte Dios je. Gracias, i bei ee jenĩĩ. ¹⁷ —Paba, ndequiato embaaquiatu tuchi Cristo rĩĩ. Cristo eicua uquia tuchi ee, ae beite se quia Dios turã je jenĩĩ co. ¹⁸ Acheẽ mbeite quia Dios je jenĩĩ co. —Paba, ae turã nda eresaã je ndequiato je nae, ũquĩ ndese embiirandu jiri namo. Ae turã nda eremeje ee nae, ũquĩ ndese abe embiirandu. ¹⁹ Ndequirãcuã ndese abe embiirandu, ae beite quia Dios je jenĩĩ co. Dios quirãcuã nda ua eã mbei. Equirãcuã ndiqui Jesús quiato chianguí re ja ã. ²⁰ Dios quirãcuã ae que Jesús raaque mbuquera si ra. Dios quirãcuã ae que Jesús mbocoi mĩĩ ujii ra. ²¹ Dios que Jesús mĩĩ mbae rerecuarã ja ra. Ae quia rei i tuchi ererecua mo si. Gobierno mo ab e si. Ae quia rei ecuasú tuchi ibi jenda ja

si. Ibatenda abe mo si. ²² —Mbae ja rerecua tuchi rei Jesús, i que Dios ra. —Sequiato rerecua ja chõ ae re, i que Dios ra. ²³ Dios quiato rei Jesús rete rã. Jesús riqui uquiato chiangui re co. Manguiti eriqui eã aroneate. Mbae aosa ja chõ ae re.

2

Uturã nã Dios aba rirõ aba icuã si

¹ Dios que ngueco mondo jêje cote ra. Jêicuã nã ño ngue jêingo nguiã eraaque rã nyii. ² Mbia ataque rã tuchi que jêingo aque mose ra. Mbae icuã naa naa ndesechi. Satanás ñee ndui beite que jêingo nyii ra. Equirãcuãte que eriqui jêje ra. Ae siqui âte quia Dios rese nae, ùquĩ ño Satanás ñee mumbayã nguiã ã. ³ Eĩ nande que equia cose nyii ra. Ae nandebite riqui mbae icuã nyii nae, ùquĩ ndesechõ ño ngue nandeico ra. Ae rese nandeico ndua beite mbae icuã nyii nae, ùquĩ ndesechõ ño ngue nandeico nyii ra. Mbia ataque rã sí chõ ngue nandeico mbae icuã naa naa nda. Dios nda nandembasi nguiã nandeicuã nã ña. ⁴ Eyayãte quiatu ngue eriqui rei nguiã nanderese. Nyesecua tuchite quiatu que equia nanderese ra. ⁵ Eraaque raãte raque nande nandeicuã nã nyii. Nyebe ngueco turã mondo nguiã nande je Cristo raaque mbuquera si mose. Dios turã ae chõ jendirõ nguiã jêicuã si. ⁶ Dios Cristo raaque mbuquera mose que nande abe mbuquera echabe ra. Dios que nandemingo erese ibate cote ra. ⁷ Dios turã tuchi riqui nande je Jesucristo rã co. I nda mbia jirandu randu Dios chisaã turã ndese emo mose. Ibátee nandeico mose abe no. ⁸ Jê ngue Jesús jêicua ra. Nyebe que Dios jendirõ jêicuã si ra. Uturã nã ño ngue jendirõ nguiã jêicuã si. Jê ae jeñimbucha aroneate Jesús rese. Dios ae ngue jembucha nguiã erese. ⁹ Nandechisaã turã nã eã ño Dios nandembucha nguiã Jesús rese. Nyebe nandemo ndiqui uturã naa naa aroneate. ¹⁰ Dios ae que nandea ra. —Se emingo mose Jesucristo rese,

aque mose quia ra mbae turã naa naa cote, i que Dios nanderẽ cose ra.

Cristo mã ño mbia mingo turã turã nguiã nyiese

¹¹ Dios rese que jêingo âte nyii ra. Ûquĩ si jêtesareiã ño. Judíos eã ño ngue jê ndesẽ. Nyebe judíos jendirirõ nguiã. Circuncisión ngue jêsaã eãte judíos rã ndesẽ. ¹² Jêingo eãte que Cristo rese nyii resẽ. Jêingo turã eãte que equia Dios rimba je resẽ. Dios cheẽ si que jêingo ishote resẽ. —Dios ra mbae turã saã nande je, jenye âte que equia ndua aque mose resẽ. ¹³ Jesucristo mbae chõ jê cote re. Ishote jêingo raque Dios si cose. Dios que jembucha tuchi uchiese Jesucristo mano nã nda. ¹⁴ Cristo mã ño nandemingo turã nguiã nyiese ã. Ae mã ño judíos mingo turã nguiã judíos eã ndese co. Ae mã ño judíos eã mingo turã nguiã judíos rese co no. Ûquĩ ngue siqui icuãte quia nyue Cristo icuayã mose nyii ra. Mbia mã na ño eriqui nguiã siqui turã nyue ã cote. ¹⁵ Umano mose que Jesús judíos mbui mondo Moisés cheẽ si cote ra. Ae Moisés ñee, judíos echeẽ mumba eã sacua nae, ùquĩ si que Jesús embui cote ra. Nyebe judíos siqui turã arõte judíos eã ndese ã cote. Judíos eã abe siqui turã arõte judíos rese cote. Ûquĩ siqui mose Jesús rese, co mã na ño eriqui nguiã ã cote. Mbia mã mbiasu ji rã ño eriqui nguiã ã cote. ¹⁶ Ûquĩ icuã icuã mose nyue que Cristo mano ùquĩ icuã ndiquicharõ nda. Ûquĩ mingo turã ja nonde Dios rese. Siqui turã mose Dios rese, siqui turã nda nyue cote. ¹⁷ Cristo que mano mbia mingo turã sacua Dios rese ra. Tu que mbia mbiirandu ja nonde nyiese ra. Judíos. Judíos eã abe mbiirandu nonde nyiese. ¹⁸ Cristo que mano nande ja je ra. Judíos je. Judíos eã je abe no. Nyebe Espiritu Turã mã nandemingo ja nguiã nyiese ã. Dios nandesichã ja arõte qui a ã cote. ¹⁹ Mbiamo eã ño jê Dios je cote re. ã jêingo isho eãte Dios si ã

cote. Dios riirĩ tuchi chõ jẽ cote re. Cristo resenda ataque rã sí chõ jẽingo nguiã ã cote. ²⁰ Tuchua raã ji mo na ndei jẽ. Jesús chĩmbaaquiatu rei tuchia i rã. Dios cheẽ mbuchecuasa cose ndare abe rei tuchu a i rã no. Jesucristo rei ũquĩ i tuchi. ²¹ Nande Jesús icua mose, Dios chuchua turã naanguia chõ nandeico nguiã Jesús je ã. Nande Jesús quiato tubiriã i ite riqui ã. ²² Espiritu Turã ño jemingo nguiã Dios rese jẽ abe ũquĩ. Nyebe jẽ abe jẽingo Dios chuchuarã ũquĩ. Dios riqui jeñiangui re ũquĩ.

3

Judíos eã abe ra siqui Dios rese, i Pablo

¹ Se rei Pablo. Jesucristo rimba. A setarõ ji ñi jeni a. Jẽ judíos eã ñi. —Judíos eã abe riqui Dios rimba ã, ae beite que se quia jeni nda. Nyebe setarõ ji ñi nguiã a. ² —Judíos eã je chõ seturã esenei senei nde, i que Dios seje ra. ũquĩ ndese beite aico co. Jẽirandu equia serese reae. ³ —Judíos eã abe ra siqui serese. Secheẽ turã esenei senei ee, i tuchi que Dios sembaaquiatu ra. ũquĩ ngue asenei jua chõ jẽje ra, se embesa mose jẽje nyii. ⁴ Sechimbesa rese jemaie mose ra jeñee cote. —Pablo Dios cheẽ icua tuchi chõ nguia judíos eã ñi nde, jentye ra cote. ⁵ —Judíos eã abe ra siqui serese judíos rã si tuchi, i eã ngue Dios mbia mo je cose ra. Namõ ño mbia jirandu nguiã ũquĩ ndese. Namõ ño Espiritu Turã Jesús chĩmbaaquiatu mbiirandu nguiã ũquĩ ndese. Dios cheẽ mbuchecuasa abe mbiirandu ũquĩ ndese. ⁶ ã ndei Dios cheẽ mbuchecua ramo ji ã: Judíos eã abe ra siqui Dios rese judíos rã si tuchi cote. Mbia rete mĩ na nda eriqui ja cote. —Mbae turã tasaã jẽje Jesucristo riĩ, i mose Dios, judíos achõ je eã ño eriqui nguiã ñee. Judíos eã abe je chõ ñene.

⁷ —ũquĩ secheẽ esenei senei mbei quia mbia je, i que Dios seje ra. Mbae turã mo asaã eã ndaque Dios je nyii.

Uquirãcuã abe que emee seje ũquĩ naa sacua nda. ⁸ Dios turã tuchite que seje ra. Se mbae raande rocoĩ ee nyii. Nyebe ñee nguiã seje. —Secheẽ esenei senei mbei quia judíos eã je. Ae rese mbia riqui jiranuate Cristo turã nae, ũquĩ esenei senei judíos eã je, i que seje ra. ⁹ —Ae turã nda asaã judíos eã je nae, ũquĩ ndese mbia embiirandu ja cote, i que Dios seje ra. Dios quiarei ndua ndua ũquĩ nyii. Mbae ao ja nonde nyii. ¹⁰ Mbaerã ño Dios mbia mbiirandu ũquĩ ndese cote chã. Mbia jirandu sacua Dios aquiatu rese chõ ñene. Dios judíos eã mingo turã mose judíos rese, mbia ra nyuruira tuchi mae Dios quirãcuã ndese. Ibatenda abe ra nyuruira tuchi mae erese no. ¹¹ Dios ndua ndua ũquĩ nyii. —Mbia chumumbarate riqui raque ã. Emo emo nda ambucha nyiese Cristo mano mose, i que Dios cose ra. ũquĩ ngue esaã Jesucristo riĩ cote ra. ¹² Nandeico Jesucristo icuate ã cote. Nyebe nandeico nguiã siquicheãte ñee Dios je ã cote. ¹³ Ae mbae rasi asaã nguia cárcel co nae, jeni ño ñene. Seyate se mbae rasi raã mose jeni. Jẽ abe jeñimbua chõ nguia serese.

Cristo nyesecua tuchi uquiato rese

¹⁴ Judíos eã abe chõ Dios mingo nguiã uchiese. Nyebe aico nguiã gracias i bei Dios je co. ¹⁵ ã nandechumumbarate riqui ibii ã nae, ũquĩ ndu ja chõ Dios re. Ibatenda abe ru chõ ae no nde. ¹⁶ Dios mbae saã ja arõte nande je. Ebite mbae raã mose nande je. Nyebe aico nguiã ñee ee jeni a. —Paba, Espiritu Turã emondo tuchi echiangui re. Embuquirãcuã sacua, ae chõ nguiã ee a. ¹⁷ —Paba, sã Cristo riqui tuchi echiangui re. Sã Cristo icua tuchi. Sã eriqui nyesecua tuchi Cristo rese, ae beite se quia Dios je jeni co. ¹⁸⁻¹⁹ Mbaerã ño Dios riqui nyesecua tuchite nanderese co. Co eriqui nyesecua tuchite nande rese co. Jendua tuchi quiatu quia ũquĩ ndese. Sã Cristo quiato riqui ndua

ja ũquĩ ndese. Sã Dios riqui tuchi jeñiangui re. ²⁰ Dios quirãcuã ndiqui beite nandechiangui re co. Nandembirãcuã mbeite equia co. Nyebe eriqui mbae raã ja arõte nande je co. Ae rese nandeico ndua eãte nae, ũquĩ abe chee esaã arõte quia nande je co. ²¹ Sã Jesucristo quiato riqui ñee turã mbei Dios je Jesucristo rĩĩ. Mbae ua ja mose chee. Eĩ si ra equiato quia ñee turã mbei erĩĩ. Amén.

4

Hue rĩ ja chõ Espiritu Turã ndiqui nguiã Jesús quiato mundua

¹ Setarõ ji aĩ Jesús rĩĩ a. Secheẽ amondo quia jẽje aque. Jẽingo turã ño nguia Cristo rã si. Dios chiirabote quia jẽ nde. ² Jẽseteã ño jẽingo. Jẽingo tochi chõ nguia. Jendoseĩ nguiatu chõ nguia jenyue. Jenyesequa chõ nguia jenyiese. ³ —Hue rĩ ja chõ nandeico ndua jẽ, jenyue chõ nguia jenyue. Sã Espiritu Turã ndiqui jemundua hue rĩ ja. ⁴ Jesús rete mĩĩ na ño nandre. Espiritu Turã mĩĩ ño siqui nguiã nandechiangui re co no. Jesús mĩĩ na nda nande ja nandeico. ⁵ Ae mĩĩ ño nandererecua ja re. Ae mĩĩ ndese chõ nandeico ja nguiã ã. Aque mĩĩ ñĩ ño ngue bautizar i nguiã nande je no. ⁶ Dios mĩĩ ño nanderu ja re. Ae mĩĩ ño nandemingo nguiã mbae rese. Ae mĩĩ ño siqui nguiã nandeite re co no. ⁷ Dios que nandechisaã ae aerã mee nande je ra. Cristo que uturã mee mee nande je ra. Ae ra nandesaã saã, ũquĩ naa naa turã sacua. ⁸ Sã embesa ji riqui ñee no: Cristo que nyui oso ibate ra. Mbia tarõ ji que equerao ra. Mbia chisaã ae aerã ngue emee mee mbia je ra, i que embesa ji ra. ⁹ Jesús que siqui ibátee nyii ra. Aquere que eru nguichi íbii cote ra. ¹⁰ Ae sí que oso nyui ibei robei cote ra. Mbae rerecuarã ja sacua ngue ae cote ra. ¹¹ Ae que mbia chisaã ae aerã mee ee ra. —Apóstoles ra jẽ, i que emo emo je ra. —Secheẽ embuchecua checua

quia mbia je, i que emo emo je ra. —Mbia sequiatoã je secheẽ turã esenei senei mbei serĩĩ, i que emo emo je ra. —Mbia serimba eteaquiato bei, i que emo emo je ra. —Mbia embaaquiato quiato bei quia, i que emo emo je no nda. ¹² Eĩ ngue Dios uquiato mbaaracua racua ja uchisaã ae aerã ndese ra. ũquĩ mose ra Jesús quiato Jesús oseĩ i i tuchi cote. ¹³ ũquĩ mose ra nandendua ja Jesucristo rese hue rĩ ja. ũquĩ mose ra Jesucristo nandeicua i i tuchi. Jesucristo rã nda nandeico chee ũquĩ mose. ¹⁴ ũquĩ mose ra nandeico ñimbirãcuã tuchi Cristo rese. “Tambirĩ irĩ Cristo rĩĩ” i mose emo nande je, nandeicoã nda ũquĩ ndese. Nandendua ata ata eã nda Cristo rĩĩ. Ae mĩĩ ndese chõ nda nandeico bei. Mbia riirĩ na nda nandeico ndua ata ata eã. ¹⁵ ũquĩ mose ra nandechẽ ñooño eã. Mbia ra nandembirĩ iriã. Nandechesequa ja ra equia mbia rese. Cristo rã si chõ nda nandeico turã. Dios quiato rerecua tuchite quia ae re. Sã nandeaquĩ nanderete rerecua no. ¹⁶ Sã nanderete riqui ñimbirãcuã ja no. Eĩ si chõ Cristo rimba nguiã ñimbirãcuã ja siqui turã nyiese. Sã nanderete no. Nanderete resenda siqui turã ja mose, nanderete rasiã ja rae.

Ae icuã jẽsaã saã nguia nyii nae, ũquĩ jẽsaã saã eãte quia namo ã

¹⁷ Jesús cheẽ tuchi chõ ã nde: Dios icuasa reã na nda jẽingochĩ cote jẽ. Ndua chooño ño nguiã mbae rese ũquĩ. ¹⁸ Eãquĩ ãtã ño ũquĩ nde. Dios cheẽ andu sereã nea je chõ ũquĩ nde. Nyebe Dios riqui nguiã ngueco mee eã tuchi ũquĩ je. ¹⁹ Mbae icuã achõ ndese chõ eriqui nguiã ndua ndua. Eireĩ nguiãte mbae icuã naa naa mose cote. Oo oo tuchi mbae icuã ja rese. ²⁰ ũquĩ ngue Cristo jembaaquiato quiato eã jẽ nda. ²¹ Jẽirandu que Jesús rese resẽ. Ae sí chõ ngue jembaaquiato resẽ. Jembaaquiato que ucheẽ turã ñĩĩ nda. ²² Jeñiangui renda icuã si jẽhui chõ. Aba mbiãcuãsa

tuchi chõ ùquĩ nde. Aba mbĩĩrĩ irĩ ño ùquĩ nde. ²³ Jendua ndua jembiasu chõ ae. Ae rese jẽingo ndua icuã icuã nyii nae, ùquĩ si jẽtesarei chõ cote ae. ²⁴ Jeñimbiasu chõ nguia ae. Ùquĩ mose ra jẽingo Dios rã si. Jẽingo turã tuchi ra equia ee.

²⁵ Jeñee ñooño eã ná nguia jendenda mo je cote ae. Nyiesenda ja chõ nande cote re. ²⁶ Jẽ paama i mose, paama jenyete turã ño nguia. Paama jenyete ocoã ño nguia. Tenda oso nonde ti jenyete. ²⁷ Jẽ paama i oco mose, diablo ra jembĩcuãte cote. ²⁸ Ae mbae mbuquiachã quiachã nguia nae, sã mbae mbuquiachã eã cote. Sã ae ae mbae ao ao o je icua cote. Sã eriqui mbae mondo mondo mbaecha reã je cote. ²⁹ Jenyuru jendecochõ ño nguia ñee ndocoĩ mbae icuã ñii jẽ. Mbae turã ñii ño jẽingo ñee mbia je jẽ. Emundua ndua sacuã Dios rese. ³⁰ Espĩritu Turã nda jembia eã eãchĩ jẽ jẽ. Ae chõ ngue Cristo mbae marca ñii nguia jendese. Nyebe jẽingo nguia ñee. —Cristo ra nandembiasu erã si, i. ³¹ Paama jenyechĩ nda emo ñii. —I ãchĩ se, jenyechĩ nda emo ñii jẽ. Jẽtasẽ tasẽchĩ nda emo je. Jeñee icuã icuãchĩ nda emo ñii. ³² Jẽturã ño jẽingo jenyete. Jẽseteã ño jẽingo jenyete. Jendesenda icuã icuã mose jẽje, jẽtesarei chõ eicuã si. Sã Dios jẽicuã mbutiã jẽ Cristo rĩ nyii no.

5

Dios quiato siqui bei mbae turã ndese

¹ Dios rĩrĩ tuchi chõ jẽingo nguia ã. Nyesecua tuchi equia jendese co. Erã si chõ jẽingo. ² Jenyesequa tuchi quia mbia rese. Sã Cristo riqui nyesequa tuchite nanderese no. Sã mano nandeicuã ndiquicharõ oveja rã no. Emano mose que Dios ia tuchi erese ra.

³ Cristo mbae chõ jẽ cote re. Nyebe jẽingo eã emo ninisi rese. Erũã mo ndese abe no. Emo mbae ra jenyosei

choseichĩ. Eicuãte ùquĩ. ⁴ Jenyuru jendecochõ ño nguia ñee ndocoĩ mbae icuã ñii. Mbae icuã aba ireingua rĩ jẽnee eã. Eicuãte ñee mose ùquĩ. Gracias jenyete quiatu quia Dios je. ⁵ Emo siqui mose ngũinisiã ndese, aque ra siqui eã Cristo rese, Cristo siqui mose ererequa. Ae mbae icuã saã saã mbeite quia nae. Ae emo mbae chosei chosei quia nae, ùquĩ abe ra siqui eã Cristo rese. Emo mbae osei osei mose, Dios abareã ndese siqui raanguia chõ ùquĩ no nde. ⁶ Ae ùquĩ saã saã nguia mbae icuã nae, ùquĩ je ra Dios mbae rasi raanguia tuchi. “Ichõĩño ñene” ichĩ nda emo jembĩrĩ irĩ jẽ. ⁷ Ae ùquĩ saã saã nguia mbae icuã nae, ùquĩ ndese ra jẽingochĩ jẽ. ⁸ Itondaruqui re rã ngue jẽingo cose ra. Nyaáshiĩ ño jẽingo nguia Jesús rese ã cote. Nyebe jẽingo turã. ⁹ Ae siqui nyaáshiĩ nae, ùquĩ siqui turã ño nguia ã. Ñee ñooño eã ño nguia emo je ã. Siqui ãte equia mbae icuã mo ndese ã. ¹⁰ Ae Dios bite riqui nae, ùquĩ ndese chõ jẽingo ñimbaaquiato quiatu. ¹¹ Ae itondaruqui rĩnda saã saã nguia mbae icuã nae, ùquĩ nda jẽsaã saãchĩ erese jẽ. Echiao icuã ñii ño jẽnee ee emundua jẽ. ¹² Ae ùquĩ saã nyecuayã cuayã nguia mbae icuã nae, aba ireite ñee ùquĩ ñii. ¹³ Jẽ ùquĩ nyiao icuã mbuchecua mose ee, ndua ndua ra erese cote. Emo emo siqui arõte Cristo rese cote. Itondaruqui rĩnda recha mbae icuã. ¹⁴ Sã embesa ji riqui ñee no:

Ae uque saã saã nguia nae, sã ùquĩ ñumumba.

Ae siqui quia eraaque rã nae, sã ùquĩ quera si.

Ùquĩ mose ra Cristo uturã ndeacuquia ee,

i que embesa ji ra.

¹⁵ Cochee tuchi chõ jẽingo Dios rese. Mbua aquiatuã na nda jẽingochĩ. Mbua aquiatu rã nguiatu jẽingo. ¹⁶ Ae Dios bite riqui nae, ùquĩ ndese chõ jẽingo ñimbecoteã. Mbae icuã icuãte eriqui ã cote. ¹⁷ Jẽaquiatuã eã ño jẽingo Dios rese. Ae Dios bite riqui nae,

ũquĩ ndese chõ jẽingo ñimbaaquiatu quiatu. ¹⁸ Jẽquiacua quiacuachĩ nda equia jẽ. Jẽquiacua mose mbae icuã jẽsaã saã ja arondete. Espíritu Turã nguiatu jemingo tuchi jeñiangui re. ¹⁹ Cristo rĩ jeñee turã tuchi quiatu quia jenyue. Jẽirasei rasei tuchi quiatu quia Dios je. Himnos. Salmos. Jẽya chõ jẽingo irasei rasei Dios je. ²⁰ Dios rei nanderu. Ae chõ mbae ja mee mee nguiã nande je co. Nyebe “gracias” jenyue bei quiatu quia ee Jesucristo rĩ.

Jẽingo turã ja chõ nguia jenyuchua jenda ja je

²¹ Jenongue cheẽ jemumbayã ño nguia. Cristobi tuchi chõ ũquĩ nde. ²² Sã cuña ngu cheẽ mumbayã. Sã eriqui Dios cheẽ mumbayãte no. ²³ Eru quia rei ngũinisi rerecua. Sã Cristo uquiato rerecua no. Cristo quiato rei Cristo rete rã. Cristo quiatu ngue esirõ nguiã eicuã si. ²⁴ Sã Cristo quiato riqui echeẽ mumbayãte no. Eĩ si chõ cuña nguia ngu cheẽ mumbayã mbei. ²⁵ Sã eru riqui nyesequa tuchi ngũinisi rese. Sã Cristo nyesequa tuchi uquiato rese no. Sã mano nyee eriquicharõ no. ²⁶ Uquiato no sacua icúe chõ ũquĩ nde. Irei que i je ra. Ucheẽ je abe que eirei no nda. ²⁷ Cristo uquiato mbuturã turã ja quia co. Mbae icuã ndese emingo uquia reãte. Nyebe eyate riqui nguiã erese co. ²⁸ Sã Cristo riqui nyesequa tuchi uquiato rese no. Eĩ si chõ mbia quia nyesequa ngũinisi rese. Sã emo ndiqui ngueteãte nguete rese no. Emo ngueteã mose ngũinisi rese, nguete rese ngueteã naanguia chõ ũquĩ nde. ²⁹ Emo nda nguete ucuayã eã. Nguete ra equereco turã. Teaquiato turã nda equia. Eĩ si Cristo quia uquiato rerequia turã co no. ³⁰ Cristo rete rã si chõ equiato re. Nande abe chõ Cristo rete rã no nde. ³¹ Dios que ñee nyii ra. Emo ngũinisirã ndea mose, sã nyao usi si. Ngu si abe no. Sã ngũinisi mĩ ndese chõ eriqui. Co mĩ siqui rã ño eriqui nguiã nyiese cote. ³² Mbaranguiatuãte raque ũquĩ

icua. Nyeremo siqui mose co mĩ na. Cristo rĩ ño eriqui nguiã ñee. Equiato rĩ abe no. ³³ Jẽje abe chõ eriqui nguiã ñee. Jẽ nyesequa tuchi sacua jeninisi rese. Sã jẽingo nyesequate jendete rese no. Sã cuña abe riqui ngu cheẽ mumbayã mbei.

6

¹ Mbia riirĩ, jendu cheẽ jemumbayã ño nguia. Jẽsi cheẽ abe. ²⁻³ ã ngue Dios ñee cose ra: “Jẽingo turã ño nguia jẽsi je jẽ. Jendu je abe. Jẽingo turã mbei ra equia ũquĩ mose. Jendeco ra jẽingo arete íbii,” i que Dios mbia je cose ra. ⁴ Eru je tacheẽ cote. Esi abe je. Jeñee icuã icuã tuchite chĩ nda jendiirĩ je jẽ. Paama i chee ra jẽje. Jembaaquiato turã turã quiatu quia. Jemingo turã quiatu quia Dios rese.

⁵ Mbia rimba je tacheẽ cote. Jenderecua cheẽ jemumbayã ño nguia. Cochee chõ jẽingo ee. Jẽingo turã ño nguia jenderecua je. Cristo bite ũquĩ. ⁶ Jenderecua mae eã mose jendese, ũquĩ mose abe chõ jẽingo embae raã naa turã ee. Mbae jẽsaã turã ja quiatu quia Dios cheẽ ndui si. Cristo rimbate quia jẽ nde. ⁷ Jẽya chõ jẽingo mbae raã naa mose jenderecua je. Dios je chõ jẽingo nguiã eraã ũquĩ. Jenderecua ibi jenda mĩ je eã ño ñene. ⁸ Dios ra mbae turã mee jẽje emo mose jenyiao turã ndibishorõ. Jẽingo mose mbia rimba. Mbia rimba eã jẽingo mose ra re no ae. ⁹ Mbia rerecua je tacheẽ cote. Jẽingo turã ño nguia jẽ abe jenimba je. —Tareiruã nua, jenyechĩ nda embirĩ irĩ jẽ. Jẽ abe chõ jenderecua no nde. Jesucristo rei jenderecua. Jenimba abe rerecua. Eĩ ja chõ mbia Dios je re. Mbia mĩ ndese ra eriqui turã eã.

Soldados rã si chõ jẽingo nyiquisã mbae icuã si

¹⁰ Hui bei nonde ã tacheẽ jẽje. Dios quia rei equirãcuã tuchi. Dios quirãcuã je chõ jẽingo nguiã ñimbirãcuã. ¹¹ Sã soldado riqui armadura mingue no. ũquĩ ndei

nyiquisã sacuã ùquĩ. Eĩ jenye si chõ nguia siqui tuchi Dios rese nyiquisã Satanás si. ¹² Ae icuã icuã ndiqui nande je Jesús rĩ nae, mbia eã ño ùquĩ nde. Satanás ño ùquĩ nde. Satanás nimba abe no. Aba checuayã icuã abe no. Mbae icuã nderecua ja chõ ùquĩ nde. Equirãcuã tuchi riqui ùquĩ. ¹³ Jẽingo tuchi Dios rese ùquĩ icuã si nyiquisã sacuã. Jẽquirãcuã jẽingo tuchi sacuã. Jẽquirãcuã mbei quia jẽingo, Satanás jembicuã eã sacuã. ¹⁴⁻¹⁷ Jẽquirãcuã tuchi chõ jẽingo. Sã soldado riqui icoquiato armadura mingue no. Eĩ jenye si chõ nguia icoquiato diablo jembicuã eã sacuã. Sã soldado riqui ngũmbi cuasa mingue no. Huĩsia rĩnda abe mingue nyiquisã sacuã no. Sã soldado riqui huiyao mingue icoquiato no. Sã escudo abe rerequia oo no. Nyiquisã sacuã emo uu mombo mose ee. Sã huiite sucha ãtã abe mingue uãquĩ ndiquisã sacuã no. Sã tiquise abe rerequia no. Soldado rã si chõ jẽingo icoquiato nyiquisã sacuã diablo si. Jeñee ñooño eã ño nguia. Jẽingo turã mbei chõ nguia. Jẽingoquiato bei quia Dios cheẽ turã nenei nenei mbia je. Dios jẽicua tuchi quiatu quia. Dios icua tuchi mose ra diablo tã i eã jẽje. Dios quirãcuã ndese quia jẽingo tuchi mbae icuã naa eã sacuã. Dios cheẽ jẽicua tuchi quiatu quia. Ùquĩ mose ra Espiritu Turã siqui tuchi jendese. ¹⁸ Jeñee mbei quiatu quia Dios je. Sã Espiritu Turã jembucheẽ turã mbei quia ee. — Mbae embu seje. ã embu seje, jenye bei quiatu quia Dios je. Dios quiato ja rĩ ño jẽingo ñee Dios je. Dios siqui turã sacuã erese. ¹⁹ Serĩ abe quia jẽingo ñee mbei Dios je. Sembucheẽ turã sacuã, se echeẽ nenei nenei mose mbia je. Ae rese mbia riqui jiranuate Cristo rĩ nae, ùquĩ asenei senei nguia mbia je co. ²⁰ Dios que semondo ucheẽ turã nenei nenei sacuã nda. Ùquĩ ñi ño setarõ ji aĩ nguiã a. Jeñee mbei quiatu quia Dios je serĩ. Se ireĩ ireĩ eã sacuã. Se echeẽ

turã nenei nenei mbei sacuã mbia je.

Pablo ñee hui bei

²¹ Tiquico si quia jendea aque. Ae ra mbae senei ja jẽje jembiiirandu serĩ. Ae que mbae saã turã mbeite quia serese ra. Dios rimba turã tuchi chõ ae re. ²² Nyebe amondo nguiã jendea aque. Jembiiirandu ja sacuã urerese. Jembia tuchi sacuã Cristo rese abe. ²³ Jesús quiato chõ jẽ abe, se rã si re. Sã Paba ibatenda riqui jembia bei tuchi. Sã eriqui jembuchesequa tuchi mbia rese. Sã Jesucristo icua uquia tuchi jẽje. ²⁴ Ae nyesequa tuchi quia Jesucristo rese nae, sã Dios turã siqui tuchi ùquĩ ndese. Amén.

LA CARTA DEL APOSTOL SAN PABLO A LOS FILIPENSES

Pablo tarō ji ucheẽ mbesa mondo Jesús quiato je

¹ Pablo chō se re. Timoteo rese. Jesucristo rimba chō ure re. A ureico ã mbesa jêje a. Felipos jenda Jesucristo quiato ja je a. Jesús quiato rerecua je abe ureico ã mbesa a. Diáconos je abe no. ² Sã Paba Ibatenda turã ndiqui jendese. Sã jembia mingo. Sã Jesucristo abe jembia mingo no.

Pablo ñee Dios je Jesús quiato rñ

³ Sendua ndua mose jendese, seya beite aico jendese co. Gracias ae beite sequia Dios je jeni co. ⁴ Se ñee ñee mose Dios je jeni, seyate riqui co. ⁵ Se Jesucristo cheẽ nenei namo mosenda bei chō jêingo nguiã ndua bei serese co. Nyebe jêingo nguiã mbae mondo mondo bei seje co. Nyebe seya tuchi riqui nguiã jendese co. ⁶ Dios que ucheẽ mingue jeñiangui re, ae si ra siqui bei jendese jembitirō tirō. Jesucristo tu chee. Ae bei. Siqui bei ra jendese. Aicuate se quia co. ⁷ Coche aico nguiã ndua ndua eĩ jendese cco. Achesequa tuchite quiatu nguiã jendese. Jẽ ngue jêingo beite quia serese ra. Jendua ndua beite que equia serese ra. Mbae mondo mondo bei seje. Mbia icuã icuã mose seje. Se mbia cheẽ ndiquisã quisã mose Jesús cheẽ si. Mbia setarō tarō mose. Ûquĩ mose abe que jêingo beite serese ra. Dios turã ndese que nandeico mae mae mbeite ra. ⁸ Dios resa aico ñee co. Jesucristo rã si aico nyesequa tuchite jendese co. ⁹ Aico ñee mbeite Paba je jeni co. —Paba, ùquĩ embuchesecua i i tuchi mbia ja rese. Ndeaquiatu emondo i i tuchi ee, ae beite quia Paba je jeni co. ¹⁰ Eĩ nda mbae turã jêicua. Eĩ nda jêingo bei mbae turã ndese. Eĩ nda Jesucristo ñee asiã jêje tu mose. ¹¹ Eĩ nda Jesucristo jemingo bei mbae

turã ndese. Eĩ nda mbae turã jêsaã saã ja Dios je.

Cristo mñ nñ ño aico nguiã se co, i Pablo

¹² ã tasenei jêje. Mbae icuã ngue jeĩ jeĩ mbeite quia seje, ùquĩ ngue Jesús cheẽ mbutiba eã mbei ra. Ûquĩ jeĩ jeĩ mose seje, mbia que jirandu tuchite quia Jesucristo rese cote ra. ¹³ A setarō ji ñi cárcel a. —Cristo rñ ño etarō ji ñi nguiã hue, i jate mbia quia serñ ùquĩ. Mbia rerecua chuchua jenda ja. Tuchuamo jenda ja abe. ¹⁴ Jesús quiato jirandu mose setarō ji rese, esiquicheãte riqui Dios cheẽ nenei nenei ùquĩ cote. Jesús quiato ja riqui Dios cheẽ nenei nenei tuchi ùquĩ cote. —Dios riqui tuchi urerese co, i equia ùquĩ cote. Maende setarō ji rese.

¹⁵ Emo emo ndiqui Cristo renei ñooño ùquĩ. Ndua icuã icuã ño nguiã ùquĩ. Mae icuã icuã ño nguiã serese ùquĩ. Emo emo ndiqui Cristo renei turã tuchi ùquĩ no. ¹⁶ Ae Cristo senei ñooño nguia nae, ùquĩ icuãte riqui seje ã. —Sã Pablo tarō ji ñiño, i equia serñ ã. Cristo renei ñooño ã. Emo ndese ndua eã. Nyiese chō eriqui nguiã ndua. ¹⁷ Ae Cristo senei turã nguia nae, ùquĩ ndua chō nguiã emo ndese. —Jesucristo cheẽ nñ ño Pablo tarō ji ñi nguiã hue, i equia ndua serese ùquĩ. ¹⁸ Seyate emo Cristo renei turã mose. Seyate emo Cristo renei ñooño mose no. Cristo rñ nguiatu eriqui nguia ñee. Tachimbua tuchi chō nguia ùquĩ Cristo renei nenei mose.

¹⁹ Jëndese abe seyate aico co. Ûquĩ jêingo ñee Dios je serñ ùquĩ. Espíritu Turã ndiqui serese a no. Ae Jesucristo mbu seje. Nyebe Dios riqui nguiã setarō ji reaquiato tuchi a. Nyebe seya tuchi riqui nguiã a. ²⁰ Sesiquicheã tuchi ra se reae. Seireĩ nguiã mbei nda eriqui Cristo cheẽ nenei nenei ña. Cristo bi achō ndese taico bei setarō ji. Mbia nda seiquia rei nguiã, se taico bei Cristo rese. Mbia nda sembusẽ ndei nguiã no, ùquĩ mose abe taico bei erese no. Eĩ ja chō seje

re. Eturã ja chõ seje no nde. ²¹ Cristo mii ñi ño aico nguiã se co. Semano mose, eturã tuchi quiarei ùquĩ seje cote. ²² Dios semingobe mose, ae si je chõ aico nguiã mbae turã naa naa co. Ma ño eturã jiri riqui seje. Mano mose ereae. Siquibe jiri mose ere no ae. Aicua eãte se. ²³ Ma ño sebi jiri. Semano sete raque oso sacua Cristo rese. Ûquĩ nda eturã jiri seje. ²⁴ Se seicobe mose íbii, ùquĩ nda eturã jiri jêje reae. ²⁵ Ûquĩ aicuate se. Seicobe mose, ùquĩ nda eturã jiri jêje reae. Nyebe ra Dios semingobe jiri jendese. Se Cristo icua uquia sacua jêje. Se jembiabe jiri sacua Cristo rese. ²⁶ Anyae ra oso jendea. Aque mose nda jêya tuchi Jesucristo rese chã.

²⁷ Ae uresenei senei nguia Cristo rii nae, ùquĩ andure chõ jêingo turã. Airandu turã nda se quia jendese chã. Eĩ nda mbia ñee seje chã. —Hue rĩ ja chõ eriqui ndua turã nye. Huee echi mbia cheẽ ndiquisã quisã Jesucristo cheẽ si hue, i nda mbia seje chã. I nda mbia seico mose isho chã. Seico mose abe jendese. ²⁸ ¡Tiri jenyechĩ nda Jesús ucuãya sa si jê! Jêsiquicheã mose, Dios ra ùquĩ mundua tata cuasu rese cote. “Huee ra asochĩ nde”, i chee rae. “Jesús icuasa ra Dios mingo bei”, i ra ùquĩ jeni cote, jêsiquicheã mose esi. ²⁹ Jê Cristo jêicuate quia ùquĩ cote. Ûquĩ miiño eã. —Jeñimbirãcuã abe quiatu quia serii, mbia icuã icuã mose jêje, i Cristo quia jêje co. ³⁰ Sã mbia icuã icuãte riqui seje no. Eĩ si chõ mbia icuã icuã ndiqui nguiã jêje ùquĩ. Nande jaje bei chõ ñene. Jemae ndei que equia serese cose resẽ. Se mbia icuã ndiquisã quisã mose. Ûquĩ sí rese chõ jêingo nguiã jirandu randu serese namo no.

2

Cristo seteã tuchi que tu ra

¹ Jesucristo jembiu turãte quia co. Cristo nyesequa mose jendese, jêyate riqui ùquĩ. Espiritu Turã abe riqui jendese ùquĩ. Jendua turãte equia

emo ndese ùquĩ. ² Nyebe aico nguiã ñee jêje. Seyate aico raque jendese co. ¡Secheẽ jemumbayã tuchi quiatu quia jê! ¡Sembia tuchi quiatu se jê! ¡Jendua ata atachĩ nda jê! ¡Hue rĩ ja chõ jêingo ndua jê! ¡Hue rĩ ja chõ jêingo nyesequa nyiese no jê! ³ ¡Abei chiãte ra jêingochĩ jê! ¡Jenguasu ra jêsaã saãchĩ! ¡Jêseteã ño jêingo! —Nde chõchĩ ndeturã sesi, ¡jenye chõ jenyue! ⁴ “Se chõ jê” ¡jenyechĩ nda jê! Emo mbaerã abe rese quia nandeico ndua. ⁵ Sã Jesucristo riqui ndua eãte uchiese no. Erã si chõ nandeico ndua nande abe jê. ⁶ Dios rã si rei que Jesucristo ra. Ñimbuseteã tuchi que u íbii ra. Ererequa rã eã ngue eru íbii ra. —Dios rã si chõ taico bei se, iã ngue u íbii ra. ⁷ Mbia rerequa tuchi rei que Jesucristo ra. Huiico mose ibate. Mbia mo na ngue eru íbii cote ra. Mbia mbaecha reã na ño ngue eriqui íbii cote ra. Mbia rimba rã. ⁸ Mbia mo na ño ngue ae ra. Ibii eico mose cote. Mbia rerequa que esaã saã eãte quia ra. Siqui mingue chõ ngue equia ra. Dios cheẽ ngue emumbayã mbei mano nyee ra. Embucha ji que mano ira rese ra. Aba ireite mano ira rese. ⁹ Nyebe Dios riqui nguiã Jesucristo mbuchecua beite co cote. Mbia rerequarã tuchi Dios Jesucristo mingo co cote. ¹⁰ Mbia ra ngoi ja chee nguiã ndese Jesucristo je ñee. Ae siqui ja íbii. Ae siqui ja íbatee no. Ae siqui ja ibiqui rĩ. Ûquĩ ja ra ñee turã Jesucristo je. ¹¹ —Jesucristo rei mbia rerequa ja, i chee ra ùquĩ ja ñee. Ûquĩ mose ra Dios ia tuchi cote.

Secheẽ jêisi chooño eẽ ño nguiã, i Pablo

¹² Secheẽ ngue jemumbayãte quia seico mose jendese. Ishote aico jêsi co. Secheẽ jemumbayã tuchi quiatu quia isho seico mose abe. Cochee jiri quiatu jêingo Dios je. Jêingo bei tuchi quia erese. Jenderao chee ra ibate mbae icuã si. ¹³ Dios quirãcuã ndiqui jeñiangui re ùquĩ. Dios quia mbae turã nyosei uquia nguiã jêje. Dios mii ño jemingo nguiã ubi rese.

14 Mbae turã jësaã turã ja chõ. Ñee icuã icuã ndocoĩ. Teã teã ndocoĩ. 15 Eĩ nda mbia mo ñee icuã icuã eã jëje. Eĩ nda jëicuã eã emo je. Dios riirĩ ño jë nde. Sã nyasitata riqui mbae resae jate itondáruu no. Eĩ ño jë nde. Nyasitata rá si chõ jë nde. Mbia icuã ndesae ja. 16 Jëingo mbia mingo beisa renei nenei tuchi mbia je ũquí. Nyebe ra seya tuchi jendese Cristo tu mose. Secheẽ jëisi chooño eã ño nguiã. Jaembaaquiatu chooño eã ngue Cristo riĩ nda. 17 Secheẽ nguire jëingo Dios icuate ũquí cote. Secheẽ nguire jendete jemee tuchi mose Dios je, seya tuchite ra jendese cote. Mbia nda sei quia rei nguiã Jesucristo riĩ, seya bei ra aico jendese, jendete jemee tuchi mose Dios je. 18 Jeñimbia chõ nguia serese. Sã seyate aico co no.

Timoteo tamondo jëje Epafrodito rese, i Pablo

19 Jesús eno i mose, Timoteo tamondo rá jendea. Eĩ nda seya jirandu mose jendese. 20 Timoteo rá si áte emo ndua tuchi jendese. 21 Umbaerã achõ ndese chõ eataque riqui nguiã ndua ndua. —Á tasaã saã mbei Jesucristo je, i áte equia ũquí. 22 Sã eriirĩ ndiqui mbae raã naa ngu rese no. Eĩ si que Timoteo quia serese ra. Jesucristo cheẽ nenei nenei mose serese. Siqui turã mbeite que equia serese ra. Ũquí jëicuate quia ũquí. 23 Nyebe ra Timoteo amondo jendea. Á tatea rá nyii. Mbia ra setarõ ji mbei a reae. Sembusẽ nda re no ae. Ũquí tatea rá nyii. Ũquí ndeare ra Timoteo amondo jendea. 24 Aĩ mbeite ndua Dios rese a. Ae ra sembusẽ jei reae. Semondo ra jendea cote reae.

25 Epafrodito abe tamondobe jëje. Ae jemondo seje nyii seraarõ sacua nae. Seresenda turáte riqui seje co. Dios cheẽ nenei nenei serese. Senongue rá tuchi eriqui seje co. 26 Mae sete equia jendese co cote. —Mbia jiranduchĩ serasi rese re, i equia jeni co. Nyebe eya eã ndiqui nguiã nduate jendese cote. 27 Ae

bei. Erasi tuchi que eriqui rei ra. Mano serĩ tuchi rei que equia ra. Dios ia eã tuchi que eriqui erese ra. Nyebe embucherõ nguiã. Serĩ abe que Dios embucherõ nda. Sembia jiri sacua. Sã mbae riqui eĩ eĩ ja tuchi sembia eã se no. 28 Nyebe Epafrodito amondo nguiã jëje aque. Jembia sacua erasiã ndese cote. Seya eã nda sasẽ jiri jemaie mose erese cote. 29 Nanderesenda tuchi chõ ae Jesucristo rese re. Ngasẽ mose pee, jëya chõ erese. Jëisi turã ño. Er-aanguia rese jëingo turã mbei Jesús quiato. 30 Jesucristo riĩ ngue mano serĩ serĩte ra. Jesucristo cheẽ nenei nenei mose. Siquiche áte que equia ra. —Amanochĩ nda se re, i áte que equia ra. Sereaquiato turã tuchi que equia ra. Ishote quiato ngue jëingo nguiã jë. Sereaquiato aronea.

3

Cristo mbei ndese aico cote, i Pablo

1 jëya bei chõ jëingo Jesucristo rese jë! Ae asenei senei nguia jëje nyii nae, ũquí sí tasenei senei jëje. Sebite secheẽ nenei nenei sí jëje. Jendua bei sacua erese.

2 Ae siqui nyacua raáte nae, ũquí si jenyicuasẽ ño nguia. Eicuáte riqui ũquí. Aba rete sia chooño ño ũquí nde. Mbia mbaaquiatu turã ndocoĩ. 3 Circuncisión ño nande re. Nandechiangui re chõ nandeico nguiã Dios rerequia nande ã. Nande chõ nandeya riqui nguiã Jesucristo rese ã. —Mbia circuncisión naa mose, aque mose quia ra Dios emingo bei cote, i chõchĩ emo hue jenda nguiã ũquí. Nandequiato jiriã tuchi chõ ũquí nde. 4 —Dios ra semingo bei, mbae turã naa naa mose, ae rei que se quia nyii ra. —Seturã nbei nda Dios semingo bei, i chõchĩ emo. Seturã tuchi raque eriqui ũquí si. 5 Sechacuquia mose, ocho días mose que circuncisión naa seje ra. Israelita chõ se re. Benjamín ndiirĩ nducucha chõ se re. Hebreo chõ se re. Paba abe que hebreo ra. Fariseo que se nyii ra. Moisés

chimbresa que amumbayã nguia ra. ⁶ Aico asite que se quia Dios rese nyii ra. Jesús quiato que asiquisã tuchi quia nyii ra. —Pablo riqui Moisés chimbesa mumbate co, i aroneate que equia seriã nda. ⁷ Ûquĩ nĩi ngue aico secuasu raã naa tuchi cose ra. Jesús icuayã mose se. Mbae eã tuchi chõ ùquĩ seje cote re. Cristo rese quiatu aico nguiã co cote. ⁸ Mbae mo ndese aico queteã eãte co cote. Aico ndua eãte mbae mo ndese co cote. Jesucristo mĩi aicuate quia co cote. Ûquĩ eturãte mbae ja si seje cote. Jesucristo rĩi aico hui jate mbae si co cote. Iti rã ño mbae ja riqui nguiã seje cote. Seico bei sacuã Cristo rese. ⁹ Cristo rese tuchi chõ aico nguiã co cote. Aico bei rei que Moisés chimbesa rui nyii ra. Ûquĩ nĩi eã ño Dios seisi turã nguiã. Se Jesucristo icua mose, ùquĩ mose quiatu ngue Dios seisi turã nguiã. Ae Jesucristo icua quia nae, ùquĩ Dios isi turã ño nguiã. ¹⁰ Cristo aicuase tuchichĩ nguia co. Ae quirãcuã Cristo mbuquera si nae, aque quirãcuã nda siqui rã serese chã. Sã Cristo ñimbirãcuã mbia icuã si no. Eĩ ae rã nda ñimbirãcuã mbia icuã si chã. Sã Cristo mano nandẽicuã ndiquicharõ no. Eĩ ae rã nda mano mbae icuã si chã. ¹¹ Eĩ mose ra Dios seraaque mbuquera si mingo bei cote.

Cristo mĩi ndese aico ndua co cote, i Pablo

¹² Mbae quia asaã ja eãte rei nguiã. Jesús turã na nguia ra aico jee cote. Co Dios riqui sembitirõ tirõ mbeite co. Co aico erui beite co. Jesucristo que seisi seico sacuã ae rã si ra. Jesucristo turã na tuchi aicoã ndaque namo co. Nyebe aico nguiã siqui tuchi erui co. Seico sacuã tuchi chee ae rã si cote. ¹³ Ae ra Dios mee seje, ùquĩ asiiti ja eãte. Ae eĩ eĩ seje cose, ùquĩ si aico tesareite co. Ae ra Dios mee seje, ùquĩ nda asiiti. Ûquĩ mĩi ndese chõ aico nguiã ndua co cote. ¹⁴ Ae siqui tuchi quia Jesucristo rese, ùquĩ je quia ra Dios premio mee. Nyebe aico tuchi nguiã erese co. Premio isi sacuã. ¹⁵ Eĩ

nae ja tuchi quiatu quia siqui Jesucristo rese jẽ! Nande eicua tuchi mose. Jendua ja eã mose hue rĩ, Dios ra ñee jẽje. —Ã ndese chõ jẽingo, i ra jẽje. ¹⁶ Ae nandesiti nae, ùquĩ ndese bei chõ nandẽico. Ae rĩi Dios nandembaaquiato quiatu nyii nae, ùquĩ ndese bei chõ nandẽico. ¹⁷ Serui bei jẽingo, Seresenda. Ureico bei Jesucristo rui ã. Sã mbia siqui bei urerui. ¹⁸ Mbia tubiriã ndiqui Cristo ucuãyãte ã. Ûquĩ ae rei que se quia jẽje nyii resẽ. Aba mbucheseo seri. “Cristo que mano mbia riquicharõ nda”, ùquĩ andu sereãte. ¹⁹ Ûquĩ nda nyoĩ ja tata cuásuu. Ubi rese achõ ño ùquĩ ndiqui nguiã. Eireĩ nguiãte. Eya chõ eriquichĩ nguiã huicua ndese. Ibi jenda achõ ndese chõ eriquichĩ nguiã ndua. ²⁰ Jesucristo riqui nanderirõ mbae icuã si co. Ibei jenda chõ nande cote re. Jesucristo ra tu ibei si nanderea cote. ã nandẽico eraarõ arõ ã namo. ²¹ Jesucristo tu mose nande je íbii, nanderete ra embuchicuabo. Nanderete icuã ño siqui nguiã namo ã. Jesucristo rete nininya chõ siqui nguiã co. Jesucristo ra nanderete mbuchicuabo nguete rã si. Uquirãcuã je ra nanderete mbuchicuabo. Sã mbae mbitirõ ja arõte uquirãcuã je no. Eĩ nda nanderete je.

4

Jẽya bei chõ jẽingo Cristo rese

¹ Sechesequa, andua tuchite quia jendese a. Amaese tuchi se quia jendese a. Seya tuchite aico jendese a no. jẽingo turã tuchi chõ Jesucristo rese jẽ! ² Evodia je tacheẽ. Síntique abe je tacheẽ. ¿Mbaerã jẽingo siqui icuãte nyue re? Jẽingo turã ño jenyue ae. Jesús quiato chõ jẽ ndesẽ. ³ Nde abe je tacheẽ, Seresenda. Ûquĩ cuña emingo turã nyiese. Eteaquiato bei quia. Ûquĩ ngue siqui bei serese Jesús cheẽ nenei nenei mose ra. Clemente rese abe no. Eataque rese abe no. Dios que ùquĩ mbae nombre mĩi mĩi libro umbae rese ra. —Ûquĩ nda siqui bei serese, i que ra. ⁴ Jeñimbia bei

Jesucristo rese. ¡Jeñimbia tuchi jê! ⁵ Sã mbia mae ja jêturã ndese. Jê abei rese. Achite Jesucristo ñi tu a. ⁶ Pari pari jenyechi nda mbae mo je. Jeñee ja quiatu Dios je. —Mbae mo embu ure je, jenye chõ nguia ee. Gracias jenyechõ nguia ee. ⁷ Ñquĩ mose ra Dios jembia tuchi. —Mañi Dios quia ã mbia tuchi re, i nda mbia mae mose jendese chã. Jesucristo ra jeñia mbucoi tuchi. Jesucristo ra jembia bei mingno.

Mbae turã ndese chõ jêingo ndua

⁸ Hui bei nonde ã abe tambesa jêje. ¡Mbae icuã ndese ra jenduachi jê! Mbae turã ndese chõ jêingo ndua. Ae riñ nandeico ñee turãte, ñquĩ ndese chõ jêingo ndua. Ichõiñosa reã ndese chõ jêingo ndua. Ae Dios bite nae, ñquĩ ndese chõ jêingo ndua. Mbae quishĩ ndese chõ jêingo ndua. Ae rese mbia turã ndiqui mae sete, ñquĩ ndese chõ jêingo ndua. ⁹ Ae asenei senei nguia jêje nyii, ñquĩ ndese chõ jêingo jê. Ae eraã ndese jêingo mae mae seje nae, ñquĩ ño jêsaã saã mbei quia. Ñquĩ naa naa mose, Dios ra siquijendese. Jembia bei ra equia.

Jesús quiato ofrendas mondo Pablo je

¹⁰ Jendua ramombe equia serese ñquĩ. Dios sembia tuchite quia ñquĩ ndese co. Jêtesarei eãte rei que equia sesi nyii ra. Mbae que jemondo aroneate quia seje nyii ra. ¹¹ —Mbae ãte seje. Mbae mo embu seje, ae ãte se quia jêje co. Sembae eã mose, seyate ñquĩ mose. Sembae ñetê mose, seyate ñquĩ mose no. Ñquĩ je que achimbaaquiatu se ra. ¹² Sembae eã mose, seyate ñquĩ mose se. Sembae tubiriã mose, seyate ñquĩ mose no. Seya beite aico co. Seriãcuã mose. Serio mose abe no. Sembae tubiriã mose. Sembae eã mose abe no. ¹³ Cristo que uquirãcuã mee seje ra. Equirãcuã je mbae asaã ja arondete. ¹⁴ Coche ngue mbae jemondo nguia seje. Sembae eã mose. Seyate raque sembae eã mose. ¹⁵ Jê ae

chõ ngue mbae jemondo mondo bei nguia seje. Se Jesús cheẽ nenei namo mose bei chõ ngue mbae jemondo mondo nguia seje. Iglesia mo abe que mbae mee ãte seje ra. Jê ae chõ ngue re. Filipos jenda ja. Se Jesús cheẽ nenei nenei namo mose jêje, aque mose bei chõ ngue mbae jemondo mondo seje. Seso ramo mose Macedonia si. ¹⁶ Sã ñi mbae mo jemondo mondo seje Tesalónica seico mose no. Mbae eã mose seje. ¹⁷ —Mbae mo jemondochõ seje, ae ãte quia jêje a. Dios je chõ jêingo nguia emondo ñquĩ. Dios ra mbae mondo tuchi jêje eribishorõ. Ñquĩ ndese quiatu seya riqui nguia. ¹⁸ Ae jemondo seje namo Epafrodito rese nae, ñquĩ ngue aisi ja ra. Dios bite jeñimondo. Ofrenda turã tuchi que ñquĩ Dios je ra. Mbaete rei sembae cote re. ¹⁹ Jesucristo resenda chõ jê nde. Ae emoate jêje nae, ñquĩ nda Dios mee ja jêje. Dios quia mbae quereco ja nguia. Equirãcuãte quia ñene. ²⁰ Sã mbia ñee turã mbei Dios riñ. Nanderu riñ. Amén.

Hui bei chõ ã cote re

²¹ Jesucristo quiato je saludar jenyechõ ja seje. Ae Jesús quiato riqui serese nae, ñquĩ ucheẽ mondo quia saludar i jêje aque. ²² Jesús quiato a jenda ja ucheẽ mondo quia saludar i jêje aque. César chuchua jenda abe ucheẽ mondo quia jêje aque. Ae siqui quia Jesús rese, ñquĩ. ²³ Sã Jesucristo turã tuchi riqui jê ja je. Amén.

LA CARTA DEL APOSTOL SAN PABLO A LOS COLOSENSES

Pablo embesa mbesa Colosas jenda je

¹ Pablo chõ se re. Dios chiirabo chõ se re. Jesucristo que seirabo mingo ucheẽ nenei nenei sacuaã nda. Timoteo rese aico ã mbesa mbesa jêje a. Nanderesenda Timoteo. ² Dios rimba Colosas jenda je chõ aico nguiã co mbesa mbesa a. Cristo icuasa hue jenda ja je. Ae Cristo icua tuchi quia nae, ãquĩ ja je. Sã Dios turã ndiqui bei jendese. Sã eriqui jembia bei. Sã Jesucristo abe riqui bei jendese.

Pablo ñee Dios je Jesús quiato rñ

³ Nandererecua tuchi rei Jesucristo. Dios rei eru. Ureico beite ñee Dios je jeniã ã. Gracias ure beite equia jeniã ã. ⁴ Ureirandu turãte quiatu ngue jendese re. Jesucristo jêicuate quiatu nguiã ure je ãquĩ. Jenyesequa tuchi quiatu nguiã Dios quiato rese ãquĩ. ⁵ —Cristo rese ra nandeico je ibate, jenyete quiarei equia eicua ãquĩ. ãquĩ ndese que jêirandu tuchite nyii ra. Jesucristo cheẽ nenei nenei namo mose jêje nyii. ⁶ Jesucristo quiato echeẽ senei senei mbeite quia mangue chooñoa jenda ja je ã. Nyebe Jesús quiato riqui nguiã ñimbeta i i tuchi ã. Sã nandeico mbae a ucua ucua no, eĩ si chõ ñene. Sã eriqui Jesucristo cheẽ nenei nenei jêje nyii no. Sã Jesucristo cheẽ jeñia mbitirõ eandu ramo mose no. ⁷ Epafras abe que jembaaquiato quiatu Cristo rñ nda. Cristo resenda tuchi chõ ae re. Ae chõ Cristo cheẽ senei senei turã nguiã co. Nanderesenda tuchi chõ ae re. ⁸ Ae que sembiirandu turãte jendese ra. Espiritu Turã ndiqui tuchi jendese ãquĩ. Nyebe jêingo nguiã nyesequa turãte mbia rese ãquĩ.

⁹ Ureirandu mose jendese ãquĩ ndese, aque mose bei chõ ureico nguiã ñee Dios je jeniã ã. Dios jemingo bei sacuaã ubi rese. Ucheẽ

abe rese. Dios uaquiato mee sacuaã jêje. ¹⁰ Jêingo turã sacuaã Dios mbia. Jêingo turã sacuaã mbae turã ja rese. Jê Dios icua i i tuchi sacuaã. ¹¹ Dios jembirãcuã tuchi sacuaã uaquiato je. Jeñimbirãcuã tuchi sacuaã mbae rasi je. I nda jêingo tochi tuchi mbae ja je. ãquĩ mose ra jêyate no. ¹² Ureico gracias i tuchi Dios je ã. Ae quiatu ngue nandembuchiicabo nguiã. Ae ra Dios mee uquiato ja je mbae turã nae, nande abe je ra emee. Dios quia nandererequia turãte nguiã nyaashĩ na co cote. ¹³ Mbae icuaã nguiatu que nanderereco quia itondãruu nyii ra. Dios que nandembui ãquĩ si cote ra. Nguiirĩ ndese que nandemingo cote ra. ¹⁴ Dios riirĩ ngue nandeisirõ umbaerã mbei ra. Mano ngue nanderiquicharõ nda. Nandeicuaã ngue embutiã mbei nyesi ra.

Cristo que mano nandemingo turã sacuaã Dios rese ra

¹⁵ Mbiamae aroneate raque Dios rese. Dios rã sí tuchi chõ Cristo re. Ae rane ngue siqui Dios chiao mbae ja si ra. Ae que nyecua u mbia je cote ra. ¹⁶ Dios ae que mbae chao eã nda. Nguiirĩ ndese quiatu ngue mbae ja ao nguiã. Mbae ibatenda ao ja. Mbae ibi rñnda abe ao ja no. Ae rese nandeico mae ã nae, ãquĩ ja que Dios chao nguiirĩ ndese ra. Ae rese nandeico mae aroneate nae, ãquĩ abe que echao nguiirĩ ndese no nda. Mbiam rerecua ja abe no. Aba checuayã ja abe no. ãquĩ ja que Cristo chao ngu rese ra. Cristo mbaerã ño ãquĩ ja re. ¹⁷ Mbae ao ja nonde Cristo riqui rei nyii. Erñ ño mbae riqui ja nguiã ã cote. ¹⁸ Dios quiato rerecua ja chõ Cristo riqui nguiã co. Sã nandeaquĩ nanderete rerecua no. Cristo rei mbae i tuchi. Mbae i ja. Ae rane ngue quera si manonde ra. Ae rei mbae rerecua ja tuchi. ¹⁹ —Se rã sí tuchi Cristo jê, i que Dios ra. ²⁰ Cristo mano mose, nandemingo turã sacuaã Dios rese chõ ñene. Nande mñ mingo turã sacuaã eã ño ñene. Mbae ja mingo turã sacuaã Dios rese chõ Cristo mano

nguiã. Mbae ja ibi rinda. Mbae ibei rinda ja abe no.

²¹ Ishote que jëingo Dios si nyii ra. Mbae icuã naa naa mose. Ũquĩ mose que jëingo Dios ucuayãte ra. Jendua ndua icuãte que equia erĩnda. Namonguia eriqui nguiã jemingo turãte uchiese ũquĩ. ²² Cristo quiatu ngue mano nguiã jeni. Mbia rete raanguia rerequia mose. Mbae rasi que esaã tuchi umano mose ra. Jeni ño ngue mbae rasi raã nguiã. Jëicuã mbutiã sacuã. Jemingo turã sacuã icúe Dios mbaerã. ²³ Nyebe jeñimbirãtã jiri quia Jesús icha rui. Jeñimondocho eã mbei quiatu quia jë. Jëhui eã ño Jesús cheë turã si jë. Jesús cheë turã ngue jeñandu tuchi quia. Mangue choñoa jenda ja que echandu ra. Se abe asenei senei tuchi quia Dios cheë nguire co. Pablo chõ se re.

Dios que seirabo ra, i Pablo

²⁴ Se mbae rasi raã mose jëje, seyate aico se co. Cristo quiatu ngue mbae rasi saã tuchi nguiã nande je nyii. Se mbae rasi raã mose, Cristo abe chõ mbae rasi saã nguiã serese. Cristo rete rã ño Cristo quiato riqui nguiã. Nyebe seyate riqui nguiã serete mbae rasi raã mose Cristo quiato je. ²⁵ Dios que seirabo uquiato mbaaquiato quiatu ja sacuã nda. Iglesia jenda ja. Dios cheë mbuchecua ja tuchi sacuã jëje. ²⁶⁻²⁷ Dios que seirabo judíos eã mbaaquiato quiatu sacuã nda. Ae Dios mbuchecua eã mbei judíos je nyii nae, aico ũquĩ mbuchecua Jesús quiato ja je ã cote. ã ndei ã: Cristo riqui jeñiangui re ã cote. Ae mii ño aba mingo arõ nguiã Dios rese co. Ũquĩ ño Dios mbuchecua ramo nguiã uquiato je co. ²⁸ Cristo mii ño aico nguiã ñee mbia je co. Mbia ambuti mbuti chõ nguiã Cristo icha rui co. Seaquiato je chõ aico nguiã mbia mbaaquiato quiatu Cristo rii co. ¶ nda Jesús quiato ja riqui siqui i tuchi erese. ²⁹ Nyebe serecoteã tuchite riqui nguiã ũquĩ ndese co. Dios quia

sembirãcuã mbeite nguiã co. Mbia mbuti mbuti sacuã Cristo icha rui.

2

¹ Co secheë jeñandu rã. Andua ndua tuchite se quia nimbecoteã jendese co. Acheë tuchite se quia Dios je jeni co. Laodicea jenda ñi abe no. Ae mae ãte quia serese Jesús quiato nae, ũquĩ ñi abe no. Mbia mbaaquiato icuã icuãsa riqui jembui serite Cristo si ũquĩ. ² Jë ja rii aico ñee Dios je co. Jëingo i i sacuã Dios rese jeñiangui re. Jenyesequa ja sacuã jenyiese. Jendua ja sacuã hue rii si. Jëaquiato tuchi sacuã Cristo rii. ¶ nda Cristo jëicua tuchi cote. ³ Cristo mii tuchi chõ aba mbaaracua nguiã co. Ae mii tuchi chõ aba mbaaquiato nguiã Dios rese co. ⁴ Mbia jemburi iri eã sacuã ño aico nguiã ñee jëje co. Mbia cheë turã abareãte raque. Jesús cheë ndui eãte quia ñene. ⁵ Aico ndua ndua tuchi jendese co. Siqui rocoi jendese. Ae rese airandu jendese nae, sembia tuchi chõ ũquĩ nde. Jëingo turã mose jenyiese. Jë Cristo icua i i tuchi mose. Nyebe seya bei tuchi riqui nguiã jendese co. ⁶ Sã Jesucristo jëisi nyii no, eĩ jenye si chõ nguia siqui bei erese. ⁷ Sã ira riqui ngao mondo tuchi ibiqui rii no. Ñimbirãcuã tuchi sacuã. Eĩ jenye si chõ nguia jë abe jë. Jeñimbirãcuã ño nguia Cristo rui. Cristo jëicua tuchi quiatu quia. Secheë ñinda rui sí. Gracias jenye bei chõ nguia Dios je.

Dios que jembiasu Cristo rii cote ra

⁸ Mbia ra jemburi irichi jembucha nonde Cristo si jë. Ũquĩ ñee turã arõte raque. Ñee iru iru chõ nguiã ũquĩ. Ñimbucha eãte equia Cristo rese ũquĩ. Mbia cheë achõ ño echeë nde. ⁹ Dios rã si tuchi rei Cristo. Mbia rete raãte raaque Cristo rete. ¹⁰ Ũquĩ jëingo ñimbucha Cristo rese ũquĩ. Cristo rã sí tuchi rei nande cote. Cristo quiarei ererequa tuchi mbia rerequa ja si. ¹¹ Cristo que jembui jenyiosei osei icuã si cote ra. Jemingo que icúe Dios mbaerã cote ra. ¹² Ũquĩ jëingo Dios

quirãcuã icuate ùquĩ. Sã mbia Jesús raaque ati rei no. Eĩ si chõ jẽ Jesús icua mose re. Jendaaque ati rã si chõ jẽ Jesús icua mose re. Sã Dios Jesús mbuquera si uquirãcuã je no. Eĩ si chõ jẽ Jesús icua mose re. Jembuquera si rã ño jẽ Jesús icua mose re. Dios chõ Jesús icua uquia nguiã jẽje. ¹³ Isho que jẽingo rei Dios si cose ra. Jenyiosei oseicua ndese siqui bei mose. Jẽ jẽicuã nderequia bei mose. Dios que ngueco mee jẽje cote ra. Jẽ Cristo icua mose. Dios que jẽicuã mbutiã cote ra. ¹⁴ Ae icuã nandesaã saã nguia Dios je nae, Dios que ùquĩ mbutiã nandesi ra. Ae cheẽ nandemumba mumba quia mbia nae, ùquĩ ñee ngue Dios mbutiã nandesi cote ra. Dios nandẽicuã mbucha raanguia Cristo rese chõ ñene. Cristo chĩ mose cruz rese. ¹⁵ Cristo mano mose que aba checuayã nderecua quirãcuã mbutiã nda. Cristo que aba checuayã mbuquirãcuã nea ja ra. Mbia resa rae que embuquirãcuã nea ja ra.

Mbia chisaã saã ndese ra jẽingochĩ jẽ

¹⁶ Sã emo jendiquisã quisã eã mbei mbaeiaie mo si. Jẽ mbaeiaie u serea mose, jẽu eã ño. Jẽ euse mose, jẽu chõ. Jẽ jẽingose mose mbae mo ndese sábadu mose, jẽingo chõ erese. Jẽ jẽingose mose mbae mo ndese nyasi yasu mose, jẽingo chõ erese. Jẽingo serea mose erese, jẽingoã erese. ¹⁷ Cristo siqui nonde íbii chõ ngue ùquĩ ja nyii re. Mbia Cristo ru raarõ sacua ño ngue ùquĩ nyii re. Cristo tu mose que ùquĩ quiachã ja cote ra. ¹⁸ Mbia jembũrĩ irĩchĩ jembũcha nonde Cristo si jẽ. Ae useteã saã ñooño nguia nae. Ae “Dios chõ ñene” i quia ángeles je nae. “Se quiatu” i chooño ño nguiã eaquiatu rocoĩ. Ndua turã eã ño nguiã Dios rese ùquĩ. Unduasa rese achõ ño eriqui nguiã ucuasu raã naa ùquĩ. Ùquĩ nda jembũchachĩ Cristo si jẽ. ¹⁹ Nimbucha eã ño nguiã Cristo rese ùquĩ. Ererecua raque Cristo. Sã nandẽaquĩ ndiqui nanderete mingo turã

ja no. Eĩ si chõ Cristo uquiato mingo turã ja nguiã nyiese ã. Nyebe Cristo quiato riqui nguiã Cristo icua i ite ã. Dios chõ Cristo icua uquia i nguiã ee.

²⁰ Cristo mano mose que jẽ abe jemanu erese resẽ. Mbia chisaã saã ima si que jẽhui turã ndesẽ. ¿Mbaerã nda ùquĩ ñee ndui si jẽingo si cote re? ²¹ Sã ùquĩ ndiqui ñee no: “Jẽocochĩ nda ã ndese. Á nda jẽuchĩ no. Ùquĩ nda jẽisichĩ jẽo je no”, sã eriqui i no. ¿Mbaerã jẽingo ùquĩ ñee mumbayãte re? ²² Mbia cheẽ achõ ño ùquĩ ndesẽ. Dios cheẽ eã ño ùquĩ ndesẽ. Nandechiurã ño mbae ja resẽ. ²³ Ùquĩ ñee turã arõte raque. Eture arõte raque mbia mbaeiaie uã mose. Mbia mbaeiaie uã mose, eaquiatu arõte raque. Siqui mingue arõte raque. Ùquĩ nda aba chiosei oseicua mbutiã eã. Ùquĩ nda aba mingo eã Dios mĩ ndese.

3

Jendua chã mbae ibatenda rese

¹ Dios que jendaaque mbuquera si Cristo rese resẽ. Nyebe jẽingo mbae ibatenda osei. Mbae ibi jenda osei rocoĩ. Cristo quia chĩ nguiã ngoi ibate ngu jii hue. ² Jendua quiatu quia mbae ibatenda rese. Mbae ibi jenda rese ndua rocoĩ. ³ Jemanu ngue Cristo rese resẽ. Dios que jembucha Cristo rese resẽ. Nyebe Dios riqui nguiã jendeco rerecoquiatu jẽje co. ⁴ Dios chõ nandereco mingo nguiã Cristo rese co. Cristo tube mose ra jendete mbiasu tuchi cote. Jenininya tuchi ra erese cote.

Cose ndare rã eã ño jẽingo nguiã ã cote

⁵ Ae icuã jendeco quia jeñiangui re nae, ùquĩ icuã jẽquiti chõ jenyiesi. Jenyiosei oseicua jẽquiti chõ jenyiesi. Jẽingochĩ nda jeninisiã mo ndese. Jendu eã ndese ra jẽingochĩ no. “Aque rese nda aico rã ña”, jenyechĩ nda emo mĩ jẽ. Mbae icuã mo ndese ra jendua ndua jirichĩ jẽ. Emo mbae ra jenyosei choseichĩ jẽ. Dios abareã

ndese siqui raanguia chõ ùquĩ nde. ⁶ ã icuã ja rĩĩ nda Dios mbia mbasi. Ae echeẽ mumba mumbate quia. ⁷ Jẽ abe que ã icuã jẽsaã saã tuchi quia nyii ra. Cristo icuayã mose. ⁸ ã icuã jẽjea ja chõ jenyesei cote. Jẽ paama i. Jẽicuã icuã nyue. Jeñee nyecua nyecua emo nĩ. Jenyuru icuã. ã jẽjea ja chõ jenyesei. ⁹ Jeñee ñooñoĩĩ nda jendesenda je jẽ. Jẽ mbae osei osei icuã ñiinda que jembuquiachã jenyesei resẽ. Jenyisaã saã ima jẽsaã eãte quia ùquĩ cote resẽ. ¹⁰ Jeñimbiasu ji chõ jẽingo nguiã ùquĩ. Nyebe Cristo riqui nguiã jembaaquiату tuchi Dios rĩĩ ùquĩ. Jẽingo turã sacuã Dios rã si. ¹¹ Cristo quia rei mbia mbuchiabi abiã tuchi. Judíos raque. Judíos eã ndaque. Ishonda mo ndaque. Ae eaquiатуãte raque. Mbia rimba raque. Mbia rimba eã ndaque. Ùquĩ ja Cristo mbuchiabi abiã tuchi. Ùquĩ ja chiangui re Cristo riquise rete. Cristo siqui mose nandechiangui re, ùquĩ nguia rei eturã tuchi mbae ja si.

¹² Co Dios riqui nyesea tuchi jendese co. Dios que jẽirabo mingo icúe umbaerã nda. Nyebe jẽingo nguiã siqui turãte. Jẽya eã ño jẽingo mbia rese. Jẽseteã ño jẽingo mbia rese. Jẽingo tochi chõ nguia. Jendosei nguiату chõ jẽingo. ¹³ Jeñimbiãcuã ño nguia jendesenda rese. Jẽtesarei chõ nguia jendesenda icuã icuã mose jẽje. Sã Cristo tesarei jẽicuã si no. ¹⁴ Jenyesea tuchi quiату quia mbia rese jẽ. Dios cheẽ tuchi chõ ã nde. Jenyesea tuchi mose mbia rese, mbae turã ja rese chõ nda jẽingo tuchi cote. ¹⁵ Jeñimbia bei chõ nguia Dios rese. ĩ nda jemingo turã mbei jenyue. Ùquĩ nĩ ño Dios jemingo nguiã icúe umbaerã. Jesús rete mĩ na ño Dios jemingo nguiã ùquĩ. “Coche ñene” jenyesei bei chõ nguia Dios je. ¹⁶ Sã Cristo cheẽ ndiqui tuchi jeñiangui re. Jẽaquiату tuchi nda jẽingo chã. Jenongue jembaaquiату quiату chõ nguia. Jenongue jembuti mbuti quiату quia Cristo cuti. Jẽirasei rasei

tuchi quiату quia Dios je. Himnos. Salmos. Jẽya chõ jẽingo irasei rasei Dios je. ¹⁷ Jẽ mbae raã mose, Jesús rĩĩ ño jẽsaã. Ae jẽingo ñee nae, Jesús rĩĩ ño jeñee. Gracias jenyesei bei chõ nguia Dios je Jesús rĩĩ.

Ae jẽsaã nguia nae, jẽsaã ño Cristo je

¹⁸ Tacheẽ mbia ninisi je. Jendu cheẽ jemumbayã ño nguia. Diosbi tuchi chõ ùquĩ nde. ¹⁹ Eru, jenyesea tuchi quiату quia jeninisi rese. Jẽingo tochi chõ nguia ee. ²⁰ Mbia ririĩ, jendu cheẽ jemumbayã mbei chõ nguia. Jẽsi cheẽ abe no. Diosbi tuchi chõ ùquĩ nde. ²¹ Jendiiriĩ nda jembupaama ichĩ jenyue jẽ. ĩ nda ñimondocho eã. ²² Tacheẽ erimba je cote. Jenderecua cheẽ jemumbayã mbei quiату quia. Emae eã mose abe quiату echeẽ jemumba eã. Jẽseteã jẽsaã ñooñoa nguiату quia ee. Dios je quiату jẽingo mbae raã turã ja. Ae quia mae mbeite nguiã jendese co. ²³ Jẽ mbae raã mose, jẽsaã turã ño nguia. Mbia je eã ño jẽingo nguiã mbae raã. Dios je chõ jẽingo nguiã eraã. ²⁴ Dios ra mbae turã mee jẽje jenyisaã turã ndibishorõ. Cristo je chõ jẽingo nguiã mbae ao ao ùquĩ. Jenderecua tuchi chõ ae re. ²⁵ Ae mbae icuã saã nguia nae, Dios abe ra mbae icuã mee ee echisaã icuã ndibishorõ. Dios ra emo mbasi chooño eã. Emo nda eisi turã ñooñoa no.

4

¹ Mbia rerecua je tacheẽ cote. Jenimba jembuquei quieĩ chooño eã ño nguia. Mbae jẽsaã turã jiri quiату quia jenimba je. Jẽ abe jenderecua riqui Dios co no.

² Jeñee ñee mbei quiату quia Dios je. Jẽtesa tesa bei quiату quia Dios rese. Gracias jenyesei bei quiату quia ee. ³ Jeñee ñee mbei quiату quia Dios je ure rĩĩ. ĩ nda Dios riqui sembucheẽ ñee mbei tuchi mbia je Cristo rĩĩ. Ae rese mbia riqui jiranuate Cristo rese nae, ùquĩ asenei senei sete mbia je. Nyebe setarõ ji aĩ nguiã a. ⁴—Paba, sã Pablo Jesucristo mbuchecua checua

tuchi quia mbia je, jenyé beí quiatu quia Dios je.

⁵ Jeñimbaaracua chõ nguia siqui turã Jesús quiatoã je. Ae Dios bite nae, ùquĩ ndese chõ jẽingo ñimbecoteã. ⁶ Sã embiquesa riqui mbae mbiise no. Eĩ jenyé sí chõ nguia ñee turã mbia je. † nda jëaquiatute ñee Jesús quiatoã ñee ndibishorõ.

Pablo ñee hui bei

⁷ Tíquico sí quia jendea aque. Ae ra mbae senei ja jẽje jembiirandu serĩ. Ae que mbae saã turã mbeite quia serese ra. Dios rimba turã tuchi chõ ae re. ⁸ Nyebe amondo nguiã jendea aque. Jembiirandu ja sacua serese. Jembia tuchi sacua Cristo rese abe. ⁹ Onésimo abe sí quia erese aque. Hue jenda sí chõ ae re. Jesús quiato tuchi chõ ae abe re. Ùquĩ nyeremo nda jembiirandu tuchi a jenda ja rese.

¹⁰ Aristarco tarõ ji ñi serese a. Ae abe saludos mondo quia jẽje aque. Marcos abe saludos mondo quia jẽje aque. Bernabé nongue riirĩ ño ae re. Ae oso mose jendea, jëisi turã ño secheẽ nguire. Acheẽ ngue jẽje eriĩ nyii. ¹¹ Jesús Justo abe saludos mondo quia jẽje aque no. Ùquĩ miĩ judíos que siqui tuchi quia serese Dios cheẽ nenei nenei nda. Ùquĩ ngue sembiate quia mbae raã turã mose serese ra. ¹² Epafra abe saludos mondo quia jẽje aque no. Cristo rimba rei ae no. Jendesenda sí chõ ae no nde. Ae ñee mbeite quia Dios je jeni co. Jẽingo irãtã sacua Dios rui. Ae Dios bite riqui nae, ùquĩ ndese jẽingo tuchi sacua. ¹³ Epafra riqui nyesequa tuchite jendese co. Aicuate se quia co. Laodicea jenda rese abe eriqui nyesequa tuchite co. Hierápolis jenda rese abe no. ¹⁴ Lucas abe saludos mondo quia jẽje aque no. Aba rasi rea reasa rei ae. Médico rei ae. Jesús chesequa tuchi chõ ae re. Demas abe saludos mondo quia jẽje aque no. ¹⁵ Jesús quiato Laodicea jenda je saludar jenyé rã ure je. Ninfas je abe saludar jenyé. Ae ñumunua nua nguia Ninfas chuchua Jesús quiato nae, ùquĩ

abe je saludar jenyé rã ure je. ¹⁶ Ae ambesa mbesa quia a nae, emondo nonde jẽje a nae, ã je leer jenyé ja rã. Aquere jemondo rã Jesús quiato Laodicea jenda je. Ùquĩ abe leer i sacua ee. Ae carta ambesa Laodicea jenda je nae, jẽ abe leer jenyé ee no. ¹⁷ Jeñee na Arquipo je. —Ae je Jesús ñee nae, “co esaã seje” i ndeje nae, ùquĩ esaã turã ja chõ, jenyé Arquipo je.

¹⁸ Hui bei sacua co ambesa mbesa quia seo ae je co. Pablo chõ se re. Jendua serese setarõ ji rese. Sã Dios riqui turã tuchi jẽje. Amén.

PRIMERA CARTA DEL APOSTOL SAN PABLO A LOS TESALONICENSES

Pablo ã mbesa

¹ Pablo rei se. Silas riqui serese a. Timoteo abe no. A urembesa mondo quia jêje aque, Tesalónica jenda. Ae ñumunua nua mbeite quia Jesús rñ. Jesucristo icuasa chõ jê nde. Dios icuasa abe chõ jê no nde. Dios rei nanderu. Jesucristo rei nandererecua. Sã ãquĩ turã ndiqui bei jêje. Sã ãquĩ ndiqui jembia bei.

Jesús jêicuate quia ãquĩ

² Gracias, ure bei quia Dios je jeniã. Jê ja rñ. Ure ñee mose Dios je, jeniã ño ureico nguiã ñee ñee ee ã. ³ Jesús jêicuate quia ãquĩ. Nyebe jêingo beite nguiã mbae turã ndese ãquĩ. Jenyese-cuate quia Jesús rese ãquĩ. Nyebe jêingo nguiã Dios cheẽ nenei nenei mbei mbia je ãquĩ. Jesús nyebi si mose, ãquĩ ño jësaarõ arõ u nguiã hue. Jeñimbirãcuã tuchi equia eraarõ arõ ãquĩ. ⁴ Seresenda, Dios riqui nyese-cua tuchi jendese co. Dios que jêirabo umbaerã nda. ⁵ Dios cheẽ turã ngue uresenei senei nguia jêje ra. Urecheẽ achõ je eã. Espiritu Turã abe que jembaaquiatu quiatu ra. —Ichõñõ eã tuchi chõ Dios cheẽ nde, ure que equia erenei nenei jêje ra. Ureico mose jendese que ureico turãte jêje ra. ãquĩ ndese que jêingo mae nda. ⁶ Ure rã si que jêingo Dios rui ra. Nandererecua rã si que jêingo ra. Dios cheẽ ngue jêisi tuchi ra. Nyebe que mbia icuã tuchi riqui jêje ra. Mbiambia icuã mose jêje que Espiritu Turã ndiqui tuchi jendese ra. Jembia tuchi sacua. ⁷ Nyebe Jesús icuasa riqui nguiã siqui turã jendui. Jesús icuasa Macedonia jenda. Acaya jenda abe no. ⁸ Nandererecua cheẽ ngue jêsenei senei tuchi quia Macedonia jenda je ra. Acaya jenda je abe no. Ishonda ja je. Mbiambia que jirandu ja quia jendese

ra. —Dios icuasa rei ãquĩ, i equia jeniã ãquĩ. ¿Mbaerã nda Dios cheẽ asenei ee re? Jembiiirandu turã ngue eno. ⁹ ãquĩ nguia ñee turãte nguiã jeniã ãquĩ. —Tesalónica jenda que Pablo isi turã nda. Pablo resenda abe isi turã. Hui tuchi que Dios raanguia si ra. Siqui bei nonde Dios reco rese cote, i equia jeniã ãquĩ. ¹⁰ —Tesalónica jenda chi Jesús raarõ arõ huee. “Tu ra nyebi ibate si”, i u huee, i equia jeniã ãquĩ. Jesús rei Dios reco riirĩ. Dios que Jesús raaque mbuquera si ra. Jesús ra nanderiquisã mbae rasi si. Dios mbiambia icuã mbasi mose.

2

Dios cheẽ uresenei tuchi jêje

¹ Ureso chooño eã ngue equia jendea ra, Seresenda. Dios cheẽ ngue uresenei tuchi quia jêje ra. Jêisi turã turãte que equia ra. Ureso mose jendea. ² Ureso que Filipos nyii ra. Hue jenda que mbiambia icuãte riqui ure je ra. Ureirua nua ngue ra. ãquĩ jêicuate quia ãquĩ. Aquere que Dios cheẽ turã uresenei senei tuchi jêje cote ra. Ureso mose jendea. Dios que urembusiquiche eã tuchi ra. Mbiambia icuã tuchi raque ure je. ³ Dios cheẽ ngue urechabi chabiã tuchi quia erenei nenei nda. Urendua icuã icuã eã ngue equia ñee mose jêje ra. Jembiiirĩ irĩ eã. ⁴ —Mañi nda equia reae, i que Dios quia ure je nyii ra. Maende ure rese que ureirabo cote ra. Echeẽ turã nenei nenei sacua. Mbiambia sacua eã ño ureico nguiã Dios cheẽ nenei nenei jêje. Dios mbiambia sacua ño ñene. Dios riqui mae mbeite urechiangui renda rese co. ⁵ Urecuasua que uresaã saã eãte quia jêje ra. Urecheẽ ñooño eãte que equia jêje ra. Jembiiirĩ irĩ eãt e que ureico quia ra. —Sã mbiambia mbae mo mee mee ure je, ure eãte que equia jembiiirĩ irĩ nda. Dios riqui maete urerese co. ⁶ —jenderecuarã nda ure cote jê! ure eãte que equia jêje ra. Ure eãte que equia mbiambia mo abe je ra. Cristo chimondo raque ure, echeẽ nenei nenei sacua jêje. ⁷ Ureico

turã ngue equia jêje ra. Sã esi mo ndiqui nguiirĩ nderequia turã, eĩ ure chõ ngue equia jêje ra. ⁸ Urechesequa tuchi que equia jendese ra. Nyebe Dios cheẽ achõ eã uremee nguiã jêje. Mbae ja uremeese rete raque jêje.

⁹ Urechisaã saã ndese que jêingo mae tuchi ra, Seresenda. Ureico mose jendese. Mbae que uresaã saã mbeite quia ra. Ure ae chõ urechiurã ureisi isi nguiã. Nyaashĩ mose achõ eã ngue ureico mbae raa naa nda. Itondaru mose ab e que ra. † nda je mbae jemondoã ure je. Ure Dios cheẽ nenei nenei mose jêje. ¹⁰ Jesús icuasa chõ jê cote re. Urecuata turãte que equia jêje ra. Jemaengue equia urerese ra. Dios abe que mae nguia urerese ra. Ureico mose jendese. Ureico turãte que equia ra. Nyebe emo ñee icuã aroneate urerĩ. ¹¹ Jendu rã ngue ureico jêje resẽ. Sã emo ndiqui nguiirĩ mundua turã no. Sã emo ndiqui nguiirĩ mbucuata turã no. Eĩ si chõ ure re. Jemundua ndua. Jembucuata turã nonde. ¹² Urecheẽ tuchi que equia jêje. —Dios quiato chõ jê cote re. Nyebe jêingo nguiã Dios mbia beite cote. Dios que jêirabo ra. Dios ra jenderequa tuchi cote. Dios ra uturã mee jêje, ure beite que equia jêje ra.

¹³ Gracias, ure bei equia Dios je jeni a. Dios cheẽ nguiatu ngue jêisi turãte nguiã. Ure Dios cheẽ nenei nenei mose jêje, jêisi turã ngue ra. Mbia cheẽ na eã ngue Dios cheẽ jêje ra. Dios cheẽ ngue jembuturã nda. Jê eisi mose. Gracias ure que Dios je, jê echeẽ isi mose ra. ¹⁴ Sã judíos icuã icuã Jesús quiato Judea jenda je no. Eĩ si chõchĩ mbia icuã icuã jêje no, Seresenda. Jê ji jenda chõ eicuã icuã ndiqui nguiã jêje Jesús rĩ ãquĩ. ¹⁵ Judíos sí que Jesús icuã nandererequa ra. Sã Dios cheẽ mbuchecua icuã nyii no, eĩ sí que Jesús icuã no nda. Ure abe mombo no. Judíos icuã tuchi que ãquĩ nda. ã eicuãte riqui Dios je ã. Mbia abe je eicuãte riqui ã no. Mbia ja je. ¹⁶ —¿Mbaerã nda jêso Dios cheẽ nenei nenei Judíos eã je

re? i que equia ure je ra. Ureriquisã quisã ndei que equia ra. Dios cheẽ ngue uresenei mbei bei chõ judíos eã je ra. Dios erirõ sacua eicuã si. Judíos que urecheẽ siquisã quisã ño nguia ra. Judíos que huicua saã i i tuchi quia ra. Nyebe que Dios paama i tuchi ee cote ra. Dios ra embasi tuchi cote.

Sesose rete jendea

¹⁷ Seresenda, ishote urecu jêsi a. Nyebe ureya eãte riqui nguiã jendese ã. Uremaese rete quia jendese ã. Urendua beite quia jendese ã. ¹⁸ Uresose rete rei que equia jendea ra. —Taso erea, ae beite rei que se quia ra. Pablo rei se. Satanás que ureriquisã quisã ño nguia ra. ¹⁹⁻²⁰ Jesucristo ra tu si nyebi nanderea. Seya tuchi aico eraarõ arõ a. Jê nguia uremombia mbia beite nguiã ãquĩ. Jêchĩ Jesús quiato. Nyebe ra ureya jendese Jesús tube mose. Ure Jesús cheẽ nenei nenei mose que jêisi turã nda. Nyebe ra Jesús ia tuchi urerese eru mose.

3

¹ —Tairandu tuchi rã erese, ure tuchi que equia jeni nda. Urendua ndua tuchi que equia jendese ra. Nyebe ure ae ureico nguiã Atenas. ² Nyebe que Timoteo amondo rei nguiã jendea. Jirandu sacua jendese. Dios rimba tuchi que ae ra. Nanderesenda tuchi que ra. Cristo cheẽ turã nenei neneisa que ae ra. Ae que uremondo jendea jemundua ndua sacua Jesús rese ra. ³ Timoteo que amondo jendea ra. † nda jêhui eã Dios cheẽ si mbia icuã mose jêje. Mbia icuã tuchi que eriqui jêje ra. Nande je ja que eicuãte riqui ra. Jesús icuasate quia nande re. Nyebe mbia icuãte riqui nguiã nande je. ⁴ Ureico que equia jendese nyii, aque mose que ureico rei ñee jêje resẽ. —Mbia icuã tuchi ra eriqui nande je, ure rei que equia jêje nyii resẽ. ¡Sã ngasẽ cote jê! ¡Sã mbia icuã icuã nande je cote jê! ⁵ Nyebe seiranduse beite riqui nguiã jendese. Nyebe Timoteo amondo rei nguiã jendea. Ureirandu sacua. — ¡Quiatu Jesús quiato rea jê! Siqui bei

rei equia Jesús rui reae. Aba mbiirĩ irĩsa embiicuã eã ndei reae. Dios cheẽ nandesenei ñooño eã ndei ee reae, ae que Timoteo mondo jendea ra.

⁶ Ae que Timoteo tu jẽsi cote ra. Ñee turãte que u jeni nda. —Hue que echi Dios icua tuchi ra. Hue que echi nyesequa tuchi Dios rese ra. Nande abe rese que echi nduate huee ra. Eyayãte eriqui rei nanderese, i que Timoteo u urembiirandu jeni nda. Ure abe ureyayãte riqui jendese ã. ⁷ —Hue que echi Dios icua tuchi ra, i mose que ureya tuchi ra. Mbia icuãte raque ure je. Seresenda, jẽ urembiate quia ũquĩ. ⁸ Ureya tuchite jendese, jẽingo bei mose nandererequa rese. ⁹ Dios urembia tuchite quia jendese co. Nyebe ureico nguiã gracias i ee co. ¹⁰ Dios je que ureico ñee mbei ra. Nyaashĩ mosechõ eã. Itondaru abe. —Paba, urererao rã mbia rea, ure bei que equia Dios je jeni nda. † nda jembaaquiatu ji jẽingo tuchi Dios rese.

¹¹ Dios rei nanderu. Jesucristo rei nandererequa. Ũquĩ je ureico ñee tuchi ã. Urererao sacua jendea. ¹² Sã nandererequa jembuchesequa tuchi jenyiese. Mbia ja rese. Sã ureico nyesequa tuchi jendese no. Eĩ jenyese si chõ nguia nyesequa mbia rese jẽ abe no. ¹³ † nda Cristo uquirãcuã mee jẽje. † nda Cristo jemingo icúe umbaerã tuchi. † nda jemingo turã mbei Dios rese. Jesucristo tu mose chee ibate si. Mbia ra ñee icuã aroneate jeni cote. Ñee icuã aroneate ra Dios je jeni. Jesucristo tu mose ra Dios mae jẽturã ndese. Jesucristo ra tube uquiato ja rese.

4

Jẽingo turã, i Dios mbia je

¹ Seresenda, tacheẽ tuchi jẽje. Jesús cheẽ ngue uresenei senei tuchi quia jẽje ra. Ũquĩ ndui chõ jẽingo turã ndei nguiã ũquĩ. Jẽingo i i tuchi quiatu erui jẽ. † nda Dios ia tuchi jendese. Secheẽ ae eã ño ã nde. Jesucristo cheẽ ño ñene. ² Nandererequa tuchi chõ Jesús re. Ae chõ urembucheẽ

nguiã jẽje. Ae cheẽ si jẽingo tesarei ãte ũquĩ. ³ Dios jemingo sete quia icúe umbaerã co. ¡Emo ninisi rese ra jẽingochĩ jẽ! ¡Eru eã mo ndese abe ra jẽingochĩ jẽ! ⁴ ¡Jeninisi ae rese chõ jẽingo! Jeninisi jendeco turã ño nguia. ⁵ Dios icuasa reã ño mbia ninisi oseĩ oseĩ nguiã ũquĩ. ¡Eĩ jenyechĩ nda jẽ jẽ! ⁶ ¡Jenongue ra jembĩirĩ irĩchĩ eninisi rese jẽ! Ũquĩ naa naa mose ra Dios jembasi tuchi. Nyebe urecheẽ nguiã jẽje nyii. ⁷ —Jẽingo turã icúe sembaerã, i que Dios nande je ra jẽ. —Jẽingo icuã icuã, iã equia nande je co. ⁸ ¡Urecheẽ jẽisi turã ño nguia jẽ! Jẽ urecheẽ isiã mose, eĩ jenyese chõ nguiã Dios ucuayã. Urecheẽ achõ eã ño uresenei senei nguiã jẽje. Dios cheẽ ño ñene. Dios sí que Espiritu Turã mondo nande je ra.

⁹ —Jenyesequa jenyiese, aeã nda jẽje cote. ¿Mbaerã nda acheẽ jẽje re? Dios que ñee jẽje no. Nyebe jẽingo nguiã nyesequa jenongue rese ũquĩ cote. ¹⁰ Macedonia jenda rese jẽingo nyesequa ũquĩ. Jesús quiato rese. Jenyesequa i i tuchi jiri erese jẽ. ¹¹ ¡Jẽingo turã ño nguia jẽ! ¡Jẽñimbecoteã ño nguia jembae rese jẽ! ¡Jẽquieĩ quieĩ bei equia jẽ! Ũquĩ ngue urecheẽ jẽje nyii resẽ. ¹² Ũquĩ naa mose ra Jesús icuasa reã ñee turã turã jẽje. Ũquĩ naa mose ra mbae tiã eã jẽje no.

Jesús ra tu nyebi íbii

¹³ Mbia raaque rese taembiirandu rã. † nda jẽyayã eã mbia raaque rese. Jesús icuasa reã ngue eyayã tuchite riqui mbia raaque rese ra. —Quera si na nye. Nandemae si na erese re, i eã ño Jesús icuasa reã nguiã mbia raaque je ũquĩ. ¹⁴ Jesús que mano ndei nguiã nyii. Quera si que ra. Nyebe ra Jesús icuasa raaque abe quera si. Sañi Jesús quera si no. Eĩ si ra Jesús icuasa raaque quera si no. Dios ra embuquera si. Jesús rese ra ecuaẽ. Ũquĩ nandeicuante quia ã. ¹⁵ Nandererequa Jesús cheẽ uresenei senei nguia jẽje ã. Jesús ra tube íbii.

Aque mose ra mano je rane nyoĩ erea. Ae nandereco nandeico ã nae, ũquĩ abe ra nyoĩ erui cote. ¹⁶ Cristo ra tu nguichi ibei si. Ererecua rã nda eru ñee mbia je. Angel nderecua ibatenda ra ñeemombo. Corneta abe ra pu i Dios mbae. Cristo nguichi mose íbii. Aque mose tuchi ra Cristo icuasa mano je quera si. Ũquĩ nane nda quera si. ¹⁷ Aquere ra nandereco rerao ũquĩ ndese cote. Ibeishĩ ni nda nandererao ja. Huee ra nandemae tuchi Cristo rese cote. Nandeico bei ra erese cote. ¹⁸ ã ndei Dios cheẽ ã. Jeñimundua ndua bei quia erese. † nda jëya tuchi erese.

5

Jëquiche je na Jesús ru chã

¹ —Aque mose ra Jesús ru, ae eã nda jëje, Seresenda. ² Isa chõ mbae mbuquiachãsa riqui nguiã tu. Mbia ndua eã mose ra eru. Eĩ si ra Jesús u, mbia ndua eã mose erese. ³ —Ureico turãt e quia ã ndesẽ, i ra mbia. Ajee tuchi ra Jesús ru aque mose. Mbia mbutiã nonde cote. Sã nanĩmbae rasi riqui tu ajee no nae, eĩ si tuchi ra Jesús u ajee. Emo nda oso chee eã. ⁴ Jë nguiã jëingo ãte nguiã itondaru ũquĩ, Seresenda. Jëaquiatuã eã ño jë nde. Jë nguiã ra Jesús jembua eã u. Mbae mbuquiachãsa rã eã nda eru jëje. ⁵ Nyaashĩ na ño jëingo nguiã jë ja ũquĩ. Itondaru rã eã ño nandeico nguiã nande ã. ⁶ Nyebe nandechumumba rã mbei chõ nandeico nguiã tesa. Mbia ataque quiarei uque bei. ⁷ Ae uque quia, ũquĩ ño uque nguiã itondaru. Ae quiacua quiacua quia, ũquĩ ño quiacua nguiã itondaru. ⁸ Nyaashĩ jenda chõ nande re. Nyebe nandechimbaaraqua bei quiatu quia nande. Dios nandeicua tuchi quia nande. Nandechesecua tuchi quia erese nande. Dios ra nanderirõ tuchi mbae icuã ja si. Ũquĩ nandeicuate quia ã. Nyebe ra mbae icuã ocoã nanderese. ⁹ Nandembasi sacua eã ngue Dios nandeirabo ra. Nanderirõ sacua eicuã si chõ ngue nandeirabo

nguia. Jesucristo rĩĩ nda nanderirõ eicuã si. Jesucristo rei nandererecua. ¹⁰ Ae que mano nande je ra. Nandeico sacua erese. Tu ra nandererao siqui sacua erese. Nandereco siqui mose ra nandererao. Nanderaaque chi mose ra nandererao no. Eĩ ja chõ ñene. ¹¹ ã ndei Dios cheẽ ã. Jë ño jeñimundua ndua nguiã erese ũquĩ. ¡Ũquĩ jësaã saã mbei quia jë!

Pablo embaaquiatu

¹² Jesús icuasa rerecua cheẽ nda jemumbachĩ, Seresenda. Jenderecuarã ño Dios emingo nguiã. Jembaaquiatu quiatuchĩ equia ũquĩ. ¹³ Nyebe jëingo turã ño nguia ee. Jenyesequa tuchi quia erese. Jembaaquiatu quiatu sacua ño ũquĩ nde. ¡Jëingo turã ño nguia jenyue! ¹⁴ Emo tomei mo siqui mose jendese, jemingo mbae mo ndese. Ae hui serĩ serĩte quia Dios cheẽ si nae, ũquĩ jemingobe erese. Ae equirãcuã neate, ũquĩ jembirãcuã. Jëingo mingue chõ nguia mbia ja je. ¹⁵ Mbia icuã mose jëje ¡jëicuã eã ño ee jë! ¡Jëingo turã ño jenyue jë! ¡Jëingo turã ño mbia ja je no jë! ¹⁶ Jëya bei jëingo. ¹⁷ ¡Jeñee ñee mbei quia Dios je jë! ¹⁸ Gracias, jenyue quia Dios je mbae ja rĩĩ. Ebi tuchi quiarei ũquĩ. Jesucristo icuasa chõ jë nde. ¹⁹ Espiritu Turã nda jësisquisãchĩ jë. ²⁰ Dios cheẽ mbuchecuasa cheẽ jeñandu turã ño nguia jë. ²¹ —Ma ñee ñooñoa, jenyue tuchi quiatu eicua jë. Ñee ñooño eã mose, erui jëingo. ²² ¡Mbae icuã ja rese ra jëingochĩ jë!

²³ Aba mombiasa chõ Dios riqui nguiã co. Sã ae si jemingo icúe umbaerã tuchi. Sã ae jemingo turã mbei. Jesucristo tu chee mose ibate si. Mbia ra ñee icuã aroneate jeni cote. ²⁴ Ũquĩ nda Dios saã ja jëje. Ae quiarei ichõñosa reã tuchi.

Pablo ñee hui bei

²⁵ Jeñee mbei quia Dios je urerĩĩ, Seresenda. ²⁶ Mbia nanderesenda jëquiaam a ama ja ure je hue jenda. ²⁷ ã sechimbasa jësenei ja rã nandengue hue jenda je. —Jësenei na, i

Cristo quia jêje co. ²⁸ Jesucristo rei
nandererecua. Sã ae riqi siqui turã
mbei jendese. Amén.

SEGUNDA CARTA DEL APOSTOL SAN PABLO A LOS TESALONICENSES

Pablo chimbesa

¹ Pablo rei se. Silas riqui serese a. Timoteo abe no. Ureico ã mbesa jêje a, Tesalónica jenda. Jê nguia jeñumunua mbeite nguiã Jesús je ùquĩ. Jesucristo icuasa chõ jêingo nguiã ùquĩ. Dios rei nanderu. Jesucristo rei nandererecua. ² Sã ùquĩ turã ndiqui jêje. Sã ùquĩ ndiqui jemombia bei.

Dios ra mbia icuã mbasi

³ Gracias, ure beite quia Dios je jeniã. Coche ureico nguiã ñee Dios je jeniã. Jê nguia jêingo nguiã Dios icua tuchite ùquĩ. Jê nguia jêingo nguiã nyesequa tuchite jenyiese ùquĩ.

⁴ Nyebe ureico nguiã ñee turãt e jeniã. Ae ñumunua nua nguia Dios je, ùquĩ ja urembirandu turã nguia jendese ã. Jêingo mingute quia mbia icuã je ùquĩ. Jêingo Dios icua tuchite ùquĩ. Mbã icuãte riqui raque jêje. Mbã icuã mose jêje, jê jêturãte riqui ee ùquĩ.

⁵ Sã Dios turã tuchi riqui no jê. Sã mbã mbuchecha turã no. Ae ra ñimbirãcuãte quia mbã icuã icuã mose Jesús rĩ ee nae, ùquĩ je ra mbã turã mondo. Mbã ra emondo mbã chisã turã ndibishorõ. Mbã chisã icuã abe ribishorõ no. ⁶ Ae jembasi mbasi quia nae, Dios ra ùquĩ mbasi tuchi cote. ⁷ Jesucristo ra tu ibate si. I ra eu quia nyecua. Angel cuabê ndese ra eru. Jesús ra ángel quirãcuã tuchi queru. Tata rendi rã nda Jesús ru. Eru mose ra mbã icuã icuã eã nande je cote. ⁸ Jesús tu mose ra Dios icuasa reã mbasi mbasi cote. Echeẽ turã mumba mumbasa ra embasi Dios cheẽ turã Jesucristo rĩ. ⁹ Jesús ra ucheẽ mumba mumbasa mbasi tuchi. Jesús ra emombo isho. Echeẽ mumba mumbasa ra siquã mbei Dios rese cote. Dios quirãcuã ndese abe ra eriquã no. ¹⁰ Ùquĩ nda Jesús saã ucheẽ mumba mumbasa je

tu mose. Echiirabo quia ra ñee turã turã mbei erĩ eru mose. Eicuasa ra ñee turã turã mbei erĩ eru mose. Jê abe ra jêingo erese. Ure Dios cheẽ nenei mose, jêisi que ra. Nyebe ra jê abe jêingo erese eru mose. ¹¹ Nyebe ureico nguiã ñee ñee mbei Dios je jeniã. Ae Dios bite nae, ñnda ùquĩ jêsaã saã mbei quia. Ùquĩ je que Dios “jenyu” i jêje ra. Mbã turã jêsaã saãse rete quia ùquĩ. Sã Dios uquirãcuã mee jêje. Mbã turã naa naa nonde cote. Jesús icuasa chõ jengu nguiã huee. ¹² Jê mbã turã naa naa mose, mbã ra ñee turã turã Jesucristo rĩ. Jê abe rĩ nda Jesucristo mbã mbucheẽ turã turã. Dios quia eturãte riqui nguiã nande je. Jesucristo abe eturãte nande je. Ae rei nandererecua.

2

Dios ucuãyãsa

¹ Jesucristo rei nandererecua. Ae ra tu nandemunua mbucha uchiese. Ùquĩ ño asenei senei nguiã jêje. ² —“Co Jesús ru quia co”, i que Pablo ra, ichõño nda mbã serĩ jêje. Jeñanduchõ ño ùquĩ mose. —Co Jesús ru quia co, ae eã se quia embesa jêje a. Mbã mo nda ñee ñooño jêje. —Jesús ra tu cote. Dios que sembirandu ra, ichõño nda jêje. Ùquĩ jeñanduchõ ño. ³ ¡Mbã ra ñee ñooño chí jembĩrĩ irĩ jê! Jesús rane nda tuã nguiã. Mbã rane nda hui hui Dios si. Dios ucuãyãsa rane nda tu Jesús si. —Emo mose aque tambutiã, i que Dios aque rĩ nda. ⁴ Aque ra Dios resenda ucuãyã tuchi. Dios abe ucuãyã tuchi rae. Dios chuchúaa ra eñi ngoi mbã mbĩrĩ irĩ. —Se rei Dios, ichõño nda hui mbã mbĩrĩ irĩ. ⁵ Seico mose jendese que asenei ja jêje ra. ¿Jêtesareĩã ndei equia secheẽ si re? ⁶ Dios ucuãyãsa ra tu emo mose. Eriquisã ji ae riqui nguiã aque. Eriquisã iriã mose ra eru. Eriquisãsa jêicua quia ùquĩ. ⁷ Mbã Dios cheẽ mumba tuchi quia ã cote. Dios ucuãyãsa ra tuchõ eã. Eriquisãsa iriã mose quia ra eru cote. ⁸ Nyecua tuchi ra u mbã je

cote. Jesús ra tu eriicharã cote. Jesús nininya tuchi ra tu. Aque mose ra Dios ucuâyãsa iguia. ⁹ Satanás nda uquirãcuã mondo Dios ucuâyãsa je. Dios ucuâyãsa mbuquirãcuã sacua. Mbae icua chumumbara tuchi ra equeru. Ñee ñooño nda u mbia je. Mbia mae sayã nda esaã saã u mbia mbirĩ irĩ sacua. ¹⁰ Dios ucuâyãsa icua tuchi ra Jesús quiatoã je. Jesús quiatoã mbirĩ irĩ tuchi ra u. Jesús quiatoã nyesequa eã nguia Dios rese resẽ. Nyebe ra Dios ũquĩ ndiroã eicua si. Dios ra uquiatoã mbutiã tuchi. ¹¹ Dios rese eriqui nyesequa eãte ã. Nyebe Dios aba mbirĩ irĩsa mondo nguia ee. Nyebe eriqui nguia “ae beite”, i aba mbirĩ irĩsa je. ¹² Nyebe ra Dios ñee tuchi Jesús icuasa reã je. Ae mbae icua saã sete quia, ũquĩ je. —Jẽso tata cuásuu, i ra Dios ee.

Dios chiirabo rei jẽ

¹³ Seresenda, Jesubite jẽingo ũquĩ. Gracias, ure bei quia Dios je jeni a. Dios que jẽirabo cose nyii ra. Jendirõ sacua jẽicua si. Espiritu Turã jemingo sacua icue. Jẽ ichõiñosa reã jẽicua sacua. ũquĩ je chõ ngue Dios jẽirabo nguia. ¹⁴ Jesús cheẽ ngue uresenei senei nguia jẽje huee ra. Aque mose que Dios “jenyu” i jẽje ra. Jembuquirãcuã sacua Jesucristo quirãcuã je. ¹⁵ Seresenda, ¡jẽhui jẽhuichĩ nda esi jẽ! ¡Urecheẽ ndui jẽingo bei jẽ! ¡Urechimbasa abe rui jẽingo jẽ! ¹⁶ Dios rei nanderu. Ae quia rei eturã tuchi nande je. Ae quia rei nyesequa tuchi nanderese. Ae quia rei nandemombia mbiasa. Nandeya tuchi nandeico Jesús raarõ arõ ã. Tube ra nyebi uquiato rea. ¹⁷ Sa Jesucristo riqui jemombia mbia bei. Dios abe no. Sã ũquĩ ndiqui tuchi jendese. Jẽhui eã sacua echeẽ si. I nda jẽnee turã mbei quia querabe. I nda jẽingo bei mbae turã ndese querabe.

3

Jeñee Dios je

¹ Seresenda, jeñee mbei quia Dios je ure riĩ. I nda isho ishonda Dios cheẽ andu ja. I nda eandu chooño eã. I nda eisi turã jẽ na si. ² I nda Dios mbia icua ndiquisã ure si. Mbia mĩ mĩ ño Dios icua nguia ã. Mbia ja eã. ³ Nandererequa ñee ñooño eã nguia co. Uquirãcuã nda emee jẽje ucheẽ nguire. Mbae icua nda esiquisã jẽsi. ⁴ Urecheẽ ndui si chõ jẽingo nguia ũquĩ. Ae uresenei senei nguia jẽje, ũquĩ ndese ra Dios jemingo tuchi. ũquĩ ño aicua nguia ã. ⁵ ¡Sã nandererequa siqui tuchi jendese jẽ! Jẽirandu sacua Dios nyesequa rese nanderese. Jẽ abe jẽingo mingue sacua Jesucristo rã si.

¡Jõtomeite ra jẽingochĩ jẽ!

⁶ Jesucristo cheẽ tuchi chõ ã nde, Seresenda. Jesús quiato mo tomei mose, jẽhui chõ esi. Jesús quiato siqui sereã mose mbae mo ndese, jẽhui chõ esi no. Jesús cheẽ tuchi chõ ã nde. ⁷ Ure rã si chõ jẽingo. Uretomei ngue uresaã saã eãte quia jẽje ra. ⁸ Jẽ mo ngue urembuquiaru chooño eãte quia resẽ. Mbae mo ño ngue uremondo mondo quia urechiurã ndibishorõ ndesẽ. Urequei quiei beite que equia resẽ. Itondaru mose abe. Jẽ mbae mondochõ eã sacua ure je. ⁹ —Mbae mo embu se, ureã mbei que equia jẽje resẽ. Eturãte raque ũquĩ. Urequei quiei chõ ngue equia urembaerã ndesẽ. Jembaaquiato sacua. Ure rã si jẽingo sacua quiei quiei. ¹⁰ Ureico mose jendese que jaembiirandu rei resẽ. Ae quiei quiei sereãte quia, ũquĩ nda quiaruã. ¹¹ Ureirandu que jendese ra. Jẽataque nda quiei quiei eã tuchi quia ra. Siqui chooñose tuchi nda equia ra. Uchuru mondo chooño ñee emo je. ¹² Sã ũquĩ ae riqui quiei quiei uchiurã ao sacua. Jesucristo cheẽ tuchi chõ ã nde. Nandererequa tuchi chõ a e re. ¹³ Seresenda, ¡mbae turã ndese chõ jẽingo bei jẽ! ¡Jẽhuichĩ nda esi jẽ!

¹⁴ A urecu urecheẽ mbasa mbasa emondo sacua jẽje a. Jẽ mo urecheẽ

mumba mumba mose, ũquĩ ndese jemaetuchi. Jẽhũ chõ ũquĩ si. ¶ nda ireĩ ireĩ jiri urecheẽ mumbare. ¹⁵ ¡Ũquĩ nda jẽucuãyã cuãyãchĩ jẽ! ¡Jeñee turã ño equia ee jẽ! ¡Jembaaquiatu quiatu turã ño jẽ! Jendesenda chõ ñene. Urecheẽ mumba mumbate raque.

Hui bei

¹⁶ Cristo rei aba mombiasa. ¡Sã aeriqui jemombia bei jẽ! Jẽingo mose jenyuchúaa. Jengatásaa abe no. ¡Sã eriqui bei jendese jẽ! ¹⁷ Pablo rei se. Se ae chõ ã ambesa nguiã hui bei a. Sechimbesa ae chõ ã nde. Sechimbesa jẽicuate quia ũquĩ ndesẽ. Sembae letras. Se bei que ambesa quia hui bei ra. ¹⁸ Sã Jesucristo turã ndiqui bei jẽ ja je.

PRIMERA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablo rei se. Jesucristo chimbaaquiatu, Jesucristo chimondo. Dios abe chimondo. Dios ae nanderirõ nguiã nandeicua si. Jesucristo chõ nandesaarõ arõ nguiã ã. ² Aico ã mbesa ndeje a, Timoteo. Secheẽ nguire chõ ereico nguiã Jesús icua aque. Nyebe aico nguiã seriirĩ i ndeje co. Dios rei nanderu. Jesucristo rei nandererecua. Sã ãquĩ turã mbei riqui ndeje. Sã ãquĩ ia eã mbei riqui nderese. Sã ãquĩ nembia tuchi.

Emo ndiqui mbia mbaaquiatu icua icua ã, i Pablo

³ Sã acheẽ ndeje seso mose Macedonia no. “Efeso eico” ae que ndeje, huee bei chõ eico. Ae ñee ñooño nguia mbia mbaaquiatu icua icua hue nae, ãquĩ ñee embutiba. ⁴ ãquĩ siqui bei quia mbia cheẽ ima nenei nenei mbia je ãquĩ. ãquĩ siqui bei quia amei cose ndare nenei nenei mbia je ãquĩ no. ãquĩ ñee embutiba. ãquĩ ñee icua icuate quia ãquĩ. ãquĩ ñee ño mbia mbiã icua nguiã nyue. ãquĩ ñee nda aba mbaaquiatuã Dios rii. ãquĩ mose Dios icua aroneate. ⁵ Sã hue jenda turã mbei riqui Dios je jẽ. Sã hue jenda riqui ndua turã mbei jẽ. Sã hue jenda riqui Dios icua tuchi jẽ. Nyesequa tuchi nda nyiese cote chã. ⁶ Mbiam hue jenda mo ndiqui tesarei Dios cheẽ si ãquĩ. Dios cheẽ abi abi. Ñee ñooño mbei equia nyue ãquĩ. ⁷ Moisés cheẽ ndese mbia tambaaquiatu, i raque equia ãquĩ. Moisés cheẽ icua rocoĩ. Eaquiatu rocoĩ. Echeeño ño ñene.

⁸ Dios que Moisés mbucheẽ turã mbia je ra. Mbiam icua je que embucheẽ nda. Mbiam mundua sacua huicua ndese. ⁹ Mbiam turã je eã ngue Dios Moisés mbucheẽ nguiã. Mbiam turã je eã ngue Dios ley mii nguiã.

Dios cheẽ mumbasa je chõ ngue emii nguiã. Mbiam icua je. Dios quiatoã je. Mbiam teã teã je. Usi ucuãyãsa je. Ngu abe ucuãyãsa je. Mbiam iquiasa je. ¹⁰ Ucheẽ mumbasa je chõ ngue Dios ley mii nguiã. Ae siqui quia emo ninisi rese, ãquĩ je. Ae eninisirã saã saã nguia nguesenda mo je, ãquĩ je. Mbiam rirõsa je abe no. Ñeeñoõsa je abe no. Ae eicua icuate riqui Dios cheẽ turã je, ãquĩ je abe no. ãquĩ ja je chõ ngue Dios ley mii nguiã. ¹¹ Dios que ñee ucheẽ turã ñi seje ra. —Secheẽ esenei senei mbiam je, i que Dios seje ra.

Dios que uturã teacuquia seje ra, i Pablo

¹² “Coche ñene” ae se quia Jesucristo je co. Ae que seirabo ra. Ae que sembuquirãcua nda. Ae que semondo ucheẽ nenei nenei sacua mbiam je ra. ¹³ Seicua tuchi raque ee nyii. Acheẽ icua icua ndei que se quia ee nyii ra. Equiato je abe que seicua icua ndiqui nyii ra. Se Jesús icuayã mose. Seaquiatuã mose. Nyebe Dios ia eãte riqui nguiã serese. Nyebe Dios seicua mbutiã nguiã sesi cote. ¹⁴ Uturã ngue eteacuquia seje ra. Nguiirĩ ngue embuchecua seje ra. Nyebe aico nguiã Jesucristo icua co cote. Nyebe aico nguiã nyesequa Jesucristo rese co cote. ¹⁵ Jesucristo que tu ibii ra. Mbiam icua mbitirõ sacua. Emingo bei nonde. Ichõiñoa tuchi chõ ã nde. Sã mbiam “ae beite” i ja ã je. Seicuate raque se quiatu mbiam ja si. ¹⁶ Dios ia eãte que eriqui serese ra. Eroseĩ nguiatu tuchi que eriqui seje ra. Nyebe mbiam riqui nguiã jirandu ja Dios roseĩ nguiatu rese. Sã Dios semingo bei se abe, i chee ra emo abe ñee ñee. Dios roseĩ nguiatu rese jirandu mose. ¹⁷ Sã mbiam riqui ñee turã mbei Dios je. Ae mii ño mbiam rerecua tuchi re. Ae mii ño siqui bei tuchi nguiã co. Ae mii ño ererecua nandemae sayã nde. Ae mii ño mbiam icua tuchi nguiã. Amén. ¹⁸ Timoteo, seriirĩ na tuchi chõ nde re. Dios cheẽ mbuchecua que sembiirandu nderese nyii ra. Nyebe aico nguiã

ñee tuchi ndeje ũquĩ ñee na si. Mbae icuã esiquisã quisã mbei chõ nguia Jesús quiato si jẽ. ¹⁹ Dios eicua tuchi quia jẽ. Erendua ata atate chí nda jẽ. Mbae turã ndese chõ eico. Emo emo ngue ndua chooño mbei quia ra. Mbae turã naa naa ndocoĩ. Nyebe eriqui nguiã siqui icuã icuã mbeite. Nyebe tesarei nguiã Dios cheẽ si cote. ²⁰ Eĩ ngue Himeneo nda. Alejandro abe no. Nyebe ngue amondo nguiã Satanás je. Ndua ndua sacuã. Ñee icuã icuã eã sacuã Dios rĩĩ.

2

Sã mbia ñee turã ja Dios je, i Pablo

¹ ã tacheẽ Jesús quiato ja je: Mbia ja rĩĩ jẽingo bei ñee Dios je. † nda Dios uturã mee mbia je. Gracias jenyẽ bei quia Dios je mbia ja rĩĩ. ² Ae ererecua nae, ũquĩ ja rĩĩ abe jẽingo ñee mbei Dios je. Dios uturã mee sacuã ee. Ũquĩ mose ra nandeico turã ja cote. Ũquĩ mose ra nandeya bei nandeico cote. Ũquĩ mose ra nandeico tuchi Dios rese cote. ³ Ũquĩ mose ra Dios abe ia tuchi nanderese. Eicuã si mbia rirõsa chõ ae re. ⁴ Dios mbia rirõ ja sete quia eicuã si co. Dios mbia mbaaquiato quiato sete quia co no. ⁵ Dios mĩ ño siqui nguiã co. Mbia que icha icha jate esi ra. Jesucristo mĩ ño siqui nguiã mbite re co. Mbia mbucha sacuã Dios rese. Mbia sí chõ ae re. ⁶ Jesucristo que mano mbia icuã ndiquicharõ sacuã nda. Ũquĩ ndese que Dios mbia mbiirandu cote ra. ⁷ Ũquĩ nĩ ngue Dios seirabo ra. Semondo que judíos eã je embaaquiato quiato sacuã nda. Ũquĩ Dios icua sacuã ngue Dios cheẽ asenei senei ee ra. Ae bei. Acheẽ ñooñoa ño nguiã co.

⁸ Sã mbia ja riqui ñee mbei Dios je. Sã o mumbate ñee Dios je. Sã eriqui turã ja. Sã paama iã mbei nyue. ⁹ Sã cuña abe riqui siqui mingue. Sã eriqui ndua tuchi eã jiri huĩrao rese. Uachu rĩinda hui rese abe. Ua rese abe no. Lujo rese abe no. ¹⁰ Sã eriqui quiato ndua Dios rese. Sã eriqui

mbae turã naa naa mbia je. ¹¹ Sã cuña quiriri chõ nguia mbia ñumunua mose. Sã eriqui nyiisaquia turã. Sã eriqui mingue. ¹² Mbia ñumunua nua mose, cuña mbia mbaaquiato quiato aroneate. Sã cuña mo ererecua raã naa eã ngu je. Sã eriqui chõ nguia quiriri. ¹³ Adán nane nguiatu ngue Dios chao nguiã. Aquere quiato ngue Eva ao nguiã cote. ¹⁴ Adán nane eã ngue Satanás mbiirĩ irĩ nda. Eva rane nguiatu ngue re. Eva rane ngue mbae icuã saã nyii ra. ¹⁵ Dios ra paama i bei eã cuña je. Nguiirĩ nderequia turã mose. Dios icua mose. Siqui tuchi mose Dios rese. Nyesecua mose mbia rese.

3

Sã Jesús quiato rerecua siqui turã

¹ Acheẽ ñooño eã ño se re. Jesús quiato reaquiato sacuã ño taico se, i mose emo, eturãte ũquĩ. ² Sã Jesús quiato rerecua riqui siqui turã mbei. Mbia ñee eã sacuã ee. Sã ngũinisi mĩ ño nderequia. Sã eriqui ndua turã turã mbei. Sã earacua tuchi riqui. Sã eriqui mbia isi turã turã mbia mo oso mose echuchúaa. Sã eriqui mbia mbaaquiato quiato aracua. ³ Sã eriqui quiacuayã. Sã eicuã icuã eã mbei riqui emo je. Sã eriqui oo tuchiã mbae isiquia rese. Sã eriqui ico mingue. ⁴ Sã eriqui mbia uchuchua jenda rerequia turã. Sã eriqui nguiirĩ mbaaquiato quiato turã. Aba cheẽ mumbayã sacuã. † nda eriirĩ eĩ ñooño eã mbia je. ⁵ Nguiirĩ ndea chooño mose, Dios quiato reaquiato turã aroneate. ⁶ Ae Jesús icua ramote nae, Jesús quiato rerecua aroneate ũquĩ. Ũquĩ mose ucuasu raã naa arõte. Eicuã arõte cote. Sã Satanás abe ucuasu raã naa ñimbĩcuã nonde no. ⁷ Sã Jesús quiato rerecua riqui siqui turã mbei Jesús quiatoã abe je. † nda diablo embiirĩ irĩ eã embĩcuã. † nda Jesús quiatoã ñee turã mbei erĩĩ.

Sã diáconos siqui turã

⁸ Diáconos je abe tacheẽ. Sã diáconos abe siqui turã. Sã eriqui ucheẽ mbuchebiã mbae raã nonde. Sã

eriqui quiacuayã. Sã eriqui oo tuchiã mbae isiquia rese. ⁹ Sã diáconos siqui eã tuchi mbae icuã mo ndese. Sã Dios mii ndese quiatu eriqui bei. Sã Dios icua tuchi. ¹⁰ Ae ra diácono nae, sã mbia mae na nguiatu erese nyii. Eturã mose mbia je, sã diácono ae cote. ¹¹ Sã diácono ninisi abe riqui siqui turã mbia je. Sã mbia mbucheẽ ñee eã emo nii. Sã eriqui quiacuayã. Sã eriqui ucheẽ mbuchebiã mbae raã nonde. ¹² Sã diácono ngüinisi mii ño nderequia. Sã eriqui nguiiri nderequia turã. Uchuchua jenda ja abe no. ¹³ Diáconos mbae raã turã turã mbei mose, mbia ra eicua tuchi cote. Dios abe ra embuquirãcuã tuchi Jesucristo renei nenei sacuã mbia je.

Ae Dios saã nande je, ñquĩ aba icua ja aroneate raque

¹⁴ Sesó jeise rete raque nderea. Sesó eã moi ño aico nguiã co mbesa ndeje a. ¹⁵ Nde Jesús quiato rerecuarã irabo aquiatu sacuã ño aico nguiã ã mbesa ndeje a. Iglesia jenda rerecuã irabo sacuã. Dios reco mbae rei iglesia. Iglesia quia rei Dios cheẽ nderequia tuchi mbia ja je. ¹⁶ Ae Dios saã nguia nande je nae, ñquĩ aba icua ja aroneate raque: Dios que tu mbiarã íbii ra. Jesús, i equia ee. “Eturã tuchi” i que Espíritu Turã erii nda. Angeles abe que mae erese ra. Ae Jesús quiato nae, ñquĩ ngue esenei senei mbia ataque je ra. Mbia mangue choñoa jenda ja que eicua ra. Aquere que Dios equeraobe ibate coté ra.

4

Mbia ra hui hui Dios cheẽ si

¹ Espíritu Turã ndiqui ñee co: Mbae ua ja nonde ra mbia hui hui tuchi Dios si. Aba mbiiri irisa rese ra mbia riqui tuchi. Ñquĩ nda mbia mbaaquiato icuã icuã aba checuayã icuã na. ² Ae uturã saã saã nguia nae, ñquĩ nduiri ra mbia riqui. Ae ñee ñoño nguia nae, ñquĩ nduiri ra mbia riqui

no. Ñquĩ siqui beite mbae icuã ndese ñquĩ. Nyebe eriqui nguiã mbae turã icuayãte chee cote. ³ Ñquĩ nda mbia mbaaquiato icuã icuã. Jeninisirã nda jendecoã. Jendurã abe ra jendecoã no, i ra equia ñee mbia je. —Mbae ra jẽu choñochoĩ jẽ, i ra equia mbia mbaaquiato icuã icuã. Dios mbae chao ja raque mbia chiurã. —Sã sequiato mbae ja u, gracias ire seje, i que Dios ra. ⁴ Dios chiao mbae turã ja. Mbae nandesi teã teã eã ño nguia echiao. Mbae nandeu turã ja chõ nguia. Gracias nande bei chõ nguia Dios je. ⁵ Dios cheẽ nguire mbae turã ja riqui nandechiurã ã. Nande “gracias” i mose Dios je, mbae turã ja chõ eriqui nguiã nande je.

Jesús quiato rerecuã turã

⁶ Ñ secheẽ esenei senei mbei quia Dios quiato je, Timoteo. Nde mbia mbaaquiato turã turã mose. Dios rimba turã tuchi ra nde cote. Jesús cheẽ nduiri ra ereico tuchi cote. Dios ra ereicua tuchi cote. Sã ereico beite erese co no. ⁷ Mbia cheẽ ñoño je cheẽ ndese ra erechiisaquiachĩ jẽ. Echimbirãcuã tuchi quiatu quia siqui Dios rese jẽ. ⁸ Nanderete quirãcuã mose, eturãte raque. Nandeco mose Jesús rese, ñquĩ nguiatu eturã tuchi nanderete quirãcuã si re. Achõ eã nandeco Jesús rese. Ibate abe quiatu nandeco erese. ⁹ Acheẽ ñoño eã ño se re. Sã mbia “ae beite” i ja secheẽ je. Dios cheẽ ño ñene. ¹⁰ Dios cheẽ nii ño ureico nguiã quicoi coi ã. Dios cheẽ nii ño ureico nguiã ñimbirãcuã mbae ja rese ã. Dios reco quiatu ureicuate nguiã ã. Ae que mano mbia ja je ra. Ae eicuate quia nae, ñquĩ nda emingo bei.

¹¹ Ñ esenei senei mbei quia mbia je. Mbia Dios cheẽ mumbayã sacuã. ¹² Sã mbia ndecheẽ andu turã. Amei eã ndaque nde. Mbae turã esaã saã nguia Jesús quiato resaa. Ñquĩ siqui turã sacuã nde rã si. Echeẽ turã mbei quia mbia je. Eico turã mbei quia mbae turã ndese. Echesequa tuchi quia mbia rese. Dios eicua tuchi quia.

Mbae icuã ndese ra eremae mae jirichĩ. ¹³ Mbia embaaquiato quiatu bei quia seso mose chee nderea. Dios cheẽ esenei senei mbei quia leer i ee. ¹⁴ Jesús quiato rerecua o chono mose ndearõ, aque mose que Dios nembaaracua tuchi ra. —Á esaã, i que ndeje ra. Ûquĩ si ra eretesareichĩ. ¹⁵ Ûquĩ ndese eico bei. Endua ndua bei quia erese. Ûquĩ mose ra Dios ereicua i i tuchi. Mbia ra jirandu ja nderese. ¹⁶ Emae ño nguia nde ae ndechiese. Echicuasẽ cuasẽ ño nguia mbae icuã si. Ae eresenei senei nguia mbia je Dios cheẽ nae, ùquĩ emumbayã ño nguia nde abe. Ûquĩ mose ra Dios nemingo turã tuchi. Ndecheẽ andusa abe ra emingo turã tuchi.

5

Jesús quiato siqui turã sacuã

¹ Erecheẽ icuã icuãchĩ nda amei je nde embaaquiato quiatu mose jẽ. Amei embaaquiato turã turã ño nguia jẽ. Nderu esaã ño nguia siqui turã ee. Ndenongue rá ño eico mbia yasu je no.

² Ndesi esaã ño nguia ari je jẽ. Ndenongue esaã ño nguia ubichõ nyucuaaque rese jẽ. Endua icuã icuã eã ño nguia eriĩ jẽ. ³ Eru cheecha mo mbae eã mose, sã Jesús quiato riqui mbae mo mee mee ee. ⁴ Eriirĩ tiarõ mose, sã aque chõ mbae mee mee mbei quia usi je. Eriirĩ nducucha mose, sã aque chõ mbae mee mee ee no. Ngu abe je. Umumbebosa je. Ûquĩ Dios bite. ⁵ Sã eru cheecha mo ae riqui no. Sã embae eãte riqui no. Ae ndua ndua bei mose Dios rese, ñee mbei mose Dios je, sã Dios quiato riqui mbae mee mee mbei ee. ⁶ Ae ebite nae, ùquĩ ndese achõ eru cheecha mo siqui mose, eicuãte ùquĩ. Eraaque rá ño aque riqui nguã. Ereco siqui raque. ⁷ Á esenei senei nguia mbia Jesús quiato hue jenda je. I nda mbia ñee icuã eã eriĩ. ⁸ Emo ndua eã mose usi rese, ngu abe rese, eicuãte ùquĩ. Mbae mee mee eã mose ee, eicuãte ùquĩ. Ûquĩ siqui ãte quia

Dios rese ùquĩ. Eicuã tuchi chõ ùquĩ Dios quiatoã si re.

⁹ Ari eru cheecha je inscribir jenye rá mámbii. Ae sesenta años eãte nae, ùquĩ je inscribir jenye eã. Ae eru ata nyii nae, ùquĩ je inscribir jenye eã no. Ae eru mii nyii nae, ùquĩ mii je chõ inscribir jenye. ¹⁰ Ae ari turã aba chũcuate nae, ùquĩ achõ je chõ inscribir jenye. Ae ari nguiirĩ mbutiarõ turã mbeite quia nae. Ae ari mbia isi turãte quia uchuchúaa nae. Ae ari mbae turã saã saã mbeite quia Jesús quiato je nae. Ae ari erasi teaquiato turã mbeite quia nae. Ae ari siqui beite quia mbae turã ndese nae. Ûquĩ ari je chõ inscribir jenye. ¹¹ Eru cheecha ari eã mose, ùquĩ je inscribir jenye eã. Ûquĩ nyao arondete Cristo si. Ae ebite, ùquĩ achõ ndese ndua mose. —Serurã mo tateabe, i ra cote. ¹² Ûquĩ mose ra Dios paama i ee. Ucheẽ mbuchebi chõ nguã ngu rea mose cote. ¹³ Eru cheecha ari eã mose, siqui eã arõte mbae mo ndese. Tuchua embuchesea sea chooño arõte. Mbia mbuchee ñee ñooño arõte emo nii. Uchuru rerequia chooño eã arõte. ¹⁴ Nyebe aico nguã ñee eru cheecha, ae ari eãte, ùquĩ je. Sã ngurã mo ndea. Sã tiirĩ. Sã eriqui mbae turã naa naa mbei uchuchúaa. Ûquĩ mose ra Jesús quiatoã ñee eã ee cote. ¹⁵ Emo emo ngue nyao Dios si cote ra. Satanás ndese eriqui ã cote. ¹⁶ Sã Jesús quiato riqui mbae mee mee uchari eru cheecha je. Usi abe je eru cheecha mose. Iglesia mbae mee mee eã sacuã ee. Ae eru cheecha eriiriãte nae, ùquĩ je quiatu iglesia mbae mee mee.

¹⁷ Jesús quiato rerecua mbae saã turã turã mbei mose, sã mbia ia tuchi riqui erese. Dios cheẽ nenei nenei turã mose, sã Jesús quiato riqui mbae mee mee mbei ee. ¹⁸ Sã embesa ji riqui ñee no: “Emo nimba ticuasu mbae usi raã mose, echuru ra jenyatichĩ mbae mo je jẽ. Sã ae ae si quia quiaru quiaru”, i que embesa ji ra. “Ae quiei quiei quia emo je nae, sã echa mbae isiquia mo mee ee”, i

que embesa ji ra. ¹⁹ —Jesús quiato rerecua que mbae icuã saã nda, i mose emo, echeẽ nda jeñanduchĩ, ae mii ñee mose. Nyeremo ñee mose, ũquĩ ñee ñooñoa arõte cote. ²⁰ Jesús quiato rerecua mo siqui siqui bei mose mbae icuã ndese, echeẽ asi asi ee Jesús quiato ataque résaa. † nda ũquĩ abe siquiche mbae icuã naa naa eã. ²¹ Eĩ ere chõ Jesús quiato rerecua je, siqui mose mbae icuã ndese. Ndequiatote raque. Echeẽ asi ee. Aico ñee ndeje Diosa a. Jesucristo sa abe no. Angeles Dios rimba sa abe no. ²² Jesús quiato rerecuarã nda eremii jeichĩ jẽ. Emae nguiatu turã na erese nyii. Emii jei mose, eicuã arõte emo mose. — Eremii jeichĩ ngue nyii ra, i ra mbia ñee ndeje cote. Mbae turã ndese chõ eico nde abe.

²³ I achõ nda erembeichĩ jẽ. Uva rique rasi ñetẽ abe embei mbei quia nderie rasi mose jẽ.

²⁴ Emo emo nyisaã mbae icuã nyecuate riqui nande je ã. Emo nyisaã icuã ndese quia nandeico nguiã mae ãte namo. Dios eicuã mbasi mose, aque mose ramo nda nandemae ũquĩ nyisaã icuã ndese cote. ²⁵ Eĩ si chõ mbia chisaã turã no nde. Emo emo nyisaã mbae turã nyecuate riqui nande je ã. Emo nyisaã turã ndese quia nandeico nguiã mae ãte raque ã no. Echisaã turã nda nyecua ja chee nande je cote.

6

¹ Ae Jesús quiato ererecua rimba mo nae, sã ũquĩ ndiqui nguerecua cheẽ mumbayã tuchi. Sã eriqui turã nguerecua je. Eĩ mose ra mbia ñee icuã eã Dios cheẽ nii cote. ² Timoteo, mbia rimba embaaquiato quiatu quia. ã echeẽ ee. —Jenderecua Jesús quiato mose, echeẽ jemumbayã ño nguia mbae raã turã turã ee. “Jesús rimba ja chõ nande re” jenyechĩ nda jenderecua ucuãyã cuãyã jẽ. Jenderecua Jesús quiato mose, mbae jẽsaã turã tuchi quiatu quia ee. Jẽngo turã tuchi chõ nguia ee, ere ererecua rimba je ñee.

Nandendua tuchiã jiri quiatu quia mbae isiquia rese

³ ã ndei Jesucristo cheẽ tuchi ã. Emo siqui mose ã ndui, siqui turã nda Dios rã si. Emo mbia mbaaquiato quiatu mose ã abi, Dios cheẽ ndui eã ño ũquĩ ndiqui nguiã. ⁴ Ucuasu raã naa ño nguiã ũquĩ. Ñee tuchi beite equia ũquĩ. Eaquiato rocoĩ. Mbia mbiiacuã icuãte equia ũquĩ. Mbia mbucheẽ icuã icuãte equia nyue ũquĩ. Mbia mumae icuã icuãte equia nyiese ũquĩ. ⁵ Ndua icuã icuã mbeite equia ñee turã ndocoĩ ũquĩ. Eicuã icuã mbeite riqui emo je ũquĩ. —Mbia ra mbae isiquia mee seje, se Dios cheẽ nenei nenei mose ee, i beite equia ũquĩ. Ũquĩ ndese eicoã tuchi, Timoteo. ⁶ Nandeico mose Dios rui, ae ae ra nandembia nandembae mii ndese. ⁷ Mbae mo ngue nanderuãte nandechaacuquia mose ra. Eĩ nande si ra nandemano mose mbae mo nderao eã no. ⁸ Nandechiurã nandereco mose, nandeirao abe nandereco mose, nandeya chõ nandeico ũquĩ ndese. ⁹ Ae “mbaecha tuchi ra se” i bei quia ndua ndua, ũquĩ nda nimbirãcuã eã mbae icuã si. Mbae icuã tã i mose ee, mbae icuã nda esaã jei. Mbae Isiquia quiatu ebi tuchite riqui nguiã. Echiosei osei icuã nda equerao chee tata cuásuu. ¹⁰ Ae ndua beite quia mbae isiquia rese, ũquĩ mbae icuã saã ja arondete. Emo emo ndiqui ndua tuchi mbae isiquia rese ã. Nyebe eriqui nguiã hui Dios si ã. Nyebe eya eã ndasi tuchi riqui nguiã ã.

Dios eicua tuchi, i Pablo ñee Timoteo je

¹¹ Eĩ erechĩ nda nde, Timoteo. Dios rimba tuchi chõ nde re. Mbae turã ndese bei eico. Dios rã mbei chõ eico. Dios eicua bei chõ nguia. Echese-cua bei chõ nguia mbia rese. Eico mingue chõ nguia. Ndecuasu ra eresaã saãchĩ nguia jẽ. ¹² Echimbirãcuã tuchi quiatu quia Dios cheẽ ndese jẽ. Aba mingo beisa rese quia eico tuchi jẽ. Ae quia ngue ndeirabo nguiã nyii. Sã erecheẽ turãte mbia résaa nyii no.

—Dios riqui semingo beite co, ere que equia nyii. Ûquĩ ndese bei chõ eico. ¹³ Dios ae chõ mbae mingo ja nguiã co. Erésaa tacheẽ ndeje. Jesucristo résaã abe tacheẽ ndeje. Sã Jesucristo siquicheã ñee Poncio Pilato je no. ¹⁴ Ae rĩĩ Dios ñee ndeje nae, ùquĩ emumbayã ja chõ nguia eraã turã. Jesucristo tu mose chee eico echeẽ mumbayã mbei. † nda emo ñee eã ndeje. ¹⁵ Dios quia rei equirãcuã tuchi mbia mo si. Ae quia ererecua tuchi mbia mo si re. Emo mose ra Dios “Jesucristo tamondo íbii mbia rea” i. Aque mose ra Jesucristo nyecua tuchi mbia je. ¹⁶ Dios mĩĩ nda manoa. Ae mĩĩ ño siqui bei nguiã nyaashĩ na co. Mbia mo nda esichã eã. Mbia mo mae eãte erese emo mose. Emo nda mae eã mbei erese. Sã mbia ñee turã mbei quia erĩĩ. Sã eriqui ñee turã mbei equirãcuã nĩĩ. Amén.

¹⁷ Ae mbaechate nae, ùquĩ je echeẽ. Sã ucuasu raã naa eã. Sã eya siquiã umbae mĩĩ ndese. Embae ra ua emo mose. Sã Dios rese quiatu eya riqui. Ae mĩĩ ño mbae mee nguiã nande je. ¹⁸ Echeẽ mbaecha je. —Mbae turã jësaã saã mbei quia jembae je jë. Jëingo turã jiri quia mbaecha reã je. Abei chiãte ra jëingochĩ jë, ere mbaecha mbaaquiatu quiatu. ¹⁹ Ûquĩ naa naa mose ra Dios mbae mee tuchi ee ibate. Ûquĩ naa naa mose ra siqui turã tuchi no.

Pablo ñee hui bei Timoteo je

²⁰ Timoteo, ae rĩĩ Dios ñee ndeje, ùquĩ emumbayã mbei quia. Mbia ñee ñooño mose nyue, nde abe ra erecheẽchĩ. Ûquĩ ñee aba mundua turã eã ño nguiã. Uaquiatu raã naasa chõ ùquĩ nde. ²¹ Dios cheẽ abi chõ eriqui nguiã ùquĩ naa naa ùuuuuu uu-ùquĩ. Dios icuasa reã ño ùquĩ nde. Sã Dios turã ndiqui bei ndeje. mén.

SEGUNDA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablo rei se. Jesucristo chimbaaquiatu rei se. Dios que semondo mbia mbaaquiatu quiatu sacua nda. —Jesucristo icuasa ra siqui bei, i sacua ngue Dios semondo mbia je ra. ² Aico a mbesa ndeje a, Timoteo. Secheẽ nguire chõ ereico nguiã Jesús icua aque. Nyebe aico nguiã seriirĩ i ndeje co. Dios rei nanderu. Jesucristo rei nandererecua. Sã ãquĩ turã mbei riqui ndeje. Sã ãquĩ ia eã mbei riqui nderese. Sã ãquĩ nembia tuchi.

Pablo Dios ose i uquia Timoteo je

³ Gracias, ae bei se quia nderĩĩ Dios je co. Aico turãte quia Dios je co. Seramei ja rã si. Senduasa tuchi Dios riqui co. Nderĩĩ aico ñee mbeite Dios je co. Nyaashĩ mose. Isa abe. ⁴ Anduate quia nderese co. Achimbiate rã nda mae nderese chã. Erecheseote que nandechao ramo mose nandechesi ra. ⁵ Ereico Dios icua tuchite aque. Ndesi rã si Eunice. Ndechari abe rã si Loida. ãquĩ ngue Dios icua tuchite quia ra. Eĩ ere si quia Dios icua tuchite nde abe aque. ⁶ Nyebe aico nguiã ñee ndeje a. Seo achono nguia ndearõ nae, aque mose que Dios nembraaracua tuchi ra. Ndearacua eico bei Dios cheẽ ndese. Dios cheẽ nenei nenei mbia je. ⁷ Dios siquiã nguiã nandembu siquiche mbia si a. Dios nandembirãcuãte quia a. Dios nandembuchesequate quia mbia rese a no. Dios nandembaaracuate quia a no.

⁸ Dios quirãcuã ndese eico bei. ãquĩ mose ra ereireĩ ireĩ eã Jesús renei nenei mbia je. ãquĩ mose ra ereireĩ ireĩ eã setarõ ji si. A setarõ ji ñi Jesús rĩĩ a. Mbã icuã icuã mose ndeje Jesús rĩĩ, echimbirãcuã ño. Dios ra nembirãcuã. Sã sembirãcuã no.

⁹ Dios quiatu ngue nanderirõ nguiã nandeicuã si. Dios que nandembu turã mingo icue umbaerã nda. Nandeturã je eã ngue nandemingo nguiã icue umbaerã. Nduate quiatu nguiã nanderese. Mbae ao ja nonde que nduate nanderese ra. Jesucristo rĩĩ ño ngue Dios riqui nguiã nyesequa nanderese. ¹⁰ Nyebe Jesucristo mondo nguiã nanderirõ sacua nandeicuã si. Nyebe nandeico nguiã ñee: —Dios nyesequate nanderese, i cote. Jesucristo que nandembusiquicheã u nandemano si ra. Ae riqui nandemingo bei co. Ae riqui ucheẽ isiquia mingo bei co. Jesucristo tu mose que nandembiirandu ja ãquĩ ndese ra. ¹¹ Ucheẽ turã nenei nenei sacua ngue Dios seirabo ra. Semondo que mbã mbaaquiatu quiatu ra. Mbã mangue choõnoa jenda ja mbaaquiatu quiatu. ¹² ãquĩ je chõ mbã riqui nguiã mbae rasi raanguia tuchi seje co. Aireĩ ireĩ eãte quia Dios si co. Dios aicuate quia co. Sereco que amee tuchi ee ra. Ae ra sereco teaquiatu bei seje. Jesucristo tube chee mose. ¹³ Arembaaquiatu turãte que se, ãquĩ ndui eico bei. Dios eicua bei quia Jesucristo rĩĩ. Mbã rese echesequa bei quia Jesucristo rĩĩ. ¹⁴ Ae rĩĩ Dios ñee ndeje nae, nembraaracua equia nae, ãquĩ ndese eico tuchi. Espiritu Turã nda nembesari eã. Eriqui tuchite nandechiangui re co.

¹⁵ Ereirandu que Asia jenda serecha rese ra. Figelo. Hermógenes. ãquĩ ngue hui ja sesi ra. ¹⁶ Onesíforo quiatu que tuutu quia serea sembia ra. Ireĩ ireĩ eãte que equia setarõ ji si ra. Sã Dios turã mbeite riqui ee. Echuchua jenda ja abe je. ¹⁷ Tu mose aa Rómaa que serequia tuchi ra. Ngasẽ nyee que seje ra. ¹⁸ Efeso seico mose abe que eriqui tuchite serese ra. Serese que eriqui Dios cheẽ nenei nenei nda. ã ereicuate quia aque. Sã Dios mbae turã tuchi mondo ee Jesús tu mose.

2

Mbae esaã saã tuchi quia Jesús je, i Pablo Timoteo je

¹ Seriiĩ naate nde, Timoteo. Jesucristo quirãcuã ndese eico ñimbucha tuchi. ² Arembaaquiatu quiatu que se mbia résaa, ãquĩ esenei senei tuchi quia mbia je. Mbia ndua je secheẽ esenei senei. ãquĩ nda esenei senei emo je no ña. ³ Mbae rasi tu mose ndeje, echimbirãcuã ño. Soldado rã ño eico ñimbirãcuã. Jesús rimba turã ño eico. ⁴ Jesús rimba chõ nde re. Echeẽ emumbayã mbei chõ nguia. Mbae mo ndese ra erendua nduachĩ. Ndererecua mi ndese endua bei. ⁵ Sã deporte no. Emo nda ganar i eã, nguerecua cheẽ mumba mose. ⁶ Sã emo ndiqui quiei quiei tuchi úcoo no. Aque mbae tubiriã tuchi rae. Eĩ ere si quiatu mbae raã naa tuchi Jesús je. ⁷ Ae ambesa mbesa quia ndeje ã, ã ndese endua tuchi. Dios ra embuchecua tuchi ndeje.

⁸ Endua tuchi quia Jesucristo rese. Quera si que manonde ra. Mbiate raque. David rucucha raque. Quera si que manonde ra. ãquĩ asenei senei nguia mbia je co. ⁹ ãquĩ je chõ mbia riqui nguiã mbae rasi raanguquia tuchi seje ã. ãquĩ ñi ño setarõ mi nguiã a. Se mbia iquiare rocoĩ nyii setarõ tarõ. Se chõ setarõ ndaque. Dios cheẽ nguia etarõ aroneate re. ¹⁰ Coche mbia icuã ndiqui nguiã seje. I nda Dios chiirabo Dios cheẽ isi bei cote. I nda Dios emingo bei cote. I nda ãquĩ siqui bei ibate Jesucristo rese cote. ¹¹ Ñee ñooñoa tuchi chõ mbia cheẽ ã nde: Nandemano ngue Jesucristo rese ra. Nyebe ra nandeico bei erese cote.

¹² Cristo riĩ mbae rasi nandesaã saã mose, Cristo ra nandemi ererecuarã, ererecua tuchi mose ae.

“Cristo aicuayãte” nande i mose, Cristo abe ra ñee nande je.

“Se abe jaẽicuayãte” i ra nande je.

¹³ Nandechẽ iru raque ra nande, Dios quia ra ñee iru eã mbei.

Dios quia ra ucheẽ mbuchebi aroneate nande je, i que embesa ji ra.

Ndeico tuchi mose Dios rese, ereireĩ ireĩ eã ndae

¹⁴ ã ndese mbia hue jenda embaaquiatu quiatu tuchi. Diósaa embaaquiatu quiatu tuchi. Ñee icuã icuã eã nda nyue chã. Ñee icuã icuã mose, emingo turã eã nyiese chõ ãquĩ nde. Mbae turã si embui chõ ãquĩ no nde. ¹⁵ Equiei quiei tuchi chõ nguia Dios je jẽ. I nda Dios “coche ñene” i ndeje. Sã emo ndiqui quiei quiei turãte nguerecua je no. Eireĩ nguiãte ra nguerecua si cote. Eĩ ere si chõ nguia Dios cheẽ nenei nenei mbia je. Dios cheẽ abi abiã. ¹⁶ Ae uchuru mondo chooñote quia nae, ãquĩ ndese eicoã. ãquĩ ndiqui isho i ite Dios si ãquĩ. ¹⁷ ãquĩ ñee mbuchei i ite echoi quia qui. Sã mbae rasi riqui oso i ite no. Eĩ si chõ Himeneo nguiã ãquĩ. Fileto rese. ¹⁸ ãquĩ ndiqui ñee Dios cheẽ abi abi tuchi ãquĩ. —Mbia rete raaque ra quera si eã, i chõ ño mbei equia ãquĩ. Nyebe eriqui nguiã mbia mbui mbuite Dios si ãquĩ. ¹⁹ Sita cuasu mo na ndei Dios cheẽ. Embuquiata aronea. Aque ñi mbei chõ nda echi. Eĩ si chõ Dios cheẽ nande je no nde. Dios cheẽ ño ã nde: “Dios riqui ngũimba icua jate ã,” i que ra. Co abe rei Dios cheẽ co: “Ae ‘Dios rimba rei se’ i quia nae, sã ãquĩ ndiqui nyao ja mbae icuã si”, i que ra.

²⁰ Sã mbae riru chumumbarate riqui mbaecha mo nyuchúaa no. Sã oro ao ji riqui emo no. Sã plata ao ji emo no. Sã ira ao ji emo no. Sã tuchu ao ji emo no. Emo emo ndei iti mombo sacuã no. Emo emo mbae turã ndirurã no. ²¹ Sã Jesús quiato riqui mbae turã ndirurã na. Sã eriqui icúe bei Dios mbaerã. Sã nyao tuchi mbae icuã si. ãquĩ mose ra Jesús ia tuchi erese. ²² Ae icuã acuanindu chosei chosei quia nae, ãquĩ si ehui chõ jẽ. Eico turã ño Dios icha rui jẽ. Dios eicua tuchi chõ nguia jẽ.

Echesequa tuchi chõ nguia mbia rese jẽ. Echimbia chõ nguia mbia rese jẽ. Eĩ ño Jesús quiato nguiã siqui turã nyiese ã, echiã quishĩ ja mose. ²³ Mbia uchuru mondo chooño mose ñee nyue, nde abechĩ nda jẽ. Mbia mbĩcuã sacua ño ũquĩ nde. ²⁴ Dios rimba quia mbia mbĩcuã aroneate re. Eturã tuchite quia mbia ja je re. Mbia mbaaquiato quiato turãte quia ñene. Siqui minguete quia mbia je re. ²⁵ Ae Dios cheẽ isi teã teã, ũquĩ nda embaaquiato quiato mingue quia. ũquĩ ñĩ nda ñee ñee Dios je. Dios emundua si sacua. Dios cheẽ isi turã sacua. ²⁶ I nda echoi oso chee uchã diablo si, ndua si mose Dios cheẽ ndese. Diablo quia eisite nguiã co. —Ã esaã jẽ, i beite diablo quia ee co.

3

Mbia ireĩ nguiãte ra mbae icuã naa

¹ Jesús quiato ra mbae rasi saã tuchi Jesús tu serĩ mose. ũquĩ eicua quiato tuchi, Timoteo. ² Umbae ae ae rese ra mbia ndua cote. Mbae isiquia mĩ ndese chõ nda mbia riqui ndua ndua cote. Mbia ra ucuasu saã saã tuchi. Ñee icuã icuã mbei ra equia emo ñĩ. Mbia ra ngu cheẽ mumba mumba tuchi. Usi cheẽ abe no. Mbia ra gracias iã tuchi nyue aque mose. Siqui sereã tuchi ra Dios rese. ³ Mbia ia eã eã nda emo ndese. Ñimbuturã sereã tuchi ra emo je. Emo nda embuqueta queta bei quia. Hui aroneãte ra mbae icuã si. Nyaba nyaba reã tuchi rae. Mbae turã nda eucuyã tuchi. ⁴ Mbia ra embucheẽ ñee ngõngue rĩ. Mbia ra mbae ñ ñooño. Mbia ra uaquiato saã ñooño. Ubi achõ ndese ra eriqui. Siqui rocoĩ Dios bi rese. ⁵ Dios quiato ra mbia saã ñooño. Dios quirãcuã icua rocoĩ. ũquĩ mbia icuã si echao tuchi, Timoteo. ⁶ ũquĩ mo ndiqui ique ique emo nyuchua ã. Cuña aquiatuã mbĩrĩ irĩ. Ae ndua ndua beite quia huĩcuã ndese cuña nae, ũquĩ mbĩrĩ irĩ. ũquĩ cuña ndiqui uchioseĩ raã naa mbei mbae icuã ũquĩ. ⁷ ũquĩ

cuña ndiqui “tachimbaaquiato” i beite raque ũquĩ. Ñimbaaquiato aroneate Dios cheẽ ndese. ⁸ Sã brujos Moisés cheẽ mumba no. Janes, i equia ee. Jambres abe no. Eĩ si chõ cuña mbĩrĩ irĩsa nguiã Dios cheẽ mumba mumba ũquĩ. Ndua aquiatuã je chõ ũquĩ nde. ũquĩ ndiqui emo mingo aroneate Dios cheẽ ndese ũquĩ. ⁹ Mbia ra siqui eã ũquĩ ñee ndui cote. Mbia ra “eaquiatuã” i chee erĩ. Sã “eaquiatuã” i chee Moisés cheẽ mumbasa rĩ brujos no.

Jesús quiato ra mbae rasi saã, i Pablo

¹⁰ Ereico turãte que se rã si ra, Timoteo. Dios cheẽ ngue eresenei senei nguia se rã si ra. Ae asaã saã nguia Dios je nae, ũquĩ ngue eresaã saã nguia nde abe ra. Ae “tasaã Jesús je” ae quia co nae, nde abe eresaã saã turã nguia aque. Dios ereicua tuchite se rã si. Ereico minguete equia aque. Erechesecuate equia mbia rese aque. ¹¹ Ereico turãte que equia mbia icuã icuã mose ndeje ra. Sã mbia icuãte riqui seje Antioquíaa no. Icónioo abe. Lístraa abe. Sã ñĩ aico mbae rasi raã tuchi huee no. Dios que sereaquiato ũquĩ si ra. ¹² Ae siquise rete quia Jesucristo rese nae, ũquĩ nda mbae rasi saã tuchi. Mbia icuã icuã tuchi ra ee. ¹³ Ae icuã icuãte riqui Dios je nae, ũquĩ nguia ra eicua i i tuchi cote. Ae mbia mbĩrĩ irĩ nguia nae, ũquĩ ngui a ra mbia mbĩrĩ i i tuchi cote. Ñimbĩrĩ i i tuchi ra equia no. ¹⁴ Nde chõ eico tuchi Dios cheẽ ndese. Ae rese erechimbaaquiato nae, ũquĩ ndese eico tuchi. —Ichoiñoa tuchi que ã nda, erete equia eicua aque. Nembaaquiatusa abe ereicuate quia aque. ¹⁵ Ndeñetẽ mosenda bei chõ ereico nguiã Dios cheẽ icua aque. Dios cheẽ nembaaracuate quia aque. Nyebe ereico Jesucristo icuate aque. Nyebe Dios nderirõ nguiã ndeicua si. ¹⁶ Dios cheẽ turã ja chõ ñene. Dios chimondo ja chõ ñene. Dios cheẽ nguia rei mbia mbaaquiato. Dios cheẽ ngui a rei mbia icuã mbuchecua ee. Dios cheẽ

nguia rei “eĩ jenye” i tuchi nande je. Dios cheẽ nguia rei aba mingo Dios bi rese. ¹⁷ ¶ nda Dios quiato siqui turã tuchi. ¶ nda eaquiato mbae turã naa ja.

4

¹ Aico ñee ndeje Dios nonde a, Timoteo. Jesucristo nonde abe no. Ae r a tube mae ja mbia rese. Mbiam reco rese. Mbiam mano je rese abe. Ae nonde aico ñee ndeje a. ² Dios cheẽ esenei senei tuchi quia mbiam je, Timoteo. Mbiam eanduse mose. Mbiam eandu sereã mose abe no. Embaaquiato quiato mingue bei chõ nguia. Embuti mbuti bei quiato quia Dios cuti. “Eĩ jenye” ere bei quiato quia mbiam je. ³ Namojiri quiato ram biam Dios cheẽ turã andu sereã cote. Ubi achõ ndese chõ nda huiisa rerequia tuchi cote. Nyebe ra Dios cheẽ andu sereã. Ae mbiam mbaaquiato icuã icuãte quia Dios cheẽ ndui eã nae, ùquĩ ndui chõ nda mbiam riqui tuchi cote. ⁴ Nyiisaquia tuchi chõ nda equiam biam ñee ñooño je rese cote. Ñee ñooño eã je rese nyiisaquia rocoĩ. ⁵ Cochee chõ eico nde, Timoteo. Nderoseĩ nguiatu chõ eico mbiam icuã icuã mose ndeje. Equieĩ quieĩ tuchi chõ nguia Dios je. Dios cheẽ esenei senei tuchi chõ nguia mbiam je.

⁶ Achuruchate ucua quia cocote. Aico mano utate cocote. ⁷ Mbae que asaã saã tuchi quia Dios je ra. Ae je Dios riqui ñee seje nae, ùquĩ ngue asaã jate quia ee ra. Ahui eã mbeite que se quia esi ra. ⁸ Dios que sechiã mbuturã nda. Ñquinde que aico ngata turã nda. Nyebe eriqui nguiã premio nderecoquiato seje pe. Jesucristo tu mose ra Dios mae jam biam rese cote. Aque mose quia ram premio mee seje cote. Se mii je eã ndae. Ae Jesucristo ru choseite quia nae, ùquĩ jam abe ram premio mee.

Echu serea, i Pablo Timoteo je

⁹ Echu jei chõ serea, Timoteo. ¹⁰ Demas quiato ngue serecha nguiã. Ibi jenda achõ ndese chõ eriqui nguiã

ndua. Ubi mii ndese chõ eriqui nguiã ndua. Nyebe esi nguiã serecha Tesalónicaa. Crescente quiato que oso Galáciaa ra. Tito quiato que oso Dalmáciaa no nda. ¹¹ Lucas mii ño siqui nguiã serese cocote. Marcos abe eru bei seje. Ae nda quieĩ quieĩ jiri nguiã serese aa. ¹² Tíquico quiato que amondo Efésoo ra. ¹³ Ae asecha sasco sembae nae, eru bei seje ndechu mose. Asecha que Troas ra. Carpo chuchua. Libros abe eru bei seje. Sechimbesa papeles si ra eretesareichĩ. Eru bei seje. ¹⁴ Alejandro el herrero que mbae icuã saã saã tuchi quia seje ra. Dios ram biam icuã mee ee eicuã ndibishorõ. ¹⁵ Echiteaquiato quia esi jẽ. Nande Dios cheẽ nenei nenei mose, ebiãte eriqui co. ¹⁶ Mbiam sererao mose ererecua je, emo ngue nyaroã tuchi serese ra. Serecha jam chõ ngue ra. Dios nda paama i eã ee ùquĩ nii ña. ¹⁷ Jesús mii ngue serecha eã nda. Ae mii ngue sembirãcuã nda. Se echeẽ turã nenei nenei tuchi sacuã. Ae judíos eã nae, ùquĩ Jesús cheẽ turã andu tuchi sacuã. Nyebe Jesús sembui mondo nguiã mbiam icuã si. ¹⁸ Ae ram sereaquiato bei quia mbae icuã si. Sererao chee mose ibate nyiese. Sã mbiam riqui ñee turã mbei erii. Amén.

Pablo hui mbae mbesa mbesare

¹⁹ Saludar ere rã Prisca je. Aquila abe je. Onesíforo chuchua jenda jam abe. ²⁰ Erasto que siquichõ Coríntoo ra. Trófimo ndasi que asecha Milétoo ra. ²¹ Nyiiseĩ tuutu nonde chõ echu. Eubulo saludos mondo quia ndeje aque. Pudente abe no. Lino abe no. Claudia abe no. Jesús quiato jam a jenda abe no. ²² Sã Jesucristo riqui bei nderese. Sã Dios turã ndiqui bei jendese. Amén.

CARTA DEL APOSTOL SAN PABLO A TITO

Pablo embesa mondo Tito je

¹ Pablo rei se. Dios rimba. Jesucristo chimbaaquiatu. Dios que semondo ñee ñee sacua uchiirabo je ra. Ũquĩ Dios icua tuchi sacua ngue semondo ra. Siqui turã sacua Dios rã si. ²—Sechiirabo ra amingo bei, i que Dios cose ra. Ñee ñooño eã ndae. Ũquĩ ndese embiirandu sacua ño ngue semondo nguiã. ³ Dios rei nanderirõsa mbae icua si. Ae que seirabo ucheẽ nenei nenei sacua mbia je ra. Eĩ ngue Dios ucheẽ mbuchecua mbia je cote ra. ⁴ Aico ã mbesa ndeje a, Tito. Ereico Jesús icuate se rã si aque. Nyebe aico nguiã “seriirĩ” i ndeje co. Nanderu chõ Dios re. Sã nanderu turã ndiqui bei ndeje. Sã Jesucristo abe turã ndiqui ndeje. Sã ũquĩ ia eã tuchi riqui nderese. Sã ũquĩ ndiqui nembia turã tuchi.

Sã Jesús quiato rerecua riqui turã

⁵ Ae nandesaã ja eã huee nae, ũquĩ esaã ja rã nguia nde huee. Amei mo eirabo rabo Jesús quiato rerecuarã. Mbiam recua ja ja jenda. Secheende ndeje eirabo rabo ino huee. Nyebe arerecha nguiã huee Crétaa. ⁶ Amei turã ño eirabo rabo Jesús quiato rerecuarã. Eninisi mii nderecua chõ eirabo. Ae riirĩ Jesús icua quia nae, ũquĩ mii ño eirabo rabo. Ae eriirĩ seteãte riqui nae, ũquĩ ño eirabo rabo. Ae eriirĩ teã eãte nae, ũquĩ ño eirabo rabo. Jesús quiato rerecuarã. ⁷ Jesús quiato rerecua quia Jesús quiato teaquiatu quiatu quia. Ũquĩ siqui icua aroneate. Ucuasu abe raã naa aroneate. Erosee nguiã aroneate. Quiacua aroneate. O rerequia chooñoa aroneate. Mbiam mo mbae osei osei aroneate no. ⁸ Mbiam nyoimose echuchúaa, isi turã ndae. Siqui turã ndae. Ndua ndua ra mbae ao nonde. Siqui eã nda mbae icua

ndese. Dios rã si chõ nda eriqui. Echi-ichati eã ndae. Jesús quiato rerecua ra eĩ mbei quia. ⁹ Sã eriqui bei Dios cheẽ ndese nandechee nguire. Ũquĩ mose ra ũquĩ abe mbiam mbaaquiatu quiatu turã. Jesús osei uquia ee. Mbiam icua ñee nda embutiba Dios si. Ũquĩ ño eirabo rabo Jesús quiato rerecuarã, Tito. ¹⁰ Mbiam teã teã je tubiriãte riqui ã. Judíos teã teã je abe tubiriãte no. Ñee ñooño tuchite equia ã. ¹¹ Ũquĩ nyuru esiquisã tuchi. Mbiam mbaaquia tu icua icuate quiatu nguiã ũquĩ. Eru mbiirĩ irĩ. Eninisi abe mbiirĩ irĩ. Eriirĩ ja abe no. —Mbiam ra umbae mee mee nandeye, i chõ nguiã ã. ¹² Hue jenda mo ngue ñee nda. —Ñee ñooño je chõ ure re, Creta jenda re. Ureicua mbei chõ ure re. Nyacua icua na ño ure re. Uretomei ño ure re. Mbae mburireãsa chõ ure no nde, i que Creta jenda mo nda. ¹³ Ichõiñoa tuchi chõ ñene. Nyebe echeẽ asi tuchi ũquĩ je, Tito. I nda eriqui tuchi Jesús rese. ¹⁴ I nda eriqui eã judíos icua ñee ndese. Mbiam tubiriã Dios cheẽ isi teã teãte quia ũquĩ. —Ũquĩ ñee nda jemumbayãchĩ jẽ, ere chõ mbiam hue jenda je. ¹⁵ Echiã mbuturã ji je chõ mbae turã ja riqui nguiã ã. Echiã mbuturã jiriã je quiatu mbae mo turã eãte re. Dios icuasa reã je mbae mo turã eãte. Ndua turã eã mbei. —Eicua eã, i chõchĩ nguiã mbae icua ndese siqui siqui. ¹⁶—Dios ureicuate quia ã, ichõiño equia ũquĩ. Echisaã nguia eicuate re. Nyebe nandeyico nguiã eicuate, Dios rese siquiã mose. Aba biã tuchi chõ ũquĩ nde. Aba cheẽ mumbasa. Siqui aroneate mbae turã mo ndese.

2

Mbiam embaaquiatu turã, i Pablo ñee Tito je

¹ Nde quia mbiam embaaquiatu quiatu turã jẽ. Dios cheẽ ndui si embaaquiatu quiatu. ² Amei embaaquiatu quiatu. Enyere chõ ñee ee: —Jẽquiacua quiacuachĩ nda jẽ. Jengata turã mbei chõ nguia jẽ.

Jëaracua bei chõ nguia jë. Dios jëicua tuchi chõ nguia jë. Jenysecua tuchi quia mbia rese jë. Jëingo tochi chõ nguia no jë, ere chõ amei mbaaquiату quiату, Tito. ³ Ari abe embaaquiату quiату. Enyere chõ ñee ee: —Jengata turã mbei quia Dios resa rae. Jeñee icuã icuã techĩ nda mbia mo nii jë. Jëquiacua quiacuachĩ nda jë. Mbae jësaã turã ño nguia mbia resa ráee jë, ere chõ ari mbaaquiату quiату, Tito. ⁴ Sã ari acuanĩ mbaaquiату quiату. ¶ nda acuanĩ nyesequa jaaja ngu rese. ¶ nda nyesequa jaaja nguiirĩ abe rese. ⁵ ¶ nda acuanĩ aracua ja ja. ¶ nda ndua ndua ja mbae turã ndese. ¶ nda uchuchua jenda abe mbuturã turã ino no. ¶ nda eturã mbia je. ¶ nda ngu cheẽ abe mumbayã no. Sã ari eĩ acuanĩ mbaaquiату quiату. Ũquĩ mose mbia ñee icuã icuã aroneate Dios cheẽ nii. ⁶ Acuanĩndu abe embaaquiату quiату quia no. ¶ nda earacua racua ja. ⁷ Nde abe ecuata turã mbei, Tito. Mbae turã esaã uquia mbia je. Ndeico mose mbia mbaaquiату quiату, cochee chõ eico. Echĩmbirãtã tuchi chõ nguia. ⁸ Ndeico mose mbia mbaaquiату quiату, echeẽ turã turã ño nguia ee. ¶ nda mbia ñee icuã eã ndecheẽ mose. ¶ nda Dios cheẽ ndesenda reã ireĩ ireĩ ndecheẽ si. ¶ nda ñee icuã eã jëje. ⁹ Mbia rimba abe embaaquiату quiату. Enyere chõ ñee ee: —Jenderecua cheẽ nda jemumba mumba techĩ nguia jë. Echeẽ nguire jëingo bei chõ mbae turã ndese jë. Jeñeechĩ nda echeẽ ndibishorõ jë. ¹⁰ Mbae mo nda jembuquia chãchĩ jë. Jëseteã ño jëingo mbae turã ndese jë. Eĩ jenyese mose ra mbia ñee turã Dios cheẽ nii, jenyese chõ nguia mbia rimba je.

¹¹ Dios que uturã teacuquia mbia je cote ra. Mbia rirõ ja nonde mbae icuã si. ¹² Mbae ja rĩĩ Dios riqui nandembaaquiату quiату co. Ae echosei chiãte quia nae, ũquĩ nandesecha ja sacua. Ae icuã nandebite riqui nae, ũquĩ ndecha ja sacua no. Nandear-

acua sacua abe no. Nandeico sacua mbae turã ndese no. Nandendua bei sacua Dios rese abe no. Eĩ nande bei quiату quia nande namo. ¹³ Jesucristo ra tu íbii ucheẽ nguire. Enininya tuchi ra tu. Nandeico eraarõ arõ ã. Ae ra nandembiate u. Ae rei Dios tuchi. Nanderirõsa mbae icuã si. ¹⁴ Ae que tu mano nande je ra. Nandeicuã ndibishorõ ngue mano nda. Nandechiã mbuquishĩ ngue u umbaerã nda. Nandeico tuchi sacua mbae turã ndese. ¹⁵ Enyere chõ mbia mbaaquiату quiату, Tito. Ererecua rã ño eico embaaquiату quiату. Echeẽ asi asi jiri quia ee. Sã emo ndiqui ndecheẽ andu sereã nea eã.

3

Dios uturã teacuquia nande je

¹ Echeẽ mbia je, Tito. —Ererecua cheẽ nda jemumba mumba techĩ nguia jë. Ererecua cheẽ jeñandu quiату quiату quia jë. Jeñĩmbirãtã tuchi quiату mbae turã naa naa nonde jë. ² Jeñee icuã icuãchĩ nda emo nii jë. Jeñee icuã icuãchĩ nda jenyese jë. Jeseteã ño jëingo jë. Jenguasu ra jësaã saãchĩ emo je jë, ere chõ mbia je, Tito. ³ Nandearacuayã techĩ nande abe nyii. Nandeteã teã techĩ equia nyii. Nandembĩrĩ irĩ ji raanguiate nandecochoĩ nyii. Ae nandechosei chosei quia mbae icuã nyii nae, ũquĩ achõ ndesete nandecochoĩ nyii. Mbae icuã ndese nandeico techĩ nguia nyii. Mbia mbae nandechosei chosei techĩ nguia nyii. Mbia mae icuã icuã techĩ nguia nanderese nyii. Nande abe nandemae icuã icuã techĩ nguia nandechiese nyii no. ⁴ Dios ia eãte que mbia rese aque mose ra. Uya eã ngue eteacuquia nande je ra. Uturã abe que eteacuquia nande je no nda. ⁵ Aque mose que nanderirõ mbae icuã si ra. Eya eãte quiату ngue eriqui nguia nanderese. Nyebe nanderirõ nguia mbae icuã si. Nandeturã nii eã ngue re. Nandechiã ngue eirei mbiasu ra. Espĩritu Turã je que nandechiã mbiasu ra. ⁶ Dios que

Espíritu Turã mondo tuchi nande je ra. Jesucristo rñi ñgue emondo nande je ra. Jesucristo rei nanderirõsa tuchi nande icuã si. ⁷ Dios que Espiritu Turã mondo nande je ra. Uturã je nandembitirõ sacua. Nandemingo bei tuchi sacua no. —Nandemingo bei tuchi rae, sã nandeico i ã no. ⁸ I chõiñoa tuchi chõ ã nde. ã esenei senei tuchi quia mbia je. † nda mbia emumbayã. † nda Dios icuasa siqui ja mbae turã ndese. Ae rñi aico ñee jẽje nae, sã mbia ñquĩ ñee mumbayã ja quiatu. Aba bite ñquĩ. ⁹ Mbia ñee asi asi je si ehui chõ. Mbia ñee mbei mose ngãmei ndaaque rñi, ñquĩ abe si ehui chõ. Mbia ñee icuã icuã mose nyue, ñquĩ abe si ehui chõ. Ae Dios senei senei nquia judíos je cose nae, ñquĩ nñi mbia ñee icuã mose nyue, ñquĩ abe si ehui chõ no. Aba biãte ñquĩ ñee. Aba mbaaquiato ãte ñquĩ. ¹⁰ Emo Jesús quiato mbuqueta queta mose embicuã nonde uchue, ñquĩ abe si ehui chõ. Eicuãte ñquĩ, ere ee. Ndecheẽ andu eã mose, echeembe ee. Aquere ehui chõ esi. ¹¹ Aba chicuante ñquĩ icuã. Ñquĩ siqui turã aroneate quia ñquĩ. Huiicuã eicuate quia ñquĩ.

Pablo embesa hui bei

¹² Artemas nda amondo nderea reae. Ae oso eã mose, Tíquico ra amondo ndeje. Ñquĩ mo ngasẽ mose huee, echu serea Nicápolis cote. Huee taico bei ama mose, ae que se ra. ¹³ Apolos embucuata turã mondo. Zenas ndese. Zenas ndei embesasa. Jesús quiatote ñquĩ. Mbae mo emondo ee. † nda echoi turã. † nda mbae tiã eã ee. ¹⁴ Sã nandere-senda riqui mbae turã naa naa mbei ñimbaaquiato. Emo mbae ua mose, sã mbae mo mee mee ee. Ñquĩ naa naa mose, siqui turã ño nguiã ñquĩ cote. ¹⁵ Ae chi ja serese a nae, ñquĩ saludos mondo quia ndeje aque. Ae Jesús quiato nyesequate quia urerese hue jenda nae, ñquĩ je saludar ere ure je. Sã Dios turã ndiqui tuchi jẽ ja rese. Amén.

LA CARTA DEL APOSTOL SAN PABLO A FILEMÓN

Pablo embesa Filemón je

¹ Se rei Pablo. Setarõ ji aĩ a. Mbia que setarõ Jesucristo rĩĩ nda. Timoteo rese aico ã mbesa mbesa ndeje a, Filemón. Ureresenda tuchi chõ nde re. Jesucristo rimba. ² Ae Jesús quiato ñumunua nua mbei quia ndechuchúaa nae, ũquĩ je abe ureico ã mbesa mbesa a. Apia je abe ureico embesa mbesa a. Arquipo abe je no. Ae que siqui bei ureresese ra. Mbia icuã icuã mose ure je Jesús cheẽ ñĩ. ³ Sã Dios riqui turã mbei jẽje. Sã jẽya bei riqui erese. Jesucristo rese abe no.

Filemón Jesús quiato tuchi

⁴ Secheẽ mose Dios je, “gracias” ae bei se quia Dios je nderĩĩ co. ⁵ Mbia que sembiirandu randu nderese ra. —Filemón ndiqui Jesús icua tuchi co. Co eriqui nyesequa tuchite Jesús rese co. Dios quiato ja rese abe no, i que equia sembiirandu randu nderese ra. ⁶ Aico ñee mbeite Dios je nderĩĩ co. Ae je ereico Jesús nenei nenei nae, i nda ũquĩ abe Jesús icua tuchi nde rã si. ⁷ Aque ereico nyesequa tuchi Jesús quiato ja rese aque. Nyebe seya beite riqui nguiã nderese co. Nde que Jesús erechesei uquia quia Jesús quiato je ra.

Onésimo eisi turã, i Pablo ñee

⁸ Cristo chimbaaquiatu aico raque co. Sã ererequa riqui ñee ngũimba je no. Ũquĩ asaã arõte raque ndeje. Asaã eã nda se. ⁹ Tacheẽ mingue chõ ndeje. —Mbae esaã seje, tae turã ño ndeje. Ameite se cote. Setarõ ji aĩ Jesús rĩĩ a no. Se rei Pablo. ¹⁰ Mbae mo esaã Onésimo je. Seico mose aa cárcel que aico Onésimo mbaaquiatu quiatu Jesús rĩĩ nda. Jesús quiato riqui co cote. Seriirĩ tuchi rã ño eriqui nguiã co cote. Jesús icua mose co cote. ¹¹ Nderimbachõ ño ngue eriqui nguiã

nyii. Erequeteã eã jiri que equia erese nyii ra. Aqueteãte quia erese co cote. Nde abe ra erequeteãte erese cote. Siqui turãte ra nande je cote. ¹² Aque amondo quia ndeje aque. Eisi turã mámbii. Sã ereico seisi turãte no. Ũquĩ esaã si ee. ¹³ Amondo sereãte raque. Siquichõ ndei nda serese aa chã. Mbae mee mee sacua setarõ ji je ndecutiã. A setarõ ji ñĩ Jesús cheẽ turã ñĩ a. ¹⁴ Aisi eã nda mingo serese a, nde “eno” iã mose seje. “Eĩ ere chõ”, ae eã nda ndeje. Nde ae chõ eisi turã. Nde ae chõ echeẽ turã ee. Se ae ra arembucheẽ turã eã ee.

¹⁵ Uchã ndei que ndesi nyii ra. Siqui bei ra nderese cote reae. ¹⁶ Nderimbachõ eã nda cote. Ndequiato chõ nda cote. Nderesenda chõ nda cote. Co aico nyesequate erese co. Nde quiatu ra erechesequa tuchi erese cote. Cristo resenda chõ siqui nguiã co cote. nderese. ¹⁷ Ndequiato tuchi chõ se re. Sã ñĩ ereico seisi turã turãte no. Eĩ ere si chõ Onésimo isi turã se rã si. ¹⁸ Onésimo deber i mose ndeje, cobrar erechĩ nda ee. Seje quiatu cobrar ere. ¹⁹ Pablo chõ se re. Seo je chõ aico nguiã co mbesa ndeje a. Onésimo deber i mose ndeje, asibishorõ nda mbae mee ndeje. Mbae que asaã tuchite rei quia ndeje ra. Dios cheẽ ngue asenei tuchite quia ndeje ra. Dios nemingo bei sacua. Nyebe deber ere tuchite raque seje. ²⁰ Nyebe Onésimo eisi turã na seje. I nda seya tuchi jiri nderese. Dios abe ra eyate nderese.

²¹ —Filemón nda secheẽ mumba eã. Secheẽ ndui si tuchi ra Onésimo isi turã, ae tuchi se quia nderĩĩ co. ²² Seruacuã jendecoquiato ino mámbii. Dios ra sembusẽ mondo, jeñee mbei mose ee reae. Ũquĩ mose ra aso jendea.

Pablo ñee hui bei

²³ Epafra saludos mondo quia ndeje aque. Ae tarõ ji ñĩ serese a. Jesucristo cheẽ ñĩ. ²⁴ Marcos abe saludos mondo quia ndeje aque. Aristarco abe. Demas abe no. Lucas abe no. A ndiqui Dios cheẽ nenei

nenei serese ã. ²⁵ Sã Jesucristo riqui
uturã ndeacuquia bei jêje. Amén.

LA CARTA A LOS HEBREOS

Jesucristo m̄i ño Dios cheẽ mbuchecua nguiã

¹ Dios que ucheẽ mbiãsa asa tuchi quia mbiã nandei ñiinda je cose ra. Hue rĩ ji eã ngue eriqui ucheẽ mbiãsa asa ee ra. Dios cheẽ mbuchecua checuasa atate que aque mose ra. ² Eĩ eã ño namo nde. Jesucristo m̄i ño Dios cheẽ mbuchecua checuã nguiã nande je co cote. Dios nguiĩrĩte mbucheẽ nande je cote. Ae m̄i ndese chõ ngue Dios ibi ao nyii ra. Dios que em̄i mbae ja rerecuarã nda. ³ Dios nininya rã si tuchi chõ Jesucristo nininya re. Dios rã si tuchi chõ ae re. Ae chõ mbae mingo ja nguiã ucheẽ quirãcuã je co. Ae que mano nandecuã mbutiã sacua nda. Aquere eñi ngoi bei ngu rese ibate pe cote.

Jesús quia rei i tuchi ángeles si

⁴ Jesucristo quia rei i tuchi ángeles si. “Seriĩrĩ tuchi” i chõ Dios nguiã ee. ⁵ Ñ ngue Dios ñee áte ángeles mo je ra: Seriĩrĩ ño nde re. Ndereco que amee ndeje ra, i áte que Dios ángeles mo je ra. Nderu chõ se re. Seriĩrĩ ño nde re, i áte que Dios ángeles mo je ra. ⁶ Dios nguiĩrĩ mbu mose íbii que ñee nda: Sã ángeles riqui adorar i ja seriĩrĩ je, i que ra. ⁷ Ñ ngue Dios ñee ángeles rĩĩ nda: Quĩrĩrĩã tu asi rã tuchi chõ ángeles re. Serimba chõ ángeles re. Tata rendi rã tuchi, i que Dios ñee ángeles rĩĩ nda. ⁸ Nguiĩrĩ je quiatu que ñee ã nda: Nde rei Dios. Ererecuarã mbei ra nde. Ererecuã turã tuchi ereico nde co. ⁹ Mbae turã eresaã sete quia co. Mbae icuã nguia erechosei chiãte nguiã. Nyebe Dios riqui nguiã nembia tuchi nderesenda mo si.

¹⁰ Nde que mbae erechao ja tuchi ibi jenda nyii ra.

Ndeo je que ibei erechao no nda.

¹¹ Ñquĩ nda ua ja chee.

Nde quia ra ereico bei.

Tiru ima na ja chee ra ñquĩ.

¹² Sã mbiã riqui tiru ima mombo no.

Eyasu rerecuã erendaque re.

Eĩ si ra ibi cote. Ibei abe no.

Nde quia ra eĩ mbei ereico.

Eremanoa mbei ra nde quiatu,

i que Dios ñee Jesucristo je ra. ¹³ Ñ ngue Dios ñee áte ángeles mo je ra:

Ecoi seji. Nde abe ra ererecuã serese.

Ae ndeucuãyãte quia nae, ñquĩ je ra

ndequirãcuã ateacuquia tuchi.

Ndequirãcuã tuchi chee ra ñquĩ si,

i áte que Dios ángeles mo je ra. Jesús

m̄i je que ñee ñquĩ nda. ¹⁴ Dios riĩrĩ eã

ñooñoa re. Dios rimba chõ ñene. Ae

ra Dios mingo bei, ñquĩ ndaarõ sacua

ñooñoa re. Dios ángeles m̄i nguiã.

2

Nandechayã sacua Dios icha si

¹ Ae nandechandu quia Dios cheẽ

nae, ñquĩ ndese nandeco ndua tuchi.

Ñ nda nandechayã mbei Dios icha

si. ² Ae rĩĩ ángeles riqui ñee mbiã

je cose nae, ñee ñooñoa tuchi chõ

ñene. Ae ñquĩ ñee mumba nae, mbae

rasi que esaã cote ra. ³ Jesucristo sí

que ñee nda. —Mbiã tamingo bei, i

que ra. Mbiã que echeẽ senei senei

mbiãsa nande je cote ra. Nande

echeẽ mumba mose ra mbae rasi

nandesaã tuchi nande quiatu cote.

⁴ —Jesucristo ñee ñooñoa ñooñoa ñooñoa re,

i sacua mbiã que Dios mbiã mae sayã

naa naa nda. Milagros tubĩrĩã. —

Jesucristo ñee ñooñoa ñooñoa ñooñoa re, i

sacua mbiã que Dios Espĩritu Turã

mondo mbiã je no nda. Ae je Dios

Espĩritu Turã mondo mondo sete nae,

ñquĩ je chõ ngue Espĩritu Turã mondo

ra.

Mbiã rã ngue Jesucristo ru nyii ra

⁵ Ae ra nandeso emo mose nae, hue

jenda rerecuã eã nda ángeles. ⁶ Sã

embesa ji ñi ñee ã no:

¿Mbaerã ereico nduate mbia rese re, Dios?

¿Mbaerã ereico eraarõ tuchi re?

⁷ Angeles que eremingo turã tuchi rei mbia si aque mose ra.

Ûquinde ereico bei mbia mingo turã tuchi ángeles si co cote.

Mbia que eremii mbae abe ja rerecuarã cote no nda.

Ndechiao rerecuarã tuchi cote.

⁸ Mbae que eremii ja mbia mbaerã nda,

i embesa ji huĩ ñee a. —Mbae rerecuarã ja ra mbia, i mose Dios, mbae ja riĩ ño ñee nguiã. Mbae mbia cheẽ mumbate raque quia ã. ⁹ Jesús mii ndese chõ nandeico nguiã mae ã. Ae je Dios mbae rasi saanguquia tuchi nae. Ae que ererecua eã tuchi ángeles si aque mose ra. Dios que mbia mingo bei sete ra. Nyebe “emano mbia riĩ” i nguiã Jesús je. Emanonde que Dios emii mbia rerecuarã tuchi cote ra. ¹⁰ Dios que mbae chao ja tuchi umbaerã nda. Nyebe mbae rasi raanguquia tuchi nguiã Jesús je cote. Mbia tubiriã mingo bei sacua ño ùquĩ nde. Jesús mbae rasi raã mose, ererecua turã tuchi sacua ño ùquĩ nde.

¹¹ Jesús que nandembitirõ uturã na sí ra. Nyebe eru riqui nguiã nanderu ja co cote. Nyebe Jesús riqui nguiã “senongue” i ireĩ ngũíã nande je. ¹² Sã Jesús cheẽ ñi embesa ji rese a no: Paba ibatenda tasenei senongue je.

Senongue rese tairasei rasei ee, i que Jesús cheẽ mbesa ji huĩ nda.

¹³ Dios taicua tuchi, i abe que Jesús cheẽ huĩ nda.

A aico seriirĩ Dios chimondo rese a, i abe que Jesús cheẽ huĩ nda.

¹⁴ Mbiate quiatu ngue nande re. Nyebe Jesús abe mbiarã no nde. Mano sacua nande je. Mano mose nande je que diablo quirãcuã mbutiã cote ra. Diablo quiarei equirãcuã tuchi aba iquia sacua. ¹⁵ Ae siquiche beite quia umano si nae, mbae icua nimba raanguia chõ ùquĩ nde. Ûquĩ siquiche eã sacua ño ngue Jesús mano nguiã. ¹⁶ Angel sacua eã ngue

Jesús ru ra. Mbiarã ño ngue eru nguiã. Judiorã ño ngue eru nguiã. Mbia mbitirõ sacua. ¹⁷ Nyebe Jesús ru nguiã mbiarã nande rã. Ñee turã sacua Dios je nande riĩ. Dios nandembasi eã sacua nandeicuã nii. Jesús siqui mose mbiarã ngue mano mbia icua nii nda. Mbia icua mbutiã sacua esi. ¹⁸ Mbae icua ngue tã i tuchi rei Jesús je ra. Nyebe ra eriqui tuchi nanderese uquirãcuã mee nande je, mbae icua tã i mose nande je.

3

Jesús quia rei i tuchi Moisés si

¹ Seresenda, Dios que jemii icúe umbaerã tuchi ra. Nyebe aico nguiã ñee tuchi Jesucristo riĩ jêje co. Secheẽ ndese jenyiisaquia tuchi quiatu quia. Jesucristo rei nandererecua tuchi cote. Sacerdote rerecua rã tuchi nande je cote. ² Jesucristo que Dios cheẽ mumbayã tuchi quia mbae raã ja echeẽ nguire ra. Sã Moisés abe mbae raã ja Dios cheẽ nguire no. ³ Jesús quia rei i tuchi Moisés si. Ae que Moisés chao ra. Sã emo ndiqui tuchua ao no. Tuchua aosa quia rei i tuchi tuchua uchiao si. ⁴ Mbia mo tuchua chao arondete raque. Dios mii nguia rei mbae ao ja tuchi. ⁵ Moisés que Dios cheẽ mumba eãte rei quia ra. Erimbachõ ño ngue ae ra. —Ã nda Dios saã je mbia je, i chõ ngue Moisés quia ra. ⁶ Cristo quia rei i tuchi Moisés si. Ae quia rei Dios riirĩ tuchi. Dios chuchua rerecua tuchi chõ ae re. Nande rei Dios chuchua. Ae quia siqui nguiã nandechiangui re co. Nandeico bei mose ndua erese. Nandeya bei nandeico mose abe erese.

Dios quiato ra uquenea ucua nyo i Dios récuã

⁷ Jesús quia i tuchi re. Nyebe Espiritu Turã ndiqui nguiã ñee nande je ã:

Dios cheẽ jeñandu rã namo.

⁸ Jeñia átãte ra jêingochĩ jê.

Sã cose ndare chiã átã mbeite riqui Dios cheẽ andu sereã turúquiaa eico mose no.

Ūquĩ icuãte que eriqui Dios je ra.

Dios que ñimbirãcuã ñote quia ee ra.

⁹ Dios que siqui minguete quia ũquĩ mbia je ra.

Cuarenta años chee que ra.

Mbia mae sayã ngue esaã saã mbei quia ee ra.

“Ma Dios siqui minguete nande je”,
i rei que mbia jenamei nguia cose ra.

¹⁰ Nyebe Dios paama i nguia ñee ee.

“Siqui icuã mbeite equia uchiangui re ã. Siqui sereãte equia seicha rui ã.

¹¹ Aico paama ite ee co.

Uquenea nda eucua eã mbei nyoĩ serécuaa”, i tuchi que Dios eriĩ nda,

i que Espíritu Turã ñee embesa ji huĩ nda. ¹² Cochee chõ jëingo, Seresenda. Jëicha eã sacua Dios reco si jeñiangui re. Dios jëicua bei sacua jeñiangui re no. ¹³—Nandeico i i tuchi quiatu quia Dios rese, jenyee jenyee bei quiatu quia jenyue. Jendeco mose íbii. I nda mbae icuã jembũrĩ irĩ eã. I nda jëteã teã eã Dios chee je no. ¹⁴ Sã nande Cristo nandeicua raque nyii no, eĩ nande bei chõ nguia eicua i i. Ūquĩ mose ra Cristo resenda tuchi nande cote. ¹⁵ Sã embesa ji riqui ñee ã no:

Dios chee jeñandu rã namo.

Jeñia ãtãte ra jëingochĩ jë.

Sã cose ndare chiã ãtã mbeite riqui Dios chee andu sereã turúquiaa eico mose no,

i que embesa ji ra. ¹⁶ ¿Aba chõ Dios chee ñandu sereã eandure cose chã? Ae Moisés querao Egipto si nae, ũquĩ ño ngue resẽ. ¹⁷ ¿Aba je chõ Dios paama i cuarenta años cose chã? Ae mbae icuã saã saã nae, ũquĩ ño ngue resẽ. Nyebe mano mano nguia turúquiaa. ¹⁸ ¿Aba je chõ Dios ñee tuchi chã? —Jenguenea nda jëucuyã mbei oso serécuaa, i chã. Ae echeẽ mumba quia nae, ũquĩ je chõ ngue re.

¹⁹ Nyebe ngasẽ eã nguia Dios récuua. Dios icua eãte quiatu ngue re.

4

¹ —Ae seicua quia nae, ũquĩ nda nyoĩ serécuaa, i chõte Dios quia nande je co. Nyebe nandeico cochee. Cochee jëingo eã mose, jemo jengasẽ eã arõte Dios récuua. ² Nande abe je chõ Dios riqui nguia ñee co. —Ae seicua quia nae, ũquĩ nda nyoĩ serécuaa, i. Moisés reco mosenda achõ je eã ño ngue ñee nguia. Ūquĩ ngue Dios chandu iru chooño nda. Dios icua rocoĩ. ³ Ae Dios icua quia nae, ũquĩ achõ ño nda nyoĩ ngasẽ Dios récuua. Uquenea ucua sacua huee. Dios que ñee tuchi ucheẽ andu sereãsa je cose ra:

Aico paama ite ee co.

Uqueneã nda eucua eã mbei nyoĩ serécuaa,

i que ra. —Ma siqui serese, i bei rei que equia eraarõ arõ nda. Ibi ao mosenda bei. ⁴ ã mbesa ji que chí nda:

Dios mbae ao jare que uqueneã ucua séptimo día ra,

i que embesa ji ra. ⁵ ã abe que chí embesa ji rese ra:

Uquenea nda eucua eã mbei nyoĩ serécuaa, i que embesa ji huĩ no nda. ⁶ Emo emo abe ra Dios icua. Siqui sacua erécuaa. Ae Dios chee ñandu nyii nae, ũquĩ ngue Dios icua eãte ra. Nyebe ngasẽ eãte nguia Dios récuua. Dios chee nguia tu ngue emumbate nguia. ⁷ Nyebe Dios riqui nguia ñee nande je quiatu co. Nandeico sacua erese namo. Ūquĩ echeẽ mumbare nyii. Sã David Dios chee mbesa no:

Dios chee jeñandu rã namo.

Jeñia ãtãte ra jëingochĩ, i que Dios ra, i que David embesa ra. ⁸ Josué que mbia isrealitas mii aroneate Dios récuua ra. Uqueneã ucua sacua. I nda Dios ñee ãte rei. —Taemingo serécuaa jenguenea ucua sacua, i ãte rei. ⁹ Nyebe ra Dios quiato nyoĩ ngasẽ Dios récuua. Huee ra uqueneã ucua tuchi huee cote. ¹⁰ Ae ra ngasẽ Dios récuua nae, ũquĩ nda uqueneã ucua

tuchi. Sã Dios uqueneã ucua tuchi mbae ao jare no.

¹¹ Nandechimbirãcuã tuchi oso nonde Dios récuã. Nandequenea ucua sacua. Ae Dios icuayãte quia cose nae, ùquĩ na nda nandecoche nande mo namo jẽ. ¹² Dios cheẽ nguia rei ereco tuchi. Equirãcuã tuchi. Ique tuchi aba chiangui re. Sã tiquise rimbe riqui ique chõte oso no. Eĩ si chõ Dios cheẽ nde. Ique tuchi aba ndua nduasa rĩ. Aba ndua nduasa mbuchecua tuchi aba je. Aba chiosei oseĩ abe mbuchecua tuchi aba je no. ¹³ Mbae mo ndese Dios riqui jirandu eã eãte co. Mbae mo nandesã nyecuayã cuayã aroneate quia esi ã.

Jesús ñee turã mbei Dios je nande rĩ

¹⁴ Jesús rei Dios riirĩ tuchi. Sacerdote rerecua tuchi chõ eriqui nguia nande je co. Oso que ibate Dios rea ñee ñee sacua nanderĩ nda. Eriqui ñee ñee mbei Dios je nanderĩ co. Nyebe nandeco tuchi quiatu quia erese. ¹⁵ Diablo tã i mose nande je, Jesús riqui ico tochi tuchi nande je co. Ae rane je quiatu ngue diablo tã i tuchi nguia nyii. “Ma Jesús mbae icuã naa” i nguia. Mbae icuã ngue Jesús saã eã mbei chõ nda. ¹⁶ Nyebe nandesiquicheã nguia quia Dios rĩchã. Nyesequate quiatu nguia nanderese co. Nandesiquicheã nguia quia ñee ñee ee. Eya eã sacua nanderese. Uquirãcuã mee sacua nande je, diablo tã i mose nande je.

5

¹ Sacerdote rerecua judío mbae rei mbia chõ. Ae chõ ñee turã mbei nguia mbia rĩ Dios je. Ae chõ mbae quishĩ ji mondo mondo nguia Dios je. Dios mbia chisaã saã icuã mbutiã sacua esi. ² Sã sacerdote rerecua abe riqui mbia nande rã si no. Nyebe eriqui nguia siqui tochte mbia quirãcuã nea je. Mbã aquiatuã je abe. Mbã icha icha je abe no. ³ Sã sacerdote abe riqui Dios cheẽ mumba no. Sã eriqui mbae quishĩ ji mondo mondo Dios je

no. Dios eicuã mbutiã sacua esi. Mbã chisaã icuã abe mbutiã sacua esi no. ⁴ “Sacerdote rerecua se” i aroneate emo, Dios eirabo eã mose. Dios ae que sacerdote mĩ mĩ nda. Sã Aarón mĩ cose no. ⁵ Eĩ si que Cristo ra. “Sacerdote rerecua se” iã ngue ae ae ra. Dios quiatu ngue emĩ nguia. Sã Dios cheẽ mbesa ji riqui ñee no: Seririĩ ño nde re.

Ndere co que amee ndeje ra, sã Dios i ñee ee no. ⁶ Sã embesa ji mo ndiqui ñee no:

Sacerdote bei rei nde.

Melquisedec na tuchi ereico nde co, sã embesa ji riqui i no. ⁷ Jesús siqui mose a íbii, eya eã tuchi que emo mose ra. Ñee tuchi que Dios je aque mose ra. Nyeseo tuchi que equia Dios je ra. Dios emano ndiquisã sacua esi. Dios que echeẽ ñandu ra. Jesús quiatu que Dios cheẽ mumba sereã mbeite quia ra. ⁸ Dios riirĩte raque Cristo. Mbae rasi que esaã tuchi ra. Ñimbaaquiatu chõ ngue equia ùquĩ ndese Dios cheẽ mumbayã nda. ⁹ Jesús que Dios cheẽ mumbayã tuchi mbae rasi raã tuchi ra. Aquere Jesús riqui mbã mingo bei co. Ae echeẽ mumbayã nguia nae, ùquĩ emingo bei quia co. ¹⁰ Dios quiatu ngue emĩ nguia sacerdote rerecuarã. Melquisedec na si no.

Jẽimbaaquiatuã mbei chõchĩ equia Cristo rese ã

¹¹ —Mbae tasenei tuchi Jesucristo rĩ jẽje, ae rei que se ra. Jẽ nguia secheẽ jeñandu sereãte nguia. Nyebe aico nguia embiasa asa aroneate jẽje co. ¹² Cosete que jẽingo rei Jesús icua resẽ. ¿Mbaerã jẽingo ñimbaaquiatuã mbeite re? † nguia nda jẽingo nguia emo mbaaquiatu quiatu chã. Jẽaquiatuã mbei chõchĩ. Dios cheẽ aba chũcua jẽicuayã mbei chõchĩ. Áquẽ na ño jẽingochĩ ã. Sã ãquẽ ndiqui usi quiandi achõ mbei no. Soo quiatu eu aroneate nguia. ¹³ Áquẽ na jẽingo bei mose, jẽaquiatuãte siqui mbae turã ndese. ¹⁴ Ae ñimbaaquiatu quiatu tuchi quia Cristo rĩ nae, ùquĩ nguia

rei mbae turã icua tuchi, mbae icuã icua rocoĩ. Mbia cuasu rã ño ùquĩ nde.

6

¹⁻² Ae rese jeñimbaaquiatu nyii nae, aba chĩcuate ùquĩ. Ùquĩ mĩite rese jẽingochĩ nguiã. Mbae aba chĩcuayã mo abe jẽicua jiri Jesús rĩĩ ae. Ñ aba chĩcua que asenei ja jẽje nyii ra: —Jenyisaã mbae icuã si jẽhui, ae que jẽje nyii ra. —Dios jẽicua, ae que jẽje nyii no nda. Bautismo abe que asenei jẽje nyii ra. —Jẽo jeñono Jesús quiato arõ, ae que jẽje nyii no nda. —Mbia raque ra quera si, ae que jẽje nyii ra. —Mbia Dios quiatoã nda mbae rasi saã tuchi tata cuásuu, ae que jẽje nyii no nda. ³ Ùquĩ aba chĩcuate riqui ã ndesẽ. Aba chĩcuayã tasenei jẽje cote, Dios “eno” i mose. ⁴ Emo emo ngue siqui rei Dios quiatorã nyii ra. Dios chĩmee icua raque nyii. Espiritu Turã abe icua raque nyii no. ⁵ Dios cheẽ turã abe icua raque nyii. Dios quirãcuã abe icua raque nyii no. ⁶ Ùquĩ hui mose Dios si, uba si aroneate erese cote. Jesús mbucha si chõ nguiã ira rese ùquĩ. Iquia iquia chõ nguiã Jesús je mbia résaa ùquĩ. ⁷ Sã Dios riqui ama mbuchaaqui ibi ja rese no. Eĩ si chõ ndaque equia ucheẽ mbuchecua raque mbia ja je co no. Sã mbia riqui mbae tiquia ibi ia mose no. Suri turã mose, echa iate ra cote. ⁸ Ñui achõ suri mose huee, eicuãte ùquĩ. Eĩ si chõ mbia Dios cheẽ andu chooñosa no nde. Eicuãte ùquĩ. Ùquĩ nda Dios mombo chõ tata cuásuu.

Dios ra ucheẽ mbuchebiã mbeĩ

⁹ Jeniĩ aico nguiã ñee eã, Sere-senda. Dios cheẽ jeñandu chooño eã nguia jẽ ndeae. Jesús jẽicuate quia ùquĩ. Nyebe jẽingo tuchi quia erese ùquĩ ndeae. ¹⁰ Dios turãte eriqui co. Tesareiaã nda jenyisaã turã si. Jendua ndua mose Dios quiato ataque rese. Mbae jemondo mondo mose ee. Mbae jemondo mondo bei quia ee ùquĩ. ¹¹ Eĩ jenyee bei quiatu equia nyesecua bei emo ndese. Ñ nda Dios

mbae mee tuchi je jẽje. ¹² Jeñimbirãtã mbei chõ nguia mbae raã jẽ. Sã Dios quiato cose ndare no. Sã eriqui Dios icua tuchi no. Sã siqui mingue tuchi ee no. Nyebe Dios ucheẽ mbuchebi jiri jiriã tuchi nguiã ee. Eriqui beite mbae mee mee ee co.

¹³⁻¹⁴ Sã Dios ñee Abraham je cose no: —Taico turã mbei ndeje. Ndeririĩ nducucha tubiriã ndae, sã i Dios Abraham je no. Ùquĩ mose que Dios jurar i umbae nombre rĩĩ nda. ¹⁵ —Dios ra seriirina mee seje ucheẽ nguire, i que Abraham nguia eraarõ arõ mingue ra. Dios que eriiriĩ mondo chee ee ucheẽ nguire cote ra. ¹⁶ Mbia jurar i mose, Dios rĩĩ ño eriqui nguiã jurar i. —Ùquĩ nda asaã eã, i aroneate cote, jurar ire nyii. ¹⁷ —Nderiiriĩ nducucha tubiriã nda ambu, i mose Dios Abraham je, jurar i que ee aque mose ra. ¿Mbaerã ño jurar i chã? —Dios ra ucheẽ mbuchebiã, i sacua mbia chõ ñene. —Dios ra ucheẽ nyabi i eã, nande i sacua ño ñene. ¹⁸ Dios “mbae tasaã jẽje” i mose, ñee ñooñoa ño ñene. Dios jurar i mose, jurar i chooñoa ño eno nde. Nyebe eriqui nguiã nanderarõ turãte nandeso mose erichã. —Taemingo bei, i mose Dios nande je, ucheẽ nda embuchebiã. ¹⁹ —Dios ra semingo bei ibate ucheẽ nguire, nande equia ã. Nande ùquĩ icua mose, nandequirãcuãte ra cote. Dios ra nandemingo tuchi uchiese cote. Sã sacerdote si quia Lugar Santísimo Dios rĩichã sacua no. Eĩ nande chõ nguia nande abe Dios rĩichã, nande eicua mose. ²⁰ Jesús rane ngue oso ibate ñeenda mombe nande je ra. Pe eriqui ñee turã mbei Dios je nanderiĩ pe. Sã sacerdote riqui ñee turã mbei Dios je mbia rĩĩ no. Sacerdote rerecua tuchi chõ Jesús nande je re. Melquisedec na si tuchi Jesús riqui co.

7

Jesús i tuchi sacerdotes ataque si

¹ Melquisedec ndei Salem jenda rerecua. Dios mbae sacerdote abe que ae ra. Abraham tu mose mbia rerecua iquia iquiare, Melquisedec

que esobeishĩ oso ra. Melquisedec que bendecir i ee ra. ² Abraham ngue el décimo mee Melquisedec je ra. “Ererecua Turã” i chõ nguiã “Melquisedec” i mose. “Mbia mingo turãsa nyiese” i abe chõ nguiã “Melquisedec” i mose no. “Mbia siqui turã nyiese” i chõ nguiã “Salem” i mose no. ³ Melquisedec si eãte que ra. Eru eã abe no. Eramei mo eã abe no. Mano eã mbei que ra. Nyebe eriqui nguiã Jesucristo rã mbei co. Sã Jesucristo riqui beite sacerdoterã co no.

⁴ Melquisedec quia rei i tuchi Abraham si. Abraham quiatu ngue el décimo mee nguiã ee. Ae emee ee décimo sacuaã nda. ⁵ Abraham ndesenda eã ndaque Melquisedec. Aquere que Dios ñee judíos je ra. —El décimo jemee mee ño nguia sacerdote jendesenda je, i que Dios judíos je ra. Judíos que emee mee sacerdotes je ra. Leví riirĩ ndaque sacerdotes. Judíos sí raque sacerdotes. Abraham ndiirĩ ja raque judíos no. ⁶ Melquisedec que el décimo isi Abraham si ra. Leví riirĩ eã ndaque Melquisedec. —Judíos i tuchi ra nde, i raque Dios Abraham je. Nyebe que Melquisedec bendecir i Abraham je ra. ⁷ Ae bendecir i nae, aque quia rei i tuchi bendecir i ji si. ⁸ Ae mbia décimo isi isi quia uataque si ã nae, mbiachõ ño ãquĩ nde. ãquĩ mano arondete. Melquisedec quiatu que mano eã mbei ra. ⁹ Abraham décimo mee mose Melquisedec je, erucucha riirĩ décimo mee naanguia chõ ngue ee re. Leví décimo mee naanguia chõ ngue ee re. Sacerdotes Leví riirĩ décimo mee naanguia chõ ngue ee re. ãquĩ décimo isi isi raque nguesenda si. ¹⁰ Abraham ngue ãquĩ i ja ra. Eriiriã ndaque nyii, décimo mee mose Melquisedec je.

¹¹ Sacerdotes riqui mose que Dios ucheẽ mondo rei judíos je ra. Sacerdotes mbia mingo turã aroneate Dios rese. † nda Jesús tu ãte rei. Ae quia ñi tu nguiã sacerdote bei nonde cote. Melquisedec na sí. Aarón na eã. ¹² —Sacerdotes ra nyuuru uru

eã ngõngue rendaque re cote, i que Dios aque mose cote ra. —Jesús mii nda siqui sacerdoterã mbei cote, i que Dios cote ra. ¹³⁻¹⁴ Leví riirĩ nducucha eã ndaque Jesús. Judá riirĩ nducucha raque quia ñene. Judá riirĩ nducucha mo siquiã ndaque sacerdoterã cose. —ãquĩ mo sacerdoterã aroneate, i rei que Moisés nyii ra.

¹⁵ Sacerdotes cose ndare rã eã ño Dios Jesús mii nguiã sacerdoterã cote. Jesús quia ra siqui bei sacerdoterã. Melquisedec na si ra eriqui bei.

¹⁶ Moisés chimbesa rui si eã ño Jesús riqui nguiã sacerdoterã co. Leví riirĩ nducucha eã ño ae re. Ae quiatu siqui beite nguiã co. Nyebe eriqui nguiã sacerdote beite co. ¹⁷ Sã Dios ñee ee embesa ji rese no:

Nde quiatu ereico bei nguiã sacerdoterã mbei co.

Melquisedec na si, sã Dios i ñee ee no. ¹⁸ —Sacerdotes ra nyuuru uru eã ngõngue rendaque re cote, i que Dios aque mose cote ra. ãquĩ nguiatu ngue mbia mingo aroneate nguiã Dios rese. ¹⁹ Moisés chimbesa quia mbia mingo aroneate nguiã Dios rese. Ae rese nandeico quia namo co cote, aque quia aba mingo arondete nguiã Dios rese co cote. ²⁰⁻²¹ —Sacerdoterã nde, i mose emo je nyii, emo ngue jurar i ãte quia ra. Dios Jesús mii mose sacerdoterã, jurar i que aque mose cote ra. Sã embesa ji riqui no:

Dios que jurar i ra. Ucheẽ nda embuchebiã mbei.

“Nde quiatu ereico bei nguiã sacerdoterã mbei co.

Melquisedec na si”, i que Dios cheẽ huĩ embesa ji rese ra.

²² Ae contrato Dios saã mbia je nyii nae, ãquĩ contrato que mbia mingo eã Dios rese ra. Ae contrato Dios saã Jesús rii namo nae, ãquĩ nguia rei eturã tuchi nande je namo cote.

²³ Sacerdote ñiinda atate que eriqui nyii ra. Nyuuru uru que equia ngõngue mano mose ra. ²⁴ Jesús quia siqui nguiã sacerdoterã mbei co cote. Emo nda chí eã mbei euru erendaque

re emo mose cote. ²⁵ Ae ra Dios siichã Jesús rĩ nae, ũquí nda Jesús mingo bei tuchi. Jesús quia siqui beite nguiã co, ñee turã sacua Dios je ũquí nĩ.

²⁶ Ae chõ sacerdote turã tuchi riqui nguiã nande je co cote. Dios rã tuchite quia ae re. Eicuã jiri jiriãte quia ñene. Mbae turã achõ ndese chõ eriqui nguiã. Mbae icuã ngue embicuã aronea tuchi quia ra. Ae quia iba-tenda rerecua tuchi riqui nguiã namo co. ²⁷ Jesús quia rei sacerdote rerecua ataque rã eã tuchi. ũquí nguiatu ticuas quishĩ quishĩ mbeite nguiã sacrificio raã naa. Dios eicuã mbutiã sacua esi. Mbia abe icuã mbutiã sacua esi. Jesús quiatu ngue ticuas mo quishĩ eãte nguiã sacrificio raã emo mose. Ae sí chõ ngue mano nguiã sacrificio raã sacua. Mbia icuã mbutiã ja sacua ño ngue mano nguiã aque mose. ²⁸ Mbiachõ ño ngue sacerdote rerecua ja ñiinda ra. ũquí ngue mbae turã saã mbei aroneate quia ra. Dios quiatu que Jesús mĩ sacerdoterã mbei cote ra. Ae quia mbae icuã saã jiri jiriã tuchi nguiã.

8

Dios contrato yasu saã Jesús rĩ

¹ Ababi tuchi quia rei Jesús siqui mose sacerdoterã. Sacerdote turã tuchi quia rei ae nande je. Hue eñi ngoi Dios Ibatenda ribisho quitinande je huee. ² Hue eriqui mbae raã naa Dio s chuchua ibatendaa huee. Dios ae chisaã tuchi chõ hue tuchia re. Mbia mo nyisaã eã ño ñene. Nyebe Dios chuchua tuchi chõ hue re. ³ Sacerdote rerecua ja chõ sacrificio raã naa sacua nde. Nyebe Cristo abe sacrificio saã nguiã umano mose. ⁴ Ae sacrificio Cristo saã nae, ũquí nguia eturã tuchi sacerdote chisaã si re. Cristo siqui mose ibii, eĩ nda sacerdote eãte rei ae. Moisés chimbesa cheẽ ndui achõ ño sacerdotes ibi jenda riqui nguiã sacrificio raã naa ã. ⁵ Ae sacerdotes ibi jenda saã saã nguia mbae nae, ibei jenda rese aba mundua sacua ño ñene. Sã Dios ñee Moisés je Dios chuchua ao

nonde no. —Ndeico mose ibi ibátee que sechuchua ibei jenda atecuquia ndeje, ũquí na si chõ sechucharã ibi jenda esaã, i que Dios ñee Moisés je ra. ⁶ Ae contrato Dios saã mbae je nyii nae, mbaranquiataate que ũquí nda. Ae contrato Dios saã nande je namo Jesús rĩ nae, eturã tuchi chõ ũquí cote re. —Ã tasaã jėje. ã abe tasaã jėje no, i tuchi Dios quia contrato namonda rĩ nande je co. ⁷ Contrato ñiinda mbae mingo bei mose Dios rese, ñi nda contrato yasu raã eãte rei nande je. ⁸ Dios ia eãte que eriqui mbae aque mosenda rese ra. Sã embesa ji riqui no:

Ã ño ngue Dios ñee nguiã: Contrato yasu ra asaã je Israel jenda je.

Judá jenda je abe no.

⁹ Contrato asaã nguia ũquí namei je nyii nae, ũquí contrato rã eã nda eyasu asaã cote.

Mbia arao quia Egipto si nae, ũquí mosenda rã eã nda contrato asaã je mbae namondo je.

Mbia cose ndare chõ ngue contrato saã iru seje resẽ.

Contrato raande que secheẽ mumba mumba chõ nda.

Nyebe ũquí asecha chõ nguiã, i que Dios ra.

¹⁰ Ae contrato ra asaã je Israel jenda je, ã ndei eã:

Secheẽ nda amii tuchi eãquĩ ndese.

Secheẽ nda amondo tuchi echianguire.

Se ra ererecua turã tuchi ee.

Serimba tuchi ra ũquí.

¹¹ Seicua ja tuchi rae. Mbae cuasu ja.

Eñetẽ abe ja chee.

Seicua ja mose, ũquí mose emo uataque mbaaquiato quiatu aroneate serĩ cote.

Seicua ja tuchi quiatu ra aque mose.

¹² ũquí icuã nda ambutiã ja esi.

Atesarei bei ra eicuã si,

i que Dios cheẽ huĩ embesa ji rese ra.

¹³ —Contrato yasu tasaã, i que Dios cote ra. Contrato ñiinda imate quiatu ngue ee re. Mbae ima nda ua ja cote.

9

Cristo rei sacerdote tuchi cote; sacerdotes ñiinda raã eã

¹ —Eĩ jenye jenye bei chõ nguia mbae raã naa mose sechuchuaa, i que Dios sacerdote je ra. Contrato ñiinda raã mose. Uchuchua ibi jenda rĩ ño eriqui nguiã ñee, “sechuchua” i mose. ² Dios chuchua que cuartos nyeremo ñi nda. Eiquesa jii que cuarto nongue ñi nda. Lugar Santo, i que hue cuarto je ra. Candelero oro ao ji que chí huee ra. Mesa abe que chí huee ra. Mbichae Dios chuchua jenda abe que chi huee no nda. ³ Cortina mbucheseco ji que siqui tuchua ite rĩ nda. Aque quitera quititi que cuarto nongue ñi nda. Lugar Santísimo, i que hue cuarto je ra. ⁴ Huee que altar mo ñi oro ao ji ra. Mbae shimbu turã ndei sacuaã. Ira ao ji mbae riru mo abe que chí huee ra. Oro quititi ji resebe que ra. Contrato Dios cheẽ mbesa ji que chí aque mbae riru imi ye ra. Oro ao ji ñio abe que chí mbae riru imi ye ra. Mbichae resebe que eñi nda. Maná i equia ee. Aarón chitochoquia ruri abe que chí mbae riru imi ye no nda. ⁵ Angeles raanguia ao ji que chi ibate mbae riru arõ nda. Querubines, i que ũquĩ je ra. Ujeo que embiitee u mbae riru arõ nda. Sacrificio renda rei mbae riru. Ũquĩ cuartos nyeremo jenda asenei ja aroneate jẽje namo.

⁶ Aque mose que sacerdotes riqui ique ique bei cuarto eiquesa ji ra. Mbae raã naa sacuaã Dios je. ⁷ Cuarto cortina quitera quitinda quiarei mbia mo ique aronea tuchi. Sacerdote rerecua mĩ ño ngue i que quia huee ra. Ique chĩbe ibeã ngue equia huee ra. Una vez al año ño ngue eriqui ique huee ra. Mbae ruqui que esii sii quia huĩque mose huee ra. Dios eĩcuã mbutiã sacuaã. Mbia icuaã abe mbutiã sacuaã. ⁸ Aque mose bei que mbia mo ndiqui ique aroneate Lugar Santísimo nda. Dios rĩchã tuchi sacuaã. Ũquĩ ndese Espíritu Turã ndiqui urembiirandute

ã. ⁹ Sacerdotes que ticuasú iquia iquia tuchi rei quia aque mose ra. Ũquĩ ngue mbia chiã mbitirõ eã mbei chõ nda. Mbia mundua ndua sacuaã Cristo ruqui rese chõ ngue ũquĩ nda. Ũquĩ nandeicuate quia ã cote. ¹⁰ Contrato ñiinda que mbia mingo turã aroneate quia ra. Mbae rĩ achõ ño ngue eriqui nguiã ñee. Mbaeia rĩ. Mbia chiũ rĩ. Mbia chimbei rĩ. Mbia choita rĩ. Ũquĩ nĩ ja. Ũquĩ ñee ndui sí chõ ngue mbia riqui rei nguiã nyii. Cristo tu nonde.

¹¹ Cristo tu mose que contrato ñiinda mbutiã ja cote ra. Contrato yasu que esaã nande je cote ra. Ae mĩ ño sacerdote namo cote re. Dios chuchua ibi jenda jie eriqui eã ndaque aa. Ibatenda ye chõ eriqui nguiã mbae raã naa nande je pe. ¹² Cristo quiatu ngue ticuasú ruqui sii sii eã u nguiã nande je. Chivo ruqui abe. Nguqui ae je chõ ngue nandeicuaã mbutiã nguiã. Mano mĩ ngue mbia ja je ra. Mbia mingo bei sacuaã cote. ¹³ Ticuasú ruqui que mbia mbitirõ tirõ ndei quia sacerdote je ra. Chivo ruqui abe. Ticuasú riirĩ ndaque rei ji cusubu abe no. ¹⁴ Cristo ruqui quia rei equirãcuã tuchi ũquĩ mbae ruqui si. Cristo ruqui mĩ nguia rei nandendua nduasa mbitirõ tuchi. Ae ruqui mĩ nguia rei nandemingo turã Dios reco rese. —Se ae tamano mbia icuaã mbitirõ sacuaã. Mbia mbae turã naa naa sacuaã Dios je cote, i que Cristo mano nda. Mbae icuaã mo ngue esaã jiri jiriã tuchi ra. Espíritu Turã ngue siqui tuchi erese emano mose ra.

¹⁵ Cristo que contrato yasu saã nande je cote ra. Dios chiirabo erĩchã tuchi sacuaã cote. Dios chiirabo siqui tuchi sacuaã erese Dios cheẽ nguire. Sã Dios ñee ee nyii no. —Jẽingo bei ra serese, i ee no. Ae je Dios contrato saã ndei quia nyii nae, ũquĩ icuaã nĩ ngue Cristo mano nda. ¹⁶ Ae contrato Cristo saã nande je nae, testamento chõ ũquĩ nde. Sã emo testamento mbesa no. Testamento raãsa mano mose, aque ramo mose

chõ testamento valer i nguiã cote. ¹⁷ Testamento raãsa manoa mose, testamento chõño ño aque mose re. ¹⁸ Dios contrato ñiinda raã namo mose que ticuasú iquia uquia mbia je ra. ¹⁹ Moisés contrato ñiinda raã mose, Dios cheẽ ngue embuchecua ja mbia je ra. Aquere que ticuasú ruqui isi chivo ruqui rese ra. I je que emombara ra. Eruqui je que Dios cheẽ mbesa ji rii rii cote ra. Mbia ja abe rii rii que ra. Mbae ribichu mbia ji je chõ ngue erii rii nguiã. Ovejara ireĩ je. Ira rãquiã ñetẽ je abe no. ²⁰ Aquere que Moisés ñee mbia je ra. —Ã mbae ruqui ã ndesẽ. Ticuasú que mano nda. Mbae ruqui rei Dios mbae testamento valer i sacua jẽje, i que Moisés ñee mbia je erii rii cote ra. ²¹ Aquere que Dios chuchua abe rii rii cote ra. Dios chuchua teiqui renda abe que esii sii no nda. ²² Contrato ñiinda mose, mbae ruqui achõ je chõ ngue Dios riqui nguiã mbia icua mbutiã esi. Dios que mbia icua mbutiã choño eã nda. Mbae quishĩ mose bei quiatu ngue eriqui nguiã mbia icua mbutiã mbei esi.

Cristo m̃i aba icua mbutiã

²³ Dios chuchua ibi jenda quia rei echuchua ibatenda raanguia. Ibatenda quia rei eturã tuchi ibi jenda si. Ibi jenda que Moisés sii sii mbae ruqui je embitirõ sacua nda. Ibatenda quiatu que embitirõ eã mbae ruqui je ra. Cristo ruqui m̃i je quiatu que ra. ²⁴ Dios chuchua ibi jenda que Cristo iqueã oso quera si mose ra. Dios chuchua ibatenda quiatu ngue esi nguiã ique cote. Hue eriqui ñee turã mbei Dios je nanderĩ huee. ²⁵ Sacerdote ique ique beite quia Lugar Santísimo co. Una vez al año ño eriqui nguiã ique ique bei huee. Mbae rii rii sacua mbae ruqui je. Nguqui j e eã ño ñene. Cristo quiatu que mano m̃i nda. Nguqui que eichusẽ tuchi nande je ra. ²⁶ Cristo que tu m̃i ibi ra. Mano m̃i sacua nande je. Nandeicua mbutiã sacua. Mbae ua serĩ mose que eru mano aa

ra. Mano nyibeĩ ibei eã equia co. ²⁷ Sã mbia riqui mano m̃i no. Sã Dios riqui ecuata mee aquere no. ²⁸ Eĩ si que Cristo mano aque m̃i no nda. Mbia icua ja mbutiã sacua esi. Cristo ra tu si ibii emo mose. Aquere mose ra manoa mbia icua ndiquicharõ cote. Uquiato mingo bei sacua nguiatu ra eru. Ae esaarõ arõ nguiã nae, ũquĩ mingo bei sacua.

10

¹ Moisés chimbesa que mbia mingo turã eã ndaque ra. Mbia mundua ndua sacua Dios rii rii mano ndese chõ ngue re. Ticuasú mbia quishĩ nyibeĩ ibei rei quia nae, ũquĩ nduqui que mbia mingo turã eã no nda. ² ũquĩ mbia chiã mbitirõ mbei mose, eĩ nda sacerdotes equishĩ nyibeĩ ibei ãte rei. Eĩ nda ticuasú m̃i quishĩ ndei mbia mbitirõ ja sacua. Eĩ nda mbia tesareĩ rei huicua si. ³ Mbia ticuasú quishĩ nyibeĩ ibei mose, ũquĩ ngue embutesareĩate huicua si ra. Munduate quiatu que huicua ndese ra. ⁴ Ticuasú ruqui ra mbia icua mbutiã eã mbei. Chivo ruqui abe no.

⁵ Cristo ruqui m̃i nguiatu mbia icua mbutiã nguiã esi co. Sã Cristo ñee Dios je siqui mose ibii no: Ticuasú ruqui mbia mbitirõ eã mbeite quia ndeje co.

Nyebe que serete ereme seje ra.

Se mano sacua mbia icua ñi.

⁶ Mbae raaque rei ji abe ndebiãte.

Ticuasú mbia quishĩ quishĩ nguia huicua ñi nae, ũquĩ abe ndebiãte no.

⁷ Nyebe ngue acheẽ nguiã ndeje: “Ae ndebite nae, ũquĩ ndese seico sacua ño ngue achu nguiã.

Sã embesa ji riqui ñee serĩ no, ũquĩ ñee nguire que achu ra”, ae que ndeje ra,

i que Cristo ngu je ra. ⁸ Nyebe Dios biãte riqui nguiã sacrificios. Mbia ticuasú quishĩ quishĩ mose huicua ñi. Mbae raaque rei ji abe ebiãte no. —ũquĩ jesaã saã, i raque Moisés chimbesa huĩ. ⁹ —Ae ndebite nae, ũquĩ ndese seico sacua ño ngue achu

nguiã, sã Cristo i Dios je no. Mbia mbui sacua sacrificios raã naa si chõ ngue eru nguiã. Sacrificio mii tuchi que esaã u mano mbia icuaã nii nda. Cristo ruqui mii ño mbia icuaã mbitirõ mbei nguiã co cote. Sacrificio raã i i rocoi. ¹⁰ Ae Dios bite nae, uqui ngue Jesucristo saã tuchi u ra. Mano mose mbia ja icuaã nii. Mano mii tuchi que u ra. Nanderirõ mbei que nandecuã si cote ra. ¹¹ Sacerdotes riqui beite raque Dios chuchua ã. Ticuas equishĩ nyibeibeite raque quia mbia icuaã mbutiã sacuaã ã. Uqui nda mbia icuaã mbutiã eã mbei. ¹² Jesucristo quiatu que mano mii aque mose bei ra. Mbia icuaã ndiquicharõ sacuaã ño ngue re. Aquere eñi ngoi bei Dios ribisho quti nande je hue. ¹³ Pe eñi ngoi beite Dios jii pee. Ererecua tuchi ra Dios rese cote. Uquirãcuã nda eteacuquia tuchi chee uquiatoã je cote. ¹⁴ Sacrificio mii ngue esaã nda. Aque mii sacrificio je que uquiato chiã mbitirõ ja bei ra. ¹⁵ Sã Espiritu Turã abe riqui ñee uqui no:

¹⁶ Ae contrato ra asaã je judíos je nae, ã ndei e ã:

Secheẽ nda amii tuchi echiangui re. Secheẽ nda amii tuchi eãquĩ ndese no.

¹⁷ Atesarei bei ra eicuã si, i que Espiritu Turã nda. ¹⁸ Dios nandecuã mbutiã mose, mbae mo nandequishĩ aroneate quia nandecuã ndiquicharõ ã cote.

Dios nandesichã na

¹⁹ Nande abe quiatu Dios nandesichã tuchi quia cote, Seresenda. Sã sacerdote ique Lugar Santísimo no. Eĩ nande si quiatu quia siquicheã ique Diósa. Jesucristo ruqui rii nandequi Diósa. ²⁰ Cristo rete rei cortina mbucheseco ji rã. Cristo rete mano mose, cortina abe que embui ra. Nyebe nandeco ique arõte Dios rea Lugar Santísimo ã cote. Cose ndare rã eã tuchi chõ cote re. ²¹ Jesucristo mii ndei sacerdote tuchi nande je cote. Dios quiato ja je cote. ²² Diósa ra nandesiquicheã ique oso cote. Nandechiã turã ño nandeco oso

Dios rii chã. —Dios ra nandei turã, nande chõ nguia nandechiangui re. Cristo quiatu ngue nanderii rii nguiã nguqui je nyii. Nandecuã mbutiã sacuaã nande si. I turã je que nanderei ra. ²³ —Taemingo bei, i que Dios nande je ra. Ñeende uqui nda ucheẽ mbuchebiã. Nyebe nandeco quiatu quia ñee: —Dios ra nandemingo bei ucheẽ nguire, i. ²⁴ Sã Cristo mbae raã ja tuchi nande je no. Eĩ nande sí chõ nguia siqui turã nyue. Nandenongue nandembuchesecua turã nguiatu quia nyiese. Mbae turã nandesaã uquia bei quiatu quia nandenongue je. ²⁵ Cristo quiato ñumunua nua mose, nandetesareia mbei quiatu quia ñumunua nua. Sã emo emo ndiqui ñumunua nua eãte no. Cristo nandechosei uquia uquia bei quia nanderesenda je. Achite quiatu Cristo ñi nguiã tu a.

²⁶ —Mbae icuaã tasaã, nande i i mose Jesucristo icuare, emo nda manoa nandecuã ndiquicharõ cote. ²⁷ Uqui mose, mbae icuaã nda nandesaã tuchi. Uqui mose, nandeso chee ra tata cuásuu no. Huee ra Dios ucuãyãsa nyo ja. ²⁸ Sã mbia Moisés cheẽ mumbasa iquia iquia cose no. —Uremae ngue echeẽ mumbasa rese ra, i mose mbia nyeremo, echeẽ mumbasa que mbia iquia cote ra. Mbia que etisu isu eã tuchi eiquia ra. ²⁹ Dios riirĩ ucuãyãsa quia ra mbae rasi saã tuchi uqui si. Cristo ruqui ucuãyãsa abe no. Ae Espiritu Turã isiteã teãte quia nae, uqui abe no. Cristo ruqui je quiatu ngue Dios uqui mii ndei nguiã icue. ³⁰ Sã Dios ñee no: —Se ra mbia icuaã asibishorõ mbae rasi je, sã i no. —Dios sí ra mbae rasi saanguquia ngũimba je, erimba icuaã mose ee, i abe que embesa ji huĩ nda. ³¹ Ae ra Dios mbasi eicuã nii nae, mbasi tochi eã ndae. Aba mbusiquiche tuchi chõ uqui nde.

³² Jẽ Jesucristo icua ramo mose que mbia mbae rasi saanguquia tuchi rei jẽje ra. Jẽingo turã mbei chõ ngue equia Dios rese ra. Jeñimbirãcuã

mingue que equia aque mose ra. Ũquĩ ndese jendua jiri ae. ³³ Mbia que ñee icuã icuã tuchite quia jemo je ra. Mbia que mbae rasi saanguquia tuchi quia jemo je no nda. Mbia tubiriã ndésaa. Jēataque abe ia eã ndasi tuchi que eriqui erese ra. Jēingo tochi tuchi que equia aque mose ra. ³⁴ Jēya eãte que eriqui mbia tarõ ji rese ra. Mbia jembae rirõ ndirõ mose abe chee que jēyate riqui Dios rese ra. Jēirandute quiatu que equia jembae turã ibatenda rese ra. Jembae ibatenda quiatu ra ua eã mbei. ³⁵ Dios jēicua bei quiatu quia aque mosenda rã mbei. Ũquĩ mose ra Dios mbae turã tuchi mee jēje. ³⁶ Ae Dios bite nae, ũquĩ ndese bei chõ jēingo. Ae mbae turã nda Dios mee jēje nae, ũquĩ jēsaarõ arõ mingue chõ nguia cote. ³⁷ Achite Jesucristo ñi tu a. ³⁸ Ae chiã Dios mbitirõ nae, Dios icuate quiatu que equia ra. Nyebe ra siqui bei Dios rese. Ae ra hui Dios si nae, Dios ia eã tuchi ra erese. ³⁹ Nande quia ra nandehui eã mbei esi. Ae ra hui esi nae, ũquĩ nda Dios mbutiã. Nande quiatu Dios nandēicua tuchite nguĩã ã. Nyebe ra nandemingo bei.

11

Ae Dios icua

¹ Emo Dios icua mose, ¿mbae chõ ũquĩ ña? Ae Dios icua nae, ũquĩ nda ñee. —Ucheẽ nguire ra Dios mbae mondo seje, i rae. —Ae asaarõ arõ nguia nae, ũquĩ nda emondo seje ucheẽ nguire no, i ra eno. Mae eã ndaque erese. ² Dios quiato cose ndare que Dios icua tuchi quia ra. Nyebe mbia riqui nguĩã jirandu jate erese. ³ Dios que mbae chao ja cose mbae eã mose ra. Mbae mo je eã ngue mbae ao ra. Ucheẽ achõ je chõ ngue mbae ao ra. Nande Dios icua mose, ã abe nandēicuate quia ã. Nandemae ãte raque erese.

⁴ Abel que Dios icua ra. Nyebe que Dios eisi turã nda. Ofrenda turã ngue emondo Dios je ra. Embae ofrenda que eturã tuchi Caín mbae

si ra. Nyebe Dios embae ofrenda isi turã nguĩã. —Co eturãte riqui seje co, nyebe Dios i nguĩã Abel ñi. Nyebe mbia riqui nguĩã jirandu jate Abel rese. ⁵ Enoc que Dios icua ra. Nyebe Dios ererao nguĩã ibate emano mose rocoĩ. Mbia mbuate que eoreã cote ra. Dios equerao quiatu quia ibate reaẽ. —Co eturãte riqui seje co, i quia Dios quia Enoc ñi nyii reaẽ. ⁶ Emo Dios icua eã mose, ũquĩ nda Dios isi turã eã mbei. —Co Dios reco riqui co, sã i quiatu nyii. —Emo Dios rĩchã mose, Dios turãte ra ee, sã i quiatu no. Aquere quiatu ra Dios eisi turã cote. ⁷ Noé que Dios icua ra. —Ama nda uchi, mbae ati ja chee, i mose Dios, “eno” i que Noé Dios cheẽ mose ra. Mae eã ndaque erese aque mose. Arca que esaã Dios cheẽ nguire ra. Nguirĩ mingue sacua eye. Mbia ataque que Dios icua eãte quia ra. Noé mii ño ngue eicua quia ra. Nyebe Dios Noé isi turã nguĩã.

⁸ Abraham ngue Dios icua ra. Nyebe Dios cheẽ mumbayã nguĩã. Dios que ñee ee ra. —Eso rã a si. Ibi mo tamee ndeje mámbi, i que Dios ee ra. Abraham ngue Dios cheẽ mumbayã oso ra. Ae quitu esi nae, jiranuate raque erese nyii. ⁹ —Ibi mo tamondo ndeje, i Dios quia Abraham je nae, huee que eriqui huee cote ra. Ibimo tuchi que ee hue ra. Tei ñetē quire chõ ngue eriqui riqui bei huee ra. Nguirĩ ndese. Isaac. Jacob abe no. Ũquĩ je abe que Dios ñee nda. —A ibi tamondo jē abe je, i. ¹⁰ Abraham quiatu que Dios icua tuchi quia ra. Nyebe ñee nguĩã. —Aico chee ra sucha tubiriã túraã. Hue ra ua eã mbei, i que Abraham ndua ndua Dios recua rese ra. ¹¹ Abraham ninisi abe que Dios icua ra. Sara, i equia ee. Nyebe que nguirĩ ndea Dios cheẽ nguire ra. Ari tuchite rei que ae ra. —Dios ra seriirina mee seje ucheẽ nguire, i quiatu que equia Dios icua ra. ¹² Amei tuchi raque Abraham, Dios eriirina mee mose ee. Mbia tubiriã i tuchi chõ ae cote re. Contar i ja aronea tuchi chõ erucucha je cote

re. Sã nyasitata tubiriãte riqui no. Sã ibi quiãshĩ tubiriãte riqui no.

¹³ Ũquĩ ngue mano ja Dios mbae mondo ja eã mose ee ra. Ae je “co tamondo jêje” i Dios ee nae, ũquĩ ndurubi quiã ño ngue mano nda. — Dios ra emondo ure je uremanonde, i que eyate quia ndua ndua ũquĩ ndese ra. Ũquĩ nguiatu que Dios icuate quia ra. —Nandeico mbirĩ ndaque equia íbii ã. Ibatenda chõ nande re, ite que equia eicua ra. ¹⁴ Emo ñee mose ũquĩ, siqui sete quiatu nguiã Dios récuua. ¹⁵ Ũquĩ ndua ndua mose nguecua rese nda nyoĩ si nyebi re chã ae. ¹⁶ — Nanderecua turã nguiatu nandetea, ite que equia ra. Dios recua je chõ ngue eriqui nguiã ñee. Nyebe Dios ireĩ ireĩ eã nguiã esi. Dios bite “Paba” i mose ee. Dios ũquĩ ndecua turana quereco co.

¹⁷ —Ma Abraham secheẽ mumbayã, i que Dios Abraham nĩ nda. — Nderiirĩ eiquia rã sacrificiorã, i que Dios ee ra. Abraham ngue Dios icua tuchi ra. Nyebe ngue “Isaac taiquia” i rei nguiã nguiirĩ mĩ nĩ. ¹⁸ —Isaac nda tiirĩ tuchi ndeje, i rei que Dios ee nyii ra. ¹⁹ Abraham ngue Dios icua tuchite quia ra. —Dios seriirĩ mbuquera arondete se eiquia mose nyii, i que ndua ndua uchiangui re ra. Abraham nguiirĩ iquia serĩ mose que Dios eo isi ra. Abraham Dios cheẽ mumbayã mose, nguiirĩ iquia raanguia chõ ngue re. Dios embuquera si raanguia chõ ngue eno nde. ²⁰ Isaac que Dios icua ra. Nyebe ñee nguiã nguiirĩ je. —Dios ra mbae turã saã jêje, i que Jacob je ra. Esaú abe je. ²¹ Jacob que Dios icua ra. Nyebe ñee nguiã José riirĩ ja je umano serĩ mose. —Dios ra mbae turã saã jêje, i que ee ra. Uchitochoquia rese que nyeco rei nyibi ñee turã Dios je ra. ²² José que Dios icua ra. Nyebe ñee nguiã israelitas je umano serĩ mose. —Dios ra jenderao a Egipto si. Sequianguie abe jendao a si, i que israelitas je ra.

²³ Moisés ru que Dios icua ra. Esi abe. Moisés ñetẽ mose que esi em-

buchemi tres meses ra. Ererecua eiquia eã sacua. Moisés itãquieĩ turãte quia ee re. Nyebe eru riqui nguiã siquicheãte ererecua si. Esi abe. ²⁴ Moisés s abe que Dios icua quia aquere cote ra. Nyebe “Egipto jenda rerecua riirĩ nducucha eã se” i nguiã. ²⁵ “Dios quiato rese taico se. Mbia icuã icuã ndaque ra seje. Dios quiatoã ndese ra aicoã”, i que Moisés ucuasu mose cote ra. Mbae icuã ndese aba oote raque. Aba mbia mbirĩ ño ñene. ²⁶ —Taico chõ Dios rimba rese. Mbia ra sembasi mbasi raque Cristo rĩ, i que Moisés ra. Nyebe eriquiã nguiã Egipto jenda rerecua rese. Mbaecha tuchi raque ae. —Dios ra mbae turã mee seje, ite quiatu que Moisés ra. ²⁷ Moisés que Dios icua ra. Nyebe esi nguiã Egipto si. Siquiche ãte ererecua paama i si. Nĩmbirãcuã turã mbeite que equia ra. Dios rese mae naanguia. Emo mae aroneate raque Dios rese. ²⁸ Moisés que Dios icua quia ra. Nyebe pascua raã nguiã. Aque ramo ngue pascua ra. —Oveja ruqui je jêiquesa ja jêsii sii. fnda ángel jendiirĩ i iquia eã, i que Moisés ñee mbia je ra. Angel que israelita riirĩ mo iquia eã tuchi cote ra.

²⁹ Israelitas que Dios icuate quia ra. Nyebe echoĩ nguiã Ama Ndisha Ireĩ ndasa. Ama iru raanguia que etasa nyoĩ sobei ra. —Nande abe nandeso iasa emombita, i rei que Egipto jenda abe ra. I que tuchõ eati eiquia ja ra. ³⁰ Israelitas que Dios icua quia Josué reco mose ra. Nyebe echoĩ nguiã sucha cuasu Jericó mama mama siete días. Nyebe Dios etaronda mbucoĩ nguiã ee. Muros i equia ee. ³¹ Rahab abe que Dios icua ra. Ae ngu saã saã jate quia mbia je nyii nae, aque. Dios icua tuchi que cote ra. Nyebe manoa nguiã mbia uataque rese. Ae Dios cheẽ mumba mumba quia nae, ũquĩ ndese. Rahab que Dios quiato isi turã nda. Mbuchemi ngue ererecua icuã si ra.

³² ¿Aba rĩ abe ra aba ñee jêje re? Dios quiato tubiriãte quiatu ñene. Ũquĩ asenei ja aroneate jêje. Gedeón.

Barac. Sansón. Jefté. David. Samuel. Dios cheẽ mbuchecuasa ja rĩ. ³³ Ũquĩ ngue Dios icuate quia ra. Nyebe eriqui nguiã Dios cheẽ nguire mbia mbuti tuchi guerra mose. Siqui turã ngue equia Dios cheẽ nguire ra. Dios que siqui eres e ucheẽ nguire ra. Dios que eteaquiato quiato bei quia nyacua mbaba mose abe ee ra. ³⁴ Ũquĩ ngue Dios icuate quia ra. Nyebe tata rendi erei eã nguiã. Tata sendi cao caote raque. Mbia tiquise rerequia requia mose erese, Dios que eteaquiato quia ũquĩ mose no nda. Dios que uquirãcuã mee equirãcuã nea je ra. Dios que embuquirãcuã mbei guerra mose abe ra. Ganar i sacua. ³⁵ Cuña abe que Dios icuate quia ra. Nyebe Dios eriirĩ ndaque mbuquera sí nguiã ee. Emo emo abe que mbae rasi saãte quia Jesús rĩ nda. Hui sereãte quiato que equia esi ra. — Sã sei quia rei. Dios ra sembuquera si nguiã. Serete mbuchiicuaõ turã ndae, i que equia ra. ³⁶ Emo emo ngue ñimbirãcuã nguia mbia iquia iquia choõno mose ee ra. Mbia eiruã nua mose abe no. O cuaacua mose abe no. Utarõ tarõ mose abe no. Hui eã mbei chõ ngue Dios si ra. ³⁷ Emo emo ngue mbia iquia iquia rei sita je no nda. Tiquise je abe que eriqui rei eiquia iquia ra. Emo emo ngue echisiamo tuchi ra. Mbae rasi je que eriqui ñimbiracuã tuchi ra. Eirao eã ndei que ra. Mbae ire achõ ño ngue eirao riqui ra. Hue jechõ ngue eriqui aronea tuchi ra. Mbaecha reã ndei que ra. Mbia que mbae rasi saanguquia tuchi rei quia ee ra. Hui eã mbei que equia Dios si ra. ³⁸ Ũquĩ ngue eturã tuchi mbia ataque si ra. Hue jechõ ngue eriqui aronea tuchi ra. Mbaecua re que eriqui uque uque ra. Emo emo mose que eriqui sita ibate no nda. Emo emo mose que eriqui turuquia rĩ no nda.

³⁹ Ũquĩ ngue Dios icua tuchite rei quia ra. —Mbae turã tamondo jêje, i rei Dios quia ee nyii nae, mee jei eã ngue ee ra. Mee je quia ra ee cote.

⁴⁰ Ũquĩ mii je eã nda Dios mbae turã mee. Nanderese abe chõ eriqui nguiã ndua ndua. Mbae turã nda emondo nande ja je cote, ũquĩ ndese.

12

Jesús mii ndese nandendua ndua

¹ Sã Dios icuasa tubiriãte cose no. Ũquĩ na ño nandeico nande abe Dios icua tuchi. Ae nandembuti mbuti quia Dios si nae, ũquĩ si nandehui. Ae mbae icuaã aba mbuchishĩ arõte quia nae, ũquĩ si nandechicuasẽ ño. Jesús mii ndui chõ nandeico ngata. Nandechimbirãcuã ño nguia siqui erese. ² Jesús mii ndese nandendua ndua. Ae riqui Dios icua uquia nande je co. Ae ra mbae saã ja nande je ucheẽ nguire. Mbae rasi que esaã tuchi ira rese ra. Emo mbucha mose i quia ira rese, aba ireĩte raque uquĩ. —Mbae rasi raande ra seyate cote, i que Jesús quia ra. Mbae rasi raande eñi ngoi bei Dios jii pe cote.

³ Jeñimondochote chí nda siqui mose Dios rese jẽ. Sã Jesús no. Mbia icuaã icuaã mose ee, ñimbirãcuã mbei que equia ra. Ñimondochõ eã ngue ra. ⁴ Jesús mii ngue mano mbae icuaã ndiquisã quisã sacua mbia si ra. Jẽingo mose mbae icuaã ndiquisã quisã, aba mo ngue jẽiquia eãte jẽ nguiatu ra. ⁵ ¿Embesa ji si jêtesarei chõ nde? —Seriirĩte quia jẽ nde, ite Dios quia jêje co. Sã embesa ji riqui ñee ã ño:

Seriirĩ, Dios mbae rasi saanguquia mose ndeicuã nii, ereisiteã teãchĩ nda jẽ.

Dios ñee mose ndeje ndeicuã nii, echeẽ eisi turã ño.

⁶ Ae rese Dios nyesecua nae, mbae rasi ra esaanguquia ee eicuã mose.

Ae Dios isi nguiirina nae, ũquĩ je ra ñee eicuã nii,

i que embesa ji hui ñee nda. ⁷ Dios “seriirĩ” i tuchi quia jêje co. Nyebe eriqui nguiã mbae rasi raanguquia jêje jẽicuã mose co. Sã mbia ja riqui nguiirĩ iruã eicuã mose no. ⁸ Dios mbae rasi raanguquia eã mose jêje,

eriiriã nguiatu rei jê. ⁹ Sã nanderu ibi jenda riqui nandeiruã nua nandēetē mose no. Nandembaaquiātu sacuã. Sã nandēico echeē mumbayã cote no. Eĩ nande sí chõ Paba ibatenda je. Ae cheē nguiatu nandemumbayã tuchi. Ũquĩ mose ra nandereco siqui turã tuchi. ¹⁰ Sã nanderu ibi jenda riqui nandembaaquiātu jua raque no. Nandēico turã sacuã aa íbii. Dios quiatu nandembaaquiātu turã tuchi nguiã nanderu ibi jenda sí co. Nandechiã mbitirõ sacuã ae rá sí. ¹¹ Dios mbae rasi saanguquia mose nande je, nandechosei chiãte raque. Erasite quia ñene. Aquere quiatu ra nandechimbitirõ cote. Aque mose quiatu ra nandeya cote.

Dios cheē nda jêisiteã teãchĩ jê

¹² Jêo tomei jembirãtã jiri ae. Jêtima abe jembirãtã jiri siqui sacuã Dios rese no ae. Jeñimondochoã jiri quia siqui Dios rese ae. ¹³ Jêingo tuchi quiatu quia erese. Ae ndua ata atate quia nae, ñ nda ũquĩ abe siqui tuchi chee erese chã. ¹⁴ Jêingo turã mbia ja rese. Dios rá sí chõ jêingo. Dios rá sí nandēicoã mose, nandemae eã mbei ra erese. ¹⁵ Jenyiteaquiātu turã ño nguia. ñ nda jemo Dios turã isiteã eã. Emo mbae icuã naa mose jêje, jêtesarei chõ esi. Jendua icuã icuãchĩ nda jenongue rĩĩ jê. Ũquĩ mose ra jeñimbiicuã jate. ¹⁶ Jeninisi ae rese chõ jêingo. Jemo nda siquichĩ emo ninisi rese jê. Dios mbae ra jêisiteã teãchĩ jê. Sã Esaú no. Aque que umbae herencia mondo ja chõ soo ñetē ndibishorõ nda. ¹⁷ Aquere que “sembae herencia taisibe” ñ rei nyeseo tuchi ra. “Bendecir ere rá seje”, ñ rei que ngu je ra. Eru que teã teã ño ee echeē mose ra. Nyebe Esaú nyeseo tuchi nguiã cote.

¹⁸ Dios turã tuchi riqui jêje namo co. Mbia Moisés mosenda je sí. Aque mose que mbia riqui titi titi ñ tuchi siquiche Dios sí ra. Aque mose abe que sita ibate sendi sendi ee ra. Itondarute que eriqui ee ra. Ama ngue pirirã pirirã ñ tuchi quia ee aque

mose ra. ¹⁹ Trompeta que nyuihuui ee no nda. Dios que ñee ee cote ra. Mbia que Dios cheē ñandu sereãte ra. ²⁰ Dios quiatu ngue ñee nguiã nyii: —Emo oco mose sita ibate rese, ũquĩ jêiquia. Mbae quiaa rĩnda abe oco mose erese, ũquĩ abe jêiquia no. Sita je jêiquia. Jeñio no ae, ñ quiatu que Dios ee nyii ra. ²¹ Aba mbusiquiche tuchi que mae mose ũquĩ ndese ra. —Aico titi titi ñ tuchi esi co, ñ chee que Moisés abe ra. ²² Eĩ jenye eã ño jê nde. Dios jembusiquiche ãte quia jê co. Dios recua jêsiichã tuchi quia jê ã. Dios reco chuchua. Jerusalén naanguia ibatenda jêsiichã tuchi quia jê ã. Angeles tubiriã abe jêsiichã tuchi quia ã no. ²³ Dios icuasa ñiinda abe jêsiichã nguia ã no. Ũquĩ mbae nombres mbesa ji chĩ ibate pe. Dios abe jêsiichã nguia ã no. Ae ra Jesús quia-toã icuã tea tea ja emo mose. Mbasi ja rae. Jesús quiato mano je abe chõ jêsiichã ichã nguia ã no. Ũquĩ ngue Dios mbuturã tuchi cote ra. Eicuã jiri jiriã tuchi chõ cote re. ²⁴ Jesús abe chee jêsiichãte quia ã no. Ae ruqui rĩĩ ngue Dios contrato yasu raã nande je ra. Ae ruqui rii rii ji jêsiichã nguia ã. Ae ruqui quia rei eturã tuchi Abel ruqui sí.

²⁵ Dios riqui ñee jêje co. Echeē nda jêisiteã teãchĩ jê. Dios que mbae rasi saanguquia mbia je cose ra. Echeē nenei neneisa andu sereã mose a íbii. Ibatenda riqui ñee nande je co. Ae cheē nandechandu sereã mose, mbae rasi ra esaanguquia tuchi nande je cote. ²⁶ Dios cheē mose que ibi nyere nyere aque mose coose ra. —Namo nda ibi ambuchere sí no. Ibi mĩ ño eã nda ambuchere. Ibei abe ra ambuchere no. Aque mĩ nda ambuchere cote, ñ Dios quia co. ²⁷ —Aque mĩ nda mbae ambuchere ja, ñ Dios quia co. Aque mose ra mbae ua ja Dios chiao. Ae ra siqui bei, ũquĩ achõ nda ua eã. Mbae ataque ra ua ja aque mose. ²⁸ Dios rimba rei nande. Nyebe ra nande nandetiã aroneate. Gracias nande tuchi quiatu quia Dios

je. Nandeico mingue chõ nguia ee. Ûquĩ mose ra eya tuchi nanderese. ²⁹Mbia Dios cheẽ mumb a mose, Dios ra paama i tuchi ee. Tata rã tuchi chõ Dios re.

13

Jenyesequa jenyiese

¹ Jenyesequa quia jenyiese jẽ. Nyiesenda chõ jẽ nde. ² Mbia ngaẽ mose jenyuchúaa, jẽisi turã ño nguia. Emo ngue ángeles mo isi turã uchuchúaa ra. Iranua ndaque erese. Mbia mo eriqui reĩ nguiã ee. ³ Etarõ ji rese jẽingo ndua. Mbae turã jẽsaã saã ño nguia ee. Jẽtarõ ji raanguia chõ jẽ abe erese re. Ae je mbia icuã icuã ndiqui nae, ùquĩ je jẽingo turã ño. Sã jẽ abe jendete riqui no. Sã jẽ abe jẽiruã nua arõte no. ⁴ Emo siqui mose ngũinisi rese, ùquĩ Dios bite. Sã emo ngũinisi resechõ ño siqui. Sã eriquiã emo ndese. Emo siqui mose emo ninisi rese, Dios ra paama i tuchi ùquĩ je. Ae ninisi ãte riqui nae, siqui mose emo ndese, Dios ra paam a i tuchi ee no. ⁵ Mbae isiquia rese ra jendua nduachĩ jẽ. Jembae mii ndese chõ jẽya. —Jaendechayã mbei ra se, i quiatu Dios nguiã co. ⁶ Ae bei jẽ. Dios ra nanderechayã mbei. Nyebe nandeico nguiã ñee: Dios riqui beite serese co. Mbia mo si ra asiquicheã, nyebe nandeico nguiã i ã.

⁷ Jenderequa rese jẽingo ndua. Ûquĩ ño ngue Dios cheẽ senei senei jẽje ra. Ûquĩ ndiqui Dios icuate ùquĩ. Eĩ jenyese Dios icua jẽ abe ùquĩ na si. Ûquĩ nguia siqui turãte nguiã Dios rese ùquĩ. ⁸ Eĩ mbei chõ Jesucristo re. Cose mosenda bei. Namõ abe chee. Eĩ mbei ra ae quia. ⁹ Mbia jembaaquiato ata ata mose, echeẽ si jẽhui chõ. Mbia jembaaquiato choõno mose, echeẽ si jẽhui chõ no. Ae je mbia riqui mbaeiaie i nande je nae, ùquĩ si nandehui mose, ùquĩ abe ra nandechiã mbuquirãcuã eã no. Nandechiu abe ra nandechiã mbuquirãcuã eã no. Dios turã ae

chõ nandechiã mbuquirãcuã nguiã. ¹⁰ Jesús mii ngue mano nande je ra. Sacrificio rei ae mii nande je. Cose ndare rã eã namõ cote re. Ticuasu ra mano eã nandechiã mbutiã sacua cote. Jesús ruqui mii ño nandechiã mbutiã nguiã co cote. ¹¹ Sacerdote rerequa riqui ticuasu ruqui rerao rao Lugar Santísimo aque. Dios mbia icuã mbutiã sacua esi. Isho jiri sucha cuasu si echoi quia ticuasu roo rei rei aque. ¹² Jesús abe que mbae rasi saã isho jiri sucha cuasu si ra. Mano tuchi que mbia mbitirõ sacua nguqui je ra. ¹³ Jesús que aba ireingua saã tuchi ra. Nande abe nandesiquicheã nguiatu quia aba ireingua raã erese. ¹⁴ Nanderequa ibi jenda ra ua chõ. Dios ra nanderecuarã mee nande je ibate. Ûquĩ nguia ra ua eã mbei. ¹⁵ Jesús que mano nande je ra. Nyebe nandechẽ turã mbei quia Dios je. Sã nandechuru riqui ñee turã mbei eriĩ. ¹⁶ Jẽingo turã ño nguia mbia je. Jembae jemee mee nguia emo je. Ûquĩ Dios bite.

¹⁷ Jẽingo turã jenderequa je. Echeẽ jemumbayã. Jenderequa riqui jendeaquiato quiato Dios je ùquĩ. —¿Jeteaquiato turãte equia re? i chee ra Dios ee. Jenderequa cheẽ jemumbayã mose, eyate ra ùquĩ mose. Echeẽ jemumba mose, eya eãte ra jendese. Jẽ abe ra jẽya eãte no.

¹⁸ Jeñee mbei quia Dios je ureriĩ. Ureico turã sete equia mbia ja je ã. Ureico ndua icuã icuã eãte emo nii ã no. ¹⁹ Jeñee tuchi quiato quia serii Dios je. I nda Dios semondo jei jendea.

Echeẽ hui bei

²⁰ Dios ae aba mombia nguiã. Dios ae que Jesús raaque mbuquera si ra. Jesús ruqui riĩ ngue Dios ucheẽ yasu mee nande je ra. Jesús ruqui riĩ ngue Dios embuquera no nda. Jesús rei oveja raarõsa rã. Nanderaarõ arõ mbei equia co. ²¹ Sã Dios riqui jembuquirãcuã tuchi. I nda jẽingo bei ae Dios bite ùquĩ ndese. Sã ae

riqui tuchi nandechiangui re. Nandemingo tuchi sacuã ae ebite ãquĩ ndese. Jesucristo quiatote quiatu nande re. Sã mbia ñee turã mbei quiatu quia erĩ. Amén.

²² Seresenda, aico co mbesa juate jembirandu sacuã a. Secheẽ jemi tuchi rã jẽaquĩ ndese. ²³ Aico jembirandu Timoteo rese a. Etarõ iriã ndiqui namo co cote. Tu jei mose serea, ae abe ra arao seso mose jendea. ²⁴ Saludos amondo quia jenderequiasa je aque. Jesús quiato ja je saludos amondo quia aque. A Italia jenda saludos mondo quia jẽje aque. ²⁵ Sã Dios siqui turã jẽ ja je. Amén.

LA CARTA DE SANTIAGO

Mbia icúe cúe jenda je Santiago ucheẽ mbesa mondo

¹ Santiago chõ se re. Dios rimba chõ se re. Jesucristo rimba abe chõ se re. Judíos Jesús quiato je chõ aico nguiã ã mbesa mbesa. Judíos isúe cúe jenda je. Saludar ae chõ nguiã ã mbesa jêje.

Dios mĩ ño aba mbaaquiatu nguiã

² Mbae icuã tã i mose jêje, jêya bei chõ nguia, Seresenda. ³ —Ma Dios icua tuchi, i mose mbae mo tã i jêje, jêingo tuchi chõ nguia Dios rese ùquĩ mose. Jeñimbirãcuã aquiatu sacuã. ⁴ Jeñimbirãcuã mbei chõ nguia Dios icua. I nda Dios riqui jembitorõ tirõ mbei jembuchicuabo mingo. Ùquĩ mose ra jêturã tuchi cote.

⁵ Jêingo turã aquiatuã mose, jeñee ño Dios je. Jeñimbirãcuã aquiatuã mose, jeñee ño Dios je no. Ae ra jembaaquiatu. Ae ñee nguia Dios je nae, ùquĩ ja je ra mbae mondo tuchi. Ñee asi asi eã nda ee no. ⁶ Jê ache i mose Dios je, “Dios quia ñene”, jenye tuchi quiatu quia. —Dios ra emee ãte rei seje, i mose jemo, eicuãte ùquĩ. Ama ndebera rã ño ùquĩ nde. Sã quiririã ndiqui ama ndebera rerao turã eã no. Sã eriqui embuchebi chebite no. ⁷ Ama ndebera rã emo siqui mose, Dios ra mbae mee eã ùquĩ je. ⁸ Emo ndua ata ata mose, mbae mĩ mo ndese eriqui aroneate.

⁹ Jesús quiato mo embae eã mose, sã eya tuchi chõ siqui. Sequiatote ite quia Dios nguiã ee aque. ¹⁰ Sã Jesús quiato mbaecha ia bei chõ siqui, mbae icuã tã i mose ee. Sã eya riquiã umbae tubiriã ndese. Sã Dios rese quiatu eya riqui. Embae ua mose, sã eya riqui ùquĩ mose abe no. Mbaecha mbae ra siqui bei eã. Sã quiata uti riqui soõ jeite no. ¹¹ Tenda rasi mose ee, quiata ra ñimama. Euti abe ra uqui. Etura eã mbei ra cote. Eĩ si ra

mbaecha. Umbae tubiriã nyabe chõ nda mano.

Mbae icuã tã i mose nande je

¹² —Ã esaã icuã, i mose emo jêje, ijêsaãchĩ nda jê! Jêingo mingue chõ nguia ñimbirãcuã. Jeñimbirãcuã mose ra Dios mbae turã mee jêje. Jemingo bei rae. —Ae nyesecua quia serese nae, ùquĩ nda amingo bei, i que Dios cose ra. ¹³ —Ã esaã icuã, i mose emo jêje, Dios eã ño ñee nguiã jêje ùquĩ. —Dios que “ã esaã icuã” i seje ra, jenyechĩ nda jê. —Ã esaã icuã, i eã nda Dios emo je. Dios abe ra mbae icuã saã eã emo ñee mose ee. ¹⁴ Aba chiangui renda icuã nguiarei mbae icuã oseu uquia aba je. Dios eã ñene. ¹⁵ Emo mbae icuã oseu mose, mbae icuã naa arondete cote. Mbae icuã naa naa mbei mose ra Dios embasi cote.

¹⁶ —Mbae icuã esaã, i mose emo jêje, Dios ñee eã nguiã jêje. —Dios chõ ñee nguiã, jenyechĩ nda jê. ¹⁷ Ae mbae turã tuutu beite quia nande je nae, Dios chimondo chõ ùquĩ nde. Dios quiarei eturã mbei tuchi. Eicuã jiri jiriã emo mose. Sã Dios tenda ao no. Nyasi abe no. Ùquĩ nguia nyiabi abi jiri nguiã. Dios quiarei nyiabiã mbei emo mose. Etura mbei tuchi eriqui co. ¹⁸ Sã Dios riqui seriirĩ i nande je no. Nande echeẽ icua mose nandechiangui re. —Jê nane je aico seriirĩ i co, i que Dios nane je ra. Dios riirĩ tubiriã tuchi ra ngaẽ nanderui cote.

Dios cheẽ jemumbayã ño nguia eandu mose

¹⁹ Dios quiarei eturã tuchi. Nyebe echeẽ jeñanduse tuchi quiatu quia jê. Jendua quiatu quia ñee nonde. Paama jenye jei jei techĩ nguiã emo je. ²⁰ Ae Dios bite riqui mbae nae, ùquĩ nandesaã aroneate nande paama i mose. ²¹ Ae Dios ucheẽ mondo quia jeñiangui re nae, ùquĩ jêisi tuchi quiatu quia. Jêingo mingue chõ nguia Dios cheẽ je jê. Aba mingo beisa chõ Dios cheẽ nde. Ae mbae icuã ndese mbia riqui nae, ùquĩ icuã tubiriãte

eriqui raque. Ûquĩ si jẽhui tuchi. Mbae icuã ja si jẽhui tuchi.

²² Dios cheẽ nda jeñandu chooñocheĩ jẽ. Echeẽ jemumbayã tuchi quiatu jẽ. Emo Dios cheẽ andu chooño mose, ae sí chõ ñimbĩrĩ irĩ nguiã aque. ²³⁻²⁴ Sã emo ndiqui mae ñooño nguba rese espejo je no. Sã eriqui tesarei jei chõ nguba si no. Eĩ si chõ Dios cheẽ andu chooñososa re. Tesarei jei chõ nguiã Dios cheẽ si. Echeẽ mumbayã ndocoĩ. ²⁵ Dios cheẽ nguiarei aba mbui tuchi mbae icuã si. Ae siqui tuchite quia Dios cheẽ ndese nae, ùquĩ ndese ra Dios riqui tuchi echeẽ mumbayã mose. Ûquĩ Dios cheẽ ñandu chooñoate quiatu nguiã. Echeẽ emumbayãte quiatu nguiã.

²⁶ —Dios quiato chõ se re, i raque emo. Uchuru rerequia chooñoa mose, Dios quiato raã ñooño ño ùquĩ nde. Ae sí chõ ñimbĩrĩ irĩ nguiã ùquĩ. ²⁷ Ae Dios quiato chooñoa tuchi nae, ùquĩ ndiqui mbae turã naa naa ùquĩ. Ûquĩ ndiqui esi cheecha reaquiature ùquĩ. Ûquĩ ndiqui eru cheecha reaquiature ùquĩ no. Mbae eã mose eru cheecha mbae. Ûquĩ ndiqui ñimbĩcuã icuã eãte mbae icuã mo je ùquĩ.

2

Mbia nandeisi turã ja chõ nguia nyiabiã

¹ Jesucristo quiato chõ jẽ nde. Jenderecua tuchi chõ ae re. Nyebe mbia jẽisi turã ja chõ nguia nyiabiã. ² Sã mbaecha mo ndiqui ngasẽ jeñimunua mose jẽje no. Huĩrao turã ndesebe. Eo cuasa turã ndesebe oro. Sã mbaecha reã mo abe riqui ngasẽ jeñimunua mose no. ³ Sã jẽingo mbaecha isi turã no. Sã jẽingo embucoi erenda turã tose no. Sã jẽingo mbaecha reã mbucoi turã eã no. ⁴ Eĩ jenyẽ mose, jẽisi turã ja eã ño nguiã ùquĩ. Jembuchiabi chõ nguiã ùquĩ. Hue rĩ ja eã ño jẽingo nguiã mbia cuata mee ùquĩ. Jendua turã eã ñochĩ

nguiã ùquĩ. ⁵ Secheẽ jeñandu rã, Sere-senda. Mbia mbaecha reã ngue Dios irabo ra. Dios icua tuchi sacua. Ûquĩ ndese quiarei Dios o tuchi mbaecha mo si. — Ûquĩ nda siqui tuchi serese se ererecua tuchi mose, i que Dios ñee nyii ra. ⁶ Jẽ ngue mbia mbaecha reã jenguirirõ tuchi ra. Eicuã eãte ùquĩ ndiqui raque jẽje. Mbaecha quiatu eicuãte riqui nguiã jẽje. Jembĩrĩ irĩ ño nguiã. Jenderao rao chõ nguiã ererecua je, jẽ mbae mo mee mee sacua ee. ⁷ Mbaecha chõ ñee icuã icuã nguiã Cristo rĩ. Nandererecua chõ Cristo resẽ.

⁸ —Sã ereico nyesequa ndechiese no. Eĩ ere si chõ nyesequa emo ndese, i que Dios mbia je cose ra. Dios cheẽ i tuchi chõ ùquĩ nde. Nande ùquĩ ñee mumbayã mose, nandeico turã ndae. ⁹ Nande mbia mo isi turã mose, emo isi icuã mose, eicuãte ùquĩ. Nande mbia isi chiabi abi mose, Dios cheẽ nandemumba chõ nguiã ùquĩ. ¹⁰ Dios cheẽ tubiriãte raque nande je echeẽ mumbayã sacua. Nande echeẽ mi mo mumba mose, echeẽ ja mumba raanguia chõ ùquĩ nde. Echeẽ ataque mumbayã ndaque. ¹¹ Dios cheẽ tubiriãte. —Jẽingochĩ nda emo ninisi rese, i que ra. —Mbia mo nda jẽiquiachĩ, i que ae si ñee nda. Nande emo iquia mose, echeẽ nandemumba chõ nguiã ùquĩ. Nandeicoã ndaque emo ninisi rese. ¹² Dios cheẽ ngue nandembui mbae icuã si cote ra. Nandechesequa sacua mbia rese. Nyebe nandeico turã mbei chõ nguia mbia je. Dios quiatu ra nandecuata mee tuchi emo mose cote. ¹³ Ae eya eã eãte riqui emo ndese nae, ùquĩ ndese ra Dios ia eã eã nandecuata mee mose, Nandeya eã mose emo ndese, ùquĩ mose ra Dios nandembasiã.

Nande Dios icua mose, mbae turã abe nandesã ño nguia

¹⁴ Sã emo ndiqui ñee no. —Dios aicuate quia co, i. Ûquĩ mbae turã naa eã mose, ùquĩ nda Dios sirõ eã mbae icuã si. Dios icua chooño ño ñene. ¹⁵ Sã Jesús quiato mbaecha reã

mo ndiqui ngasē jēje no. Sã eirao eã ndiqui no. Sã echiurã mo eã ndiqui no. ¹⁶ Sã jemo ndiqui ñeeño ee no. —Nde ae chõ ndechiurã etea. Nde ae chõ ndeiraorã etea. Eso turã ño, i jemo ee. Mbae mo mee ndocoĩ ee. Jeñee iru chooño ño nguiã ee ùquĩ. ¹⁷ Jẽingo turã eã mose emo je, Dios jẽicua chooño ño nguiã ùquĩ. Jẽ Dios jẽicua mose, mbae turã jẽsaã jiri ae.

¹⁸ Sã emo ndiqui ñee no. —Dios aicuate quia co, i. Sã emo ndiqui ñee no. —Mbae turã asaã saã nguia co. Dios aicua chooño eã nguia co, sã emo ndiqui i no. Jẽ Dios icua mose ¿mañi ae ra jẽicua mbae turã naa naa eã mose re? Se quiatu mbae turã asaã saã nguia co. Nyebe ra mbia “eriqui Jesús icuate co”, i serĩ. ¹⁹ —Dios mñi ño siqui nguiã co, jenyẽ chõ nguiã ùquĩ. Eturete raque ùquĩ. Aba checuayã abe riqui ñee ndaque Dios mñi co no. Siquichete esi ñee ndaque erĩ. ²⁰ ¿Mbaerã jẽaracuayã tuchi riqui re? Emo mbae turã naa naa eã mose, Dios icua chooño ño nguiã ùquĩ. ²¹ Sã nandei Abraham no. —Nderiirĩ emee seje, i mose Dios, Abraham ngue echeẽ mumba eã nda. Nyebe Dios Abraham isi turã mbei nguiã. ²² Abraham ngue Dios icua chooño eã nda. Mbae turã ngue esaã saã mbei quia Dios icua mose ra. Dios cheẽ ngue emumba eã nda. Nyebe nandeco nguiã ñee. “Abraham Dios icuate”, i. ²³ Sã embesa ji riqui ñee no: Abraham ngue Dios icua ra.

Nyebe que Dios eisi turã mbei ra, i que embesa ji ra. Ùquĩ ngue ique tuchi cote ra. Nyebe “Dios Quiato” i nguiã Abraham je. ²⁴ Emo Dios icua chooño mose, Dios ra eisi turã eã. Emo Dios icua tuchi mose, sã mbae turã abe raã naa. —Dios icuasa, i nda mbia ee cote chã. ²⁵ Sã Rahab cose no. Cuña icuã. Siqui ata ata bei mbia rese. Aque que Josué chimondo isi turã nda. Mbuchimi turã ngue mondo mbia icuã si ra. Nyebe Dios Rahab isi turã nguiã. ²⁶ Sã nanderete no. Umi umi eã mose, “eraaque” i

chõ mbia nguiã ùquĩ je. Ùquĩ na ño mbia mo ndiqui nguiã ã. Mbae turã naa eã. Nyebe nandeco nguiã “Dios icuayãte” i ee ã.

3

Cochee chõ nandechuru nandereco

¹—Mbia mbaaquiato quiatu sacuã se, jjenye jaaja techĩ nda equia jẽ! Emo emo mñi ño. Mbia ra mae tuchi urerese. Urecuata ra emee tuchi. Mbia mbaaquiato quiatusate quia ure re. ² Dios cheẽ nandechabi chabi chõ nguiã nande ja ã. Emo uchuru rerequia turã mose, nguete ja abe rerequia turã ño nguiã ùquĩ. ³ Sã nandeco freno mñi ticuasú churu rese no. Nandechẽ mumbayã sacuã ño ùquĩ nde. Sã freno ñetẽ je chõ nandeco ticuasú rete rurucuata nandenduasa quiti no. Ticuasú rete cuasute raque. ⁴ Sã lancha cuasute raque no. Sã quirirĩa quirãcuãte riqui raque ee no. Ira ñetẽ je chõ echa riqui nguiã embucuata turã unduasa quiti. ⁵ Eĩ ño nandechuru nguiã. Nandechuru mbae saã ata ata chõ nguiã. Eñetẽte raque. Sã tata ñetẽte raque no. Mbae ra esei ja tuchi oso quia.

⁶ Tata rã ño nandechuru re. Nandechuru quiarei mbae icuã ñumumbara raã uquia tuchi nande je. Nandechuru icuã na eãte nanderete resenda mo. Nandechuru chõ nanderete mñicuã ja nguiã. Nandechuru chõ nandereco rerequia icuã mbei nguiã. Aba checuayã ño nandechuru rerequia icuã nguiã no. ⁷ Sã nandeco quiaa rĩnda mo mbuseteã arõte raque no. Ae mbebe quia nae, ùquĩ abe nande mbuseteã arõte raque. Mbei abe nandembuseteã arõte raque. Ae siqui ama ñi nae, ùquĩ abe nandembuseteã arõte raque no. Ùquĩ ja que mbia mbuseteã emo mose ra. ⁸ Nandechuru quiatu nandembuseteã aroneate nguiã. Nandechuru icuã nguiatu nandembuquirĩ aroneate nguiã. Mbei tasi je rã tuchi chõ nandechuru riqui nguiã nande je ã. ⁹ Nandechuru je nandeco ñee turã ndaque nanderu Dios je.

Nandechuru sí je chõ nandeico nguiã ñee icuã mbia Dios chiao je cote. Ae rá sí raque Dios mbia ao. ¹⁰ Nandechuru sí je nandeico ñee turã ndaque. Ñee icuã abe no. Ñquĩ Dios biãte, Seresenda. ¹¹ Sã icua riqui no. I turã mose, eturã ja bei chõ ñene. I reẽ mose, ereẽ ja bei chõ eno nde. I chumumbara chĩ aroneate icua mii ye. ¹² Sã isio riqui ia eã ira a mo no. Isio a bei chõ nda ia nguiã. Ira mo nda ia eã enongue a no. Ea sí chõ nda ia nguiã no. Sã nandeico i turã ndea eã i reẽ mbirõ no. Hue icua mii ye ra eñi ja eã. Eñi sí chõ nandechuru no nde. Nandechẽ ñumumbara mose, eicuãte ùquĩ.

Ae je Dios uaquiato mee nae

¹³ Jemo aquiato mose, sã eriqui mbae turã naa naa mbei. Sã eriqui tochi bei no. ¹⁴ —Paama jenyechecuayã mose jenyue, jẽaquiato jẽsaã ñooño ño nguiã ùquĩ no. Jeñee ñooño ño nguiã ùquĩ. Dios cheẽ ndui eã tuchi chõ ùquĩ nde. ¹⁵ Eñi jenyue eã nda cote, Dios uaquiato mee mose jẽje. Paama jenyue checuayã mose jenyue, Dios rá eã ño jẽ nde. Dios quiatoã nyisaã na ño ùquĩ nde. Aba checuayã nyisaã na ño ùquĩ no nde. ¹⁶ Mbia ndua eã mose emo ndese, eicuãte ùquĩ. Mbia paama i checuayã mose nyue, eicuãte ùquĩ no. Ñquĩ mose ra mbia siqui turãnyã nyue. Mbae icuã icuã mbei ra ee. ¹⁷ Dios uaquiato mee mose nande je, nandechiã turãte ra cote. Nandechiã nda ngoite cote. Cocheete ra nandeico cote. Emo ñee nda nandemumba eãte cote. Nandeya eã nda mbia rese cote. Mbae ra nandesaã turã mbei quia cote. Nandendua ata ata eã nda cote. Nandechẽ nyecuate ra eriqui mbia je cote. ¹⁸ Nande mbia nandemingo turã mose nyiese, nandechiã turã nda nandeico cote.

4

Ae mbae icuã quiatote nae, Dios quiatoã ño ùquĩ nde

¹ ¿Mbaerã ño jẽingo nyao nyao nyiese chã? ¿Mbaerã ño jẽingo ico icuã icuãte nyue chã? Jeñiangui renda icuã nii ño ñene. “Se chõ jẽ”, jenyue jaaja quiato nguiã mbae icuã osei osei. ² Jembae eã jenyosei choseichĩ nguiã ã. Jẽ ererequiayã mbei mose, mbia jẽiquia arõ ñochĩ nguiã ã. Mbae jenyosei chosei chõchĩ nguiã ã. Nyebe jẽicuã icuã mbeite riqui nguiã jenyue ã. “Embu seje”, jenyue ãte quiato nguiã Dios je. Nyebe jẽingo nguiã eisiã. ³ “Embu seje”, jenyue mose Dios je, “embu seje” jenyue icuã icuã ño nguiã ee ã. Mbae mumba chooño sacua ño jẽingo nguiã “embu seje” i Dios je ã. Nyebe Dios riqui nguiã emee eã jẽje. ⁴ Sã cuña mo ndiqui hui ngu si no. Eñi jenyue sí chõchĩ nguiã hui hui Dios si ã. Ae Dios biãte nae, jẽ ùquĩ osei osei mose, Dios quiato aronea ño jẽ cote re. ¿Mañi jenyue quia ùquĩ icuayãte re? ⁵ Sã embesa ji riqui ñee ñooño ãte no:

Espíritu Turã Dios mee nguia nandechiangui re nae, aque riqui ngueteãte nanderese co.

Nandeico sacua Dios mii ndese, i que embesa ji ra. ⁶ Dios turã i ite riqui nande je co. Sã embesa ji riqui ñee no: Ae ucuasu saã saã nguia nae, Dios riqui ùquĩ ndiquisãte co. Ae siqui tochte quia nae, ùquĩ je quiato Dios turã i ite riqui nguiã co, i que embesa ji ra. ⁷ Jẽingo tochi chõ nguia Dios je. Aba checuayã jẽsiquisã ño nguia jenyese. Ñquĩ mose ra uchã jẽsi cote. ⁸ Dios jẽsiichã tuchi quiato quia. Ñquĩ mose ra Dios abe jendiichã tuchi. Jẽingo mose mbae icuã ndese, jẽhui chõ esi. Jendua ata ata mose, jeñia jembitirõ ño. ⁹ ¿Mbaerã jẽingo iquia iquia mbae icuã naa mose re? ¿Mbaerã jẽyate riqui mbae icuã naa mose re no? Jenyeseo quiato quia jẽicuã nii. Jẽya eã nguiato quia jẽicuã ndese no ae. ¹⁰ Jẽingo tochi chõ nguia Cristo je. Aquere quia ra ae jẽturã mbuchecua mbia je cote.

Nandechẽ icuã eã emo nii

11 Jeñee icuãchĩ nda emo nĩ, Seresenda. Dios cheẽ mumba chõ ãquĩ nde. —Jenyesequa chõ nguia jenyese, i que Dios ra. Jẽ Dios cheẽ mumba mose, “Dios cheẽ icuã” i raanguia chõ ãquĩ nde. “Dios cheẽ icuã” jenyechĩ nda echeẽ mumbayã ndocoĩ jẽ. 12 Dios ae chõ mbia cuata mee nguia co. Dios mĩ ño ucheẽ mondo nguia nande je. Nande echeẽ mumbayã sacua. Dios ae chõ aba rirõ nguia aba icuã si. Dios ae chõ nda aba mondo tata cuásuu no. Nande quiarei emo cuata nandemee aroneate.

Mbae mo tasaã isamami, nande aroneate

13 Sã nandemo ndiqui ñee no. —Taso mbae mo naa naa pee. Taico are tuchi pee. Mbae mo isi sacua icua. Tenda nongue mose ra achube, i no. Ndua rane eã Dios rese. 14 ãquĩ Dios biãte. Nandeiranuate mbae mo ndese. Mbae mo tu arondete tã i nande je. Isamami nandemano arondete. Shimbo rã ño nande re. Sã shimbo riqui quiachã jeite no. 15 —Mbae mo tasaã, nandechĩ nda nande ae ndua mose rocoĩ Dios rese jẽ. —Dios eno i mose seje, ãquĩ mose quiatu mbae tasaã, nande quiatu quia. 16 ¿Mbaerã jẽingo tesarei Dios si re? ¿Mbaerã jẽingo “se ae mbae tasaã” i re? Jenguasu jẽsaã saã ño nguia ãquĩ. Eicuãte ãquĩ. 17 Ae mbae turã icuate quia nae, sã ãquĩ ndiqui mbae turã naa mbei. Mbae turã naa eã mose, eicuãte ãquĩ cote. Dios biãte ãquĩ cote.

5

Santiago ñee asi mbaecha je

1 Tacheẽ mbaecha je cote. Jẽya eã ndasi ra jẽsaã tuchi cote, mbaecha. Jenyeseo tuchi quiatu quia. 2 Jembae ra ua ja tuchi cote. Chicuaquiari nda jẽirao ua tuchi. 3 Jembae mbae isiquia ra quiachã ja cote. Jembae mbae isiquia rã nda jẽ abe jẽquiachã tuchi cote. Mbae isiquia rese chõ jẽingo nguia ndua. Dios rese ndua rocoĩ. Mbae isiquia jemunua nua tuchi chõ nguia Dios jembae sacua ã

cote. 4 Mbae que quie quie rei quia jẽje resẽ. Mbae que jemondo turã turã nguia jembae ishao shaosa je resẽ. ãquĩ Dios mbiirandu raanguia chõ nguia jeni. Nyebe ra Dios jembae uquirãcuã je. 5 Sã ticuas riqui quiaru bei ñimbuquirã no. Eiquia nonde. Eĩ ño jẽ nde, mbaecha. Jembi rese chõ ngue jẽingo bei quia ra. Jẽquiaru chooño mbei que equia ra. Siqui rocoĩ Dios rese. Nyebe ra Dios jembae cote. 6 Jẽ ngue mbia turã jembae mbasi quia ra. Jẽ ngue mbia turã jẽiquia iquia quia no nda. Mbae icuã mo esaã eãte raque jẽje. Nyebe ra Dios paama i tuchi jẽje, mbaecha.

Jesucristo jẽsaarõ arõ mingue chõ nguia

7 Jesucristo ra tube íbii, Seresenda. Jẽsaarõ arõ mingue chõ nguia. Sã mbia riqui ama nyaaqui raarõ arõ mingue no. Mbae tiquia nonde no. Aquere ra eriqui minguebe umbae raarõ arõ no. Eucua uca nonde. 8 Eĩ jenyẽ chõ nguia Jesucristo raarõ arõ mingue jẽ abe. Jeñimbirãcuã ño nguia Jesucristo raarõ arõ. Achite eĩ tu a cote. 9 Jeñee icuã icuãchĩ nda jenyue, Seresenda. ãquĩ mose ra Dios jembae. Namõ jiri ra Dios mbia icuã mbasi. 10 Jeñimbirãcuã mingue chõ nguia. Sã Dios cheẽ mbuchecua mbae cose ndare no. Sã ñimbirãcuã mingue mbia icuã mose ee no. 11 Ae ñimbirãcuã mingue quia nae, ãquĩ je chõ Dios turã ndiqui nguia. Sã Job cose no. Ñimbirãcuã mingue tuchi que equia ra. Aquere que Dios turã tuchi riqui ee cote ra. ãquĩ jẽicuate quia ã. Eĩ si chõ Dios turã tuchi nguia mbia je co.

12 ã abe jeñandu tuchi. Jeñee ñooño chĩ nda jẽ. Jurar jenyechĩ nda emo mose jẽ. Ibatenda rĩ. Ibi jenda mo nĩ abe no. Mbae ja mo nĩ nda jurar jenyẽ jirichĩ jẽ. Eno jenyẽ mose, ãquĩ mĩ mbei chõ jeñee. Tei jenyẽ mose, ãquĩ mĩ mbei chõ jeñee no. Eĩ jenyẽ mose ra Dios ñee asiã jẽje.

¹³ Jemo ia eã mose, sã ñee Dios je. Jemo ia mose, sã irasei rasei Dios je no. ¹⁴ Jemo ndasi mose, sã “jenyu” i Jesús quiato rerecua je. Sã ãquĩ ñee Dios je erasi riĩ cote. Sã mbae quira mo quiti erasi ãquĩ ndese Jesús riĩ. ¹⁵ —Jesús ra embucherõ, i mose uchiangui re ñee mose Jesús je, mbucherõ ndae. Erasi mbae icuã naa mose nyii, ãquĩ nda embutiã esi no. ¹⁶ —Mbae icuã ngue asaã eã nda, jenyechĩ nda jẽ. —Mbae icuã ngue asaã nda, jenye quiatu quia jenyue. Jeñee quiatu quia Dios je jenongue riĩ. ãquĩ mose ra Dios jembucherõ. Emo turã mo ñee tuchi mose Dios je, Dios ra mbae turã saã tuchi ee. ¹⁷ Sã Elías no. Nande rã si chõ ndaque Elías. Sã ñee tuchi Dios je ama mbuchaaqui eã nonde no. Nyaaqui eã mbei que cote ra. Tres años y medio chee que ra. ¹⁸ Aquere que Elías ñee Dios je cote ra. Ama mbuchaaqui sacua cote. Aque mose que nyaaqui cote ra. Mbae que suri ja cote ra. Mbae ia ja chee no. ¹⁹ Emo icha mose Dios si, sã enongue embuchebibe mingo Dios rui sí. ²⁰ Nde mbia mo mbui mose huicua si, eresiquisã quisã ño nguiã eso eã sacua tata cuásuu ãquĩ. Dios ra eicuã mbutiã esi cote.

PRIMERA CARTA DEL APOSTOL SAN PEDRO

Pedro ucheẽ mbesa mondo Jesús quiato ishonda jaaja je

¹ Pedro chõ se re. Jesucristo chimbaaquiatu chõ se re. Aico ã mbesa jêje a. Isho isho jendeco mose jendecua si. Ponto jenda je. Galacia jenda je. Capadocia jenda je. Asia jenda je. Bitinia jenda je. Jê ja je aico ã mbesa a. ²Dios que jêirabo umbaerã nyii jeã mose ra. Espíritu Turã ngue jemii icúe Dios mbaerã cote ra. Jê echeẽ mumbayã sacua. Jesucristo ruqui jembitorõ sacua abe jêicua si no. Sã Dios riqui turã i i tuchi jendese. Sã eriqui jembia i i tuchi no.

Dios ra mbae turã mee ja nande je

³ Nandechẽ turã mbei quia Dios rii. Jesu cristo rute quia ae re. Ae que eya eãte riqui nanderese ra. Nyebe nandesi nguiã mbiasu nguirina cote. Dios Jesucristo raaque mbuquera mose, aque mose que nandembiasu nande abe ra. Nyebe nandeco nguiã ñee ã. “Dios cheẽ nda io turã ja nande je”, i ã. ⁴ Dios ra nandemingo bei. Eriirite quia nandre. Nyebe ra mbae mee ja nande je nandeco mose ibate. Mbae icua ndese ra nandemae eã tuchi aque mose cote. ⁵ Jêingo Dios icuate ãquĩ. Nyebe ae riqui nguiã jendeaquiatu tuchi uquirãcuã je co. Dios que mbae mbuquiche ja nande je ra. Nandererao sacua ibate. Mbae ua ja mose ra nandererao ja ibate cote. Co eriqui raã nguiã nandereaquiatu co. ⁶ Nyebe jeyate riqui nguiã ãquĩ. Mbae rasi tu mbirĩ arõte raque jêje. ⁷ Sã mbia riqui oro mbuchi no. Equia rirõ sacua esi. Eĩ ño Dios nguiã jêje co no. Jê Dios icua tuchi sacua ño mbae rasi riqui re. Nyebe Dios jêicua. Mbae rasi raã naa ndaque. Etura tuchi chõ ãquĩ oro si re. Oro quia ra ua emo mose. Jê nguia ra jêhua eã mbei Dios icua

mose. Jesucristo tu mose nda Dios ñee turã tuchi jeni ña. ⁸ Jêingo nyese-cuate Jesucristo rese ãquĩ. Jemae eãte raque quia erese ãquĩ. Jêingo eicuate jeñiangui re ãquĩ. Jêya tuchite riqui erese ãquĩ. ⁹ Jêingo Jesucristo icuate ãquĩ. Nyebe ra Dios jêã mingo turã mbei cote.

¹⁰ Sã Dios cheẽ mbuchecuada ñee cose no. —Mbia ra mae jee Dios turã ndese, i que ñee nda. Nanderii ño ngue eriqui nguiã ñee. —Mañi nda Dios quia reae. Utura je ra mbia mingo bei reae, i que Dios cheẽ mbuchecuada ndua ndua cose ra. ¹¹ Espíritu Turã ngue siqui quia Dios cheẽ mbuchecuada chiangui re ra. Mbiirandu randu que equia Cristo rii nda. —Cristo ra mbae rasi saã tuchi. Aquere ra equirãcuã tuchi mbia rerecua mose ae cote, i que Espíritu Turã Dios cheẽ mbuchecuada mbiirandu nyii ra. —Manosete ra ãquĩ ndeae. Aba rii eriqui “Cristo” i remi, i tuchi que Dios cheẽ mbuchecuada quia ndua ndua ra.

Dios que jemii icúe umbaerã nda

¹² Dios que embiirandu ra. —Jê jêtiamba quiatu ra Cristo mbae rasi saã mbia mingo bei sacua. Jêtiamba quiatu ra Cristo mbae rasi saã mbia namonda je. Mbia emo mosenda je, i que Dios ra. Nanderii ño ngue eriqui nguiã “namonda” i. Nyebe mbia riqui nguiã ãquĩ ja renei nenei jêje Cristo rii cote. Espíritu Turã abe riqui erenei nenei jêje co cote. Angeles abe ãquĩ icua sete raque quia Cristo rii ãquĩ. ¹³ Jendua tuchi rã nguia mbae raã nonde. Jêtesa bei quiatu quia. Jesucristo tu mose, eturã tuchi ra ae jêje aque mose. ãquĩ ndese quia jêingo bei tesa eraarõ. ¹⁴ Ae jenyosei chosei quia nyii nae, Dios icuayã mose nyii nae, ãquĩ ndese jêingo ndua eã cote. Dios cheẽ jemumba eã ño nguia cote. ¹⁵ Dios quiarei jemingo icúe umbaerã tuchi. Nyebe jêingo turã tuchi ae rã si. ¹⁶ Sã Dios cheẽ mbesa ji riqui no: —Jêtura ño jêingo se rã si, i ñi embesa ji re. ¹⁷ ãquĩ jêingo “Paba” i Dios je ãquĩ.

Nyebe jëingo ireĩ ireĩ jiri esi jëingo mose íbii. Dios ra mae nandechiao ja ja rese. Emo chiao rese ra mae eã eã. ¹⁸ Nandei ñiinda que siqui chooño nguia cose ra. Dios rese siqui rocoĩ. Eĩ nande que equia nande abe nyii no nda. Dios que nanderirõ ùquĩ si cote ra. Dios que mbae isiquia mondo eã nanderirõ sacua nandecuã si ra. Oro que emondo eã no nda. Plata abe no. ¹⁹ Cristo ruqui quiatu ngue nanderirõ nguia nandecuã si. Aba queteamba tuchi chõ Cristo ruqui re. Cristo mano mose nande je que eruqui uchẽ tuchi ra. Sã sacerdote oveja turã ño iquia no. ²⁰ —Cristo ra mano mbia icua ndiquicharõ, i que Dios nyii mbae ao nonde ra. Namõ ño ùquĩ io nguia jėje cote. Namõ ño Cristo mano nguia jėje cote. ²¹ Cristo chõ Dios icua uquia nguia jėje ùquĩ. Dios chõ ngue Cristo raaque mbuquera nguia. Dios chõ uquirãcuã mee nguia Cristo je. Nyebe jëingo nguia Dios icua ùquĩ cote. Nyebe jëingo nguia ñee. “Dios ra nandemingo bei ibate” i ùquĩ.

²² Dios cheẽ jëisi turã mingo ùquĩ cote. Nyebe jeñia mbitirõ nguia mbushĩ cote. Nyebe jëingo nguia nyesequa arõte mbia rese cote. Jyesequa tuchi quiatu quia jenyese jẽ. Nandechiangui re chõ nandeco nyesequa tuchi mbia rese jẽ. ²³ Nyaacuquia si je raanguia chõ jẽ cote re. Nandechaacuquia que equia nyii nae, mbia chõ ngue nanderu nyii ra. Nandechaacuquia sire, Dios que nanderu tuchi cote ra. Dios cheẽ ño nandembuchaacuquia si nguia. Echeẽ nda ua eã bei. Siqui bei rae. ²⁴ Sã embesa ji riqui ñee no:

Quiata rã tuchi chõ mbia ja riqui nguia ã.

Sã quiata riqui mano jeite no.

Quiata uti rã ño mbia riqui nguia ã no.

Etura mbirĩ ño chĩ ndaque nyii.

Aquere chõ ñimama cote. Mano cote.

²⁵ Dios cheẽ nguia ra ua eã mbei,

i que embesa ji ra. Dios cheẽ sí chõ ngue jeñandu nguia Jesucristo rĩ. Jemingo bei sacua.

2

Jëo tuchi chõ nguia Dios cheẽ ndese

¹ Nyebe jëhui mbae icua ja si. Jẽ nda mbia jembirĩ irichĩ nguia jẽ. Jenguasu ra jësaã saãchĩ. Emo mbae ra jenyosei choseichĩ nguia jẽ. Jeñee icua icuachĩ nda equia emo ni jẽ. ² Sã ãquẽ itãqueĩ ndiqui uchũ achã asite no. Eĩ jenyẽ bei chõ nguia oo Dios cheẽ ndese. Eĩ nda jëquirãcuã tuchi riqui Dios rese. Sã ãquẽ quirãcuã ndiqui quiambure no. ³ Dios turã ngue jësaã ndei resẽ.

Sita turã na ño Cristo re

⁴ Jesucristo ra siqui bei. Jesucristo rei sita turã na. Sã mbia riqui sita mo ndirirõ no. Eĩ si chõ mbia nguia Jesucristo ririrõ ndei ã. Dios queteamba tuchi quiatu Jesucristo re. Dios chirabo tuchi chõ ae re. Jesucristo jësiichã i i tuchi quiatu quia jẽ. ⁵ Sita turã na ño jëingo nguia jẽ abe ùquĩ. Sã Dios chuchua ao ji sita turã je no. Dios chuchua ao ji rã ño jẽ no nde. Jeñee turã mbei quiatu quia Dios je. Jẽ sí chõ jendete jemondo quia ee. Jëingo bei quiatu quia icúe embaerã. Ùquĩ mose ra Dios jëisi turã mbei Jesucristo rĩ cote. ⁶ Nyebe Dios cheẽ mbesa ji riqui nguia ñee:

Jesucristo ra amĩ Zión.

Tuchua i turã na tuchi chõ Jesucristo re.

Sechiirabo tuchi chõ ae re.

Aba queteamba tuchi chõ ae re.

Ae Jesucristo icuate quia nae, ùquĩ mo nda ñee eã.

“Jesucristo rui aico jirichĩ co”, iã nda emo,

i que embesa ji ra. ⁷ Sã mbia mo tuchua ao sita turã je no. Ùquĩ sita turã na ño Jesucristo riqui nguia co. Ùquĩ jëingo Jesucristo icuate ùquĩ. Nyebe jengueteamba tuchi ae riqui nguia co. Ae Jesucristo icua eãte quia nae, ùquĩ je ra embesa ji cheẽ io tuchi cote. ã ndei embesa ji cheẽ ã:

Ae tuchua aosa quirirō sita nae, aque quia ra tuchua i turā tuchi cote, i que embesa ji ra. ⁸ Sã embesa ji riqui ñee no: Sã sita riqui pãtã i emo cúi je no jẽ. Embucoi no jẽ, i que embesa ji ra. Eĩ si chõ nda mbia pãtã i raanguia Jesucristo cheẽ je. Jesucristo cheẽ mumbayã sereãte quia ñene. “Echeẽ mumbasa ra pãtã i raanguia”, i que Dios ñiinda mosenda bei ra.

Dios mbaerã tuchi chõ jẽ nde

⁹ Dios que jẽirabo umbaerã tuchi ra. Sacerdotes rã ño jẽingo nguiã Dios je ũquĩ. Dios que jemingo icúe umbaerã nda. Jẽ mbia mbiirandu randu bei sacua Dios chiao turã nii. Ae quiatu que jendirō itondaru si ra. Jẽingo sacua nyaashĩ Dios rese cote. ¹⁰ Mbia chĩbutereãte que jẽ nyii ra. Dios quiato tuchi chõ namo jẽ cote re. Emo ngue ndua eãte quia jendese nyii ra. Dios quia ndua tuchi nguiã jendese co cote.

Dios rimba chõ jẽ nde; nyebe jẽingo turã

¹¹ Achesequa tuchite quia jendese co. Isho ishote jẽingo jendecua si ũquĩ. Ae mbia chosei chosei quia mbae icuã nae, ũquĩ ndese ra jemaie maechĩ. Eicuãte riqui nandeaĩ je ũquĩ. ¹² Ae Dios icua eãte quia nae, ũquĩ ndésaa jẽingo turã ño nguia. ũquĩ ndiqui ñee icuã icuãte raque jeni ũquĩ. Jẽicuã mose rocoĩ. ũquĩ nda mae jee jẽturã ndese. Ñee turã jee ra Dios rĩ, Jesús tu mose.

¹³ Mbia rerecua ja cheẽ jemumbayã ño nguia Dios je. Ae ererecua tuchi ererecua ja si nae, aque cheẽ abe jemumbayã ño nguia no. ¹⁴ Sã ererecua tuchi riqui mbia rerecuarã mii jaaja no. Mbia icuã mbasi mbasi sacua. Mbia turã ndeaquiato sacua abe no. ũquĩ ñee abe jemumbayã ño nguia no. ¹⁵ Jẽingo turã ño nguia jẽ. Jẽingo turã mose ra mbia aquiatuã ñee icuã aroneate jẽje. Dios bite ũquĩ. ¹⁶ Jesucristo que jembui mbae ja si cote ra. Jenderecua eãte raque mbae

mo cote. —Mbae icuã tasaã, Sererecua eãte rei ñene, jenyechi ndae. Dios rimba chõ jẽingo. ¹⁷ Jẽingo turã ño nguia mbia ja je. Jenyesequa chõ nguia jendesenda Jesús quiato rese. Jẽireĩ ireĩ jiri Dios si. Mbia rerecua cheẽ nda jemumba mumbachĩ jẽ.

Cristo rã si chõ jẽingo ñimbirãcuã turã mbae rasi je

¹⁸ Mbia rimba je tacheẽ cote. Jenderecua cheẽ jemumbayã ño nguia jẽ. Jẽireĩ ireĩ jiri quia esi jẽ. Jenderecua icuã mose abe chõ echeẽ jemumbayã nguia. “Jenderecua turã mose achõ ño echeẽ jemumbayã”, ae eã nguiã jẽje co. ¹⁹ Mbia icuã icuã ñooño mose nande je, nanderoseĩ nguiátu chõ nandeico. Dios bite ũquĩ. Dios rĩ nanderoseĩ nguiátu mose, ebite ũquĩ. ²⁰ Mbae turã jẽsaã saã mbei chõ nguia. Mbia jẽiruã nua mose jẽturã nii, jendoseĩ nguiátu chõ jẽingo. ũquĩ mose ra Dios ia tuchi jendese. Mbae icuã mo nda jẽsaãchĩ. Jẽ mbae icuã naa mose, Dios biãte ũquĩ. Mbia jẽirua nua mose jẽicuã nii, jendoseĩ nguiátu raque rae, Dios biãte ũquĩ. Jẽicuã nii ño ñene. ²¹ Nyebe Dios “jẽingo serui”, i nguiã nande je. Sã Cristo roseĩ nguiátu tuchi mbae rasi raã mose nande je no. Nande abe nanderoseĩ nguiátu sacua eraã si. ²² Cristo que mbae icuã mo saã eã tuchi ra. Mbia mo ngue embiri iriã tuchi quia ra. ²³ Mbia ñee icuã mose Cristo je, ae que ñee icuã eã mbei mbia cheẽ ndibishorō nda. Mbia Cristo mbaasi asi mose, “tasaã se”, iã tuchi que equia ra. “Dios quiarei”, i chõ ngue equia ra. ²⁴ Jesús mano mose ira mbuchicuandasa ji rese, nandeicuã ndiquicharō ño ngue mano nguiã. Eraaque rã nandeico sacua mbae icuã je chõ ngue re. Nandeico sacua mbae turã ndese chõ ngue re. Cristo mbae rasi raã mose, jembitorō sacua ño ũquĩ nde. ²⁵ Ovejas quiachã je rã ño ngue jẽingo nguiã nyii. Jenyebi que oso ngasẽ Cristo rea cote ra. Ovejas

raarõsa rã ño ae riqui nguiã jêje co cote. Ae chõ jendeaquiatu nguiã co.

3

Jendu cheẽ jemumbayã ño nguia, i cuña je

¹ Mbia ninisi je tacheẽ cote. Jendu cheẽ nda jemumbachĩ jẽ. Jesús quia-toã ndaque jendu. Echeẽ jemumbayã ño. Jendu nda Jesús icua chee cote chã. Jẽingo turã mose ee. Jẽ Jesús cheẽ nenei neneinde rocoĩ ee. Jesús nda eicua cote chã. ² Jẽingo turã ndese ra jendu mae nyee. Echeẽ jemumbayã mose. ³ —Mbae je nda serete ambarõ na ña, jenyechĩ nda ndua ndua jẽ. Jẽo resenda rese. Jẽhui rese abe no. Tiru turã ndese abe no. Jẽa uma ji turã ndese abe no. Ûquĩ mii ndese chõ nda jẽingochĩ ndua beite jẽ. ⁴ Jeñiangui re quiatu jẽingo turã. Jẽingo tochi chõ nguia. † nda jêturã ua eã mbei jêsi. Ûquĩ nguiatu Dios bite re. ⁵ Sã cuña mo no. Dios quiato cose no. Ûquĩ nguiatu que eturãte riqui uchiangui re quiatu ra. Ngu cheẽ abe mumbayã no. Ndua rocoĩ nguete resenda umbarõsa rese. ⁶ Sã Sara Abraham ñee mumbayã no. Sererecua i ee. Jẽingo turã mose, Sara rã nda jẽ cote. Mbae mo si ra jêsiquichechĩ cote jẽ.

Jẽingo turã ño nguia jeninisi je

⁷ Tacheẽ eninisi rerecua je cote. Jẽaquiatu chõ jẽingo turã jeninisi je. Jeninisi jemingo turã. Jẽingo tochi chõ nguia ee. Jẽ nguia jeãtã jiri esi re. Dios quia eturãte jẽ ja je re. Jeninisi rese. Dios que jendeco mingo nyiese ra. Jeninisi rese. Nyebe jẽingo nguiã siqui turã jeninisi je. Ûquĩ mose ra Dios jeñee andu bei, jeñee mose ee.

Mbia icuã icuã mose jêje jêturã mose, jêya chõ jẽingo

⁸ Jẽingo turã ja chõ nguia jenyue no. Jêya eã jiri jẽingo jenyiese no. Hue rĩ ja chõ jẽingo ndua ja. Jenyesequa ja chõ nguia nyiese. Jêseteã ño jẽingo nyue. ⁹ Mbia icuã mose jêje, jêicuãchĩ nda jẽ abe ee. Mbia ñee icuã mose jêje,

jeñee icuãchĩ nda jẽ abe ee. Jeñee turã nguiatu quia ee jẽ. Jẽingo serui, i chõ ngue Dios jêje re. Dios ñee turã mbei sacua jeni ño ngue re. ¹⁰ Sã embesa ji riqui ñee no:

Jẽingo turãse mose, jeñee icuã eã emonii.

Jẽingo chooño sereã mose, jeñee ñooño eã emo je no.

¹¹ Jenyicuasẽ ño nguia mbae icuã si.

Mbae turã ño jêsaã nguia.

Jêturã ño nguia mbia ja je jẽ.

¹² Ae siqui turã nguia nae, ùquĩ Dios teaquiatu bei quia co.

Ûquĩ ñee Dios chandu turã mbei quia co.

Ae siqui quia mbae icuã ndese nae, Dios biã tuchi chõ ùquĩ nde, i que embesa ji ra.

¹³ Jẽingo turã mose ¿mañi nda emo mbae icuã naa jêje re? ¹⁴ Mbia icuã icuã mose jêje mbae turã naa mose, jêya tuchi chõ ùquĩ mose re. — Mbae icuã nda asaã ndeje jẽ, i mose jêje, jêsiquicheã ño esi. ¹⁵ Jesucristo jemingo tuchi chõ nguia jeñiangui re jenderecuarã. Emo ñee mose jêje, jeñee aquiatu chõ ee. —¿Mbaerã ereico Jesucristo rese re? i mose emo jêje, jeñee aquiatu chõ ee. Jẽingo mingue chõ ee. ¹⁶ Jẽingo turã mbei. Diosbi rese jẽingo bei. † nda jêya bei riqui. † nda “mbae turã asaã eã ñochĩ”, jenye eã. Ae ñee icuã icuã nguia jeni nae, ùquĩ nda ireĩ ireĩte quia ucheẽ icuã si cote. Ireĩ ireĩ nda jẽingo turã mose Cristo rese. ¹⁷ Mbae rasi jêsaã mose jêturã nii, ùquĩ nguiarei Diosbi tuchi. Mbae rasi jêsaã mose jêicuã nii, ùquĩ nguiarei Dios biã tuchi. Mbae icuã niite quia ñene. ¹⁸ Cristo abe que mbae rasi saã nande je ra. Mbae icuã naande rocoĩ. Ae raque eturã. Mbae rasi que esaã nandeicuã ndiquicharõ nda. Nandemingo sacua Dios rese. Cristo rete que mano nda. Espíritu Turã ngue embuquera si ra. ¹⁹ Aque mose que Cristo si Dios cheẽ nenei nenei mbia aĩ tarõ ji je ra. ²⁰ Ûquĩ ngue Dios cheẽ mumba mumba quia nyii ra. Noé

Dios cheẽ nenei nenei mose ee. Dios roseĩ nguiátu tuchi que eriqui mbia riisu isu aque mose ra. Noé siqui bei mose arca raã naa. Aquere que mbia mĩite ique arca ye ra. Ocho que mbia ra. Siqui bei sacuaã ama ndicuasú mose. ²¹ Sã ama Noé mumbebi mingo no. Eĩ si chõ bautismo co no. Nandei mbuchasu mose, aque quia ra nandemingo eã Dios rese. Nandechiã mbitirõ ji mose, aque mose quia ra Dios nandemingo bei cote. Bautismo tuchi chõ ùquĩ nde. ²² Jesucristo quera sire que esi ibate ra. Hue eriqui beite Dios jii hue cote. Mbae ja rerecua tuchi chõ ae cote re. Angeles rerecua. Ibatenda rerecua ja.

4

Mbae jẽsaã turã ja

¹ Sã Cristo mbae rasi saã tuchi siqui mose ibii no. Eĩ jenye si chõ nguia ñimbirãcuã nguiátu mbae rasi raã mose. Ae mbae rasi saã tuchi quia nae, ùquĩ nda mbae icuã saã eã mbei cote. ² Ae Dios bite nae, ùquĩ ndese ra eriqui bei cote. Ae echoseite quia nae, ùquĩ naa ndocoĩ. ³ Mbia ataque rã tuchi que nandeco nyii ra. Nandeco tuchi que eriqui nyii ra. Ae nandehoi quia nae, ùquĩ ndese achõ ño ngue nandeco nyii ra. Nandequiacua quiacua que equia nyii ra. Nandechimbusarei chooño mbei que equia nyii ra. Dios abareã ndese que nandeco ndua tuchi nyii ra. Huee chõ cote. Nandehui que ùquĩ ja si cote ra. ⁴ —¿Mbaerã jẽingo bei eã mbae icuã naa naa urerese re? i nandere-senda ñiinda quia nandeco je ã. Nyebe eriqui nguia ñee icuã icuãte nandeco je ã. ⁵ —¿Mbaerã ùquĩ jẽsaã nde? i chee ra Dios ùquĩ je cote. Dios mae mose mbia chisaã saã ja rese. Aque mose ra Dios mbia mano je abe chisaã ndea ja. Mbia reco abe chisaã ndea ja. ⁶ Ae mano mbia nyii nae, ùquĩ je que Jesucristo Dios cheẽ nenei nenei nda. Eaĩ siqui turã sacuaã Dios rã si. Erete mano ndaque huicuaã je.

⁷ Achite mbae ñi ua ja a cote. Nyebe jẽingo mbae turã naa naa

ja bei. Nyebe jẽingo ñee ñee mbei Dios je. ⁸ Jenyesequa tuchi quiatu quia jenyese. Ùquĩ mose ra jẽtesarei jenongue icuã si. ⁹ Jenongue jẽisi turã ño nguia nyoĩ mose jenyuchua. Jẽya chõ jẽingo eisi mose. ¹⁰ Dios que nandehisaã saana mee nandeco ae ae je ra. Ùquĩ jẽsaã turã turã ño nguia jẽataque je. Dios uaquiato mee mose jẽje mbae mo naa sacuaã, ùquĩ jẽsaã turã turã ño nguia jẽataque je. ¹¹ Emo Dios cheẽ nenei nenei mose, sã Dios cheẽ tuchi chõ esenei senei nguia. Jemo mbae turã naa naa mose uataque je, sã eriqui eraã turã Dios quirãcuã ñi. Ae jẽsaã saã nguia mbae nae, Dios je chõ jẽsaã. I nda mbia ñee turã mbei Dios riĩ. Jesucristo riĩ abe no. Sã mbia ñee turã mbei Dios riĩ. Amén.

Mbae icuã tuutu mose jẽje, jẽya cho jẽingo

¹² Mbae icuã tuutu mose jẽje, “¿mbaerã eriqui seje re?” jenyechi nda nyuruirate, Seresenda. Eĩ mbei chõ mbae icuã nguia tuutu Jesús quiato je. ¹³ Mbae icuã tuutu mose jẽje, jẽya chõ jẽingo. “Cristo rã si chõ nandeco nguia mbae rasi raã”, jenyechõ nguia ñimbia. Cristo nininya tu mose, aque mose abe nda jẽya tuchi chã. ¹⁴ Mbia ñee icuã icuã mose jẽje Cristo riĩ, coche ñene. Jẽya chõ jẽingo. Espiritu Turã ño jẽichu ichu nguia ùquĩ. ¹⁵ Mbia jembaasi asi chooño mose Cristo riĩ, jẽya chõ jẽingo. Jẽicuã ñi mbia jembaasi asi mose, ùquĩ quiatu aba ireite re. Jẽ mbia mo iquia mose. Jẽ mbae mo mbuquiachã mose. Jẽ mbia mo mbupaama i mose. Jẽ ùquĩ icuã mo naa mose, aba ireite ùquĩ. ¹⁶ Mbia jembaasi asi mose Cristo riĩ, jẽireĩ ireichĩ nda ùquĩ mose. Cristo resendate quia jẽ nde. Nyebe jẽya chõ jẽingo. ¹⁷ Dios ra mae ja chee mbia chisaã ja rese. Achite Dios ñi mae uquiato chisaã ndese a. Nandehisaã ndese chee ra Dios mae. Uquiato chisaã ndese chee. Mañi nda uquiatoã nyisaã je remi. Ùquĩ quiatu ra embasi

tuchi nandesí quiatu. Dios cheẽ turã nguiatu ngue eisiãchĩ nguiã. ¹⁸ Dios quiato riqui ñimbirãcuãyã arõ arõte mbae icuã tuutu bei mose ee ã. Dios quiatote raque. Dios quiatoã nguiatu ra ñimbirãcuãyã tuchi mbae icuã si. Dios ra emondo chee tata cuasu. ¹⁹ “Mbae rasi jësaã”, i mose Dios nande je, nandesã turã ño nguia ee. Mbae turã nandesã i i chõ nguia ee. Nandereco nandemee tuchi nandeaosa Dios je. Ae ra ucheẽ mbuchebiã mbei nande je.

5

Jesús quiato jëteaquiato turã ño nguia

¹ Jeñimunua je rerecua ja je tacheẽ cote. Cristo quiato rerecua chõ se no nde. Cristo mbae rasi raã ndese que amae se ra. Cristo nininya nyecua mose, se abe ra aico bei erese cote. ² Ae Jesús quiato siqui quia jendese nae, ùquĩ jëteaquiato turã nguia. Sã ovejas raarõsa riqui ovejas raarõ turã no. Eĩ jenyee chõ nguia Jesús quiato raarõ. Jëteã teã eã ño nguia mbia mbaaquiato quiatu. Jendua ndua eã ño nguia mbae isiquia rese. ³ Jëingo tochi chõ nguia Jesús quiato chimunua nua je. Mbiacha ra jësaã saã techĩ ee jë. Jëingo turã ño nguia eresa rae. ¶ nda jë na sí eriqui. ⁴ Jesucristo quiarei mbia reaquiatusa tuchi nande si. Ae tu mose, mbae turã tuchi mo nda emee jëje premio. Ùquĩ nda ua eã mbei. ⁵ Acuanindu je tacheẽ cote. Amei ñee jemumbayã ño nguia jë. Jë ja jëataque cheẽ jemumbayã ño nguia jë. Jëingo tochi ja chõ nguia jenyue jë. Sã embesa ji riqui ñee no:

Ae ucuasu saã saã nguia nae, Dios biã tuchi chõ ùquĩ nde.

Ae siqui tochi quia nae, ùquĩ je quiatu ra Dios turã mbei riqui, i que embesa ji ra.

⁶ Jëingo tochi chõ nguia Dios je jë. Equirãcuã tuchi chõ ae re. Ae ra mbia mumae turã nyee jendese emo mose cote. ⁷ Jendua ndua ia eã si

jëhui chõ. Jemee ño Dios je. Ae riqui ndua beite jendese co. Jendeaquiato beite quia co. ⁸ Jeñimbaaracua chõ nguia jë. Jëtesa bei chõ nguia jë. Aba checuayã nderecua riqui ngata beite co jë. “Mbia tambicuã icuã”, i beite equia co. Sã nyacua no. Sã nyacua risha riqui ureĩ mbocheite “mbae tau” i no. ⁹ Aba checuayã nderecua jësiquisã ño nguia jenyese. Dios jëicua tuchi chõ nguia jeñiangui re. Sã jendesenda ishonda ja riqui mbae rasi raã tuchi no. Jë na si no. ¹⁰ Sã Dios turãte riqui nande je no. Mbae rasi ra jësaã ndaque nyii. Aquere ra Dios jembitirõ cote. Jembirãcuã tuchi cote. Dios sí chõ ngue ñee nguia nande je. “Taemingo bei serese ibate Jesucristo riĩ”, i nguia nande je. ¹¹ Dios quiarei equirãcuã mbei. Eturã mbei. Amén.

Pedro ñee hui bei sacua cote

¹² Co ambesa quia jëje co. Jemingo i i sacua Dios rese. Jembaaquiato sacua Dios turã ñi. Jëingo bei chõ nguia erese. Co ambesa mondo quia jëje aque. Silvano ndese aque. Jesús quiato turã tuchi chõ Silvano nde. Nanderesenda re. ¹³ Jesús quiato Babilonia jenda saludos mondo quia jëje aque. Dios chiirabo chõ ã nde. Jë na si. Marcos abe saludos mondo quia jëje aque no. Seriiĩ na ño aico nguia ee co. ¹⁴ Saludar jenyee turã turã ño jenyue mambi. Jenongue ritii abe jësiite ite chõ nguia mambi. Jesucristo quiato jate quia jë nde. Sã jëya beite riqui. Amén.

SEGUNDA CARTA DEL APOSTOL SAN PEDRO

Pedro ucheẽ mbesa mondo Jesús quiato je

¹ Simón Pedro chõ se re. Jesucristo rimba chõ se re. Jesucristo chimbaaquiatu chõ se re. Aico co mbesa mbesa jẽje co. Ure rã si chõ jẽingo nguiã Jesucristo icua ùquĩ. Nandebi tuchi Jesucristo icua mose. Dios turã tuchi nandemingo mose Jesucristo rese. ² Sã Dios turã ndiqui tuchi jendese. Sã Dios jembia tuchi mingo. Jesucristo jẽicua i i tuchi bei oso quia.

Jeñimbaaquiatu i i tuchi Dios rĩ

³ Jesucristo nandecuate quia ã. Nyebe Dios riqui nguiã mbae raã ja tuchi nande je co. Nandemingo bei sacua. Nandeco sacua erã sí. Uquirãcuã je eriqui mbae raã ja tuchi nande je co. Uturã ngue emee nande je ra. ⁴ Dios que ucheẽ turã mee nande je ra: —Co tasaã jẽje. ã tasaã jẽje. Co abe, i tuchi que equia nande je ra. Ùquĩ ngue esaã ja nande je cote ra. Jesucristo rã si que nanderaã nda. Ae mbae icua mbia chosei chosei quia nae, ùqui si eriqui nanderiquisã quisã co. ⁵ Jẽingo Dios icuate ùquĩ. Jẽingo turã ño nguia jẽ. Jeñimbaaquiatu i i tuchi quiatu quia Dios rĩ jẽ. ⁶ Jendeco jẽingo turã ño nguia i co jẽ. Jẽingo mingue chõ nguia jẽ. Dios rã si chõ jẽingo jẽ. ⁷ Jẽingo turã ño nguia jenyue. Jenyesequa chõ nguia jenyese no. ⁸ Eĩ jenyese mose, eturãte ùquĩ. Eĩ jenyese i i tuchi chõ nguia jẽ. Ùquĩ mose ra Jesucristo jẽicua chooño eã. Mbae ra jẽsaã saã tuchi quia ee. ⁹ Eĩ jenyese eã mose, mbia resayã na ño jẽingo nguiã ùquĩ. Eĩ jenyese eã mose, jẽtesarei chõ ndei equia jeñia irei ji si ùquĩ. Jesús jẽicuaã cose ndare mbutiã mose. ¹⁰ Ùquĩ jesaã saã tuchi chõ nguia jẽ. Jẽ ùquĩ naa

mose, jẽ sí chõ nda jeny#cua quia. “Dios chiirabo chõ nande re”, jenyese tuchi ra equia. Jẽhui eã mbei ra equia Dios si cote. ¹¹ Dios ra jẽisi tuchi mingo Jesús récuua cote. Huee ra jẽingo bei erese.

¹² Nyebe ra aico bei jemundua ndua ùquĩ ndese. Jẽicuate raque. Jẽingo turãte raque Dios cheẽ ndese. ¹³ Coche aico rei jemundua ndua ùquĩ ndese a. Sereco siqui mose a ra aico jemundua ndua bei ùquĩ ndese. ¹⁴ Jesucristo que ñee seje ra: —Ereico arete eã nda íbii, i que sembiirandu ra. ¹⁵ Taemundua ndua bei erese. I nda jẽtesareiã mbei esi semanonde abe.

Se sí amae Jesucristo rese, i Pedro

¹⁶ Jesucristo quirãcuã ngue ure-senei senei tuchi quia jẽje ra. — Jesucristo ra tube íbii, ure tuchi que equia jẽje ra. Ichoiñosa reã ñeetuchi chõ ùquĩ nde. Mbia ñee ñooño je eã tuchi chõ ùquĩ nde. Se sí chõ ngue amae Jesucristo nininya rese ra. ¹⁷⁻¹⁸ Dios que unininya mee ee sita íbátee ereco mose ra. Se abe reco mose huee que ra. Serésaa que Dios unininya mee Jesucristo je ra. — Seririñ ño co re. Sechesequa chõ co re. Seyate erese, i que Ibatenda ñee aque mose ra. Echeẽ ngue achandu se abe ra. ¹⁹ Eĩ sí tuchi que Dios cheẽ mbuchecuaa chimbesa nyii ra. Echeẽ mbesa ji chooño eã ño ùquĩ nde. Jẽingo tuchi quia echeẽ mbesa ji rese. Mbae resaesa tuchi chõ echeẽ mbesa ji re. Sã tata rendi riqui itondaru resaete nyaashĩ nyee no. Jẽingo tuchi mose echeẽ mbesa ji rese, Cristo ra jendique tesae tuchi quia jẽje. Sã nyasitata riqui nandere-sae no. ²⁰⁻²¹ Dios cheẽ mbuchecuaa mo ngue ñee ñooño eãte quia emo mose ra. Ucheẽ ae que embesa mbesa eãte quia ra. Espíritu Turã ño ngue embucheẽ nguia ra. Espíritu Turã ño ngue Dios cheẽ mbesa mbesa uquia quia ee ra.

2

Ae mbia mbĩĩĩ irĩ nguia embaaquiatu quiatu mose

¹ Mbia mo ngue Dios cheẽ mbuchecuasa saã ñooñote quia cose ra. Espĩritu Turã ae que embucheẽ eã nda. Eĩ sí ra emo jembĩĩĩ irĩ ñooño name. Ñee ñooño nda equia Dios rĩĩ jẽje. Hui huĩte chõ nda equia Jesucristo si. Ae mano nguia erĩ. Nyebe ra Dios ũquĩ mbutiã asi. ² Mbia ra siqui tuchi mbae icuã ndese ũquĩ ñee nguire. Mbia ra siqui chooño ño cuña mo ndese ũquĩ ñee nguire. Nyebe ra mbia ñee icuã icuã Jesús cheẽ turã nii. ³ Ũquĩ nda mbae isiquia choosei oseĩ tuchi chõ nguia jembae. Nyebe ra jembaaquiatu icuã icuã. Dios que ñee ũquĩ nii coose ra. —Ũquĩ nda ambasi tuchi je, i que ra. Achĩte ũquĩ ñi a cote.

⁴ Angeles mbae icuã naa mose, ũquĩ nyee que Dios tiisu isu ãte quia ra. Ecuã jĩ que emombo tata cuãsuu ra. Itondáruu que emombo ra. Siqui bei sacuã huee, Jesús tu chee mae eicuã ndese. ⁵ Mbia cose ndare abe que Dios tiisu isu ãte quia ra. Noé mosenda. Ũquĩ ngue eicuãte riqui ee ra. Nyebe que Dios ama mbuchaaqui tuchi ee ra. Ama mbicuasu mbia iquia ja sacuã. Noé mĩĩ ngue Dios iquia eã nda. Mbia siete rese. Dios cheẽ nenei neneisate quiatu ngue Noé nde. ⁶ Sodoma jenda abe que Dios tiisu isu ãte quia ra. Gomorra jenda abe no. Mbia icuã tuchĩte quiatu ngue re. Nyebe Dios ũquĩ ndei ja nguia tata je. Echuchua ja resebe. —Eĩchĩ nda nande abe je re, nandeico eã mose erese, i sacuã mbia icuã. ⁷ Lot mĩĩ ngue Dios iquia eã nda. Eaturãte quiatu ngue eriqui nguia Dios je. Eya eãte que eriqui mbia hue jenda mbae icuã naa naa mose ra. ⁸ Mbia mbae icuã naa naa mbei mose que Lot ia eã mbeĩte riqui ra. Ae mĩĩ ño ngue echĩã turã Dios je ra. Nyebe Dios ae mĩĩ iquia eã nguia. ⁹ Ae siqui beite quia Dios rese nae, Dios riqui ũquĩ

ndeaquiatu beite co. Mbae icuã jea je esi tã i mose ee. Ae mbae icuã saã nguia nae, ũquĩ nda Dios mbasi tuchi. Jesucristo ra tu chee mae eicuã ndese.

¹⁰ Ae siqui quia mbae icuã ndese ubi nae, ũquĩ nda Dios mbasi tuchi. Ae aba cheẽ mumba quia, ũquĩ abe ra Dios mbasi no. Ae eĩ ñooñote quia mbia je nae, ũquĩ. Ae ñee ñooñote quia mbae ibatenda je nae, ũquĩ abe no. ¹¹ Mbae ibatenda rĩĩ ngue ángeles ñee icuã eãte quia Dios je ra. Angeles quirãcuãte raque mbia si. ¹² ã mbia quiarei mbae quiaa rĩinda rã tuchi. Ndua turã eã mbae rese. Siqui chooño. Ñee icuã ñooño mbae icua rocoĩ. Mbae quiaa rĩinda rã ño nda ã mano cote. Dios ra eiquia tuchi. ¹³ ã nda mbae rasi saã tuchi quia cote. Ubi icuã mĩĩ ndese chõ eriqui nguia ndua ã. Jembĩĩĩ irĩ ño nguia ã. Quiaru chooño ño nguia jendese ã. Jesús quiato raã ñooño jẽje. Aba ireingua tuchi chõ ũquĩ nde. ¹⁴ Maeño aronea cuña mo ndese. Hui aroneate equia mbae icuã si ã. Ubichõ aroneate equia cuña iquia iquia chooño je rese ã. Mbae oseĩ oseĩ jate equia ã. Dios ra embasi tuchi cote. ¹⁵ Ishote eriqui Dios si ã. Nyĩcuasẽ equia Dios si ã. Sã Balaam ndiqui nyĩcuasẽte esi no. Beor riirĩ. Sã mbae icuã naa mbae isiquia isi nonde no jẽ. ¹⁶ Sã burra ñee asite ee no. “Mbae icuã tasaã”, i mose ndua ndua. Sã mbae icuã naa eã burra ñeende ee cote no.

¹⁷ Icuã iru rã ño ã mbia re. Sã quirĩĩã ndiqui ibeishĩ mbucuatate no. Eĩ si chõ ã mbia re. Hue bei eã chĩ. Nyebe ra Dios emombo bei itondáruu. ¹⁸ Uchĩsaã mbae icuã nii ñee ñee ja mbia je. Ucuasu raã naate equia ã. Mbia mbĩĩĩ irĩ mbeĩte equia mbae icuã je ã. Ae hui ramo ndei mbae icuã si nae, ũquĩ abe mbĩĩĩ irĩte equia mbae icuã je ã. ¹⁹ —Jẽingo mose urerese, jẽingo turã ndae, i bei rei equia mbia je ã. Mbae icuã nimba sí chõ ñee ñee nguia ee ũquĩ. Ae rui nandeico quia nae, ũquĩ nimba quiatu nande re. ²⁰ Sã emo Jesucristo

icua raque nyii no. Sã mbae icuã naa eã ndaque ee aque mose no. Mbae icuã embiirĩ irĩ mose ũquĩnde, eicuã tuchi ra cote. Mbae icuã nimba tuchi ra ae cote. Niinda si. ²¹ Dios quia nda ũquĩ icuayã mbei nyii re chã. Dios icuare quiatu ngue hui nguiã echeẽ si. ²² Siqui mbiirĩ ndaque Jesús rese. Hui esi aquere cote. Sã ñooño ndiqui ñemo ndaque no. Sã oso raque ucúẽ ndecha nõ. Nyebi jei chõ u ucúẽ u cote. Sã teasu socio mo ndiqui raque nyasu no. Aquere ñimoo moo ño utuchu je cote. Eĩ ño mbia re, ae siqui juate quia Jesús rese. Aquere siqui jei chõ mbae icuã ndese.

3

Jesucristo ra tube

¹ A aico segunda carta mbesa jêje a. Jemundua turã sacuã ño ũquĩ nde. Ae acheẽ jêje nyii nae, ũquĩ ndese jemundua sacuã ño aico nguiã ã mbesa jêje a. ² Ae Dios quiato senei senei mbia je nyii nae, ũquĩ ndese jendua. Ae Jesús chimbaaquiato ñee mbia je nae, ũquĩ ñee jemumbayã ño. ³ ã ndese jendua: Jesucristo tu nonde ra mbia riqui iquia chooño Dios je. Ñee icuã icuã nda equia Dios je. Ae ebite mbae icuã nae, ũquĩ achõ ndese chõ nda eriqui. ⁴ ũquĩ nda ñee jêje: —Sã Jesús tu ãte no jê. Sã ucheẽ mbuchebi chõ jê. Sã eĩ mbei chõ Dios chisaã ima jê, i ra ũquĩ ñee icuã icuã jêje. ⁵ Cose ndare rese nduayã. Dios que ibei chao ucheẽ je chõ cose ra. Ibi abe que echao i ite re ra. ⁶ Aquere que Dios ama mbicuasura. Mbae iquia ja nonde cote. ⁷ Dios riqui ibei rerecoquiato co. Ibi abe no. ã nandeico irõ erese ã nae, Dios ra emendi cote. Aque mose ra mbia Jesús quiatoã oquei ja.

⁸ Co abe rese jendua, Seresenda: Nyaashĩ mii na ño mil años Dios je re. Mil años na ño nyaashĩ mii Dios je no nde. ⁹ —Jesús ra tu ãte rei no. Ucheẽ embuchebi rei quia mambi, i raque emo emo nguia Jesús rĩ ã.

Ico minguete equia mbia je pe. — Emo nda quiachãyã Dios si chã. Siqui ja nda erese chã, i equia erisu isu pe no. Nyebe eriqui nguiã tu jei eãte. ¹⁰ Mbia mbuate ra Jesús ru. Sã mbae mbuquiachãsa riqui tu itondi-ite mose no. Eĩ si ra Jesús u mbia mbua. ũquĩ mose ra ibei ua cote. Mbae rieu ra aba mundi tuchi. Nyasitata ra membe. Ibi abe ra oquiei tuchi. Mbae ja ra oquiei ibi jenda.

¹¹ Nyebe Dios nandesichã tuchi quiatu quia. Dios rã si quiatu nandeico mbae turã ndese. ¹² Jesucristo ru jenyosei quiatu quia. Ae Dios bite nae, ũquĩ ndese quiatu jêingo. † nda Jesucristo ru jei. ũquĩ mose ra ibei oquiei ja. Nyasitata abe ra membe tata je. ¹³ Aquere ra Dios ibei mbiasu cote. Ibi abe ra embiasu ucheẽ nguire no. ũquĩ ño nandesaarõ arõ nguiã ã. ũquĩ mose ra mbae turã achõ cote.

¹⁴ Nyebe jêingo turã ño Dios rese. Mbae icuã je ra jeñimbicua chĩ jê. Jeñimbicua eã mose ra Dios iate jendese eru mose chã. ¹⁵ Dios siqui minguete quia mbia je co. Mbia rirõ sacuã eicuã si chõ ũquĩ nde. Eĩ si chõ ngue Pablo abe embesa nguiã jêje no. Ae Dios ñee Pablo je nae, ũquĩ sí que Pablo mbesa jêje ra. Nanderesenda tuchi chõ Pablo re. Nandechesecua chõ nguiã erese ã. ¹⁶ Pablo carta mbesa mbesa bei mose, mbia mundua ndua sacuã ã ndese chõ ñene. Aba chiicuayãte raque Pablo chimbesa emo emo. Ae eaquiataate Dios rese nae, ũquĩ Pablo cheẽ nyabi chabi chõ nguiã. Sã embesa ji ataque abi abi no. Nyebe ũquĩ sí chõ ñimbicua icuã nguiã ũquĩ. ¹⁷ Sechesecua, a aico jembirandu jei a. Mbia icuã jembui eã sacuã Dios si. Mbia icuã nda jembirĩ irĩchĩ jê. Jêingoquiato tuchi quiatu jê. Huee jêingo turãte Dios rese namo hue. ¹⁸ Jesucristo rei nanderesecua tuchi. Jêicua i i tuchi quiatu jê. Jenyesequa i i tuchi quiatu erese jê. Ae que nanderirõ mbae icuã si ra. Eturã mbeite

que eriqui nande je ra. Sã mbia ñee
turã mbei quia erĩ. Amén.

PRIMERA CARTA DEL APOSTOL SAN JUAN

Mbia mingosa

¹ Ae siqui quia mbae tiã mose nyii nae, aque tasenei jêje. Ae riqui beite namo co no. Ae cheẽ ngue urechandu chandu bei quia ra. Uremae mae mbei que equia erese ra. Ureoco oco que equia erese no nda. Jesucristo, i equia ee. Dios cheẽ, i abe equia ee. Mbia mingosa, i abe equia ee no. ² Mbia mingosa que siqui ngu rese nyii ra. Tu que nyecua ure je íbii cote ra. Uremae ngue equia erese ra. Uresenei senei equia jêje ã. ³ Ae rese uremae nae, aque uresenei senei nguia jêje ã. Ae urechandu nae, ùquĩ abe uresenei senei nguia jêje ã. Jê abe nda jêingo urerese chã. Sã ureico Dios rese ure no. Jesucristo abe rese. ⁴ Jêya tuchi sacua ño ureico nguiã ã mbesa jêje ã.

Dios rei nyaashĩ na

⁵ Jesucristo que urembiirandu Dios rese nyii ra. Ùquĩ si chõ uresaã saã nguiã jemiirandu sacua ã: Dios rei nyaashĩ na. Itondaru rã jiri jiriã tuchi chõ ae re. ⁶ “Dios resenda rei se” nandechĩ nda nandeico eã mose erui jê. Nande i mose, nandechẽ ñooño ño nguiã ùquĩ. Nande i mose, mbia mbiirĩ irĩsa chõ nande re. ⁷ Dios rã nandeico mose nyaashĩ, nandeico turã ño nguiã nandechiese ùquĩ. Dios rã nandeico mose nyaashĩ, Jesús ruqui nandeicuã mbutiã ja quia nandesĩ ã no. ⁸ “Mbae icuã asaã eãte rese” nande i mose, nandechĩmbiirĩ irĩ ño nguiã ùquĩ. Nande i mose, ñee ñooñosa tuchi chõ nande re. ⁹ Nandeicuã nandesenei mose Dios je, ae ra eturã nande je. Nandeicuã nda embutiã ja nandesĩ ucheẽ nguire. ¹⁰ “Mbae icuã asaã eãte resẽ” nande i mose, “Dios ñee ñooñosa” nandesã ño nguiã ee. Nande i mose, Dios cheẽ iqueã ño nguiã nandechiangui re ùquĩ.

2

Jesús ñee turã Dios je nanderĩ

¹ Mbae icuã jêsaã eã sacua ño aico nguiã co mbesa jêje co, seriirĩ. Jemo mbae icuã naa mose, Jesucristo ra ñee turã Dios je aque rĩ. Eicuã mbutiã sacua esi. Jesucristo quia rei eturã mbei. ² Jesucristo rĩ ño Dios nandeicuã mbutiã nguiã nandesĩ. Ae rei nandeicuã ndibishoronda. Nande mii icuã ndibishoronda eã ño ñene. Mbia ja icuã ndibishoronda chõ ñene. ³ Nande Dios cheẽ mumba eã mose, “Dios aicuate quia co” nande ra nandechiangui re cote. ⁴ “Dios aicuate quia co” i mose emo, Dios cheẽ mumba mose, ñee ñooño je chõ ùquĩ nde. ⁵ Ae Dios cheẽ mumba eãte nae, ùquĩ nguiatu nyesequate nguiã Dios rese ùquĩ. ⁶ Ae “aico tuchi Dios rese co” i quia nae, sã ùquĩ siqui tuchi quiatu quia Jesús rã.

Dios cheẽ yasu

⁷ Dios cheẽ yasu eã ño ambesa nguiã jêje co, Sechesequa. Dios cheẽ ñiinda sí chõ ambesa mbesa nguiã jêje a. Jê echeẽ mumbayã sacua. Ae jeñandu nyii nae, ùquĩ. ⁸ Jêingo Jesucristo icuate ã cote. Nyebe eyasu raãte eriqui nguiã jêje. Jesucristo que nyesequa mbia rese ra. Jê abe jêingo nyesequa jenyiese ã cote. Itondaru eãte riqui jêje ã cote. Nyaashĩ ja chõ jêje cote re. ⁹ Nyaashĩ aico co, i mose emo, nguesenda ucuãyã cuãyã mose, itondaru bei chõ siqui nguiã ùquĩ je aque. ¹⁰ Ae nyesequate quia nguesenda rese nae, ùquĩ ndiqui nyaashĩ mbei ùquĩ. Ùquĩ nda siqui icuã eã. ¹¹ Ae nguesenda ucuãyãte quia nae, ùquĩ ndiqui itondaru bei ùquĩ. Itondaru eresa chati chõ nguiã ùquĩ. Nyebe eriqui nguiã ngueco icuayãte ùquĩ.

¹² Jesucristo rĩ ngue Dios jêicuã mbutiã jêsi ra, Seriirĩ. Nyebe aico nguiã co mbesa mbesa jêje a. ¹³ Ae siqui beite quia nyii nae, aque jêicuate quia ùquĩ, Mbiaru. Nyebe aico nguiã co mbesa jêje a. Jêingo

mbia mb̄irĩ irĩsa riquisã quisã ũquĩ, Acuanĩdu. Nyebe aico nguiã co mbesa jêje a. Nanderu jêicuate quia ũquĩ, Echo. Nyebe aico nguiã co mbesa jêje a. ¹⁴ Ae siqui beite quia nyii nae, aque jêicuate quia ũquĩ, Mbiaru. Nyebe aico nguiã co mbesa jêje a. Jêirâtâte jêingo jeñiangui re ũquĩ, Acuanĩdu. Dios cheẽ ngue jêisi turâte jeñiangui re ra. Jêingo mbia mb̄irĩ irĩsa riquisã quisãte ũquĩ. Nyebe aico nguiã co mbesa jêje a.

¹⁵ Jenyesequate chĩ nda mbae ibi jenda ja rese jê. Mbae ibi jenda ja rese jenyesequa mose, jenyesequa eãte ra Dios rese. ¹⁶ Ibi jenda icuã ja chõ ñene. Nanderesa mbae icuã oseĩ oseĩ mose, eĩcuãte ũquĩ. Nanderete abe mbae icuã oseĩ oseĩ mose, eĩcuãte ũquĩ no. Nandecuasú abe nandesã saã mose, eĩcuãte ũquĩ no. Ibi jendachõ ño ũquĩ nde. ¹⁷ Mbae icuã nda ua ja ibi jenda. Ae mbia choseĩ choseĩ quia ibi jenda nae, ũquĩ abe ra ua no. Ae Dios cheẽ mumba eãte quia nae, ũquĩ nguia ra siqui bei.

Cristo ucuãyãsa

¹⁸ Achite mbae ñi ua ja a, Serirĩ. Cristo ucuãyãsa ra tu mbia mb̄irĩ irĩ, i que jeñandu nyii, ngaẽ ngaẽte que cote ra. Nyebe ureico nguiã ñee, “mbae ra ua ja cote” i. ¹⁹ Cristo ucuãyãsa tubiriãte riquiã. Nanderesenda rei que nyii ra. Nanderesenda choõno ño ngue ra. Nanderesenda tuchi mose, eĩ nda huiãte rei nandesĩ. Hui chõ ngue echoĩ uresi ra. “Eresenda eã ño eriqui re” i sacua mbia. ²⁰ Jêje quiatu que Cristo Espĩritu Turã mondo nguiã. Nyebe jêingo nguiã mbae icua jate ũquĩ. ²¹ Ae bei, jenyee eã ño nguiã ichõĩñosa je ũquĩ. Dios quia ichõĩñosa reã tuchi re. Dios cheẽ jêicuate quia ũquĩ. Nyebe aico nguiãã mbesa mbesa jêaquiatu je a. Eaquiatuã je eã aico nguiãã mbesa mbesa a. ²² ¿Aba chõ ichõĩñosa chã? “Dios chimondo eã ndei Jesús” ae i quia nae, ũquĩ ño ñene. Ae siqui sereãte quia Paba rui nae, Jesús abe

rui nae, Cristo ucuãyãsa chõ ũquĩ nde. ²³ Ae siqui sereãte quia Dios rirĩ ndui nae, Dios abe rui eriquiãte ũquĩ. Ae Jesús isi turã nguia nae, eru abe eisi turã ño nguiã no. ²⁴ Ae rese jêingo jirandu beite nyii nae, ũquĩ ndese jêingo bei. ũquĩ ique tuchi mose jeñiangui re, jêingo bei ra Dios rirĩ ndese. Eru rese abe no. ²⁵ Taemingo bei, i que nande je ra.

²⁶ Ae jemb̄irĩ irĩ serĩte quia nae, ũquĩ ñi ño aico nguiãã mbesa mbesa jêje. Jemb̄irandu sacua. ²⁷ “¿Aba quiatu ra nandembaaquiatu quiatu re?” jenyee aroneate quia ũquĩ. Espĩritu Turã ndiqui tuchi jeñiangui re jembaaquiatu quiatu ũquĩ. Jesucristo que emondo jêje ra. Ae chõ jembaaquiatu quiatu nguiã mbae ja rĩ ũquĩ. Ñee ñooñoa tuchi chõ ñene. Cristo rese jeĩ ngo bei, Espĩritu Turã ñee nguire.

²⁸ Serirĩ, jêingo bei equia erese jê. Nandesiquicheã nda esi eru mose chã. Nandeireĩ nguiã nda eru mose no ña. ²⁹ Jesucristo quia rei eturã tuchi. Mbae raã turã ja bei. Ae mbae saã turã mbei quia nae, erirĩ ño ũquĩ nde.

3

Serirĩ, i Dios nande je

¹ Dios que nyesequa tuchite nanderese ra. Serirĩ i tuchi que nande je ra. Nyebe mbia Dios quiatoã ndiqui nandeicua eãteã. Dios abe icua eãte equiaã. ² Dios rirĩ ndei nande, Sechesequa. Dios ra nandembaturã tuchi core. ũquĩ nandeicua eãte raque quiaã. Jesucristo tu mose, nandemae tuchi ra erese cote. Erã si ra nandeico tuchi cote. ³ “Jesucristo ra tu sembuturã” ae i icuate quia uchiangui re nae, ũquĩ ndiqui siqui turã tuchi ũquĩ. Jesucristo rã sí.

⁴ Mbae icuã naa naasa rei Dios cheẽ mumba. Eĩcuãte Dios cheẽ mumba. ⁵ Jesucristo que tu mano nandeicua mbutiã nandesĩ ra. Mbae icuã ngue esaã jiri jiriã tuchi quia ra. ũquĩ

jëicuate quia ã. ⁶ Ae siqui quia Jesucristo rese nae, ùquĩ nda mbae icuã mo saã eã. Ae siqui quia mbae icuã ndese, ùquĩ nguia eicua eãte nguia. ⁷ Seriirĩ, emo nda jembirĩ irichĩ ñee ñooño jêje jê. Ae mbae turã saã saã nguia, eturã ño ùquĩ nde. Jesucristo rã sí chõ ùquĩ nde. ⁸ Ae mbae icuã saã saã nguia, diablo rimba chõ ùquĩ nde. Diablo riqui mbae icuã naa naa mbei co. Cose ndare bei. Diablo chiao mbuquiachã sacua ño ngue Dios riirĩ ndu ra. ⁹ Nande Dios riirĩ mose, mbae icuã nandesã aroneate. Dios quiatu ngue ngueco mee nguia nande je. Nyebe nandeico nguia mbae icuã naa aroneate ã. Eriirĩte quia nande re. ¹⁰ Ae Dios riirĩ nae, ae Dios riirĩã no nae, ùquĩ abe aba chëcuate. Emo nyesequa eã mose ngõngue rese, diablo riirĩ ño ùquĩ nde. Emo mbae turã naa naa eã mose, diablo riirĩ ño ùquĩ no nde.

Nandechesecua chõ nguia nandechiese

¹¹ Cose ndare bei que jëingo ã andu ra: nandechesecua bei chõ nguia nandechiese. ¹² Caín na nda jëingochĩjê. Diablo resenda chõ ae re. Nyebe ngõngue icuã nguia. ¿Mbaerã ño ngõngue icuã chã? Echisaã saã icuãte quiatu ngue eriqui nguia. Enongue chisaã nguia ngue eturãte riqui nguia. ¹³ Jesús quiatoã jëucuyã mose, jenyururate chĩ nda mae erese jê. ¹⁴ Nanderaaque rã eã ño nandeico nguia ã cote. Dios nandereco mingo tuchi quia co cote. Nandenongue rese nandeico nyesequa ã cote. Nyebe nandeico nguia “nanderaaque rã eã ño nandeico nguia ã cote,” i. Ae nyesequa eãte quia ngõngue rese, eraaque rã mbei tuchi chõ ùquĩ ndiqui nguia ùquĩ. ¹⁵ Emo ngõngue ucuãya mose, mbia icuãsa rã tuchi chõ ùquĩ nde. Dios ra aba icuãsa mingo bei eã. ¹⁶ Jesús que mano nande je ra. Nyebe nandeico nguia “Jesús riqui nyesequate nanderese co” i. Eĩ nande quiatu quia nyesequa nandenongue

rese. Nandeteã teã eã ño mano sacua nandenongue rĩ. ¹⁷ Nandequeteã tuchi aroneate nandembae rese mbaecha reã mo je. Emo ia eã eã mose mbaecha reã mo ndese, ¿mañi ño nda equia nyesequa Dios rese uchiangui re? ¹⁸ “Aico nyesequate mbia rese co” nande chooño chĩ nda equia jê. Mbae turã quiatu nandesã saã tuchi quia ee.

Nandereĩ ireĩ eãte equia ñee Dios je ã

¹⁹ Nandechesecua mose mbia rese, Dios resendate quia nande re. Nandechiã ngoi turãte. ²⁰ Nandechiangui renda nandemundua ndua mose nandeicuã ndese, Dios quia rei equirãcuã tuchi ùquĩ si. Ae quia mbae icuã jate nguia. ²¹ Nandechiangui renda nandemundua eã mose nandeicuã mo ndese, nandereĩ ireĩ eãte quia ñee Dios je ã. ²² “Mbae mo embu seje” nande mose Dios je, mondo ra nande je. Echeẽ nguia nandemumbayãte nguia ã. Nyebe ra emondo nande je. ²³ ã ndei Dios cheẽ ã, nande emumbayã sacua ã: “Serucucha jëicua Jesucristo jê. Jenyesequa chõ jenyese Jesucristo cheẽ nguire jê”, i Dios quia nande je co. ²⁴ Nande echeẽ mumbayã mose, nandeico beite quia erese ã. Ae abe riqui beite nanderese co. Espiritu Turã Dios mondo quia nande je nae, aque chõ nandembiirandu nguia ùquĩ ndese. —Dios riqui beite jeñiangui re co, i Espiritu Turã nguia nande je co.

4

Eĩ nande ra Dios quiato icuã; Dios quiatoã abe icuã

¹ —Aico Dios cheẽ nenei nenei co, i ja jate raque mbia quia ã. Ñee ñooño quiatu nguia ã. ùquĩ ñee nda jëisi chooño chĩ nguia jê. —¿Ma Dios cheẽ nenei neneisa tuchi ma nde? jenyete tuchi rã eicua nyii. ² “Jesucristo que tu ibate si mbiarã nda” i mose ùquĩ, Espiritu Turã ndiqui erese ùquĩ cote. Eĩ jenyete ra eicua. ³ “Jesucristo que tu

mbiarã nda” i eã mose, Espíritu Turã siqui eã tuchi chõ nguiã erese. Cristo ucuâyãsa chõ ùquĩ nde. Se rei Cristo, ichõĩño ño nguiã ã. Cristo ucuayãsa ra tu, i jeñandu quia nyii nae, aque riqui a cote. ⁴Dios resenda rei jẽ, Seririĩ. Ae siqui jeñiangui re co nae, ae quia rei equirãcuã tuchi ibi jenda si. Ae Dios cheẽ senei ñooño nguia nae, jẽ quiatu que jẽquirãcuã tuchi ùquĩ si ra. ⁵Dios quiatoã ño ùquĩ nde. Ibi jendachõ ño ùquĩ nde. Ibi jendachõ ñi ño eriqui nguiã ñee mbia je. Mbia ibi jenda achõ ño echeẽ ñandu nguiã. ⁶Nande quiatu Dios resenda tuchi re. Ae Dios icua quia nae, ùquĩ ndiqui nandechẽ andu ùquĩ. Ae Dios icua eãte quia nae, ùquĩ nguiatu nandechẽ andu sereãte nguiã ùquĩ. Eĩ nande ra Dios quiato icua. Dios quiatoã abe icua.

Dios nyesequa tuchi mbia rese

⁷ Sechesequa, nandechesequa ja chõ nandechiese jẽ. Dios chõ nandembuchesequa nguiã nandechiese. Nandechesequa mose nandechiese, Dios ririĩ ño nande re. Ùquĩ mose chõ nandeico nguiã Dios icua ã. ⁸ Nandechesequa eã mose nandechiese, ã nguia nandeico nguiã Dios icua eãte ã. Dios quia siqui nguiã nyesequate nanderese co. ⁹ Dios que nguiĩ mĩ mbu íbii ra. Nandemingo bei tuchi sacua erĩ. Nyebe nandeico nguiã “Dios riqui nyesequate nanderese co” i. ¹⁰ Dios ae nyesequa aquiatute. Nande rane nguia nandechesequa eãte nguiã erese. Ae rane nguiatu ngue nyesequa nguiã nanderese. Nyebe nguiĩ mondo nguiã nandecua ndiquicharõ sacua. ¹¹ Sechesequa, Dios nyesequa tuchite quia nanderese co resẽ. Nyebe nande abe quiatu nandechesequa nandechiese. ¹² Nandechesequa mose nandechiese, Dios riqui tuchi nandechiangui re co. Dios riqui nandembuchesequa tuchi nandechiese co. Aba mo mae eã ndaque erese.

¹³ ã nandeico tuchi Dios rese ã. Ae abe siqui tuchi quia nandechiangui re co. Espíritu Turã ngue Dios mondo

nande je, ae chõ nandembiirandu nguiã ùquĩ ndese co. ¹⁴ Dios que nguiĩ mondo mbia rirõ ja sacua huicua si ra. Uremae ngue erese ra. ã ureico erenei nenei ja mbia je ã. ¹⁵ “Jesús rei Dio s ririĩ” nande i mose, Dios riqui tuchi nandechiangui re co. Ùquĩ mose nande abe nandeico tuchi erese ã. ¹⁶ Dios riqui nyesequa tuchite nanderese co. Ùquĩ nandecua tuchi quia ã cote. Nandechesequa bei mose Dios rese, ã nandeico tuchi erese ã. Ae abe riqui tuchi nandechiangui re co. ¹⁷ Nandeico mose Dios rese, ae riqui nandembuchesequa uchiese co. Nandechesequa tuchi mose erese, nandeico siquicheãte esi ã. Nandesiquiche ãte ra esi mbia icua mbasi mose. Nandembasi ãte ra mbia chabe. Jesucristo raãte quiatu nandeico nguiã nande ã. ¹⁸ Nandesiquiche mose Dios si, nandechesequa tuchi ãte quiatu nguiã erese nandechiangui re ã. Nandechesequa tuchi mose erese, nandesiquicheã nda esi. Nandesiquiche mose Dios si, nandesiquiche chõ nda nandembasi. ¹⁹ Dios rane ngue nyesequa nanderese nyii ra. Nyebe nande abe nandeico nguiã nyesequa erese ã cote. ²⁰ “Achesequa quia Dios rese co” i mose emo, ngõngue ucuâyã mose, ñee ñooño je chõ ùquĩ nde. Nandechesequa eã mose nandenongue rese, Dios abe rese chõ nandeico nguiã nyesequa eã no. Dios rese quia nandeico nguiã mae aroneate. ²¹ ã i que ñee nande je ra: Ae nyesequa quia Dios rese nae, sã nyesequa ngõngue abe rese.

5

Jesús quiato “qui jẽ” i mbae icua je

¹ “Dios chõ mondo rei Jesús” nande i mose, Dios ririĩ ño nande re. Emo ndese nandechesequa mose, eririĩ abe rese ra nandechesequa. ² Nandechesequa mose Dios rese, echeẽ nandemumba eã mose, Dios ririĩ ja rese abe chõ nandeico nguiã nyesequa ã. ³ Dios rese nandechesequa mose, echeẽ nandemumbayãte

quia ã. Echeẽ mbaranguiatuã eãte riqui nande je co. ⁴ Dios riirĩ mose nande, ibi jenda icuã nandesiquisã quisã ño nguiã nandechesi ã. Nandeico Jesucristo icuate ã. Nyebe nandeico nguiã “qui jẽ” i mbae icuã ibi jenda je. ⁵ Jesús icuasa achõ nda “qui jẽ” i mbae icuã ibi jenda je. —Dios chi mondo rei Jesús, i je ra “qui jẽ” i ibi jenda icuã je no.

Dios siqui ñee mbei Jesús quiato chianguire

⁶ Jesucristo que tu íbii ra. I je que Juan bautizar i ee ra. Eruqui que uchẽ emano mose ra. Ñquĩ Espiritu Turã senei senei nguia nande je ã. Ae ñee ñooño eãte quia co. ⁷⁻⁸ Tres riqui nandembiirandu randu Jesús rĩ ã. Espiritu Turã nane. I abe no. Jesús ruqui abe no. Ñquĩ ja riqui nandembiirandu randu Jesús rĩ ã. Hue rĩ ja chõ ñquĩ tres riqui nguiã ñee. ⁹ Eĩ sí que Dios ñee Jesús rĩ nande je ra. “Ae bei”, nande chõ nguia ee. Sã nandeico mbia cheẽ mo isi turã no. Dios cheẽ nguiatu nandeisi turã tuchi. ¹⁰ Ae Dios riirĩ icua quia nae, ñquĩ je quia Dios riqui nguiã ñee mbei echianguire Jesús rĩ. Ae “eno” i ãte quia Dios cheẽ je nae, “ichõiñosa chõ Dios cheẽ nde”, isa chõ ñquĩ nde. “Eno” i ãte quiatu nguiã Dios ñee mose Jesús rĩ. ¹¹ Dios nandemingo bei quia co. Nguirĩ ñi ño eriqui nguiã nandemingo bei co. Ñquĩ ñi ño Dios riqui nguiã ñee nande je. ¹² Ae chianguire Dios riirĩ ndiqui nae, ñquĩ nda Dios mingo bei. Ae chianguire eriqui eãte nae, ñquĩ nguiatu ra emingo bei eã.

Juan embesa hui bei

¹³ A aico ã mbesa jẽje a. Dios riirĩ icuasa je a. “Dios ra semingo bei” jenyẽ sacua eicua jeñiangui re. ¹⁴ Nandesiquicheã nguia ñee Dios je ã. “Mbae mo embu seje”, i mose ee, mondo ra nande je. Nandendua mose ae rã sí, mondo ra nande je. ¹⁵ Nande ache i mose ee ra nandandu. “Aque embu seje”, i mose ra

emondo nande je. Nandeico ñquĩ icuate ã. ¹⁶ Nandemae mose nandenongue rese mbae icuã naa naa mose, nandechẽ Dios je erĩ. Dios ra emingo turã cote. Aque mii mbae icuã ndiqui mbia mbuquiachã icuã mbei co. Emo aque icuã naa mose, “jeñee Dios je erĩ”, ae ãte quia jẽje co. Ñquĩ nda quiachã mbei chõ. ¹⁷ Mbae icuã naa naa mose rei eicuã tuchi. Aque mii mbae icuã nguiarei mbia mbuquiachã mbei mondo tata cuásuu.

¹⁸ Dios riirĩ mose nande, nandeico ãte quia mbae icuã ndese ã. Jesús riqui nanderaarõ mbeite mbae icuã si co. Satanás nandembiicuã eã sacua. ¹⁹ Nande rei Dios resenda. Ñquĩ nandeicuate quia ã. Mbia ataque quiarei Satanás ndesenda tuchi. Eicuã ndesenda tuchi. ²⁰ Dios riirĩ ngue tu nandembaaquiato sacua Dios rĩ nda. Dios ichõiñosa reã ñi. Ichõiñosa reã ño eriirĩ abe no nde. Ae rese nandeico tuchit e quia ã. Aba mingo beisa chõ ae re.

²¹ Seriirĩ, Dios aba reã ndese ra jẽingochĩ. Amén.

SEGUNDA CARTA DEL APOSTOL SAN JUAN

Achesequate jendese, i Juan

¹ Juan ndei se. Ameite se. A aico ã mbesa mbesa ndeje a, Ari. Dios chiirabo tuchi chõ nde re. Nderiirĩ je abe aico ã mbesa mbesa a. Co aico nyesequa tuchi jendese co. Dios rese quia jëingo tuchite nguiã ùquĩ. Nyebe Dios quiato riqui nguiã nyesequa jate jendese ùquĩ. ² Achesequa tuchite quia jendese co. Dios cheẽ nguiatu siqui beite quia nandechiangui re co.

³ Dios rei nanderu. Jesucristo rei eriirĩ. Sã ùquĩ ndiqui turã jendese. Sã ùquĩ ia eã tuchi riqui jendese. Sã ùquĩ ndiqui jembia bei tuchi. Ùquĩ ndiqui nyesequa tuchi jendese ùquĩ. Ùquĩ ñee ñooño eã tuchi quia ùquĩ.

⁴ Nderiirĩ mo ngue chi tuchi Dios cheẽ ndese seje ra. Seya tuchi que ùquĩ mose ra. ⁵ Nandechesequa ja chõ nguia nandechiese. Dios cheẽ yasu eã ño ã nde. Dios cheẽ ñiinda bei chõ ñene. ⁶ Nandechesequa mose nandechiese, nandeico Dios cheẽ ndui sí ã. —Jenyesequa chõ jenyiese, i quiatu ngue Dios nande je re. Cose ndare bei chõ jëingo nguiã ùquĩ andu ã.

Aba mbĩrĩ irĩsa

⁷ Mbia tubĩrĩã ndiqui aba mbĩrĩ irĩte ã cote. Jesucristo que tu ibate si mbiarã nda, i sereã nea. Cristo ucuayãsa, i chõ ùquĩ je re. Aba mbĩrĩ irĩsa, i abe que ùquĩ je ra. ⁸ Cochee chõ jëingo. Mbae jësaã iru iru eã sacua Dios je. Ùquĩ mose ra Dios jenyisaã sibishorõ turã tuchi jëje. ⁹ Emo icha mose Cristo cheẽ si, Dios resenda eã ño ùquĩ nde. Emo siqui bei mose Cristo cheẽ ndese, Dios resenda tuchi chõ ùquĩ nde. Cristo resenda abe no. ¹⁰ Emo mbia mbaaquiato quiato mose Cristo cheẽ ndui si eã, ùquĩ jëisi turã eã ño nguia jenyuchúaa. Jeñee turã turã aroneate ee. ¹¹ Ae ñee turã

nguia ee ùquĩ ñi nae, ae abe chõ eicuã ndiqui nguiã erã sí.

Juan embesa hui bei

¹² Mbae tasenei ja tuchi jëje, ae rei que se ra. Ambesa oco sereãte mondo jëje. Tambuchecua tuchi chõ oso ñee jëje, ae que se ra. Nandeya tuchi sacua nandechiese.

¹³ Dios chiirabo tuchi chõ ndenongue re. Eriirĩ ja saludos mondo quia ndeje aque. Amén.

TERCERA CARTA DEL APOSTOL SAN JUAN

Gayo turãte que eriqui Dios je ra

¹ Juan ndei se. Ameite se. A aico ã mbesa mbesa ndeje a, Gayo. Aico nyesequa tuchite nderese co. ² Sechesequa, acheẽ mbeite quia Dios je nderĩ co. Dios nemingo turã sacua. Nderete abe mingo turã sacua no. Sã ereico siqui tuchite Dios rese no. ³ Seya tuchi que jirandu mose nderese ra. Nanderesenda mo ngue ngaẽ sembiirandu nderese ra. — Gayo riqui tuchi Dios rese aque, i que sembiirandu ra. ⁴—Nderiirĩ nyi tuchi Dios rese pee, i mose seje, sembia beite equia co. Uquĩ nguiatu sembia tuchi nguiã mbae mo si co.

⁵ Sechesequa, ereico turã tuchi nanderesenda je huee. Ishonda je abe no. Mbae turã eresaã saã mbeite quia ee huee. ⁶ Urechumunua mose que Dios quiato mo urembiirandu ndeturã ndese ra. —Nyesequa tuchi que urerese ra, i que ecuaẽ ñee ure je ra. Mbae turã emondo mondo bei ee, embucuata turã sacua. Eĩ mose ra Dios ia tuchi nderese. ⁷ Jesús rĩ nguiatu uquĩ ndiqui nguiã ngata mbia mbaaquiato quiatu. Mbae mo nda eisi chooño eã Jesús icuasa reã mo si. ⁸ Nyebe nande chõ mbae nandemee mee ee. Dios cheẽ nenei neneisate quia uquĩ nde.

Diótrefes ucuasu raã ñooño

⁹ Papel jua que ambesa rei mondo jeñumunua ji je ra. Diótrefes quiatu seosei chiãte nguiã. —Se mĩ ño ererecuarã, ite. ¹⁰ Huee seso mose ra Diótrefes icua asenei jẽ ja je. Ae icua esaã ure je nae, uquĩ. Nanderesenda abe isi teã teã nyee. Emo eisi turã sete mose, ñee asi asi chõ nguiã aque abe je no. Mombo chõ nguiã hue si no. ¹¹ Sechesequa, ereicochĩ nda eicuã mo ndui. Etura ndui chõ eico. Etura nduinda quiarei Dios resenda.

Ae siqui quia eicuã ndui, uquĩ ndei Dios resenda eã.

Etura tuchi, i Demetrio je

¹² Demetrio quiarei etura tuchi. Co eriqui tuchi Dios rese co. Mbia ja abe ñee turãte quia erĩ uquĩ. Se abe acheẽ turãte quia erĩ co. Acheẽ ñooño ãte que se quia jẽje resẽ.

Juan embesa hui bei

¹³ Mbae tasenei ja tuchi ndeje, ae rei que se ra. Ambesa oco sereãte mondo ndeje. ¹⁴ Namu jiri ra amae nderese reae. Aque mose ra nandechẽ tuchi nandechue. ¹⁵ Sã Dios nembia turã mbei mingo. Nandequiato a jenda ja saludos mondo quia ndeje aque. Saludar ere sequiato hue jenda ja je.

LA CARTA DEL APOSTOL SAN JUDAS

Judas embesa Dios chiirabo je

¹ Judas rei se. Jesucristo rimba. Jacobo nongue rei se. ã ambesa quia jêje a. Dios chiirabo je. Dios que jêirabo ino icúe umbaerã nda. Dios riqui nyesecua tuchi jendese co. Dios riqui jenderecoquiato bei Jesucristo mbaerã co. ² Sã Dios riqui ndua bei jendese. Sã eriqui jembia bei. Sã eriqui nyesecua bei jendese.

Ae Jesús quiato saã saã nguia

³ Jesucristo nandemingo beisa rii ngue ambesa seese rei nguia jêje. Ae mbia mbaa tambesa jêje. Jêingo eã nonde erese. Ûquĩ ñee icuã icuã mose Dios cheẽ ñi, echeẽ jêsibishorõ. —Dios cheẽ tuchi chõ ñene, jenye tuchi quiato quia Dios cheẽ ndiquisã quisã mbia icuã si. Dios quiato ngue ucheẽ mondo ja nguia nguesenda ja je. ⁴ Dios quiato raã naasa mo ndiqui mbia mbaaquiato icuã icuãte ùquĩ. Ûquĩ siquiã tuchi chõ nguia Dios rese ùquĩ. —Sã Dios riqui aba icuã mbutiã uturã je c o no jê. Nyebe mbae icuã nandesã i chõ jê, i chõchĩ nguia ùquĩ. Jesucristo cheẽ ndui eã tuchi chõ ùquĩ nde. Nandererecua cheẽ ndui eã. Cosete que Dios ùquĩ mbiçúe embasi sacua nda. Mbasi mbasi bei ra equia cote.

⁵ Mbae tasenei na jêje. Jêicuate raque. Taemunduabe erese. Dios ngue judíos sirõ ja rei nguia Egipto si cose. Mbiam hue jenda icuã icuã mose ee. Ûquĩnde que siqui sereã Dios rese cote ra. Nyebe Dios eiquia nguia. ⁶ Sã ángeles mo je Dios ñee ndei no jê. “Aa jêingo aa”, sã i rei ee no jê. Sã Dios cheẽ mumba chõ no jê. Sã Dios riqui etarõi nderequia itondaruqui re co no. Embasi mbasi bei sacua cote. ⁷ Sã Sodoma jenda no. Sã Gomorra jenda no. Sã ùquĩ ndurubinda ja no. Siqui chooño eã. Mbae icuã naamba amba. Siqui siqui emo ninisi rese. Eruã mo

ndese abe no. Nyebe que Dios ùquĩ mombo tata cuásuu ra. Mbae rasi ra esaã mbei u huee cote. Mbiam mundua ndua sacua ño ùquĩ nde.

⁸ Ae Dios quiato saã saã nguia nae, ùquĩ ndiqui ndua icuã icuã mbei ùquĩ. Nyebe eriqui nguia nguete mbiçua ùquĩ. Aba cheẽ mumba. Ñee icuã ángeles ibatenda abe rii no. ⁹ Sã Miguel ángel rerecua no. Sã ñee asi asi nyue diablo rese no. Moisés rete rii. —Mbae icuã tasaã ndeje, i eã ngue diablo je ra. —Dios quiato ra mbae rasi saanguquia ndeje, i chõ ngue ñee diablo je ra. ¹⁰ Ae Dios quiato saã saã nguia nae, ùquĩ ndiqui ñee ñooño mbae uchicua yã ñiã. Ae eicuate quia mbae nae, ùquĩ ndese siqui turã eã. Siqui chooño eã ùquĩ ndese. Nyebe ra Dios embasi tuchi cote. Quiaa rinda quia mbae icua jiri nguia ùquĩ si. ¹¹ Aba mbiam eã tuchi chõ ùquĩ nde. Caín na tuchi chõ eriqui nguia mbae icuã naa naa ùquĩ. Balaam abe rã si chõ eriqui nguia icha icha Dios si ùquĩ. Mbae isiquia achõ ndese siqui sacua. Aba cheẽ mumba mumba bei chõ nguia Coré rã ùquĩ. Nyebe ra Dios mbae rasi saanguquia ee Coré rã si. ¹² Ae Jesús quiato saã saã nguia nae, aba ireingua tuchi chõ ùquĩ nde. Jeñumunua nua mose quiaru sacua nyese, ùquĩ ndiqui quiaru chooño ño ùquĩ. Mbae abe mbei chooño. Ico chooñoa abe mbiam mo je. Mbiam reaquiatusa mo na eã. Nguete mii ño ùquĩ teaquiato nguia ùquĩ. Sã ibei rondei riqui raque pã i mose no. Sã eriqui nyaaquiã no jê. Sã quiririã ndiqui ibei rondei rerao no jê. Ûquĩ na ño Dios quiato raã naasa riqui nguia ã. Mbae iabae je rã abe chõ eriqui nguia ã. Ira shii rã abe no. Ira riqui ji rã abe no. ¹³ Ama ndebera rã abe chõ ùquĩ ndiqui nguia ùquĩ. Mbiam mbaaquiato quiato mose, i richoi rã ño ùquĩ nde. Sã nyasitata riqui oso ngũenda recha no. Eĩ si chõ ùquĩ nguia ùquĩ. Nyebe ra mbae rasi raã tuchi

itondaruqui re.

14 Enoc abe que ñee ũquĩ icuã nĩ nda. Adán ndiirĩ nducucha rei ae. Eĩ ngue ñee nda: “Dios ra tu ngũimba tubiriã ndese. 15 Mbia icuã mbasi ja ra eu. Ae icuã mbia saã saã nguia nae, ũquĩ ndese ra mae ja. ‘Mbae icuã asaã ãte resẽ’, i aroneate ra ũquĩ cote. Ae ñee icuã nguia Dios rĩ nae, Dios ra echeẽ icuã senei a e sí je cote. ‘Eĩ ere que equia ñee icuã serĩ nda’, i ra Dios ee. Echisaã icuã tuchi chõ ũquĩ nde”, i que Enoc ñee cose ra. 16 Echiichati tuchi chõ ũquĩ nde. Ñee icuã mbei equia emo nĩ ũquĩ. Ae rese eriqui sete nae, ũquĩ mĩ ndese chõ eriqui nguia ndua ũquĩ. Ucuasu raã ñooño. Uchuru mondo chooño. Ñee turã abareã nea emo je. Mbirĩ irĩ ño nguia ñee turã abareã nea ee.

Ãjẽsaã saã, i Judas Jesús quiato je

17 Jẽ nguia rei Jesús quiato tuchi. Jesús chimbaaquiato cheẽ si jẽtesarei eã. Ñ ndei echeẽ ã: 18 “Mbae ua ja nonde ra mbia iquia iquia Dios cheẽ je. Ae icuã ndese eriqui sete nae, ũquĩ mĩ ndese chõ nda eriqui nguia ndua”, i que Jesús chimbaaquiato ñee cose ra. 19 Mbia mbuqueta que-tasa tuchi chõ ũquĩ nde. Ae ebite mbae icuã nae, ũquĩ ndese achõ ño eriqui nguia ndua. Espiritu Turã siqui ãte echiangui re. 20 Jẽ nguia jeñimbirãcuã tuchi quia Dios rui. Dios jẽicua tuchi. Jeñee mbei Dios je. Sã Espiritu Turã ndiqui jembucheẽ mbei Dios je. 21 Jẽingo bei quia Dios rese. ĩ nda jeñee. —Nyesecua tuchi chõ equia nanderese re, i. Jesucristo ia eã tuchi que nanderese ra. Nyebe ra nandemingo bei tu mose. ũquĩ jẽsaarõ mbei quia. 22 Ae Dios tiisu isu quia nae, ũquĩ jembuti mbuti quiatu quia Dios cuti. 23 Mbia icuã mo abe jemingo Dios rese. Tata si erirõ naanguia jemingo Dios rese. Eicuã tuchi raque. Jẽingo tuchi quiatu quia Dios rese. ũquĩ icuã uba eã sacua jendese.

Judas ñee turã Dios rĩ

24 Dios mĩ ño jendeaquiato bei nguia jembiãcha eã sacua. Dios mĩ ño jeñiangui renda icuã mbuchicuabo nguia jemingo sacua uchiẽ. Dios mĩ ño jembia bei nguia no. 25 Dios mĩ ño mbae icua ja nguia. Dios mĩ ño nandemingo bei nguia Jesucristo rĩ no. Ae je ra mbia ñee turã mbei quia. Ae rei eturã tuchi. Ae rei ererecua tuchi. Ae rei equirãcuã tuchi. Eĩ mbei chõ ae re. Amén.

APOCALIPSIS O REVELACIÓN A SAN JUAN

Jesucristo mbae mbuchecua

¹ Juan ño se re. Mbae tasenei jêje. Ae ra nyecua namo nae, ùquĩ tasenei jêje. Dios rane ngue embuchecua Jesucristo je ra. Jesucristo que ángel mbu sembiirandu sacua ere se cote ra. Se jembiirandu sacua ere se cote. ² Nyebe aico nguiã Dios cheẽ mbuchecua checua jêje co. Ae Jesucristo senei senei nguia seje nae, ùquĩ ño asenei senei nguiã jêje co. Ae rese semumae nae, ùquĩ abe chõ asenei senei nguiã jêje co. ³ Ae ra mae mae nguia sechimbesa rese nae, Dios turã tuchi ra eriqui ùquĩ je. Ae ra nyiisaquia turã sechimbesa rese nae, Dios turã tuchi ra eriqui ùquĩ je no. Achite secheẽ ñi ique a cote.

Juan ucheẽ mbesa mondo siete iglesias je

⁴ Se rei Juan. Jê siete iglesias Asia jenda je aico ã mbesa a. Sã Dios riqui uturã ndeacuquia cuquia jêje. Sã Dios riqui jembia bei mingo. Ae chõ siqui bei nguiã co. Ae siqui beite quia nyii no. Ae ra tu emo mose no. Sã Espiritu Turã abe riqui uturã ndeacuquia cuquia jêje. Ae chõ siqui nguiã mangue choõña ja co. Mbae raã naa Dios je. ⁵ Sã Jesucristo abe uturã mee jêje. Ae que nandembiirandu turã tuchi Dios rese ra. Ae rane ngue quera si manonde ra. Ae quia rei equirãcuã tuchi mbia rerecua mo si. Ae riqui nyesecua tuchite nanderese co. Ae que nandembui nandeicuã si nguqui je ra. ⁶ Ae que nandemingo bei ngu res e erimbarã nda. Nande mbae raã naa sacua Dios je. Sã mbia riqui ñee turã turã mbei Jesucristo je. Ae ra ererecua bei. Amén. ⁷ Jesucristo ra tu ibei si. Mbia ra mae ja tuchi equichi rese. Mangue jenda choõña tuchi ra mae ja ere se. Ae Jesús iquia nyii nae,

ùquĩ abe ra mae ere se no. Mbia ra siquichete nyeseo mae mose ere se. Ae bei. Amén.

⁸ —Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Dios ra. Equirãcuã mbeite riqui co. Ae chõ siqui bei nguiã co. Ae siqui beite quia nyii. Ae ra tu sí emo mose.

Juan mae Jesús rese cuu

⁹ Se rei Juan. Jendesenda chõ se re. Nandeico ñimbiirãcuã jate mbia icuã icuã mose nande je ã. Jesucristo riĩ. Ae sí chõ nandembiirãcuã nguiã co. Ae sí chõ nandererecua ja riqui nguiã co no. Ama ndisha joõ ngue mbia sereru aa ra. Aa semingo isho mbia si a. Se Dios cheẽ nenei nenei eã sacua. Mbia mbiirandu eã sacua Jesucristo rese. Patmos, i que a ejoõ acua je ra. ¹⁰ Aa sereco mose que Espiritu Turã mbae reacuquia seje cuu ra. Domingo mo mose. Emo ngue ñeemombo seje sequite quiti cuu ra. Echeẽ ngue serasate ra. ¹¹ —Se ae que aico bei mbae eã mose nyii resẽ. Mbae ua ja mose abe ra aico bei no, i que seje ra. —Ae ra eretea cuu nae, ùquĩ embesa papel rese. Ndechimbese emondo rã siete iglesias Asia jenda je. Efeso, Esmirna, Pérgamo, Tiatira, Sardis, Filadelfia, Laodicea. Ùquĩ jenda ja je ndechimbese emondo, i que ñee seje cuu ra.

¹² —¿Aba ñee nguia seje re? ae que uba mae nda. Siete candeleros oro ao ji rese que amae nda. ¹³ Ùquĩ ite re que mbia raanguia mo ñi juã nda. Dios riirĩ ño eriqui reaẽ. Huĩrao oco que ecunua nda. Eichuã ati tuchi que eirao ra. Oro ao ji chõ ngue eishia cuasa ra. ¹⁴ Eashĩ tuchi que ra. Tata rendi rã tuchi que eresa ra. ¹⁵ Ei nininyate que ra. Bronce rã. Ama ndieu rã ño ngue echeẽ nda. ¹⁶ Nyasitata siete que equereco oo ra. Uquiatocuti que ererequia ra. Espada que equereco uchúruu ra. Erimbe tuchi que ra. Erimbe chobei que ra. Eruba nininya tuchi que ra.

Sã tenda nininyate riqui nandeite re mose no.

¹⁷ Sema e mose erese que sesiquiche tuchi ra. Mbia raaque rã ngue aso ngoi ejii ra. Oco que serese oo uquiatocutinda je ra. Ñee ngue seje ra. —Eresiquichechi nguiã sesi. Ae siqui beite quia querabe nae, ae chõ se re. ¹⁸ Seraaque rei que nyii ra. Aico bei querab e co cote. Mbia mingo beisa chõ se re. Secheẽ mose ra mbia mano. Secheẽ mose ra mbia riqui bei querabe no. ¹⁹ Ae rese eremae nae, ùqui embesa rã. Ae ateacuquia cuquia quia ndeje namo nae, ùqui abe embesa no. Ae ra nyecua nyecua emo mose nae, ùqui nonde embesa jei rã. ²⁰ Siete candeleros rese que eremae namo, siete iglesias rã ño ùqui nde. Siete nyasitata rese que eremae séoo, siete iglesias rerecua rã ño ùqui no nde. Jesús quiato rerecua rã ño ùqui nde, i que ñee seje ra.

2

Cristo ucheẽ mondo uquiato Efeso jenda je

¹ Jesús que ñeembe seje ra. —Dios quiato rerecua Efeso jenda je ã embesa rã. ã embesa rã mondo ee: “Cristo que ñee jêje ra. Ae siete nyasitata quereco oo nae, aque. Ae ngata quia siete candelero ite rĩ nae, aque sí chõ ñee nguiã jêje aque. ² ã ngue Cristo ñee jêje ra: ‘Jenyisaã turã aicuate quia co. ã jêingo quiei quiei tuchite seje ã. Jeñimbirãcuã tuchite quia mbae icuã si ã. ã jêingo jiri jiriãte mbia icuã ndese ã. Ae sequiato rerecua saã ñooño nguia nae, jê ngue ùqui jêisiã nda. “Ma Jesús quiatote”, jenye turã tuchi que ra. “Ichõiñosa chõ ñene” jenye chõ ngue erĩ nda. ³ Jeñimbirãcuã turãte que equia ra. Mbae rasi que jêsaã nguia serĩ nda. Jêquiei quiei tuchite que seje ra. Jêhui eã mbeite equia sesi ã. ùqui jêsaã turã jate rei nguiã ã. ⁴ ã nguiatu sembia eãte nguiã ã. Jenyesequa eã jirichĩ equia serese jê

nguiatu ã cote. Seicua ramo mose que jêote serese nyii. Jenyesequate que equia serese nyii. Eĩ jenye eã ñochĩ equia ã cote. ⁵ Jendua rã ùqui ndese ae. Jenyesequabe jiri serese ae. Jemba eã mose serese, jaembutiã nda u. Sequiato eã nda jê cote, jemba eã mose serese. ⁶ ã abe sembiate quia jendese ã. Ae siqui quia Nicolás rese nae, ùqui nyisaã jêucuãyãtequia ùqui. Se abe aucuãyãte quia co no. ùqui nyisaã icuãte riqui ùqui. ⁷ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ùqui jeñandu rã: Ae “qui jê” i beite quia Satanás quirãcuã je nae, ùqui nda amingo turã mbei ibate Dios rese’, i que Cristo jêje ra”, ere chõ embesa mondo sequiato Efeso jenda je.

Cristo ucheẽ mondo uquiato Esmirna jenda je

⁸ Dios quiato rerecua Esmirna jenda je ã embesa rã. ã embesa rã mondo ee: “Cristo que ñee jêje ra. Ae rane ño ngue siqui bei mbae eã mose nyii ra. Mbae ua ja mose abe ra eriqui bei no. Ae que mano ndei nyii ra. Manonde eriqui beite e co no. Aque sí chõ ñee nguiã jêje co. ⁹ ã ngue Cristo ñee jêje ra: ‘Jenyisaã turã aicuate quia co. Mbia icuã icuãte riqui jêje serĩ ùqui. Mbaecha reãte jêingo ùqui. Dios quiatu siqui tuchite nguiã jendese co. Ae Dios chiirabo saã ñooño nguia nae, ùqui ndiqui ñee icuã mbeite jeni ùqui. Satanás chiirabochõ ño ùqui nde. ¹⁰ Ae ra jêsaã saã mbae rasi nae, ùqui mo si ra jêsiquichechi jê. Satanás nda jemo tarõ mii. “Ma nyao Dios sí”, i sacua ño ùqui nde. Diez días ra jêingo mbae rasi raã naa. ùqui mose, jêingo bei Dios rese. Mbia ra jêiquia serĩ. ùqui mose nda jaemingo bei Dios rese cote chã. ¹¹ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ùqui jeñandu rã: Ae “qui jê” i beite quia Satanás quirãcuã

je nae, ũquĩ nda Dios mondo eã tata cuásuu', i que Cristo jêje ra", ere chõ embesa mondo sequiatio Esmirna jenda je.

Cristo ucheẽ mondo uquiato Pérgamo jenda je

¹² Dios quiato rerecua Pérgamo jenda je ã embesa rã. ã embesa rã mondo ee: "Cristo que ñee jêje ra. Ae espada rimbe chobei quereco nae, aque sí chõ ñee nguiã jêje co. ¹³ ã ngue Cristo ñee jêje ra: 'Sucha tubiriã jendecua aicuate quia co. Mbia hue jenda siqui tuchite quia Satanás ndese ũquĩ. Jê ae chõ jêingo nguiã serese ũquĩ. Jêhui eãte equia sesi ũquĩ. Mbia icuã sequiatio iquia raque huee jendécuaa. Antipas, i rei ngue aque sequiatio je re. ¹⁴ ã nguiatu sembia eãte nguiã ã. Balaam na tuchi chõ jemo jemo ndiqui nguiã ũquĩ. Balaam nguiarei Balac mbaaquiato icuã icuã nyii. Balac Israel jenda mbicua icuã nonde. Nyebe Israel jenda riqui nguiã siqui tuchi cuña icuã ndese. Dios abareã ndese abe no. Jemo abe chõ mbia jembicua icuã nguiã ũquĩ. ¹⁵ Ae siqui quia Nicolás rese nae, ũquĩ mo siqui chõchĩ nguiã jendese ũquĩ. ũquĩ ñee aucuãya tuchi quia co. ¹⁶ Jendua si rã jêicuã ndese. Nicolás resenda jemombo chõ. Jemombo eã mose ra achu icuãte ee. Co espada areco sechúruu co nae, aque ra areco reco tuchi erese. ¹⁷ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquĩ jeñandu rã: Ae "qui jê" i beite quia Satanás quirãcuã je nae, ũquĩ nda amingo tuchi Dios cheẽ ndese. Dios cheẽ nda ũquĩ mingo bei. ũquĩ je ra sitashĩ ñetẽ mo amee. Sita ñetẽ ndese ra nombre yasu ambesa mi. Eme sacua ee. Emo nda sechimbesa icuayate nombre yasu. Ae je ra amee, ũquĩ achõ nda eicua', i que Cristo jêje ra", ere chõ embesa mondo sequiatio Pérgamo jenda je.

Cristo ucheẽ mondo uquiato Tiatira jenda je

¹⁸ Dios quiato rerecua Tiatira jenda je ã embesa rã. ã embesa rã mondo ee: "Dios rucucha que ñee jêje ra. Ae resa tata rendi saãte quia nae, aque. Ae i nininyate eriqui bronce rã nae, aque sí chõ ñee nguiã jêje co. ¹⁹ ã ngue Cristo ñee jêje ra: 'Jenyisaã turã aicuate quia co. Jenyesequate quia mbia rese ũquĩ. Mbae jêsaã saã turãte quia Dios je ũquĩ. ũquĩ jêingo Dios icua tuchite ũquĩ. Jeñimbirãcuã turãte equia mbae icuã si ũquĩ no. Jenyisaã turã tuchite riqui cose ndare si ũquĩ. ²⁰ ã nguiatu sembia eãte nguiã ã. Jezabel naanguia siqui chõchĩ nguiã jendese ũquĩ. ¿Mbaerã aque cuña jêteachõ nde? Emombo rocoĩ jenyesi. Dios cheẽ esenei senei ñooño ño nguiã aque. Sequiatio mbaaquiato icuã icuã ño nguiã aque. Sequiatio mingo chooño ño nguiã cuña icuã ndese aque. Sequiatio mingo chooño ño nguiã dios aba reã ndese aque no. ²¹ Jezabel naanguia que atiisu isu chõ nyii ra. "Sã ndua sí huicua ndese. Sã eriqui chooñoa mbia rese", ae rei que se nyii ra. Hui eã mbei chõ equia ũquĩ si aque re. ²² Nyebe ra ambasi tuchi cote. Ae siqui siqui quia erese nae, ũquĩ abe ra mbae rasi saã tuchi cote, ndua si eã mose huicua ndese. ²³ Ae siqui Jezabel icuã ndui nae, ũquĩ abe ra aiquia. ũquĩ mose ra sequiatio jirandu ja sequirãcuã ndese. "Jesús mbia chiangui renda icua ja chõ nguia re. Mbia ndua ndua eicua ja chõ nguia re", i ra sequiatio serĩ cote. Jêingo bei mose mbae icuã ndese, se abe ra mbae icuã amee jêje. ²⁴ Ae siqui eã nguia Jezabel cheẽ ndui jemo nae, ũquĩ je chõ tacheẽ cote. Jê nguiatu que jeñimee ãte Satanás je ra. Nyebe ra acheẽ tuchiã jêje. "Mbae mo ndese ra jêingochĩ jê", ae eã nda jêje mbae mo ni cote. ²⁵ Ae jêicuate quia serĩ nae, ũquĩ ndese jêingo bei querabe. Achu chee nda jêje chã. ²⁶⁻²⁷ Sã seru uquirãcuã me e seje no. Ae ra secheẽ mumbayã mbeite quia nae, ae ra "qui jê" i beite quia Satanás

quirãcuã je nae, ùquĩ je ra sequirãcuã amee tuchi. Ûquĩ nda mbia rerecuarã cote. Ûquĩ nda mbia icuã mbasi mbasi tuchi quia cote. Sã emo ñio iquia iquia ira je no. ²⁸ Nyasitata turã na nda aico ùquĩ je. ²⁹ Jëisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ùquĩ jeñandu rã, i que Cristo jêje ra”, ere chõ embesa mondo sequiato Tiatira jenda je.

3

Cristo ucheẽ mondo uquiato Sardis jenda je

¹ Dios quiato rerecuia Sardis jenda je ã embesa rã. ã embesa rã mondo ee: “Cristo que ñee jêje ra. Ae siete nyasitata quereco oo nae, aque. Ae rese Espíritu Turã ndiqui nae, aque. ã ngue Cristo ñee jêje ra:

‘Jenyisaã aicuate quia co. Mbia raaque raãte chõ jëingochi nguiã ùquĩ. Siqui eã Dios rese. Jëingo arõte raque equia Dios rese mbia je ùquĩ. ² Secheẽ ndese jenyiisaquia rã. Jeñimbirãcuã ño nguia siqu i Dios rese. Jëhui serĩ serĩte chõchĩ nguiã Dios si ùquĩ. Jenyisaã ndese aico mae maete co. Jenyisaã saã icuãte riqui Dios je ùquĩ. ³ Jendua jiri mbae rese ae. Ae rese jeñimbaaquiatu nae, ùquĩ ndui jëingo tuchi jiri ae. Jëicuã si jëhui tuchi jiri ae. Jë secheẽ mumba mose, jaembuate ra ngasẽ jêje. Jendua eã mose ra asochĩ jêje re. Sã mbae mbuquiachãsa riqui aba mbuate no. ⁴ Jemo mii mii mbae icuã saã saã eãte quia ùquĩ. Ûquĩ ño nda siqui bei serese. Eiraoshĩ nda amee ùquĩ je. Mbae icuã ndese quiatu que eriqui oco oco ãte ra. ⁵ Ae “qui jê” i beite quia Satanás quirãcuã je nae, ùquĩ nda huiraoshĩ quereco quia serese. Ûquĩ nda siqui bei serese ibate. Ûquĩ mbae nombres ra achusi eã mbei. “ã ndei sequiato tuchi ã”, ae ra Paba je. Angeles abe je. ⁶ Jëisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ùquĩ jeñandu rã, i que Cristo jêje ra”, ere

chõ embesa mondo sequiato Sardis jenda je.

Cristo ucheẽ mondo uquiato Filadelfia jenda je

⁷ Dios quiato rerecuia Filadelfia jenda je ã embesa rã. ã embesa rã mondo ee: “Cristo que ñee jêje ra. Ae ñee ñooño eãte quia querabe nae. Ae mbae icuã saã eã mbeite quia nae. Ae ererecuia tuchi riqui David rã si nae. Cristo eiquesa mbuquiata mose, emo ematã aroneate. Cristo ematã mose, emo embuquiata aroneate no. ⁸ ã ngue Cristo ñee jêje ra. ‘Jenyisaã aicuate quia co. Jëquirãcuã miite jëingo raque ùquĩ. Seisi teã eãte que equia ra. Ûquĩ jëingo secheẽ mumbayãte ùquĩ. Nyebe que mbae ambuquiata mii eiquesa rã jêje ra. Jëingo tuchi sacuã serese. Emo nda ematã eã. ⁹ Judíos ñee ñooño je ra amumae turã nyee jendese. Ûquĩ ndiqui Dios chiirabo raã ñooñote ùquĩ. Ûquĩ eriqui tuchite Satanás rese ùquĩ. Ûquĩ nda ñee turã nyee seje jeni. “Dios nyesequa tuchi chõ nguia ã ndese re. Judíos eã ndaque”, i chee ra jeni. Ngoi turã nyee ra jendese ñee seje. ¹⁰ Jeñimbirãcuã turãte equia secheẽ nguire ùquĩ. Nyebe ra jaendeaquiatu turãte serequia. Mbia mangue chooñoa jenda mbae rasi raã ja mose ra jaendeaquiatu tuchi serequia. ¹¹ Achu jei ra se. Ae jëicuate quia serĩ nae, ùquĩ ndese jëingo bei querabe. ã nda emo jembui eã Cristo si. ¹² Ae “qui jê” i beite quia Satanás quirãcuã je nae, ùquĩ nda amingo bei Dios récuua. Sembae marca ra amii tuchi ùquĩ ndese. “Dios quiato” i tuchi ra mbia quia ùquĩ je. “Dios recua jenda” i tuchi ra mbia quia ùquĩ je no. “Jerusalén yasu”, i chõ nguiã Dios recua je ã. Jerusalén yasu ra nguichi u ibate si. ¹³ Jëisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ùquĩ jeñandu rã, i que Cristo jêje ra”, ere chõ embesa mondo sequiato Filadelfia jenda je.

*Cristo ucheẽ mondo uquiato
Laodicea jenda je*

14 Dios quiato rerecua Laodicea jenda je ã embesa rã. ã embesa rã mondo ee: “Cristo que ñee jẽje ra. Ae ñee ñooño eãte quia querabe nae. Ae rane siqui quia mbae eã mose nyii nae. Ae ucheẽ mbuchebiã mbeite quia nae. 15 ã ngue Cristo ñee jẽje ra: ‘Jenyisaã aicuate quia co. Seya eãte aico jendese co. Jẽhui tuchi ãte raque equia sesi ùquĩ. Jẽingo tuchi eã ñochĩ equia serese ùquĩ no. Eĩ jenyete chõchĩ equia ùquĩ. I ribebe rã ño jẽingochĩ ùquĩ. 16 Sã emo ndiqui i ribebe mbei aroneate no. Mombo chõ nda uchuru si. Eĩ ae ra jemombo sechuru si no. 17 “ã ureico tuchite Dios rese ã”, jenyete chooño ñochĩ equia ñimbĩrĩ irĩ ùquĩ. Aba mbia eã tuchi chõ jẽingo nguiã ùquĩ. Mbaecha reã na ño jẽingochĩ nguiã Dios je ùquĩ. Eresayã na ño jẽingochĩ nguiã Dios je ùquĩ. Jẽirao eã na ño jẽingochĩ nguiã Dios je ùquĩ no. 18 Jẽingo chõ nguiã serese ae. 1 nda oro turã naanguia amee jẽje. 1 nda mbae amee tuchi jẽje. 1 nda tirushĩ naanguia amee tuchi jẽje. 1 nda jẽireĩ nguiãte jẽirao eã si. 1 nda Dios cheẽ ambuchecua tuchi jẽje. 19 Ae rese aico nyesequate nae, ùquĩ icuã icuã mose chõ aico nguiã eiruã nua. Emundua si sacuã mbae turã ndese. Jẽicuã si jẽhui. Jendua sí Dios rese. 20 Aico jẽiquesa mbuu mbuu a. Jemo seandu mose, huĩquesa mbuquiata mose seje, aique ra ee. Aico bei ra erese cote. Aquiaru quiaru ra se quia erese cote. Ùquĩ abe ra quiaru quiaru quia serese cote no. 21 Ae “qui jẽ” i bei quia Satanás quirãcuã je nae, ùquĩ nda siqui bei serese se ererecua tuchi mose. Ùquĩ abe ra amĩ mbia rerecuarã. Sã ñi aico “qui jẽ” i beite Satanás quirãcuã je nyii no. Sã ñi Paba semĩ mbia rerecuarã no. 22 Jẽisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ùquĩ jeñandu rã’, i que Cristo jẽje

ra”, ere chõ embesa mondo sequiatio Laodicea jenda je, i que Cristo ñee seje ra.

4

Mbia ibatenda ñee turã ja Dios rĩ

1 Aquere que amae ibate quti ra. Eĩquesa raanguia que nyeequia mĩ seje ibei ra. Ae ñeemombo sequite quti serasate nyii nae, aque que ñee si seje cote ra. —Echu rã ibate. Mbae tateacuquia ndeje. Ae ra jeĩ jeĩ mbia je nae, ùquĩ tateacuquia rã ndeje, i que seje ra. 2 Aque mose tuchi que Espiritu Turã mbae teacuquia seje cuu ra. Dios rese que amae cuu ra. Huee que eñi ngoi trono tose ibate ra. 3 Enininya tuchi que seje ra. Sita rendi rã jaspe rã. Cornalina na abe no. Ibei asa que chĩ trono mama nda. Ibei asa nininya tuchite que chĩ nda. Esmeralda rã. 4 Veinticuatro tronos que chĩ Dios mama nda. Veinticuatro amei ngue chĩ tronos tose ja ja ra. Huĩraoshĩ ngue ecunui ja ja ra. Coronas oro ao ji que chĩchi ja eãquĩ ndese ra. 5 Ama ngue sieu tuchi Dios mbae trónoo nda. Ama ngue ñee tuchi trónoo nda. Pirirã pirirã i tuchi que equia trónoo nda. Siete tata rendi que chĩ Dios ruba quti ra. Ùquĩ ndei Espiritu Turã na ùquĩ. 6 Ama ndisa raanguia que chĩ Dios ruba quti no nda. Eibera tuchi que ra. Mbae reco cuatro que chĩ Dios mama nda. Eresa ata atate que ùquĩ nda. Eruba quti que eresa ra. Equite quti abe que eresa no nda. 7 Nyacua rã tuchi que ùquĩ mo nda. Ticuasu riirĩ na ngue enongue no nda. Mbia ruba rã ngue enongue no nda. Ngaira risha rã ngue enongue no nda. Aque que mbebe quia ra. 8 Seis ja ja que ùquĩ jeo ra. Eresa ata ata tuchi que ejeo rese ra. Ùquĩ cuatro que ñee turã mbeite quia Dios rĩ nda. Isa abe que eriqui ñee turãte Dios rĩ nda. Eĩ ngue equia ñe e nda:
Ndeturãte. Ndeturãte. Ndequirãcuãte ereico co, Dios.
Co ereico beite co.

Nyii que ereico beite no nda.
 Mbae ua ja mose abe ra ereico beite
 no,
 i que ũquĩ nguia ñee ñee Dios je ra.
⁹ Ũquĩ ndeco cuatro que ñee turã
 mbeite quia Dios je ra. Ae siqui beite
 quia co, aque je. ¹⁰ Amei veinticuatro
 abe que ngoi ngoi quia ngũĩã ndese
 ra. Ñee turã turã Dios je. Umbae
 coronas que echono chono ja Dios jii
 ra. ¹¹ Eĩ ngue equia ñee ñee Dios je ra:
 Urererecua turãt e ereico co, Dios.
 Nyebe ureico nguĩã ñee turã mbeite
 ndeje ã.
 Mbae que erechao jate nembraerã
 nda.
 Erendua turãt e que mbae ao nonde
 nyii no nda,
 i que ũquĩ nguia ñee turã turãte Dios je
 ra.

5

Emo libro equia aronea

¹ Dios que libro quereco quia oo
 cuu ra. Uquiatocuti que enunui trono
 tose ra. Libro mbesa ji. Equitera quitu
 abe que embesa ji ra. Siete sellos
 je que ematã ji ra. ² Angel quirãcuã
 mo ngue ñee nda. —¿Aba ra sellos
 ndoso libro equia re? i que ángel
 ñeemombo ra. ³ Mbia mo ngue sellos
 ndoso aroneate ra. Ibatenda. Ibi
 jenda. Ibi qui rĩnda. Ũquĩ mo ngue
 sellos ndoso aroneate cuu ra. Nyebe
 mbia riqui nguĩã mae aroneate li-
 bro rese. ⁴ Nyebe que acheseo tuchi
 cuu ra. Mbia ja libro equia aronea
 mose. Mbia ja mae aronea mose
 erese. ⁵ Ũquĩ amei mo ngue ñee seje
 ra. —Erecheseochĩ nguĩã. Jesucristo
 ra libro equia. Ae quia equirãcuãte re.
 Ae quia Dios chiirabo rerecua tuchi
 re. David riirĩ tuchi chõ ae re. Ae
 quiatu que mbae rasi saã tuchi mbia
 icuã ndiquicharõ nda. Ae quia ra
 sellos ndoso. Ae quia ra libro equia, i
 que amei ñee seje cuu ra. ⁶ Jesucristo
 que chĩ huee cuu ra. Oveja iquia ji
 rã ngue eñi seje huee cuu ra. Siete
 que erambashĩ nda. Siete que eresa
 no nda. Siete eresa rei Espiritu Turã.
 Sã Espiritu Turã mae mbae ja rese

no. Jesucristo que chĩ Dios ruba quitu
 ra. Mbae reco cuatro joõ ngue eñi
 nda. Amei abe joõ ngue eñi no nda.
⁷ Dios que libro mondo Jesucristo oo
 cote ra. Dios chĩ mose trono tose,
⁸ Jesucristo libro isi mose que ũquĩ
 mbae cuatro ngoi ngũĩã ndese ejii ra.
 Amei veinticuatro rese. Arpas que
 amei quereco reco ja ra. Mbae riru
 oro ao ji abe no. Incienso resebe.
 Incienso, i que mbae mbushimbusa
 oquieĩ mose ra. Dios quiato ñee mose
 Dios je, eĩ sí chõ incienso ee re. ⁹ Ũquĩ
 amei ngue irasei rasei canto yasu mo
 je ra. ã ño ngue irasei rasei nguĩã:
 Nd e que mbia ndeiquia ra.
 Nde que mbia mangue chooñoa jenda
 ereisi Dios mbaerã nda.
 Mbia cheemo ja ja eriqui nae, ũquĩ
 abe que ereisi ja Dios mbaerã
 no nda.
 Mbia mbuae ja abe no.
 Nyebe nde mii ño libro ereisi arõte
 nguĩã co.
 Nde mii ño sellos erendoso arõte
 nguĩã co.
 Libro rese mae sacuã.
¹⁰ Nde que uremii Dios rimbarã nda.
 Ure mbae raã naa sacuã Dios je.
 Mbia ibi jenda rerecuarã nda ureico
 cote,
 i que amei irasei rasei Jesucristo je
 ra. ¹¹ Angeles cheẽ ngue achandu
 cot e ra. Angeles que chi ũquĩ mama
 tuchi cuu ra. Dios mama. Mbae reco
 cuatro abe mama. Amei veinticuatro
 abe mama no. Angeles tubiriã tuchi
 que ra. Millones y millones tuchi que
 ángeles ra. ¹² Ũquĩ ngue ñee nyecuate
 Jesucristo je re:
 Oveja riirĩ na ño ereico nguĩã nde.
 Mbia que ndeiquia mbae icuã
 ndiquicharõ nda.
 Nyebe mbia riqui nguĩã ñee turãte
 ndeje co cote.
 Nyebe mbia riqui nguĩã ñee turãte
 nderĩ co cote no.
 Ndequirãcuã nii. Ndeaquiatu rĩ abe
 no,
 i que ángeles ñee turã Jesucristo je cuu
 ra. ¹³ Mbae que ñee turã jate quia
 Jesucristo rĩ cuu ra. Ibatenda ñee
 turã ja erĩ. Ibi jenda abe no. Ibi qui

riinda abe no. Ama ndisha riinda abe no. Eĩ ngue ũquĩ nguia ñee turã jate Jesucristo je ra. Dios abe je:

Jẽquirãcuã jẽingo beite ã.

Mbia rerecua jẽingo beite ã no.

Mbae jenyiao ra ñee turã mbeite quia jẽje,

i que Dios chiao quia ñee jate ee cuu ra. ¹⁴Ae beite, i que mbae reco cuatro ra. Amei veinticuatro abe que ngoi ja ngũĩã ndese ñee turã Dios je ra. Ae ereco siqui beite quia co, aque je.

6

Jesucristo sellos ndoso

¹ Jesucristo que chĩ oveja riirĩ na cuu ra. Ae que sello mo ndoso libro si cote ra. Ae mbae reco cuatro chi nae, ũquĩ mo ngue ñee cote ra. —

Echu, i que ñeemombo ra. Ama ndieu rã ngue echeẽ nda. ² Caballo shĩ

mo ndese que amae cote ra. Ae chĩ eátoo nae, nguira mo ngue ecunui oo ra. Corona abe que emo mee ee ra. Oso que guerra raã naa cote ra. Equirãcuãte que eriqui mbia mo si ra.

³ Jesucristo que segundo sello ndoso cote ra. Ae mbae reco cuatro chi nae, ũquĩ mo ngue ñee endoso mose cote ra. —Echu, i que ra.

⁴ Caballo nongue gue usẽ u seje cote ra. Era ireĩ tuchi que aque ra. Ae chĩ eátoo nae, aque je que emo espada cuasu mee nda. Aque que mbia mbũcuã icuã jate nyue ra. Nyebe mbia riqui nguĩã nyũquia iquia.

⁵ Jesucristo que sello nongue ndoso cote ra. Tercer sello. Ae mbae reco cuatro chi nae, ũquĩ mo ngue ñee endoso mose cote ra. —Echu, i que ra. Caballo rondei que usẽ u seje cote ra. Ae chĩ eátoo nae, aque que balanza mo cunui oo ra. Mbae mbuchechasa.

⁶ Emo ngue chĩ ũquĩ mbae reco cuatro ite re ra. Aque que ñee nda: —Mbia chiu ra ua jiri. Un kilo de trigo rei una jornada. Tres kilos quiata a rei una jornada no. Mbae quira quiatu ra ua eã. Vino ndese, i que ra.

⁷ Jesucristo que sello nongue ndoso cote ra. Cuarto sello. Ae mbae reco cuatro chi nae, ũquĩ mo ngue ñee nda:

—Echu, i que ra. ⁸ Caballo nongue que usẽ u seje cote ra. Eracho que aque ra. Ae chĩ eátoo nae, ERAAQUE i que aque je ra. Emo ngue oso erui no nda. ERAAQUE TÃSA i que aque je no nda. ũquĩ ngue mbia ibi jenda mbutiã tuchi la cuarta parte ra. Mbia iquia iquia tuchi que equia guerra je ra. Mbae rasi je. Eriãcuã je. Quiaa riinda icuã je abe no.

⁹ Jesucristo que sello nongue ndoso cote ra. Quinto sello. Mbae rese que amae altar qui re cote ra. Mbia chi quia iquia aingue rese que amae nda. Ae mbia iquia iquia Dios cheẽ ñi nyii nae, ũquĩ aingue rese que amae nda. ũquĩ ñimbirãcuã tuchi chõ nguia mbae rasi je Jesucristo riĩ nyii reaẽ.

¹⁰ ũquĩ ngue tasẽ tasẽ ñee Dios je ra: —Mbae eresaã turã jate quia nde co, Dios. Mbae ja rerecua chõ nde re. ¿Manosete ra urerichare erembasi re no, Dios? i que ñee ja Dios je ra.

¹¹ Dios que tirushĩ mee mee ũquĩ ja je cote ra. Ñee ngue ee cote ra: —Mbarandiri. Mbia icuã nda jẽataque abe iquia. Sã jẽiquia nyii no. ũquĩ sacua jẽingo chombe jiri, i que Dios ñee e e ra.

¹² Jesucristo que sello nongue ndoso cote ra. Sexto sello. Ibi que nyere nyere tuchi aque mose cote ra. Tenda que ñimoo tuchi cote ra. Mbae ruqui rã tuchi que nyasi no nda. ¹³ Nyasitata que ngoi ngoi ngaẽ íbii cote ra. Sã ira a riqui uqui quiririã ñimbuqui no. ¹⁴ Ibei abe que ua cote ra. Sã emo ndiqui papel acua acua no. Sita ibate abe que siri siri ja nyesi ra. Ama ndisha joõ abe que echoi siri siri ja ra. ¹⁵ Mbia que ñimi ñimi ja ibicua ye ra. Sita imi ye abe. Mbia rerecua. Mbia rimba abe. Mbaecha abe. Soldados rerecua abe. Mbia que ñimi ñimi jate cuu ra. Esiquichete quia ñene. ¹⁶ Mbia siquiche mose que ñee ñee jate sita ibate je cuu ra: —Jenyu ngoi urearõ ureiquia. † nda Dios mbae rasi saanguquia eã ure je. † nda Jesucristo mbae rasi saanguquia eã ure je no. ¹⁷ Dios riqui

mbae rasi raanguquia uquiato eã je co. Aba quia ra ñimbirãcuã ã je, i que mbia quia siquichete cuu ra.

7

Angeles Dios mbae marca mii mii mbia je

¹ Aquere que cuatro ángeles atea cuu ra. Emo ngue chí juã tenda chuisa quititi ra. Enongue que tenda sosa quititi no nda. Enongue que sur quititi no nda. Enongue que norte quititi no nda. Ũquĩ ngue quiririã isi tuchi quia ra. I chu eã sacua. Mangue jenda chooñoa quitinda abe ichu eã sacua. Ama ndisha quititi abe. I nda quiririã ira rãquiã mo ichu eã tuchi. ² Angel nongue mo ndese abe que amae no nda. Tenda chuisa quititi que eru quia ra. Dios mbae marca que equereco ra. Ñeemombo que ũquĩ ángeles cuatro je ra. ³ —Mbae rasi ra jemondo jeichĩ ibi je jẽ. Ama ndisha abe je. Ira abe je. Dios rimba ruba rese Dios mbae marca uremii mii na nyii, i que ñeemombo ángeles cuatro je ra. ⁴ Ciento cuarenta y cuatro mil ndese que Dios mbae marca mii nda. Judíos chumumbara ja que ra.

⁵ Judá riirĩ ndei doce mil.

Rubén ndiirĩ ndei doce mil.

Gad ndiirĩ ndei doce mil.

⁶ Aser riirĩ ndei doce mil.

Neftalí riirĩ ndei doce mil.

Manasés riirĩ ndei doce mil.

⁷ Simeón ndiirĩ ndei doce mil.

Leví riirĩ ndei doce mil.

Isacar ndiirĩ ndei doce mil.

⁸ Zabulón ndiirĩ ndei doce mil.

José riirĩ ndei doce mil.

Benjamín ndiirĩ ndei doce mil.

Ũquĩ ja rese que ángeles Dios mbae marca mii mii nda.

Mbia tubiriã irashĩ

⁹ Aquere que mbia cuabête atea cuu ra. Contar i ja aroneate que ee cuu ra. Ecuabête quiatu ngue re. Mbia chumumbarate que ra. Mangue chooñoa jenda abe tubiriãte que ra. Echeẽ ñumumbarate que ra. Dios ruba quititi que ũquĩ chí jate juã nda. Cristo ruba quititi abe no.

Eiraoshĩ ja que chí ra. Sindo que equeru ja oo ra. ¹⁰ Ũquĩ ngue tasẽ tasẽte u ñee Dios je ra. Cristo abe je.

Ã i chõ ngue equia ñee nda:

Nde ae ereico nguiã mbia rirõ eicuã si co.

Nde ereico trono tose mbia rerecuarã co.

Jesucristo rese chõ ereico nguiã mbia rirõ ndirõ eicuã si co,

i que ũquĩ ja ñee Dios je ra. ¹¹ Angeles que ñumbui jate u Dios mama cuu ra. Mbae reco cuatro abe mama. Ae amei veinticuatro chí nae, ũquĩ abe mama no. Ũquĩ ángeles que ngoi jate ngũiã ndese Dios ruba quititi ra. Ngũiã ndese que echi ñee turã jate Dio s je ra:

¹² Dios turã tuchite riqui mbia je co.

Sã mbia riqui ñee turã mbei erĩ.

Dios aquiatu tuchite riqui co.

Sã mbia riqui “gracias” i bei ee.

Dios quirãcuã tuchite riqui co,

i jate que ñee turã Dios je ra. ¹³ Ũquĩ amei mo ngue ñee seje cote ra: —

¿Aba ã nde? Ae eiraoshĩ chí a. ¿Ma si ecuaẽ a re no? i que ñee seje cuu ra. ¹⁴ —Ereicuate nde resẽ, Amei, ae que ee ra. Ae que eicua seje cote ra.

—Ã ngue mbae rasi saã tuchi quia resẽ. Tiru irei ji rã ño ã ñia ndiqui nguiã ã cote. Jesucristo echiã mbitirõ nguqui je resẽ. ¹⁵ Nyebe eriqui beite nguiã Dios rese ã. Nyebe eriqui nguiã mbae raã naa mbei Dios je echuchúaa ã. Dios ra siqui bei erese. Teaquiato bei ra mingo. ¹⁶ Ũquĩ nda ngũiãcuã irara eã mbei. Huisei abe ra eirara eã no. Tenda abe ra eiro eã. Huiriei abe ra eucuyã eã cote. ¹⁷ Jesucristo quia ra eteaquiato bei mingo. Sã oveja raarõsa riqui oveja reaquiature no. Sã eriqui oveja rerao rao mbiu no. Eĩ si ra Jesucristo ũquĩ ndeaquiato mingo. Dios ra echeseo mbutiba bei cote, i que amei ñee seje ra.

8

Mbae rei ji shimbu turã ndetashĩ ngasẽ oso Dios je

¹ Jesucristo que sello nongue ndoso libro si cote ra. Séptimo sello. Mbae

ibatenda que quiriri tuchi sello ndoso mose ra. Quiriri arete que ra. Media hora chee. ² Siete ángeles chi quia Dios ruba quiti nae, ũquí ndese que amaembe cuu ra. Emo ngue trompeta mee ja ja ũquí je ra. Siete que trompetas ra. ³ Angel mo ngue tu incienso riru mo nderu ra. Oro ao ji. Tiba que uã altar jii ra. Emo ngue incienso tubiriã mondo ee cuu ra. Altar mo ngue chí oro ao ji ra. Aque arõ ngue ángel incienso ñono nda. Dios ruba quiti. Ae Dios quiato ñee ñee nguia Dios je nae, ũquí ñee ngue ngasẽ nguia Dios je ra. Incienso rei jí shimbu turã ndese. ⁴ Incienso retashĩ ngue nyui oso quia ángel o si ra. Dios quiato cheẽ mbirõ ngue eriqui oso ngasẽ Dios je ra. ⁵ Angel que incienso riru mombisẽ tata reteĩ je ra. Altar jenda je. Ichusẽ ngue ibi quiti cuu ra. Ama ngue sieu tuchi cote ra. Pirirã pirirã i tuchi que ra. Ibi abe que nyere cuu no nda.

Ángeles trompetas mbucheẽ

⁶ Ae siete ángeles trompetas quereco nae, ũquí ngue icoquiato cote ra. Trompeta mbucheẽ sacua.

⁷ Emo ngue trompeta mbucheẽ cote ra. Iquitã ngue ngoi ngoi tuchi íbii cote ra. Tata abe que ngoi ngoi ra. Ireĩ tuchi que cote ra. Mbae ruqui rã. Ibi tercera parte que oquiei tuchi ra. Ira tercera parte abe que oquiei ra. Mbae ruri abe que oquiei ja no nda.

⁸ Segundo ángel que trompeta mbucheẽ cote no nda. Aque mose tuchi que mbae mo ndu ngoi ama ndisha ye ra. Ecuasu tuchi que ra. Sita ibate rã. Sendi que u ama ndisha ite re ra. Ama ndisha tercera parte ireĩ tuchi que cote ra. Mbae ruqui rã. ⁹ Ama ndisha rinda tercera parte que mano ja ra. Ae ngata quia ama ndisha rui barcos nae, ũquí tercera parte abe que ñimi imi ja no nda.

¹⁰ Tercer ángel que trompeta mbucheẽ cote no nda. Aque mose que nyasitata cuasu mo ndu ngoi íbii ra. Tata rendi rã ngue erendi ra. Ngoi que ama tercera parte ye ra.

Eriecua tercera parte ye ja abe que ngoi no nda. I mbiã tuchi que ra. ¹¹ Etei, i que equia aque nyasitata je ra. Nyasitata que ama tercera parte mbotei tuchi ra. Itei tuchi que cot e ra. Nyeb e mbia riqui nguiã mano mano tuchi iu mose cuu.

¹² Cuarto ángel que trompeta mbucheẽ cote no nda. Aque mose que mbae mo tenda mbuchecuayãte tercera parte ra. Nyasi tercera parte abe. Nyasitata tercera parte abe no. Nyebe mbae checuayã tuchi riqui nguiã mbia je nyaashĩ mose tercera parte. Isa mose abe nyasi mbae tesae eã tercera parte. Nyasitata abe no.

¹³ Nguira risha rese que amae cuu cote ra. Mbebe que equia ibate tuchi searõ nda. Ñeemombo mombo que equia ra: —Aba mbia eã tuchi mbia ibi jenda. Mbae rasi ra esaã tuchi cote. Angeles ataque nyuihuĩ mose. Angeles tres trompetas mbucheẽ mose, mbia ra mbae rasi saã tuchi cote, i que nguira risha ñee nda.

9

¹ Quinto ángel que trompeta mbucheẽ cote no nda. Aque mose que nyasitata mo ngoi u íbii seje cuu ra. Mbia raãte que aque nyasitata ra. Nyasitata que ibicua atiquia jea ra. Abismo, i que hue ibicua je ra. ² Equia mose que tatashĩ usẽ tuchi ra. Sã tata riqui nyuuta rosot e tetashĩ no. Tatashĩ ngue tenda choote ra. Mbae mbuchecuayã jate que ra. ³ Tatashĩ si que tucu mbuae ngaẽ tuchi usẽ cote ra. Tucu mbuae que ibi mboo ja tuchi nyoĩ manguie chooñoa nda. Mbia i i tuchi que equia ra. Quiraẽ ndasi rã tuchi que eriqui mbia je ra. ⁴ Emo ngue ñee tucu mbuae je ra: —Ira mo nda jẽuchĩ jẽ. Ira ruri ja abe. Mbae ruri ja abe no. Quiata abe no. Mbia Dios quiatoã achõ ño jembasi mbasi quia. Ae Dios mbae marca quereco eã nguia nguba rese nae, ũquí. ⁵ ũquí je mbae rasi jẽsaanguquia tuchi cinco meses. Jẽiquia eã ño, i que ñee tucu mbuae

je ra. Quiraẽ ndasi rã tuchi que tucu rasi riqui mbia je ra. ⁶ Aque mose ra mbia “nandemano” i tuchi rei nguiã nyue. Mano aroneate rae.

⁷ Caballo rã tuchi que tucu mbuae ra. Sã caballo riqui icoquiato guerra raã naa sacua no. Corona naanguia que siqui tucu mbuae aiqui ndese ja ja ra. Oro ao ji ereae. Mbua ruba raãte que tucu mbuae ruba ra. ⁸ Cuña a raãte que ea ra. Nyacuareĩ naate que ereĩ nda. ⁹ Eishia atã tuchi que ra. Hierro rã. Mbua eiõ aronea. Guerra ndieu rã tuchi que ebebe mose ra. ¹⁰ Sã quiraẽ ndiqui mbia i ngocoi je no. Eĩ si que equia mbia i i ngocoi je ra. Mbua mbasi mbasi que equia cinco meses ra. ¹¹ Angel icua mo ngue tucu mbuae rerecua ra. Ae ibicua atiquia jea nae, aque que ererecua ra. Abadón, i que hebreo cheẽ nguia ee ra. Apolión, i que griego cheẽ nguia ee no nda. —Mbua iquiasa, i chõ nguiã embae nombres je.

¹² Tucu mbuae que ua chee cote ra. Mbua rasi ñiinda chõ uqui nde. Mbua rasi nyeremo tasenei jẽje cote.

¹³ Sexto ángel que trompeta mbucheẽ cote no nda. Aque mose que emo ñee altar jii Dios mbua ra. Oro ao ji rei altar. ¹⁴ Ñee ngue ángel je ra. Ae trompeta mbucheẽ namo nae, aque je. —Cuatro ángeles embui rã mondo. Aecua jí chi Ama Eufrates nae, uqui embui rã mondo, i que ee ra. ¹⁵ Cuatro ángeles que embui mondo cote ra. Aque mose sacua ngue Dios uqui nderecoquiato ra. Uqui ngue mbua iquia iquia tuchi tercera parte cuu ra. ¹⁶ Soldados tubiriã tuchi que uqui ángeles nimba cuu ra. Doscientos millones tuchi que ra, i que achandu ra. ¹⁷ Caballo átoo que soldados chi ja ra. Eishia riquisã ja ja que mbua atã ñi nda. Eishia aosa mbiitã jí que ra. Eireĩ. Erubi. Echo. Nyacua aiqui na ngue caballos seje cuu ra. Tata que emombo mombo ja quia uchuru rã nda. Tatashĩ abe. Azufre abe no. ¹⁸ Uqui tres que mbua rasi tuchi ra. Tata. Tatashĩ. Azufre. Ae caballos

mombo mombo quia uchuru rã nae, uqui. Uqui ngue mbua iquia iquia tuchi quia tercera parte ra. ¹⁹ Ngocoi je que eriqui mbua mbasi mbasi tuchi ra. Mbei tasi je rã tuchi que erocoi ra. Uchuru je abe que eriqui mbua mbasi mbasi tuchi ra.

²⁰⁻²¹ Nyebe mbua riqui nguiã mano mano tuchi uqui ndasi je. Mbua ataque quiato que siqui beite quia huicua ndese ra. Eicua icua mbei nyue. Nyiquia iquia. Brujería raã naa mbei. Siqui icua icua cuña mo ndese. Mbua mbuquiachã quiachã mbei. Uchisaã icua si hui eã mbei. Siqui beite que equia aba checuayã ndese ra. Uchiao Dios abareã ndese abe no. Oro ao ji. Plata ao ji. Bronce ao ji. Sita ao ji. Ira ao ji abe no. Uqui ja rese chõ ngue eriqui ra. Uqui mae aroneate raque Dios abareã. Mbua andu aroneate raque. Ngata aroneate raque no.

10

Angel libro mo quereco

¹ Angel mo ngue nguichi ibei si seje cuu ra. Equiracuãte que ra. Ibeishĩ ngue equeru huiraorã nda. Ibei asa que chí eãqui mama nda. Eruba nininyate que tenda rã sí ra. Etima abe nininyate que ra. Sã tata nininyate riqui no. ² Libro ñetẽ mo ngue equereco oo ra. Eequia ji que equereco ra. Utima ndibisho que emi ama ndisha ye ra. Utima ndibisho que emi ibi no nda. ³ Tasẽ tuchi que ra. Sã nyacua riqui curu curu no. Erasẽ mose que ama ñee siete veces ra. ⁴ —Ae rese ama ndieu sembiirandu nae, aque tambesa rã, ae rei que se cote ra. Ibatenda mo ngue ñee ño seje ra. —Ae ama ñee erechandu nae, uqui nda erembesachĩ. Eresenei seneichĩ nda emo je. Echeẽ emocoño ño, i que seje ra. ⁵ Ae ángel tima ndibisho chí ama ndisha ye nae, aque que oo uquiato cutinda mee ibate quitira. ⁶ Ñee ngue cote ra: —Dios que sembu ra. Ae siqui i beite quia co nae. Ae ibei chao nae. Ae ibi

chao nae. Ae ama ndisha chao nae. Ae mbae chao ja tuchite nae. Aque que sembu co renei nenei sacua nda. Achite mbae ja ñi ua a cote. ⁷ Séptimo ángel nda nyuihuí cote. Trompeta mbucheẽ. Dios cheẽ ique ja mose r a nyuihuí cote. Ae Dios ñee uquiato ñiinda je nae, ñquĩ nda ique ja echeẽ cote. Mbia rerecuarã tuchi ra Jesús cote, i que ángel quirãcuã ñee seje cuu ra.

⁸ Ae cheẽ achandu ibatenda nyii nae, aque que ñeembe seje ra. —Eso rã libro ñetẽ isi. Ae tima chí ama ndisha ye nae, ae tima ndibisho chí íbii nae, aque si libro ñetẽ eisi rã. Eequia ji eisi, i que seje ra. ⁹ Ae aso nguiã ñee ángel je. —Libro ñetẽ emee na seje, ae que ee ra. Ae emee nguiã ñee seje cote. —Co libro ñetẽ jẽ. Eu ja. Irao raãte raque ra eachã namo mose. Etei tuchite quiatu ra nderie je cote, i que seje ra. ¹⁰ Angel que libro ñetẽ mee seje cote ra. Au que se ra. Etura tuchi que sechuru je ra. Irao rã. Se eu tuchi mose quiatu que eteite serie je cote ra. ¹¹ Emo ngue ñee seje cote ra. —Dios cheẽ nda eresenei senei sí mbia ja je. “Co ra Dios saã. Ñ nda Dios saã no”, ere ra mbia je. Ishonda abe je. Mangue choñoa jenda abe je. Mbia cheẽ ñumumbara abe je. Mbia rerecuã jate abe je, i que seje cuu ra.

11

Dios quiato nyeremo Dios cheẽ senei senei

¹ Dios que uu mo mondo séoo cuu ra. Ñee ngue seje ra. —Eso Dios chuchua mbuchecha checha. Altar abe embuchecha. Ae mbia chí huee ñee ñee Dios je nae, ñquĩ abe je contar ere rã. ² Itaicuee ra erembuchechachĩ jẽ. Patio ra erembuchechachĩ jẽ. Ñquĩ ngue amee mbia sequiataõ je ra. Sequiataõ nda irõ irõ Jerusalén ndese cuarenta y dos meses chee. ³ Sequiatao nyeremo je ra sequirãcuã amee. Ñquĩ nda secheẽ senei senei tuchi quia mbia je 1,260 días chee. Tiru rondei ra ñquĩ quereco quia, i que seje ra.

⁴ Dios quiato nyeremo ndei olivos i nyeremo na sí. Candeleros nyeremo na sí no. Sã Dios mbae reaquiato ja no. Uquiato nyeremo abe ra eteaquiato no. ⁵ Dios ra uquirãcuã mee ñquĩ nyeremo je. Emo embasi serĩ mose, tata ra embu embu uchuru si. Ucuãyãsa mbasi tuchi sacua. Eĩ nda mbia mano mano, ñquĩ Dios quiato nyeremo ucuãyã mose. ⁶ Ñquĩ Dios quiato nyeremo ama mbuchaaqui eã arõte, Dios cheẽ nenei nenei mbei mose mbia je. Mbae ruqui rã nda ama naa. Mbia ra embasi mbasi arõte uquirãcuã je. Ibi jenda a mbasise mose, mbasi tuchi rae. ⁷ Ñquĩ Dios quiato nyeremo Dios cheẽ nenei nenei ja mose mbia ja je, icua nda tu icuate ee cote. Ibicua yenda. Icuã nda Dios quiato nyeremo iquia cote. ⁸⁻⁹ Emo ñquĩ Dios quiato raaque nyati aroneate. Erete tiquia iriã nda chichõ itaicuee rĩ. Mbia mangue choñoa jenda abe tuchi r a mae ja eraaque rese. Tres días y medio chee rae. Jerusalén ndei ra ñquĩ. Ae mbia Jesucristo mbucha ira rese nae, huee. Hue jenda quiarei eicua tuchi mbia. Sodoma jenda rã. Egipto jenda rã abe no. ¹⁰ Ae mbia siqui quia ibi rĩ nae, ñquĩ ia tuchi rae. Dios quiato nyeremo mano mose. —Ae nandechiao icua siquisã quisã nguia nae, ñquĩ ngue mano cote ra, i r a eyate ñee nyue. Nyebe ra eriqui mbae mondo mondo tuchi nyue. ¹¹ Dios quiato nyeremo ndaaque que chí tres días y medio cuu ra. Aquere que Dios embuquera sí seque re cuu ra. Júã ngue cuu ra. Mbia que siquiche ja tuchi mae erese ra. ¹² Ibatenda que ñee nyecua ñquĩ Dios quiato nyeremo je cote ra. —Jenyu aa quiatu ibate, i que Dios ñee ee ra. Nyoĩ que ibate ibei ye cuu ra. Eucuãyãsa que mae mbeite u echui rese ra. ¹³ Aque mose tuchi que ibi nyere icua nda. Sucha tubiriã ndibisho que ngoĩ ngoĩ jate ra. Mbia tubiriãte que mano nda. Siete mil que mbia mano nda. Mbia

ataque que siquichete ra. Ñee turã turãte que equia Dios ibatenda je cote ra. ¹⁴ Segundo mbae rasi chõ ã nde. Tercero quia tasenei jêje cote.

Séptima trompeta mbucheẽ cote

¹⁵ Séptimo ángel que trompeta mbucheẽ cote no nda. Ñquĩ mose que mbia ñeemombo ja ja ibatenda ra. Eĩ ngue tasẽ tasẽ nda:

Mbia mo ibi jenda mo nda siquiã ererecuarã cote.

Dios ae chõ nda siqui ererecuarã cote. Nguiirĩ ndese.

Ae ae chõ nda siqui ererecuarã mbei cote,

ĩ que ibatenda tasẽ tasẽ cuu ra.

¹⁶ Ae amei veinticuatro siqui beite quia Dios jii nae, ñquĩ ngue ngoi nguiã ndese ñee Dios je cuu ra. Eĩ ño ngue ñee nguiã:

¹⁷ Gracias ure tuchi quia ndeje co, Dios.

Ndequirãcuã mbae saã ja arõte quia co.

Ereico beite que equia nyii ra. Namo abe no. Ereico beite ra eno.

Ereico ndequirãcuã naanguquiate mbia je co cote.

Ereico mbia rerecuarã tuchi co cote.

¹⁸ Mbia rerecua que paama ite ndeje ra.

Co mose ra ndequiatoã erembasi cote.

Ndequiatoã mano je abe ra erembasi cote.

Ndequiato abe ra erembuquera cote.

Mbae turã mee mee sacua ee.

Ae ndecheẽ senei senei mbeite quia mbia je nae.

Ae ñee turã turã nguia ndeje nae.

Ndequiato cuasu je. Ndequiato ñetẽ je abe no.

Ndequiato ja je ra mbae turã eremee mee cote.

Ae mbia mbeicuã icuã nguia nae, ñquĩ nda erembutiã co mose cote,

ĩ que veinticuatro amei ñee turã Dios je cuu ra. ¹⁹ Dios chuchua ibatenda iquesa que quiata seje cuu ra. Caja Dios chuchua jenda que nyecua seje cuu ra. Aque rei contrato riru Dios mbae aque. Aquere que ama pirirã

pirirã ĩ ra. Ama ngue sieute ra. Ama

ngue ñeete ra. Ibi que nyere ra. Iquitã abe que ngoi ngoi chee ra.

12

Dragón icuã icuã cuña je

¹ Mbia mae sayã mo ndese que amae ibate cuu ra. Cuña nguasu tuchi mo ngue ra. Tenda que eirao ra.

Nyasi que chĩ ei quiti ra. Corona ngue equereco uãquĩ ndese ra. Nya-sitata doce que chĩ corona ndese ra.

² Nañimbae que cuña nda. Tasẽ tasẽ tuchi que equia nguiirĩ ndasi je ra.

³ Aquere que amae mbia mae sayã mo ndese ibate no nda. Dragón ireĩ mo ndese que amae nda. Siete que aque dragón ãquĩ cuu ra. Diez que er-

ambashĩ nda. Corona ngue chĩ eãquĩ ja rese ra.

⁴ Dragón ngue nyasitata tubiriã siichã tuchi imbu íbii ngocoi je ra. Cuña ji que eñi eraarõ cote ra. —Sã nyaacuquia. Eriirĩ tau, ĩ que huĩ ejii ra.

⁵ Nyaacuquia que cote ra. Erãcoẽ ngue ra. Mbia ja rerecuarã tuchi ra aque. Emo ngue eriirĩ isi ra.

Querao que Dios je íbatee ra. ⁶ Cuña ngue uchã oso turuquia ñi nda. Dios echuchua saã ño nguia huee reaẽ.

Huee que eriqui 1,260 días ra. Huee que emo ndiqui embuquiaru quiaru ra.

⁷ Amae ngue guerra rese ibate cuu ra. Dragón icuã icuãte que ángeles je ra. Miguel nimba ángeles abe que ucu a dragón nimba ángeles rese no nda. Nyiquia serĩ jate que cuu ra.

⁸ Dragón ngue ganar ĩ aroneate umbae ángeles rese ra. Nyebe eriqui aroneate nguiã ibate cote.

⁹ Dios que dragón mombo bei ibate si cote ra. Mbei ima ndei dragón. Di-

ablo. Satanás, ĩ abe que ee ra. Ae chõ mbia mangu choñoa jenda mbeirĩ irĩ mbeite nguiã co. Dios que ae mombo íbii cuu ra. Ngũimba rese.

¹⁰ Ibatenda ia tuchi que Dios emombo mose ra. Ibatenda mo ñee ngue achandu cuu ra: —Coche ñene.

Dios riqui mbia rirõ mbei huicuã si co cote. Namo tuchi mbia riqui mae Dios quirãcuã ndese co. Cristo

riqui mbia rerecua tuchi co cote. Dios quiatu que diablo mombo nguiã. Ae Dios mbuqueta queta beite quia equiato rĩ nyii. ¹¹ Ūquĩ Dios quiato que diablo siquisãte quia Jesús ruqui je ra. Jesús cheẽ je abe no. Ae ũquĩ senei mbeite quia mbia je Jesús cheẽ nae, ũquĩ je chõ eriqui nguiã eriquisã quisã. Ūquĩ Dios quiato que siquicheãte quia umano si ra. “Tamano ndei Dios je”, i jate que equia ra. ¹² Mbia ibatenda ia tuchite cote. Mbia ibi jenda quiatuchĩ eya eãte. Mbia ama ndisha yenda abe no. Diablo quiatu que nguichichĩ u nguiã jẽje, ibi jenda. Paama i tuchite equia co. Achite quiatu Dios ñi nguiã embasi a cote, i que ibatenda mo ñee cuu ra.

¹³ Dios dragón mombo mose íbii, dragón icuã icuã ngue cuña je cote ra. Ae eririĩ nacue nyaacuquia nae, aque cuña je que dragón icuã icuã cote ra. ¹⁴ Emo ngue mbae jeo nyeremo mondo cuña je ejeorã nda. Nguira risha jeo raanguia. Cuña mbebe sacua. Eso chee sacua turuquia rĩ. Ae Dios saã echucharã turúquiaa nyii nae, huee eso chee sacua diablo si. Mbei si. Emo embuquiaru sacua tres años y medio huee. ¹⁵ Mbei que i mombo tuchi uchuru rĩ nda. Iãcuana. Cuña iquia sacua ndaque chõ ũquĩ iãcuã nde. ¹⁶ Ibi ia eãte que cuña ndese ra. Nyebe ibi nyiequia nguiã i mocõ ja dragón nyuru jenda. ¹⁷⁻¹⁸ Nyebe dragón paama i tuchi nguiã cuña je. Eicuã icuã mbeite que eriqui cuña ndiirĩ ataque ja je cote ra. Ae Dios cheẽ mumba eãte quia nae, ũquĩ je chõ eriqui nguiã cuña ndiirĩ i. Ae siqui beite quia Jesús cheẽ ndui nae, ũquĩ je dragón icuã icuã mbeite riqui co.

13

Icuã nyeremo

¹ Ama ndisha rimia ndese que aĩ juã cuu ra. Mbae mo ndese abe que amae huee ra. Icuã mo ngue usẽ u quia ama ndisha si seje cuu ra. Siete

que eãquĩ nda. Diez que erambashĩ nda. Corona ngue chĩ erambashĩ ndese ja ra. Eãquĩ ndese que nombre mo mbesa ji ñi nda. Aque nombre icuãte que Dios je ra. ² Nyacua risha rã ngue icuã nda. Oso i rã tuchi que ei ra. Echuru que nyacua churu rã nda. Dragón ngue uquirãcuã mee tuchi icuã je ra. —Ererecuarã nde, i tuchi que dragón icuã je ra. ³ Icuã aiquĩ mo sia ji tuchi rei ngue re. Manombi chõ ndei ngue re. Nyerõ ñochĩ ngue re. Nyebe mbia mangu e chooñoa jenda nyuruira jate nguiã mae erese cote. Mbia que siqui jate eruĩ cote ra. ⁴ Mbia que ñee turã turãte quia dragón je ra. Uquirãcuã mee mose icuã je. Icuã je abe que eriqui ñee turã turãte ra: —Co icuã turã na eãte mbia mo. Ae mñi ño equirãcuã ndiqui nguiã mbia si co, i jate que mbia quia ee ra.

⁵ Icuã ngue ucuasu saã saã tuchi quia Dios je ra. —Dios tuchi chõ se re, i tuchi que equia mbia je ra. Dragón ngue emñi mbia rerecuarã cuarenta y dos meses ra. ⁶ Aque mose bei que eriqui ñee icuã icuã Dios rĩ nda. Echuchua rĩ abe no. Dios rimba ibatenda rĩ abe no. ⁷ Dragón ngue uquirãcuã mee tuchi icuã je ra. Icuã icuã icuãte que eriqui Dios quiato je cote ra. Dios quiato iquia iquia cheete que equia ra. Icuã ngue mbia mangue chooñoa jenda rerecua tuchi cote ra. Mbia cheemo abe rerecua tuchi que cote ra. ⁸ Mbia Dios quiato ja tuchi que siqui icuã ndese ra. Ae embae nombre mbesa iriãte riqui Jesús mbae libro rese nae, ũquĩ ngue siqui jate icuã ndese ra. Dios quiato mbae nombre que Jesús mbesa mbae ao ja nond e coose ra. Jesús mano nonde eriĩ. ⁹ Jẽisa mose, secheẽ jeñandu rã. ¹⁰ Dios mbae icua ja chõ nguiã, mbae tã i nonde equiato je. —Co sequiato ra mbia iquia tiquise je, i mose Dios, mbia ra eiquia tiquise je. —Co sequiato ra mbia tarõ, i mose Dios, mbia ra etarõ no. Sã Jesucristo rimba ñimbirãcuã ño. Sã Jesucristo icua tuchi. Icuã icuã icuã mose ee. ¹¹ Aquere que amae icuã mo ndese no

nda. Ibi si qu e co icuã ndu ra. Er-ambashĩ nyeremo ngue ra. Cordero nambashĩ na si que ra. Dragón ñee na si que echeẽ no nda. ¹² Equirãcuã tuchi que ra. Icuã ñiinda rã sí. —Icuã ñiinda rimbarã ño jẽingo, i tuchi que equia mbia mingo ja icuã ñiinda rese ra. Ae ãquĩ sia ji nyerõ nguia nae, aque. ¹³ Mbia mae sayã ngue esaã saã tuchi quia ra. Tata que embucoi ibei si mbia resa rae ra. ¹⁴ Mbia mae sayã ngue esaã saã tuchi icuã ñiinda rese eico mose ra. Eĩ ngue equia mbia mbĩrĩ irĩ tuchi ra. —Icuã ñiinda raanguia mo mbae mo jenyao jẽ, i que ñee mbia je ra. Mbia que echao ra. Ae ãquĩ sia ji tiquise je nae, ae nyerõ nguia nae, aque raanguia que mbia chao ra. ¹⁵ Icuã ngue ereco mee mbae ao ji je ra. Mbucuate que ra. Mbucheẽ ngue ra. Mbia rã ngue eriqui cote ra. Ae ngoi sereãte quia ngũĩã ndese mbae ao ji résaa nae, mbae ao ji que ùquĩ iquia cote ra. ¹⁶ Icuã ngue umbae marca mii jate mbia rese ra. Mbia ruba rese. Mbia o rese equiatocutinda. Mbia riri irĩ ndese. Mbia cuasu rese. Mbaecha rese. Mbaecha reã abe rese. Mbia rimba rese. Mbia rimba eã ndese abe no. Icuã ngue marcar i ja mbia ja je cuu ra. ¹⁷ Mbia mo marcar iriã mose, ùquĩ mbae mo isi aroneate. Mbae mo je vender i aroneate no. Icuã mbae marca nderequia eã mose. Icuã mbae número abe rerequia eã mose no. ¹⁸ Ae ndua tuchi eãte quia nae, ùquĩ nda ã icua eã. Ae mbae icuate quia nae, sã ùquĩ icuã mbae número icua. Mbia mo ni ño ñene. Embae número rei 666.

14

Mbia 144,000 irasei rasei Dios je

¹ Mbae mo ndese abe que amae cuu ra. Jesucristo que chí juã Ibi Ibate Sión seje cuu ra. Ae je eriqui Cordero i. Mbia cuabẽ tuchi que chí erese ra, 144-000 que mbia chí erese ra. Ùquĩ nduba rese ja ja que Jesucristo mbae nombre mbesa ji ñi nda. Dios mbae nombre mbesa ji abe no. ² Mbae rieu

que achandu bei quia ibatenda ra. Tororomba ata ata rieu raãte que ra. Ama ndieu abe raãte que ra. Sã mbia tubiriãte riqui arpas mbucheẽ ñee no jẽ, ùquĩ naate que erieu riqui ra. ³ Ùquĩ mbia cuabẽte que irasei rasei quia Dios résaa ra. Mbae reco cuatro résaa abe no. Amei veiticuatro résaa abe que eriqui irasei rasei no nda. Eirasei rasei yasu que ra. Mbia mo ngue ñimbaaquiato aroneate quia eirasei rasei yasu je ra. Mbia 144,000 achõ ño ngue ñimbaaquiato aque irasei rasei yasu je ra. Dios ùquĩ sirõ nguiato quia mbae icuã si reaẽ. ⁴ Ùquĩ ngue ñimbũcuã eãte quia mbae icuã je ra. Ñimbũcuã eã siqui cuña mo ndese no. Siqui turã mbei equia Jesucristo rese ùquĩ. Dios que esirõ mbei mbia ibi jenda si ra. Ofrenda turã na tuchi chõ ùquĩ Dios je re. Jesucristo abe je. ⁵ Ùquĩ nguiarei ñee ñooño eã tuchi ùquĩ. Ùquĩ turã tuchite eriqui Dios je ã.

Tres ángeles ñee mbia je

⁶ Amae ngue ángel nongue rese cuu ra. Mbebe mbebe que equia ibei rĩ cuu ra. Dios cheẽ turã ua eã je que equereco quia ra. Erenei nenei sacua mbia ja je. Mangue chooñoa jenda ja je. Mbia cheẽ ñumumbara abe ja je. ⁷ Aque ángel que ñee nda: —Jẽireĩ ireĩ jiri Dios si. Jeñee turã turã jiri quia ee. Achite Dios ñi mae ja mbia rese a. Uquiatoã mbasi nonde. Dios quiato ngue mbae chao ja nguia. Ibei. Ibi. Ama ndisha. Ama ndũcoĩ. Nyebe ra mbia ñee turã ee, i que ángel ñee cuu ra.

⁸ Ángel nongue abe que siqui seje cuu ra. Aque que ñee cote ra: —Sucha tubiriã Babilonia ngue quiachãte cote ra. Babilonia nda mbia mbũcuã eã cote. Mbia mbũcuã tuchi chĩ equia nyii, i que aque ángel ñee cuu ra.

⁹ Ángel nongue abe rese que amae no nda. Ñee asite que ra: —Icuã ndese chõ nda jẽingochĩ jẽ. Icuã naanguia mbae ao ji rese abe chõ nda jẽingochĩ jẽ. Icuã mbae marca ra jemũchĩ jenduba rese jẽ. Jẽo abe

rese ra jemiichĩ jẽ. ¹⁰ Emo emi mose, Dios ra paama i tuchi ee. Emo emi mose, Dios ra embasi tuchi. Dios ra ũquĩ mbasi bei tata je. Azufre je abe no. Mbasi bei ra ángeles resa rae. Jesucristo resa rae abe no. ¹¹ Ũquĩ nda Dios mbasi bei. Mbae rasi ra eucua mbiri jiriã. Siqui quiatu que equia icuã ndui mbaerã nda. Icuã naanguia ao ji abe rese quiatu que eriqui ra. Icuã mbae marca abe rese quiatu que eriqui mbaerã no nda.

¹² Dios quiato tuchi ra ũquĩ saã eã. Sã eriqui beite Dios cheẽ ndui. Sã eriqui ñimbirãcuã mbeite, i que ángel ñee cuu ra.

¹³ Ibatenda mo ngue ñee seje cuu ra: —Å embesa rã: “Jesús quiato mo mano mose, eyate riqui co”, ere chõ mi embesa. Espiritu Turã ñee abe chõ ũquĩ nde. Jesús quiato mo mano mose, uquenea nda eucua cote. Ae mbae turã esaã saã nguia nyii nae, ũquĩ si ra Dios tesareia mbei, i que ibatenda ñee seje ra.

Dios uquiatoã mbasi mose, mbae a riamí amí na ño nda esaã ee

¹⁴ Ibeishĩ ndese que amae cuu cote ra. Emo ngue chĩ ngoi ibeishĩ tose ra. Jesucristo rã tuchi que ra. Corona ngue chĩ eãquĩ ndese oro ao ji ra. Tiquise raanguia rimbete que equereco oo ra. Quiata a ucuu ucua sacua. ¹⁵ Angel mo ngue tu usẽ Dios chuchua si ra. Ñeemombo que Jesucristo raanguia je ra. —Mbae eucua ucua tiquise raanguia je cote. Mbae a quiche jate mangue chooñoa jenda ja, i que ee ra. ¹⁶ Ae chĩ ibeishĩ tose nae, aque que tiquise raanguia mee ibi quti ra. Aque mose tuchi chõ ngue mbae a ibi jenda ishao ja tuchi cote ra.

¹⁷ Angel mo abe que usẽ u Dios chuchua ibatenda si ra. Tiquise raanguia rimbete que equereco no nda. Uvas ucua ucua sacua. ¹⁸ Angel mo ngue tu altar si cot e ra. Tata raarõsa altar jend a rei aque ángel. Ñeemombo que tiquise raanguia rerequiasa je ra: —Uvas eucua ucua tiquise raanguia

je cote. Mangue chooñoa jenda ja eucua ucua. Equiche jate, i que ra. ¹⁹ Angel que tiquise raanguia mee ibi arõ cote ra. Aque mose tuchi chõ ngue uvas ibi jenda ishao ja tuchi ra. Uvas ishao ji que emondo ja tuchua mo nda. Eriami ami sacua. Dios uquiatoã mbasi mose, mbae a riamí amí na ño ũquĩ nde. ²⁰ Isho jiri que eriqui uvas riamí amí sucha tubiriã si ra. Dios uquiatoã mbasi mose, uvas riamí amí na ño ũquĩ nde. Eruqui riquiraa tuchi que ra. Caballo mbuchecha tuchi que eruqui riquiraa ra. Trescientos kilómetros tuchi que eruqui seje cuu ra.

15

Angeles mbae rasi siete quereco ja eriruye

¹ Aba siquichesa mo ndese que amae ibei rĩ cuu ra. Mbia mbiirandu sacua. Siete angeles rese que amae nda. Mbae rasi chumumbarate que ecurucuaẽ cuaẽ nguia íbii ra. Siete que mbae rasi ra. Mbae rasi tuchi. Ũquĩ siete mbae rasi ua mose, Dios ra mbae rasi mbu si eã cote.

² Ama ndisha icoi mo ndese que amae nda. Enininya tuchi que ra. Vidrio raanguia. Tata abe raanguia. Ae siquiã mbei icuã ndui Jesús quiato nae, ũquĩ ndese que amae no nda. Icuã naanguia rese abe siquiã. Icuã mbae número abe que equerecoã nda. Ũquĩ ndese que amae ama ndisha arõ nda. Arpas Dios mbae je que echi tocar i ra. ³ Ae Moisés irasei rasei nyii nae, ũquĩ sí je que echi irasei rasei ra. Ae mbia irasei rasei Jesús je nae, ũquĩ sí je que echi irasei rasei ra. Å ngue irasei rasei ra:

Ndechiao turã tuchite, Dios.

Ndequirãcuã tuchite ereico co.

Mbia erembuchiabi jiri jiriãte quia co.

Erecheẽ iru iru eãte quia co.

Mbia rerecua jate ereico co.

⁴ Mbia ra ireĩ ireĩ ja ndesi mae mose ndechiao rese.

Ñee turã ja ra nderĩ.

Nde miñ ño ererecua tuchi re.
Mbia ra ngaẽ ja tuchi nderea. Ñee
turã sacuañ ndeje.
Ndechiao turã ndese quiatu ngue
mbia mae nguiã,
i que mbia irasei rasei ama ndisha arõ
cũu ra.

⁵ Aquere que mbae mo abe atea
cũu ra. Dios chuchua ibatenda
eiquesa que quiata seje cũu ra. ⁶ Siete
ángeles mbae rasi quereco quia nae,
ũquiñ ngue usẽ nyoĩ Dios chuchua si
cote ra. Eiraoshĩ tuchi que nyoĩ usẽ
nda. Oro que equereco huĩshia ati ra.
⁷ Ae rese ama e mbae reco cuatro nyii
nae, ùquiñ m o ngue mbae riru mee
mee ja ùquiñ ángeles siete je ra. Oro ao ji
rei mbae riru. Mbae rasi mbisẽte que
chi eriru ja ye ra. Dios mbia mbasi
tuchi sacuañ. ⁸ Dios nininya tuchi
que seje cũu ra. Equirãcuã tuchi que
ra. Nyebe que tatashĩ Dios chuchua
mboo ja tuchi ra. Mbia mo ngue ique
aroneate rã huee ra. Ùquiñ ángeles
mbae rasi icherẽ cherẽ ja eã mose.

16

Angeles mbae rasi icherẽ cherẽ ja

¹ Dios chuchua jenda mo ngue ñee
asite ùquiñ ángeles je cũu ra. —Jẽso
mbae rasi icherẽ cherẽ ibi jenda ja
rese. Dios embasi sacuañ, i que ñee
siete ángeles je ra.

² Angel ñiinda que oso umbae mbae
riru yenda icherẽ ibii ja ra. Ae siqui
quia icuañ ndese nae, ae ngoi coi quia
ngũiañ ndese icuañ naanguia je nae,
ũquiñ ire rasi rasi que cote ra. Mbae
asi tubiriã ngue erese cote ra. Nyerõ
aroneate que ra.

³ Segundo ángel que umbae mbae
riru yenda icherẽ ama ndisha ja ye
ra. Mbia raaque ruqui rã ngue ama
ndisha cote ra. Ama ndisha riinda
que mano ja tuchi mbae cote ra.

⁴ Tercer ángel que umbae mbae
riru yenda icherẽ ama ñi nda. Ama
ndicoĩ ñi abe que eicherẽ no nda.
Mbae ruqui rã tuchi que ama ja cote
ra. ⁵ Angel ama ndaarõsa que ñee
Dios je cũu ra. —Coche rei mbia icuañ
erembasi. Dios turã tuchi chõ nde re.

Ndeturã mbeite que eriqui ra. ⁶ Ùquiñ
mbia icuañ nguiatu ngue ndequiato
iquia iquiate nguiã nyii. Ndecheẽ
nenei neneisa abe iquia iquia. Coche
rei mbae rasi eresaanguquia ùquiñ je
cote. Coche rei mbae ruqui eresaan-
guquia ee, i que ángel ñee turã Dios je
ra. ⁷ Altar jenda mo abe que ñee Dios
je cũu ra. —Ae bei. Coche mbia icuañ
erembasi nguiã cote. Ndeturã mbeite
chõ ereico nguiã nde, i que Dios je ra.

⁸ Cuarto ángel que umbae mbae
riru yenda icherẽ tenda rese ra.
Nyebe tenda riqui nguiã mbia rei ja
ngacu je cote. ⁹ Tenda que mbia sei
tuchi quia embasi ra. Ùquiñ mose abe
que mbia riqui ñee turã eãte Dios je
ra. Dios embasi raque. Mbia que uba
eã mbei Dios rese ra. Ñee icuañ icuañ
mbei chõ ngue equia eriñ nda.

¹⁰ Quinto ángel que umbae mbae
riru yenda icherẽ icuañ nenda rese ra.
Itondaru tuchi que icuañ nimba ja je
mbia cote ra. Mbia que hueecõ shiu
shiu tuchi quia mbae rasi mose ee
ra. ¹¹ Ùquiñ mose abe que mbia uba
eã Dios rese ra. Huĩcuã ngue esecha
eãte quia ra. Ñee icuañ mbeite que
equia Dios riñ nda. Ngasi rerequia
mose abe que eriqui ñee icuañ mbeite
Dios riñ nda.

¹² Sexto ángel que umbae mbae riru
yenda icherẽ Río Eufrates ye ra. Ama
nguasu tuchi que aque ra. Aque ama
ngu e iru cot e ra. Tenda chuisa
quitinda soldados iasa sacuañ. ¹³ Aba
checuayã icuañ tres rese que amae
nda. Emo ngue tu usẽ dragón nyuru
si ra. Enongue que tu usẽ icuañ nyuru
si ra. Enongue que tu usẽ Dios cheẽ
nenei ñooñosa churu si no nda. Nyui
rã tuchi que ùquiñ aba checuayã icuañ
nda. ¹⁴ Ùquiñ aba checuayã icuañ ngue
mbia mae sayã saã saã tuchi quia mi-
lagros ra. Ñee ja que mbia rerecua ja
je ra. Ñumunua ja sacuañ pelear i sacuañ
Dios rese. ¹⁵ Sã Jesús ñee no: “Mbia
ndua eã mose serese ra achu. Jẽtesa
tesa bei equia serese jẽ. Jẽingoquiato
bei equia jẽ. † nda jẽireĩ ngũiañ sechu
mose”, sã Jesús i no. ¹⁶ Aba checuayã

icua ñgue mbia rerecua munua ja huee ra. Pelear i sacua Dios rese. Armagedón, i que hebreo chee hue je ra.

¹⁷ Séptimo ángel que umbae mbae riru yenda icherē quiririãsa ra. Aque mose que Dios ñeemombo uchuchua ibatenda si ra. —Mbae rasi icherē ji jate cote, i que Dios ñeemombo ra.

¹⁸ Ama ñgue pirirã pirirã i tuchite cote ra. Ama ñgue sieu tuchi quia no nda. Ibei que ñee tuchi quia ra. Ibi abe que nyere tuchi quia no nda. Emo mose rã eã tuchi que ra. ¹⁹ Sucha tubiriã Babilonia ñgue obo obo nyibite rĩ nda. Tres partes. Hue jenda tuchua que ngoi ja tuchi ra. Mbia chuchua que ngoi ngoi ja mangue chooñoa jenda aque mose ra. Dios quiatu ñgue tesareiãte nguiã Babilonia jenda chisaã icua si. Nyebe eriqui nguiã paama i tuchi ee cote. Embasi mbasi uquirãcuã je cote. ²⁰ Islas abe que quiachã quiachã ja ama jenda ra. Ibi ibate abe que quiachamba chamba ja no nda. ²¹ Iquitã nguasu que ngoi ngoi quia mbia iquia iquia ra. Cuarenta kilos ja ja que ũquĩ iquitã nda. Iquitã ñgue mbia iquia iquia tuchi quia ra. Nyebe mbia riqui nguiã ñee icua icua tuchi Dios rĩ. Ñee turã ndocoi ee.

17

Cuña icua mbae rasi saã tuchi

¹ Ae mbae riru quereco ángeles nae, ũquĩ mo ñgue tu ñee seje ra. —Nyao serese. Mbae tateacuquia ndeje. Babilonia jenda ra mbae rasi saã tuchi cote. Ae cuña siqui chooñote quia mbia ja rese nae, aque ra mbae rasi saã tuchi cote. Ama ndisha jie eñi ngoi mar hue. ² Mbia rerecua que siqui siqui jate quia erese ra. Mbia ataque abe no. Ae que mbia mbicua jate quia ra, i que ángel ñee seje cuu ra. ³ Angel que sererao turuquia rĩ cuu ra. Huee que amae cuña icua ndese ra. Icuã ireĩ átoo que eñi nda. Embesa ji tubiriãte que chí icua ndese ra. Nombres mbesa ji icua tuchi que ũquĩ Dios je ra. Icuã ãquĩ atate que ra. Siete

que eãquĩ nda. Diez que erambashĩ no nda. ⁴ Mbia rerecua irao raãte que cuña icua irao ra. Eirao ireĩ turãte que ra. Oro tubiriãte que equereco adorno nda. Perlas abe no. Sita ñetē aba queteamba abe no. Mbae riru abe que equereco oo ra. Oro ao ji. Huiãcuã ñgue equereco ja quia aque mbae riru ye cuu ra. ⁵ Embesa ji que chí eruba rese ra. Aba chícuayã tuchi que ra. Ñ i chõ ñgue huĩ nguiã: “Babilonia ño co re. Sucha tubiriã icua ño co re. Cuña icua nderecua ja chõ co re. Mbae icua nderecua ja chõ co re”, i chõ ñgue embesa ji huĩ nguiã eruba rese. ⁶ Quiacuate quia cuña icua ndiqui reaẽ. Jesús quiato uninya ruqui quia embei quia quiacua nonde reaẽ. Achuruira tuchi que mae erese cuu ra.

⁷ Angel que ñee seje cote ra. — ¿Mbaerã ereico nyuruirate mae erese re? Tarembiirandu cuña icua ndese. Ae átoo eñi nae, aque rese abe tarembiirandu. Ae siete eãquĩ ndiqui nae. Ae erambashĩ diez riqui nae. ⁸ Ae rese eremae icua cuu nae, aque ñgue siqui rei nguiã cose. Emoate namo cote. Siquibe rae. Usẽ nda ibicua si. Aque icua quera si mose, Jesús quiatoã nda nyuruira tuchi mae erese. Ae embae nombre mbesa ji eãte Jesús mbae libro rese nae, ũquĩ. Icuã nda oso mbae rasi raã tuchi tata cuasu cote. ⁹ Earacua achõ nda ã secheẽ icua: Eãquĩ siete rã sí rei ibi ibate siete. Cuña icua ñi ngoi ibi ibate siete tose hue. ¹⁰ Eãquĩ siete rã sí rei mbia rerecua siete no. Cinco que mano nda. Aque mĩ ndiqui namo co. Emo mĩ nda siqui emo mose cote. Aque ra siqui mbirĩ ño mbia rerecuarã. ¹¹ ũquĩ siete mo ndei icua ireĩ mo. Siqui que equia nyii ra. Emoate namo cote. Siqui i ra ũquĩ siete ua mose cote no. Mbia rerecua octavo ra ae cote. Ae ra oso bei tata cuasu aquere cote. ¹² Ae erambashĩ ndese eremae diez nae, mbia rerecua diez rã sí chõ ũquĩ nde. Mbia rerecua eã ño ũquĩ namo nde. Emo mose quia ra mbia rerecua cote. Ererecua mbirĩ ño ndae. Icuã

ndese quiatu ra ererecua. ¹³ Hue rĩ sí tuchi ra ũquĩ ererecua ndua ndua. —Ererecuarã ño icuã jê, i ja ra ũquĩ ererecua. Uquirãcuã nda emee ja icuã je. ¹⁴ Ũquĩ nda pelear i ja Cristo rese cote. Cristo quia ra i tuchi ũquĩ ja si. Ae quia mbia rerecua tuchi re. Ae quia equirãcuã tuchi mbia mo si re. Ae siqui Cristo rese nae, Cristo chiirabo chõ ũquĩ nde. Eturã tuchi chõ ũquĩ Cristo je re, i que ángel seje cuu ra.

¹⁵ Ñee si que seje ra. —Ae amandisha rese eremae mar nae, ae jicuã icuã ñi ngoi nae, mbia chumumbara rã sí chõ ũquĩ nde. Mangue chooñoa jenda ja rã ño ũquĩ nde. Sucha tubiriã jenda ja rã ño ũquĩ nde. ¹⁶ Erambashĩ diez rese que eremae nae, mbia rerecua diez na sí chõ ũquĩ nde. Ũquĩ nda cuña icuã ucuãyãte cote. Ũquĩ nda cuña icuã secha icuã cote. Erete checua ra esecha cote. Eroo ra eu. Erete ra esei tata je cote. ¹⁷ Dios que ñee nyii ra. —Mbia rerecua icuã tuchi ra cuña icuã je, i que Dios nyii ra. Echeẽ ndui sí ra eicuã icuã cuña icuã je cote. Dios que eicua nyii ra. Hue rĩ sí ra ũquĩ ererecua diez ndua. Umbae ra emondo ja icuã je. Icuã mii nda mbia rerecuarã ja cote. Aque mose ra Dios cheẽ ique. ¹⁸ Cuña icuã ndese ereico mae nae, sucha tubiriã na si chõ aque cuña nde. Hue sucha rei ererecua tuchi sucha ataque si. Mangue chooñoa jenda rerecua ja rei hue sucha, i que ángel seje ra.

18

Babilonia jenda ra mbae rasi saã tuchi

¹ Aquere que amae ángel mo ndese ra. Nguichi que u quia ibei si ra. Equirãcuã tuchi que ra. Enininya tuchi que ra. Ibi resae tuchi qu e eu quia ra. ² Angel que ñeemombo mombo tuchi ra. —Sucha tubiriã Babilonia jenda que ngoi ja cote ra. Mbia tiãte que huee cote ra. Aba checuayã icuã achõ ño chi nguiã hue

cote. ³ Hue sucha tubiriã Babilonia jenda que mbia mbicuã jate quia ra. Mbia mbui mbui tuchi que equia Dios si ra. Ubi icuã achõ ndese chõ ngue eriqui ndua tuchi ra. “Ũquĩ na nda se chã” i ja ja que equia mbae ja je ra, i que ángel ñee cuu ra. ⁴ Ibatenda mo ngue ñee cuu ra. —Ae serimba jemo nae, hue si jenyao. I nda hue jenda chisaã icuã jësaã eã jê abe. I nda mbae rasi jësaã eã jê, hue jenda mbae rasi raã mose. ⁵ Hue jenda que mbae icuã saã saã tuchite quia ra. Dios tesareiãte quia hue jenda icuã si co. ⁶ Hue jenda que mbia ataque mbasi mbasi tuchi quia ra. Ũquĩ sí ra mbae rasi saã tuchi cote. Dios ra mbae rasi saanguquia i i tuchi quia ee cote. ⁷ Hue jenda que ucuasu saã saã tuchi quia ra. Ubi achõ ndese chõ ngue eriqui ndua ra. “Co ai aico turãte co. Mbae rasi tu aroneate seje”, i ja jate rei que equia ra. Nyebe ra Dios mbae rasi saanguquia tuchi ee cote. ⁸ Aque mose tuchi ra mbae icuã tu tuchi ũquĩ mbua cote. Mbae rasi icuã nda esaã tuchi. Eriãcuã ndasi tuchi ra cote. Echuchua ra oquiei ja. Mbia ra mano ja. Dios quiatu ra mbae icuã saanguquia tuchi mbia je eicuã ñi cote. Dios quiarei equirãcuã tuchi, i que ángel ñee cuu ra. ⁹ Ae ererecua mbae icuã saã nguia Babilonia jenda rese nae, ũquĩ ia eã tuchi ra erese cote. Nyeseo tuchi ra erese mbae rasi raã tuchi mose. Echuchua oquiei rese mae mose. ¹⁰ Isho chõ nda echi mae mbae rasi raã ndese. Esiquichete quia ñene. Ñee nda ee mbae rasi raã mose. —Ureya eãte riqui jendese ã. Babilonia sucha tubiriã jenda rei ngue jê nyii re. Sucha eã tuchite que jenyuchu a cote ra. Mbae rasi tu asi chõchĩ nguia jêje ã, i ra maesa erese ñee ee. ¹¹ Comerciantes mangue chooñoa jenda ja abe ra eya eãte, Babilonia jenda mbae rasi raã mose. Nyeseo tuchi ra erese. Mbia quia nda embae isi eãte nguiã cote. Nyebe ra eya eãte cote. ¹² ã je nda vender i nguiã ña:

oro

plata
 sita ñetē aba queteamba huirā
 perlas
 tiru turā tuchi
 tiru irei
 tiru seda
 ira simbu turā mo
 marfil ao ji
 ira turā ao ji
 bronce ao ji
 hierro ao ji
 sitashī ao ji
 13 canela
 aba mbushimbusa
 perfumes
 tuchua mbusimbusa
 vino
 mbae quira
 mbae cui
 trigo
 ovejas
 caballos
 ira nambacua
 mbia nimba

Ūquĩ ja je nda vender i nguiā ee chā.

14 Mbia ra ñee Babilonia jenda je cote. —Ae mbae jenyoseite quia nae, ũquĩ mo nda tu āte jēje cote. Jembae tubiriāte riqui nyii nae, ũquĩ mo nda jendecoā cote, i ra mbia ee cote. 15 Ae ā mondo mondo quia vender i Babilonia jenda je nyii nae, ũquĩ abe ra chi mae isho erese no. Esiquichete ra chi mae mbae rasi raā ndese. Nyeseo ra erese. 16 Ñee nda Babilonia jenda je. —Ureya eāte riqui jendese ā. Babilonia sucha tubiriā jenda rei ngue jē nyii re. Sucha eā tuchite jenyuchua cote. Jēirao turā tubiriāt e rei ngue nyii re. Oro ao ji tubiriāte rei ngue adornos jembae nyii no nde.

17 Jembae ua asi chōchĩ jē mbae rasi raā mose, i ra ee. Ae comerciantes nyoĩ choĩ quia canoa ye nae, ae nyoĩ choĩ quia barco ye nae, ũquĩ nda chi isho mae Babilonia jenda mbae rasi raā ndese. 18 Babilonia sucha tubiriā oquiei mose ra ũquĩ nyi isho mae erese. —Sucha tubiriā tuchichĩ Babilonia. Babilonia na eāte emo, i ra nyeseo sucha tubiriā oquiei mose Babilonia jenda. 19 Ibi tuba ra emombo mombo uāquĩ ndese. Nyeseo tuchi

rae. Sucha tubiriā oquiei mose Babilonia jenda. Ñeemombo mombo ra Babilonia jenda je. —Ureya eāte riqui jendese ā. Mbaechate que jēingochĩ nyii ra. Ure abe que mbaechate ureico jeni nyii no nda. Mbae ua asi tuchi chōchĩ co mose cote, i ra ñee Babilonia jenda je. 20 Babilonia sucha tubiriā ua mose ra ibatenda iate cote. Jesús chimbaaquiatu abe ra eya cote. Ae Dios cheē senei senei quia nae, ũquĩ abe ra eyate cote. Dios quia ra mbae rasi mondo tuchi Babilonia jenda je uquiato rĩ.

21 Angel quirācuā mo ndese que amae cuu ra. Sita cuasu mo ngue esui mombo ama ndisha ye cuu ra. Ñee ngue cote ra. —Eĩ nda Dios sucha tubiriā Babilonia mombo. Sā sita amombo ama ndisha ye no. Sucha tubiriā eā mbei ra Babilonia cote. 22 Nyebe ra mbia música saā eā mbei huee cote. Mbia ra irasei rasei eā mbei huee cote no. Mbia ra nyuao eā mbei mbae rese huee cote. Mbia ra mbua tocho eā mbei huee cote no. 23 Lamparina mo nda mbae tesae eā huĩ huee cote. Emo nda ngūinisirā isiā mbei huee cote. Mbia mbaecha hue jenda que aba chīcuate riqui nyii ra. Hue jenda que mbia ataque mbiĩ i rĩ jate rei quia brujería je nyii no nda. 24 Hue jenda que Dios quiato iquia iquia bei quia ra. Dios cheē mbuchecuasa que eiquia iquia tuchi quia ra. Nyebe ra Dios mbae rasi raanguquia tuchi hue jenda je cote.

19

1 Aquere que mbia cheē tubiriāte achandu ibate cuu ra. Ñeemombo mombo que ñee turā Dios je ra. Dios turā tuchite riqui mbia je co. Dios ae riqui mbia rirō eicuā si co. Dios ae chō equirācuā ndiqui nguiā co.

2 Ae siqui sereāte quia Dios rese nae, ũquĩ nda Dios mbasi.

Mae tuchi ra erese embasi nonde. Sā Dios mbae rasi saanguquia cuña icuā je namo no.

Aque que siqui siqui jate quia mbia rese ra. Mbia mbiicuā icuā ja.

Ae que Dios quiato iquia iquia quia no nda. Nyebe Dios embasi nguiã cote, i que ibatenda cheẽ tubiriãte cuu ra.

³ Aquere que ñee si ra. —Dios turã tuchi riqui mbia je co. Cuña icuã ndiqui oquiei beite hue, i que ñee nda.

⁴ Aquere que veinticuatro amei ñee turãte Dios je cote ra. Mbae reco cuatro rese. Ngoi que ngüiã ndese Dios nonde ra. Dios chí mose ngoi umbae trono tose. Ñee turã ngue Dios je ra. —Amén. Dios turã tuchi riqui mbia je co, i que ñee turã Dios je ra. ⁵ Emo ñee ngue achandu ibate ra. — Ae Dios quiato jẽ nae, jeñee turã ja erĩ. Ae Dios cheẽ jemumba eãte quia jẽ nae, jeñee turã ja erĩ no. Ae ecuasua nae, ae eñetẽ nae, jeñee turã ja chõ nguia erĩ, i que ibatenda mo ñee cuu ra.

Jesús quiato ra quiaru erese ibate

⁶ Mbae mo ndieu que achandu cote ra. Iãcuã ndieu rã. Ama sieu rã. Mbia tubiriã ñee ño ndei ngue re. A ño ngue mbia ñee nguiã:

Dios turã tuchi riqui mbia je co.

Equirãcuã tuchite riqui co.

Ae riqui mbia rerecua tuchi co cote.

⁷ Nandechimbia tuchi quia erese jẽ.

Nandechẽ turã ño nguia erĩ jẽ.

Jesús ra uquiato isi bei cote.

Sã emo ndiqui ngüinisirã isi bei no.

Sã eninisi icoquiato ngurã ndaarõ arõ no.

⁸ Sã eninisi tirushĩ turã mingue eru eisi bei nonde no.

Eĩ si ra Jesús uquiato isi cote, eru ngüinisirã isi rã,

i que ibatenda ñee cuu ra. Tirushĩ turã ndei Jesús quiato reco turã na.

⁹ Angel que ñee seje cote ra. — Co embesa rã: “Jesús ngüinisirã isi raanguia chõ nda esaã uquiato je ibate cote. Ae je ra ñee ‘jenyu serese quiaru’ i aque mose nae, Dios turã tuchi ra ñquĩ je”, ere embesa mi, i que ángel seje ra. —Dios cheẽ tuchi chõ ñquĩ nde, i que ángel seje ra. ¹⁰ Senia ndese que acoi rei ángel ndésaa ra. Adorar i sacua ee. Angel que ñee

ño seje ra. —Adorar erechĩ nda seje jẽ. Dios rimba chõ se re. Nde rã sí. Ndequiato rã sí. Ae siqui tuchi quia Jesús rui nae, ñquĩ mo na ño se re. Dios mi je chõ adorar ere. Ae Dios cheẽ senei senei nguia mbia je nae, Jesús mbuchecua sacua mbia je chõ ñquĩ nde, i que ángel seje ra.

Ae siqui cabaloshĩ átoo

¹¹ Ibei que obo seje cuu ra. Cabaloshĩ mo ndese que amae huee ra. Emo ngue chí eátoo ra. “Ñee ñooñosa reã” i que aque je ra. Ererecua turãte que ae ra. Ae que guerra saã saã nguia mbae turã ndiquisã quisã nda.

¹² Tata rã tuchi que eresa ra. Corona tubiriãte que eãquĩ ndese ra. Embae nombre mbesa ji que chí ndei ra. Mbia mo ngue embae nombre icua eãte quia ra. ¹³ Eirao mondo ji eruqui ye que equereco ra. “Dios cheẽ” i que embae nombre ra. Jesús chõ eriqui reaẽ. ¹⁴ Ejército ibatenda que nyoĩ jate eruĩ ra. Eiraoshĩ turã achõte que nyoĩ eruĩ ra. Caballo átoo que echoĩ quia eruĩ ra. ¹⁵ Ae rui ejército nyoĩ nae, aque que tiquise mo nguereco uchúruu ra. Ae teã teã nguia Dios je nae, ñquĩ mbasi sacua ño tiquise rerequia nguiã uchúruu aque. Ae ra mbae rasi saanguquia tuchi Dios quiato eã je cote. Dios ra paama i tuchi mbia je aque mose. Mbia quia siqui sereãte nguiã Dios quirãcuã ndese. ¹⁶ Ae chí caballo átoo nae, aque irao rese que embesa ji ñi nda. Eu rese abe que embesa ji ñi nda. ERERECUA TUCHI i que embesa ji huĩ nda.

¹⁷ Angel mo ngue chí juã tenda re cuu ra. Urubu je que eñi ñeemombo mombo ra. Ae mbebe ja quia. — Jenyu ja quiaru. Dios ra jembuquiaru ja tuchi cote. ¹⁸ Mbia chumumbara roo ra jẽu cote. Mbia rerecua roo. Soldados rerecua roo. Mbia quirãcuã ndoo. Caballo roo abe no. Caballo ato jenda roo abe no. Mbia cuasu roo abe no. Mbia riirĩ ndoo abe no. Ae ererecua riqui nae, ñquĩ ndoo abe no.

Ae ererecua eã ndiqui nae, ùquĩ ndoo abe no. Ùquĩ ndoo ra jëu ja cote, i que ángel urubu je ra. ¹⁹ Icuã ndese que amae cote ra. Mbia rerecua tubiriã ndese uquiato rese. Ejército tubiriãte que chi erese ra. Ùquĩ ñumunu a ño nguia eicuã icuã nonde Jesús je reaẽ. Ae siqui caballoshĩ átoo, aque je. Jesús rimba soldados je abe no. ²⁰ Jesús que icuã isi tarõ nda. Dios cheẽ nenei ñooñosa abe no. Aque chõ mbia mae sayã saã saã ño nguia icuã ndeco mose nyii reaẽ. Aque chõ mbia mbĩĩrĩ irĩ nguia reaẽ. Ae mbia marca quereco quia icuã mbae nae, ùquĩ mbĩĩrĩ irĩ ño equia reaẽ. Ae adorar i quia icuã naanguia mbae ao ji je nae, ùquĩ mbĩĩrĩ irĩ ño equia reaẽ. Nyebe Jesús icuã mombo nguia tata cuásuu cote. Dios cheẽ nenei ñooñosa rese. Azufre rese eriqui sendi hue. ²¹ Jesús que icuã nimba iquia ja cote ra. Ae equereco quia tiquise uchúruu nae, aque je que eiquia ja cuu ra. Urubu ja que eroo u tuchi quia ra.

20

Dios ra Satanás tarõ mi mil años

¹ Aquere que amae ángel mo ndese cuu ra. Nguichi que u quia ibate si ra. Cadena cuasu que equereco ra. Llave abe que equereco ibicua mbuquiata sacua nda. Abismo i equia hue ibicua je. ² Ángel que dragón isi nyucua ra. Satanás, i que equia dragón je ra. Mbei ima, i abe que equia ee ra. Diablo, i abe que equia ee no nda. Aque que ángel nyucua mil años cuu ra. ³ Ángel que dragón mombo ibicua ye ra. Tarõ ngue llave je huee ibicua ye ra. Eiquesa que ematã nda. I nda dragón mbia mangue choñoa jenda mbĩĩrĩ irĩ si eã. Mil años ua mose, ángel nda embui mbĩĩrĩ na mondo.

⁴ Jesús quiato iquia ji rese que amae nda. Ae ãquĩ mbia nyisia sia quia Jesús rĩĩ. Mbia rerecuarã tuchi que ùquĩ cuu ra. Siqui eãte quiatu ngue icuã ndese re. Icuã naanguia mbae ao ji je abe que eriqui adorar i ãte

ra. Icuã mbae marca abe que equerecoãte quia nguba rese no nda. O abe rese. Ùquĩ ndaaque que quera si cuu ra. Cristo que emii ererecuarã mil años nda. ⁵ Ùquĩ ndei mbia quera je rane ùquĩ. Mbia raaque ataque que quera eã aque mose ra. —Mil años ua mose ra Dios mbia ataque mbuquera cote, i que seje cuu ra. ⁶ Ae rane nda Dios mbuquera nyii nae, ùquĩ ia tuchi rae. Dios quiato tuchi chõ ùquĩ nde. Ùquĩ nda nyoĩ eã mbei tata cuasu. Siqui bei ra Dios rese. Cristo abe rese. Ererecuarã mbei ra eriqui Cristo rese mil años.

⁷ Mil años ua mose, Dios ra Satanás mbui sí mondo ibicua si. ⁸ Satanás nda mbia mangue choñoa jenda mbĩĩrĩ irĩ ja quia cote. Gog abe mbĩĩrĩ irĩ. Magog abe mbĩĩrĩ irĩ no. Dios quia-toã ja mbĩĩrĩ irĩ. Etubiriã tuchite ùquĩ. Satanás nda ùquĩ munua nua ja quia. Guerra raã naa sacua Dios je. ⁹ Mbia tubiriã tuchi ra Satanás munua nua nguia ibi jenda ja cote. Ùquĩ nda Jesús quiato mama tuchi cote. Jerusalén ab e mama tuchi rae. (Dios nduasa tuchi chõ Jerusalén nde.) Dios ra tata mbu ibei si cote. Tata ra ùquĩ sei ja cote. ¹⁰ Diablo quiatu nda mbia mbĩĩrĩ irĩte nguia. Nyebe ra Dios emombo tata cuásuu cote. Ae eriqui icuã mombo. Ae eriqui icuã naanguia mbae ao ji abe mombo. Ùquĩ nda siqui bei huee tata cuásuu. Tata sendi quia azufre mumbara. Mbae rasi ra esaã saã mbei huee. Nyaashĩ mose. Isa abe chee. Usẽ eã mbei ra hue si.

Dios mbia uquiatoã mbasi mose

¹¹ Mbae mo ndese abe que amae cuu ra. Dios que chĩ ngoi trono tose ra. Trono cuasu tuchi que ra. Eshĩ ngue ra. Mbae que uchã ja Dios si aque mose ra. Ibi jenda. Ibei jenda abe no. —Tachimi Dios si, i rei que mbae ja ra. ¹² Amae ngue mbia raaque rese ra, ae mano ndei quia nyii. Mbia cuasu rese. Mbia riirĩ abe rese. Chi ja que júã Dios resa rae cuu ra. Emo ngue libros ata equia ra. Libro nongue abe que

eequia ra. Ae mbia ra siqui bei nae, ũquĩ mbae nombres que chí aque libro rese ra. Ae mbia saã saã nguia mbae nyii nae, ũquĩ mbesa mbesa ji qu e chí ũquĩ libros rese ra. Dios que mbia chisaã mbuchechea checha cote ra. Embasi sacua. ¹³ Ae mbia mano ama ñi nae, ũquĩ ja que chí ra. Ae mbia mano ibii no nae, ũquĩ abe que chí ja no nda. Ae mano mano mangu e chooñoa jenda nae, ũquĩ abe que chí ja no nda. Dios que ũquĩ nyisaã mbuchechea checha ja cuu ra. Embasi sacua. ¹⁴ Aquere ra mbia mano eã mbei cote. Dios quiatoã nda siqui bei tata cuásuu no. ¹⁵ Ae embae nombre mbesa iriãte aque libro rese nae, ũquĩ ngue Dios mombo ja tata cuásuu seje cuu ra.

21

Dios ibi mbiasu, ibei abe

¹ Aquere que amae mbae yasu rese cuu ra. Ibei yasu rese. Ibi abe yasu rese. Ibei ñiinda quiachã ño nguia reaẽ. Ibi ñiinda abe no. Ama ndisha mo eãte que cote ra. ² Se rei Juan. Mbae que nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Mbae mbuturã ji jate que ra. Sã emo ninisirã quiche riqu i ngurã je no. ³ Ibatenda mo ngue ñee cuu ra: —Sã jẽ. Sã Dios riqui mbia mumbara co cote jẽ. Siqui bei ra equia erese. Mbia rerecua turãte ra eriqui ee. Erimbarã tuchi ra mbia cote. ⁴ Dios ra mbia mbia tuchi cote. Mbia mo nda manoã tuchi cote. Emo ndasiã nda cote. Emo nda nyeseo eã cote. Emo ia eã eã nda cote. Cose ndare rã eã nda mbae cote, i que ibatenda ñee cuu ra.

⁵ Dios que ñee cote ra: —Sã jẽ. Sã aico mbae mbiasu jate co jẽ, i que ra. —Ã secheẽ embesa ja rã. Ae riã aico ñee nae, ũquĩ nda asaã ja, i que ñee seje ra. ⁶ Ñeembe que seje ra: —Equiche que eno. Co aico beite querabe co. Mbae eã mose abe que aico se rane nyii ra. Mbae ua ja mose abe ra aico bei querabe no. Emo isei mose, i turã nda amondo ee. I mbia

mingo beisa ra amondo ee. “Mbae embu i ribishorõ”, ae eã nda ee. ⁷ Ae “qui jẽ” i quia Satanás je nae, ũquĩ je ra mbae turã ja amondo. ũquĩ nderecua tuchi ra se. Seriiĩ tuchi ra ũquĩ. ⁸ ã ja ra nyoĩ tata cuásuu: Esiquiche. Jesús icuasa reã. Mbia nyaba chaba reã. Mbia iquiasa. Ae siqui chooñote quia emo ninisi rese. Ae brujería saã saã nguia. Ae siqui quia Dios abareã ndese. Ae ñee ñooño nguia. ũquĩ ja ra nyoĩ tata cuásuu. Huee ra tata rasi raã mbei. Asufre mumbara, i que ra.

Jerusalén yasu

⁹ Ae siete ángeles mbae rasi quereco mbae riru ye nae, ũquĩ mo ndese que amae cuu ra. Ñee ngue seje ra: —Quiatuchu. Mbae tateacuquia ndeje. Jesucristo ninisirã tateacuquia ndeje, i que seje cuu ra. ¹⁰ Aque ángel que sererao ibi ibátee mo cuu ra. Huee que mbae nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Sucha cuasu. ¹¹ Jerusalén yasu nininyate que ra. Dios nininya rã si. Sita rendi rã ño ngue eturã nda. Eibera turã ño ngue ra. ¹² Etaronda que sucha cuasu mama ja huĩ nda. Muralla, i que etaronda je ra. Eicoĩ tuchi que ra. Ibate tuchi que ra. Doce que eiquesa ra. Ángel mii ngue chí eiquesa raarõ ja ja ra. Embesa mbesa ji ja que eiquesa ra. Doce tribus mbae nombre que chí jaaja eiquesa rese ra. ¹³ Eiquesa tres que chí tenda chuisa quiti ra. Tenda sosa quiti tres no. Norte quiti tres no. Sur quiti tres no. ¹⁴ Doce sita cuasu que chí muralla qui ñi nda. Etaronda irã. Doce apóstoles mbae nombres mbesa ji que chí ũquĩ sita rese ra.

¹⁵ Ángel que uu mo nguereco oro ao ji ra. Dios recua mbuchechea sacua. Eiquesa abe mbuchechea sacua no. Etaronda abe mbuchechea sacua no. ¹⁶ Ángel que Dios recua mbuchechea uu je ra. Cuadrado tuchi que Dios recua ra. Eoco que 2,200 kilómetros ra. Eicoĩ que 2,200 kilómetros no nda. Ibate quitinda abe que 2,200

kilómetros no nda. ¹⁷ Angel que muralla abe mbuchechea ra. Sesenta y cuatro metros que eicoi ra. Sã mbia riqui mbae mo mbuchechea no. Eĩ sí que ángel muralla mbuchechea no nda. ¹⁸ Oro ao ji rei sucha cuasu. Eibera tuchi que ra. Muralla rei sita ao ji. Jaspe ao ji. Aba queteamba tuchi rei jaspe. ¹⁹ Sita cuasu chi quia muralla irã nae, ùquĩ arõ ngue sita ñetẽ nininya chĩchi ja ra. Embarõsa chõ ngue ùquĩ nde. Jaspe mbitee ji rane ngue ra. Zafiro mbitee ji que chĩ jaspe arõ cote ra. Agata mbitee ji que chĩ cote ra. Esmeralda abe no. ²⁰ Onice. Cornalina. Cristólito. Berilo. Topacio. Crisoprasa. Jacinto. Amatista. Ùquĩ ja sita ñetẽ nininya que chi ja ja sita cuasu arõ nda. ²¹ Eiquesa riquisã jate que perla ao ji chi ra. Perla mĩ mĩ ja que chĩ eiquesa riquisã nda. Oro ao ji que calle mbite renda ra. Oro ao ji achõ ngue ra.

²² Dios chuchua templo mo eãte que huee ra. Mbia quiatu que ñee mbei quia Dios je mangue chooñoa nda. Jesucristo abe je. ²³ Tenda eãte abe que eriqui Dios récuuaa seje cuu ra. Nyasi eãte abe que seje cuu ra. Dios nininya ae chõ ngue mbae tesae ja quia ra. Jesucristo nininya abe no. ²⁴ Dios nininya ra uquiato tesae ja ino huee. Mangue chooñoa jenda ja. Mbia rerecua ra ñee turã turã ja Dios recua rĩ cote. ²⁵ Dios recua chiquesa tarõ iriã mbei rae. Itondaru eã mbei ra huee. ²⁶ Mbia mangue chooñoa jenda ja ra ñee turã turã Dios recua rĩ. Mbae turã ja ra chi huee. ²⁷ Mbia icuã nda iqueã mbei huee. Mbia mbĩrĩ irĩsa abe ra ique eã mbei huee no. Ae embae nombre mbesa ji Jesucristo mba e libro rese nae, ùquĩ achõ ño nda ique Dios récuuaa.

22

¹ Angel que ama mo abe teacuquia seje cuu no nda. Mbia mingo beisa que aque ama nda. Ama ndiibera tuchi que ra. Dios mbae que aque ama nda. Jesucristo mbae abe no.

Sucha tubiriã ite rĩ ngue iãcuã irãtã mo ñi nda. ² Ama nimia nguiti ja que ira ñi nda. Mbia mingo beisa que ùquĩ ira ra. Ùquĩ ngue ia beite quia doce veces en el año nda. Nyasi mbuchechea quiatu bei que eriqui ia ia bei ra. Ùquĩ iraro que mbia chumumbara mbucherõ cherõ tuchi quia ra. ³ Mbia rasi eã mbei ra huee cote. Dios ra siqui tuchi huee. Jesucristo rese. Cordero, i equia ee. Erimba ra ñee turã mbei quia ee huee. ⁴ Mae mae ja ra Dios ruba rese. Dios mbae nombre mbesa ji ra equereco nguba rese ja ja. ⁵ Itondaru eã mbei ra huee. Tenda aroneate huee. Tata abe aroneate huee no. Dios nininya ae chõ nda mbae tesae ja huĩ nguiã huee. Ererecua turã tuchi ra Dios quiato ja huee.

Achite Jesús ñi tu a cote

⁶ Angel que ñee seje ra: —Acheẽ ñooño eã ño nguiã co. Ae rĩ aico ñee nae, ùquĩ nda Dios saã ja. Sã Dios ucheẽ mbuchecuasa mondo mbia je cose no. Eĩ si que sembu namo no nda. Ae ra nyecua namo jiri nae, ùquĩ ndeacuquia sacuã mbia je chõ ngue sembu nguiã. ⁷ “Se ra achu jei”, i que Jesús ra, i que ángel ñee seje ra. Ae ra ã mumba eã Dios cheẽ mbesa ji nae, ùquĩ ia tuchi rae.

⁸ Se rei Juan. ã ndese que amae nda. ã ngue achandu no nda. Aque ángel ã teacuquia quia seje nae, aque jii que acoi rei senia ndese ra. Adorar i sacuã ee. ⁹ Ñee ngue seje ra. — ¡Adorar erechĩ nda seje jê! Dios mĩ je chõ adorar ere. Dios rimba chõ se re. Nde rã sí. Ndequiato rã sí. Ae Dios cheẽ mbuchecua checua quia nae, ùquĩ na si. Ae ã mbesa ji mumba eãte quia nae, ùquĩ na sí, i que ángel ñee seje ra.

¹⁰ Angel que ñee si seje no nda: — Ae erembesa co libro nae, ùquĩ nda erembuchecuayã cuayãchĩ mbia si jê. Eteaquiatu ee. Ae rĩ erembesa nae, achite eñi tu a cote. ¹¹ Sã mbia icuã mbae icuã naa naa ño na. Ae siqui quia mbae rondei rese nae, sã eriqui

rã erese. Ae siqui quia mbae turã ndese nae, siqui i tuchi ra mbae turã ndese. Ae siqui Dios rese nae, siqui i tuchi ra erese cote, i que ángel seje ra.

¹² Jesús que ñee nda: —Achu jei ra se. Ae mbae turã saã saã nguia nae, ñquĩ je ra mbae turã aru. Echisaã na sí. ¹³ Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Jesús ra.

¹⁴ Ae echiã irei ji Jesús ruqui je nae, ñquĩ ia bei ra eriqui. Eirao ituquia jí na ndei echiã irei jí. Ñquĩ nda ique Dios récuua. Siqui turã mbei ra equia huee. ¹⁵ Dios quiatoã nda iqueã huee Dios récuua. Ae brujería saã saã nguia nae. Ae siqui choñote quia cuña mo ndese nae. Ae mbia iquia nae. Ae siqui quia dios mbuae rese nae. Idolo rese nae. Ae mbia mbiirĩ irĩ nguia nae. Ñquĩ mo nda iqueã tuchi Dios récuua.

¹⁶ Jesús que ñee nda: —Angel serimba que amondo ra. Ñ nenei nenei sacuaã iglesias ja je. David i chõ se

re. David nducucha chõ se no nde. Nyasitata nininya rã ño se re, i que Jesús ra.

¹⁷ Espíritu Turã ndiqui “quiatuchu” i co. Jesús ninisirã abe riqui “quiatuchu” i co no. Sã secheẽ andusa abe “quiatuchu” i. Emo isei mose, sã ecuaẽ i mbei Jesús mbae. I mbia mingo beisa ra Jesús mondo ee. Embei mose, siqui bei rae. —Mbae embu i ribishorõ seje, i eã nda Jesús ee.

¹⁸ Ae ã ñandu quia Dios cheẽ co libro resenda nae, ñquĩ je tacheẽ tuchi: Emo co libro resenda mbirõ mose emo ñee je, Dio s ra ñquĩ mbasi tuchi. Ae mbae rasi chi ja co libro rese a nae, ñquĩ nda esaã ja tuchi. ¹⁹ “Dios cheẽ eã ño co re”, i mose co libro resenda je, ñquĩ abe ra Dios mbasi tuchi. Ñquĩ nda Dios mingo bei eã nguécuaa.

²⁰ Jesucristo cheẽ ño ã nde: —Achu jei ra se, i equia co. Amén. Echu cote, Jesucristo.

²¹ Jesucristo rei nandererrecua. Sã uturã mondo tuchi jêje. Amén.